





北京大學《儒藏》編纂與研究中心

### 圖書在版編目(CIP)數據

儒藏. 精華編. 五六/北京大學《儒藏》編纂與研究中心編. 一北京: 北京大學出版 社,2011. 1

ISBN 978-7-301-11774-3

I. 儒··· II. 北··· III. 儒家 IV. B222

中國版本圖書館 CIP 數據核字(2011)第 011887 號

書 名: 儒藏(精華編五六)

著作責任者:北京大學《儒藏》編纂與研究中心 編

責任編輯: 黨偉龍 吴遠琴

標 準 書 號: ISBN 978-7-301-11774-3/B • 0460

出版發行:北京大學出版社

地 址:北京市海淀區成府路 205 號 100871

網 址: http://www.pup.cn

電子郵箱: dianjiwenhua@163.com

雷 話:郵購部 62752015 發行部 62750672 編輯部 62756694

出版部 62754962

印 刷 者:北京中科印刷有限公司

經 銷 者:新華書店

787 毫米×1092 毫米 16 開本 49.75 印張 480 千字

2011年1月第1版 2011年1月第1次印刷

定 價: 500.00元

未經許可,不得以任何方式複製或抄襲本書之部分或全部内容。

版權所有,侵權必究 舉報電話: 010-62752024

電子郵箱: fd@pup. pku. edu. cn

# 《儒藏》精華編第五六册

首 席 總 編 纂 季羡林

項目首席專家 湯一介

湯一介 龐

總

編

纂

本

册

主

編

毛遠明

樸

孫欽善

(按年齡排序)

安平秋

爲儒 則的典籍的叢 家經典和 中 國傳統文化以儒家思想爲中心。 反映儒家思想、體現儒家經世做人原 收書時 限自先秦至清代結束。 《儒藏

藏 的 一、《儒藏 精要 書 》精華編爲《儒藏 一 一部分,選收《儒

越南儒學者用漢文寫作的儒學著作,編爲海外文獻 以古文字書寫者 録,並注明互見。 録 四 凡單書已收 出 .部分類法分類,大類、小類基本參照《中國叢書綜 土文獻。 》和《中國古籍 三、《儒藏》精華編所收書籍,包括傳世文獻 傳世文獻按《四 人人選的 善本書目》,於個 出土文獻單列爲一 律收其釋文文本。 個人叢書或全集者,僅 庫全書 別處 總目》經史子 個部類,原件 韓國、 略 作調 日本、 存 整。 H 集 和

> 編,不改編,保持原書的完整性和 四、所收書籍 的 篇目卷次,一 獨 仍底本原貌,不 立 性

選

勘價 爲主,酌校異同。 確定内容完足、精確率 值的版本爲校本。 五、對人選 書籍進 校記力求規範、精 高的版本爲底本,精選 行簡要校勘。 出校堅持少而 煉 以對校爲主 精 以 校 有 正 校 誤

例,進行規範化 六、根據現 元行標點 標點 專名號除書名號用角號(《》) 符號用 法,結合古 籍 標 點 通

落。 外 其他 正文原已分段者,不作改動。 七、對較長的篇章,根據文字内容,適當劃分段 律 省 千字以

内

的

短

般不分段

出 及其他有關情況。 及整理時所確 介紹作者生平、該書成書背景、主要内容及影響,以 現順序前詳 八、各書卷端由整理 定的 後 略 重複 底本、校本(舉全稱後括注 出現的作者,其生平事蹟按 者撰 (寫《校 と點說 明》,簡 簡 稱 要

九、本書用繁體漢字豎排,小注 一律排爲單行

部

類。

《儒藏》精華編第五六册

經部 禮類

禮記之屬

禮記集解〔清〕孫希旦

## 禮記集解

〔清〕孫希旦 四

校 撰點

### 明

中書。 甲三名及第,授翰林院 試。 除 温 任《四庫全書》分校官。 京任職,始專治《小戴禮》,撰《禮記 等十篇。 生行 爲歎服,遂與訂交。三十四年會試,取中正 敬軒,浙江瑞安人。 九 回京,任武英殿分校官兼國史三通 州城内中山書院,家居整理 》的基礎上成《禮記集解》六十 年,因 次年撰《周禮注説》之《大祝九祭説》、《會同説 狀 回 希 鄉候缺,撰《尚 餘姚邵晉涵 旦(一七三七 積勞成疾,卒。 清乾隆二十七年(一七六二)舉 其生平主要見孫衣言《敬 聞其論經史百家滔滔不絕,大 編脩。 四十三年,應 書 一七 顧 命解》。 舊作,在《 四十 1 四),字 卷。 四 注疏駁 館 禮部 年居憂,主 三十六年,赴 纂脩官。 四 禮記注 紹 十六年 試,以 誤 榜,補授 周, . 浙 疏 江 軒 自 四 服 講 續 駁 先 鄉 號

> 名物 也。 逮也。」故貫通漢、宋,是其特點。 先王制作之意,以即乎人心之所安,則 義,而不爲詭詞 《敬軒先生行 之安,則尤篤實正大,粹然程、朱之言也。」孫 必求確有根 現。 約 蕪,掇其樞要,下及宋、元以來諸 苗、典章名物制度。 又生活於清代考據 曆算、卜筮、尤深於《三禮》。 取。 制度,考 至其闡明 孫鏘鳴《序》云:「是書首取鄭 孫 苟有未當,裁以己 希旦于書 據, 索 狀》云:「其 禮意,往復曲暢,必求即乎天理 曲 精 而 無所不窺,旁涉 論。 詳,可以 大旨在 學盛行之時,故 這在《禮記 故論者 大指 以 意。 補 經 平生爲學,一 漢 在博 謂 注 其於名物制度之詳 儒所 經, 集解》裏有 先生之言 儒之説,靡不博觀 天文、地 注、孔義, 芟其 參衆説 亦 非 未 又漢 一苟爲 講 及 輿、鐘 究文字 宗 禮,其 以以 儒 異 充 而 程、朱 所 明 衣 人 同 分體 深 於 古 不 言 明 in 繁 者 訓

己見,以顯 周 禮 是書博采漢、唐以降諸家,以 儀 一家之言。 禮 》及《禮 記 對鄭箋、 相 關 文字 孔 疏 求 異同 詳 賅 加 備 辨 之處,每 而 别 又 時 體 引 出 現

校

點

説

明

甫 了「以 作者態度謹嚴,用力專精,其説頗爲後學者採 用之。」可見爲釋名物,雖莊子之文亦加引用。 遊》:「宋人資章甫而 至如《儒行》解「孔子長居宋,冠章甫之冠」云:「章 與笙以三篇爲三終,間歌與合樂皆以六篇爲三終, 之説,則 蓋間歌則以二篇相間爲一終,合樂則以二篇相合爲 賈疏……與孔疏異,朱子是賈氏而非孔疏。 見其異,如《鄉 解》,即爲代表,若有難以苟同之處,必謹慎據理以 解説常 殷 終,若如賈氏,則合樂爲六終矣。」對於其他諸家 玄冠 經注經」 以之爲旨歸、《大學》、《中庸》全採朱熹《集 兼取 之名,宋人冠之。」則引《莊子 其長,力辨 飲酒 的 特 色。 義》解「升歌三終」云: 適諸越,越人斷髮文身,無所 其 由 非,總以 作 者學 宗程、朱,於 明經義 爲趨 「《儀禮 竊謂歌 用。 由 消 義 歸。 於 遥 理

由云:「原稿本五十卷,仲父止 序》、項琪《跋 宋慈抱《兩 本書卷次、《敬軒先生行狀》、孫治讓《温州 》均爲六十一卷。 浙 著 述考》均 爲五十 庵先生校刊時析 孫治讓 卷。 闡明其 孫 鏘 經 間 緣 籍 爲 鳴

檢視,此本卷十四以前 共十七册,《北京大學圖 京大學圖書館 文庫》又據孫氏盤谷草堂刻 據《書目答問補正》,尚有蘇州新刻本、《永嘉叢書 方宗誠批注本、福建省圖 生行狀》。 《續脩四庫全書》據以影印,但未录孫 草堂刻本《禮記集解》六十一卷,是本書最早 十年(一八六〇)至同治七年(一八六八)孫 二十六一四十一),當是本書的最早文本。清咸豐 五 鳴校正的稿本,即孫詒讓 六十 本,並非另雕新版。 本二種。 本,書前有孫鏘鳴《序》和孫衣言《敬軒先生行狀》, 書版本: 一卷(卷 卷。 前者遍查未見,後者即盤谷草堂本的 一一十四、十八一十九、二十一一二十三、 温州市圖 此系統重要的版本有安徽省文史館藏 今以五十卷著於録,從其朔也。」 藏有「舊鈔本」《禮 書館今藏《禮 九三〇年 書館 版心處皆有書名、卷次、 書館藏 著録的「原稿本」,存三十 本排印 藏善本書目》著録。 清 記集解》六十一卷, 商務印 記集解》爲 陳 出 寶璐校本。 版。 衣言《敬 官館《萬 此 氏 清 關 外,北 覆印 軒 的 盤 孫鏘 於本 頁 有 另 先 刻 谷 經 清

刻本出版沈嘯寰、王星賢校點本。 整谷草堂刻本頗異,由其校語可知爲稿本之鈔本, 盤谷草堂刻本頗異,由其校語可知爲稿本之鈔本,

影印文淵閣四庫全書本,簡稱四庫本《某某》書。 成果,必要時還參考相關古籍以見異同,其版本爲 用阮刻本十三經注疏《禮記注疏》(以下簡稱「《禮記 用阮刻本十三經注疏《禮記注疏》(以下簡稱「《禮記 用阮刻本十三經注疏《禮記注疏》(以下簡稱「《禮記 用阮刻本十三經注疏《禮記注疏》(以下簡稱「《禮記 以果,必要時還參考相關古籍以見異同,其版本爲 以果,必要時還參考相關古籍以見異同,其版本爲 當記 之。

校點者 何錫光

湖、几 我家敬 之書 孫 H 禮尤深,著《禮 第,爲學一 援据 窺,旁涉天官、地 樂其簡易,遂 瀚 裕昆 一,鏘鳴 未易徧觀。 綜 多 小 111 疎 軒 羅 發篋出之,則纍然巨編。 戴之學,鄭注、孔 自粤 兩 禮 最 先生,乾隆戊戌廷 宗程、朱,研精覃思,於書無所不 先生 博, 右歸,被朝旨治團 意則發明未至,學者弗心饜 列學官,至今承用,然於禮制 記 自元雲莊陳氏《集説》出,明 而 屢 興、鍾 集 無 謀 解》六十一 所 鋟 律、曆算,而 折 版 義 衷,黄東 而 而 對以 未果。 外,宋櫟 卷。 於鄉、從其 首十卷,几 第三人及 余舅 致 發 咸 力 以 齋 豐癸 於三 氏 爲 衛 也 八曾 鴈 則 浩 氏

> 度之詳 觀約 所聞 焉。 掇其樞要,下及宋、元以來諸儒之説,靡不博 始 庚申 莫決從違。 者幾滿,遂爲之參互考訂,逾歲 黏 乙紛 山 四十九篇,先王之遺制,聖賢之格言,賴是傳 逐句,丹黄已徧,讐勘駁正之説,劄記於簡端 三禮注疏本及衛氏《集説》於裕昆所,皆逐 成 綴 先生所精校,録藏 取 糾 ,集貲鳩工,藉同人之力爲多。 ,其旨不能盡 六月開雕,中更寇亂,迄同 歲 而雜出於漢儒之所輯,去聖已遠,各記 心,苟有 ,必求確有根據,而大旨在以經注經, ,蓋稿雖屢易,而增改尚多,其間 久脱落, 是書首取鄭注、孔義,芟其繁蕪 未當 往 一裁以 一,於是訓詁家紛紜聚訟 往 其副,餘 而 己 是。 意。 則 乃索先生所 朱墨雜糅,塗 其於名物制 治戊辰 而 清本定。 夫 《禮 三月 剪 字 紙

原無題,爲後加。

序

### 敬軒先生行狀

翰林院 軒。 祖、父皆贈徵 祖 七 家,大抵皆孫氏,土人呼之曰 、世矣。 都 德脩,妣 鄉鄉 先 先生 編 世 日 脩 有 孫 某氏 集 諱 氏, ,妣皆孺 仕 善,里 桐 郎、内閣 諱 彪 父珠 者,自 希 日 人。 日 昭 ,妣某氏。 中書 德。 蓋自徙瑞安至先生 永 字 嘉徙居 紹 力加加 桐田 其所 周 先生即 贈 了實桐: 自 居 瑞 文林 數 號 安二 十百 日 郎 貴, 乾 + 敬

以 端 神 老學 拊 立 其背 先生幼 不 木 視。 。唱出 遇,祈夢於 有 讀 書三四 異 心 稟,方垂髫,見群 肝紙上,文林君愕然弗怡 聖 過即 井 山之許 成 誦 兒嬉 旌 初,文林君 陽 祠 戲 夢 獨

> 生讀。 别爲 榜者 几 浙江 東皋先 書,大學士金壇于文襄公爲總裁 服除,充武英殿分校官、國史三通 第三賜及第,授翰林 卯,補授中書。 乾隆以前舊制 官,以父憂歸。 爲古作者。 時 紙者子也 庫全書第一 先生方在 鄉試。 ,會試榜出 生視 年十二,補縣學生。後數年,諸 榜引見,以内閣 ,此欲我成此兒耳。」輙 己丑 時先 浙 娠,及生 部成,議 學, 也。 服除 ,主司擇其當中 四庫全書館開,先生爲 會試 生年甫及冠。 少許可,獨 而先生引見得 ,中戊戌 院 而 ,●挑取 敘加 中書、國子監學正 編 穎 脩。 異 科 絶 奇先生 中正榜。 級。 復 進 而限於額 乾隆壬午,舉 人, 以 士,以 館纂脩官 以 中 閉 初 乃 母 書。 王應 脩 以 户 悟 憂 中 分校 城 課 几 謂 日 甲 用, 歸 辛 庫 竇 先

「己」,原誤作「丁」,今改。

手訂 生 其 加 譌 玉 已 明 釐 舛 U 海 病 年, 定。 也 葉 隆 徵 所採 書成,天子以 禮 文襄 引 今《欽定契丹國志 所 繁 胡 遂並 爲《 博 安國 契 俾 ^ 丹 大金 之論多 先 爲 國志 生 善。 車 或 》體 一謬説 任 志 勅 世莫知爲 校 部 例 **>** 以 議 勘 混 詔 屬 敘 淆 館 先 至 先生 臣 書 而 生。 是 先 重 法

館者遇 之傾 弟子 之役 能 林 殊 天子屢下詔敦趣,先生又 不自 行。 觀平,壬 盡 講 5,歸 先生素清 生尤悲之。 覺也。 學,至於場 所 比冬初,氣益逆,喘急,遂不起,乾隆甲 則從 食少 疑 辰 必必 進 事二志 而 已 羸 士,鄆 就 而 事繁,或謂先生毋過 既 其秋 屋 先 林 文字, 爲 生質 城令露之子,未 氏女卒於鄆城。 而《 校 遂病 纂官 在繕 正。 几 有 庫 痢,及痢 來問 又以 書所 全書 日 有 分校。 先 其 『尚未 國 已,猶 一勞,先 女許、 嫁 生 間 史三 爲 必 而 成 門 可 缗 字 牛 爲 通

> 館,驟 之,而先生卒矣。 名動海内,天子、宰相皆奇其才,方思有 逾 辰 白 + 年 以文章學術 月九 而 先 日 生 也 始 是殆先 折服其輩行。 爲 我瑞 登 安自 朝官,遂 生之命 國 也 當是時 由 朝 歟 甲 至 科 乾 先 以 隆 人 生 用 詞 時

此。 所對 先生遇 博覽, 好, 愛。 不 研 誠。 見先生退然居人後, 家,先生滔滔 究。 擇 而 策讀 地 居家 持己甚嚴 先生自少以 及榜發,同 自天文、地輿、曆算、卜筮之書,無 遇人之急,常務竭其 於舟中, 爲舉人 而 之,日 不問 生也 不 一。」于文襄主戊 時 生 年 初 可 而 善事 餘 「使他 産 未 生大集, 讌主 窮, 與 知 姚 即手 及 人甚寬厚,務在 父母 乃大歎 先 邵 在 人 生。 晉涵 官, 招使前,以語諸 檢 力。 稱,與弟希 書爲 戌 無 服,曰: 及 司。 博 其 禮 與論 車 之,不 闡 聞 爲 馬 學, 文襄至 1: 得 經史百 衣 相 奭 也 才 能 所 務 接 服 盡 有 固 不 之 進 牛 與 在 其

士 日 : 諸 君 皆 師 事 可 也 0 其 爲 當 時 推 重

如此。

清 非 除 以 流 又 也 實 致 在 雖 生絶不一 會 生 一翰林, 岭 非 彌 X 口 體 爲 公費錢,先生輙以在假,辭不受,同 密 試 翰林 静 可 欲 占 前卒數月,當爲 外 難 先 諸 友 自 微 捷,主人閒暇且安居」之語。 以 爲 身。 不 矜惜 生既以文學爲諸公貴人所慕嚮,而 大學 往。 觀 得 詩,曰: 其於程、朱之説,尤篤信之, 見者皆知爲 某 其 當日: 病 不 士和 欲 見其 所得矣。 裹静言半生 遇鄉 授 苟 人 珅慕其名,使人喻意指,先 以 趨 面 會試, 學道 《觀心》之詩,有「客感 禽相去只幾希,天 關 勢 端 利。 先生 既 節,先生笑弗受。 而 輙 事 卧 以 前 在 ,茫茫 雖 病 爲名, 期 内 瘦弱 或 杜 閣 四 史 及疾 門 時 干 吾 館 而 館 而 謝 理 所 者皆 務 將 氣 九 猶 亟 横 及 年 耻 在 月 應 平.

> 若自陶 也。 之意 精 故 指 過來矣。」又自謂 當,賴以 家之書,推 己亥居憂,主中 於三禮。 力,然自少喜金正 而 曰 身 : 詳 論 在博參衆説以明古義,而 親 以即 者謂 爲諸 然先生常自言「讀《禮經》當 我平生它著述不敢自 口 庵 行 以 己意爲 之一, 辛卯 先生之言禮,其 入則當早得 生 乎人心之所安, 補 廣 時 漢 其説 以 儒 山 之詁釋,謂之《注 善 則其著 後始專治《小 其文過羅文止,但不及章 所 書院 希、 ,爲《集 舉 未 子 科 陳大士 及; 文 書之旨, 乃 矣。 解》五 於名 則 益 而 信 頗 不 其 故 又 取 深 戴》,注説 自 物 爲 於諸 至 漢 宋 + 明 如 喜 蓋 制 詭 不 卷。 疏 制 目 儒 先 元 利 詞 可 度 駁 以 嘗 經 親 所 王 義 科舉 見 曲論 考 誤 見之 制 尤 自 不 其 來 則 有 逮 作 大 深 大 透

❶ 「目」,原本作「自」,今據《萬有文庫》本改。

鏘 教諭 風。 時文,太平門人黄河清刻之,予舅氏項 集》若干卷,而 論著有《尚 可卒業,而 禮 鳴 頃 又增刻之。 今他文多散軼,而詩特爲世所傳 「若四分官書 注 始刻之, 距先生之卒八十年矣。 既 成 書 疾病不及爲矣,非可惜歟!」其 方欲 顧 詩 命解》一卷、《求放心 《禮》注及《顧 尤 事畢 治 清遠,有王 周 丁,再得 官 從事二十 儀 一維、孟 命解》則 禮 **\*** 誦 浩 齋 謂 年 先 几 詩 予 然 門 牛 弟 其 之 Ш 文 他 當 人

首

縣 亦 學生 好 而相去約十里。 ?學,通 予居邑二十五都潘 一,次某某,皆端謹守其家法 曆 算家言。 予族望富春, 玄孫三: ●長 埭 ,與先生皆集 而 日 桐 高 善鄉 田 紱 孫

鼎

廩

生,有文而早卒。

曾孫一,裕昆,郡庠生,

子

一,涑

歲貢

生,候選教諭。

孫一,松承

邑

薛

有

九。

娶同

邑林氏,鄆城女弟也

封

孺

. [JU]

陳

承

來若同族云。 議 後 氏 然莫 望 府君,及裕昆 樂 安, 能 得其 言 譜 與予兄弟,皆相親愛,歲 詳 諜 也。 者 以 而 謂 先生之子 皆 出 田 敬 涑 仲 與 時 先 完 通 之

四

於東 考諸 人之治。 固守,而後知今人之心可即於古人之心。 永嘉之學必 立 聞 經 君 於 舉尤號 於新 鄉 Ш 其 後 程、吕遺言;鄭景 昔水心葉氏言:「吾鄉 先 浮 始 也。 安、 沚 輩之遺 故永嘉之學,必彌 陳 就省 而 精 薛 東 緯其 密,而後知古人之治可措於今 士 陽間 能 書,蓋 以禦 隆 卓然自成爲 終也。」予 憤 雖 物 望 發 吾 百 欲 出 昭 鄉 世後 者,周 ,明見天理,篤 曠 嘗 綸 儒 之學,自周 永嘉之學,以 術 由 以 不能 獨 之 通 水 作於前 究 世 興,雖肇 心之言, 强爲 體 L 變者 統 恭 故 鄭 信 叔

生於乾隆丙辰十二月二十日,其卒也年僅

玄」原避清 康熙諱缺笔,今回改。 下做此,不出 校

餘,以迄於明之黄文簡淮、張吉士文選,而 輊 無雜於陸學,而永嘉先生之風微矣。 參政喬、王副 事朱子,以傳新安之學,元儒史伯 者,必推 乾、熙諸儒。 使 叔 果當姚江方熾之時,不能 至葉文脩、陳潛 璿實 其 室 項 師 緒

行,其 乎? 者鮮。 能盡 矣。 行先生之行者。 年論定,如先生者可謂行 今,非水心所謂「彌綸以通世變」者歟? 謂「兢省以禦物欲」者歟? 其明庶物、知 綜其生平論之,其敦内行,厲名節,非水 衰熄之時,獨能奮其孤踨,仰追逸軌。 徒以年未及中壽,官不過翰林,其書未 具,而其學亦未有所施,是以後世知之 豈其遂替矣乎? 先生之生,在南宋六百年之後,當學術 可無辭以述之乎? 至於吾鄉之人,亦鮮能志先生之志、 永嘉先輩之學,其將誰屬矣 然則先生之遺言往 又以先生之文行, 方景望、學媲 艮 i 閒 齋 古 所 嘗 百

於國史宜在儒林,故不揣謭陋,敘而論之,以

俟後之人有可採焉。

同治十年辛未正月,同里後學孫衣言(42)才百岁黑

謹狀

月令第六之一 四二五	曲禮下第二之二 一四六
<b>禮記卷十五</b> 四二五	<b>禮記卷六</b> 一四六
王制第五之三 三九四	曲禮下第二之一 一〇九
<b>禮記卷十四</b> 三九四	禮記卷五 一〇九
王制第五之二 三五九	曲禮上第一之四 八三
<b>禮記卷十三</b> 三五九	<b>禮記卷四</b> ··························· 八三
王制第五之一 三二八	曲禮上第一之三 五三
<b>禮記卷十二</b> 三二八	<b>禮記卷三</b> ······ 五三
檀弓下第四之二 二九四	曲禮上第一之二 二八
<b>禮記卷十一</b>	<b>禮記卷二</b> ······· 二八
檀弓下第四之一 二五七	曲禮上第一之一 一
<b>禮記卷十</b> 二五七	禮記卷一 一
檀弓上第三之三 二三〇	敬軒先生行狀 一
禮記卷九 二三〇	序 
檀弓上第三之二 二〇〇	校點説明 一
<b>禮記卷八</b> 二〇〇	野山 一
檀弓上第三之一 一七三	目録
<b>禮記卷七</b> 一七三	

社言 身 角	
<b>禮記卷十六</b> 四六七	禮記卷二十五 七一〇
月令第六之二 四六七	郊特牲第十一之一 七一〇
禮記卷十七 四九三	禮記卷二十六 七四一
月令第六之三 四九三	郊特牲第十一之二 七四一
<b>禮記卷十八</b> 五三四	<b>禮記卷二十七</b> 七六七
曾子問第七之一 五三四	内則第十二之一 七六七
<b>禮記卷十九</b> 五五六	<b>禮記卷二十八</b> 七九九
曾子問第七之二 五五六	内則第十二之二 七九九
<b>禮記卷二十</b> 五八一	禮記卷二十九 八二〇
文王世子第八 五八一	玉藻第十三之一 八二〇
<b>禮記卷二十一</b> 六一三	禮記卷三十 八五七
禮運第九之一 六一三	玉藻第十三之二 八五七
<b>禮記卷二十二</b> 六三八	禮記卷三十一 八八九
禮運第九之二 六三八	明堂位第十四 八八九
禮記卷二十三 六六〇	禮記卷三十二 九一〇
禮器第十之一 六六〇	喪服小記第十五之一 九一〇
<b>禮記卷二十四</b> 六八四	<b>禮記卷三十三</b> 九三二
禮器第十之二 六八四	喪服小記第十五之二 九三二

目録	雜記下第二十一之二 一一七一	禮記卷四十二 ······· 一一七一	雜記下第二十一之一 一一四七	<b>禮記卷四十一</b> 一一四七	雜記上第二十之二 一一二四	<b>禮記卷四十</b> 一一二四	雜記上第二十之一	禮記卷三十九	樂記第十九之二 一〇六二	<b>禮記卷三十八</b> 一〇六二	樂記第十九之一 一〇三二	<b>禮記卷三十七 一〇三二</b>	學記第十八 一〇一二	禮記卷三十六 ············ 一〇一二	少儀第十七 九七四	<b>禮記卷三十五</b>	大傳第十六 九五五	<b>禮記卷三十四</b>
11	坊記第三十 一三五五	<b>禮記卷五十</b> 一三五五	孔子閒居第二十九 一三四九	仲尼燕居第二十八 一三四一	禮記卷四十九 一三四一	哀公問第二十七 一三三二	經解第二十六 一三二八	禮記卷四十八 ·················· 一三二八	祭統第二十五 一三一〇	禮記卷四十七   三   〇	祭義第二十四 ················· 一二八○	禮記卷四十六 一二八〇	祭法第二十三 一二六三	禮記卷四十五 一二六三	喪大記第二十二之二 一二二八	<b>禮記卷四十四</b> 一二二八	喪大記第二十二之一 一一九五	<b>禮記卷四十三</b> 一一九五

儒行第四十一 一四七五	<b>禮記卷五十七</b> 一四七五	投壺第四十 一四六〇	深衣第三十九 一四五四	<b>禮記卷五十六</b> 一四五四	三年問第三十八 一四四九	間傳第三十七 一四四〇	<b>禮記卷五十五 一四四〇</b>	服問第三十六 一四三〇	問喪第三十五 一四二四	<b>禮記卷五十四</b> ··················· 一四二四	奔喪第三十四 一四一〇	禮記卷五十三 一四一〇	緇衣第三十三 一三九八	禮記卷五十二 一三九八	表記第三十二 一三七三	<b>禮記卷五十一</b> 一三七三	中庸第三十一 一三七二
		· 1000000000000000000000000000000000000	<b>項琪跋</b> 一五六五	顧命解跋	命解	喪服四制第四十九 一五四九	聘義第四十八 一五三六	禮記卷六十一 一五三六	燕義第四十七 一五二九	射義第四十六 一五一六	<b>禮記卷六十</b> 一五一六	鄉飲酒義第四十五 一五〇三	<b>禮記卷五十九</b> 一五〇三	<b>昏義第四十四 一四九四</b>	冠義第四十三 一四八九	禮記卷五十八 一四八九	大學第四十二 一四八八

國史館纂脩孫希旦集知賜進士及第翰林院編

禮上第一之一《别録》屬《制度》。國史館纂脩孫

曲

《曲禮 之也。 《曲禮》者,古《禮》篇之名。《禮記》多以簡 故 致 曲 端之語名篇,此篇名《曲禮》者,以篇 應對、進退之法,蓋 敬」之一言,則尤貫徹 朱子謂爲小學之支與流裔。 養 折,而上篇尤致詳於言語、飲食、灑 乎其内,循乎其 》,非是。此篇所記,多禮文之細 鄭氏 謂「篇中記五禮之事」,故 一將使學者謹乎其 末,以漸及乎其 乎精粗内 而首 外,而 公外,以 篇「毋 首 本。 埽、 微 名 引

> 有委曲 吉、凶。』蓋以《儀禮》爲經禮也。 『《周禮》三百,特官名耳。 禮》冠、昏、吉、凶,其中書儀三千,❶以其 禮即《周禮》三百 《中庸》以經禮爲禮儀。 此。 學、大學皆當 愚 萬民,保氏掌之以教國子者,亦此書也。」 事,小史讀之以喻衆,而鄉大夫受之以 之目也。先王之世,二者蓋皆有 蒼葉夢得曰:『經禮,制之凡也。 有司,祭祀、朝覲、會同則大史執之以 意 ,以簡策重大故也。 ~ 禮 〇朱子曰:「《禮器》作經禮、曲禮 威儀,故有二名。』獨臣 》篇三名、儀禮》一、經禮》二、禮儀 以 此 六十官, 曲禮即 爲 本 後凡分上下篇者放 鄭玄等皆曰: 者 也。 經禮 篇 爲 而 曲禮,文 書,藏 費 曰: 分上下 近 冠 今《 世栝 、香、 「經 一,而 儀 涖 於

<sup>「</sup>書」、朱熹四庫本《儀禮經傳通解》作「事」。

之數。 數官 古 事 則》、《玉藻》、《弟子職》篇所記事親、事 禮之微 大率且以春官所領五禮之目約之,則其 史氏記》數十篇,及河 有古經增多三十九篇 廟 逸見於他書者,猶有《投壺》、《奔 以《曲禮》名之也。 燕、射、朝、聘自爲《經禮》大目,亦不容專 爲禮設 蓋 當當 一周 》、《釁廟》、《中霤》等篇,其不可見者,又 下 至 通 事 有 禮 禮 文小 也。 行 五 至 無 器 百餘 乃 百餘篇,儻或猶有 於《儀禮 不 爲 事 其中或以 節 該 制 勝 篇 ,如今《 攝 治 亦難計 亡 禮 立法、 諸 》,則其 疑 今《儀禮》十七篇,而 儒 典 矣。 ,而《明堂陰陽》、《王 一官兼掌衆禮,或 曲禮》、《 間 其官數以充《禮》篇 設 固 之説,瓚、 獻 官 在 所 冠、昏、喪、祭、 Ŧ. 逸在 其 分 謂 所 少 職 中 曲 輯 喪 葉 其 之 禮 禮樂古 而 ~》、《遷 》、《内 間 書 爲 則 非 广,於 長 皆 初 以 其 專

其説誤 之類 曲 鄉飲 昏禮之六禮 禮 禮其常,曲 以 《經禮》之中者,其篇之全數雖 宗 子之所辨論者至矣。 中。『坐如尸,立如齊』,『毋放飯 用 石林葉氏雖 條而析之,亦應不下三千有餘矣。 在』之類,皆禮之變,而未嘗不在《經禮》篇 起居、飲食、 廟、 則 經禮爲常禮,曲 禮之合,即爲經 酒」、『殺牲 ~,雖在 酒禮之獻賓、獻介、獻衆賓之類皆是 經 宫室、衣 也。 禮 禮其變」。 言「經禮制之凡,曲禮文之目」,而 中之儀文 《曲禮》之中, 容 , 士相見之授贄、反見、還 而 冠、 貌 愚 有 則如《冠禮》之『不 謂 折 禮 禮 車 辭 曲 俎」,若『孤子冠,母 爲變禮 旗 氣 蓋經禮 折 經禮、: 之等 之法 經禮之分,即 而不得 如 即儀 曲 冠 藍 凡 制 不可 禮 謂 禮 田 所 器 毋 之三 禮也 之説,朱 吕 之變禮 或者 醴 以 氏 亦 知, 流 備 爲 云「經 之説 而 曲 加 歠 物、 不 車 曲 平 醮

人之事 事 爲《檀弓》,不可以《檀弓》一篇皆 皆曲禮之言,猶《檀弓》首章載檀弓事 則特以篇首引《曲禮》而名之,不可 文與《儀禮》不類 禮》中之曲折,而此所引「毋不敬」以下,其 之,而可補《禮經》之所未詳者也 禮》、《少儀》、《内則》、《玉藻》, 禮 如「坐如尸 所引之《曲 物,則又皆周末儒者各以其所傳習者記 書》之《弟子職》,或詳其儀文,或記 至於三千篇之多也。 而 (禮器))所言之曲 以 父母》篇; 相十之數言之, 曲 也。 禮之所以 , 立如齊」,見於《大戴禮 「禮》,則別爲古《禮》篇之名 蓋此篇 示 也。 登高,不苟訾, 禮。 爲三千者, 所言多雜見於他 而非别 至《禮記》中所載《曲 而 蓋曲禮三千,即《儀 此篇之爲《曲禮 有《曲》 蓋 據 與 不苟 爲 經禮 (夫《管] 禮》之書 若此 謂 • 檀 笑」, 曾子 其 書 此篇 弓一 而 三百 非 篇 名 名 子

内有一 哉。 人言莫也。』按『毋』字與父『母』字不同 曲禮》曰:  $\equiv$ 篇,「道德仁義 之《曲禮》,一 此 事君三諫 爲先後,然其言「君子抱孫 及《韓詩 堂,聲必揚,將入户,視必 崩」至「庶 侯失地名」之類,又皆《春秋公羊》之説,知 以明禮」,見賈 見於《大戴 《釋文》: 非《曲禮》之完篇明矣。 禮》曰」,而「前 畫,象有姦之形,禁止之,勿令姦。 爲《儀禮》中之曲折, 外傳》。 一毋 毋不敬,儼若思,安定辭,安民 不從則去,「天子未 人 音無。 禮 則《禮記》中之《曲禮》也。 日 誼《 「非禮不成」至「撙 死」,見《大 曾 《説文》云:『止之詞。 雖 有 新書 子 其 車 本 與諸 騎」又爲 孝 • 下」,見《列 禮》 `》篇; 俗俗 書所出 不抱子」,别引 戴 然則 除喪稱名,諸 則古《 古人云毋,猶今 禮 本多亂, 》篇;「: 戰 國 其字從 曲禮 未知 節 天子日 女傳》 禮 四 時 將 退 》篇 孰 讓 有

朱點 並 嚴,魚檢反,本亦作「儼」,同。 一母」字 以 作 無 音 非 也。 思,如字,徐息嗣反。」〇音義 後 放 此 疑 者 特 復 音 之

用《釋文》,有不同者及補音者 齊嚴 所計 孔 坐思 鄭 儼若思,敬者之貌 「主一之謂敬,無 氏 氏 肅, 慮,則其形狀必端慤也 曰 : ,貌必儼然。 曰:「禮主於敬。 朱子 則心自一,一 「若,如 Ĭ 「毋不敬, 也。 適之謂一。」又曰"「 也。 安定辭,審言 思 别 則自 儼, 安定 計 出於下。 是統 矜莊 慮 辭,敬者之言 無 世 言主宰處。 非 貌。 語 程 僻之干 人 子 也 但 人之 日 心 整 有

> 敬」。 三百, 百 也 姓 ^ 即 論 曲 語 此 禮 》言「脩 三千, 意 也 0 己 言 以 范 以 敬 氏 ۰, 蔽 祖 之, 而 禹 能 日 曰『毋 安 人、 經 禮 不 安

反。 盧植、 敖不 釋文》: 樂、舊音洛、皇侃音岳。 馬融、王肅並直良反。 可 「敖,五報反,王肅五高反,遨遊也。 長,欲 不可從,志 極,如字,皇紀力反。」 欲,如字,一 不 可 滿 音 樂不 I 喻。 長,丁丈反 從, 可 極 用

於性 私,志滿 情學 則 問 招 損 之大者,克己者之所 樂 極 則 必淫。 四者 當 皆害 力

賢者狎 而 戒也。 知 其 善。 而 敬之,畏 積 而 能散,安安而 而 愛之。 愛而 能 遷

知

其

惡,

所畏敬 朱子曰 以 雖 褻 則 而 「人之常情,與人 愛衰。 不慢; 畏而愛之,是以貌恭而 惟賢者乃能 親 狎 狎 則 而 敬之,是 敬 %弛,有 情

不敬

而謹於言貌

如

此,則其效至於安民

也。

安者氣之和,定者理之確,人能

事

無

也

儼若

思,謂容貌端嚴

儼

然若

有

所

思

應

事

接

物,

無

時

事之可

以

不

主

乎

此

也。

安民哉,敬者之效也。」

愚謂:

人之

治其身心,莫切乎敬,自不睹

不聞以

至於

之

矜己淩物謂之敖。

敖者德之凶,欲者情

溺志。 行此,而學者之所當自勉也。 於所安,而能遷以從善,則不至於懷安 能散以與人,則不至於專利而害義。 之,則有事賢友仁之益。財物之積聚,而 狎而敬之,則 畏,謂德位之可嚴憚者。安安,謂心安於 親 所安,凡身之所習,事之所便者,皆是也。 而 自有公論,惟賢者存 也。 廢彼也。」 六者皆脩身進德之事,惟賢者爲 己之愛憎,或出 愚謂:狎, 無玩人喪德之失。 心中正 私 心,而人之善惡, 謂所親習之人。 ,乃能不以此 畏而愛 心安 能 而

多。《釋文》:「難,乃旦反。很,胡懇反。勝,舒證反。臨財毋苟得,臨難毋苟免,很毋求勝,分毋求

分,扶問反。」

者,血氣之争。毋求勝,爲其傷和,而且將傷義也。毋求多,爲傷平也。」 愚謂:很鄭氏曰:「毋苟得,爲傷廉也。毋苟免,爲

疑事毋質,直而勿有。 有忘身及親之禍也。

是也。 己俱疑 當稱 鄭氏 質,即《少儀》所謂『毋身質言語』也 之,專事强辨,不然,則是以身質言語矣。」 勿有,謂陳我所見,聽彼決擇,不可據 勿爲己 己若不疑,仍須謙退,稱師友所説以正之, 終不然,則傷知。 愚 師 曰:「質,成也。 謂: 有 而來問己,己亦疑,則毋得成之, 友 據 而正之,謙 此 義 而有之,若子游以禮許人 也。 直,正也。 彼己俱疑而己成之, 也。」 朱子曰:「疑 孔氏 己若不疑,則 曰:「彼 事 直 而 有 而

發語解,舊讀爲「丈夫」之夫,非是。也。齊,側皆反,本亦作「齋」,音同。」○今按:夫,當音扶,若夫坐如尸,立如齊。《釋文》:「夫,方于反,丈夫

鄭氏曰:「坐如尸,視貌正。立如齊,磬且

説爲 間 法。」 神位 則 大 受命然也。 之時,主人磬折致恭,而僾見、愾 祭前言。 聽 曰:「祭之日,爲尸者有坐而 食間。』是祭 如祭前之齊,磬折屈身。 案《士虞禮》云: 處必當如尸之坐。 無尸 爲 以以 事 也 長。 齊 而 法 者,主人哭,出,復位,祝闔牖 釋 坐必 致其敬 愚 嚴 齊 朱 注 謂: 祭者有 肅, 又注以磬且 祭時有 子 養,亦 矜 謂 疏引《士虞禮》「祝闔户,如 時主人有聽法。」 莊 티 : 祭 而 者也。 齊,鄭氏 祀 惰 非是。 立無坐,故立言如齊, 立 劉 慢邪 言人雖不 時。」 人之立時 而 君子之坐立常如此 聽言如齊、蓋謂祭 以 無 原父云: 僻之氣 尸之坐,齊之立 坐, 祭 孔 時言,孔氏 無立 爲 雖 氏 故 尸 不 日 立 無 , 所 聞, 一,故坐 齊,亦 大 吴氏 自 以 户,如 齊 如 尸 而 在 戴 食 將 祀 居 人 注 以 爲 以 澄 當 坐

> 禮 夫之事,誤矣。」」 失於删去。 子之道也。 言,言必齊色,此成人之善者也,未得 父母安之。 • 曾子事 鄭 若夫 此篇 父 氏 母 不 蓋 坐 **>** 篇 知其然,乃謂二句爲丈 一如尸 取彼文,而若夫二字, 日 : ), 立 如 孝 子 齊,弗訊 惟 巧 變, 爲人 不 故

者也。 鄭氏 宜 然事變不 得此意。」 彪 則相授受之類。 謂事之所宜,若男女授受不親 以 ,或隨乎他國之俗,又有貴乎變而 日: 「 吉服 弔齊,齊 事 ,禮俗不同,故或權 愚謂: 不可常也。」 俗,謂: 、裴昭 禮之爲 彼 明 國之俗,若 以 體 朱子曰: 凶 固 · 而 服 乎 有 弔 祭 定, 魏, 時之 魏 與 「宜 通 李

非也。《釋文》:「夫,音扶,凡發語之端皆然,後放此。夫禮者,所以定親疏,決嫌疑,别同異,明是

禮從宜,使從俗。《釋文》:「使,色吏反。」

異者 亦 該 此 證,而皇氏具引,今亦略之。」 愚謂 爲是,失禮爲非,若主人未小斂,子游裼裘 請 服 同異、是非之屬,在禮甚 世母、叔母及子婦是也。 是決嫌也。孔子之喪,門人疑所服,子貢 疑 孔 而弔是也,曾子襲裘而 大重,降之則有舅姑爲婦之嫌,故全不服, 者 可 其 相淆謂之嫌,是非 喪夫子若喪父而無服,是決疑也。 麗者爲親,小功以下服精者爲疏。 氏 以類推矣。 廣,孔氏各舉 ,本同今異,姑姊妹是也,本異今同 ,若妾爲女君 曰:「定親疏者,五服之内,大功以上 期,女君爲妾,若報之則 喪禮 相似謂之疑。 吊非 明是非者,得禮 衆,各舉一事爲 端以言之,其餘 也。 但嫌 四者 别同 決嫌 疑 所 彼

禮

不踰

節,

不侵侮,不

好狎。《

釋文》:

好,

呼

不受也。後皆放此。 反。辭,本又作「詞」,同。《説文》以詞爲「言詞」之字。 於多。」 鄭氏 佞 費,爲傷信。」 媚以 曰:「不 求説於人也。 妄説人,爲近 費,芳味反。」 朱子曰 : 辭達 禮有常度,不 佞 則 媚 也。 止 不貴 不 辭 爲 辭

報反。」 鄭氏 日 自卑而尊人,故不得侵犯侮慢於人也。」 下,下不僭上,故不踰越節度。 「禮者所以辨尊卑,别 曰:「不好狎, 爲 傷 敬 等級,使上 也。」 禮主於敬 孔 不 逼 氏

則不敬。 恭敬退讓,踰節則上僭,侵侮則不讓,好狎 朱子曰

:「狎,謂親

褻。」

愚

謂

禮主於

《釋文》:「行,下孟反。」

脩身踐言,謂之善行。

行脩言道,禮之質也。

禮記卷一

禮

不

妄説

人,不辭費。

《釋文》:

「説,音悦,又始悦

七

所言 孔氏 鄭 言皆合道矣。 忠信之行脩、言合於仁義之道、則 本,所謂「忠信之人可以學禮」也 言合於道。 氏 也。 也。」 曰:「禮以忠信仁義爲本,禮爲文飾。 日 行顧言則行無不脩矣,言顧 踐, 質,本也,禮爲之文飾 愚謂:脩身踐言,脩身 人之言行篤實,乃行 履 也, 言履 而 行之。 可 耳。 以 言道 禮之 與 行 践 禮 則 其

「取」字並如字。
字,謂取師之道。取人,如字,謂制師使從己。」○今按:二教。《釋文》:「取於,舊七樹反,謂趣就師求道也,皇如教。《釋文》:「取於,舊七樹反,謂趣就師求道也,皇如禮聞取於人,不聞取人。 禮聞來學,不聞往

來學。 鄭氏 子有教無類,然必彼有求道之心,而後我 人不來而我引取之也 曰:「取於人者 日 -不聞取人,故無 一禮不 爲 往 人所 教, 往教。」 尊道 禮 取 聞 法 也。 藝。」 取 於人,故有 愚謂 取 人者, 朱子 君

之教有所施。若往而教之,則道不尊而教

八

道德仁義,非禮不成

之道。 禮則 矩獲。 禮 劉氏 其 恩厚薄之等,義非禮則無以得因 曲 惟禮者天理之節文,人事之儀則,而細微 得於身謂之德。 義禮知之爲人所由謂之道,仁義禮知之有 大,而百行資之以成其德焉。」 行,然後四者附之以行。 文、有質,咸有等降上下之制,以載乎五 折 理 ,事爲之物,物爲之名,有數、有度、有 之間 無 而 彝曰:「仁也,義也, 然則五常之道同本乎性,待 以 故 無 道 爲持守之實,仁非 , 參差等級之度, 莫不有一 定形,附於行事 非禮則無以 仁義與禮 爲率由之準,德 而 知 雖同 此禮之所 也,信 禮 後著者也 則 出於性,然 事 無 愚謂 也 裁制之 以 定之 以 禮 雖 酌 爲 之 常 施 惟 有

宜。是四者非禮則不能成也。

教

訓

IE.

俗,非

禮不備

緯 之以 黄氏 民 俗,而 萬端,事爲之制,曲爲之坊,故教訓 、炎曰:「率之以身而使傚之謂教,諭 言而使循之謂訓。」 苟不以禮,則闕略而 愚謂: 不備 也。 禮 者 以 經經 正

二者非禮則不能決。」 非 直 朱子曰:「争見於事而有曲直,分争則 不 -相交。 相 敵 訟形於言 禮 所 以 IE. 而 曲 有 直,明是 是非 辨訟 (非,故 則 此 是 曲

家之倫,父子爲大,兄弟次之。有分有義,氏澄曰:「國之倫,君臣爲大,上下次之。公、卿、大夫列位於上,士列位於下。」 吴公、卿、大夫列位於上,击列位於下。」 吴君臣上下,父子兄弟,非禮不定。

弟」者,舉疏以包親也。
小功以下謂之兄弟。不言「昆弟」而言「兄不能定之。」 愚謂:大功以上謂之昆弟,有恩有情,其尊卑厚薄,非禮有一定之制

學者。 愚謂: 情 志。」《 藝。 云: 鄭氏 非 十、雖已仕、猶親學也。宦、學皆有 虔云:『宦,學也。』是學職 盾 見 事之以禮 不親矣。 『宦,謂學仕宦之事。學,謂 靈 此二者俱是事師。』《左傳》宣二年,趙 曰:「宦,仕 王制》云:「六十不親學。」明未 宦,謂已仕而學者。 故《學記》云:「凡學,官先事 **輙餓,問之。云:『宦三年矣。』服** ,則學者怠,教者倦,而師弟之 也。 孔氏 事爲宦 學,謂未 曰:「熊 習學 也。 師,然 仕 士 六 氏 而

九

力位反。」 班 朝、 朝,直 治 軍 遥 反。 涖 官 涖,本亦作『莅』,徐音利,沈力二反,又 行 法 非 禮 威 嚴 不 行。 釋

事。 謂 也 次 鄭 日 也。 : 氏 四者之事,必以禮肅之,不然,則 行 涖 딩 : 朝 而徒爲文具矣。 臨 法 治軍,謂 朝 班,次 謂 也。 廷 司 也。 寇 官 師、旅、卒、伍各 也。 謂 次,謂司 士 師 卿、大夫、士 涖, 明 臨 刑法 士 也。 正 也 E 朝 各 其 儀 E 部 之位 有 孔 慢 愚 職 分 氏

文》:「共,音恭,本或作『供』。 禱 鬼 孔 祠 下 祠。』 神 氏 怠 祭 曰 祭祀者,常事之祭。 祀 必 供 依 「《周禮注》云: 吴 給 於禮,然後 氏 鬼 澄 神, 曰 : 莊,側良反,徐側亮反。」 非 禮 其 『求 皆 禱 不 小 有 祠 福 誠 誠 性幣以 者 日 不 實, 禱 大 莊 其 供 事 得 容 給 之 求 釋

莊

肅

文》:「撙,祖本反。」是以君子恭、敬、撙、節、退、讓以明禮。《

爲 葛 挫 銜」, 撙、 子,卿大夫若有異德者。」凡禮有深疑,則 鄭 之,非矣。 是 言恒趨於法度。 稱 德 爲恭,在 日 日 譲。 : 非、 也。 氏 「趨數煩志」之「趨」,疏以「趨向 有爵之通稱。 君子以正之。 節 臣 亦是相迫促之意。 曰:「撙,趨也。」 撙,抑也。』《漢書 然 退、 楊 瓚曰:「撙,促也。」師 心爲 不 愚謂: 雄 有所 然 讓六字平 賦 敬。」 之情, 日 抑 君子,以 應進 又康 撙, 而 齊 不敢 列。 以 孔 趨 成 而 總 • 王吉傳》「伏 鄭 相 注《 氏 何氏 卻 也 德言之。 總 《荀子》:「不 肆謂之撙,有 氏 薦 日 日 撙 少儀》云: 撙。」 訓 退,應受而 允曰:「在 節 古 撙, 爲 君 日 法 一之義 趨 楊 其 恭、敬、 子 當 度 倞 相 軾 是 『君 也 讀 恤 辭 所 解 膠 注 有 撙 貌

之文。 黄髮,下卿 皆此義也。 夫及國中賢者。」此篇屢言「侍坐於君子」, 者。」又注《士相見禮》云:「君子,謂卿 鄭注《少儀》云:「君子,卿 之歡」,皆此義也。 敦善行而不怠,謂之君子」,「君子不盡人 敬、撙節、退讓以明禮」,「博聞强 撙、節、退、讓以明之,禮主其減故也。 實,撙、節所以約禮之用,退、讓 制 云:「君子,國 凡君子,有專以德言者。鄭注《鄉飲酒禮 而 不 凡事不可以無禮,故君子必 敢過謂之節。恭、敬所以盡禮之 位」,「君子將營宫室,宗廟 又有專以人君言者。 中有德者。」此篇「君子恭 有兼德與位言之者。 大夫若有異德 所以 「君子式 識 一恭、敬 而讓 達禮 爲 大

鸚鵡能言,不離飛 先」,是也。 而 無禮,雖能言,不亦禽獸之心乎? 鳥。 猩猩能言,不 離 夫

故此經「鸚鵡」字、《釋文》作「嬰母」,後放此 磨,音憂。」○今經文係孔疏本,陸氏本經文與孔間有不同 『鸚」,厄耕反。母,本或作『鵡」,同 唯禽獸無禮,故父子聚麀。《釋文》:「嬰,本或作 離,力智反。狌,本又作『猩』,音生。 音武,諸葛恪茂后 禽獸,盧本作『走獸』。

《爾雅》云:『二足而 鄭氏曰:「聚猶共也。鹿牝曰麀。」 鳥力小,可擒捉 獸』者,凡語有 謂之獸。」鸚鵡是禽,猩猩是獸,今並云『禽 力多,不易可 禽,毛則 阯封谿縣 曰:「《爾雅》云:『猩 山海經》云:❶『人面豕身,能言 日 出猩猩,狀 獸。所以 擒, 通别: 而 須圍守乃獲 取之。 然者, 羽謂之禽,四足 如 猩 别而言之,羽 獾 小 獸者,守也,言其 **純**,聲如 而 禽者,擒也,言 好 也。 啼。」 通 兒 則 而 而 啼。」 今交 郭 孔氏 璞 日 毛

0 郭璞」下、《禮記注疏 》有「注」字。

擒 人而無禮,則與禽獸無以别矣。 能言,而 通》云:『禽者,鳥獸之總名。』以其小獸 職》云:『大獸公之,小禽私之。』《周 云:『王用三驅, 云:『以禽作六摯,卿羔,大夫 故得 不 不 耐 可 名 離 日 平 禽 뾆 也。」 禽獸 l'; 獸 失前 亦可 者, 禽。』《周 愚謂: 以 E 其 禽。 無 鸚 雁。』《白虎 禮 聚,共也。 禮 鵡 故《易 . 故 猩 禮 司 也。 猩 又 馬 可

别於禽獸。「是故」,石經作「是以」。 於萬 爾。 男女有别,人道之所以立而與天地參也。 同 息 制 氏大臨 與禽獸異者幾 物者,蓋 然猩猩、鸚鵡亦或能之。 爲之禮 曰:「夫人之血 有理 ,然後父子有親 義 希,特禽獸之言 存焉。 氣 聖 嗜 是則 君 人 欲 因 視 臣 所 與 理 有 以 聽 義 之 貴 異 食

> 大彘之無辨,是果於自暴自棄而不欲齒於 縱恣怠敖,❶滅天理而窮人欲,將與馬牛

人類者乎!」

來,非禮也。 大上貴德,其次 大,音泰。 施,始豉反。」 來 務 而 不往 施 報。 亦非禮 禮尚往來,往 也 《釋文》: 而 不

惟報。 已者。 鄭氏 禮制未備 遠矣,與天地並,但上古之時,人心淳樸 然施之有報,乃理之當然,而情之不可以 於人謂之施,答人之施謂之報 大上,上古之時。 曰 : 三王之世,禮始 故後王有作,制爲交際往來之禮 「大上,帝、皇之世,其民施 惟 貴 施 其次,謂後 德於人,而不 興 、焉。」 王 禮之 也 必相 愚 從 謂 而 施 德 而 來 不

是故聖人作爲禮以教人,使人以

有禮

知

自

麀

、牝獸也。

父子共麀,言其

無別之甚。

<sup>● 「</sup>恣」,四庫本衛湜《禮記集説》(以下簡稱「《集説》」)作

有

得於内

而在

外者莫能奪矣。」

内無素定之分,而與物爲輕重也。

好禮則

富貴之所以驕淫,貧賤之所以怯懾者,以

稱情立文,而禮制於是大備矣。

學也。人有禮則安,無禮則危,故曰:禮者,不可不

而況富貴乎。 禮所以治人情,脩仁義,尚辭讓,去争奪。 大禮者,自卑而尊人,雖負販者,必有尊也, 天子至於庶人,未有無禮而不危者。 天子至於庶人,未有無禮而不危者。

鄭氏曰:「懾,猶怯惑。」 馬氏晞孟曰:禮,則志不懾。《釋文》:「好,呼報反。」 富貴而知好禮,則不驕不淫。貧賤而知好

耄,惛忘也。《春秋傳》曰:『謂老將知,耄則》曰:『十年出就外傅,居宿於外,學書則》曰:『十年出就外傅,居宿於外,學書則》曰:『十年出就外傅,居宿於外,學書

刑焉。 反。 政,六十曰耆,指使,七十曰老,而傳, 肚,有室,四十曰强, 幼,時始可學也。」則本於「幼」字讀斷。 下至『百年曰期』皆然。」 朱子曰:「陸農師點『人生十年曰幼』爲句,「學」字作一句, 曰耋,九十曰旄」,後人妄加之。」○期,朱子讀居宜反。 五蓋反,謂蒼艾色也,一音刈,治也。 九十日耄;七年日悼。 人生十年 弱冠」等相連解之,失鄭氏之意矣。 八十九十曰旄,本又作「耄」,同忘報反,本或作「八十 百年日 曰幼,學; 期,頤。《釋文》:「冠,古亂反。艾, 愚謂: 二十旦 而仕 悼與耄,雖有罪不加 鄭氏解「幼學」云:「名曰 ; 五十曰艾, 弱,冠; 傳,直專反,沈直 孔疏始以「幼學」、 三十 八 服 + 官 

三

蒼白 强有 名弱。 六十 老境 以前 壯有 治其官政,故曰『服官政』也。 兀 九以前爲幼。 名,稱幼。 曰 冠,體猶未壯 至十九時。 有妻」而 |老也 十 及之。』悼,憐 「色如艾。 一義 頤,養 至老 也。 妻。 九以前 ,通名曰 三十 云『有 既 六十 境 妻居室 也。 《冠禮》云:『棄 老則傳授家事,付委子孫,不 通 而 故《檀弓》云『幼名』, 而 壯。 故故 則智慮强,二則氣力 學,就業 不得 日 立,氣 未 五十 室』者,含妾媵也。 愛 强。 日弱 中, 全, 电七十 壯久則强,故四十日 孔 也。 執 氏 堪爲大夫,大夫得 至五 故 血已定,故曰『壯 事, 也。 也。 日 不 呼妻爲室。 旧 加 十氣 爾幼志。」是 至二十九 二十成 全 指 刑 幼 耆,至也,至 至老 事 力已衰,髪 愛幼 使 育 三十九 三月爲 人 境,故 强 人 不云 通 始 始 而 也 也 强 + 車 得 加 牛 尊

**至** 其視濯 傳之。 居田 復指 鄭 不 悼者,幼 或八十而耄,或九十而耄,故並言二時 云 鼎俎」,是也。 子孫所傳家事,祭祀爲重,若非宗子,無由 傳之事。 鄭 注法云: 日 惟 加其刑 制》云:『八十,齊喪之事 『不齊則不 里,不能 使 云『宗子』者, 幼 但七十 也。 溉則子孫。 無 弱」,二『日 『若今時律令、未滿八歲、八十以 傳者,上受祖父之重,下傳 辟 識 案 也。 慮 備祭宗廟,長子當親 之時,祭祀之事 庶子年老亦 若至八十,祭 祭也。」耄者, ,耄者可 周 庶子授家事 故《序卦》注 老耄」, 禮 尊 • 司 敬 得 三三日 刺》 傳 雖 僻 亦 不 云『謂 猶 於子 付 有 謬 及 不 有 親 子 惷 爲。 也。 也。」 視  $\equiv$ 罪 ', 非 爲之, 子孫。 孫 愚」。 滌 父退 赦 加 也。 注 故 濯 相 口 而

<sup>● 「</sup>未全」下、《禮記注疏》有「老」字。

謂 周匝之義。 學』者也。」「耄者、老而知已衰,悼者,幼 大事 也。 期,故百 待於養。」 加刑焉。 知未及,二者雖有罪,而情不出於故,故不 待其成而用之,所謂『賊夫人之子』,『以政 而 「『期』,與『朞』字同。《論語》『期可已矣』, 材,至於成就而後用之,則收功博。 大夫,非無 上,非手殺人,他皆不坐也。」」 頤 如 己。 「仕者,爲 也。 服官政者,爲大夫以長人,治官府之 者,《 期如 上句『學』『冠』『不刑』等字。」 年以『期』名之。」 百年者,飲食、居處、動作無所不 材可 蚤 期,謂百年已周。 喪服》傳 上句『幼』『弱』『耄』『悼』等字, 方氏慤 成夙知之才也。 士以 '用則使之仕,德成 事 所謂「傳重」也。 曰:「人生以百 人,治官府之 蓋養天 頤, 朱 吕 子 謂 則 氏 年爲 下之 命 當養 日 小 大 如 曾 愚 臨 不 爲 事 而

> 殤」,則大夫、士之冠、昏,未必皆至於二 愚謂:二十而冠,三十有室,四十而仕,五 濯 子問》曰:「宗子雖 有 十、三十,而材德秀異者,其爲士大夫,亦 十服官政,亦制爲大限 戒,每十年爲一節,而人心有定向 未用者無躁進之心,當退者無不知足之 制禮以律天下,壯者服其勞,老者安其逸, 子七十主祭。 爲夫姊之長殤」,又有「大夫爲 不待乎四十、五十者矣。 ,而祭猶親之也。 故鄭 七十,無 氏謂 如 戴氏溪曰:「聖 七十 此耳。《喪服》有 無 使子 主 昆弟之長 婦。 . 矣。」 孫 視 則宗

大夫七十而致事。

劉氏敞曰:「古者大夫七十而致事。君鄭氏曰:「致其所掌之事於君而告老。」

「治」、《集説》作「與聞」。

爵,毋 也, 榮,不可慁人之朝,不可塞人之路。]再 稽首,反其室,君亦不强焉,義也。 可 也、非爲食也、爲君也、非 E TF. 失也。』君雖留之,臣曰: 非爲 此古者致事之義也。 是 除其禄,毋去其采邑,終其身 猶 家 足 也。 以 佐 是 或 以 家 時 社 稷 進 古之仕者 爲己 『不可貪人之 也。 則 也; 進, 留之, 毋 時 爲 爲 奪 而 不 拜 止 或 道 其 E

方,乘安車 若不得謝,則必賜之几杖,行役以婦人,適四

則

謝之。其有德尚壯,則不聽 鄭氏曰:「謝猶 若今小車也。」 勞歲積。』是許其致事也。 君若許其罷職,必辭謝云: 人、安車,所 以 養其身體 ,聽也。 孔氏曰: 君必有命,勞苦 也。 今不得聽,是有 『在朝日 謝,猶聽 耳。 安 車, 几杖、婦 1久,劬 坐乘, 許 也。 ...

> 國。 賜之杖,使於入朝之時持之,以自扶 之几,使於朝中治事之所憑之,以爲安也。 德 几杖不人君門,君賜之,則得以 婦人,四方安 老之具,在國 能養人、故許自 聽致事,則《王制》云:「七十杖於國,八十 『不聽致事 杖於朝。」』行役,謂本國巡行役事。 尚 安車,小車也,亦老人所宜。 壯 猶 ·則《祭義》云:「七十杖於 堪 車 及 掌 隨 ·, 則 出 事 不 也。 皆得用之。 相 聽 互. 適四方,謂遠 也。」 去 也 0 入朝 今言 愚謂 熊 然此 氏 行 聘 婦 朝。」 云 也 賜 役 養 異

自稱曰「老夫」,於其國則稱名。 名,君 **奉** 鄭氏曰:「老夫,老人稱也,亦明 老夫也。 曰:「注引《左傳》,證老臣對 秋 雖 傳》曰:『老夫耄矣。』於 尊異之,自稱 於其國, 謂自與其君言也, 猶若 臣。 他 其 國 君 X 或 雖老 自 孔 則

氏

稱

稱

稱名, 名也。」 非是 已。此老臣 臣 猶 謂上大夫自稱 君尊異,故臣亦謙退,從下大夫之例而稱 夫,宜是上大夫,而 下臣,下大夫於己君稱名。此既自 玉藻》「上大夫曰下臣,下大夫自名」者, 自稱 ,下大夫自名。」是上大夫於己君 與平日同,不 名也。 愚謂:臣於君,無不稱名者。 稱於他國曰 案《玉 曰下臣某,下大夫直 稱名從下大夫者,既 藻》云:『上大夫 敢自尊 老夫,而 異 也。 於其國尚 稱名 自 疏 稱 日 稱 説 而 被 老 爲 下

越 國 而 問 焉,必告之以其制。

問 制 鄭 於老賢,老賢則 而 也。」 氏 ,法度。」 使四方之國 日: 「 愚謂 鄰國來問,必問 孔氏 有 稱國之舊制以對他國君之 明習於國家之舊典故 所取正焉,此老成人之所 曰:「鄰 國來問 於老者以答之。 ,君必問 事,

> 以 可 貴 也

譲而對 謀於長 非 者,必操几杖以從之。 禮 也。 《釋文》:「長,丁丈反,下皆同。 長者問,不辭

七刀反。」

凡爲人子之禮,冬温 未必 物,故於謀議之時持就之。」 有 若率爾而對,自以爲能,便是實了此心,雖 弟讓之心 弟子見長者,不敢以賓客之禮見。 對,非所謂讓也。」 吕氏祖 曾子之謝不敏,所謂辭也。 杖可以策身,几可以扶己,俱是養尊者之 如曾子之爲。」 鄭氏曰:「從猶就也。長者問,當謝 曰:「辭者無所受於己,讓者有所推於 法 無几 語之言,精微之理,亦不能 也。 杖,所以 與 長者語,須是虚 孔 操 而夏凊 氏 而從之者,蓋 曰 : 昏 謙曰: 子路之率爾 操,執 人。 陳氏祥道 心而受, 長者 存 「古者 晨省 持 不敏 養其 也。 處 而

定

而

文 **\***: 凊, 七 性 反, 字從 >, 冰冷也, 本 或 作 水旁

非也。」

氏大臨 其寒; 《内則》云:「同宫則雞初鳴,異宫則昧 鄭氏 兼示 趾 之異,然 朱子曰:「 父母之所,問衣燠寒」,此晨省之事也。」 以奠其居,晨則省之,以問其安也。」 吕 而 法。」昏定晨 何 如。 」,此昏定之事也。 朝。」」 温或凊之宜也。」 日 經宿之禮。 夏則凊之,以辟其暑。 曰:「《内則》『父母將衽,奉席請 「定,安其牀衽也。省,問其安否 孔氏 温、凊、定、省,雖有 日之間,正 省,是一日之法。 方氏 慰日: 曰:「冬温夏凊,是 熊氏云:『「晨省」者,案 『子事父母 當隨時隨處省察其 「冬則 昏則定之, 四時、一 温之,以 先昏後晨, ,雞鳴 四 時之 禦 爽 日 滴 何

> 夫爲人子者,三賜不及車馬。 此爲 之禍爲少,而醜、夷之争多也。」 日 不驕,爲下不亂,在醜不争。 故戒之。」 有畏憚。 鄭 三者,此獨云『在醜、夷不争』者,上下驕亂 日 用三牲之養,猶爲不孝也。 氏 : 少者設戒,故但言「在醜、夷不争」。 日 醜 朋儕等輩,喜争勝負,忘身及親 夷,皆等類 醜 吕氏大臨曰:「事親者,居上 衆 也。 べ之名。 夷猶 儕 貴 三者不除,雖 也。 《孝經》引此 賤 相 愚謂 臨 孔 氏 則

受爵 子不受,不敢以成尊比踰於父。天子、諸 車 鄭氏曰:「三賜,三命也。凡仕者 侯之子不受,自卑遠於君。」 「《大宗伯》云『一命受職』,職 【宗伯》『三命受位』,鄭云:『始有列位於 馬 ,再命而 而身所以尊者備矣。 受衣服,三命而 卿、大夫、士之 受車 則 孔氏 爵 馬 一命而 世 日 受 又

在

或

醜、夷不争。

受也。」 耳。 馬。 馬 以 獨辭 以 之,而吕氏得其比例之確,朱子盡其情 敢 聘於王,王賜之大路,豹以上卿無路而 敢以富貴入宗子之家,雖衆車徒,舍於外, 此賜也。」 關祖父,故不受也。不云『不受』而云『不 王 不及,以心言,非以事言。 及』者,明非惟外迹不受,抑亦心所不及於 美光顯祖父,故受也,車馬是安身,身安不 乘。 寡約 爲 賜 朝。』今言受車馬者,三命受位 有 而 若天子之賜,●又爵秩 重,雖有三命之尊,猶不敢及於此 所以許受三命,不受車馬者,命是榮 人,則事親者,車馬之盛,宜在所不 不受耶?」 疑此不及車馬,亦謂受之而不敢用 功也。三賜不及車馬 朱子曰:「按《左氏傳》魯叔孫豹 吕氏大臨曰:「事宗子者,不 愚謂: 車馬 注疏之説 所當得,豈 者,賜物,車 衣服,所 即 已得 受車 也。 容 不 事

> 也。《釋文》:「僚,本又作「寮」。弟,大計反。」 州 友稱其弟也,執友稱其仁也,交遊 之詳,三説參觀之,其義 閶 鄉 黨稱 其孝也,兄弟親 乃備 戚稱 其慈也, 稱

僚

故

鄭 故 師之友,意趣相得,綢繆切磋,故見其仁恩 官,不敢踰越等級,故 爲族,五族爲黨,五黨爲州,五州 而 疏交接,並見其慈 友,官同者。執友,志同者。」 五者備有焉。 慈者,篤愛之心。❷兄弟,内外 稱 氏 稱之。交遊,汎交也。 其信。」 曰:「不敢受重賜者,心也。 《周禮》二十五家爲閭 吕氏大臨曰: 而稱之。 稱其事長之弟。 交遊本資信合, 「五者之稱不 孝子能 爲鄉。 孔 通 氏 如 稱 接 日 此 兀 僚 間 司 口 親 而

天子」、《集説》作「尊者」。

心」、《禮記注疏》作「名

其信。」 弟親 交游主於信,知其誠心於孝也,故稱 德,德莫盛於孝,孝者仁之本,故稱其仁。 也,有遜弟之心,故稱其弟。 愛必隆,故稱其慈。 行者也,見其 同 ,各以其 一戚,責其恩者也,順於父母者,親親之 所見言之也。 所以 敬親者,故稱其孝。 僚友,見其有所讓 州 間 執友者友其 鄉 黨, 觀 者 兄 其

下孟反。」 退,不問不敢對,此孝子之行也。《釋文》:「行 見父之執,不謂之進不敢進,不謂之退不敢

遍反。 鄭氏曰:「敬父同志如事父。」 自上詣下曰見,如字。 父執,謂執友與父同志者也。 或途中相見如字。 自下朝上曰見。賢 孔氏曰: 或故

所習必有業、《釋文》:「告,古毒反。」 夫爲人子者,出必告,反必面,所遊必有常

往見,賢遍反。

也。」

鄭氏 安,所習必欲其正。 之意欲知之。」 吕氏大臨曰:「『出必告, 非所以養其志也。」 貽其憂也。」「親之愛子至矣" 所遊必欲其 必有常,所習必有業」,體親之愛,而不 反必面」,受命於親,而不敢 來,宜知親之顏色安否。 曰:「告、面 同耳。 苟輕身而不自愛,則 反言『 有常、有業,緣親 專也。 面」者,從外 『所游 敢

恒言不稱老。

老也。」 鄭氏曰:「廣敬。」 父母,常言須避『老』字,一則傷父母之心, 則孝子不忍斥言,非謂人子身自 黄氏幹曰: ●「人子對 稱

五. 年長以倍,則父事之。 年以長,則肩隨之。 十年以長,則兄事之。

<sup>0</sup> 幹」,疑爲「幹」。下同。

禮,以 弟」, 倍 行而 退。 十,惇 先生並行。」 行』也。 行」也。 兄事之,正 鄭 可 踰」也。」〇 同 十於二十者 未二十童子 也。 行之節。 年二十,弱 差退。」 日 則 其 年二十 行孝 孔氏 至 似 未 肩隨,《 兄 其 年長 謂 能惇 差 孔 事 父事 曰:「父事之,即父黨隨 弟。』肩 引《 有 冠 於 退 氏 **√**, 吴氏 無 子 以 成 + 行孝弟。 曰 四 而 此 内 愚謂: 王 , 王 道。 倍 人 禮 方 + 雁行也。❶ 澄 則 王 制 制 (,有爲 謂 隨 「未二十 有 者 制 》「年二 曰:「此謂道路長 《内 **>** \* 者, 鄭氏 年二十於 誤 所 所 此 ^ 所謂『父之齒 人父之端 矣。 此 謂 謂 則》 禮 論 與 略舉 童子 元兄 謂 +, 語 肩隨 之 孔 朋 曰:『年二 此 友 之 並 几 氏 篇 惇 年長 則 以 今四 行 遂 不 씷 行 謂 所 見 無 也。 者。 孝 與 差 謂 例 以 相 隨 此 雁 幼 並

> 童子「與先 行孝弟,則其 所 灑 謂 埽、 幼幼 應 儀 對 生並 \_, 正 事不止於此 進 行 退、 所 」,正謂 以 辭 教 讓 童子。 之 其不 矣。 節 孔子言 知隨 乃 若 行 内 + 闕 後 則 黨 惇

群居五人,則長者必異席。

之禮

非

謂

禮

當

如

是

也

鄭氏 長者 之犯上而踰禮者鮮 也不並行,其居也 尺,足以容四人也。 因推長者 一人異席 孔 氏 一人居席端。 曰:「古者 曰:「席以四人爲節,因宜有」 地 敷 不同 若有五 也。 人横席, 〇馬 席 氏晞 敬長 愚謂: 人,應一 席容四 孟 如 日:日 席之度九 所尊 人,則 此 人别席, 其 則

❶ 「正」,四庫本《禮記義疏》作「止」。

立不

中

門。

釋文》:

「奥,烏報反,沈於六反。」

爲人子者,居不主奥,坐不

中席,行不

中道

39

鄭

門,謂棖、闑之中。《内則》曰:『由命士以 名爲奧。尊者居必主奧,人子不宜處之。 處。 也。室户近東南角,西南隅隱 上,父子皆異宫。」」 氏 室中 西南隅謂之奥。 謂 與 父同 宮者 孔 氏 也,不 道 曰:「主猶 有左右。 奥無事 敢 當其 故故 坐 中 尊 任 所

不禁。 路,卑者不得行也。門中有闑,兩旁 也。 尊,尊者宜獨,則 而 棖,棖、闑之中,尊者所立,人子不 一席四人,則席端爲上,獨 立也。 男女各路,路各有中,尊者常 有命既尊,各有子孫臣隸,應敬己 四事 皆謂與父同宫者,異 坐 居 席 中,卑 坐則 者 示 席 當 宫 中爲 行 得 有 則 之 正 坐

食饗不爲概、《釋文》: 「食音嗣。 響,本又作『享』。

故也。」

鄭氏曰:「概,量也。 不制待賓客饌具之

然也。」

古愛反。」

饗食。 之事。」 **轉豫限量多少** 子 有 孫。 制設饌 孔 若不傳 氏 曰 : 也。 具,事由尊者所裁,子不得 家 大夫、 熊氏云: 『謂傳家事 事, 士相 則 子無 來往,設於 待 賓

祭祀不爲尸,

安也。 與於祭,將以尊臨其父,爲人子者所不可 鄭氏曰:「尊者之處,爲其失子之道,然則 用所祭者之孫爲之。父在而爲尸,其父必 處,故人子不爲也。」 愚謂:宗廟之尸, 尸卜筮無父者。」 孔氏曰:「尸代尊者之

聽於無聲,視於 然想像視聽,似見形聞聲,而將有教使己 曰:「謂雖不聞父母之聲,不見父母之形, 鄭氏曰:「恒若親之將有教使然。」 無形

孔氏

不登高,不臨深,不苟訾,不苟笑。《釋文》:

「訾,音紫,沈又將知反。」

鄭氏 也。」 皆近於危。 之,皆非彼所欲,必反見毀辱,故孝子不爲 爲苟笑。 氏曰:「苟,且也。 近於辱。 見訾毀,不欲見笑。 毋訾衣服 曰:「爲其近 愚謂:登高恐墜,臨深恐溺,二者 彼雖 《少儀》曰:「毋訾重器。」又曰 成器。」是非但於人不苟訾,於 苟訾似讒,苟笑似諂,二者皆 有是非, 危辱 相毀曰訾。不樂而 君子樂然後笑。」 也。 而 己苟譏 人之性,不欲 毁訾笑 笑 孔

孝子不服闇,不登危,懼辱親也。

物亦然。

中, 鄭 之中從事,爲卒有非常,且嫌失禮 夜 氏 曰:「服,事 行 則 以 為卒有 燭。 非 也。 常常 孔氏 闇,冥也。 曰 : 則爲 生物 不 行 不於闇 嫌。」 事 也 於 冥 罶 男

父母存,不許友以死,不有私財。

鄭氏 專通財之恩也 死,即不許友以身也。 者,故不有 也。 報 許友以其身,不得專通財之恩。」不許友以 云:「朋友之道,親 子不可死也。 友之讎視從父兄弟。』家事統於尊,財 仇 親亡則得爲友報仇,故《周禮》: 曰 : 讎 「不許友以死,爲忘親 私 孔氏曰:「 財。」 若許友報仇怨 在 愚 不得行者二: 不有私 親存須供 謂 ^ 而 白 財, 也。 死 虎 是忘 養, 即 死,爲 通 不 則 不 關 主 義 得 得 尊 親 孝

爲人子者,父母存,冠衣不純素。《釋文》:「純

諸允反,又之閏反,下同。」

鄭氏曰:「爲其有喪象也。 純 紕,既祥之冠也。』《深衣》曰: 藻》曰:『縞冠玄武,子姓之冠也。 以青。二 孔氏 曰 : 冠 純,緣 純 謂 具 冠 父母,衣 也。 縞 冠 毫玉 也。 素

禮 記 集 解

衣謂深 同,而 母,衣 或 以大祥縞冠素紕推之,則冠純之色當與冠 存 定,不因父母之存 衣 純 不得 純 素。 其物則 純 謂 衣 純 以 衣 若禮服之冠 也 素也。」 領緣 繢 精 以其用 也。 與? 此冠謂燕居之冠 具父母,衣 没 愚謂: 《禮 而 於燕 與其 異 \*: 也。 吉冠之純 **、私,故** 純以 『具父母、大父 中 衣, 青。」故 或純 飾 未 有 采 也 聞 親

孤子當室,冠衣 不純 采。

孔氏 適子 通者 鄭 適、庶皆然。 今云 『當室』,則似庶子不同 子 十有室,有代親之端,不爲孤 或不同,故特明之。 也 氏曰:「早喪親,雖除喪,不忘哀也。 有二。 内 日 :「《深衣》云『孤子衣純 《深衣》曰:『孤子 理蒸、嘗、外交宗族、代親既 云『凡子皆然』,豈惟 故鄭引《深衣》,證凡 衣純 也 以 以素」,則 當 素。」」 當室, 室,但 備 嫌 滴

惟當室 不當室 則存 即爲 純以 蒸、當 則不必嫌當室者之不然而特明之矣。 不緦,唯當室緦。 孤 言略矣。」 者行之,非當室者則不然也。 禮 矣,冠衣 特純素。 孤 而 曰:「少而無父者,雖人之窮,然既 非 杖 悉同 ,豈可獨遂其無窮之情哉 孔 青 矣。」是童子 孤子矣。 也。 ,外交宗族 者。 者 也 氏之説。 猶 孤子,衣 0 不純采,吕 不當室則 孔氏 不 若此 愚 崔 改素,則 謂: 靈 鄭云未三十無父者 謂 ,所履之事 冠衣 恩云: 當 然考《問 緦者其免也 凡 純 《深衣》云「具父母, 純 室者之服 氏 孤 以 不純采,凡孤皆然, 采。』 吕 皆不 説 素」, 無 『當室之孤 與 窮 喪》云:「 ,莫不傷 崔 純 是非 也 采,崔 皆 氏同 ,當室則 《深衣》之 故 先 具 惟當 氏 重 内 於其 童 朱子 乃 父 除 大 王 氏 爲 母: 免 子 謂 室 制 喪 臨 衣 故 理

彌深 禮 特言「孤 故 餘 也。《深衣》不言「當室」,乃文 孤 子當室」,則是惟 不然也。 蓋 以適子傳重,所 當 室者 有 感 此

略

心矣。」 心 鄭氏曰:「視,今之『示』字。小未有所知, 而 性,純明自天,未有外物生其好惡,無所學 不可示 常示以正物,以正教之,毋誑欺。」 孔氏 曰:「幼子常習效長者,長者常示以正事, 矣。 不可成。 以 視 欺 之以詐偽,則 故視之以誠信,則誠信篤於其 誑。 劉氏彝曰:「幼 詐 僞 篤 於其 子之

不衣裘、裳,便易。」 孔氏曰:「衣猶著鄭氏曰:「裘,大温,消陰氣,使不堪苦。童子不衣裘、裳。《釋文》:「衣,於既反。」

也。 屬。 乃服之。 之服也。蓋玄端、朝服之屬,衣冠相配,冠 也。 欲其便易也。 人燕居服深衣,其禮服 衣,有齊、有緣、有衽,則深衣之制 錦緣。」《弟子職》云:「振衽埽席。」童子之 摳衣去齊尺。」《玉藻》云:「童子緇布衣, 已。不衣裳,謂外服 絅、褶之屬。童子雖冬不衣裘,服繭、袍而 人褻服,冬有裘,夏有葛,春秋 裘帛。』」 並 緇布襦袴也。《内則》曰:『二十可以 童子惟服深衣,衣裳相連,無 又應給役,若著裳,則不便。 童子體熱,不宜著裘,大温,傷 愚謂: 童子未冠,自無服裳之法,非徒 不 衣裘,謂褻 也。下文云:「兩手 則 有玄端、 有 服 故 朝服之 也。成 殊 也 衣 童 陰 裳 成 衣 氣

「心」、《集説》作「志」。

1 1 1

立必正方,不傾聽。

不得, 禮》云:『凡燕見於君,必辨君之南 或南或北,不使之偏有所向也。《士相見 氏 宜正 鄭 大臨 氏 嚮 曰:「習其 則正方,不疑君。]疑君者,謂 曰:「立必正所向之方,或東或西, 方,不 - 得傾 自 端 頭 Œ 屬 聽左右。」 孔 氏 日 面 斜 立 總 吕 若

扶恭反,下「奉扃」、「奉席」皆同。辟,匹亦反,徐芳益反,沈辟咡詔之,則掩口而對。《釋文》:「奉,芳勇反,又辟咡詔之,則掩口而對。《釋文》:「奉,芳勇反,又

之,不正方也。不傾聽者,頭容直

鄭氏 也。」 旁日 ~;謂 提攜,謂牽將 曰:「兩手奉長者之手,習其扶持尊 挾之於旁。 耳。 孔氏 曰:「兩手奉長者之手,爲兒 掩 口 辟咡 而 行。 對,習其 韶之,謂 負,謂置之於背。 鄉 傾 尊者 頭 與 屏氣 語

> 從於先生,不越路 時,傾 劍,謂 之,則掩口 人也。」 故教小兒且先教安詳恭敬。」 長者,與之提攜,則 長大,方當供養扶持長者,故先使學之也 挾 頭 於脅 與語,必教之使掩口 張子曰:「古之小兒,便能敬 「而對。 下,如 而與人言。 蓋稍不敬事,便不忠信, 帶劍 兩手奉長者之手; 也。 遭先生 而 長者負兒之 對、恐 一於道 氣 事

之言則趨而退。《釋文》:「從,才用反,下皆同。」 趨而 尊師 厚也。 鄭氏曰:「先生,老人教學者。 先生饌」,則先生之號亦通父兄。 與人言,尊不二也。 趨 稱 進,正立拱 而退,爲其不欲與己並行。」 師爲先生者,言彼先己而 如 父兄 白稱 爲弟子者,言己自 也。 手。 而《 先生與之言則對,不 正 論 文 語》云『有酒 拱手,爲有教使。 生,其德多 處 不越路而 孔氏 如 崔靈恩 弟子, 曰 : 與

從長者而

上丘陵,則必鄉長者所視。

「上,時掌反,下同。鄉,許亮反,後文皆同。」

「爲遠視不察,有所問。」

己並行爲 子既知禮,自能隨行後長,先生不必以與 無事稽先生之行也。注説非是。 敢斥問先生所爲,故正立拱手,而俟先生 者。見師而起敬,故疾趨而進就之,又不 者」,則通 生,卿大夫致仕者。』此云『老人教學 師,教於州里。』《儀禮·鄉射》注云:『先 夫、士七十而致仕,大夫爲父師,士爲少 故所稱不同也。』案《書傳略説》云:『大 君子者,皆爲有德尊之,不據年之長幼, 物者。凡云長者,直以年爲稱也。 云:『凡言先生,謂 慮也。 愚謂:不與言則退者,不 凡老而教學者,未必 年德俱 高,又教 皆致仕 蓋 凡爲 此 道 敢 童 以 於

> 登城 鄭氏 不指,城 曰:「爲惑人。」 上不呼。《釋文》:「呼,火故反。」

禮記卷一

## 禮記卷

國史館纂脩孫希旦集解賜進士及第翰林院編脩

## 曲禮上第一之二

將 也。 鄭 適舍,求毋固 古 或迂。『求毋固』者,謂 主人物,不可以 曰:「舍,主人家也。」 必 `,視必下」,皆爲燕見不將命故也。 氏 册 慎唯諾」,皆言適舍之法,蓋燕見之 必,隨其有 故下文言「將上堂,聲必揚」,「將 日 謂 行 而 無。 故常,或時 就 人館 愚謂 凡求物於主人, 黄氏幹曰: 乏無。」 固猶 自此 常 也。 以 注 孔 下 毋 求 固 禮 至 毋 義 氏

> 傳 子 野 乃 下文所言,皆毋固之事 所居,凡事當求合禮,而不可失之鄙野。 主人之法。 謂 而 遽言求主人之物,非其序也 之固。」《哀公問》曰: 不達於禮。下篇云:「輟 「我僞固而授之末。」此言將適 鄭 氏 與 然下文方言上堂入户,此發端 黄 氏 雖 異, 也 而 「寡 皆以 人 朝 爲 固 古 而 有 顧 謂 求 左 君 於

鄭氏 不同 體敵,故二屨在外。《鄉飲酒》『無算爵, 屨。』室有二人,故户外有二屨。 曰 主皆降,脱屨於堂下」,體敵 「《屨 ,則長者 曰 : 人》注 一聲 . 必 一人脱屨於户 云: 揚, 『複下 警内人 日 故也。 内,故《少儀 也。 舄, 此 單 若 謂 下 孔 尊 兩 氏

八

將上堂,聲必揚。

户外有二屨,言聞則

不聞則不入。《釋文》:「聞音問,又如字。」

將入户,視必下。 兩也。 堂上 也。 密謀私事,故不可入而干之。 於户外。 於堂下; 以爲一人之屨在户内,其户外有二屨, 也,有尊者則三人也,而其言不聞於外,或 矣」,是也。 屢升,就席」,不言「公降脱屨」,公尊,屢在 堂」,體敵故也。 三人也。 云『排闔脱屨於户内者,一人而已矣』,是 少儀》「排闔脱屨於户内者,一人而 鄉飲酒禮》「無算爵,賓主皆降 也。 聞於户外,●則外人乃可入也。 二屨,是有二人。 凡席於堂者,賓主體敵,則屢皆解 席於室者,賓主體敵,則屢皆解 有尊者,則尊者之屨在堂上。 義亦通也。」 有尊者, 户外有二屨,無尊者則二 入户奉扃,視瞻毋回。 《燕禮》「賓及卿大夫皆脱 則尊者之屨 或請問密事,若 愚謂: 二屨,謂 在户 . ;, 脱 熊 屨 , 内。 人 則 氏 己 升 兩

> 文 >: 云: 『關也。』一云:門扇上鐶 「視,常 止 反,徐音示,沈又市 鈕 志 反。 扃, 古 螢反,何

也。」 鄭 視瞻毋回,謂甫入時也 手高正之狀。 轉,廣有瞻視 然,言恭敬也。 心。今人户雖不奉扃,其 關户之木,亦得稱扃。 氏 티 : 孔氏曰 不干 也。」 視必下,謂 視瞻毋 「《禮》有 掩人之 愚 回,初 謂 凡 鼎 私 在户 奉 手對户若 扃,所以 也。 奉扃,言其 扃 外將入時。 時 必 奉 兩 不 扃, 關 得 奉 手 拱 扃 向 敬 П

户 《釋文》: 開 亦開,户闔亦闔。 置 ,胡躐反。」 有後人者,闔而勿遂。

者。 鄭氏 闔 而弗遂,謂徐徐作闔勢,以待後入,不 闔而勿遂,示不拒人。」 曰:「亦開亦闔,不以後來變於先入 孔 氏曰:

兩」,《 禮記 注 疏》作「内」。

0

得遽闔以拒人。」

徐音奏,又如字。 毋: 路 "踖,在亦反,一 屨 毋 踖 唯,于癸反,徐于比反,沈以水反。」 席, 音席。 摳 衣 摳 趨 ,苦侯反。 隅, 必 趨,本又作 慎 唯 諾 走, 釋

言「摳 愚謂 諾,應 從 人連 内 也。 坐 者 蹋 者,不先舉, 者也 工,當從 席 之屨矣。 氏 不 也 前 坐之席 日:「 得 摳 解 衣」,其實是摳 此言 蹋 既 則 也。 提 下 毋 先 並 爲 趨 5 毋踐 也。 而 以 所毋 踖 人 脱 見 隅 踖 既 升,當己位上 席 者 問 屨 升席 後爲下,當由 坐定, 席 屨於入户之後, 衣, 踐者 者 屨 户 乃 也。 升 也。 應。」 外 裳 深衣之裳 ,謂長者之屢 又慎於應對 必 也 席 深 其 踖 由 衣 必 人既 下也。 猶 孔 不不 衣 唯 由 後 躐 氏 裳 也。 下 而 多 咏 發 則 也 E ·, 此 相 升 0 初從 也。」 慎 解 非 也 連,故 ^ 若 鄉 唯 是 於 踐 將 後 踐, 升 數 户 進 諾 射 户 咏 上 就

> 共坐 席,衆人連坐者 升 席 也 後,乃得當己位 爲下 酒》云:『賓 躐 後,故必 被 禮 也。」升必中席,彼謂 之所向爲上,所背爲下,此 而 一,正與《玉藻》義 孔 地則 席。』自是不 一人之坐,故 注 即 氏 與此 云: 席,與 席, 污, 日 : 《 趨向 升 既云『當己位上』, 同 且. 脱 室隅 此 也。」 或 席自一 屨 玉 由 異 ,以席之前後爲上 以 上。 傾 則 席 藻》云: 也。 乃 西 同 跌 西 掘 前 爲 蓋 朱子 近主人爲上,故 也 方。』注 得 衣 升 下 以前 鄉 轉 一升 爲 愚 與此 趨 Ė 飲 向 而自 謂 其 爲上,後 : 隅 》乃是特設 席後 云: 與《玉 席 即 被 者 别。 席 凡燕 此 不 須 地 下,蓋 下之中 而 立 是 升 由 升 升也 坐之 爲 於 衆 以 由 鄉 前 席 蓋 賓 席 F 飲 由 西 下 爲 衣

❶ 「既」、《禮記注疏》作「或」。

禮之席,一人專坐者,以席之首尾爲上下。 異,而反 下」,望是也。人之升降,皆 云: 上,禮席與燕席一也。孔疏謂此與《玉 主人席於阼階,介席於西階,皆以 言者是 鄉飲酒禮》「賓席於户西,● 「升必 也 以《鄉飲 由 ^ 下。一下 玉 藻 酒 禮》爲證 云 即後,前 升 席 ,誤矣 以西頭 由下而 不 即 由 上 北 也。 前 爲下, 不 頭 藻 由 行 爲 注

「闌,魚列反。閾,于逼反,一音況域反。」 大夫、士出入君門,由闑右,不踐閾。《釋文》:

西。 橛。 鄭氏 雖 爲正,右在東,主人位在門東,客位 (,故出 則 在 日: 「 自 大夫、士是臣 西方東 閾,門限 高 君門,恒從 由 面, 也。 闑 則 入時仍依闌右。 右 不淨 ,臣統於君,不敢 臣統 孔氏 並 闑 東 於君 爲不 曰:「門 也。 也。 敬。」 踐閾 士之朝 以 自 闑, 在 向 同 位 門 堂 門 愚 於

> 不定。 謂: 左,主人迎賓出門左」,是也 以東爲左、《士冠禮》「主人宿賓,賓出 「主人入門而右,客入門而左」,是也。出 若人之出入於門,則入以 闑 右、《士虞禮》「側亨於 「由闑右」,是也。 右之皆爲 疏 據向堂言之,則以東爲右,此《記 謂 門 闑東,是也。 以 向 堂 據南 爲 蘭 E 向言之,則 門外之右」,是也。 亡,以 然門之左右 東爲右,下文云 明 此 以西 出 所指 人 爲 由

客而入。主人請入爲席,然後出迎客,客固辭,主人肅凡與客入者,每門讓於客。客至於寢門,則

於大門外。 鄭 氏 日 : 每 門 聘 讓 禮 於 **>** 日 客, 下 \_ 君 賓 迎 也 賓 於 敵 大門 者 迎

❶ 「西」,原本誤作「外」,據《禮記注疏》改。

❷ 「北」,原本誤作「南」,據《禮記注疏》改

從,所 之禮 受,賓 者,蓋主 《士相見禮 故 凡者,凡大夫、士也。 而 出 蓋執贄相見者,主人受贄於門内,而賓遂 此所言,乃賓反見 者,客在大門外,主人出迎之而與之人也。 三日 進 内 「公揖人,賓從」,是也。」 儀禮》, 也 世 終 爲 也 以 雖 再 與之揖 禮 進 辭 猶 已成二 凡主人與客人,皆主人先 拜 人雖當道 道之也。 客 有 敷 每 送贄 》:「賓奉贄人門左,主人再拜 謂 門者 肅, 也 讓 而 道 出 升堂,以 進 情尚 客 ,自大門 之。 此乃云「每 而 客,必先以讓客,而客 也。《公食 初曰 古 主人與之人之禮 主人請 未治 迎於大門外者,敵者 辭 一禮辭, 盡 孔 又 ,故主人復迎之 至 愚 賓主之歡 氏 見,賓反 讓 寝 謂 門 大夫 曰 : 再 先 門 讓 人, 人。 與 也 於客」 禮 古 古 客 見 而 **>** 也。 也。 如如 肅 \_0 客 案 日

也。 合。 同日 也。 贄則退, 此 内,與此言「每門讓於客」者不合。 君燕己之臣子,君不迎,燕聘賓 此言「客至寢門」者不合。 夫》、《冠禮》、《昏禮》「納采」,亦皆在 廟 孔 而入者,客既辭,主人遂道 寢門,主人乃請爲席者,欲更正之,示謹 寢 辭 兩君相見,又與下文言「客若降等」者 反見乃大夫、士之禮。 《聘禮》「歸饔餼 疏 之門也。 然後 以 讓 鄭 故 客固辭 朝、 氏 知 主 事 無反見之禮也。 云「請 此 聘之禮 異 人 爲《 禮先設席而 者,辭主人之先人爲 先 曰 士 人爲席,雖 辭。 人 相見禮》反 解 而 • 古 此 客 問 經。 辭 從 後 若 卿 又鄭氏云「客固 之 燕禮 迎 君 客以 再 然朝、 臣 賓 」,及《公食 也 亦然」, 見之禮 辭 見於君,奠 ,此客 雖 迎於大 人 也 席 在 寢 若 也。 聘 也 非 寢 廟 門 皆 以 至 無 肅 也。 爲 然 大 在 客 於 與 重

政客,再辭不先入也,亦非也。客固辭, 以客,再辭不先入也」,亦非也。客固辭, 人為席,然後出迎客,客固辭,主人之階,主 人,與下文「客若降等,則就主人之階,主 人,與下文「客若降等,則就主人之階,主 人固辭,然後出迎客,客固辭,主人肅客而 人固辭,然後客復就西階」,文勢正同。所 人固辭,然後客復就西階」,文勢正同。所 之則止矣。

音更不重出。」
固辭,然後客復就西階。《釋文》:「復,音服,後此客就西階。客若降等,則就主人之階。主人客就西階。客若降等,則就主人之階。主人

夫也。 專。 鄭 是 等,卑下之客也。 繼屬於主人。 氏 復就 曰:「降,下也,謂 不敢輙 西階,復其正。」 由 其階 案《聘禮》云:『公迎賓, 不敢亢禮,故就主人階, ,卑統於尊,不敢自 大夫於君,士於大 孔氏 曰;「降

> 反。」〇今按:「拾」字當音其劫反。 西階,則先左足。《釋文》:「拾,依注音涉。 足,連步以上。 主人與客讓登,主人先登,客從之,拾級聚 禮也。若君燕其臣,則宰夫爲主人,主人 轉 禮》並奉己君之命,不可苟下主人,故 等不就主人階者,以《聘禮》及《公食 内,乃以階言之者,指其將就是階之道也。 等然。』」 與賓皆從西階升,與此殊也。《聘禮 賓,賓入門左。』注:『左,西方。』此 賓不就主人階。』《公食大 而右也。主人固辭,然後客復就西階 『見,私事,雖敵,賓猶謙。 主國大夫,是敵禮,賓亦入門右。 而向左也。 愚謂:客就主人之階,謂 上於東階,則先右足。 主人與客之辭讓,皆在門 入門右,爲若降 夫禮 鄭云 皆是 》賓 上於 入門 大夫 從 公 謂 迎 面

鄭氏曰:「『拾」當爲 『涉」,聲之誤也。級,

Щ

之併。 者,亦 升一等,大夫從」,賓銜聘君之命,尊也。 大夫銜主君之命,尊也。 之法,賓尊於主,則 并,不栗階也。 階拾級之法可見矣。 射先升三等,下射從之中等。」中等,中間 主人與客更拾 級,謂主人既升第一級,客乃發足升第一 等 級,客既 先左足,近於相鄉敬。」 相隨,不相 「拾投」,射者 聘禮》「歸 級也。 也 所 連 涉 升第 以 先升三等,而 步 等 過也。 饔餼」,「大夫先升一等,賓從」, 道 以 聚足,謂 一級,主人乃發足升第二級, 客 「拾發」之拾。 而升也。 上 足聚則步連矣。 也。 上東 重 賓升一等而主從之。 蹉 前 聚足,後足從前 拾,更也,如《投 中 階先右 《鄉射禮》云:「上 跌 足 愚謂:主人先 「賓問卿」,「賓先 僅 躡 世 級,等也。 間 等,後 足,上西 連 〇凡升階 級,則 步 ,謂 足 足 壶 拾 升 登 階 從 而 足

> 接武,堂下布武,室中不 帷薄之外不趨,堂上不趨,執玉不趨。堂上 耳。 夫,「 前升至第二級,客乃升中較 此云「主人先登,客從之」,謂主人升一等 爲大夫,賓爲士,亦不過主升一等而賓 賓儐大夫,「賓升一等,大夫從」,賓面 而客從之,雖降等之客亦然。 賓主敵者,則主升一等,而賓從之,《聘禮 及《公食禮》皆「公升二等而賓升」,是 主尊於賓, 二等而賓從,亦惟臣與君升則然,若主 (升,賓升」,不言主人升二等,可見矣。 《鄉飲酒禮》鄉大 大夫先升一等,賓從」,是也。 ,則主升二 一等,而 翔 夫尊於賓,但言「主 賓從之,《 級」,非是。 疏謂「主人 然 聘 主升 也 升 大

堂上不趨,爲其迫也。 鄭氏曰:「帷薄之外不趨,不見尊者 由,不爲容也。 入則容。 堂下則趨。 行 而 張 足曰 執 玉不 趨

趨,謂 也。 大夫以 流 徐趨。《玉藻》云:『圏豚行,不舉足,齊如 疾趨也。 『没階趨。』執玉須慎,不論堂之上下,皆不 堂上迫狹故也。 内可趨,爲敬也。 臣吏,臣 簾 迹,不相躡。 中人之武尺二寸。 時。」武,迹也。 於廟門外。」疏云: 趨 而張拱曰翔。」 孔氏曰:「帷,幔也。 ご注 也。 志 言帷薄,謂大夫、士也。 行而張足。疾趨,敬也。貴賤各 重 《禮》:『天子外屏, 簾,士以帷。』《禮緯》文,見《郊特牲 來朝君,至屏而 玉 賓執玉,進入門内,不疾趨 也。 孔 室中不翔,又爲其迫也。 迹相接,謂每移足,半躡之。 《聘禮》曰: 子 下階則趨,故《論語》云: 堂上不趨,亦謂不疾趨, 「引《聘禮》,證賓有執玉於堂下 執 布武 玉則然。』又云:『執 ,謂每移足各自成 加 諸侯 上 肅 其外不趨,其 屏 内屏 介授賓 外不 而 薄, 》疏。 卿、 行 趨 爲 有 玉

> 二也。 常法也。 曳 臣相與行禮之法,所謂「君行一,臣行 武,士中 迫,不能趨也。 趨,非惟不疾趨,并不必徐趨 徐趨二法:疾趨,起屨 趨之事也。」 龜 布武矣。此云「堂上接武,堂下布武」者 徐趨,堂下布武即 將授志趨」,是執玉徐趨也。 一者但不疾趨耳,當徐趨也 延。 玉 ,舉前曳踵,蹜蹜 帷薄之外不趨,此 武」,以 **玉** 藻》「君 執玉重 疏 愚 數 疾 謂:《玉藻》趨有 爲 與尸 趨 如 離地; 尊 也。 慎,不敢趨也。 也。』注云: 行接武,大夫繼 卑之差,乃君 以不爲 疾趨張足,則 矣。 堂上接武 故《聘禮》記 徐趨 堂上 容 疾趨、 學前 『著徐 而 此 與 即 地 不

坐,本又作「俛仰」。」並,如字,又步頂反,後放此。跪,求委反,本又作「危」。授並坐不横肱,授立不跪,授坐不立。《釋文》:

者爲跪 其上。 敬。 爲 跪有 以 以 鄭 坐 又云『授立不跪,授坐不立』、《 爲 此道』之類,凡言坐者,皆謂跪 至」,曰『武 不立,爲煩人之起 「古人之坐者,兩 跪坐而 也。 跪 股 兩 煩 氏 危義,故 授 就 膝 尊 曰 《禮記 故《 蹠則 立不 着 又《詩》云『不遑啟 者 爾雅》以妥爲安坐。 進之」,則跪與坐又似 兩膝 地 俛 不 坐致 儀 **>** 跪 爲 仰受之。」 横 曰 「坐 兩 禮 直身而股不著於 著 坐。坐所以爲安,跪所 ,爲煩人之坐而受也 **広**肱,爲 膝著 右軒左』、《老子》曰『坐進 膝著 地 日 以以 而 而遷之」,日 地 受也。 害旁人。 地,因反其 坐 尻 伸 取 愚謂 居 著 腰 二,而 蹠 爵 夫以『啟』 及 也。 有 而 莊子》亦云 蹠 不 朱子 坐與 其 稍 股 小 蹠 日 則 跪 然《記 異。 傳 安者 而 而 不 爲 坐 坐 以 勢 以 跪 坐 日 授 立 對 啟 危 再 奠 於 皆 爲 疑 丛 爲

> 名通 請 謂: 妥爲 跪 脱 有 兩事 謂之坐,而 則竦身直股 謂之長跪 「長跪問故夫。」蓋坐以 居 則不 據 屨,蓋坐以 」、《索隱 跪,跪 膝,毋 跪即《大祝》九拜之「振動」 相 安定之坐 而 必脱屨,故拜不脱屨也。 似,但一 訓 7,亦曰 名不 坐不 有 ₩ E 啟 而 隱 尻 爲 稍 : 通 可謂 就 肘。」此 長跽。 則跪之爲 危一安,爲 跪 「跽者,長跽。」《 長 坐。 蹠,著屨則妨於 矣。 則 之跪 居之爲 坐之節 《史記》「秦王 《弟子 尻 危 故 就 小異 坐 蹠 孔 也 亦 坐 職》云:「亦 疏云: 然跪 而 也。 耳。 口 可 《古詩 坐故 稍 坐必先 知 見 短 亦 跽 跪 坐 跪 也。 或 或 愚 蓋 以 而

凡 拘,古侯反,徐音俱。 退,其塵不及長者。 爲長者糞之禮,必 「爲,于僞反。 糞,本又作『糞』,徐音奮。 扱,依注音吸,許急反。」○今按"扱 加帚於箕上,以 以 箕 自 鄉 而 扱 帚,之手反。 之。 袂 拘 而

曰:「加帚於箕上,得兩手奉箕,

退,以 埽 不恭。」 雖 蓋古者教養之道,必本諸孝弟。孝弟之心 賤者也,古之童子爲長者役,而其心安焉。 於糞,如柶扱於鉶 扱 爲吸者 吸,謂收糞時也。箕去棄物,以鄉尊者, 也。 箕膺擖,厥 也。 帚前,且埽且 扱讀如『尸扱以 再扱 生於惻隱、恭敬之端,而其行常在於洒 應對、 謂 一手捉帚,又一手舉衣袂以 袂 初 故讀從吸 以其穢物少,吸然則盡,不 孔氏 執 執 擁帚之前,場而卻行之。 中有 事 而往時 退,故曰『拘而退』。 、趨走之際。 曰:「拘, 帚。」以 **栖祭羊鉶」之扱,謂** 也。」「糞除布席,役之至 也。 也 袂 《弟子職》曰 障 拘 吕氏 也 蓋 而 人之有 退 大臨 當埽 謂 必讀 扱讀 得 拘 血 箕 障 時 埽 日 爲 扱 則 執 氣 扱 於 卻 時 H

> 扱當 敬 收斂所糞於箕也 其傲慢之氣,然後可與進於道。」 ,甘爲僕御 未有安於事人者也。 如 字。 《説文》: 而 不辭,是所以存其良心,折 「扱,收也。」謂 今使知長者之可 愚 以 謂

奉席如橋衡。《釋文》:「橋,居廟反。」

曰 : 然。 鄭氏 故 有首尾,卷則 云如 「奉席如橋之衡。 橋, 曰:「横奉之,令左昂 有首尾然』。」 井上桔橰,衡上 無 然首尾。 衡,横 此謂奉卷席之法 一低昂。」 右低, 也。 如 席舒 有 孔 首 則 氏 尾

請 將息 坐問 鄭氏 席 謂 衽 始 何鄉? 則 請 鄉,卧 ,弟子皆起,敬奉枕席,問何所 布衽席之法也。 日 ,有常則否。」君子之居恒當户 1:「順 請衽 問 趾 尊者所安也。 何趾? 因 於陰 《弟子職 《釋文》:「衽,而 陽 衽, **∀** □ : 愚 卧 趾 謂 席 審 先 反。 也 俶 生 此

三七

禮

記

卷

必

東首,然又或順乎一時之宜,故爲長

者

設衽席,必先請其所欲也。

方爲上。 席南鄉北鄉,以西方爲上。東鄉西鄉,以南

鄉,以 在也。 皆統於尊者故也。 也。」 在陰 在 鄭 之席,尊者在 面, 云: 之法,若禮 西坐是陰,其右亦在南 是陰,其右亦在西。 陰 氏 『賓席 介席 則貴右。 則 曰 南方爲上,南 愚謂: -E 凡坐隨 上右 西 牖 席 一,席 西南隅 前,南 階上,東 則 此 乎陰陽: 南 不 端 室 坐是陽 孔氏 故《士昏禮》婦盤 也。 然。 中 鄉 面,主人席 東 ,東鄉南上,故東 布 北 曰:「上,謂席首 面。」並 也。 坐是陽,其左在南 坐在陽則貴左,坐 案《鄉 坐在 ,其左在 鄉,以 席 之法 此謂尋常布 陽 飲 與 阼 西方爲 則 西。 也 階 酒 此 上左, 禮 上 饋 不 北 室 鄉 舅 上, 百 注 席 所 坐 西 中 西 坐

姑並席於奧,南上,婦餕,席於北墉下,

八

西上。

注:「丈,或爲「杖」。」「函,胡南反。丈,如字,「丈尺」之丈,王肅作「杖」。」○鄭若非飲食之客,則布席,席間函丈。《釋文》:

講説指 席不 問 説,用杖指畫 布 尺三寸三分寸之一,則三席是一丈,故 鄭氏曰:「謂講問之客 『侍坐於大司成,遠 云『容丈』也。 宜 席 於牖 須相對。 相對,容丈足以 畫,使 愚 前。 謂 相 一, 故 王肅 若講問之客,布 此 見 亦謂 孔 容 也。 近間三席。』席之制 氏 以爲『杖』,言古人講 指 杖 也。 日 -室 《文王世子》云: 畫 也。 中 也。 函 布 飲 猶 席之法也。 席相對,須 食之客,布 飲 然二家 容 食之客, 也。 미 鄭 講

❶ 「故」、《禮記注疏》此下有「使」字。

客,謂 饗食, 向,而 食,則 鄭氏以此爲講問之客,蓋據《文王世子》言 丈,不但講問爲然也 教學之分者。 席」觀之,則此乃敵 東向,而 然以下文「主人跪正席」及「客徹 主人 有 燕之正 凡以事相詣 主人 席於室者。 在 一禮,賓 在户 蓋非飲食之客,其布席皆函 北墉下 者。 内之西,西向 體之客,而與主人非 席於 其席蓋賓在西 南向也。 其席蓋賓在西 牖 間。 非飲食 若 習之也 南 尋 南 隅 常 隅 之 有 東 燕

主人跪正席,客跪撫席 弟子。 固 者,客坐主人乃敢安也。」● 去 鄭氏曰:「雖來講問,猶以客禮待之,異於 撫 重 辭,客踐席,乃坐。《釋文》: 謂 一席,謙也。 以手 撫之者,答主人之親 按 止之也。 再辭 而 辭。 固。 禮器》云: Ē 「重,直龍反。」 客徹重席,主 客 孔氏 踐席乃坐 徹,去也。 『諸侯 日

> 辭 禮 重矣。 也。 也。 也。」 席三重,大夫再重。』又《鄉 常待客之法也。 不辨大夫、士者、《禮器》謂 乃坐者,客還,履席將坐,主人待客坐乃 辭,再辭,止客之徹也。 故主人爲客設重席,客謙 『公三重,大夫再重。』是尊者多,卑者少。 重之。《公食禮》「蒲筵常,加萑席尋」,是 日 有三辭:一辭曰禮辭,再辭 大夫席再重,士不重。此客有重席 終辭。 此一種席而重之,則亦異乎大夫之再 客徹 愚謂:重席,蓋一種席 凡禮 重席者,不敢自異於主人也。 然大夫之重席,以二種 辭者,其辭皆不 踐,履 行禮之席,此尋 而 飲 自徹也。 也。 酒》之禮: 日固 而 行 重之者 客踐 解,三 《冠 席 华 古 席

禮 》「宿賓,賓禮辭,許」、《鄉飲酒》、《鄉射

客坐」。《 禮 記注疏》作「客安」。

0

客跪 皆敵者之禮,鄭氏以爲講問之客,非矣。 贄」,是也。 臣者 坐。此皆固 就西階; 辭,主人肅客而 敢不敬從。」此皆固辭而不行者也。 命,將走見。」又曰:「某也固辭,不得命, (士相見禮》)主人對 宿實,賓禮辭, 「則禮 撫 《士相見禮》「士見於大夫,終辭 席 客徹重席,主人固 而 辭 若固辭,則有行者,有不行者。 辭 辭 其贄」,是也。 而 客徹 許」、《士相 人; 行者也。 曰:「某也固辭,不得 主人固 重席,主人固辭」,此 「主人跪正席 見禮》「若嘗 一辭, 凡終辭,其 辭,客踐席 然後客 客固 乃 復 其 辭 爲

主人不問,客不先舉。 問 所爲 鄭氏 若客先舉,則近於卒遽。 其 來故。」 所爲來,然後客舉其所欲言者告之。 曰:「客自外來,宜問 愚謂: 客來 詣 其安否無恙,及 己 則主人宜

> 韻,「 之客」爲一節。 撥,足 將即 字、「同」字、「王」字爲韻,當爲一節,不宜與上文相屬。 爲韻,「前」字、「安」字、「顏」字、「言」字爲韻,「容」字、「恭 即席講問之禮,與上言賓主敵體之禮 作「策」,初革反。」〇孔疏以「足毋蹶」以上屬上「若非飲食 撥,半末反。 戒勿越。《釋文》:「作,才洛反。 席」字、「作」字、「尺」字爲韻、「撥」字、「蹷」字、「越」字 席, 毋 蹶。 容毋作。 蹶,本又作「蹷」,居衛反,又求月反。筴,本又 今按: 先生書策琴瑟在前 自此以下至 兩 手 摳 衣 「稱先王」,言弟子見 齊音咨,本又作『齌』。 不同。 去 公齊尺。 坐而 又其文皆用 遷之, 衣毋 師

敬也。 也。 名 蹶躓之貌也。策,篇簡也。 躡履之也。 以兩手提裳,令裳下緝 鄭氏曰:「怍, 摳,提挈也。 通 撥,發揚 跪 在前,謂當行之前。」 跪名不 足毋蹶者, 貌。 衣,謂裳也。 颜色變也。 通坐。 蹶,行遽貌。 謂 去 越,踰 勿得 地 齊, 坐亦跪也。 將就席之時, 尺,恐轉足 也。」 行遽,恐有 謂裳 戒勿越,廣 孔 氏曰: F 坐 緝 愚

易撥 謂: 變,故戒之。 日 「摳衣」者,深衣衣裳 作 開,行易卒遽,毋撥毋蹶,皆爲其 者,色 言去齊尺 慚 變 也。 相連 則 幼 者之色易 所摳者裳也,而 也。 趨走則 於 失 衣 慚

反,又蒼陷反。」者不及,毋儳言。《釋文》:「儳,徐士鑒反,❶又蒼鑒虚坐盡後,食坐盡前。 坐必安,執爾颜。長

容也。

也。 席前,若坐近 席尺』,是也。 猶守也。 異,故戒令如嚮者 敢近前,以爲謙也。 鄭氏曰:「盡後,謙也。 虚 玉藻》云『讀 ,空也。 凡坐好自摇動,故戒令安坐。 儳猶 空,謂: 書、食 後,則 食坐,飲食坐也。 暫也,非類雜。」 無 非飲食坐也。 《玉藻》云『徒坐不盡 則齊,豆去席尺』,是 作 濺 颜容也。 污席, 盡前,爲污席。 故 孔氏 俎豆皆陳 盡 長者,猶 盡後,不 久坐好 前 日 也 執

徐舒鋭反。」

事雜 之躁」,是也。 己言儳雜之。 謂長者方與甲言,未與乙言,則乙不得以 席之法,此又言既即席之法也。 儳長者之先而言也。」 者 先生也,互言耳。 曰:「《説文》云:『儳,互不齊也。」儳言, Ē 論 甲事,暫然 甲事、未及 《論語》曰「言未及之而言謂 雜錯長者之説。」 及,謂 乙事,少者不得 所 愚謂: 及之事 上言將即 毋儳言, 也。 輙 朱子 以 7 長

稱先王。《釋文》:「勦,初交反,一音初教反。說,如字,正爾容,聽必恭,毋勦説,毋雷同,必則古昔,

説。雷之發聲,物無不同時應者,人之言,既説又敬。勦猶擥也,謂取人之説以爲己鄭氏曰:「正爾容,聽必恭,聽先生之言,

❶ 「士」、《釋文》作「仕」。

禮 記 集

説,又不可也。故又當則古昔,稱先王。 當各由己,不當然也。 則古昔也。 古昔言其時,先王言其人,稱先王正所以 無識,既戒是二者,而或游談不根,妄自立 容,而恭敬以聽 時,既執爾颜,先生言及之,則當益正 言及之,則其容貌應對當如此也。 言之事,必稱先王。」 雷同,又不得專輙,必法於古昔之正。 得擥人説以爲己語。 必有依據。」 自「將即席」至此,皆弟子見師 孔氏 也。 曰:「語當稱師友 勦説則掠美,雷同 則,法也。言雖不當 愚謂: 則古昔,稱先王 此謂 即席之 長者既 所 則 其 無

侍坐於先生,先生問焉,終則對。《釋文》: 才卧反,後放此。」 坐

即席講問之法也

請業則起,請益則起。 鄭氏曰:「不敢錯亂尊者之言。」

> 鄭氏 之。』請益。 請 師更明説之。 也。 曰 : 「 業,謂篇卷也。 尊師 曰:『無倦。』 子路問政,子曰: 『先之勞 重道 也。 益,謂受説不了,欲 起,若今摳衣 前

父召無諾,先生召無諾,唯而起。 諾。 之稱諾,其意緩。是古今異也。」 諾,猶古之稱唯,其意急。 今之稱除,猶古 鄭氏曰:「應辭唯恭於諾。」 「父與先生呼召,稱唯,唯,除 其稱諾,則 似寬緩 驕 慢。 也,不 孔氏 但今人 -得稱 曰 稱

侍坐於所尊敬,毋餘席,見同等不起。 孔氏 鄭氏曰:「毋餘席,必盡其所近尊者之端, 之席,欲得親近先生,備擬顧問,且擬後人 爲有後來者。見同等不起,不爲私敬。」 不爲之起,尊敬先生,不敢 之來,闕在下空處以待之也。同等後來, 曰:「坐於近尊者之端,勿使有空餘 曲爲 私 敬

狹坐則起。」是非狹坐則不爲之起也。 也。」 愚謂:《弟子職》曰:「後至就席,

燭至起,食至起,上客起。

是也。 漱 行,趨進受命,所求雖不得,必以反命」, 者而起,且 《弟子職》曰「先生將食,弟子饌饋 執燭也。《弟子職》曰「昏將舉火,執燭隅 宜從之而起。」 謂尊者之上客也。尊者見之則起,故侍者 鄭氏 坐」,是也。 若有賓客,弟子駿作,對客無讓, ,跪坐而饋」,是也。 上客起,敬尊者。」 曰:「燭至起,異晝夜。 爲當給使令也。《弟子職》 食至起者,當起而饋 愚謂: 上客起者 燭至起者,當起 孔氏曰:「上客, 食至起,爲饌 1,既隨 流攝衽 應且 饌 也。 遂 曰 長 盥 而

燭不見跋。《釋文》:「見,賢遍反。跋,半末反。」

鄭氏曰:「跋,本也。 燭盡則去之,嫌若燼

《弟子職》曰「有墮代燭,交坐毋倍尊者,乃 見殘 言之,非是。 故不置於席旁而使之露見,恐先生見之而 取厥櫛,遂出是去」,是也。 辭退也。」 唯呼火炬 多有 生憎惡,亦所以爲敬也。注疏專以待賓客 跋,本也。」本,把 本積多 厭倦。」 爲燭,炬 ',則知夜深,慮主人 愚謂:不見跋,謂 孔 氏 處 盡則藏所然殘本,恐客 也。 曰 : 古者 小爾 蓋燭本不淨, 未 出 厭 雅 而棄之。 倦 有 · | | | | | | | 以或欲 蠟燭

尊客之前不叱狗。

駭尊者之聽。」方氏慤曰:「不以至賤然,舉尊爲甚。」方氏慤曰:「不以至賤然,舉尊爲甚。」方氏慤曰:「不以至賤然,舉尊爲甚。」私氏曰:「尊客至而主人叱人。

讓食不唾。

鄭 嫌若訾主 氏 日 : 人 嫌 食,亦不敬 有 憎 悪。」 也 吕 氏 大臨 日

\_ 0

則左右

屏而

待。

《釋

文》:

間

音

開

侍坐者請出矣。《釋文》:「莫,音暮。」 侍坐於君子,君子欠伸,撰杖屨,視日蚤莫,

禮 堂 伸。 鄭 故 請 者爲上諸 也。 蚤莫者,君子 侍 出 ,卑賤者請進不請退,退由尊者。今尊 ,脱之在側,若倦,則自撰持之也。 氏 矣。」 坐者得請出,體尊者之意也。 撰杖屨者,君子自執杖在坐,著 □ : 孔氏 事 以 愚謂: 日 ,皆是欲起之漸,故侍坐者得 或瞻視 君 「君子志 子 諸事皆君子厭倦之容, 有 庭 倦 影,望 疲 意 則欠,體 也 日蚤莫也。 0 撰 猶 視 屨 疲 升 則 持 H

侍 .坐於君子,君子問更端, 鄭 氏 日 : 離席對,敬異 則 事 起而 也。 對。 君 子 必令

侍 坐於君子,若有告者曰:「少間, 願 有復

復

坐。」

也 私也。」 白 鄭 「人俟間 也。 氏 日 屏 復 而 猶退 有 白 也,隱 復, 也。 則 也。」 言欲 屏而 少須空間 待,不敢 吕氏大臨 干其 有 日 : 所

毋側 或爲「肄」。」 反。 如字,徐市志反。 立毋 免,勞毋袒,暑毋褰裳。《釋文》:「嗷,古弔反。 髢,徒細反。 跛 深聽, 毋 坐 噭 毋 倨,音據。 袒,徒旱反。 應, 箕, 毋 寢 淫視, 毋 跛,彼義反,又波我反,徐 伏。 裹,起連反。」○鄭注: 毋 斂 怠 髮 荒 毋 髢 遊 ¬, 冠 毋 倨, 方寄 視 毋

嗷,號呼之聲 鄭氏曰: 耳屬於垣。 放 散身體也。 毋側聽,嫌 也。 毋 跛,偏任也。 曒 應。以 淫視,邪 探人之私 下,皆爲其 眄也。❶ 伏,覆也。 也。 怠荒, 不 側 敬。 聽,

0

側聽, 也。 謂 也。」 而 也。寢,卧 立 挈舉一足,一足蹋 怠 應答宜徐 髲 荒 也。 不 流 ,不得偏也。 身當恭謹,不得倨慢也。 覆 移 謂身體放縱,不自拘 嫌探人之私也。 也。 也。 孔 毋 徐 氏 垂 也。 髢, 髲 瞻視當直 而 日 餘 伏,覆 和 如 箕,謂舒展兩足,狀如箕舌 不得 「凡人當正 髲 也。 地。 也 也。 不不 髮以 立宜 高急 噭, 免, 得 卧當或側或仰 謂聲響高 纏 立,不 斂 如 流 如 去 跛,偏也 也。 齊,雙足 也。 韜之,不使 動 ПЦ 邪 也 得 遊,行 眄 傾 ,謂 也。 急。 淫, 欹 並 袪

《釋文》:「上,時掌反。」 侍坐於長者,屨不上於堂,解屨不敢當階。

孔

疏

蒙上侍君子爲義

非是。

垂

一如髲

也。」

愚

謂:

此節

通

戒容儀之法

者之側。不敢當階,爲妨後升者。」 孔氏鄭氏曰:「不上於堂,屨賤,空則不陳於尊

長者 脱 賤 則侍者得著屨上堂,而不得 曰 也。 ,故解於階下,不著上堂。 層 ,當就主人之階。 不上於堂者, 愚謂: 安坐 長者・ 必先 解 屨 脱 在 不 堂 屨 入室也。 若長者在室, 敢當階 加 ,侍者統 侍者屨 解 於 則

就屨,跪而舉之,屏於側。

當解於東階之東也。

者也。 藻》「 必 當階。」 鄭 屏 謂堂下東序之東,長者所 跪而 於側 氏 隱 日 辟 舉之,而轉 者,長者在堂,不敢 解屨固不當階矣,又必跪而舉之, : 而 愚謂 謂獨退也 後屨」,是 此侍 就 0 旁側 也 者退 就 猶 不見之處。 乃 對尊者著屨 而 著 著 長者不 也。 屨 也 屏 送之 亦 **宝** 故故 側 遷

或爲「還」。」 鄭而遷屨,俯而納屨。 鄭注:鄉長者而屨,跪而遷屨,俯而納屨。 鄭注:

鄭氏曰:「謂長者送之也。不得屏,遷之

而 俯 俛 也。 納 内 也 \_\_\_ 孔

:

謂: 不並 屨。 内屨 侍者 屨 跪,亦坐 不跪者,若跪 不當階 退 Щ 左納 ,必遷之轉就 長者送之,則當 則 右, 足向後,不 坐 右 階側, 納 鄉 左。 便 長 乃 也 氏 者 得 日 著 向 愚 雖

長者 而 屨 也

離 坐 鄭 離 氏 立,毋往参焉。 曰:「爲干人私 離立者不出中間 也 離, 兩 也 孔

中間 有二人併立,當己行路 有所論,則己不得輙往參預之也。 氏 曰:「若見兩人併坐,或兩 也。 不云離 坐者,道路非安坐之地 ,則避之,不得出其 人併 立 又若見 恐密

授。 男女不雜坐,不同椸、 《釋文》: 施 ,羊支反。 枷,不 枷,本又作「架」,徐音嫁,古 同 巾 櫛, 不親

故

不

·云坐也。」

本 無此 字。 櫛,側乙反。

鄭氏曰:「自此至『弗與同器而食』,皆爲

房。 此 同,置衣裳之具 氏澔曰: 東方,則女子在西方。 禮,男女之位異矣。 日 在 重 : 房 一别 四者,所以遠 男子在堂下,則女子在堂上。 也。 男女不 防 淫 植 椸, 亂 者 雜 可 也。 私 日 坐, 不 以 褻之嫌。」 雜 楎,横者曰 架衣者。」 經 男子在堂,則 坐, 巾以捝潔, 雖 坐亦宜然。」❶ 謂 無文,然喪 男 子 椸。 櫛 在 吕 堂, 以理髮。 氏 枷 男子 女子在 祭之 大臨 與 女子 架 在 陳

嫂叔不通問,諸 『嫂』。漱、悉侯反。」 母 不 · 漱裳。 《釋文》: 「嫂,字又作

漱裳。 也。 鄭氏 氏 日 日 : : 漱,澣也。 裳賤。 「諸母, 通問 尊之者,亦所以 謂父之諸妾有子者。 謂 庶母賤,可 相 稱 謝 也。 使漱衣,不可 遠别。」 諸 母, 諸 庶 母 使 孔 母

不可使漱裳,欲尊崇於兄弟之母,又欲遠

别也。」

又作「闖」,苦本反。」外言不出於梱。《釋文》:「梱,本外言不入於梱,内言不出於梱。《釋文》:「梱,本

女職織衽,男子不得濫預,故不出於梱。」在於官政,不得令婦人預之,故不入於梱。也。外言,男職也。内言,女職也。男職也。外言,男職也。内言,女職也。男職人者,不以相問也。」 孔氏曰:「梱,門限

女子許嫁,纓,非有大故,不入其門。 愚謂:此以嚴外内之限也。

繫屬,故恒繫纓。 日 子有宫者,亦謂由命士以上也。 大故,宫中有災變若疾病,乃後入也。 鄭氏曰:「女子許嫁繫纓,有從人之端 :「群公子之舍,則 「女子,婦人 通 纓有二時:一是少時常 稱 也 已 卑矣。」 婦 人質弱,必 《春秋傳》 孔 也。 女 有 氏

> 纓。」 繋香 許嫁時繫纓。 有二纓也。 鄭云:『婦人有纓,示繫屬也。』以 未聞。』又《内則》云: 『婦 因著纓,明有 纓。』鄭注云:『婦人十五許嫁,笄而禮之, 鄭以 纓。 爲佩 《内則》云: 『男女未 婦人之衿纓,即是五采者,故 繁也。 《昏禮》:『主人人,親説婦 香纓,不云纓之形制 蓋 以五 事舅姑,衿纓。』 采爲之,其制 冠笄,衿 此而言 是

而坐,弗與同器而食。
姑、姊、妹、女子子,已嫁而反,兄弟弗與同席

鄭云『示繋屬』也。」

也。不云姪及父,唯云『兄弟』,姪、父尊卑弗與同席而坐,弗與同器而食,未嫁亦然。那與同席而坐,弗與同器而食,未嫁亦然。那》云『别於男子』,故云『女子子』。 兄弟服》云『别於男子』,故云『女子子』。 兄弟

父尊卑殊,不嫌」,非也。 舉其中以該上下,避文繁也。 妹、女子子」,而下言「兄弟」,惟據姊妹者 則無以别其爲女,故兼而稱之。《内則》: 但曰「女子」,則無以著其爲子,但曰「子」, 而反」者,明雖嫁猶然也。上云「姑、姊、 七年,男女不同席,不共食。」此云「既嫁 嫌 也 愚 謂 : 謂女子子, 孔氏謂 亦子也 · 姪

父子不同席

無事乎遠别,故又明之。父子不同席,則 鄭氏曰:「異尊卑 亦不同器而食可知也 矣,又言此者,嫌父之與女,尊親兼極,或 與同器而食」,既據姊妹以見姑與女子子 上可知也。上言「兄弟弗與同席而坐,弗 也。此子亦謂女子子也。 也。 但言「子」者,蒙 愚 謂:注説 非

男女非有行媒,不相知名,非受幣,不交不

親。 耳。」○今按:據注當有「名」字,孔疏本爲長 姓名。 禮》「問名」,問女之名也。 鄭氏曰:「有媒往來傳昏姻之言,●乃相 綏,親之也」,是也。 相見」,是也。親,謂相親近,若「親御授 昏姻之禮定。交,謂交際往來,若「執贄以 天子加以穀圭。既納吉而後納幣 五兩,大夫、士玄纁東帛,諸侯加以大璋 之於男家也。幣,納徵之幣也。庶人緇幣 壻名。」 此以男之名達之於女家也。 《昏 曰:『吾子有惠, 貺室某也。』」鄭云:「某, 媒,謂媒妁之往來也。《士昏》記:「昏辭 《釋文》: 重别,有禮乃相纏固。」 「不相 知,本或作「不相知名」,「名」, 此以女之名達 愚謂: ,納幣而 行 知

故日月以告君,齊戒以告鬼神,爲酒食以召

0

八

鄉黨僚友,以厚其别也。《釋文》:「齊,側皆反。

别,彼列反。」

生,書 也。 食以 皆於廟,爲神席以告鬼神,謂此 妻者其禮亦若此。 史,間史獻諸州史,州史獻諸 書之以告君 鄭氏曰:「《周禮》凡取 友者、《昏禮》有饗送者之禮,鄉黨僚 莊、共之廟」,自大夫以上,有告廟之禮也。 之, 楚公子圍娶於鄭,亦言「布几筵,告於 公子忽娶於陳,先配 祖、禰也。《士昏禮》不告廟。 同官爲僚,同志爲友。 爲酒食以召鄉黨僚 云「稽其夫家」,蓋即據諸 召鄉黨 曰「某年某月某日,某生」,以告 愚謂: 謂 僚 日月以告君者,《内則 友,會賓客也。 此 也。 《小司徒》、《鄉師》等皆 《昏禮》凡受女之禮 而 判妻人子者,媒氏 後祖,陳鍼子 此 也。 然《左傳》鄭 州伯。 厚,重 也。 鬼神, \* 友蓋 意 爲 子 慎 譏 謂 娶 間 酒

> 女之别也 也,不可以苟。 亦有與於斯禮 者與? 昏禮慎 重 男 如 女 此 有 所 别, 以厚 故 其 男 合

文》:「取,七住反,本亦作『娶』,下『賀取妻』同。」 取妻不取同姓,故買妾不知其姓則卜之。 妾媵。 媵,取之於賤者,世無 鄭氏曰:「爲其近禽獸也。妾賤,或時非 姓。』鄭史伯之對桓公曰:『先王 生疾。」晉司空季子之告公子曰:『異 詹言『男女同姓,其生不蕃』。 姓之後,但卜得吉者取之。」 女,二國同 不取同姓,爲其近禽獸也。諸侯取 叔向云: 『内官不及同姓,美先盡 曰:「天地之化,專則不生,兩 「《郊特牲》云:『無别無義,禽獸之道 或時非 姓以 此媵 姪、娣媵,大夫、士 類,取於賤者,不 本繫。」 而子産之告 則生 顧氏 孔 聘后於異 矣,則 取 一國之 氏 (德合 炎 故 知 亦 也 日 相 武 何 叔 有

也。」 知禮 之而吉,則其非同姓可知矣。 别之義而已。 嫌、戒獨之義, 姓 務 不 和 娶 愚 口 謂: 可 也 姓 然男女同姓,其 而此節所言, 娶妻不娶 者 聲 非 無 但 聽 同 防 物 則主於遠嫌 姓 嫌 生不蕃 古 亦 無 兼 以 文。 有 戒 , 厚 遠 獨 是

賢遍反。」

小非有見焉,弗與爲友。《釋文》:「見,

之禮 其子有奇才異行,則可 鄭氏曰:「遠 自「男女不雜坐」至此,明男女遠嫌厚别 凡庸,而己與往來, "衆人所知。」 嫌 也。 孔氏 則於寡婦 有見,謂有奇才卓 與之爲友。 曰:「寡婦無夫,若 有嫌 若此 也。」 子

鄭氏曰:「謂不在賓客中,使人往者。羞,

貧者不 名子者不以國,不以日月,不以隱疾,不以 鄭氏 黨僚 客!, 不可 自謂 賀。」 乘壺 杖,八十拜君 進 强者,君子有所不責焉,所以 財、筋力,所以行禮也。 曰 不 而 也 日: 友而 以貨財爲禮、老者不以筋力爲禮。 賀,然爲酒 也。 酒、束脩若犬也。 言 則 有所慶 孔氏 所 進 已,非賀也。 以 禮許儉,不 於 故其 也。 羞者, 吕氏 曰:「某子,賀者名。 客。 命,一坐 食以召鄉黨僚友,則問 昏禮不賀,人之序 辭舍曰『昏禮』,而曰『有 大臨 古者 佐其供具之費,以待鄉 非 一再至。」 言賀,因俗之名。 曰:「賀者,以 然人之所無而 不斥主人,昏禮 謂 無 候 也。 通禮之窮 爲 進 年 愚 使某,使 五十 其 也 謂 物 禮 也 不 貨 始 遺 遺 可 雖 不

<sup>■「</sup>遠」、《禮記注疏》作「辟」。

山川。

故也。 名。 痛; 也。 指 之疾,謂若黑臀、黑肱矣。 以『日』『月』二字爲名也,皆爲其難 名甲午者,周末亂世,不能如禮,或以 丁爲名。 侯周卒」,是也。 不以國者,不以本國爲名,如他國則得爲 名,故桓十三年『衛侯晉卒』,襄十五年『晉 春秋傳》曰:『名,終將諱之。』隱 氏 擿 愚謂: 日,謂支干也,日以支干相 爾雅》「正 疾、病,避不祥也。」 此則 月,謂晦 日 ○《左傳》魯 然案《春秋》,魯僖公名申,蔡莊 : 殷家得以爲名者,殷質,不諱 無 此 、朔、弦、望,或曰謂十二月 時 在 月 常 可避。」 不以日月者,不以 申 日 語之中, 繻 陬,二月日 曰:「名不以國,不 杜氏 孔氏 疾在外者,尚可 爲 預日: 如」之屬 後 日 難 疾 阿乙丙 避 「名子 () 衣中 諱 配 也。」 爲 也 是 之 爲 名 不

> 名也。 以諱 Щ 以國 焉,固非 然,臣子尊其君父,聞名心瞿,有忠敬之心 諱避繁,故有 昌厥後」,「駿發爾 避之也。 廢 以牲畜則廢祀,以器幣則廢禮。 以器幣。 以官,不 司 是以大物不可 徒,宋以武公廢 則廢名,以官則廢職,以 事神,謂不正 則諱名之法可見矣。 禮之訾也 以山川,不以隱 《書》言「惟 周 人以 如此記與申繻之所言者 諱 私 稱其名耳,非謂他 事 ,以命。」 」,此即王季、文、武之 司 有 神,名,終將 空,先君 歷 疾,不 年」,《 Ш 周末文勝 愚謂 以 獻、武 111 晉以僖侯 詩》言「克 牲畜,不 則 諱 之,故 廢主, 處 周 廢 雖 X 而

男女異長。

鄭氏曰:「成人矣,敬其名。」男子二十冠而字。《釋文》:「冠,古亂反。」鄭氏曰:「各自爲伯、季也。」

Ŧi.

父前子名,君前臣名。

鄭氏 戰:『陷於淖,樂書欲載晉侯,鍼曰:「 氏曰:「君前臣名者,成十六年鄢陵之 以君則皆臣,故對父雖弟亦名其兄,對君 蓋至尊之前無私敬也。 夫於君前名其僚友,子於父前名其兄弟, 言臣,對父而言子,則皆稱其名。 成三年荀罃謂楚王曰:"以賜君之外臣 書」,皆名其父於君前也。 十五年申犀謂楚王曰『毋畏知死而不敢 名,至於他人則稱字。」 父母爲質,字受於賓爲文。故君父之前稱 前臣名其父也。」 賈氏公彦曰:「名受於 退。」「鍼是書之子,對晉侯而稱書,是於君 王命』,襄二十一年欒盈謂王行人曰『陪臣 曰:「對至尊,無小大皆稱名。」● 愚謂:成人雖爲之字,然對君 統以父則皆子,統 於他國君亦然。 胡氏銓曰:「 謂卿 孔 大 而 廢 宣 書

女子許嫁,笄而字。雖子亦名其父也。

笄。」 有一定,而笄之年無定。《内則》曰:「女子 鄭氏曰:「以許嫁爲成人。」 子言二十而冠,而女子之笄不著言其年也。 十五而笄。」蓋自十五以前,未可許嫁也。 ○自「名子者」至此,記男女名字之法。 必皆十五,即笄亦不必皆十五也。故於男 至十五始可許嫁,許嫁則笄矣。 許嫁則十五 愚謂:男子冠而婦人笄,然冠之年 而 笄, 未 許 嫁 陳氏 則 然許嫁不 澔 十而 日

禮記卷二終

「稱」、《禮記注疏》作「相

殺

在

俎

一,裁

在豆。

近醯醬者,食之主。

膾

肉

也。

食,飯屬也。

居人左右

,明其近

也。

鄭氏曰:「皆便食也。

殺,骨體也。 胾,切

## 禮記卷三

國史館纂脩孫希旦集解賜進士及第翰林院編脩

## 曲禮上第一之三

海,本或作『醯」,呼兮反。 深,以制反。 漿,子羊反,字亦作 羹,古衡反,舊音衡。 酒漿處右。《釋文》:「胾,側吏反。食,音嗣,徐音自 凡進食之禮,左殺右 人之右。 「將」。」○按:醢醬,孔疏本作「醯醬」,今從《釋文》。 膾炙處外,醢醬 膾,古外反。炙,章夜反。 胾。 [處内。 食居 人之左,羹居 蔥深處末, 醢, 徐 音

陽也。 耳。 無蔥 故在 醬也。』則醯醬共爲一物。 醬,兩物各别。按《公食大夫禮》『宰 云。 深 炙皆在豆。 燥 饌具之總名也。 皆通,未 東房授醯醬,公設之」,鄭注云:『以 陰,故居右。 肉切之曰胾。 客燕食之禮,其禮食則宜放《公食大夫禮》 近 人也。 爲陽,羹溼 在 右。 豆。 深,故知蔥 兩有之則左酒右漿。 孔氏 食羹係人言之者,明其在席前 知孰是。《儀禮》正饌 肉聶 食飯燥爲陽,故居左。 酒漿 深,烝蔥也。 曰:「熟肉帶骨 此醯醬,徐音作海,則 一爲陰。 骨是陽,故在左。 而切之曰膾、公食禮 處羹之右,此言若酒 深殊加 骨剛爲 或左或右者,順 陽,肉柔爲陰。 也。 言末者,殊加 此大夫、士與賓 醢之與醯,其 而臠 惟 愚謂: 有菹 肉是陰, 曰 殺,純 羹溼是 醢 若 夫 自 其 醯 之與 而 食, 也 最 陰 和

Ti.

四

西。」此 中,百 酨 《公食禮》及《内則》三牲之胾及牛鮨、牛膾 漿,故據所飲者言之也。 醢醬處内,處膾炙之内也。 醬屬」,是也 醢 有醢 牢禮》羞胾 皆有醢、特牲禮》羞庶羞四豆,有醢、化少 莝之,雜以 注 酒漿處右」者, 客自前 漿 《弟子職》云「左酒右漿」,是 也,庶羞之四 必矣。 也。 日則成矣。」凡胾與膾,必配 禮 作醢及臡者,必先膊乾其 跪、徹 《公食禮》:「酒在 亦 兩瓦豆,有 梁麴及鹽,漬以美酒,塗置 炙 豆數必偶。 當 內 飯齊以 膾 兼 酒漿 豆也。 也 炙處 有 酒 雖 醢 醢 外,處醢醬之外也。 授相者」,注云「齊, 醬爲食之主,下云 漿。 並 胾也,膾也,炙也 肉 一設,而 蔥 此 酒,清醴。 醬 漿 深 豆 有胾有 也 處 東,漿 處末者,處 食畢 也。 右, 醢 肉,乃後 設之。 膾 唐 乃 酒 在 但 漿, 则 禮 飲 云 處 稻 郵

> 胾中 若如鄭説 尊,不用於燕食也。 與 設饌之法 膾 内醢, 醢内醬, 而漿在羹之右。 者 其外殽,其外蔥涂,而 醯醬處内,爲在殽胾之內外。」今按炙、胾 夫、士與 曰:「庶羞設於稻南簋西,間容人。」此 在俎,食 殽之外,以 豆,酒漿在 、胾之間,蓋 、醢、爲庶羞之四豆、其設之當在 ,羹最近人 别, 胾在醬前, 其設要方。」《公食禮 賓客 在敦,羹及 也 則 觶。 其 ,其外胾,胾外炙,炙右 容 最 膾、炙、醢三者或左或右,非 燕食之禮,故無 其設之在左者,食最 遠 人 於 焉。《弟子 鄭氏 膾 食 酒在食之左。 炙、醢 也 謂:「膾 故 職》曰 言 醬、蔥 正 食與羹, 殺 末焉 豆,正 炙處外, 近人, 一處 膾 深 在 「羹 膾 豆 大 右 在 殽

以 鄭氏 脯 脩置者,左朐 日 「亦便食也。 右 末。 屈中曰 釋 文》: 朐。」 胸 其 俱 孔氏 反。」

也。 胸 食,有膾無脯,有脯無膾。」 其設之亦於膾之處。 酒有之。此燕食乃有脯者,用之以代 祭,擘之便也。」 析 脩 日 胸 訓 日 然也。 蓋釋而煎之以醢,而盛之則以豆 脯 治,治之乃 脯 捶, 訓 始,始 而 朐置左,末邊際置右,右手取 施 成。 薑桂 作 愚 即 《内則》曰: 謂: 鄭 曰 腶 成 注 脯 也。 脩。」胸,脯 爲籩實, 人》云: 脩 「大夫燕 亦 脯 與? 惟 中 『薄 也。 膾 飲 屈

客坐。食字、《釋文》無音、蓋如字讀之、今讀爲「飯食」客若降等、執食興辭、主人興、辭於客、然後

席 辭,告也。 之客,不敢食於尊處,故 於堂下然。」 鄭氏曰:「辭者,辭主人之臨己食,若欲 前 殺 裁問 賓席於奥,而主人席於阼,降等 容人之處,向 愚謂: 食,飯也。 執食而興,告於主 席 而 執食者自 跪執之。 食

> 不辭 辭。 也。 所親饋者也。 於客者,告客使反食於席也。 致辭,尚未離乎席前 主皆坐,設席對食,故非降等之客則不 於主人之不食而立而臨 客食,故 辭於主人,蓋當告主人以將往食於西序端 客,然與公食大夫有君臣之分者不同,其 食,賓執粱與涪,之西序端。 西序端,且又不告於主人而遽 人,言己欲食於他 賓左擁簠 必執食者,以其爲饌之主,而主人之 而遽之西序端者亦異矣。 執食興辭者,惟降等之客耳。 雖大夫相食敵 梁,●右執涪 然禮食無阼席,主人立 處 也。 也,則與大夫相 體之禮,必執 己也。此燕食,賓 以 《公食大夫禮 降。」又大夫相 此雖降等之 於賓及主人 往,蓋不 主 然興 人興辭 食之 食之 而 安 即 視 必

0

<sup>「</sup>梁」,疑當作「粱」。

五六

之客。 也。 以下,又皆言賓主之通禮,非惟降等之禮 等,則就主人之階」,而自「主人與客讓登」 言,則皆爲賓主燕食之通禮,非專據降等 等之客,其禮之異者惟此耳。若下文所 矣。又此言「客若降等,執食興辭」,則降 皆言興,則設 ·主人延客祭」,「主人未辯,客不虚口」,皆 注疏因此言「客若降等」,遂於下文 猶「凡與客入者」一節,言「客若降 饌 時主 人 與客皆已即 席 坐

祭之。 主人延客祭,祭食祭所先進,殺之序, 以爲降等之禮,非是。 徧

於牲體也。《公食大夫禮》:『魚、腊、涪 殽之序,徧祭之,謂胾、膾、炙也,以其同出 所先進,先祭之,所後進,後祭之,如其次。 事,不忘本也。 鄭氏曰:「延,道也。祭,祭先也。君子有 客若降等,則先祭。 主人

别。

胾在醬前,其設要方。

飯是爲卒,左

凡置彼食,鳥獸魚鼈。

必先菜羹,羹胾中

愚謂: 然。 並設席 醬不祭。」」 夫禮》先設豆,次設俎,次設黍稷,次設鉶。 進者先祭之,後進者後祭之也。《公食大 人之祭,實所以道客也。下言「延客食胾」 祭也。」」是也。主人祭則客從而祭,是主 於少施氏,孔子祭,作而辭曰:『疏食不足 之祭,故但自祭而已。《玉藻》:「孔子食 客祭也。 置之豆間之地,以報先代造食之人也。」 本,有德必酬之。 此禮食設饌之次也。 亦然。食,饌 《弟子職》云:「置醬錯食,陳膳毋悖。 禮食無阼席,故惟客祭。燕食賓主 而 蓋主人以爲己之食不足以當客 食,則主人必先祭以道客,而 具 孔氏 也。 故得 E : 《昏禮》、《特牲禮》亦 祭食祭所先進者,先 食而 祭者, 種 種出少許, 君子不忘 後

也。 體骨,至食則振祭,故曰「殽之序,徧 酒 後乃辯殺,未辯殺則猶未 之」,謂依所食之次第而祭之也。 殽,謂牲骨 殽、胾於外,則亦先祭食而後祭殽、胾與 外之法觀之,則當先設羹食於內,而後 客燕食,其設饌之次不可考。 祭食」,遂并言祭殽之法耳 右 殺之體骨非 漿。」此 在俎者,注以 朝夕燕食設饌之次也。 一,初時惟祭其肺,其餘 ·編祭也。 爲 献、膾、炙,非 然以設 食胾 此因言 此 饌 祭 之 設 内 與 ?

下同。」
下同。」
「一飯,主人延客食胾,然後辯殺。《釋文》:「飯, 三飯,主人延客食胾,然後辯殺。《釋文》:「飯,

飯,謂三食也。禮食三飧而告飽,須勸乃殽,辯於肩,食肩則飽也。」 孔氏曰:「三鄭氏曰:「先食胾,後食殽,殽尊也。凡食

牢禮》初食脊,次食脅,次食骼,後食肩,是 方還坐,更食取飽,不云『三飯延客食胾』, 三口也。 曰:「一口謂之一 辯於肩,故云『食肩則飽』也。」 客令食至飽,食殺得匝 與此異也。 起受漿漱口,受束帛之物,升,降拜,禮畢 故客三飧前未食之。然《公食禮》三飧竟, 三飧後乃食胾者、《公食禮》亦以胾爲加, 三飧竟而 彼文,是三飯但 云:『每飯歠涪,以殺擩醬,食正饌也。』案 食大夫禮》云:『賓三飯,以 更食,三飯竟,而主人乃道 殺之體骨非一,三飯先食殺,三 主人道客使之食胾也。 辯,匝也。 |食醬及他饌,而未食胾,故 飯。 也。 食胾竟後,主人道 愚謂: 客食載 案《特牲》、《少 涪、醬。」 鄭 賈氏公彦 三飯,食 所以 也。 《公 至

0

<sup>「</sup>扶晚反」,據下文,似當作「符晚反」。

記

也。 後編 必 説,實亦非是。《昏禮》云:「皆食以 然《公食》注「三飯、以殺擩醬、食 正饌 飯 舉,而《公食禮》不言舉數,蓋 **殺實爲二事,初** 而 矣,特未辯耳。 飯,三飲,不以醬、湆」,而不言食殽、胾之 「七舉」,子男「五舉」,則卿大夫食禮 禮》尸舉肺、脊,三飯,次舉獸幹及魚,次 已别見於他 .禮》「賓三飯,以湆、醬」,又云「賓卒食會 後云「皆祭舉 ,皆祭舉食舉 既 疏引《公食》注「賓三飯,以殺擩醬,食 案《大宗伯》上公「食禮九舉」,●侯伯 」,似已以此注「先食胾 食殺之體 竟,主人乃食胾以道客,客既食 骨也。 經,而 注謂 也。」先云「皆食以 非 食舉」,則是食涪、醬 以 殺擂 「先食胾,後食殺」,非 今不可考矣。 食胾之前 醬 」之説 而 其 食 一固己 禮 也。 涪 正饌」之 爲 節 然《特 胾 不 之詳 當三 醬」, 《公公 與 食 涪、 食 殺 然

> 食載 於其 體爲主,故食皆以是始終焉。 體 禮》亦必如此。 羞庶羞 魚,次舉 亦舉肺、 不必皆備,然先 中間一 而 後辯殺,其禮 四 獸 脊,三飯, 豆 肩,次舉骼,次舉肩, 食之耳 次 舉 此與客 食 次舉牢幹 骼 殺, 三飯竟乃食 亦不異也。 次 燕食之禮,雖 舉肩 次食胾, **\*** 庶羞卑, 少 蓋 意《公食 牢 食以 裁, 禮 次舉 其 牲 既 旧

主人未辯 ,客不虚 口

鄭氏 以 酳 孔氏曰: 蕩 八辯,乃 酳 口 ,但以漿漱 也。』案《公食禮》雖 ,異於《公食禮》也。」 日 : 得爲 「主人恒讓客,不自先飽,故 「俟主人也。 酳 П 也。 而 己。 **酳,《隱** 此是私 虚 設酒優賓,不 口,謂 愚謂: 義》云: 客,故 酳 也。 主 『飯 用 得 待 道 畢 酒 用

Ŧi.

<sup>0</sup> 「大宗伯」,據《周禮注疏》當爲「大行人」。

此。 弟子乃徹,趨 設、《公食禮》兼設酒、 安其所食也 也。 則禮之重者,食畢 考,若《士昏》及《特牲》、《少牢》則漿皆不 酳。] 此皆用 蓋酒之味濃厚而 意,食畢恐口有滓穢,故飲漿以滌盪之也。 客既食殽,則主人又緩食以待客之先 辯 客 云:「食三老、五 弟子職》云「左酒右漿」,又云 客不虚 者 食載 兼 食畢 虚 設 П 則 《士昏禮》:「合卺而酳。」《樂記 ·飲酒 酒 即 亦 口」者,蓋 酒者 走 漿 漱 道客 謂謂 飲漿謂之漱。 進漱」,亦但 也。 漿清薄,故其爲義之異如 而 更於大學,天子執 也 甪 食 食畢 祭祀,尸食畢 酒 主人雖先食以道客, 殽 食老、更之禮 漿, 矣。 以 酳 但 酳 演演 飲 飲 而 乃云「主 而 漱者,漱濯之 漿 漿而 先 賓 也,所 無漿,禮之 也。 但 生 而 飲漿。 已 人未 不 爵 獻之 以 食 是 香 口 演 飽 而

> 者同。齏,本又作「齊」,將兮反。相,息亮反。」〇此 辭於客,然後客坐。 卒食,客自前 陽 口 非 非 也。 也。 ,賓主相敬之道然也 重 於公食,而 主人不先客辯殺,客不先主 此 燕食禮輕 跪,徹 用 飯齊以 《釋文》:「卒,子恤反,後更不音 酒 用 以 漿 酳 授 虚 者 相 口,注 所 謂 以 主 鬼 人 爲 五 一人虚 神陰 句 舊

《公食大夫禮》「卒食,賓 跪也。 鄭氏 徹。 出 但 以降」,「大夫相食,卒食徹於 相 以授相者, 者 此客復坐者,尚有後事 曰:「謙 主人贊饌者。 愚謂: 飯齊, 也。 亦 主人 客自前 燕食禮殺 自, 所 跪,謂當 親 從 主 北 饋 也。 人 也 故 面 興 故 也。 坐 西序端 齊, 禮 解 席 客 取 食食畢 前 親 醬 〇自 不 粱 向 徹 屬 聽 與 席 之。 也 此 醬 親 即 而

下。」以文義考之,良是,今從之。

在

「毋嘬炙」之下,張子曰:「此簡錯,當在前『客不虚口』之

進食之禮」至此、記大夫、士燕食之禮。

侍食於長者,主人親饋,則拜而食,主人不

親饋,則不拜而食。

之親饋,則 饋之,則不必拜 長者之食,其子弟饋之,若長 耳,不在賓客之位故 興 之禮 解 氏 不隆。」 拜 非 而 勸 也 己當拜而 已,示敬也。 愚謂:不執 長 也。 者 食 後食; 疏以此爲侍從長者爲 也。 耳。 食興辭者,此 不 主人,即謂長者。 雖 拜者 若但 賤, 者 以 其子 不 敬 Ž 得 其 弟併 侍 而 禮 執 爲 食 於 食

共食不飽,共飯不澤手。鄭注:「澤,或爲[擇]。」

氏曰:「共食,謂

共

羹飯之大器也。

不

下半反。 謙 也 手 不 澤 絜 謂 也 捼 莎 禮 也。 飯 以 不澤 手。」 手, 爲汗, 孔 氏

器 曰: 食法,共食宜 共 食, 謂 同 事聚 謙,不得 居 厭 非 飫 禮食, 爲 飽 也 則 有 共 同

> 毋 爲扶晚反,今從之。 歠 JΙΪ 摶 飯 也。 飯 、悦反。」○「放飯」之飯,注疏如字,朱子《孟子集注 飯, 不不 不 古禮 澤 毋放飯 得臨 手 飯 者 食始捼莎手乃食、恐 用 亦 毋 手。 是 流 共 歡。《釋文》: 澤 器 手 盛 則 飯 汗 生 澤 爲 摶, 人穢 與 謂 徒 端 光 也。 反。 共

鄭 肆 蓋 穢 疾。」 知 欲 飯 也。 争 而 也,當棄餘於篚 ,去手餘飯於器中,人所穢 氏 11 也。」 無 飽 曰:「毋 所 孔氏曰:「取飯作摶,則易得 非 節 朱子曰: 謙 也 摶 流歠,長歠,飲之流行 飯 去手餘 「放飯、大飯、謂 無篚 爲 欲 棄 致 飯 於 飽, 於 會 器 大歠 不 會, 中 . 謙 食之 多 而 謂 嫌 /,是 放 所 簋 欲 放

字,徐云: 毋 古 獲。 咤 食, 『鄭横霸反,一 釋文》: 毋齧骨, 「咤,陟 毋 音護。」」 嫁 反 反。 魚 肉 齧 毋 五. 結反。 投 與 古 狗 並

食也。 曰 廉 與 鄭 魚肉,謂與 食不足, 不不 也。 狗骨,爲其賤飲食之物。 氏 日 咤食,謂以舌口 敬 毋齧 欲專之曰 : 以 骨致 反 人同器,已齧殘,反還器中, 咤 骨 魚 食, 者, 肉,爲已歷 飽 固,争 嫌 薄 則有聲,二則嫌 中作聲,似嫌 則 之。 取 口 口 日 脣 齧 固獲,爲其 一人所 獲。 可 骨 憎 爲 主 穢 毋 主 孔 有 爲 反 之 氏 不 聲 投

扶晚反。 毌 揚 鄭氏 飯,飯黍毋 E: 箸,直慮反。 「亦嫌 以 嚃,他答反,一 欲 箸, 疾 毋 也。 嚃 羹。 音吐計反,又音退。」 嚃,爲不 《釋文》: 一嚼菜。」 飯 黍

所

穢

之,欲速 以匕黍稷」,是 爲貪快,傷 少牢》云『廩 孔 氏 日 而 廉 飯 人概 也 又有 熱當 也 K 飯 聲,不 羹 與敦. 待冷,若揚去熱 黍 不 無 嚼菜,含 用 』,注云:『匕,所 敬 箸,當用 傷 廉 而 也 K 氣 歠 0 訓則 吞 故

> 所 謂 席上 古者 用 欲食之急,故不俟其涼而 上 手 愚 敦 而 用 也 謂 飯 黍 取 黍 ,以便尸食。」是也。 飯食不用匙箸,就器 已,不用箸也。 飯黍 當 於筵上」,賈疏云:「飯 黍 稷 用 上,非 毋 於 以 甑 箸 而 是。 者,黍 **^** 實 少牢禮 諸 少 敦者, 以箸取之。 飯 雖 中 牢 黍 黏 取 影上 禮 以 之,故 黍 非  $\approx$ 飯 箸,亦 毋以箸, 佐 之猶 飯 摡 孔 移之 時 6 所 由 用

反。 能 毋 絮羹, 亨。 亨,普彭反。 客歠醢 毋刺齒 窶,其禹反。」 主 毋 人辭 歠 醢 以 窶。 客 絮羹,主人 《釋文》: 刺 辭 七

羹 不 亦 也 鄭 能 爲 氏 詳 亨 刺 曰 「 就 於味 丛 器 辭 爲 中 以 絮羹,爲其 也。 調 窶,優賓 其 和 弄 鹽 口 梅,是嫌 也。 也。 詳 於 其 口 味 、味淡。 容止。 主 孔氏 也。 人 味惡 日 主 絮 歠 猶 也 醢 辭

法。 不足於味 也 醢 刺 齿 肉 若歠之,是其味淡也。 醬 刺 愚 也 取 謂 娲 醬 間 醢 宜 之留 但 鹹, 用 客若 以 爲 擩 弄 窶,言己貧,故 物, 歠 П 之, 無 , 不 是醬 敬 也 淡

也

濡肉齒決,乾肉不 音濡,字亦作『濡』。嘬,初怪反。」○今按:乾,音干。 鄭氏 記 牲 肉,脯脩之屬。 食之也。」 而 曰 炙,爲其貪食甚也。 反 飲 :「火灼曰炙。 《少牢》:「嚌之加於俎。」」 日 : 食之法。 置俎上。 「決,斷也。 愚 嘬者,不細齧之,一 謂 ○自「共食不飽」至此,雜 齒決,毋嘬 若食炙 濡 嘬,謂 乾肉堅,宜用手。 肉, 胾 肉,先當 一舉盡臠。 炙。 炙之屬。 《釋文》: 舉 以 孔 而 娲 「鴻 乾 氏 特 并 嘬 嘧

侍飲 ,少者反席 於長者,酒進 而飲。 則 起,拜受於尊所。 長者舉未釂,少者不敢 長者

飲 不 鄭 《釋 敢 氏 文》: 先 日 尊 : 「少,式召 「降席拜受、敬也 者。 盡 反,下 爵 日 皆同 釂 釂 子 妙 反。

尊 同 禮 敢 則 君卒 尊 者舉未釂,少者不敢飲」,與彼異者,君臣 賜之爵,則越 其設尊蓋於北 長者 長 長者 飲,卒爵 嫌 卑 者 面 鄉 飲 尊。」 闊 私飲之禮也。 有鼻,鼻嚮君,示君專有此惠也。 若諸侯燕禮、大射,設尊在東楹之西, 以 爵,若爲君嘗酒然。 至己席前 親 禮各有當也 賓客自居,故長者舉未 絶,侍君 酌 而 而 俟君卒爵,然後授虚 孔氏 賜 席 而授之也。 墉下與? 之,故於尊所拜受,不敢 飲 再拜 曰: 者 必拜受於尊所者,此 無 稽 陳尊 爲 鄭 首受,登席祭之, 《玉藻》:「君若 侍 賓 氏 私飲或在室中, 長 之所,貴賤不 客 少者不 曰:「燕飲之 愚謂:此 者 之嫌 釂,少者不 爵。」此「長 而先飲, 放先 敢飲 若 侍 煩

謂: 飲 且記 受於尊所」之文,而謂 者合,遂以此爲燕禮。 尊嚮長者,故往尊所,嚮長者而拜。」 注之失,而 注乃云「燕飲之禮鄉尊」,其説 之正。其設尊之所,於禮亦無文可言 耳,固非臣侍君燕之禮,亦非大夫、士燕飲 所」、《鄉飲酒》亦無 所」,當是燕禮,而《燕禮》不云『拜受於尊 夾 在 東 疏以「鄉尊」之言與《玉藻》言「唯君 鄉 之禮 尊, 阼 西 飲 侍飲於長者,謂長者 明言「長 列 西總 酒 示不 耶? 尊 及 資在 尊 卿 反以 敢 大夫燕,則設尊於房 者」「少者」,安可以 又疏 面 專 户 嚮 注 惠 西牖 謂 南 疑 此 也 燕禮 ,酌者嚮北。 經 其文不具,不以經 語,疑是文不具耳。 又以《燕禮》無 前 之闕,亦可 私 今云『拜受於 二酌 南嚮,使賓 飲 者在 而 殊 爲君臣 少者侍之 不 户之間 時 尊 怪 面 可 主人 主 東 尊 矣。 曉 拜 īF. 而 得 燕 愚 尊 西

面」,及「尊鼻嚮君」,亦皆非是。説見《少

儀》。

長者賜,少者、賤者不敢辭。

屬。 鄭氏 曰:「不敢 吕氏大臨 亢 日 禮 也。 辭 讓 賤 之節 者, ,行於賓 僮 僕 之

賜果於君前,其有核者懷其核。《釋文》:「核,户

主之際而已。

體不敵

,則毋敢視賓客。」

革反。」

寫。《釋文》:「溉,古愛反。」御食於君,君賜餘,器之溉者不寫,其餘皆鄭氏曰:「嫌棄尊者物也。木實曰果。」

之器。 寫 傳之也。 器中乃食之也。 鄭氏曰:「重汙辱君之器也。 御食非侍者,但是 其 餘 不溉,謂 皆倒寫 器 可 滌 之。 萑竹之器 勸 溉 動有品 侑 者 曰 不畏污, 愚 君食也。 御。」 謂 也。 御 溉,謂 寫者, 則 孔氏 食與 不 侍 須 傳 陶 謂 日 倒 梓 倒

禮記集解

侑 侍食 不同 以其食本己所當得故 君食而 ,則食畢 侍食者,侍君 已。 執 故君 飯齊以授從者,不待君賜, 食畢 而 也 食。 或或 以 御 餘賜之。 食者, 但 勸

屬。」 也。 孔子 此 者之神亦 以祭妻,不敢以 妻,不但名分有所不當,而 主之,明有尊也。 氏溪曰:「父不祭子,夫不祭妻,各使其 已,不可以祭先祖。 朱子曰:「餕餘之物,不 謂 君 平日四時之祭。若在喪,則祥禫之祭 賜 食 賜 顧氏炎武曰:「父不祭子,夫不祭 則 必不安,故 腥 則 或爲餕 鬼神之餘復以祭也。」〇戴 非 此與餕餘 餕 餘,故但 雖父不以祭子,夫不 其當祭則有代之者。 餘、熟之以 可 以 以 不祭,義不 尊 īE. 祭先祖。 臨 席先 祭 卑,則 先 嘗 祖 相 子 死 而 口 如

大 上言 見 進饌於父,妻進饌於夫,則恐未有不祭者, 惟有卑餕尊者之餘,若父餕子餘,夫餕 也。 肺,夕深衣,祭牢肉」,若日中而餕,則不祭 則非 以 祭,以其卑故也」。 觀《特牲》、《少牢禮》尸 必祭。」愚謂: 餘、尤禮之所未嘗有也。陳可 則祭之」,「若父得子餘,夫得妻餘,不 解 未嘗不行。」〇 人之餘,及子進饌於父,妻進 也。 「祭」字爲「祭食」之祭,謂「食尊者之餘 而及於餕餘不祭之事,忽於其間言吉 報先代始爲飲食之人,若 所以爲敬。故《玉藻》「特牲三俎,祭 雖尊者之餘,亦不可用以祭矣。 「御食於君」,下言「御同於長者」,故 朱子 與戴氏、顧氏之説 食人之餘不必祭固已,若子 此 節 愚謂:食之有祭,所 諸家之説 於饌 具 用 饌 不 皆 皆祭之,可 於夫 食餘以 大謂:「食 司 可通,但 等不 且 注 須 妻 疏

字·宗·宗·宋·宋·景·宗·辞·《墨·祭·未免不倫·又似朱子之説爲長也。

「坐,才卧反,又如字。」御同於長者,雖貳不辭,偶坐不辭。《釋文》:

他人並 重也。 同。 侍長 也。 唐 職 漬 不必在己也。」 愚謂:此御 爲己設,故不 爲彼客設饌, 設耳,若辭之,則嫌當長者。 不辭,盛饌不 鄭氏曰:「謂侍食於長者,饌 謂 旋 貢 者而 而 御同,謂 重殺膳 貳,唯 坐,主人設饌,己不假辭,以主人意 雖重殺 ,益也,謂食盡 「三飯二斗,左執虚豆,右執梜匕, 與長 嗛之視。」侍 辭。 侍 也。 而召己媲偶共 爲己。」 者 膳 食 同饌 而 辭之,爲長者嫌。 而 不 云:偶,二 與 ·辭者,此饌本爲長者 與上「御 而又益之也。 長者同 孔氏曰:「御,侍 長者同食,主人 偶,媲 食,此饌本 同於長者,謂 具與之同 食於君」不 饌 也。 也。 也。 《弟子 偶 謂 貳, 也 與 不 或 坐

> 之意不專爲己也。 辭之,則嫌長 益長者之饌,并益 坐同食,雖非長者 者不廉 ,於貳饌亦不辭,以主人 己饌 也。 若與 則 不 敵 必 辭。 體之 人偶 若

帝。 華,胡瓜反。 之。《釋文》:「爲,于僞反。 之,巾以綌。 爲天子削瓜者副之,巾以絺。 羹之有菜者用梜,其無菜 一梜,古協反,沈又音甲、《字林》作『筴』,云:『箸也。』」 有肉 可。 提。」 鄭氏曰:「梜猶箸也。今人或謂箸 齕,恨没反,徐胡切反。」 調者,犬羹、兔羹之屬,或當用 無菜者,大羹諳也,直 孔氏 綌,去逆反。累, 爲 曰: 大夫累 「鉶羹有菜交横 力果反,一音如字。 副,普 之,士疐之,庶 者不用梜。 逼 反。 爲國 絲, 勅 非 君 己。 《釋文》: 匕 爲 者 也。 梜 宜 反。 监 華 梜 其

斷之,而巾覆焉。華,中裂之,不四析也。鄭氏曰:「副,析也。既削又四析之,乃横

禮 記 集 解

亦不 疐,瓜之連蔓處 常之日,當謂公庭大會之時也。」 去 疐,謂脱 諸侯,直 之。』郭璞云: 也。 巾覆 刊其 巾用麤葛覆 斷 削 電而 去 刊 倮 覆 上 皮 連 諸侯禮降 也 龁之。 也。 而 而 也。 而 華處。 謂 削 進 析 而 而 之也。 庶 絲, 爲 不 中 『食啖治擇之名。』大夫降 進之。 故破 齕之, 不横 巾 四也,又横切之,而細葛爲 此 人,府史之屬。 也 士不中破,但去疐 細葛也。 裂横斷 覆 削瓜等級 華,中 也。 而 《爾雅》云:『瓜 不四析,亦横斷之, 而已,不巾 疐之,不中 斷。 爲天子削 破 不同, 也。 监 孔 給,麤 而 非 愚 氏曰 齧 覆 裂 瓜,先 横 謂: 謂 日 斷 也。 也。 平 華 於 横 葛

不御 父母 矧,怒不至詈。 食肉 有疾,冠者 不至變味,飲酒不至變貌,笑不至 疾止復故。《釋文》:「冠,如字,徐 不 櫛,行不 -翔,言 不 惰,琴瑟

> 古亂 反,又詩忍反。 反。 惰 徒禾反,一 晋,力智反。」 音 徒 卧 反。 矧,本 又 作「哂」, 失

六六

之失。 謂: 味。 出言益須謹重。 之,則爲談笑之常,在 弛之道也。 協 御,憂不在樂。 鄭 不齊之時可有邪物之干也 處,時或戲謔,亦人情所不 食少則味不變,多食則 惰, 憂不 代氏曰: 孔氏 一本曰矧,大笑則見。 言之惰慢不 笑不至矧,怒不至詈,憂在心難變也。 猶《祭統》言齊則「防其邪 日 在私好。 「不櫛、不翔,憂不 ]:「猶 惟父母 不至變味、變貌,憂不在 許 故有同此一言,在平日言 正 惰,不正 食 有 無 有 肉,但不 疾, 時 復故 憂出之,則 口味變也。」 則憂存於心,而 免,所 而 之言。 爲 可, ,自若常也。 容 許變味耳。 然朋 物 也。 謂 琴瑟 有 張 儕 初 惰 言 非 慢 相 愚

有憂者側席 而坐,有喪者專席 而 坐。 酢 王 也 席,並不重也。」 哭後, 苄翦不納, 自齊 賤 受醴」,是側猶 專 接 鄭 云 7猶單 氏 有 人,不 」之專同 氏 ■『楚有子玉 《漢 曰:「專席 重  $\Box$ 也。 : 席之禮,若父母 · 王嘉、 布 側 他 猶 面 特也。 孔氏 席。 特 傅 與 ,則文公側席 也 胡氏 ( 郊 喜》、《魏 曰:「案《聘禮》『公側 專 專猶單也。 衰以 始 席 側 特 銓曰:「側,不 喪,寢苫無席,卒 而 席 牲 坐 下,始喪 而 • **\*** 降 徐弈 而 坐, 憂不 君 坐。」 居處 吉時 專 傳》 席 而 也 皆 IF. 貴 在 而 有

水 『水潦 鄭氏 潦 士 愚 降,魚鼈 台、 謂 降,不獻魚鼈 E : 士偃 降 水潦 下,魚 難 「不饒多 得, 請 降 於荀罃曰:「水潦將降。」杜 謂 鼈 故鄭云『不 豐足,不 夏時 也。」 也。 孔 饒 饒 襄 多。 益 氏曰 + 其 年《左傳 多。」」 :「水潦 或云

> 鼈 不 水 潦盛昌。」古者三時取 寅 預 曰:「以 非 蟲 日 以魚鼈爲禮, 日 方孕,又水大則 : 其時 「水潦 向 水潦之不時。」《月令》季夏"「 夏 也 恐 方降。」哀 有 非 其 久 地 魚 雨 魚、惟夏不取、蓋 + 鼈 也 定 0 五. 難 年 四 水潦 得 夏吴大 年春 故 降不 也。 Ξ 宰 月 獻 居 水 魚 嚭 Ш

獻 拂,本又作『佛』,扶弗反。 鄭氏 鳥 經 孔 爲 行 小竹籠 賓客禽獸之類。《少儀》曰: 人 氏 雙,則執一雙以 者佛其首, 養,則不 日 曰:「爲其喙 「王云:『佛謂 以冒之。 - 喙害 畜 鳥者則 畜,許六反,徐況又反。」 將命。」鳥喙 害人也。 人。 畜,養也,養 取 弗 愚 首 佛 佛, 謂 戾 也。 能 「其禽加 轉 戾也。 則 獻 傷人,故 之。」 馴 鳥,若 釋 \_\_\_\_ 鳥 於 蓋

「弈」,據《三國志・魏書》當作「奕」。

獻民 獻車馬者執策緩、獻甲者執胄, 量鼓,獻 釋文》:「契,苦計 齏」,同子兮反。」 竹籠 執 言之與? 虜者操右袂,獻粟者執 以 冒之」,未知何據 將 孰食者操醬齊,獻 畜鳥 必 反。 佛 弗佛者,無所 其 量,音亮,又音良。 首於 ,豈因當時有此 翼 田 右 下 宅者操書致。 契,獻米者操 獻 事 鄭 乎佛也。 杖者執 齊,本又作 謂 法 用 末, 而 小

馬。 車馬 胄 設 有 之。契,券要也,右爲尊。 鄭氏曰:「凡操執者 甲 其 孔 ,兜鍪也。 執 也。 大者, 甲 氏 不上於堂,但執策、綏呈之,則知有 (日:「: 鎧也。 以呈之。 胄, 舉其 兜鍪 民 策是馬 謂鎧爲甲者,言如 虜,軍所獲也,操其右袂制 小者, 也。 杖末拄地不淨,故執以 ,謂手所舉 杖,綏是上車之繩 鎧大,兜鍪小,小 便 量鼓,量器名。」 也。 以告者 甲, 龜 鎧 鼈 也 也 者 之 車

等。 也。 著土 可爲己有,故得有獻。」 今此得獻田宅者,或有 尊者也。 致,謂圖 食可知。 緩,故云『書』。 但米可即食爲急,故言『量』。 米云『量』則粟亦量,粟云『契』則米亦書。 以量米,故云量鼓。」獻米者執 義》曰:『東海樂浪人呼容十二斛者爲鼓, 之,右爲尊,以 粟,粱稻之屬。 以左手,操囚之右袂,用右手 自 嚮 量是斗斛之數,鼓是量器名也。 一,故 然古者田宅悉爲官所賦,本不屬民, 以 板圖 淨 書於板,丈尺委曲,書之而致之於 若見芥醬,必獻魚膾 以上諸物可 頭 授 書畫以致之,故言書,又言致 先書 醬齊爲食之主,執主來, 人。 契,謂兩書一 爲 民 動,故不云致。 虜 尊 重勳爲 愚謂 也。 征 以 伐 札,同 之屬 粟可久儲爲 米,六 君上所 器 防 所 凡以物相 以 其異心。 獲,獻之 也。 呈之。 米 而 田 賜, 别 則

六八

授受而 以 施 之,不必以田宅不得獻爲疑 不然矣。 命,即豆區之類,非大器也。」是孔氏亦以《隱義》之説爲 鐵以鑄之。1但禮之將命,置重而執輕,鼓可操之以 『鼓,量名也。《曲禮》曰:「獻米者操量鼓。」取晉國一鼓 傳》昭二十九年「賦晉國一鼓鐵」,正義曰:「服虔云: 十二斛則不可執以將命,非也。 鏘鳴按"《左 疏謂「樂浪人呼容十二斛者爲鼓」,然器容 不必用契矣。鼓,量名,其容受之數未聞。 於倉,故獻其契。 者,受獻者欲 用,故書一券而中别之,留其左者,獻其 徒以杖末不淨也。 者不然。 處右宰穀臣之妻子。 歸 州 田 獻 有上下者,皆以 故獻 於韓宣子。 田,如鄭歸 取 杖執末,而以上端授 粟,則執券而合之。 米操量鼓,則并米獻之, 粟可久藏,主人或未 祊田於魯,子産爲 獻宅,如郈 其上授人,惟 古時 此 類固多有 成子分 粟藏 有 宅 豐 右 非 即 刃

凡遺人弓者,張弓尚筋,弛弓尚角,右手執 席,左手承弣,尊卑垂帨。若主人拜,則客還 解,左手承弣,尊卑垂帨。若主人拜,則客還 與客並,然後受。《釋文》:「遺,于季反。弛,本又作 與客並,然後受。《釋文》:「遺,于季反。弛,本又作

也。承弣卻手,則簫覆手與? 從客之左,右客,尊之。接下,接客手下 拜,拜受也。辟拜,謙不敢當。 磬折則佩垂。授受之儀,尊卑一。 鄭氏曰:「尚筋、尚角,弓有往 曰:「此爲敵體,故 於堂上則俱南 之簫,簫,邪也。 則張之、未定體則弛之。 令其下曲, 隤然順也。 木爲身,以角爲 面,禮敵者並授。」 面 弣,把中。 ,筋在外面 稱遺也。弓之爲體,以 遺 簫,弭 人 無 張時曲來 帨, 時,已定 來體,皆欲 鄉與客並, 由,從也。 頭 佩 也。 主人 巾 孔氏 也。 向 謂

鞘。 弓頭 遺人 還 卑 驸 覆 把,以授主人。 覆 謂 可以 弛 内 倒 而受之,卻左手接客左手之下而承弣, 地 辟,猶 執弓也。」 右手,執弓下 弓把 時 ,右手覆簫者,若主人用右手承弣,便是 右手捉弓下 不淨,故 然皆當磬折垂帨也。」 『秋合三材,冬定體。』則合三材之時 執簫, 獻人,故此注云『未定體則弛之』也 (角嚮其上,弓形亦曲向下也。 稍 反 故 張 也 遺 剡,差邪 逡巡也。 人 白 謂客覆右手,執弓下 自 地 則 外 執 朱子曰:「賓主雖或 道貴 筋在 使 頭 之,以上頭授人,示敬 知是執弓下頭者,下頭 頭,又卻下左手,以 似簫,故謂爲簫, 筋 主人拜客既竟,從客 必 右 在 曲 知 ,主人推客居右, 上 内,角在 客主俱卻 弓 愚謂: 身 # 頭 曲 也。 向 《弓人》 左手 又謂爲 一尊 外。 簫 其 承 在 也 驸 下 左 弓 今 弓 承 又 拄 客

> 還辟 磬折 君臣 遣者 有箭 之兩 並 客之手下而承弓弣也。 主人在其左也。 謂君臣相授受之法。 而 言者,文省也。 左者,主人之位 下之異,而以 主佩倚則臣佩垂,主 一授 其儀皆以磬折垂帨爲 也。 辟拜,逡巡以避主人之拜也。 爲 則 道 ,故賓主皆垂帨 頭 士,主人爲大夫,是賓主尊卑不同 帨 、《士喪》記 此 賓主授受之禮,以訝受爲正 垂。 所 執 近撻者爲上。 尊卑,如 恒 鄉與客並者,與 者 接下承驸者,卻左手以 在東,客南 所謂撻。❶ 其 也。 此雖尊卑不 佩 下 亦覆 兩 垂 度也。 頭 主人拜,拜受也。 大 則臣 也 夫 右手執簫,不 帨, 面 弓簫 相 而 客同 下篇云: 弓 佩委。」此 佩 問 同 授之,則 由客之 雖 當 而 遺 巾 矢 面 無 一,所 此 也 + 非 тi

❶ 「士喪記」,據《儀禮注疏》當作「既夕禮」

孔 主 客 乃 乃使 氏 人之拜受皆不答,於《聘禮》可以 並 一授者 謂「使者執弓不能拜」,非 人,弓非己物 以 授弓 禮 故 輕 也。 也 凡 客 也。 爲 不 使 拜 見之。 者 送 者,

進劍者左首。

劍 人欲 劍拊 鄭 首,首尊,左亦尊,爲宜也。」 襲之,加夫繞」,是也。 左首,爲辟其刺刃故 劍首爲尊,以尊處授 「以劍鋒 有匣,又有衣、《少儀》曰『劍 氏 殺公若, 僞不 環也。《春秋》魯定公十年,叔孫之圉 曰:「左首,尊也。」 末授之。』鋒是末,則 解禮而授劍 也 主人也。 左首者,主人在 孔氏 愚謂: 環是首 末,杜 則 對 曰:「首, 啟 授 櫝 亦 云: 執 也 左 劍

鐓,本又作「錞」,徒對反。」《釋文》:「鐏,在困反,舊子困反。 矛,本又作「釤」,音謀。進戈者前其鐏,後其刃。 進矛戟者前其鐓。

敬。 也,如 下,猶 刺 中 胡,直刃 若並授則左右也。」 平向人,敬也。 鐵爲矛戟柄尾,平底 半,横刃下接柄 作戟,兩邊皆安横刃,長六寸,中刃長七寸 直刃長 鄭 『前』『後』者,互文也。 四寸,並廣二寸,用 而 日鐓,取其 利,故 ,其横 矩者曰 氏 矛,如鋋 티 : 戟 爲 八寸,横刃長六寸,刃下接 日援。 不持 首。 刃長 而 後 胡,其中刃長七寸五分直前 鐓 横 地。」 向 而 鋭 刃 七寸五分枝出 安 亦應並授。 戟三鋒,其横 處又長四寸半,並廣寸半。 三廉。 人。 敬 底 刃 日 以鉤害人也。 也。 鐏在尾而 但 孔 如鐓。 鐏 愚謂: 頭 氏 戟,今之戟 若相對則 取  $\equiv$ 不 曰:「戈,鉤孑戟 不云左右而云 其 兵 向 柄,下也。 刃六寸 戈之横 而 鐏 鐏、 鈍, E 磬 地 爲 前 折 鐓 也。 刃當 向 柄 後 鉤 者 者 下 平. 雖 刃 處 也 也 爲 底 向 在  $\Box$ 頭

進几杖者拂之。

授尸於筵前」,此進几者必拂之也。 《聘禮》醴賓,「公升,側受几於序端,宰夫内拂几三,奉兩端以進,公東南嚮,外拂几三,《少牢禮》賓尸,●「主人西面,左手執三」、《少牢禮》賓尸,●「主人两面,左手執三」、《少牢禮》寶賓,「公升,側受几於序端,宰夫人第九三,奉兩端以進,公東南嚮,外拂几点。」

人右手亦有力,故用右手牽掣之。犬好亦是遺人,而言效,亦互文也。馬羊多力,離齧人,右手當禁備之。」 孔氏曰:「此鄭氏曰:「用右手便。效,猶呈見也。犬效馬、效羊者右牽之,效犬者左牽之。

不齧人,不須防,此是充食之犬,故防之。」儀》:『獻犬則右牽之。』彼是田犬、畜犬,龇齧人,故左牽之而右手防禦也。《少

執禽者左首。

鄭氏曰:「左首尊。」 吕氏大臨曰:「執鄭氏曰:「左首尊。」 吕氏大臨曰:「執難,正有執雞是也。 魯擊,若卿執羔,大夫 數氏曰:「左首尊。」 吕氏大臨曰:「執

頭奉之。」

飾羔雁者以績。《釋文》:「績,胡對反。」

不言繢。此言繢者,彼是諸侯之卿大夫『下大夫以雁,上大夫以羔,飾之以布』,並爲雲氣,以覆羔雁爲飾。《士相見禮》云爲雲氣,以覆羔雁爲飾。《士相見禮》云外氏曰:「繢,畫也。諸侯大夫以布,天子鄭氏曰:「繢,畫也。諸侯大夫以布,天子

❶「少牢禮」,據《儀禮注疏》當作「有司徹」。

夫以雁,飾之以布」,言飾,則繢可知。」也。」 陸氏佃曰:「案《士相見禮》『下大卑,但用布,此天子卿大夫尊,故畫之

必有異飾,疑陸氏之説得之。 愚謂:天子、諸侯之大夫無異贄,則亦未

鄭氏曰:「慎也。掬手中。」 孔氏曰:受珠玉者以掬、釋文》:「掬,九六反,兩手曰掬。」

置在手中,不用袂承之,①恐墜落也。」

受弓劍者以袂。

鞅氏曰:「敬也。」 孔氏曰:「不露手取欺氏曰:「敬也。」 孔氏曰:「不露手取此言受弓劍於尊者之法也。《大射禮》此言受弓劍於尊者之法也。《大射禮》。 一人,用衣袂承接之,以爲敬也。」 愚謂:

飲玉爵者弗揮。

鄭氏曰:「爲其寶而脃。」 孔氏曰:「揮,

振去餘也。」 愚謂:揮爵而去其餘瀝,易

於失墜也。

《字林》先自反,沈息里反。使,色吏反,下並同。」 凡以弓劍、苞苴、簞笥問人者,操以受命,如 使之容。《釋文》:「苴,子餘反。簞,音單。 也。 器,亦以葦爲之。 裹魚肉用茅及葦也。 以苴之。』《既夕禮》云:『葦苞長三尺。』是 麕,白茅包之。』《内則》云:『炮取豚,編 以草藉器而貯 之屬也。故《尚書》云:『厥苞橘柚。』苴者 曰 笥。」 葦,或以茅。簞笥,盛飯食者。 鄭氏曰:「問 或自有事問人,或因彼有事而問之, 孔氏曰:「苞者,以草苞裹魚 猶 物也。 遺 問 也。 人,因問 《詩》云:『野 簞圓笥方,俱 苞苴裹 而 員 魚 有 笥,思嗣 、肉,或 日 物 遺之 是竹 有 萑 死 肉 以

「不」,據《禮記注疏》當作「下」。

七四

臨 進 悉有 此,論以物 在笥」,是也。」〇自「水潦降,不獻魚鼈」至 食」,是也。 鷵,白茅包之」,是也。 橘柚」、《易》曰『包有魚』,《詩》曰『野有死 者操持諸物,進受尊者之命,先習其 退 曰 如如 物將 苞苴,魚肉果食也。《書》曰『厥 至其 其意,自『弓劍』以下皆是 相獻遺及授受之法。 笥以盛衣服、《書》曰『惟衣裳 所使國時之儀容。」 算,《論 語 **%**[ 吕氏 也。 威 簞 句 大 儀 使

文》:「爲,于僞反。」 凡爲君使者,已受命,君言不宿於家。《釋

是也。」 是。 家也 鄭氏曰:「急君使也。 聘禮》曰:『若有言,則以東帛 孔氏曰:「受君言宜急去,不敢留宿於 此通言爲君出使之禮,不當專據有 故《聘禮》既受命、『遂行、舍於郊』、 愚 謂: 君言 言,謂有 即 君命也,注 故 如饗禮 所 問 説 也。 非

言者。

必拜送于門外。 君言至,則主人出拜君言之辱。使者歸,則

也。」 鄭氏 拜君言之辱,拜送於門外,皆於大門之 辱者,言屈辱尊者之命來也。」 曰:「敬君命也。 孔 氏 曰 : 出, 此謂君問事於其臣 出 門 拜 迎 愚謂: 君 命也。 出

則必下堂而受命。《釋文》:「朝,直遥反。」若使人於君所,則必朝服而命之。 使者反,

外

也。

受命 鄭氏 使卑於君使也。」 言至,亦朝服受之,互文也。 日 赴於君,主人西 少儀》曰:「凡膳告於君子,主人展之,以 :「朝服 亦 曰:「此臣有所告請於其君。」 朝服 命使、敬也。 文互. 階 相 東 愚謂: 備 南 也 命使者朝服 面 命使者亦下堂, 命 不出門者,己 赴者,拜送。 士 喪禮》,乃 ,則君 孔氏

之也。 作階上致君命,而臣於阼階下中庭北面受命使亦下堂明矣。受命時當北面,使者於授使者於阼階之南,南面再拜稽首送。]是

進。斯可爲成德之君子矣。《釋文》:「識,如字,又式異反。行,下孟反,皇如字。」傳聞强識以窮理,而居之以讓,則不自滿假,而所知日益精。敦善行以脩則不自滿假,而所知日益精。敦善行以條,以讓,記也。博聞强識而讓,敦善行而不怠,謂之君子。

君子不盡人之歡,不竭人之忠,以全交也。 鄭氏 也。 於人。責人厚而莫之應,此交之所以 於我者,望之不深,則不至於倦而難繼 栖 酒 歡,謂好於我。忠,謂盡心於我。 曰:「歡,謂飲食。忠,謂衣服 不 吕氏大臨 舉,三爵油 曰:「君子躬自厚 油 而退」,●是也。 而 難 薄 也 之 好 全 盡 責

則應之者難而交道苦矣,故君子戒之。也。」 愚謂:歡以情之見於外者言,忠以勉而絶也。❷『每有良朋,烝也無戎』,是勉而绝也。◎『每有良朋,烝也無戎』,是

王父尸,子不可以爲父尸。《禮》曰:「君子抱孫不抱子。」此言孫可以爲

父尸,子不 引舊《禮》,又自解之云 『此言孫 弱,得抱孫爲尸,不得抱子爲尸。記 之禮必須尸,尸必以孫。今子孫 鄭氏曰:「以孫與祖昭穆 曰: 『孫幼則使人抱之,無孫 凡稱《禮》 可 日』者,皆舊《禮》語 以 爲父尸』故 同。」 也。 則 《曾子問》 取 可 也 孔氏 行 於同姓 以 者 並 祭祀 爲 日 Ŧ 既 幼

「爵」,原本誤作「酌」,據《禮記注疏》、《集説》改。

「絶」、《集説》作「難繼」。

七五

稷、山 諸侯 外神之屬,不問 社 男女各立尸。故《士虞禮》云:『男,男尸。 統》云『設同几』,是也。 祔祭漸吉故 女,女尸。』至祔祭之後,止用男之一尸,以 用己孫爲尸,恐非 倫 醉》注云:『天子以 天子、諸侯之祭,用卿大夫爲之。 子至士皆有尸 口 特牲禮》:『大夫、士以孫之倫爲尸。』言 明明 稷、境内 、天子卿大夫,故云公尸。』天子既然, 也 亦爾 若祭勝國之社稷,則士師爲尸。 河 非己 是有 四方、百物及七祀之屬,諸侯祭 孫。 山 抱 也。 大夫、士亦用 川,及大夫祭五祀,皆有尸 ,宗廟之祭,皆 孫之法也。」〇孔 皇 同姓異姓,但卜吉則可 凡吉祭止用一尸,故《祭 一侃用崔 也。 卿。』鄭箋云:『諸侯 若新喪虞祭之時 天子祭天地、社 同姓 靈 恩義,以 用 嫡 同 氏 者,鄭 姓 日 故《 之 : 大夫 天 嫡。 既 爲 明 注 人 0

> 神亦用 爲尸 《左傳》之説也。」 尊卑之勢,遂不肯行耳。」 朱子曰:「古 神而 云: 説 : 人祭祀,無 以此求神,宜其饗之。 爲一家之類,己與尸各已潔齊,至誠 必求其類 尸也。』許慎引《魯郊祀》曰『祝延帝尸』,從 義 ,極有深意。 **\***: O 「舜入唐郊,以 祭,無主則不依,無尸則不饗。 晉祀 **《公羊** 看來古人自有深意,非 户。 杜佑謂 而依之,人既與 夏郊 不 不知祭天 用尸 **>** 『古人用尸,蓋 説 蓋 以 人之魂魄既 程子曰:「古人祭 丹朱爲尸。」是祭天 董 非 祭天 地 伯 惟 後世不知 何 爲 祭 人相類,骨 如 無 尸 祖 尸。 樸 上 想惟 禰 散,孝子 一《虞 古樸 陋 此, ^ 0 也 此 夏傳 左 相 陋 祭 直 肉 祀 魂 不 傳 通 之 敢 外 求 有 以 又 氣 有

<sup>] 「</sup>祖禰」,四庫本《朱子禮纂》、《朱子語類》並作「祀」。

之所 母 之。孔氏乃據此 吉,止用男尸」,亦非 廟吉祭,然後止 寢,皆當男女别 記》云:「男子祔於王父則配,婦人祔於 而以 棄經信傳,亦不善會鄭義矣。 夫、士以孫之倫爲 祭其宗廟,則 近,故無孫 使爲尸者,於祭者子行也」。 父則取兄弟之適子爲尸,故《祭統》云「所 曰「尸必以孫」,是則尸用己孫明矣。 愚謂:此言「孫 `則不配。」祔後練、祥,又特 爲 尸,祭勝 妣配,止用男之一尸。 出,又不 而 取於同 國之社 必 所 可以爲 户。 用男尸。 取 取 而謂「尸不用己孫」,非 於同 爲尸者,皆其所祭之祖 尸」,蓋 是。 姓者。 稷 至三年喪 王父尸」、《曾子問》 姓矣。 則 《周 土師 孔 兼容無孫者言 若祔祭 若天子、諸 疏 禮 祭新 士大夫所祭 吉祭祭祖 鄭氏 畢 謂 爲尸,是祭 》墓祭則 新新 祔 小則《雜 死 【謂「大 如 者 主 徒 冢 漸 於 考 侯

> 所引《魯郊祀》,蓋未足據 尸,而天無尸矣。《晉語》「祀夏郊,董 氏 蓋以 外神 尸。」董伯與丹朱亦皆配帝之尸耳。 乎?」《虞夏傳》云: 尸」,章昭云:「神不歆非類,董伯 車。」執戈送逆尸者惟二人,則是惟配 **\***: 其 皆有尸也。 「郊祀則裘、冕二人執戈送逆尸 至尊 而 不敢以人象之也。 朱子謂祭天地 「舜 入唐 也 郊 不敢 一, 丹 其 用尸, 右 朱 節 姒 許 帝 ,從 爲 姓 服

尸者則自下之。尸必式,乘必以几。《釋文》:爲君尸者,大夫、士見之則下之,君知所以爲

乘,繩證反。」

也。 下之。 鄭氏 君 或 君許用者 時 曰:「下之,尊 尸必式,禮之。 孔 幼少,不能盡識 氏 曰:「此 也。 古者致齊各於其家。 户也。 謂 乘必 群臣,有以告者,乃 臣 爲 下,下車 君 以 P 几,尊者 ,已被 也。 慎 散 或

猶 出 在 路,及至祭日之旦,俱 來

散 故 齊 亦 齊之時 群 臣 得 ,君若在路見尸,亦自下 於路見君之尸,皆下車 車敬之。 而 敬 人 Ž 廟

所 日 有 力君先 以 不知,謂君年或幼少,不能 知是散齊者,君致齊不復出行 入廟,後乃尸 至也。 言「知」, 並 一識群臣 若祭 則 故 初

古者 者,廟門之外,尸尊未伸,不 車,故式爲敬以 車 箱長四尺四寸而三分,前 答君 式,謂 ·敢亢! 俯 禮 下 後二, 不 頭 也 口

於路或不識而臣告君,君乃下也。尸必

式

下

又於 横一 木,下去車牀三尺三寸,謂之爲 式 上二尺二寸横一 木,謂之爲較,較 式。

去車 ,則落手下隱式,而 牀 五尺五寸。 若平常則馮較,若應 頭 得 俯 俛,後云『式 爲

三日 視 敬 馬 筮 尾』是 尸 《少牢禮 也 愚 学前 謂 宿 特 日 牲 禮 宿 営
前 戒尸, 期

明

日

朝

筮尸」,鄭

注云:「不前期三日

筮

兩

無

别

齊。 祭三日,卜 尸 不得散齊七日 大夫下 士卑不嫌,得與 人君 尸得 耳。 吉,又 賈 大 人 疏 大夫尊, 戒 君 云 宿 同 「 天 子 諸官 三日筮尸, 不敢 與 使之致 諸 人 侯 君 但 前

同,直散齊九 官致齊也。」是人君散齊之時,尸 日 前 祭 一日筮宿尸 , 并 猶未卜, 宿

不出 卜尸得吉,遂致齊,尸與人君、大夫、士皆 矣。 此云大夫、士及 君 下尸者,蓋 1

即 尸 雖 擬 在 人爲尸,至祭前三日又卜之,故散 祭前三日,而 前 期 十日日 ト日之時

下 齊 時 車 也 人 君及大夫、士得見此 《節服氏》「郊祀則二人執戈送 將卜爲尸者 逆 而

日人 尸,從車」,人君之尸亦當有執戈者,若 廟,君見尸,必 無 不 知。 云「君 知 所 以 祭

爲尸者」,則是尸 旁者曰較,其當人之前者曰式。 ,故君或不知 猶 而待人告之也。 未卜 ·, 其 、威儀 尚 較 車 與 之 群 臣

七八

亦非 也。 以 時,必履几以升也。《士昏禮》云:「婦 以不敢亢禮明矣。 亢禮」,亦非也。 言較在式上,則非是。 石」,是也。 尸不下者,所以全尸之尊也。疏謂「不敢 之度,及平常憑較,敬則憑式,皆是也。 尺五寸, 夫、士爲尸下,尸則 寸,用兩手憑之以 几。」蓋履几升車者,尊者及婦人之禮 若天子則用 也 可一手憑之以爲安。 疏謂「几 尸於大夫、士亦式,則 石,《 爲敬。 乘必以几者,謂乘 俯而憑式以答其敬也。 在式上,以手據之」, 尸必式者,君及大 隸僕》「王行洗 疏言較與式高 式高三尺三 車 非 乘 乘 之 而 下

今按:樂,當如字。 齊者不樂不弔。 鄭氏 曰:「爲哀樂則 不樂,謂 《釋文》: 不 聽 樂 失正,散其 「齊,側皆反。 也。 致一 (思也。」 樂,音洛。」〇 謂之齊。

階,出入不當門隧。《釋文》:「隧,音遂。」居喪之禮,毀瘠不形,視聽不衰,升降不由阼不樂不弔,爲心志之感於哀樂而散也。

見也。 下也。 階 瘠,羸瘦也。 鄭氏曰:「形,骨見也。」 隧,門外當門之中道,《既夕禮》「甸人抗重 升阼階者 祭如饋食之禮,既同於吉,則孝子得 虞禮》云:『卒哭稱哀子,祔祭稱孝子。』祔 生,故在喪思慕,猶若父在,不忍從 故謂骨爲形也。居喪乃得 出 不衰,爲其廢 面。』既言西面,則是升自阼階。 也。 自道」,是也。卒哭以吉祭易喪祭,主人 若袝祭以後,則得升阼階。 《雜記》:『弔者人,主人升 阼階,主人之階也。 ,敬異國之賓也。」 形,骨露也。 喪事 而 將至於滅 骨爲人身之主, 羸瘠,不許骨露 孝子事 孔氏 愚謂 此未 性 曰 : 作階 死 也 案《士 不 葬 堂 升作 如 門 毁 得 西 事

蓋當即位於阼階與。既由阼階升降,則亦

可由門隧出入矣。

作「痒」。 不 飲 居 酒 喪之禮 食肉,疾止復初。 《釋文》: 勝,音升。」 頭 有創則沐,身有瘍則浴,有疾 「創,初良反,又初亮反。 不勝喪,乃比於不 瘍,音恙,本又 慈 則

生與來

日,死與往

日。

鄭注:

「與,或爲『予」。」

鄭氏 慮 謂:言此者,所以見沐浴及飲酒食肉, 也。 其不勝喪而爲之也 世,是不慈也。 然本心實非爲不孝,故言比也。」 曰:「勝、任 也。」 違親生時之意 孔氏 日: 是不 示不 留 愚 孝 乃 身

飲酒食肉,處於内。《釋文》:「衰,七雷反。」五十不致毁。六十不毁。七十唯衰麻在身,

毁 孔 鄭 马,而 氏 氏 曰 : 曰 : 不得 「所以養衰老。 愚謂: 致 極 羸 極 瘠也。 六十 也。 五十始衰,居喪 雖不毁,其居處 六十轉衰,都 人五十始衰。」 不 飲 得 許

> 精力益衰故也。 飲酒食肉處於内,則不疏食,不居廬,爲其食,猶用居喪之禮。至七十,但有喪服,而

皆以 鄭氏 月 明 日數 杖以 日 曰:「天子七日 諸侯亦悉 杖。』二者相推,其然明矣。」 記》曰:『士之喪二日而 「大夫尊,成服及殯皆不數死 而更言『三日成服 而葬。」以《春秋》考之,天子、諸侯之葬, 而殯,五月而葬。 而 也。 來 死 小 曰 : ·斂,又 明日數也。 日 數。 不數 此士禮貶於大夫者,大夫以 與猶數 厥 ^ 死 而殯,七月而 士喪禮》曰『死 明大斂而殯」, 日 也。 杖」,似異日矣。《喪 死數往日,謂殯斂以 大夫、士三日 也。」 生數 殯,三日之朝主人 愚 來 葬。 H, 謂 則死 日,謂成 日 孔氏 而 而 則天子、 《王制 諸侯五 襲,厥 殯, 三 三日, 티 : 大 死 服

日; 與 子必 矣。 舒 H 昏 大斂、大夫、士皆異 三日 固上下之達禮 之法可見矣。 其 日者,固 三日之朝杖。」士之二日 三日之朝,既 喪,五日既殯,授大夫世婦杖。 由 乃 暮,頃刻之間 ,故《喪大記》言「五 君、大夫皆當 天子、諸侯 七月、五 襲,而 大夫之三日 其 間二日。 所 則 制禮之本法然 以異者何 君之五 小 月 皆 斂、大斂皆當 殯而杖。士之喪,二日而 以 而 也 則生與來日,死 如 推 不能 并 死 而 日 此 大夫、士,其 數 有早 也? 然《喪大記》云:「君之 日,諸侯 殯,并數死 而 ,但君、大夫位 遽 死 日 殯,并 畢 也。 月。 晚之 而 而殯,并數 蓋 襲 殯,三日 下移 殯 必 然 事 不 由 數 數殯 日 則 間 襲 大夫之喪, 與往日者 同 葬 日 日。 死 之連 與 以 爲 必至 日 而 尊 如 死 葬 日 小 推 殯 數 四 爲 日月 而 死 H 斂、 天 殯, 殯 次 爲 事 在 死 H 六

> 與 自有變通之宜,雖《禮》無 士 位 來 日 卑,故《喪大記 ,死與往日,雖有一 明文,而 定之禮 日 而 殯 ,而 0 以 人情 其 蓋 中 生

不 知 傷。 生者 物 理 书, 推之,必當 知 死 知死 而 不 者 知 出 傷 生, 於 此 知 傷 也 生而 而 不弔。 不 知

死,

弔

而

《釋

傷

8,如字

舊式亮反。

皆 淑 弔 淑 日 致命 鄭 哭。」 氏 ! 辭 : ! 此 曰 : 」」此施於生者,傷辭 辭 云:『皇天降災,子遭 寡 也。 君 施 「人恩各施於所知 聞 於 《雜 死 君之喪,寡 記》 者,蓋 曰:『諸 本 未 君 傷 罹之, 聞 也。 辭。 使 侯 也。 某 使 弔、傷,皆 人用, 辭 如 如 説 畢 何 何 者 退,

文 問 弔 其 喪 所 弗 賻 欲。 能 音 賻,不問 附 見人弗能 不 問 其 其 所 、所費。 費,費 館 不問 芳味 問 反, 疾 其 弗 所 本作「有 能 舍。 遺 所

費」,下句 放 此。 遺 ,於季 反。」

是也。 致 所以 帛及馬,贈以束帛,則貨貝是賻物 賻。」《穀梁傳》曰: 不至也。」 館,舍也。」 鄭 寡之數及足否也。 貨貝於君。」案含以玉,襚以衣,賵以束 氏曰: 助生者之費。 員也。 含、襚、贈、賵,皆施於死者,惟 皆爲傷恩也。 愚謂 王氏 「歸生者曰賻。」二説皆 安石曰:「辭 《公羊傳》 《少儀》:「臣 問其所費,問 見人,見行人。 ě: П 其 爲君喪, 可知,是 錢 惠 所 而 賻 財 用 則 實 多  $\Box$ 

賜

賻

用

錢

人者不曰「來取」,與人者不問其所欲。

其所

欲,將不

·與也。」

王氏

安石曰:「

爲

之所難言也。

賜之而

難

取,

與之而難言

來取,人之所難取也。

與人者問所欲,人

養廉也。」

吕氏大臨

曰:「賜人者使之

鄭氏

曰:「與人不問

其

所欲,己物或

時

非

其貪。

人多苟得,故與之不問

其

所

欲,

所以

節

好,故賜之不曰「來取」,

所

以

養其

廉

小

者君子,

與者小人。」

愚

謂

君

子

多 自

非 所 以

惠人之道

也。」

陳

氏

澔

日

:

賜

禮記卷三終

## 禮 記 卷 四

國 賜進士及第翰林院編脩 史館纂 脩 孫 希 日

集解

## 曲 禮上第一 一之四

適墓 不登壟。 《釋文》:「壟,力勇反。」

鄭 氏 曰 : 爲 其 不 敬。 壟, 冢 也。 墓,

塋域。」

助 、葬必執紼。《釋文》:「紼,音弗。」

鄭氏 孔氏 曰 曰 : 繩 葬,喪之大事。 屬 棺曰紼, 屬 紼, 車 日 引 引。 車索。」 助 葬

也。」 本非 爲客,正 愚謂: 送葬在塗時,或有不執 是 助 事 耳,故 宜必 執 引 綍 而

散 行在後者,若柩車至墓,脱載除飾 以以 紼

臨喪不笑。

鄭氏

曰:「臨喪宜有哀色。」

屬於柩而

下之,助人之葬必宜執此紼也

揖人必違其位。

鄭 氏 曰 「禮以變爲敬。」

如字,舊力鴆反。」

望柩不歌,人臨

不 翔。

《釋文》:「柩,求又反。❶

臨,

鄭氏曰:「哀傷之,無容、樂。」 「臨人之喪,不得趨翔爲容也。」

孔

氏 日

不歌是不爲樂,不翔是不爲容。

當食不歎。

鄭氏 티 : 「食或以樂,非歎所 陳氏 澔

曰 : 唯食忘憂,非歎 所 也。

鄰有喪,春不相。 里有殯,不巷歌。《釋文》:

,束容反。 相,息亮反。」

0 求」,原誤作「本」,今據《禮記注疏》及《經典釋文》改。

愚謂

分焉。」 矣。 知。 慤 鄭 里有 遠,鄰寡 猶 謂之有殯。 言有殯不巷歌,則有喪可知」,尚未當。 相春矣。 不 曰 : 氏 相 鄰 ·殯不巷歌,則既葬之後,歌或非所禁 於里言有殯不巷歌 日 「未祥之前,謂之有喪。 里之哀,非 而里衆,故哀不能無 則不巷歌可 五家爲鄰,五鄰 有别矣。 愚謂: 助 鄰言有喪春不相 哀 也。 方氏之説皆是,惟 但輕重淺深之不同 知。 相, ,則有喪可 送 爲里。 不巷歌, 杵 聲。 輕重淺深之 ,則有殯 未葬之前 鄰近 則容 知 云「里 方氏 而 前 口 蓋 或 里 春

滴 墓不歌

其

久

暫

固

鄭 氏 日 非 -樂所。」

哭 日不 歌

鄭 語》云『子於是日哭,則不歌』,則弔日之 氏 日 「哀未忘 也。」 孔 氏 曰 論

> 耳。」 朝 據弔後言之。 歌」、《檀弓》云「弔於人,是日不樂」,皆但 以 喪 將往哭之、未哭之前、豈容歌 日之朝得歌樂」,未爲通論。 預禁。 無定時 亦 得 愚謂: 故《論語》云「子於是日哭, 歌 ,如日中方聞喪,則朝時 樂 哀樂之情 但 弔 以 不 還 並 樂乎? 如有服 其 一行,孔 日 歌 晚 樂,難 謂「弔 之親 但 不 則 聞 歌

送喪不 避,本亦作『避』。」 由徑,送葬不辟塗潦。《釋文》:

鄭氏 葬言 於外而以尸若柩歸者、春秋》「公之喪至 自乾侯」,是也。 曰:「所哀在 「不辟塗潦」,亦互文也 於送喪言「不由徑」,於送 此。 愚謂: 喪, 謂 死

於人。 則 臨 喪 有 則 不 必有哀色,執紼不笑,臨樂不歎,介胄 可犯之色。 故君子戒慎,不失色

八四

「辟,音

日 : 鄭 色也。」〇自「適墓不登壟」至此,記吉凶威 氏 □ -色必 稱 貌 其服,情 與 事 宜 必 相 稱 配 其 色,所謂 吕 氏 大 不 失 臨

《釋文》:「下,遐駕反,下同。」 大夫撫式,士下之。 國君撫式,大夫下之。大夫撫式,士下之。

儀容止之事

式,則士下之,不必爲大夫之臣也。 君式 乘車 鄭氏 若士爲大夫之臣,亦如大夫之於君也。」 愚謂: 大夫、士尊卑等級不同,故大夫撫 、則臣宜下車。 言『大夫』,則士可 ·必正 曰:「撫猶據也。 立。 孔氏曰:「謂 據式 小俛,崇敬 君 臣 旧俱行, 知。 也。

刑不上大夫。《釋文》:「上,時掌反。」

儀物或有所不能備也

百,威儀三千耳。其有事,則假士禮行但以其遽務,不能備之,故不著於經文三孔氏曰:「張逸云:『庶人非是都不行禮,鄭氏曰:「爲其遽於事,且不能備物。」禮不下庶人。

於寢。 之。」 《士冠》、《士昏》、《士相見》是也。 事,假士禮以行之,而有所降 其質野則於節文或有所不能習,卑賤 人」者,不爲庶人制禮 則懸棺而室,不爲雨止,以祭則無 幣五兩,以喪則四寸之棺,五寸之椁,以 此亦庶人之禮也,而曰「禮 愚 謂: 庶 人 非 也。 無 禮 制禮自士以上, 也, 殺 焉。 以 庶人有 不 廟 昏 下 則 蓋以 則 而 庶 於 薦 緇

賢也。 鄭氏 千、周二千五百之科,不使賢者犯法也,非 千之科條,不設大夫犯罪之目。 謂 者,大夫必用有德,若逆設 議 輕重,不在刑書。」 都不刑其身也。其有罪,則以八議 曰:「不與賢者犯法,其犯法 張逸云:"謂所犯之罪,不在 孔氏 刑,則是君 三五五 所 則 夏 以 刑 議其 在 不 知 然

之有禮,故群臣 猶 輕 刑不上大夫, 所以 不 重 制 耳 庶人 之禮 陳 氏 自意 也。」〇《漢 澔  $\Box$ 厲 : 嬰以 寵臣之節 不 廉耻,故人矜 書 制 1》賈 大夫之刑 也。 誼 日 遇 :

刑人不在君側。

節行。」

曰:『近刑人則輕死之道。』」鄭氏曰:「爲其怨恨爲害也。《春秋傳》

兵車不式,武車綏旌,德車結旌。《釋文》:「緩,

耳

崔反。」❷ 兵 車。 鄭 德 車 旌 盡 氏日 亦 車 車 革路。 尚 結旌,不 ,乘車。」 飾 武 : 也 「兵車 猛 宜 取 綏, 盡 其建戈刃,即云兵車,取 不式,尚威 無 孔 飾 謂舒 推讓,故不爲式敬。 氏 也。 曰 垂之也。 [: 「兵 結,謂收斂之也 武,不崇敬。 車,革路 武 車亦 也。 其 武 兵 綏

> 德車 著於竿也。」 兵,建而 之,亦結之之意也。 故《節服氏》「朝覲,六人維王之大常」。 德 武 綏旌、結 王之玉路,建大常,則不結旌而使人維之, 車 玉 『旌』,猶《司常》通 載 路、 車。 故 旞 以結旌爲常耳 金路、象路、 舒旗旛之旒,以 德美在内,不尚赫奕,故纏結其旒, 旌之事。 不 斿 斾, 壬申 車 載 方氏 旌。』此 調 木路,四 是兵車 ·斾之」。 **^** 慤曰:「《周官》: 『九旗』也。」 見 左傳》晉人「辛未治 武 爲 亦 路 美 車、德 有 旆 不用 也 時結 與 車 不 兵 德 愚謂: 斾 並 旌 車 『道 行,但 言。 即即 謂 維

史載筆,士載言。

鄭氏曰:「謂從於會同,各持其職以待事

●「崔」、《釋文》作「佳」。●「上」,據《漢書·賈誼傳》當作「至」。

威

猛

即

云武車也。

旌,謂車上旗旛

尚

威

前

有

水

則

載

青

旌

前

有

塵

埃

則

載

鳴

鳶

前

有

車騎

則

載

飛

鴻

前

有

1:

師

則

載

虎

皮

前

有

四人。 之士。 則大 之屬 辭。 又 士 禮事」,内史「掌書王命」。 應 載 王若 言,謂盟會之辭,舊 書之主 也 載 真 四人,中士八人,下士十有六人。」 須 盟會之辭者,或尋舊盟 文史、内 舊 而 舉 知之也。」 筆 《周 時 《周禮》大史「大朝 一,則 動 謂 内史,中大夫一人,下大夫二人,上 從之也。 孔 紀載之言,以備徵 , 史必書之。 氏 禮》: 史載 書 餘 曰 : 具之屬 載 筆 「大史,下大夫二人,上 「史,謂 不言簡 可 愚謂: 以 知。 事 從 也。 以以 王若 言, 或 牘 士 一,或用 史謂 覲 史 崔靈 而云 士,大史、 謂 備紀載 考 謂 會 行 書 會 同,以 大史、 司 筆 往 録 舊 恩云 同 會之禮 盟之士 則 者,筆是 王 盟 事 内 史載 君 内 要之 其 書 『必 者。 出 協 史 士 史

> 寄反。 虚虯反。」○鄭注:「士,或爲『仕』。」○今按: 獸 則 載 貔 貔 ,婢支反,徐扶夷反。 貅。 釋 文》: 「載,音戴,本 貅,本亦作『豺』,許求反,又 亦作 「載」字, 「戴」。 騎, 其

胡氏讀

如字,

亦通

望見 知所有 畫 鴟 鳥,畫於旌 之、《左傳》云『前茅 衆 獸 謂 鳶 君 鄭 日 廣遠,難 兵衆。 鳴 鳴 行 鳶 也。 氏 則 則 則 於 師 日 軍 從,卿 旌 風 將 ^ 行銜枚,若 知 書 生, 首 虎, 風。 所舉各以 載 前 可 上,軍 而 謂 風 必 周徧,故前 日 取 行 載之。 鴻, 生則 值 其 旅 舉 行 水 有 取 從 有 於 慮無」, 類 如 值 塵 而 威 飛 非 不直言鳶 象。 旌 虎 水, 防 埃起,前 有 前 有變異 常 勇 首 之也。 如 則舉示之,軍 是 不能 驅 也 行 青 以 貔 列 舉 警 青雀 也 \_\_ 傳道 貔 也。 此 衆 而 有 鳶,鴟也 則象類 塵 貅 青雀,水 云 也 則 水 鳴 埃, 士 孔 且. 士衆 亦 禮 師 則 示 人 氏 墊

可, 每月風一三, 女董. F. 月

不言旌 鳶 不 鳴 從 則 風 可 不 知 生, 也 故 車 書 ·騎,彼 作 開 口 人 之 如 車 鳴 騎 時 也 也

鴻,鴻鴈。 見彼人車騎, 鴈 則 飛 畫 有 行 鴻於旌首而 列 與與 車 騎 載之也 相 似 軍 然 行

古人不騎馬,經記正典無言騎者。今言
身名之事,與重治方方可重之也,外

亦兵衆之象,若見兵衆,則舉虎皮於竿首騎,當是周末時禮。士師,兵衆。虎威猛,

也。 白 豹 摯獸 虎類。 猛 而 爾 能 雅》 擊, 日 虎 狼之屬。 『貔,白 狐 貔, 也。 貔 名

貔 貅 是 貅 也。 一獸,亦有威猛 云: 與 虎 ,若前有 皮 並 畫 猛 作 潤 皮 ,則舉此 於 旌

建之於車 云 並 載 而 其皮。」 警衆於後 方 也 氏 慤 愚 曰: 謂 載 既 謂

行 在 上,急繕 ,前朱雀 車 ·騎,又言士 其 而 へ怒。 後玄武,左青 前,則 《釋文》: 士師 招 龍 謂 摇 徒 而 並, 右 兵 如字。 白 也 虎 繕,依 招 摇

音勁,吉政反。」〇朱雀,今本注疏作「朱鳥」,衛氏《集説》及

氏 石 經 胡 作 氏皆讀如字,義亦通 「朱雀 與 孔 疏 合, 今從 之。 又 按 繕 字,吕 氏 陸

八八

武, 軍行 之 也 虎 能 捷,故用朱雀。 雀、玄武、青龍、白虎,四方宿名。 也 在 以 堅 鄭 軍 沈 北 起 氏 發生,象龍變 也 龜 軍行 前, 居 陳 殺 逢值之禮,此明軍行象天文而 斗杓端,●主指者。」 日 也 堅勁, 也。 繕 南。 以以 畫 招 讀 龜 摇 此 日 軍之左右,生殺變應 後,北。 有 四 軍之威怒,象天 勁。 四 生 北 甲 潤 軍後宜殿,故 潤 也。 ,能禦侮 爲 斗 於旌 又 第 軍 畫 左,東。 右爲陰, 七 陳 旗 招 星。 门以 也。 摇 孔氏曰: 象 星 、帝也。 用玄武。 天 標前 ^ 右, 陰沈 左爲陽 於旌 春 也 秋 如 軍 後 西。 作 「前 能 旗 前 運 龍 左右 急 招 陳 陽 斗 虎 玄 宜 摇 猶 法 明

❶ 「招摇」下,據《禮記注疏》當有「星」字。

物皆畫 軍旅 四宿 勁 也 象青龍 威怒也。 作七星而 使四方之陳不差,故云『招摇在 此 之,則四方之宿不差。今軍行法之,亦作 魁,五至七爲標。』摇光,即 几 居四方宿之中,以 樞》云:『北 司常,掌九旗之物名」,所謂『交龍爲旂』, 利 權, 北斗星,在軍中舉之於上,以指 於四 旟』,象朱雀 士卒起居舉動,堅勁奮勇,如天帝之 急,迫之也。 也 五. 可 也。 衡,六開陽,七摇光。 知 鄭云『畫招摇星於旌旗上』,則四 方,標招摇於中上,象天之行,故 獨云『招摇』者、舉指者爲主也。 其怒,士卒之怒也。 『熊虎爲旗』,象白虎也。 矣。」 斗七星,一天樞,二璇,三機, 也。 繕, 脩 斗末從十二月建 吕氏 『龜 大臨 也。 蛇 招 爲旐」,象玄武 日: 言作 摇 上也。 軍行既張 也 至 | | | | | | | | 正四方, 而 北 四 致 而 『鳥 官》 爲 並 指 其 斗 0

> 雀,鶉 怒也。」 以象之。東方七宿,有青龍之象,故 非。一 之象,故 之旗畫爲青龍以象之。 七宿,有玄武之象,故後軍之旗畫 畫爲朱鳥以象之。● 玄武,龜 鶉。」南方七宿 青龍、白虎、皆畫之於旌 繕」,又云『繕 招摇指揮耳。繕、完也。《春秋 氏銓曰:「招 虎,旗是 後玄武, 旐是 也。 愚謂:行,謂軍 也。 右軍之旗畫爲白虎以象之。 陸 師 氏佃 摇、蓋謂 招 也 曠《 ,有朱雀之象,故前 甲 摇 兵」。 禽經》云:「赤鳳謂之 在 曰:「前 左青龍,旂 上,大常 主 行也 西方七宿,有 以表 鄭 兵者以 朱雀,旗 以 是 蛇 軍 繕 是 朱雀、玄武、 四獸 也。 也。 陳 傳》云『征 也 爲 者。 爲 0 軍 勁, 是 白 玄武 之旌 右白 北 之 《考 左 也。 朱 旗 . 虎 恐 方 胡

「鳥」,據北大本當作「雀」。

而建族 雀也。 旗之中,以指正四方也。 畫日、月、七星,此獨言 斿,從七星之旟,此天子之位 盛姬,建日月七星」。 常之上又畫星也。 杜預云:「三辰,日、月、星 常,是也。 旐矣。」在牧者爲前軍,則在郊者爲後軍 牧矣。」又曰:「我出 行。」鳥章,鳥隼之章也,而以啟行,此前 龜蛇 I 七斿,以象鶉火也。 九旗之物,日月爲常。」不云「畫星」, 織文鳥章,白斾央央。 \* E 四族,以象營室也。」《六月》之詩曰 《出車》之詩曰:「我出 ,此後玄武 「龍 《左傳》「三辰旂旗,昭 旂 九游,以象大火也。 也。 《穆天子傳》稱「天子 我 熊旗六斿 《戰國策》:「建 車,于彼郊矣,建此 招摇 「招揺 元戎十乘,以先 胡氏 陸氏 也。」疏 也。」大常 解 ,以象伐 我 取 招 其 車,于彼 其 明 以 摇爲指 蓋大 云 爲大 也, 居 九 葬 朱 啟 旗 几 兼

> 人施而諸侯畏之也 上,所以急振起其士卒之怒氣,此所以晉 綏旌也。 摇,若永望。」上,謂 揮之義,義亦可通。 招摇市 謂 過之。」《漢 四旗 垂其旒縿,飛動於兵 車上。 書 《史記 郊祀 招摇 孔子世家》: 歌》:「體 在上 一,所謂 車之

鼓人 局 也。 鄭氏 作。鼓行,鳴鐸,車徒皆行,及表乃止。三 各有度數。 愚謂:此謂 乃止齊焉。』一擊一刺爲一伐。《爾雅》云 局者,軍在左右,各有部分,不相濫 不愆於六步七步,乃止齊焉。 、分也』,郭璞云:『謂 、皆三 曰:「度,謂 孔氏 一鼓,司 《大司 戰時之法也。軍之或進或退, 曰:「《牧誓》云: 『今日之事, 馬 振鐸,群吏作旗 馬》: 伐 與 「中軍 步 部分 數 也。」左右 以 四伐 局, 鼙令鼓 車徒皆 也 五伐, 部 有

進退有度,左右有局,各司其局。

乃止。 水」至此 局,則部分明而 之左右,各有 乃止,坐作 車 鼓, 退,鳴鐃且卻,及表乃止,坐作如初。」所 進退有度」是也。《左傳》:「樂書欲 徒皆作。 摝 鐸, ,記人君出 曰:『書退 車徒皆坐。 戒三闋,車三發,徒 如初。 鼓進 部分也。 進 鳴鳴 乃鼓,車馳,徒走,及 退亦聽之矣。 師 鐲,車驟,徒趨,及 ,車騎軍陳之法。 又三鼓,振鐸,作旗, 離局,姦也。」」是 左右之帥,各司 三刺 ○「前 乃 載 有 其 謂 表 表 軍 厲 鼓

之讎 父之讎弗與 天,非 鄭氏曰:「父者子之天,殺己之天,與 可 不同國。鄭注:「交遊,或爲「朋友」。」 與共 殺之備。 孝子 孔氏曰:「父之讎弗 、共戴天,兄弟之讎 處 也。 於天下也。天在 行求殺之乃止。 不同 國,讎 與 不吾 不反兵,交遊 上,故 共 戴天者, 不反兵, 避 日 則 共 戴。 殺 戴

所不能 許共 猶 父母仇讎則不仕,不辟市朝,兄弟仇 於普天之下,兄弟不共國,謂不同中國 者,謂帶兵自隨,見即殺之也。《檀弓》云 遇赦宥王法,辟諸海外,孝子雖欲往殺, 諸 並是不共天下也。 不反兵,與父母讎異也。 弓》又云『銜君命 國」,而此云『兄弟不反兵』者,父母不反兵 『父母之讎不反兵,兄弟之仇,仕不與共 弗與共天下也。 里之外」者,亦謂 重之也。 檀弓》云:『父母之讎,寢苫枕干,不仕 仕 海外」,則得與共戴 讎 而 辟 也。 人戴天,必殺之乃止、《調人》謂 而《調人》云『兄弟之讎,辟諸 市 朝也。 兄弟,謂親兄 遇諸 而 會遇恩赦之法也。《檀 而《調人》云『父之讎 而 使,雖 亦同 天者,謂孝子之心 市朝,不反兵 交遊之讎不 遇之不鬭」, 弟 不 反兵,則 也。 不 而鬭。」 反 同 雖 讎 同 也。 Ŧ 則 兵

九二

斷。 近,若 中也。 則可, 謂 賈氏公彦曰:「兄弟、從父兄弟等之讎 視兄弟」,則姑、姊妹、伯叔皆視兄弟。」 其君之讎、《調人》云: 『視父。』 『師 仇 時,不自爲首。 之外也。 赦,故不同國,雖不同國,國外百里二百里 兄弟」,是主友亦同 與此同。 朋友報也。 『父母存,不許友 1,交遊 無 不爲魁,主人能 子 有子及有 其兄弟仕不與 《調人》云『從父兄弟之讎不同 復 愚謂"殺人者死,人之父兄見殺 但從父兄弟及交遊、主友 又《調 無親 朋 不同國者,謂不共五等一國之 友 也 故《檀弓》云『從父兄弟之 於己者,故據己親 人》云『主友之讎,視 親 以 爲 此與? 則 死」,則知父母 於己者,則 朋 、共國, 執 友亦 兵 而 必 《調 報 陪 須 仇 自從 人》皆謂 其 相 7没,得 (後』也 疏 報讎 長之讎 去 故 親 爲 千 從 國」, 前 皆 爲 遠 之 里 會 父 爲 云

開 死。」蓋法也,情也,理也,參校而歸 爲令曰:「凡殺人而義者,令勿讎 先王亦原其情而聽之,不以爲法之所已宥 之有所狗,則勢之有所格也。 聽 則與之瑞節而執之。若此者皆無事 也? 不治 之平,先王之權衡審矣,爲慮深矣。 弟,迫於不得已之情 讎 殺,而遂已焉。 法,而爲子弟者,不能以其父兄之過 忘」,而法之所宥也。 傷人者」,乃《司刺》所謂 而禁之也。 者也。 ,將不可復止,故又爲之權之以 ,避之而不可,執之而 以士師 考之《調 讎之有 雖然,狗乎人之情,而其端 之 法, 人》,所謂 夫是以 事乎復者,蓋其 而 ",起而 使其 雖然, 宥之者朝廷之 和之而使辟,不 「不識」「過失」「遺 讎者。 不能者。 子弟 剚 刃讎 於是孝子弟 則「過 自 和之 儲 理 復焉 人之胸 此 於 之則 而 非 而 乎復 而 而 重 既 吏 不 可 見 殺 何

不治,此亦士之辱也。《釋文》:「壘,徐力軌反,又四郊多壘,此卿大夫之辱也。 地廣大,荒而

力水反。」

『亦』者,非但大夫之辱,亦是士之辱。』 " 卿氏曰: 「卿大夫之辱, 辱其謀人之國,不能安。 壘, 軍壁也。 數見侵伐, 則多壘。 七之辱, 辱其親民, 不能安。 荒, 穢也。」 大夫尊高, 任當軍帥, 若尸禄素餐, 則寇戎 大夫尊高, 任當軍帥, 若尸禄素餐, 則多壘。 二 亦』者, 非但大夫之辱, 辱其謀人之國, 不 鄭氏曰: 「卿大夫之辱, 原其謀人之國, 不

臨祭不惰。

鄭氏曰:「爲無神也。」 孔氏曰:「祭如

在,怠惰則神不歆。」

祭服敝則焚之,祭器敝則埋之,龜筴敝則埋

之, 牲死則埋之。

已不用。埋之,不知神之所爲。」●鄭氏曰:「此皆不欲人褻之也。焚之,必

凡祭於公者,必自徹其俎。

也。 問》云『攝主不歸俎」,明正主則 氏曰:「此謂士助君祭也。 鄭氏曰:「臣不敢煩君使也。大夫以下, 此「自徹其俎」者,謂士也。 俎於大夫。」是大夫助祭於君,當歸其俎。 本義。《史記・孔子世家》:「魯郊不致燔 以下自祭其 則君使人歸其俎。 或使人歸之。祭於公,助祭於君也。」 孔 愚謂: 廟,則使人歸賓俎。故《曾子 此疏有二義,前説乃經 鄭因君 以明臣,言大夫 若大夫以上, 歸 注之 俎

卒哭乃諱。

❶ 「知」下,據《禮記注疏》當有「鬼」字

九四

名惡, 惡卒。 諱之。」 是乎始。 哭後,服已受變,神靈遷廟,乃神事之,故 謂 者 鄭 日袝於廟, 曰:「卒哭前,猶以生事之,則未諱。 君 不 氏 臣 相 日 《穀梁傳》云: 同名也。❶ 君 避 臣 愚謂: 名。 敬 則 同 鬼 以 名,《 君子不奪人親之所名。二大夫有 衛侯名惡,疏云: 昭元年有『衛齊惡,今衛侯惡何? 神之名也 鬼神之禮事之,故諱 周人以諱 春 秋》 事 不非。」 諱, 神,卒哭之明 昭七年,衛 辟 也。 至卒 辟 孔 氏 於 生 侯

禮不諱嫌名,二名不偏諱。

諱 鄭 丘二字音不别。」疏説非是。 謂 而 近,若禹 義異,丘 氏 也。 「丘」、「區」二字並音 曰:「爲 孔 與 與區 子之母 雨 音異 其難 丘 丘 而義 與 避 名徵在,言『在』不言 去求反,顏師古曰: 區 同。 也。 也。 偏,謂二名不 二者各 嫌 疏云: 名, 有嫌 禹 謂音聲 疑。」 「古語 與 雨 音同 品 相 愚

『徴』,言『徴』不言『在』。」

逮事父母則諱王父母,不逮事父母則不諱王

父母。

所不 之禮 愚謂 此 恩不 鄭氏 皆不諱王父母。 乃别子爲祖者之廟 故幼無父而識母者,則諱王父母 舅姑,同事父母,且配夫爲體,諱 母之恩,正應由父。 母,猶諱祖。」 謂 庶人。 及也 : 禮不下庶人,此謂士之禮也。 至於祖名,孝子聞名心瞿,諱之由 曰:「逮,及也。 ,惟及其有廟 適士以上廟事祖,雖不逮事父 士惟 孔氏曰:「庾云:『諱王父 惟逮事父母者,父爲王父 者而 廟,適士雖二廟,其一 ,而王父母 所以連言母 謂 幼狐 止 ,廟遷 不及識 亦無廟,故 則諱 也。」 敬 者,婦事 不殊, 父母, 凡諱 避之 心

母 諱 子從 而 諱之,雖父没不 恋 變 也

君所

無

私諱,大夫之所有公諱

家諱 鄭氏 謂 諱 言,則各得 疏 所,自當爲大夫諱,但不得避己之私諱耳。 大 説非是。 夫 於大夫之所,止得避公家之諱,不得 也。 諱 曰:「君所無私諱,臣言於君前 ,尊無二也。 孔 避己私諱 然此亦謂 氏 愚謂: 曰:「大夫之所有公諱者、 大夫之所有 人門而問 以其尊敵也 士禮,若兩大夫相 諱,在 公諱,辟君 不辟 大夫 避 與

詩 書不諱,臨文不 諱

載,皆 也 鄭 書,謂教學 氏曰:「爲其 是,非 愚 諱宋。 謂 時 惟 也 臨 禮 失 文, 八事正 文 臨 凡 而 文, 己。 官 0 謂 府 執禮文行 文書 魯定公名宋, 孔 氏曰:「 或 史紀 事 詩 時

廟 中 · 不諱

春秋》不

鄭氏 尊無二也。 曰 : 有事於高祖 於下則諱上。」 則 不 - 諱曾 孔 氏 祖 日 以 : 下,

夫人之諱 雖質君之前,臣 不 諱 也

祝嘏辭

説

,有事於禰

則諱

祖

以

Ė

鄭氏 E : 臣於夫人之家,恩遠也。

猶

對也。」

婦

諱

不

出

門。

謂 耳。 鄭氏 於己 皆是也。 其家先世。 之諱,不 氏瓊曰:「《雜記》: 『母之諱,宮中諱。 而 雜記》分尊卑, 妻親 婦諱 三爲 日 總親,皆不 陳氏澔曰:「夫人之諱,婦諱,皆謂 ,故不敢舉其諱於宫中 舉諸其側。」此 謂 「婦親遠,於宫中言,辟之。」 母之諱,於己爲小功親,妻之諱 婦 門者,其所居之宫内也。」 人之所諱,母之諱,妻之諱, 故詳言之,此大略言之 在應諱 婦 之限 諱 與母 出宫則不 但以 諱 同 母 田

諱矣。

大功、小功不諱。

辟之。 孔氏 諱。」 若本服大功, 也。 氏 姑、姊妹皆小功,父爲諱,故己從父爲之 父、姑、姊妹、子與父同諱。」父之世叔父及 亦諱,小功不 謂「大功 曰:「期親 然姑、姊妹本期親,降服大功,故諱, 《雜記》: 愚謂:《記》言「大功不諱 亦 則 諱。 諱」者,謂姑、姊妹 不諱 則 「王父母、兄弟、世父、 若小功與父同 爲 也 諱。 熊氏云:『大 降 諱 二, 而 服 則 大 功 功 熊 叔 亦

文》:「竟,音境。」 人竟而問禁,人國而問俗,人門而問諱。《釋

孔氏 忌。 俗 鄭氏曰:「皆 謂 或, 曰:「竟,界首也。 所常 國門内也。 行 與 爲 所 敬 惡 主 門,主人之門也。 也 人 禁,謂 也。 或 禁, 城 或 中 中 謂 政 也 政 教所 教。 問

> 門 乃 諱 諱」至此,明諱避之法 ,方應交接,故於門 以 門 爲 節, 主人出 爲限 至大門 也。」〇自「卒哭 外迎 客, 客人

外事以剛日,内事以柔日。

《詩》言「吉日 謂: 禮》三虞皆用柔 鄭 不 而 丁巳。』《春秋》書葬皆柔 日 午,既差我馬」,《春秋》「甲午治兵」,皆 王某」,是也。 奇爲剛,乙丁己辛癸五偶爲 氏 也。 在此限也。 用 「踐阼臨祭祀,内事 曰:「十日有 氏 外 辛,卒哭爲内 日 冠、昏、喪、祭,亦爲内事,故《士 事謂祭外神,内 : 「順 其 维戊, 田獵 五剛 出 日。 事 爲 五柔: 而 既 陽,居 出 日孝王某,外事日 少 用剛 伯既 事謂 兵,亦爲 日。 牢 甲 禮 内 日,自爲别義, 禱 祭内神 柔 祭天 爲 丙 一,一吉 ě: 也。 陰。 外事, 戊 爲 庚 下, 壬 外 日 日 虞 剛 故 嗣 Ŧi. 孔 用 庚 愚

日。喪事先遠日、吉事先近日。 凡卜、筮日、旬之外曰遠某日、旬之内曰近某

同。 日。』是士於旬初即筮旬内之日。 之外曰遠某日者,案《少牢禮》今月下旬筮 事,祭、祀、冠、取之屬也。」 者,孝子之心。 不云『遠某日』『近某日』者,文不具 雜祭,或用 筮者云:『用近某日。』若天子、諸侯,凡 丁巳,筮旬有一日。』吉,乃官戒。 云:『欲用遠某日。』故《少牢》云:『日 來月上旬,是旬之外日也。 鄭氏曰:「旬,十日也。先遠日、先近 云:『士賤職褻,時至事暇,可以祭則 近某日者,案《特牲禮》云『不諏日』, ,謂葬與二祥。 案《少牢》、《特牲》皆云『來日丁亥』, 旬内, 喪事,葬與 或用 是奪哀之義,非孝子之 旬外,其辭皆 八練、 祥 孔氏曰:「旬 主人告筮 主人 旬之内 也。 也。 與此 滋其 有 用 者 告 喪 注 H

> 也。 旬有一日,不吉,則及遠日又筮」,此皆以 以旬之外内分遠近也。 下 所 日」,此以來月之下旬爲遠日者也 旬之外爲遠日者也。 吉,則及遠日,又筮 謂祭、祀、冠、昏之屬。《少牢》云:『若不 葬先遠日,辟不懷也。」尊卑俱然。 吉,卜上旬。故宣八年《左傳》云:『禮,卜 日」者,以來月之下旬與 特性禮》「不吉則筮遠日」、《少牢禮》「筮 ·旬先 欲,但 愚謂:上言「遠某日」「近某日」者, ト來月下 制 不獲已,故卜從遠 旬; 日 《左傳》「卜葬先遠 不吉, 如初。」是先近日 下言「遠日」「近 上 旬分遠近 日 卜中 而起,今月 旬; 吉事 也。 不

《釋文》:「假,古雅反。」●曰:「爲日,假爾泰龜有常,假爾泰筮有常。」

▶ 「雅」,原誤作「推」,據《禮記注疏》改。

有二。 之也。 也。 借爾 言。 爲行 常 鄭 得主人之命,遂述之,爲述命,是二也。 常」,三也。 1 命,更序述涖卜所陳之辭,名曰 言其斷吉凶不差忒,可憑信也。 命筮 文言「外事剛 人以所爲之事命筮史,是一也。 二則筮 事 氏 「凡卜、筮,大夫以上命龜有三,命 命卜史,是一也。 泰龜 若爲事而占,則當直舉所爲之事 之辭 大事 ト人即 事求吉日 其一爲 假,借也。 、泰筮之靈 亦曰 1 命 席 命筮二者: 日,内事 小事 龜 西西 也。 事命龜 「爲日」,則皆主 筮 面 日 筮 卜筮有占日、占事,上 命 辭 泰,尊之之辭。 以 沧 柔日」,而 龜,云『假爾泰 問於神也。 1 龜 爲事命筮,則 卜之官,以 愚謂: 史既得所ト之 筮 一乎占 於 此言 述命,二 爲 吉 〇 孔 有常 日 言假 龜 主 命 而 日 X 史 人 統 氏 有 主 命 而 龜 有

三也。 其父, 夫命 席西 龜; 龜 命」, 知大夫命龜三者,以《士喪禮》涖卜爲 泰筮有常,孝孫某,來日丁亥」』云。 於皇祖伯某。」』又云『史遂述命 『主人曰:「孝孫某,來日丁亥,用薦歲 命,則知大夫以上述命也。 命』,注云:『不述者,士禮略。』是士命 筮人,哀子某爲其父筮宅,筮人許諾,不述 則 二也。 也。 命 又有 統 面坐,命龜』。既云『不述命』,是士 龜 明 無有 《士喪禮》涖 有 二,但冠即席所命於述命之上也。 大 知大夫命筮二者,以士命筮 近悔,許諾,不述命』,乃云『 夫 即 命 席,西 有 筮 述命。 有 卜,命曰『哀子某 面 0 命龜 故 士 故《少牢》云: 知大夫 喪 日 : 禮 云『不 》云『命 一假 是大 事 不 ト葬 述 爾 事 述 命 即 筮

ト、<br />
筮不過三、<br />
ト、<br />
筮不相襲。

廢。」❷ 是也。 几 皆謂卜不吉則止不祭,非也。 蓋 然。」 卜,以 鄭 筮近日,後筮遠日,不從則直用下旬遠日。 文,不云『三筮』。 襲吉」,是也。 既從者,不可以更卜、筮也、《書》言「卜不 秋傳》曰:「三卜,禮也。四卜,非禮也。」 者至於三則止,不可以 秋 少牢》皆止二筮,而《春秋》書卜郊有三 卜者 亦足以致聽 張子曰:「據《儀禮》惟有『筮遠日』之 》譏之。」 氏曰:「求吉不 至於三,三若不吉則止。 愚謂: 襲, ,傳曰:「三卜,禮也。 愚謂: 重 孔氏曰:「一卜不吉而 也。 此二者,皆爲其瀆鬼神也。 卜、筮不過三,言卜、筮不 命鬼神之意,●而 張子之言最得禮意 筮日之禮,止是二筮,先 ト、筮 過 === 不相襲,言卜、筮 更卜、筮也、《春 魯 四 然《特性 四 1 祭則 1 若筮 · 郊 M, 先儒 非 不 禮 1 口 從 又 春 亦

又筮,則人君之卜日亦宜有與大夫不同更筮,大夫則筮旬有一日,不吉則及遠日人君之禮與。士祭不諏日,不吉即於筮日也。」然則二筮者大夫、士之禮,而三卜者也。」然則二筮者大夫、士之禮,而三卜者

者矣。

民信 也; 『蓍』。」○今按:踐,如字爲是 亦作『豫』。 嫌疑,定猶 龜爲卜,筴爲筮。 日而 時 日,敬鬼神,畏法令也,所 踐,依 行 與也。故曰:疑而筮之,則 事 ,則必踐之。《釋文》:「與,音預 注音善,王如字。」〇 ト、筮者,先聖王之所 鄭 注 以 使 弗 民 以 非 決 使 爲

鄭氏 之吉日 肅 日 : 曰:「弗非,無非之者。 「踐,履也。 也 踐讀 爲善,聲之誤也。」 卜得可行之日,必履 日, 所 1 王氏 而 筮

<sup>「</sup>命」、《儀禮集説》作「於」

<sup>)「</sup>祭」、《儀禮集説》作「祀」。

疑。」 也。 行 日繫於月,月繫於時,故兼言時日耳。 占日,使民信時日。 「卜、筮之用有二: 占日與占事也。 疑者似之,故謂之猶與。」 亦獸名,象屬。 敬鬼神也。 人爲天子 之。 日者,甲乙之屬。 愚謂:時,謂四時。 者 孔 《説文》: 也。 氏 日 此二獸皆進 : 時 用以 猶 先 四 擇吉而祭祀,所以 聖 一時及 ,獸名,玃屬 占事,使民決嫌 王 時不須占,以 退 吴氏澄 一日十 伏 多疑, 義 以 用以 人多 日: 來 與, 古 時 聖

> 時日之意。 ト、筮之事。 上決嫌疑之意。 嫌疑」二句 言占 ○自「外事以剛日」至此 日 事 0 而行事」二句,證上 疑 而 統 之二二句 明明 證

君車將駕,則僕執策立於馬 前。 車事, 鄭氏 頒之,馭夫主之,典路贊之與。 祭祀出路,贊駕説」,則駕車之事 治之」、《趣馬》「掌駕 僕,御 策,馬杖也。 曰:「監駕,且爲 故執策監 車 愚謂:《周禮 者 也。 駕 别有人 周禮》諸 取夫》「分公馬 説之頒」、《典路 恐 馬行。」 馬 ( 牽馬 前 奔 僕 走,故 駕 皆用 孔氏曰 車 蓋 大 立 学大 僕知 趣 而 馬

已駕,僕展軨效駕。 孔氏 於闌 也。」駕竟,僕從車軨左右四 也。 曰:「展,視也。 盧氏云:『軨,轄 《釋文》:「軨,歷丁反,一 舊 解 頭轊也。』車行 云: 面視之,上 **鸭** 音領。」 車 闌

不如

親而

赴事

也。

嫌疑者,是非之未決,

ト、 筮以決之。

猶與者,行止之未定,卜、

筮以定之。「信時日」三句,言占日。

「決

也。

畏法令者,擇

日而誓戒之,則人無敢

人無不信其善也。

祭祀必擇日,是敬鬼神

言之,非也。

信時日者,卜、筮得吉日,則

人卜、筮日,無占十二時者。

孔兼

十二時

籍交錯 轄 削 爲 陸氏《釋 所 鐵 也 爲 也。」 也。 由 君言已駕 曰 集注》:『軨,軾 軸 非 施 下從横 急 爲之,所以 車 轄 末, 陸氏爲 也 闌 小旛 盧 展 文》引 而 説 愚謂 是 植 較效駕 也。』《楚辭》『倚 效,白也 轄關 周 是。 文》:『軨, 也。 『轄 ,謂之飛軨,遂以解經,古無 木統名,即《考 視 也 盧 於轉 蓋 氏説作 關 頭靼」之説,乃 車 較爲 轊者, 靼 内 軸 闌 謂 鄭 施 下從横 白 而 周 氏 言 於 軾 轄 則 辖 制 車 君 視 謂 車 下 頭 轉、 端 道 轂 轖 之軸 頭 車 篾 靼, 從横之木,舊 結較兮長太息」, Ĭ 木。」 故 駕畢 轄 闌 間 轄 爲 記》之『軹 日 因 則 孔 此於展視固 横 古 頭。 之三 覆答,答即 按軨者 疏引之作 可 轄 漢時路 木。 在 頭 轄者 面 其 靻 戴 轄 轖 内 戦 一説 是 氏 而 車 頭 轄 若 軾 矣。 Ż 在 以 白 軫 名 車 震 以 頭

> 下『犬馬不上』同。 乘路馬」皆同 衣由 右 上 取 乘,繩 貮 綏 證反,下『除乘』、『君不乘 跪 乘,《釋文》:「上,時 **冷有車**」、 掌反,

奮

貳, 升。 故 竟 鄭 此 敢 綏,擬君之升。 乘 依常 先出 是 ,未敢立,敬 取 氏 副 全暫試 貳綏 必 曰:「奮, 也。 從右者,君 而 就 空左 立 而升也。 綏, 車 一,所以 於車後 也。 振去 登車 不嫌 跪 是副 位 跪 索。 塵 也。 而 振 在 孔 乘 也。 乘之,爲敬 衣去塵 綏, 左, 氏 者, 綏 曰 有二: 擬 貳, 故 君 僕 既 避 從 僕 副 君 右 未 也。 右 X 也 之升。 空位 出 是正 邊 白 一,未 跪 而

執 策 分轡 驅 之, 五. 步 而 立

名服 索也。 鄭 有 氏 兩 日 : 轡 馬 車 兀 兩 調試之。」 邊 馬 轅而 名 八 轡 騑 四馬 馬 驂 駕之,中 亦 孔氏 馬 日 内 驂 티 : 轡 馬 ·兩馬 繫 轡, 於軾 每 夾 轅 御 前 馬

馬,得 謂 手 餘 中 六 驅 轡分 驅, 五. 馬 步 不 馬 置 一轡置 可 而 行 兩 跪 僕 也。 手 杖 倚立 手 上云「跪 Ŧi. 中 手 步 ·, 故 待 執 而 杖 君 立 日 乘」, 者 「執 出 以 也。」 謂 僕 策  $\equiv$ 未 轡 跪 分 驅 轡 置 而 之 愚 騙 馬品 空

君 出 前 H 「并,必政 就 及 既立之後 車 賓之乘 反 則 僕 攘 車在 ,如羊 并 也。 轡授 大門外西方,北 <u>ij</u>, 反,又音讓。 綏, 駐 車 左 也 辟,音避, 右 攘 《公食禮 面 辟。 立。 徐 扶 《釋 亦

反,本或作『避』字,非也

引君 令登。 并六轡及策置 攘 右 鄭 謂 氏 ,古『讓』字。」 曰 : 上 群 當 也 臣 右 并 陪 手 左 轡授綏 位 并轡, 右 侍 手中 攘 孔氏曰:「并轡授綏者 駕 辟者,車 左手 者 者。 餘 車 攘,卻 授 手取 E 綏 將 僕 行,故 回 正 也 所 主。 身 綏授 或 左 向 後 者 右 君 左

侍

者悉遷卻

以

避

車,使不妨車行也

愚

謂 在 右手引君 右 僕 手 : 之左 授綏 并 轡 授 引君 有力也。 ,授綏向後,則君 綏 者 升 并 車 攘, 也 轡 古 蓋 策 升在 於 御 讓 車 左 字,《 僕之右 向 手 前 中 《荀子》 則 而 了**,** 且 君 以

徐起遇 右 車 就 驅 盛揖攘之容」,是 車 而 反。 翳,至於大門,君撫僕之手,而 翳,仕救反,又七須反,徐仕遘 門閭、溝渠 必步。 也 《釋文》: 反。」 驅 顧 起 命 俱

令駐 外門 驅 則 鄭 右, 從 從趨在車後,車行既至大門,方履 左,僕人中央,勇士 者 陪 氏 而 勇 車 騶 時 疾 乘, 日 力之士 者 趨 :「車右,勇力之士備非常者, 也 故 君式 從 ,左右已辟,故 抑 車行 撫 則 止 也 按 僕 下 也。 止 手 步 在 車 也。 也 行。」 右 至於大門,謂 行 驅 則 車 顧 車 初 有 行 在門内, 孔 而 口 由 進 氏 頭 僕 險 日 則 也 車 阻 君 勇 君 行 君 左 恐, 在 車 欲 至

有門。 之也。 也。 渠必 在 逸 夫、趣馬之屬掌駕馬者,車 以《肆夏》,趨以《采 而 愚 誣十 渠,勇士必 渠 有 二則溝 (説文》:「쪯, 疾行也。 左 ,故翳隨至大門也 謂 亦 非 》、《獲》以 ·室,過 古者二十五家爲 溝 步 常 御在中央,戈盾在 僕不下車者,僕下則車 , 是 也。 〇孔氏曰:「兵車參乘之法,射 渠險阻,恐有傾 翳」「趨」字 故 下車 車右 門間 П 步,下車 《周禮 養耳。」 顧 御 之禮 命 必 也。」蓋《周 所以 車 式 齊》。」或曰 通。 也。 車 大馭》: 也 右 間 門,國 君 然者 一覆,勇 驅 1 右 溝 《荀 式 同 車 車 ·初行 而趨,謂 則 ·若至門 共 門 ,一則君子不 若 也 官》 廣 「凡馭路 子 士須下扶 無 : 臣 非 深 0 騶, 如 \* 恐馬 御 當下 巷, 馭 四 門 兵 閭 車 「騶 也 大夫、僕 間間 車 尺 閶 或驚 巷 巷 既 字。 也 者。 者 首 門 行 持 溝 則 中 溝

> 中。 曠左』, 尊者 右。 右。 在中。』」《檀弓》疏。 鼓之,是也。 御,左輪朱殷。」是御 御郤克,解張云:「矢貫余手及肘,余折 血及屨,未絕鼓音」。 逐齊侯,杜 右》云『贊王鼓』,成二年齊師 元帥,則在中軍鼓下,御者在左,戈盾 若天子、諸侯親將,亦居鼓下。 故成二年韓厥自其 在 成二年鞌之戰,郤克爲中軍將 鄭 左 注 預云: 故 云 若非元帥,則皆在左, 曲 一君 『兵車 禮 者 存,惡空其位。』  $\cong$ 是將居鼓下。 自非 在左,自然戈盾 乘君之乘 車左 元帥 圍龍 居中 n,齊侯 車 代 御 御 時 故《戎 不 御 者 解 亦 若 而 在 親 在 以 張 在 敢

則自 不然 凡 僕 下拘之。《釋文》:「拘,古侯反,又音俱。」 則 人之禮,必授 否。 若僕者降等, 人經。 則 若 撫 僕 者 僕 降等 之手,不然 )則受,

鄭

氏

日

撫,小

,止之,

謙

也

自

下

拘

大夫與 僕,非 受。 邊,示不用僕 手外取之,而 者既敵 則 僕 由 然後乃受也。 者,僕者雖卑,猶 謙,故受取 必授人綏 不受其綏也。 僕 手 但爲君僕 孔 不受,而僕者必授,則主人 卿 F 氏 御 一級也。 取 也。 日 也 授 郤 之 不然則自下拘之者,不降等 : 也。」 也。 手 凡 若僕者降等,則撫僕之手 當 僕者降等,謂 也 御 不然則否,謂僕者敵體 從僕手 撫 者卑 僕 車 11: 僕 人 E 僕 降 與 之 僕 下拘僕 手,不聽 禮 己 所 則 士與大夫、 主,故爲 同 主 謂 手裏 爵 不就 人不須 爲 其 則 授 E 僕 X 切 不

客 車 也。」 立乘 鄭 倚 氏 不入大門,婦 ,異於男子。 曰:「客車 異男子也。 孔 氏曰: 木 人不立乘,犬馬不上於堂。 「立,倚 男子倚乘,婦 Ż 犬 、大門, 馬 不 也 上 謙 於堂,非 婦 也。 人坐乘,所 人質弱 婦 人不 贄 幣

> 馬 以 異 則 執 也 0 靮 犬 馬 賤 不 牽 Ė. 堂。 犬則 執

卿之朝 位。 鄭氏 位 大 車 出 公降作階,南 此以 也。 至而 式黄髮,敬老也 黄髮,老人 是諸 寢 0 則 若迎 西 過 日 下 入里必 ( 燕禮 下明 位 車。 : 侯禮、《樂師》是天子禮。 階之前,反降於阼階之前。」或 卿 賓 也。 位 發句言 也 》、《大射》『卿 雜 客 式,不誣十室。」 而 嚮 敬 或 君 上 卿 則《樂師》 邇 禮 不 出,過之而 故故 車, 下卿 位,路門之内 卿」,是也。 也。 馳 人則 位,尊 愛人 明 大夫 君子,謂人君也 注 此 未 也 E 賢 衆 云 到 門右、北 門 尋常出 篇 車 也 卿 孔 馳 雜 或 氏 登 位 善 東 卿 辭 中 車 而 北 下 日 躙 位, 也。 面 卿 於 下 面

車與? 降信 節 車,人則 也。 大寢之階前」,以《考工記》應門、路門皆 十室也。」 愚謂: 人君日視朝 十室之邑,必 ,若馳 於車者觀之,則人君之車皆於路門 《樂師》注謂「王有車出之事,登降於 矣。 車 於 下 ,則躙 卿 雉 於治朝,此 有忠信如某者焉。』是不誣 位 門 人,故不馳。 者,蓋 内 燕朝、治朝皆有卿 下 「卿位 車, 出 則於路門 過 調 《論 之而 治朝之位 語》云: 復 外 内 位 登 取 下 登

「御、依注音迓、五嫁反。」 君命召、雖賤人、大夫、士必自御之。《釋文》:

祥

蓌,子 介者不拜,爲其拜而蓌拜。《釋文》: 鄭 人來,必 卧反,又側嫁反 氏 『跛者御跛者,眇 曰:「御當爲『迓』, 自 出 迎之,尊君命 /,挫 也。 者御 沈租嫁反,又子猥反,盧 眇者」,皆迓 迎 也。 也。 《春 「爲,于僞反 君雖 也 秋 使 本作 傳》 賤

「蹲」。」

軍也。」 者必 猶言有 孔氏 法: 則 式,危事不齒,介者不拜,不以 其拜,故不拜也。 民法廢 軍容不入國,國容 日: 跪 ,介者所以不拜者,爲其 所枝拄,不利屈 介, ,●國容入軍則 甲 鎧 也。一 〇陳氏 不 伸 民 人 也 德弱 軍。 朱子 祥道 拜 軍 曰 : 愚 曰: 或 兵 則 容 謂 容 車 枝 兵 不 或 拄 拜

車。 鄭氏 曰 : 車 擬 用 爲 神 曠 「祥猶 曰: 不曠 左。 魂 也 車。 左,君 乘君之乘 乘 吉也。 曠左,空神位 曠, 車, 空 謂 存,惡 吉車 也 君之次路 車,不敢 爲 車 空其位。」 也。 平 上 曠左,左必式 生所 尚 祥車,葬之乘 也。 左, 乘, 王. 空 孔氏 有 左 葬 以 時

「法」、《集説》作「德」。

臣乘此 車 居 也。 乘之。」」 也。』●《隱義》曰:『獵車之形,今之鉤 不正之車。 衣車,如 盧 鼈 氏 而 云: 長,漢桓帝時禁臣下 不 如法者之

車是

車

車上不廣欬,不妄指。 惑衆。」 高 鄭氏曰:「不廣欬,爲若自矜。 似自驕矜,又驚衆也。妄,虚也。 ,若無事,忽虚以手指麾於四方,並 孔氏曰:「車已高,若在上大欬, 《釋文》:「欬,開代反。」 不妄指,爲 在車上 爲

立視五傷,式視馬尾,顧不過轂。《釋文》: 衆也。

手,後左手而俯,敬也。」

孔氏曰:「僕在

中央,婦人在左,僕御之時,進左手持轡,

在後。」 鄭氏曰:「立,平視也。 之度。式視馬尾,小俛。 孔 氏曰:「巂、 傷猶規也,謂 規聲相 顧不過轂 近。 規是 爲 輪 掩 轉

僕御婦人,則進左手,後右手。 右手,後左手而 左也。 鄭氏曰:「進左手,後右手,遠嫌也。 車 不敢 央,御者在左。」 恒憑式。乘車君皆在左,若戎路則君在 ,故謂生時所乘用爲魂車者爲祥車 ,王自乘一,餘四路皆從行。 曠左,若曠左則似祥車,故乘者自 左必式者,雖處左而不敢自安,故 俯。 愚謂: 載柩之車爲 御國君,則進 進右 喪 中

或 君不 不得恒式,故但俯 奇車。 《釋文》:「奇,居宜反。」 俛 而 爲敬 也。

左手者,禮以

相嚮爲敬也。

而俯者,既

御,

形微相背,遠嫌也。

御國君,則進右手,後

本又作『雋』,惠圭反。」○鄭注:「巂,或爲『繠』。」

鄭氏 孔氏曰:「國君出人必正,不可乘奇邪 曰:「出入必正。奇車,獵、衣之屬。」

<sup>0</sup> 「法」, 據《禮記注疏》當作「御」。

過 中 時,不得遠矚,而 也 爲 輪 九尺八寸,五規爲九丈九尺,六尺爲步 睘 一戰,過 朩 高 十六步半。 故 内 馬 六尺六寸,徑 讀從規。 顧」,是 引車,其尾近在車闌 轂 則 掩 也。」 在 車輪 後人私 瞻視馬 車 上所視,則前十六步 一圍三,總一規爲一丈 一周 也。 尾。 爲一規。 ^ 若轉頭,不 前,憑式 論語》云『車 乘車之 下 總總 得 頭 半

即、勿並如字,「即」字「驅」字爲句 字,又羌遇反。」〇今按: 遂,徐雖醉反,又囚歲反。 或 中 以策 彗岬 勿驅 注疏 塵不 卹,蘇 讀 出軌。 卹 没 反。 勿」爲窣没爲句,吴氏 勿,音没。 《釋文》: 「彗,音 驅, 如

策 摩 鄭 不欲令疾 「策 小,但取 氏 也 **、彗」。** 日 竹帚帶葉者爲杖,形 一人國 也 卹 孔氏 勿 3者,以 軌 不馳。 曰:「入國 車 策 轍 彗,竹帚。 微 也 沂 不馳,故不 車 馬 如 行 掃帚 體 遲,故 卹 搔 摩之, 故故 勿,搔 用 塵 鞭

> 疑謂 澄 埃 不 日 飛 策之彗,若今時鞭末 「彗卹 揚 出轍 ,謂埽 外也。」 拂之。 朱子 韋帶耳。」 勿驅, 日 謂 勿 策 吴氏 以

馬。《釋文》:「齊,側皆反。」〇下齊牛,式宗廟,當從《周國君下齊牛,式宗廟。 大夫、士下公門,式路策馬令疾行也。」

禮》注作「下宗廟、式齊牛」。

則前 慤 異。 馬。」 鄭氏 其 敬 故 正。 曲 謂 神  $\exists$ 祖 禮》曰『國 之所享 之齊牛。」 馬 熊 馬」, 曰:「自此下,皆廣 考 「齊牛,祭牲也。 也 氏 孔 比門輕,故 氏曰: 云:『此文誤,當 注云『王見 也 廣 君下宗廟,式 其 愚謂: 大夫、士至公門下車 敬 有下、式之異。」 齊 則 右 牲 於 敬 或 歲 職 則 齊 也。 時 尝云 君 以《周 拱 齊牛」,與此 牛 至宗廟 齊戒而 而 二凡 亦 路馬,君之 式」, 禮 式 有牲 朝之, 之,爲 下車, 又引 方氏 注 事 文

之所乘 君 世 也 廣 其 が敬 則於路馬亦式之,爲其君

氏

正

乘路 鄭氏 馬,必朝服,載鞭策,不敢授綏,左必式 日 載 鞭策,不敢執也。」 愚謂:

乘路馬 朝 服者 ,謂以 「敬路 他車駕路馬而調習之也。必 馬 也。 蓋 御 與左皆然。鞭,

馬箠。

策,馬杖。載之者,備而不敢用也

言居左之法也。 禮 不敢授綏者,不以綏授居左者,辟御君之 也。 此二句言御者之法。 大夫、士式路馬,御者不 左必式者,又

皆别 人矣。

皆言「左必式」,則乘路

車路馬者,御與左

能式,居左者恒必式也。此與上乘路車,

步路 馬 有誅。 馬,必中道。 《釋文》: 蹙,本又作『蹴』,采六反,又子 以足蹙路 馬芻有誅 一齒路

鄭氏 曰:「齒,數年 也。 誅,罰也。」 孔

六反。」

所食,若以足蹴踏之,則有責罰 年數,亦被 路 曰 爲 : 步猶 敬 責罰,皆廣敬也。」 也。 行 芻,食 也 牽行君馬 馬 草 也。 論論 芻 必 在 供 中 君 君

馬

道

禮 記 卷 四 終

## 禮記卷五

國史館纂脩孫希旦集解賜進士及第翰林院編脩

## **丗禮下第二之一**

『三分帶下,紳居二焉。』紳長三尺,而居帶奉之者,謂仰手當心,奉持其物。提之者,奉之者,謂仰手當心,奉持其物。提之者,之屬,其帶則高於心。深衣之類,其帶則之屬,其帶則高於心。深衣之類,其帶則之屬,其帶則高於心。深衣之類,其帶則。與氏曰:「高下之節。」 孔氏曰:「凡物鄭氏曰:「高下之節。」 孔氏曰:「凡物

帶,與朝服等之帶高下不同,則未然。 所餘正三尺五寸,故知朝服等帶則高 之帶與深衣之帶,其高下並同,而不在心 然後可以束帶而固衣也。 帶下尺」,衣當帶下之處,别以一尺續之, 自肩以下六尺六寸三分寸之二,帶下四尺 長八尺,頭長一宣一尺三寸三分寸之一, 此爲「尋常提奉」之法,是也。 此明尋常提奉,益可知也。」 者當帶」,謂深衣之帶。且古人恒著深衣 無骨者」,故知深衣之帶則下也。今云『提 之所在也。衣之度二尺有二寸,帶正當其 五寸,則肩之下二尺一寸三分寸之二,帶 人長八尺爲限,若帶下四尺五 下三分之二,則帶之下去地 下際,則於東衣不固。 而《深衣》之帶,『下毋厭 故《喪服》記云「衣 髀,上毋 由此言之,朝祭 四 而謂深衣之 愚謂: 疏以 寸,則帶上 尺五寸矣。 厭

上亦明矣。

湯果反,又他回反。」之,士則提之。《釋文》:「上,時掌反。綏,依注音妥,執天子之器則上衡,國君則平衡,大夫則綏

别尊 心齊。 奉也 衡謂 心。 鄭氏 之下,即上『提者當帶』也。」 當 謂 爲奉器,與心齊平 二處: 若大夫衡視,則 下,臣爲擎奉,皆高於心,彌敬也。 上如揖,下如授」。 心平,故謂 卑 與 心 三二上 上謂 此 心平」也。 以 孔氏曰:「衡, 平。 謂 爲 行 尋常奉物 一衡,謂 高 綏 心爲 禮之時,爲 下 讀 也。 也。 衡。 或 高於心 日 此國君 君 平也。人之拱手,正 妥。 故 面爲衡,故鄭云『此 天子至尊,器不 爲 降 論 於天 其 不分尊卑 士提之,又在 ,彌敬也。 語 妥之,謂 君 平衡之法,當 光 愚謂: 子,故 執 子 物,故分 凡衡 執圭, ·, 皆 下 執猶 其 此 於 與 綏 有 官 衡 臣

> 行走、屈伸之際者,其可忽乎?」 物同 下於 仰,爲禍 之肅慢,爲吉凶之所召,以一執玉之俯 心 者 也。 心 也 可 福之所係。 見 〇馬氏 由 矣。 是 推之, 路孟 士則提之者,謂當帶 則夫見於奉持、操執 則 曰:「古人以 上 衡 高 於 心 威 與 綏 提

凡執主器,執輕如不克。

如也, 重慎。 夫。 也。」 勝之容也。 主。今此言『主』,上通天子、諸侯,下含大 鄭 重」,是也。 氏 曰 尊者之器,不論輕重,其臣執之, 如不勝」、《聘禮》曰『上介執 器雖 孔氏 重 故《論 實 曰:「主亦君也。 慎之也。 (輕,而 語》云孔子『執圭,鞠躬 執之猶 主,君 如實重, 禮,大夫 也。 克, 如 唯 稱 勝

車輪曳踵。《釋文》:「操,七刀反。」執主器,操幣、圭、璧,則尚左手,行不舉足,

驸,右 足,但 以 愚謂 以左手所執之處爲尊。 左執領,右執要,是也。 手執其上端,右手執其下端。 其餘可推矣。 簫,左手承弣。 皆尚左手。」上篇言執弓遺人之法,右手執 手」。 鄭 穎、杖、琴、瑟、戈有刃者櫝、筴、籥,其執之 玉 輪 云:「笏、書、脩、苞苴、弓、茵、席、枕、几、 右手在下, 也。 左手之所執授之。 氏 日 曳,拽 起前拽後,使踵 行不 執 尚,上也。 尚左者,謂以 : 簫 重 絶 左手 也。 冠之右執 慎 地。 蓋凡物之有上下者,則以 此執弓尚左手之法也 也。 在上。 踵 謂執持君器及幣、玉,則 冷腳 左手爲 尚 若奉 孔 如 左 項,左執前 其以之授人 後也。 氏 其無上下者 左尊,故云『尚 車 手,尊 席 曰:「圭、璧, 輪 尊 如 曳 也。 如弓之左 橋 行 地 左 衡 時 《少儀 也 也 ),則 不 衣 則 亦 之 執 則 瑞 旧 左 舉 左 車

> 臣 立則磬折 佩 與璧無上下,而執之皆以左手爲尊也 執物皆然。 横奉之,左昂右低,如 委。 《釋文》: 垂佩。 若幣、圭、璧,則圭有上下, 「折,之列反,一音逝。 主 佩 倚 則臣 有 首 佩 尾 垂 」,是也 主 佩,步内反,本 佩 垂 則 凡

或作『珮』,非。倚,范於綺反,徐其綺

反。

之法。 尊卑 鄭氏 直 皆以磬 受器於己臣,或受之於他國之聘賓 之曲折也。 小俛則垂,大俛則委於地。」 垂佩者,謂非 言立而授受之儀也。 「行不舉足,車輪曳踵」,言行步之儀,此 則 垂帨 佩 曰:「君臣 君佩 倚 折 附 垂 磬折 或倚或垂者,物或 於身也。 是 佩 與君相授受者,則賓主之立 也。 爲 一俛仰 度。 則 佩 之節。 主,君也。 此又言與君相授受 磬折,謂身微 上篇言「遺人弓者, 垂於前。 倚,謂 愚謂 佩 重 立則 或 附 倚者,身 僂 故故 輕,或 於身。 磬折 上文 如 又

以 則 不 尊君 視 必 君之身容以 爲 也 恭 ıті 佩 倚者,有 爲節 恭敬 而 皆 而 視 佩 君 垂者。 加 恭 所 臣

「藉,在夜反。裼,星歷反。」執玉,其有藉者則裼,無藉者則襲。《釋文》:

内,而 也。」 者禮 質之異。 裼爲見美,襲爲充美,行禮以 錦 劉 賓襲執圭,「公側襲,受玉於中堂與東楹之 之左衽,以重於右襟之下,而掩其中衣 琥、璜,皆玉 無 璋 氏 繡 藉 也 彝 差 黼 露其 ,圭璋則特達 愚 輕 日 同 聘時 一,尚 謂 升, 無 中 也。 藉 衣也。 文也。 此 所 裼, 崇敬,賓主皆襲 則 謂『有 謂 執 露 襲,襲者禮 朝聘 琥、璜、璧、琮 襲,重 而 也,謂 執圭璋 藉」。 無 時圭、 藉者 也 摺 則特 有 ,謂舒其 裼、 上 也 方敬,尚 璋、 前 藉 一衣之 達,所 襲爲文、 則 ,則與帛 《聘禮 其 璧、琮、 裼 衽 E 玉 衣 則 於 質 謂 裼

之。 享而 《聘禮》「公側受宰玉,裼降立,擯 間 東帛 質,襲充美 則垂爲飾,故《聘禮》記『皆玄纁 有 **圭、璋、璧、琮,繅皆二采一** 伯三釆三就,子、男二釆二就。』又曰:『瑑 大小。』《典瑞》云:『王五 之時,必有 相變耳。 有藉 賓裼,奉束帛加璧享」,是也。 則 . 繅所以藉 五采 壁 ○鄭氏曰:「藉,藻也。 是也。 而裼,亦是也。」 分,不分玉之有 琮 無藉 也, 組 繩 有藻爲 亦質。 聘、 藻 璧琮 玉,以韋 以 行享 以承 爲 享時 則 文,裼見美亦文。 繋,無事 尚文,賓主皆裼 主、璋特 乎玉,鄭注《觀 加於束 衣木,廣袤各如其玉之 亦 藉、無藉 不同,故 孔氏曰:「凡執 采五就,公、侯、 則 帛 就。」是也。 而襲,璧、琮 裼、襲,文、質 以 而 裼、襲 而 繫玉,有 有 ,繫長尺絢 記 起 者 禮》云: 藉 無藻 會 而 因 出 者 而 其 而 聘、 也 事 玉 加 又 爲 玉 玉

而授上 之時,則須襲。 常在,不可以言無藉。 凡享時,其玉皆無 又云『賓裼奉束帛加璧享』,是有藉者裼。 藻,」是屈藻之時皆襲,所謂無藉者襲也。 襲執圭』,又云『公襲受玉,於時 盛禮不在於己」,明屈繅合襲也。 襲,執圭屈繅授賓」,注云:『上介不襲,以 裼」,明貴者垂藻當裼也。 外,『賈人東面 垂者而言之也。 不了字。」 據垂之也」,與經文及所說上下文俱 今言無者,據垂之也。朱子曰:「『今言「無」者 組」,是也。 木畫之,一 一介」,注云:『不言裼、襲者,賤 愚謂: 疏云「據垂之」者,蓋謂以韋衣木之藉 者絢 是藻藉 其垂藻之時,則 坐,啓積,取圭垂繅,不 案《聘禮》賓至主人廟門 組 今言有藉、 藻藉 垂之。 有二 ,故崔靈恩云:『初 種 玉藻,説詳《雜記下》。 無藉者,據絢組繫 又云『上介不 : 相反,疑據下脱 須 者以 裼 又云『賓 圭皆屈 章衣 屈 不 起 藻 可

> 之説。 襲、璧、琮加束 璧、琮雖有藻而屈之,特以加東帛,故從有藉之例,而 享「享」字當作 皇氏、熊氏二説,並申注後説 圭以馬,璋以皮,皮馬不上於堂,其上特 者裼耳。」〇按:此上申注前説。 則東帛加璧。 各自爲裼、襲。朝時用圭、璋特,賓主 玉,上惟用輕細之物蒙覆以 圭、璋,寶物不可露見,必以物蒙覆之,故 『襲』者,❶人之裼、襲,欲明玉亦有裼、襲。 云『襲』。 璧以帛, 琮以錦, 崔靈恩云『璧、琮既有束帛,則不須藻」,似亦牴牾。 享時壁、琮加東帛,賓主俱裼。」按此 熊氏以爲『圭、璋特』以下,明 「聘」。 既 帛而裼』者,以經云『裼』 有東帛,故無藻。』朱子曰 圭、 璋 特,故 鄭云『圭、璋特而 、裼之。 愚 既 謂 有帛、 有 藻,其 此 此條注 賓 皇 錦 俱 氏 承 有 疑 L 執

一「者」,原誤作「據」,今據《禮記注疏》改。

繅, 甚詳 者。 賓主 宰 蒙 義, 介 他 此 襲」,欲明襲者惟賓一人。 細之物蒙 有二義, 不襲」,而 屈 屈 物 並 覆 襲初 襲之變。 屈 繅 繅 蒙 解 俱襲,享用璧、琮加東帛 「爲襲,璧、琮加束帛爲有藉,惟用 至 也。 介 藻 玉 以 始受君命 覆 注之後説 以 不 執 爲 而 授實 之垂 授使者,使者 覆 ,皇氏臆説無 皇氏 相 其 璋 無 疏 爲裼。 然則圭之垂 爲三 因 藉 時 屈 一藻、 矣。 謂圭、璋特爲 圭 而 繅。 三也。 既 説。 賓 川 屈 賈人取圭垂繅以 熊氏 歸 湿藻,則 主 然惟 禮於上介授賓言「不 屈 襲。 反 垂 繅 垂繅 據, 聘、享之玉 謂 繅、 命, 藻 也,其餘 於上 上介雖將行聘 見於《聘禮》者 此不待辨 朝 此 爲 以 無藉 屈繅,與 使 賓主 時圭、璋 解 有 授 介 者 注 藉 上 授賓 故 執 皆 前 而 授宰, 介, 一,别無 俱 人之 圭 而 不 用 説 賓 裼。 特 垂 明 輕 物 主 之

諸侯則 文云: 與上 也。 禮 必 衣, 見其 衣之給,故視天子者據之以爲節 裼衣,實則 掩於中衣,謂 衣,謂之裼。 有 説,而朱子亦以爲然。 制,故有袷。 一寸以爲衽。 裼衣」者,而注、疏 視其 締、絡、春秋有禪、絅、袍、 執 中衣上有禮衣,若朝 服 禮衣皆直領而對襟,其當胸 不襲者也 圭 「天子視不上於給。」中 黼繡丹朱,大夫、士雖不可考,亦要 同,而 上服之色爲華,故裼謂之見美。 猶 不襲 裼 之襲。 若禮之尤重 古人以 衣 别以華美之物爲 衽恒摺於衣 革 即 故劉 中 非 乃以禮服内之衣指爲 裼爲常, 經記但言「裼」,無 衣 氏 以 八凡 也。 、陸 屈繅 服、皮弁服 者 繭。 内, 衣,冬有裘,夏 氏 中 之必 則 裼 衣與深 惟取熊氏 之領緣 衣之所 其上有 則 而 舒 左 襲 露其 右各餘 露 其 之屬 然則裼 其 衣 衽 而 用, F Z 是 中 口 如 mi 中 中 特

DL

衣之即 褶,其上有中衣,中衣上有上服。」此 皮弁、祭服之等。 謂:「冬有裘,裘上有裼衣,裼衣上有 衣,而誤以爲冬夏之分,則 言「襲衣」,視孔爲優。然不知裼衣即 衣上服之間,多一襲衣矣。 ,襲衣上有常著之服,皮弁之屬 中 衣 明 ,皆明執物之儀 矣。 夏有絲、綌, 孔 疏 謂「裼 亦未爲得 《聘禮 春秋 衣 上 不 則 賈 有 則 1 也。 中 别 袷 服 疏 襲 裼

林》丈一反。 娣。 士不名家相、長妾。《釋文》:「姪,大節反,《字 卿老, 君 貴於諸妾也。 鄭氏曰:「雖貴,於其國家,猶有所尊 妹,從妻來爲妾也。 曰:「上卿貴,故 自篇首至此 不名卿老、世婦。大夫不名世臣、姪、 E 娣,大計反。相,息亮反。長,丁丈反。」 卿。 姪是 世臣,父時 日 「卿老。 妻之兄女,娣是妻之 家相,謂 老臣。」 世婦, 助知家事者。 謂 兩 孔 媵, 也 氏

或

君大夫之子,不敢自稱曰「余小子」。 士之子,不敢自 長妾, 或不必有姪、娣,故 者。《士昏禮》曰:「 臣之主家事者,所謂宰也。長妾,妾之長 己,生文伯。 亦有姪、娣。《左傳》:「穆叔娶於莒,曰 右媵也。 夫人之姪、娣爲繼室,夫人之姪、娣貴於左 之貴者,謂二媵也。 女,夫人與左、右媵各有姪、娣。 世婦, 諸侯娶一國,則二國往媵之。 卿老者,諸侯之卿,自稱 娣、長妾,皆貴妾也。」 愚 卿老、世臣、家 臧宣叔娶於鑄而 謂妾之有子 世臣,父時舊臣也。大夫、士 稱 其娣聲己生惠 曰「嗣子某」,不敢與世子 相,皆貴臣 死,繼室以其姪。」家相 者。」 但推 或曰:《左氏》每言 雖 無 其年長者爲貴也。 曰「寡君之老」也。 娣,媵先。」士娶 吕氏 也 謂:上卿謂之 諸侯一娶九 叔。」又 世 大 婦 臨 大夫、 日 日 戴 娶 妾

同名。鄭注:「世,或爲『大』。」

辭。 喪自 名。 鄭 不敢與世子同名,尊儲貳也。 國,大夫不世家,故諸侯之子謂之世子。 諸 侯之辭也。 稱於臣民之辭,「適子孤」,在 稱 生,則亦不改。」 自稱 子大夫有采地者。● 大夫、士之子,不敢 子」,辟天子之子未除喪之名。君大夫,天 天子之稱者。《左傳》趙襄子謂楚 嗣子不廢舊業而敵之。」此大夫在 侯之稱者。 「嗣子某」不同者,蓋「嗣子某」,在喪 氏 下文云「諸侯在凶服曰 稱之辭。 不敢與世子同名,辟僭傚也。 曰『嗣子某』,亦辟其君之子未除喪之 日 君大夫之子,不敢自稱曰『余小 晉有小子侯,此諸侯 世子,君之適子。 嗣 愚謂:余小子,天子在 子某,諸侯在喪自稱 適子孤」,與 喪 在 而 其先 諸侯世 隆 喪 喪 稱 日 於諸 愐 而 僭 僭 此 之 之 而

> 字,本又作『有疾』。」〇鄭注:「憂,或爲『疾』。」 之憂。」《釋文》:「使,音史。 君使 士射,不 能 則 辭 以 疾 射,市夜反。 言 日 : 則 某 解以 有 疾,如 負 薪

六

也。 鄭氏 幾於非男子矣。 餘勞,故不 則似傲慢,故陳疾之所由,言己有擔樵之 薪」,亦謙 『不能』,但當自言『有疾』也。某,士名也。 之憂,不能造朝。」采薪,猶 曰:「射者,男子之所有事也。 負,擔也。 而不可以不能辭也。 射以觀德。 使士射,謂以 曰: 「射,所以 辭也。 大樵 堪射,明非假也。」 士既升朝,必宜有德,不得云 日薪。 憂,勞也。若直云『疾』, 故士不能射,可 備耦 觀 孟敬子曰:『有采薪 德,惟 士禄代耕,而 也。 負 有 薪 不能 疾 也。」 吕氏 孔 以 氏 可 疾辭, 射,則 云『負 大臨 日 以 愚

<sup>「</sup>采」、《禮記注疏》作「土」。

謂:《孟子集注》云:「負薪之憂,言病不

能負薪也。」義亦通。

侍於君子,不顧望而對,非禮也。

爾而對。」鄭氏曰:「禮尚謙也。不顧望,若子路率

之故, 謹脩

其

法

而

審

祭祀之禮,居喪之服

也。 搋 也。 喪之服者,殷雖尊貴,猶服傍親,周 六尸,及先求陰陽,犧牲騂、黑之屬 他國,猶宜重本,行故國法,不務變之從 子行禮,謂去先祖之國居他國者也 其先祖之制度,若夏、殷。」 鄭氏曰:「求,務也。 降。 祭祀之禮,即夏立尸,殷坐尸 謂去先祖之國,居 哭泣之位者,殷不 不務變其故俗,重 新 重適 國。 孔 一,以 氏 周 其 日 則以 班 也。 法 旅 雖 高 尊 新 君 本 處 居 子 居 謂

> 禮,居喪之服,哭泣之位,此三者列 上 故《冢宰》八則,六曰「禮俗以馭其民」。 皆「陳衣於序東,西領南上」。 於房中,「南領 則或布或綃,祔則或合或離,拜則或稽 行,容有不同,非但爲夏、殷、周之殊制 者其所同,俗者其所不盡同者也。 不容或異,而其儀文曲折之間,不能 於房中,「南領西 而後拜,或拜 雖《禮》無明文可見,然以 冠、昏之禮 士同「西領北上」。《 而 《喪大記》則 周 貴 正 從 嗣 加 西上, 可 沐 孫 後 知 上」,而《喪大記》大夫、士 粱。 居其 稽 也。 士喪禮》大斂亦陳 類。 而《 ^ 士喪 首。 喪大記 《士喪禮》沐稻 喪禮言之,如幕 愚 禮》小斂陳 舉 謂: 蓋禮之大體 此 》則大夫、 謹 祭 一條, 盡 國 祀 脩 也。 禮 所 之 衣 衣 餘 0

<sup>● 「</sup>新」,據《禮記注疏》當作「他」。

禮 記 集 解

去國 若兄弟、宗族 者 三世, 講 習 於 爵 平時 猶 禄 存 有 ",則 列 審行之者,致詳 於 反告於宗後。 (朝,出 人 有 詔 於 釋 臨 於 文》 或 事

朝,直遥反,下皆同。」

之人。 遠也。 列 於舊 君 事 告。 矣。 故 鄭氏 大夫者也 絕其祖祀,復立其族,若臧紇奔邾 於 相 俗 有 ,蓋其義猶未絕也。 宗後,宗子也。」 ···; 而 朝 君 服 赴告者也。 韶,告也,謂 出入 矣。 爵禄有列於朝,謂其宗族尚有 猶 則 則 「三世,自 君之喪 不變者 與 有詔 至於三世 自 其 此 舊 以道 於國,謂與舊 與卿 而 一,爵 古 君 往 祖 赴之,而 猶 則 去君而未絕者、爲 謂之出 禄 至 大夫吉凶 兄弟、宗族猶存 愚謂: 有列 以 已遠,然爵 孫。 吉凶 於朝 自 踰久 其 國以吉 三世 之事 往 死 彼 立 可 禄 亦 來 謂 而 言其 相 凶之 以 尚 相 臧 必 至 爲 君 舊 赴 謂 忘 則 掛 有 卿 赴 爲 不

> 故必反告於宗後 僅 可 以 存 無 而 己, 詔 於國 而 未 必 而 有 要不 列 於 可 朝矣。 )自絶 於其宗 如 是 則 也 雖

唯 去國三世 興之日 一,爵禄 從新 國之法 無 列 於朝, 出入 無詔 於 或

君子已 釋文》:「爲,于僞反。」 猶未可 恩。 其 既 世 鄭 後 自「君子行禮」至此,論去國者行禮之事 韶者或不待興 臣,爵 有 可 可 氏 以 孤 列 以 興,謂起 曰 禄無列 遽變其 二、出 、有韶 從新國之法。 自别於其宗, 不更名, 於朝 爲 人無詔 而 八舊俗。 而 卿 興者 已孤暴貴,不 遽變舊俗,故特明之。 い,則出 大夫。」 於國, 則雖 亦 蓋始爵者得自 唯 當 起 人 然。 變其 無詔 而 以 愚謂: 爲 故國 . 爲 嫌 舊 卿大夫,然 於國 父作謚 俗 無 於 去國 「爲宗, 矣, 列 可 己 矣。 然 無 無

鄭氏曰:「已孤 不更名,亦重本。 不爲父

八

樂章

法也。 乎? 作謚 非 於天,諸侯之謚請之於王,子無謚 父也。君子不奪人親之所名,而況敢自 凡爲人父,豈能賢乎? 之基,隆於二王。 也。 謂 在天子爲蔑天道,在諸侯爲亂王章 王,蓋告於天而王之也。若私爲父立謚 不然矣。』」 列平生德行,爲 所 造之,似如 一、庶 以 或舉武王爲難,鄭答趙商 子 謚本於尊者所成,故天子之謚 武王庚戌柴望之後,然後三王皆稱 尊其父矣。 起爲諸侯,非一等之位也。 事父無 鄙 愚謂:已孤不更名,重違 貴賤。」 薄 作美號。父賤無謚,今忽 功德 父賤,不宜爲貴人之父 由之,王迹興焉 若夏禹、殷湯, 孔氏曰: 曰:『周道 其父之 謚者, 「暴貴, 本 而亦 則 之 奪 其

居喪未葬讀喪禮,既葬讀祭禮。喪復常,讀

居喪不言樂,祭事不言凶,公庭不言婦女。 之後。 鄭 豫習,故喪葬之禮,至居喪乃讀之。 以 哭、袝、小祥、大祥之禮。 而後吉祭, 潭後宜讀之。」 喪禮 弦誦爲常,除喪則反其所業也 氏 日 : 謂 樂章,樂書之篇章 「爲 朝夕奠及葬等事。 禮各於其 時。」 ,謂《詩》也 復常,大 愚謂: 祭禮 孔 祥 虞、卒 氏 X 除 日 事 禫 服

誅。 振 書、端書於君前有誅,倒筴、側龜於君前有 凡欲 鄭氏曰:「非其時 況祭祀可言凶 服。』《祭義》:『郊之祭,喪者不敢哭。』又 樂乎? 小功之喪,議 釋文》: 無 相 《周官 「倒,多老反。 瀆 而已,況公庭可言婦女乎?」 乎? • 蜡氏》:『凡大祭祀,禁凶 而 不 也。 及樂,況大於此 内言不出,外言不入, 馬氏 晞 孟 而 日 可

鄭氏曰:「臣不豫事,不敬也。振,去塵

記

有誅 皆有 謹 文書、筴龜不豫整理,今於君前始正 也 也,抑 誅 責也。」 甫 端 蓋 正 正 省視之。」 所以 以 也。 防 群臣之衆而奉一人,不可 方氏 其 倒 漸與?」 孔 顛 慤曰:「此 氏 倒 日 也 : 書 側, 非 大過, 反 簿 之,皆 領 側 也 也 示 而

龜筴、几杖、席蓋、重素、袗絺綌,不入公門。 釋文》: 重,直龍 反。」

受賜 鄭氏 朝 七十 『士輤,葦 自 日 曰:『當暑袗絺綌,必表而出之。』 素,衣裳皆素,喪 内 長老。 者 ,卿大夫視事之室,蓋有君所常設之 曰 : 而 龜筴,臣之龜 一,不得 致 龜 事,若 席蓋 席 策,嫌 以 以 載 爲 几 不 杖 · 得 服 屋 喪 問 筴也。 」 清 人 謝 也。 國家吉凶。 車 朝 則君 席 也 也。 袗, 」。《雜 以 賜之几杖,未 單 爲 席,坐席也。 愚 裳 也 謂: 記》 几杖,嫌 帷 孔 \_ 大 孔 曰 夫 氏 子 重

> 素,白 以 果爾,則當言「車」,不當 蓋 席,故不 綌,褻衣,其上宜有中衣與禮衣焉,所 「必表而出之」也。 司 一,嫌 其 禦雨 服 色繒 》所謂「素服」,遭災變之所服 亦 可持 表尊也。 以 也。 表 席 尊 以 重素,素 鄭謂 人, **袗**締給 朝 嫌其自表 席蓋 位 冠、素衣、 但舉其 在 ,則不敬矣 爲 庭 ~, 雨 喪 車,非 異 席 則 也。 也 素 蓋 廢 裳 也。 也。 謂 持 絲 蓋

反。 苞 蒯之菲 草 衰。』注云:『不杖齊衰也,於公門有 鄭氏曰:「此皆凶服 屨、扱衽、厭冠,不入公門。 喪冠厭伏。」 屨不入公門,《服問》云: 衰』章云:『疏屨者 扱,初洽反。 爲 屨,杖齊衰之屨 也。 厭,於涉反。」○鄭注: 《問喪》曰: 孔氏曰:「苞屨,謂藨蒯 也。 也。 『親始死,扱上衽, 之菲 苞,藨也,齊衰藨 『唯公門有 故《喪 《釋文》:「苞,白表 「苞,或爲『菲』。」 也。」此 服 \* 2免齊 税 杖 云 齊 苞 齊 之

适 母 公門 也 苞屨不入公門,蓋謂爲妻杖期之服。若爲 未卒哭以前,無以冠絰衰麤入公門之禮 年之喪,雖權制,亦必卒哭乃服金革之事。 祭涖事而卒者,則其子不以扱衽入也。三 前,主人非君命不出大門。 厭冠宜得人公門也。」」 不得入。 杖齊衰則屨不得人,不杖齊衰,衰又不得 唯扱 衰 人公門」者,謂臣有死於公宫,若叔弓於禘 云「不入公門」。 人,其大功絰又不得人,其小功以下冠又 杖 而 則大功有免經也。」如鄭此言,五服入 其狀 厭 期 上衽不入公門,冠経、衰屢皆得入也。 與否,各有差 伏 ,卒哭變服之前 此厭冠者,謂小功以下之冠,故 卑伏 也 也。 喪 凡喪冠皆厭,大功以上, 降。 冠謂 《雜 記 熊氏云:『父之喪, 之厭冠者,以 亦無 》曰:「委武玄縞 愚謂: 而云 入公門之禮 扱 未殯之 其 衽 無 不

> 書方、衰、凶器,不以告不入公門。 則 問 悉變之,惟其在首者自若也。 衰。」則齊衰之喪人公門者,自身以下之服 而後蕤。」是喪至大祥,冠始有 必并首絰去之矣,其爲大功以下者與 雖朝 於君 無免經 唯 公門 厭冠不人, 武也。 有 税 《服

數目, 也。」 乃入也。 君耳。 賵 鄭氏曰:「此謂喪在 中,而君 書之,故曰 於方、若九、若 如今死人移書也。 方,版也。 孔氏曰:「書,謂條録送死者 所 書方。」 不 主主其 《士喪禮》下篇 七,若 喪者,故 愚謂: 内不得不入,當先 五。」凶 百字以 此諸 此 謂 事 E 器, 有 曰:『書 一用 須 死 明器 告君 於宫 方 物 版

公事不私議。

專擅之端。冉有與季氏議政於私室,孔子鄭氏曰:「嫌若姦也。」 愚謂:此所以杜

非之。

君子將營宮室、宗廟爲先、處庫爲次、居室

先也。 門,其内乃爲寢室,是居室爲後 之詩曰: 宗 鄭氏 之臯門,於諸侯爲庫門,此 子,謂諸 用,故爲次。 :「乃立應門,應門將將。」王之正 廟所以奉 曰:「重先祖 又曰:「乃立皋門、皋門有伉。」天子 侯 縮 也。 先祖 版以 居室所以安身,故 廐, 故 載,作廟翼 養 及 爲先。 馬 國之用。」 者。 廐 庫,藏 翼 庫 廐 庫 也 。」此宗 爲 爲 所以 次 後 愚 財 門 也。 謂 物者。 廟爲 資 曰 綿 君 應 又 或

尚反,一如字。」
文》:「造,才早反。一本作『凡家造器』,『器』衍字。養,羊人家造,祭器爲先,犧賦爲次,養器爲後。《釋凡家造,祭器爲先,犧賦爲次,養器爲後。《釋

以 鄭 賦 氏 日 出 牲 「大夫稱 孔 氏 家, 日 謂 家 「祭器爲先者,尊 始 造 事 犧 賦

共山 饗; 及其 也。」 供養人之飲食器也。 牢 羊,殷以少牢」。 矣。《左傳》鄭子張「 特性,大夫祭以少牢,此言犧 之犧牲亦令民供之,故曰「犧 卿大夫至於庶民土田之數,而 侯之列,賦之犧牲,以共皇天上帝、社稷 庫』、『居室』,大夫言『犧賦』、『養器』,互 諸侯言『宗廟』,大夫言『祭器』,諸侯言 賦 此 與。 斂 祖 云『犧』, 高 「林、名川之祀。」大夫有采地,其 命同姓之邦,共寢廟之芻豢, 邑民,供出 禰 祖 也。 殷祭者 愚謂:《月令》季冬:「命大史次 也。 謂 犧 賦 牛。 謂有 牲 然則 爲次者,諸 牢,故曰『犧 即 大事省於其君,干 是天子之大夫 黜 大夫之殷 自 官,薄祭,祭 贍 爲私,宜後 侯 賦 賦 賦。 祭,固 大 賦 則 夫 犧 命宰 用 士 少牢, 養器 牲 祭 以 祭 以 大 祭 造 祀 祀 之 特 牢 歷

=

無 田 禄者不設祭器,有田禄者先爲祭服

謂:田 《禮運》云:『大夫聲樂皆具,祭器不假,非 位 地 後爲祭器。 不祭。」是知凡仕者即爲有田 則士之得祭者寡矣。《孟子》曰: 則祭,無田則薦。」若必采地 專爲采地,非也。《王制》:「大夫、士有田 者,其禄亦皆出於公田之所入。 疏以 祭器之品,量同官同,可以暫假也。」 禮也。」有田 侯大夫,非四命,無田禄,則不得造。故 具,唯天子大夫四命以上者得備具。 曰:「大夫及士有 也。 ,猶諸侯之失國家也。惟士無田,則亦 氏 曰:「祭器可假,服宜自有。」 孔氏 禄者,大夫、士各有采地, 不設祭器者,無田禄則力不能設祭 緣人形參差,衣服有大小,而 禄者雖得造器,而先 田 禄者乃得造器,猶 乃謂之有田, 一,不必 「士之失 爲祭服, 待賜 無采地 若諸 H 愚 禄 不

> 器,且薦之需器少,可以假而有 也。

君子雖貧,不粥祭器。 室,不斬於丘木。《釋文》:「粥,音育。 雖寒,不衣祭服。爲宫 衣,於既反。」

壟也。」

鄭氏曰:「廣敬鬼神也。

粥,賣

也。

境,下同,一本作『大夫士去國』,下『去國踰竟』亦然。」 夫,士寓祭器於士。《釋文》:「去國祭器不踰 大夫、士去國,祭器不踰竟,大夫寓祭器於大 寓於同官,令彼得用,不致敗壞,冀還 還 親 蠹,三己還得復取之也 用,大夫、士皆然也。」 鄭氏曰:「此用君禄所作,取以出竟,恐辱 有三義:一使人得資其 也。 0 孔氏曰:「物不 寓,寄也。 與得 被 用 愚謂: 用,二令器不朽 者言 用 則 寄,覬 生 此寓祭器 蟲蠹,故 己 復

0 禮 記注疏》作「後」。

四

反。 三月 悦絹反。 大 蚤鬋,不祭食,不説 衣、素裳、素冠 篾,或爲『幕』。」 夫、 而 髦 復服。《釋文》: 鞮,都兮反,又徒兮反。 音毛。 去 或 蚤, 一, 踰 () 徹緣 依 竟, 注讀 人以 ,鞮屨、素篾,乘髦 「壇,徐音善。 爲 爪。 壇 無 鬋,子淺 篾,本又作 位 **然罪**,婦 鄉 鄉 反。一〇 或 人不 息亮反。 「幭」, 而 馬,不 哭, 當 鄭 莫曆 注 御 素

於人 也 玦 夫 鬄 鞮 無 鄭 曰:「此大夫、士三諫不從,出在竟上, 三月一 則 則 落 屨 天 氏 無 去。 以 也。 티 : 壇 也 待放,三年聽 時,天 者 無 約之菲 言 除 若士 蚤 壇位 罪 讀 以 氣 嫌 地 爲 則 也。 變,可 喪 除 惡 不 爪 不 於君 禮 地 其 爲 待 篾,覆笭也。 自 爲 鬋, 鬋鬢 君 以 壇 放, 命,若予 位 處 也 遂 也。 也 也 臨 去也。」 去 御, 也。 環則 徹 臣 去 皆 接 猶 無 髦馬,不 父 行 不自説 還,予 見 去 君 母 此 孔 也 也。 之 禮 猶 氏

> 幦豹 篾,車 則翦 素服 蚤 夕禮》云『主人乘惡車 穿 此 衣、裳、冠皆素,爲 邦 戒,故用繒一 云:『絇之言拘 士 一,治手 貫, 既 冠禮 有 剔馬 犆 裹 M 覆 今 桑 喪,故徹 亦 足爪 闌 》云『玄端 凶 梓之戀, 毛爲飾 今此 有 也。 中 故 寸,屈之爲約 也。 喪禮,故 衣,若吉時 禮 無 緣 也。」古屨 [X] X 故 鬋 約 而 人君 黑 飾 則 爲 一,白 純 也。 剔 無 屨, 也 用 素。 羔幦 壇 治 狗 飾 白 素, 位 以 青 鬚 不 緣 幦」,是也 中 著 屨 狗 虎 物 約 髮 白 鄉 衣 屨 中 皮 以 翦 犆 繫 博 也 狗 頭,以 用 或 約 而 也 大 衣 太之爲 寸 乘之。 皮 爲 采 緣 而 吉 夫 ^ 哭。 也 緣 飾 也 鹿 受 既 行 則 鄭

0

<sup>0</sup> 出 「不」, 曆」, 校 據《禮 原 作 歷」, 記 注 疏 避乾隆諱, 》當 作 面。 今依《釋 文》改回。 下 不再

也。」 冀 治 母 張 浴 捹 大 時 後 侍御,今喪禮自 猶 無 饌 夫、士喪位 墠 天 之邦 臨 事 罪 君之反 則 帷 、櫛、掻、翦」, 馬氏 鬋 其宗廟, 不 帷 事反 者 得 祭食之先,喪 爲 日 : 爲 氣 復命於介」,鄉國 深 哭 位 愚謂 晞 向 也 ,善則稱君 飾 「大夫、 之 孟 還如吉禮 人説 變,則 無禄 ,猶諸侯之失國家,去其墳墓, [X] 素,白 也。 也。 日 故 踰 : 己 貶,故不也。 則 以祭,故 不 「《士虞禮》 竟乃行此禮者,未踰 《左傳》魯公孫 壇 士 無 人 繒 凶 鬋 不搔、翦者,未袝之禮 與 情 而 過 罪 夫 故不 也。 也 墠 遂去 則 亦 也。 或 而 稱 通 必 宜 祭也。 衣 哭者,哀離 不 喪 除 吉時 以 易 也。三月爲 己,今雖放逐 曰 裳 祭 自 其位 也 『既祔則 喪禮處之。 及冠 食者, 歸 地 貶三月,然 不説 婦 也。 生 人以 也 一。皆以 奔 其父 竟猶 吕氏 食盛 人以 位, 沐、 大 次

以 緣 人 竟上,三年而 篾,而素繒 之者,爲采色之華 白繒 禄 放之禮乎? 放」,恐無此禮。 食,則疏食菜羹 緣者,故言其緣 疏 柎者,故 裁,素服」, (士冠禮 孔氏云『大夫三年待放竟上』,『士 此 於費以待察、《 者 爲 飾 爲之。 常。 禮 也 素 也。 ₩ E 車 以 要之,三諫不 如孔子去國,乃未嘗 其 謂 緣之也。 犬 又『三諫不從則去』,亦不可 或者古之大夫有得罪被 周 質名之。 此 後 榠 「白屨柎之以魁。」鞮 禮 聽其去者 服 以别之。 耐 孔子屢仕屢去,豈常 素 春秋》有 • 也。 美也。 른 飾。 王之喪車,木車 司 服 從 緣, 素篾者 是犬篾 〇王氏 》「大札、大荒、 盛饌 而 放 乎? 鞮 中 大 不 屨, 革履 衣之緣。 能 則 夫之文,蓋 安石 故 有 白 諫 去, 不 狗 季 屨 也 不 犬 孫 放 不 皮 日 用 蓋 則 行 也。 大 待 祭 榠 Ħ. 必 於 待 不

首。 大夫、士見於國君,君若勞之,則還辟再拜稽 勞,力報反。 待 有 宣 聞 魯,曰「遲遲吾行也」。 羊》,然春秋二百四十年間,大夫之去國者 從,以爲不合則 然後收其田里。」古之去國者,其君臣相 而 後出畫。以道去君者,宜無如孔孟,亦未 多矣,未聞有待放三年而後去者。 三年?」 愚謂:大夫待放之説,出於《公 改之心,如孟子三宿然後出晝可 放得 王 君若 待放竟上,賜環則還,賜玦則去之事矣。 禮,不過如此 去,則君使人導之出疆。去三年不反, 其待放三 日 環 迎 則還,是以待放要君耳。 拜,則 ,婢亦反。」 諫行言聽,膏澤下於民。 年 而後去者也。 ,則其去固不俟三年,而必 可以 還 一辟不 去, 孟子去齊,三宿 敢答拜。 雖 有 孟子之告齊 庶 幾其 也,何待 孔子去 《釋文》: 三諫 有故 君 與 而 或 不

過鄭 也。 氏 以 迎 再拜稽首」者,聘賓奉主君之命 禮 其辱也。 稽首者,答君之意也。 之勤勞也。 君命,亦當用此禮也。勞之,謂慰其道 見如見王。」此雖奉命出聘,而其見鄭伯 大夫者也。 疆,或去己 大夫、士見 見國君者不同也。言「君若勞之」,「君 君」,「士見 拜」, 日 其 也。《公食大夫禮》「公迎賓再 《聘禮》曰:『君勞使者及介,君皆答 私見國君,故禮之隆殺 ,鄭伯勞諸柤,辭 「勞之,謂見君既 則君蓋 還辟不敢答拜者,不敢亢賓主之 或 於 於 《左傳》:「楚公子棄疾如晉, 還辟者,逡巡不敢當也 而 大夫」,皆謂大夫、士 或 有不勞之、不迎拜者矣,亦 適他國,而見於其君 君, 及下文「大 不敢見。 迎拜者,迎之而 拜矣,而 無定也。 與此 古 夫 拜, 一請 後 見 私 見之, 見 私 與 於 賓 行 再 ○鄭 若 自 亦 其 拜 拜 路 出 或

後,賓 拜。」迎 若 有 事 門內。」此疏云「大門外」,蓋亦傳寫之誤。 問 出 是勞之而 注言君勞使介,此《聘禮》反命而君勞之之 外,主君迎 勞之是也。 訖,賓出,主君送至大門内,主君問聘君 拜」,蓋文有誤脱 介,介再拜稽首」,即此大夫出聘他國, 大夫納賓,賓入門左,公再拜。 大夫入門 迎 此禮矣。 也 大夫竟,乃云『公勞賓,賓再拜稽首 聘他國之禮。《聘禮》行聘、享及私 拜」,則非 出 拜 疏言君勞賓、介,此《聘禮》私 至大門内, 謂 一再拜稽首,於己國及他國之君皆 再拜,君 而拜之。」 然君於其臣 迎拜,謂 君 見己君。 迎 孔 而 拜 氏日 而 先 案《聘 聘賓 其 主 拜 、聘禮 不迎拜,此云「君 辱。』」案《聘 ・「此謂 之。 君 禮》: 此注云「大夫入門 初 勞之之事 至 主 美 聘 主 君迎賓於大 君 大夫、士 禮 國大門 愚 禮 迎 覿之 謂 日 \*\* \*\*: 拜, 也 绺 覿 君 再

「見於國君」,以是知此所言乃私見之禮,迎拜者矣。 且聘禮乃爲君奉使,不可云乃一定之禮,此云「君若迎拜」,則固有不

而非聘禮也。

客,客敬主人則先拜主人。 大夫、士相見,雖貴賤不敵,主人敬客則先拜

事 門左、「主人 敬者則先拜之。《特牲禮》主人宿尸,尸 先拜辱,非 見,而非 以下文「同國始 鄭氏曰: 主人來在尸家而 主人皆先拜客,而 宿尸,主人 也 始相見 「尊賢也。」 始相 再拜稽 再 拜 見,則無拜辱 相見」觀之,則此謂尋常相 者 先拜尸,即客先拜主人之 尸答拜」。 也。 此 首 乃有客先拜 愚謂 户拜, 始 相 : 之禮 見者,主 ^ ^ 許諾。」此 少牢禮 士 相 主人 故 見 人 者, 禮 出 時 心 所

凡非弔喪,非見國君,無不答拜者。《釋文》:

見,賢遍反,下「大夫見」「士見」同。」

者,以 禮 鄭氏 尊不答。 己君耳。 曰:「凡拜而不答拜者,惟有弔 ,故主人雖拜己不答也。 其爲他國之士故也。」 國君見士不答其拜,士賤。」 《聘禮》『士介四人』,君皆答拜 弔賓 「禮尚往來,喪賓不答拜,不自賓 爲 助執 喪事 士見己君,君 非 行賓 喪 與 孔氏 主 士: 見 之

鄭氏曰:「自外來而拜,拜見也。自內來大夫拜其辱。同國始相見,主人拜其辱。大夫見於國君,國君拜其辱。士見於大夫,

若迎 拜其 也。 拜。」同國始相見,謂士自相見,或士見於 見禮》曰:「大夫、士則 而 拜 拜辱 拜」是也。 、辱者,拜其自屈辱至此,即上文云 「君 見於國君、見於大夫之說,已見於上。 也。」 君於己 愚謂: 拜,拜見也。 奠贄 臣 此皆謂始相見者 不 再拜,君 拜 辱。 **企** 答 壹 相 來

> 事。 大夫 其非《聘禮》又可知也 面 夫與賓相與行禮,而士不與焉。 至衆介私 大夫奉命出聘,既不可謂「見於國君」,且 見於國君」四句,疏亦以《聘禮》言之。 君」、「見於大夫」、爲異 士見於大夫,大夫 ,則入門奠幣再拜,而大夫不迎拜,然則 也。 賓問卿,大夫出 於此言 拜 同 迎於大門外,再拜,大 其 國, 〈辱,《 國 明 則上言「見於 《聘禮》 矣。 〇「大夫 初無 其 或

其臣,雖賤,必答拜之。 君於士不答拜也,非其臣則答拜之。大夫於

《士相見禮 鄭氏曰:「非 初爲士,敬之也。」 士介四人,君旅答拜』者,敬 大夫於臣必答拜,辟正君。」 君於己士不答拜。 **当**士 其臣則答拜,不臣人之臣。 見 國君,君答拜』者,以 然《聘禮》云『聘使還, 其奉 孔 ·使而 氏曰: 其

男女 相 答 拜 也。 《釋 文》 本作 不 相 答拜』, 皇

『後人加不字耳。』」

之法。 自「大夫、士見於國君」至此,明尊卑相 鄭氏曰:「嫌遠别,不相答拜 以以 明之。二〇 拜

通,當音洛。

國君春田不圍澤,大夫不掩群,士不取麛卵。 釋文》: 「靡,音迷。」

乳 鄭氏 乳之時,尤在所禁故也。」 掩 聚 子,凡獸子亦得 多傷殺,故不合圍 曰:「國君,諸侯也。 《王制》『天子不合圍 長,故 也 田 曰:「生乳之時,重傷其類。」 四時之田 獵之禮 群 不 聚 得 則多,不可 取 也。 所同禁,特以春言之者,孕 通名。 也。」 繞 或 取 春時萬物産孕,不 君不圍澤,大夫不 ,諸侯不掩群」,諸 方氏 卵,鳥卵也。 也。 掩 取之。 馬氏晞孟曰: 群,謂禽獸 慤 曰 : 麛 韋 孔 是 春 掩 侯 欲 氏 澤 方 鹿 共

> 樂。《釋文》: 道不除,祭事不縣。 歲 群,諸 X , 年穀不 侯 在 「縣,音玄,下同。」○今按:樂,舊如字,亦 一登,君 或 田 獵 膳不祭肺,馬不食穀,馳 大夫不食粱。 之禮 也 士飲酒

不

牢。 肺。 之稱。」今謂歲 釋者曰: 鄭注《太史職》: 君憂民自貶退禮 去琴瑟。」 縣,樂器,鐘磬之屬。粱,加食 牢,朔月大牢。 虞氏以首,夏后氏以心,殷人以 鄭氏曰:「登,成也。 凶自貶損 除,治也。 不祭肺,則不殺也。 『年是據 ( ) 憂民 孔 氏 既 不治道,爲妨民 諸 也。 中 也。 티 : M 有 侯 一荒,而 禮食 氣之初,歲 數 食 此 歲 君、大夫、士皆爲 曰 [X] 歲 日特牲,朔 殺 天子食:日 年 ,水旱災害也。 節 牲則祭先, 中 朔數 明 也。 肝,周人 取蔬食也。 穀 是 稼 舉 日 凶荒人 不樂, 不登 年。 月 年 小 小 中 以 有 歲

粱。 爲加 耳。」 平. 使民 尊,舉大者 樂』,各舉 樂 大 雖 謂 馳道 也 巾 燕 也 · 常 夫 祭 先 不 治道 膳,美 不食 ,故《公食 即不祭肺 飲 食 治 如如 也 而 年 祭 豐 其 愚 酒 黍 不 肺 君 今御路,君馳 草萊 粱 破,以 , 則 1 則 謂 一邊 奏樂,今 作 食名。 膳 不者,去 而 與賓客燕,得以樂樂賓,《投 樂,樂 歲 馬 不 廢 言, 也。 也。 X 大 食穀,今凶 而 祭肺 周 粱 取 饑 夫 言, 盛 其 大 禮 IXI 爲 蔬 食以 有 IXI 故 禮 食必祭,周 夫、 年 加 加 食,故不 縣 • 以 年 走 其 \* 猶 許 故故 不 也 黍稷 膳 鐘 設 車 人應各採蔬 實 下,及『士飲 士 祭 ·馬之處。 夫》「大 一磬,因 年, 正 互. 卑 M 飲 飲酒 肺 爲 饌 治也。 年 ПÍ , 故 酒 人 正 舉 後 去之。 則 相 不 日 重 荒 小 謂 乃 以 但 不 诵 食 縣 不除 食 肺 者 酒 殺 設 [X] 則 不 與 稻 也 也。 芸若 年 壺 害 言 君 奏 士: 牪 稻 粱 不 不 故

> 禮 食 殺 事 司 而 邦 世 徒》「 学言 用 《廩 荒 又 者, 人》所謂「食不能 重 政 以 」爲「弛力」「 告禮」 「 皆 樂 自 貶 是 以 也 憂 人二鬴 此 民, 於《 節 周 蕃樂」 則認 費 禮 以 . 足 大

不 君 徹琴瑟 無 故 玉 不 去身, 大夫無故 不徹 縣,士 無 故

去也。 亦上 去玉 賜 通 但 鄭 有之,《左傳》「魏絳 喪、病。」 乎上下,若大夫、士樂縣, 縣 樂 氏 又大夫言縣,士 通 ,則知下 勝,故大夫言之。」 日 出於特典,而 於君。 自 : 士以 憂樂 孔 通於 氏 但玉 上,皆有 不 日 相 士: 不以 始有 以 玉 也。 干 言琴瑟,亦互言耳。 比 玉 也 爲常禮,雖大夫亦 德爲 金石之樂」,是也。 一,謂 愚 0 言 佩 則 謂 言君 1: 佩 故 重,故於君 惟 不去琴瑟, 也 謂 琴瑟之 賜樂者乃 無故 災、 徹 患、 樂 明 不 亦

事 不 得 必 皆 用 樂者 有 縣 故 則不係乎賜否,故鄉飲、鄉 特性、少牢禮 無 樂。 若公 射

位尊,賜樂者多,故言「無故不徹縣」,士據已賜樂及公事用樂者言之也。但大夫禮皆有樂。《小胥》「大夫判縣,士特縣」,

士有獻於國君,他日君問之曰:「安取彼?」卑,賜樂者少,故但言「琴瑟」也。

再拜

稽首

而

后對。

物之所 不親見 臨 鄭 亦 可 士 體 卻 亦 氏 曰:「君臣上下之交,不間於貴賤 也 群 有獻於君,所以達臣 曰:「再拜稽首,起敬也。」 從 君 臣之意也。 也。 來,恐其致之之難,而有所不安, 愚謂: 安取彼者, 他日君乃問之者,獻 子之誠 士禄 薄,故問 心,而 吕氏 故 其 大 時 不 雖

疆,必請,反必告。君勞之,則拜。問其行,大夫私行出疆,必請,反必有獻。士私行出

拜而后對。

問 告反 有 之所未嘗禁也。 禮通於他邦者,輕則遣使,重則自行,固 父善晉大夫,晉范鞅私於季孫意如, 者,何也? 曰:所謂 問 謂 鄭 竟矣、《春秋》季友如陳葬原仲。 交結,以行其私 曰:爲人臣者無外交,而乃有私 士有娶於異邦者。 若異邦,則贈丈夫送者以束錦」,是大夫、 君勞之」以下,大夫、士之禮皆然。 人 赴 以 氏 行,謂道中無恙及所經過也。」 於他 而已。 己事 於他 曰:「必請者,臣不敢自專也。 邦,則 也。 或 勞則拜,拜而 君、大夫之禮 士言告者,不必 者耳。 束脩之問出竟矣。 蘧伯玉使人於孔子,孔子 昏禮必親迎,此則又以 外交者,謂若衛 若慶、弔、昏、 后對,亦起 則赴弔之使出 有 《士昏禮》 其 《雜記》 行 敬 獻 私 娶之 自相 孫 出 行, 也 也 禮 林

《春秋》之譏祭伯,何也? 曰:人臣私行 贵 情 非 莫不盡忠以 待之以忠信 出 所不可已。 好,或有在 疆 靖共之義矣,此祭伯之所以見譏與。 必欲一切禁絕而後爲忠於己哉! 與 禮 ,必其事之不可已者,可已而不已,則 之重 1他國而與之往來者,乃人情之 且與所 ,恤之以情誼 而自行者 事其上。 以忠其君者未嘗相妨, 也。 至於姻戚、朋友之 ,而爲之臣者,亦 先王之於臣 然則 子,

墓也。」夫曰:「奈何去宗廟也。」士曰:「奈何去墳國君去其國,止之曰:「奈何去社稷也。」大

受於天子也。於大夫言宗廟,於士言墳君亦有宗廟、墳墓,而獨言社稷者,重其所鄭氏曰:「皆臣民殷勤之言。」 愚謂:國

國君死社稷,大夫死衆,士死制。

墓,互言之也。

秋傳》 制矣。 故 鄭 書崔杼之弑,虞人違景公之召,可謂能 反敗於鄢陵而死 法制 故社稷亡則死之。 與君教令。』」 事君,不可爲己私 士死墳墓者、宗廟、墳墓、己私有之、爲 夫去宗廟,士去墳墓,此不云大夫死宗廟, 『上云國君去社稷,此云死社稷。 教令所使爲之。」 制,死其所受於君。 師 氏 見奪則死之。 衆亡則死之。 日 日 : 「國滅, 死社稷 愚謂: 君死之,正 可謂能死衆矣。 事死,祗得死君之師 大夫爲君帥 死 子玉敗於城濮 士爲 衆,謂軍 孔氏曰:「 其 國君守社稷者 所 君守法制 受於 師。 也。」死衆、死 天子。 師衆者也 熊氏 制,謂 者 而 上云大 齊大史 死,子 也 云: <u></u> 也 臣 君 春

「予一人」。《釋文》:「分,方云反,徐扶問反。予,依字君天下曰「天子」,朝諸侯,分職授政任功,曰

音羊汝反,鄭云『余、予古今字』,則同音餘。」

王某」。

踐 作, 臨祭祀, 内事曰「孝王某」, 外事曰「嗣 帝。 臨外臣之事,分職授政任功者,治内臣之 之。』「余」「予」古今字。」 愚謂:君天下 事。予一人,天子自稱及擯者之辭,謙言 職,而授之以政,任之以 之效謂之功。分職授政任功,謂分六官之 職,六官之職也。所治之事謂之政,所著 公命。」是天子之稱,非但施於蠻夷矣。 鄭氏曰:「皆擯者辭也。天下,謂外及 曰「天子」,謂君天下者,天下之人稱之曰 「天子」,猶君一國者,國中之人稱之曰 一位」,是也。《春秋》:「天子使召伯來錫 君」也。《孟子》曰「天子一位」,又曰「君 |亦人中之一人耳,猶諸侯之稱孤、寡也。 也。 《覲禮》曰:『伯父實來,余一 今漢於蠻夷稱天子,於王 功也。 朝諸侯者, 侯 人嘉 稱 四 皇

> 於郊外者爲外事,非也。」 與氏曰:「皆祝辭也。唯宗廟稱孝,天地、 大子祭祀升阼階。」 吴氏澄曰:「宗廟所 大子祭祀升阼階。」 吴氏澄曰:「宗廟所 大子祭祀升阼階。」 吴氏澄曰:「宗廟所 八山、川之屬,天下一國之神,皆外神也, 如一,加三區,天下一國之神,皆外神也, 於郊外者爲外事,非也。 唯宗廟稱孝,天地、

南清過山川,則大祝用事焉』。鬼神,謂百萬,"畛,之忍反。」○鄭注:「畛,或爲[祗]。」文》:「畛,之忍反。」○鄭注:「畛,或爲[祗]。」文》:「畛,之忍反。」○鄭注:「畛,或爲[祗]。」文》:「畛,之忍反。」○鄭注:「畛,或爲[祗]。」文》:「畛,之忍反。」○鄭注:「畛,或爲[祗]。」

辟卿士也。」

孔氏曰:「天子行過諸侯之

以

例

而

言,則王

后死亦呼『王后

復』也。」

内山川及先代諸侯之有功德者。 際之『際』同義。」 或 不 稱名者,以其神卑,且告祭禮簡故也。 吕氏大臨 則 止於諸侯 曰 : 之廟 「畛,猶畦畛之相接,與交 愚謂:鬼神,謂諸 而 使大祝告鬼 。稱字 侯 神 國 而

崩,曰「天王崩」,復,曰「天子復」矣。 魄也。 則無的指,故男子呼名,婦人呼字,令魂識 之魂,令還復身中,故曰復也。若漫招呼, 者死,如從天墜下,故曰崩也。 侯呼字。」 死時呼魂辭也。不呼名,臣不名君也。 鄭氏曰:「天王崩,史書策辭。天子復,始 故呼『天子復』,則王者必知呼己而反也。 子不可名君,二則普天率土王者一人而已, 知其名字而還。王者不呼名字者,一則臣 至,猶望復生,故使人升屋,北面,招呼死者 人命終畢,精氣離形,臣子罔極之 孔氏曰:「自天墜下曰崩。 復,招魂 復 王 諸

死,但言其升陟於遐遠之處,猶言其登陟亦登也。」 吴氏澄曰:「尊之不敢言其曰:「遇,遠也。《竹書紀年》帝王皆曰陟。鄭氏曰:「告,赴也。登,升也。」 胡氏銓告喪,曰「天王登假」。《釋文》:「假,音遐。」

寸。 《五經異義》云:『主狀正方,穿中央,達 鄭氏曰:「同之天神。《春秋傳》曰:『凡 帝、武帝之類也。 帝,今號此主,同之天神,故題稱帝,若文 立主使神依之也。主用木方尺,或曰尺二 君,卒哭而祔,祔而作主。」 措,置也。 天子長尺二寸,諸侯一尺。]天神 鄭云:『周 王葬後,卒哭竟,而祔置於廟 以栗。 崔靈恩云: 漢主 前方後 『古者帝王 孔氏 曰 : 員 日 兀

措之廟,立之主曰「帝」。

天也。」

也

所考。 何帝。 吕氏大 有以 有主 哭而祔。《左傳》唯 埋桑主於祖廟門左埋 商,七世而 帝夷羿」,亦當夏時。 疑夏、殷人祔廟 言其德足以 曰:「卒哭明日而立主,至小祥作栗主,乃 立主稱帝,爲夏、殷之禮無疑矣。 云『凡君』,鄭注《祭法》云『大夫、士無主』 竹書紀年》夏天子皆稱帝、《左傳》曰「 死 帝名者,惟《易》言『帝乙』,亦不知其 人 同 又《檀弓》云『重,主道也』,鄭注引《公 至周人有謚,始不名帝。」 ニニュ 獨《史記》載夏、殷之王皆以帝名, 廟 稱。 曰:「鬼神莫尊於帝,以帝名之, 稱帝之義,記者録以爲 殞。」周則未聞 配天也。 今云「立主曰帝」,蓋是爲記 稱帝。 據 然考之《禮經》,未見 重 人君有主者言之,故 《國 遷据《世本》,當有 一處。 有是 語》:「帝甲 大夫、士亦卒 稱也 法。二 〇 孔 愚謂 然 氏 則 昔 亂 時 蓋

生

弓》曰: 惟 『古《春秋左氏》説,既虞,然後袝死者於先 故《公羊》上係之虞,謂之虞主,又作主爲 虞祭總了,然後作主。以作主去虞實近, 若鄭君以二傳之文雖異,其 有 羊傳》云『虞主用 重 而 虞祭竟,乃埋重作主耳。下《檀弓》云『虞 栗主。』鄭君不駁,明同 袝所須,故《左氏》據 被 同者,説《公羊》者,朝葬,日 云:『重,既虞而埋之,乃後作主。』是總行 死者,祔而作主,謂桑主也。 期年,然後作 主。 . 立 尸 虞爲喪祭,祔爲吉祭,喪祭用重,吉祭用 |徹焉。』《雜記》曰:『重,既虞 立尸,有几筵』,鄭以 , 未有主 而《左傳》云:『祔 『重,主道也。 桑,練、 也。 主 爲人君之禮。 而言。《異義》云: 殷主綴重焉 許意,故注《檀弓》 趙氏 用栗」,則似 而作主。』二傳 意 中則作虞主 方 曰: 則 而 同,皆是 埋之。」 周主 明 虞已 虞

《特牲》、《少牢》皆不言有主。 埋重 主。 皆經之所必不得而略者。 《公羊》學者妄言之耳。」 愚謂:鄭氏謂 筵几于室中東面」、《少牢禮》「司宫筵于 爲依神也。」大夫、士雖 依」,是不然。《祭統》云: 其爲無主 日,饋食之時,出之於何時,設之於何所, 作虞主之禮,則何氏必援以爲説。 氏通二傳爲 主,以吉祭自祔始,故曰『祔而 有主,則既葬之後,作之於何時,設之於何 ·大夫、士無主」,先儒多疑之。 祝布席于室中東面右几」、《特牲禮》「祝 也。 ,必預作主,重與主不並立者,神依 重,既虞 以此主之作,猶是虞日,故謂之虞 一可知 一,已得之。使有 則埋之者,喪祭有終 也。或謂「無主則神 無主,而《士虞禮 「鋪筵、設同 而今皆無之,則 如大夫、士 然《士虞 朝葬,日 作主』。 也 無所 是 几 鄭 於 蓋 中 將

名之。

天子未除喪,曰「予小子」。 大夫有主,乃亂世僭禮,不可據也。 既虞乃作主,則天子、諸侯虞、卒哭之祭, 有筵几,更有主耳。 重,則以筵几依神。 所 奥,祝設几于筵上右之」, 亦但以筵几依神也。《左傳》「孔悝反祏」, 依矣。 始死未有筵几,故 然葬還,重不入廟門, 但天子、諸侯禮隆,既 則神 生名之,死 立重; 古 不 既 患 葬 於 亦 埋 無

稱天王 鄭氏曰:「予小子,謙未敢稱一人。《春秋 之』也。」 傳》曰:『以諸侯之踰 稱天王崩,而 「《春秋》景王崩,悼王未踰 侯於其封内三年稱子。』」 踰年即位。以天子三年然後稱王,亦知諸 而稱王猛,所謂『生名之』也。 愚謂:在喪曰「予小子」,除喪 日 王子猛卒,所謂『死 年即位 年入於王城,不 吴氏 一,亦知 ₹ 翌日: 天 死不 亦名 子之

王使。 所以 秋 人君踰 文八年之冬,頃王立未 知毛伯至魯,在文九年之春,其出使實在 之,則雖未踰年,已曰「王」,以《左傳》於未 之誥》❶□「眇眇予末 已稱曰「王」也。 踰年之君皆稱公,知天子未踰年,其臣民 位」,知天子踰年亦書「王」也。 稱予一人,謙辭 成王之詩曰「閔予小子」, 而《春秋》於十年書「毛伯來求金」,②不稱 曰「王」,以《春秋》於魯君踰年皆書「公即 曰「予一人」,此天子自稱之辭也。《康王 昭 日 不稱天王者,以其未即位,未成君也。 二十四 《公羊傳》遂有「三年稱王」之説,不 年而即位 「公」,不復名矣,不待除 年「天王居於狄泉」,是也。 也。 周襄王以魯文公八年崩, ,即位則天子曰「天王」, 若史册所書,則 小子」,在喪之辭 踰 年 初免喪,未 也。 喪 若臣 也。 未 踰 欲 民 踰 《春 也。 年, 年 稱 澽

○自「君天下曰天子」至此,明天子稱謂

天子有后,有夫人,有世婦,有嬪,有之事。

有

妾。《釋文》: 爲始。 者。」 鄭氏 君,義優於鄭。 之妃曰后」,注云:「后之言後。」彼疏引《白虎通》訓 『女御』,以其 凡后妃以下, 服也,言其進而服 於家邦,終於四海,故天子立官,先從 『世』言之。 티 : 后,後也,言其後於天子。 孔氏曰:「爲治之法,刑於寡妻,始 「嬪,音頻。」 「妻,八十一 嬪者,婦人之美稱,可賓敬也。 夫,扶也,言其扶持於王 以次序而上御於王。 御序於 事君子,以其猶貴,故以 御 王之燕 妻,《周禮》謂 寢。 按下「天子 妾, 鄭注 后 后爲 妃 賤 之

<sup>「</sup>康王之誥」,據《尚書正義》當作「顧命」。

<sup>「</sup>十年」,據《春秋左傳正義》當作「九年」。

三八

也。 嬪九人,當一夕。 三夫人當一夕。 后當一 人,當九夕。 日者天之明,月者地之理。 周 卑者宜先,尊者宜後。 十五日而徧。 》云:『凡御見之法,月與后 世婦二十七人,當三夕。 望後反之。孔子云: 陰陽契制,故 女御 八十 妃其 九 象

《周禮》。妻,即《周禮》之「女御」。謂之妻「世婦」下者,從文便耳。其次第則當依三夫人,猶外官列職,自九嬪以下,而不及人明矣。内官列職,自九嬪以下,而不及人明矣。内官列職,自九嬪以下,而不及人明矣。内官列職,自九嬪以下,而不及然《酒正》有「后致飲於賓客之禮」、《漿人》《周禮・天官》有九嬪以下,而無三夫人,《周禮・天官》有九嬪以下,而無三夫人,

未既齔 進御 之御 也; 嬪》「各帥 然《易》曰「貫魚,以宫人寵」,《周禮•九 見之法,本於《孝經援神契》,先儒多疑之。 昭注:「妾,給使者。」又《鄭語》「府之童妾 妻視士,其賤而 夫人之尊視三公,嬪視孤卿,世婦視大夫, 之喪、夫人、世婦、諸妻疏 之妃直曰妻,而其尊視女御。 則》「妾未老,必與五 晉語》「鄭伯嘉造納女工妾三十人」, • 周禮》。 大夫之妃曰世婦,尊與 妻,諸侯則謂之諸 有序,經典有 而遭之」,皆是也。 《左傳》「鄭文公有賤妾曰燕姞 其屬,而 無爵 以 明文,非惟緯書言之矣。 時 日之御」,則 命者曰 御敘於王所」。 妻。 食水飲」,是也。 ○鄭氏所言御 世 《喪大記 妾,故不列於 故女御 婦 人君後宫 同 也 》「君 亦謂 《内

經援神契》文。

愚謂:此言天子之内官也

月上屬爲天,使婦從夫,放月紀。」』」此

者,蓋

諸侯之妃曰夫人,尊與三夫人同

<sup>□ 「</sup>造」,據通行本《國語·晉語》當作「來」。

則大宰爲天官。

大宗曰宗伯,爲春官,大

祝、大士、大卜,典司六典。

鄭氏曰:「典,法也。此蓋殷時制

也。

周

之遺意焉

天子建天官,先六大,曰大宰、大宗、大史、大 數者矣。此《天官》之所以不言其數與。 《昏義》:「天子立一后、三夫人、九嬪、二 婦、女御固有不必備乎二十七與八十一之 爲四十八人,此以女御充之者也。 四人,此以世婦充之者也,「中士八人」則 九嬪充之者也,「下大夫四人」,則爲二十 婦、女御不言其數。《春官》「世婦,每宫卿 十七世婦、八十一御妻。」而《天官》於世 之一端,豈可以其出於緯書而 寵,杜專妬,泯怨曠,廣嗣續,乃先王正家 日 諸侯之御以 二人」,王有六宫,則十二人,此以三夫人、 而 徧 ,亦其差宜然 Ŧi. 日 而 徧,則天子之御 也。 此蓋所以 概非之乎 以 則世 防 十五 私

禮。 卿,大史、大祝、大卜皆大夫,而以神仕者 臨 也。古者以治天道之官爲重,故少昊紀 所言非周制,不必以《周官》之名强求其合 特中、下士、恐未可並列而爲六大。 故以「以神仕者」當之。然大宰、大宗皆六 總謂之天官。」 以下,皆爲事鬼神、治曆數之職,蓋猶有古 之命。此言天子建官,先以六大,自大宗 官,首爲曆正,而《堯典》一篇,獨詳羲、和 官》無大士,鄭氏以大史以下皆春官之屬, 重於他職,故曰先。」 愚謂:自此以下至 史以下屬焉。大士,以神仕者。」 「五官致貢曰享」,言天子之外官也。《周 曰:「殷人尊神,率民以事神,先鬼而 大宗以下,皆事鬼神,奉天時之官,故 陳氏澔曰:「六者,所掌 吕氏 蓋 大

天子之五官,曰司徒、司馬、司空、司士、司

## 寇,典司五衆。

衆,謂 氏,司 言 宗、司馬、作士、共工 同。 百 爲 通。 寇 唐 鄭 誓》及鄭注,三王同有六卿。 司 司 事。 事 也 工之官爲二,故虞有司空,又有共工。 少昊官名曰:祝鳩氏,司 寇、司空爲六官。」 則 氏 夏書》云『所謂 《詩》「勿士行枚」,「陟降 掌百工之事,即舜時共工之職也。 司 日 馬也; 此《記》所言上非夏法,下異周典, 五官之屬 鶻鳩氏,司 司士,即司事也。 士屬司 :「衆,謂 愚謂:吴氏之説是也。士、事 **鳲鳩氏**,司 馬、大宰、司徒、宗伯、 群臣 也。 事 六卿者,后稷、司 也」,而 也。 也 〇孔氏 吴氏華曰:「郯子 空也 古者掌水土與掌 與《曲 此亦殷時 不説殷家六卿 徒也; 曰:「案《甘 厥士」,義 又鄭注《大 爽鳩 禮》五 徒、秩 氏, 制 司 鴡 五. 馬 也 皆 字 官 鳩 司

> 明矣。 存其説,以 地之説,亦第以意推説,別無他據。今姑 五官爲六卿,或當然也。 爲殷制,然不見六卿之名。 而《甘誓》云「乃召六卿」,則三代同置六卿 法地之五行也。」 事。天官六官,法天之六氣, 但周家六卿,放天地四時。 大 鄭 卿,以象天時,司徒以 宰、司徒、司馬、 唯 指爲殷禮也。 此篇所言,與《周禮》不同,鄭氏 俟考焉。 司 愚謂:舜 天官以下,殷家六卿 空、司 至其所言法象天 下五卿,法於地 士、司 孔氏謂大宰合 而殷以大宰爲 所命者九官, 地官五官, 寇是 也 以

器、司貨,典司六職。 天子之六府,曰司土、司木、司水、司草、司

鄭氏 也。 殷 時 司木,山虞也。 制 曰:「六府,主藏 也。 周 則皆 司水,川衡也。 屬 六 司 物之 徒。 税者。 司 土,土均 司草, 此 亦

稻人也。司器,角人也。司貨,丱人也。」

貨賄 飭 以樹 虞、衡、工、商之民所貢,故曰 澤虞、川衡之職,司草則 廩人之職,司 司 土受之。 貨則 材事貢器物,則司器受之。商以市事 澤虞以 事貢 氏大 則 玉府、内府之職 司貨受之。 Ш (薪、蜀、疏材、則司草受之。 工 臨 澤事 虞 曰:「農 木則山虞、林衡之職,司水則 以 貢 Ш 水 事 《周官》司土則倉 以 物 貢 耕 委人之職,司器 所入 則司 木 事 材 貢 典 (者乃 水受之。 九穀 則司木 司 六 農 職。」 則 甫 · 音 圃 受 以 百

甚多 地 及除草萊,皆不可以言府。 氏之説 愚謂:均人掌地税之政令,稻人掌 而 以 稍 角 爲該 括 ,然亦未有以 器貨之 見 可 乎? 稼下 其 爲 物 必

天子之六工,曰土工、金工、石工、木工、獸

也

工、草工,典制六材。

下,職 者也 鄭氏 者也。」 器。」〇 韋、裘也。 輿、弓、廬、匠、車、梓也。 段、桃也。 土工 曰 : 地 陳 司 山此 陶、施 徒 物 氏 惟草工職亡,蓋謂 石工,玉人、磬人也。 以 祥道 者 亦殷時 下, 也。 也。 曰 : 理 土 制 「大宰 金工,築、冶、鳧、栗 Ι. 道 也。 獸工、函、鮑 者 以下, 以 周 也。 作 下 則 木工,輪 在、 飭 皆 司 理 地 葦之 士 華、 屬司 天 材 以 道

事,而 鄭氏曰 之功於王,謂 終,則令百官府各正其治,受其會,聽其 上『天子五 詔 王 「貢,功 官」司徒以下 廢 置 之獻。 也。 享,獻 周 孔 禮 大宰 氏 也 日 大宰》: 總攝 致 五 其 歲 官 職 則 致 歲 終

也,言五官則六府、六工在其中矣。言六府、六工者,六府、六工即五官之屬總受五官之貢,故不入其數。」 愚謂:不

「同姓」二字。」○鄭注:「是,或爲「氏」。」 皆同。擯,本又作「儐」,必刃反。天子謂之伯父,本或有 曰「公」,於其國曰「君」。《釋文》:「長,丁丈反,後 之「伯舅」。 自稱於諸侯曰「天子之老」,於外 之「伯舅」。 自稱於諸侯曰「天子之老」,於外 工官之長曰伯,是職方。 其擯於天子也,曰

外。」 孔氏曰:「三公加一命爲二伯。 「九命作伯」。職,主也。是伯分主東西 大子之吏,擯者辭也。《春秋傳》曰『王命 天子之吏,擯者辭也。《春秋傳》曰『王命 天子之吏,擯者辭也。《春秋傳》曰『王命 要之三吏』,謂三公也。稱之以『父』與 要之三吏」,謂三公也。是伯分主東西 鄭氏曰:「五官之長,謂爲三公者、《周禮》

> 伯」也。《左傳》僖元年:「凡侯伯,分災、 凡擯、介亦通名,其所稱之辭亦同也。三 伯。」二伯謂之王官伯,所謂「五官之長曰 是職方,則二伯惟三公爲之,外諸侯無 君,謂其臣民稱之也。]〇五官之長曰伯, 若《春秋》書周公、召公是也。 曰公,謂其國外之人稱之曰公,以其本爵 以傳辭也。天子之老,亦擯者辭也。 公内臣,而有擯於天子者,蓋王大合諸侯, 告於天子之擯,擯者受之,以告於天子也。 之人也。」 伯,長也,爲内外官之長。擯,謂天子接 二伯率當方諸侯以見於天子,則有擯、介 二伯者,雖齊桓、晉文亦爲當州之伯而已。 左傳》昭十一年叔向曰:「單子爲王官 愚謂: 擯於天子,謂 於其 介傳 於外 國 爲 H

<sup>● 「</sup>親之」,據《禮記注疏》當作「親親」。

侯爲侯伯。」州伯謂之侯伯,所謂「九州之救患、討罪,禮也。」僖二十八年:「王命晉

長,於外曰侯」也。

於每 或 鄭氏曰:「每一州之中,天子選諸侯之賢 作牧』,是也。伯不云『入天子國』者,伯不 牧,養也。言其養一州之人、《周禮》『八命 之中曰侯者,本爵也。」 孔氏曰:「天子 父,辟二伯也。 者以爲之牧也。《周禮》曰:『乃施典於邦 而益,謂此類也。外,自其國之外。 一而 ,故不言入耳。」 州之中,選取賢侯一人,加一命爲牧。 建其牧。」牧尊於大國之君,而謂之叔 亦以此爲尊。 愚謂: 入天子之國 禮,或 九州 損之 H

> 《玉藻》:「伯曰『天子之力臣』。」此其擯於 《左傳》僖二十八年,王稱晉文公爲叔父, 也。 也。 以州牧之稱稱之也。昭九年,稱晉侯爲伯 者,蓋亦辟二伯,而因以别異於大國之不 也。其人天子之國則曰「牧」,辟二伯之稱 制》「二百一十國以爲 諸侯之辭與? 依其本爵稱之,若《春秋》書晉侯、齊侯是 父,以大國之稱稱之也。 爲牧者。 叔父、叔舅。」牧尊於大國,而曰叔父、叔舅 牧」,亦擯者辭也。 《覲禮》:「大國曰伯父、伯舅,小 不言擯於諸侯之辭者,文不具也。 鄭氏謂 「禮有損之而益」,是也。 牧在外亦謂之伯、《王 州, 。於外曰侯者,亦 八州 八伯 或

鄭氏曰:「謂九州之外長也。天子亦選其内自稱曰「不穀」,於外自稱曰「王老」。其在東夷、北狄、西戎、南蠻,雖大曰「子」,於

禮記集解

孔氏 不穀 賢者以爲之長,雖有大國益地至侯伯,而 舅。 之地 稱之辭也。 於外自稱,謂於其所長諸 其爵不過子。 鎮、蕃三服之諸侯。 愚謂: 夷、狄、戎、蠻,此謂中國之外 若本爵是男,亦謂爲『子』,亦尊異故 稱之,而 七戎、六蠻,謂之四海」,是也。 不云『人天子國』及『擯』者,略 老』,威遠 之國曰『子』,天子亦謂之『子』,雖 諸侯之賢者以爲之子,子猶 本爵 其本爵子者,今朝天子,擯辭曰『子』。 曰:「卑不得稱爲牧,又不得謂爲父、 ,與民言之謙稱。 無牧伯之號,蓋以其遠而略之也 國也。 亦無過子,是以同名曰『子』。 王老,言天子長老之臣,尊大 其人天子之國,亦即其本爵 外,亦 《爾雅 其戎、狄之中。」 穀,善也。 侯之中,擯者所 》「九夷、八狄 牧 可知也。 也 每方亦選 有侯 人天子 日『王 也。 曫 伯

> 之號 遠國」,是也。 以尊之,以鎮服其戎狄之族類,鄭氏謂「威 别於中夏之侯伯。 也 王 或 不 在外自稱 得 稱 牧 所 曰 以 王老,又所 抑 之, 以

「子」,自稱曰「孤」。 庶方小侯,人天子之國曰「某人」,於外曰

既舉大國之子,又舉其餘 也。 鄭氏 則曰『孤』。 其本爵,若男亦稱 舉伯之與牧,不顯其餘諸侯。九州之外, 『子』,此君在其 諸侯下文别更具顯 其賤,故曰『衆方』也。 若入王國,自稱 『某人』,若牟人、介人是也。 亦曰『男』,舉尊言之。」 小侯,謂四夷之君,非爲牧者也。以 曰:「謂戎、狄,子男君也。 孤者,特立無德能 本國外四夷之中,自 男也。 ,故於此略之。 若與其臣民言, 孔 小國者,以六服 氏 六服之内,但 日 也。」 男者於外 於外 「庶,衆 愚

諸侯稱謂之事。然。○自「天子有后」至此,記天子立官并然。○自「天子有后」至此,記天子立官并謂:自稱曰「孤」,自稱於臣民及諸侯皆

禮記卷五終

四五

## 禮 記 卷六

賜 或 史 進 館 士 篡 及 脩 第 翰 孫 希 林 巨 院 編 脩

## 曲 下第二之二

天子當依

而立,諸侯

北

面

而

見

天子,

日

覲

天子當宁 相見』皆同。 釋文》:「依,本又作『扆』,於豈反。 尺, 間 依 孔 以 氏 示 東西當户 鄭注: E : 威 故《覲禮》云『天子設斧依於户 也。」《 而立,諸 宁,徐珍吕反,又音儲。」 「依, 狀如 如今綈素屏 、牖之間,繡爲斧文,亦曰 爾雅》云: 公東 屏風,以 面 諸 「牖 風 見,賢 ,有繡斧文,所 侯 絳 户之間謂 西 严爲質, 遍 面 反,下  $\vdash$ 牖 高 文除 朝 之 之 斧 八

受玉 待諸 升成 王。 諸 之宁。』郭注云:『人君視朝,所宁立 朝時也。 受之,不布散也。 遇秋冬陰殺之時,其氣質 侯降階,並 升 圭玉者,卑見於尊,奠贄不授也。 諸 子衮 天子受朝於路門 展。』天子當依 侯 西 侯 次 拜,是北 階親授,諸侯 入廟門右, 冕 春朝陽生之時,其氣文舒而 侯,故云『當宁而立』 ,是當依 第 在 宁者,《 而 廟 北 進 面 當 面 而 而 ,諸公在 日 立 坐奠圭玉 再 依 ,外之朝,於門外宁立,以 爾雅》云:『門 立,是於秋受覲 當宁 覲。 之 拜稽首。 於是坐取 前 時 南 而 所以 也 西,諸侯在 面 而 (斂,故 也。 立 而 再 一,此 同 圭玉 擯 王 立, 拜。 北 王既 者 既 并於 屏之間 爲 禮 不迎 受 布散,故 面 延之,使 升堂,王 擯者 東而 春 所以 也 立宁, 者 玉 一處。」 夏受 賓。 處 覲 諸 奠 謂 朝 天

ĮЦ

六

采

服

四

歲

見,

衛

服

服

歲

見,甸

服

二歲

唐

制

六服

諸

侯

分年

嚴

朝

禮

文,

覲

禮

朝

冬遇依

覲」。

則

四

. 時

之朝

朝

》、《遇》、《宗》皆亡。 一西上之文,是諸 見天子之名。 面」,則 禮異也。 今《儀禮 門外 至人廟 質; 諸 同 廟 宗,秋見日 道 朝 一見,男服三歲一見, Ŧi. 時 侯 侯秋 旅見矣。 尊 ,同同 朝 歲 王。 大約 朝 旅 雖 禮 右 北 禮 鄭 見 \* 同 見天子之名; ^ 惟 依設於廟,宁 朝禮和 姓 在 見,要服 氏 也。 面 盛 受 大 故 存《 朝 覲 謂 而 西 《大宗伯 行人》 次 諸 覲 朝禮 也。 覲 ,冬見日 面 「夏宗依 於 公 覲 禮 朝 北 在 六歲 禮 廟 則 丫侯 簡 「諸 禮 門 覲 無 西 服 外 也。 廟, 無 天子 侯 出 天子 春夏 也。 别 冬則遇。 以 事 服 執擎 故,其至不能無後。 以 大門外下車。 而 爲之禮: 之内,然道 見」,是也 迎 生氣文也。 而 法 服 下 車在大門内 來 序人。」 朝者位於内朝而序進,覲者位 ○鄭氏曰:「春朝,受摯於朝 又因以勉諸侯,使疾於朝 · 隨之而 惟 朝 朝,各乘其 X 蓋 服,立 享有 應門 春 放 里不 則 天時之温 孔氏 每 秋覲 迎諸侯之禮。」 而 於路門之外,諸侯更易 用 歲 設擯、 若並 行 能 更不 命車 朝 當 曰 : ,一受之於廟,殺氣 禮。」若熊氏之説 禮 無遠 朝 朝之諸 先王則因其至之時 夏則 ·别迎。 介傳 肅 「崔 時 至泉 近,又 以 · 王 辭 氏云:『諸 侯 宗、秋 略 但迎公,諸 門 訖 而 爲 或 賈氏公彦 雖 外陳 一,受享

公東

面

諸侯西

春見曰朝,夏見曰

外,但一

一人覲,不

東上

禮

一》諸

侯受次

於

廟

行禮之

則

覲

不

敢

怠

有

疾

病

同

在

在

治

朝,

則

覲

禮

在

朝

者

侯

春

也

愚

謂

覲

者

分

於

兩

處

受

也

地

異

姓

東

面

北上。

於廟

門

質

於

則乘

車

介。

至

廟

門,

朝

朝

《大行人》言「廟中將幣三享」,則在 氏之説,則先行朝禮然後講賓主之禮 説 合。 且 受享皆在廟,此云「當依而立」,與《儀禮》 墊 人》有王迎諸侯,賓主朝位之法,先儒 在 享,何以《大行人》言受享而反略受摯耶 幣」,乃專指受享也。 幣,兼該朝、享,不應《大行人》之「廟中將 通 故鄭氏謂「受摯於朝,受享於廟」,欲以 天子出 日 春夏之朝,異 其説 則 朝耶 在 禮以廟 至朝禮 朝 覲 王先 ? 迎。 亦 禮,天子不下 然《司 受爲隆,何以受享於廟 《覲 無 迎 ,此云「當宁而立」,則 迎法。 賓 於秋 愚謂:《儀禮 禮》王不迎諸侯,而 而 儀》言諸侯相 後 冬者 至朝 ·堂而 行 且受摯之禮,重於受 朝 也。 後 禮 見諸侯、春秋受 • 覲禮》受摯、 行三享 然 朝, 如熊 如 而受摯 在 崔 廟 《大行 氏、 廟 在 朝 氏 以 中 兴迎 也。 也 廟, 賈 之 反 ? 兩 爲 將

> 子之禮也 説,今姑並録以 人 廟 加 受享。 ^ 俟考焉。 禮 經》 散 逸 ○此言諸 先 儒 侯 各 見 以 意

諸侯未及期相見曰遇,

相

見於郤地曰

會。

諸

侯使大夫問

於諸

侯

日

聘,約信

日

誓

盟,音明,徐亡幸反。」

盟。《釋文》:「郤,丘逆反。 事君。 《尚書》見有六篇。」 坎用 於五霸之道,卑於三王,有事而會,不協而 相 子巡守至方岳之下,會畢,然 爲信也。 者,以其不能自和 鄭氏曰:「及,至也。 下太平之時,則諸侯不得擅相 遇》、《會》、《誓》、《 盟 牲, 同好惡,獎王 凡國有疑,則 臨 盟者,殺 而 讀 其 牲 好,故用言 盟禮》亡。 盟 室,以 盟詛其不信者。 歃 郤,間 孔氏曰:「約信日 書。 血,誓 昭 ^ 也。 聘 事 後 於 辭 與盟 《誓》之辭 禮》 涖, 臨 神 乃 神 相 與 也 約 今 訓 後至 諸 惟 束 民、 也 誓 天

珠槃、 也。 也。 敦,用 時 遇 聘、問、誓、盟,皆諸侯之禮也。 盟 未乾」,是也。」 盟。』又《玉府》云:『則共 牛耳。』知用左者,以馘者用左耳 書」,是也。 加書」,又襄二十六年《左傳》云『歃用 血 盟 禮 献 歃血者,隱七年《左傳》『陳五父及鄭 澽 加書者,案僖二十五年《左傳》云『坎 割 略 不 則 郤 盟之爲法: 如忘」,又襄九年云『新與楚盟, 玉敦者,《戎 血爲盟,書成,乃歃血 牲 禮 期 地 左耳,盛以 期而 官 而 竟 相 略 知用耳者、《戎右職》云: 上 見 相 也 先鑿 之地 E 見日 吕氏 遇 《公羊傳》齊景公之唁 右職》云:『 珠 地 也。 會,日有 槃; 大臨 日無期 爲 珠槃、玉敦。」 方坎, 時 又取 一而讀 曰:「會、遇、 緩則 地地 期,地 會禮詳 以 故也 書。 血 殺 無所也。 禮 玉敦 盛 牲 宜 有 口 牲 知 以 於 「贊 詳 血 伯 辟 血 坎 所 而 知 知 加 坎 玉

稱

日

「寡人」。《釋文》:「自謂,一本作「自稱」。」

諸侯見天子,曰「臣某侯某」。

其與民言,

自

此者。」 命」, 以 魯昭 侯相見之禮 牲用書而 遇禮 始所 公,『以 相見」。 臨之以 謂 愚謂:以言語相要結謂之誓,殺 人 也 「約信日誓」與。 爲 遇禮: 菑 神謂之盟。 以 非 **幦爲** ·皆然· 席 《春秋》有「胥 也 此一節言諸 ,其略有 爲 几, 如

某侯 臣 皆文略耳。 此不曰「某土之守」、《玉藻》不曰「某侯」, 守臣某』。」蓋當曰「某土之守臣某侯某」。 其爵爲侯者也。若伯、子、男,亦各因 者,其國也,下言某者,其名也。 一某侯某,謂擯於天子之辭也。 某」。 《玉藻》曰:「諸侯於天子曰『某 自稱 四夷之長,則曰「某屏之臣某子 曰「寡人」,謙言寡德之人也。 其爲州牧,則曰「某土之牧臣 侯者, 上言 土之 而 謂 某 稱

其在 也。」 謂 鄭 中。」是既葬之稱猶然 欲見新君,叔向 侯之辭。 此不云名,皆文不具也。 者告曰:「孤某須矣。」」彼文不云『適子』, 適子孤,擯者告賓之辭。 父死未葬之前也。 氏 X 下云『既葬,蒲席』,明孤 曰 : 服 愚謂: 曰「適子 《左傳》晉平公既葬,諸侯 M 服,謂 適子孤,諸侯未除 辭 孤。 曰:「孤 未 故《雜記》云『孤某 也 除 《釋文》: 稱『孤』、稱名,皆 喪。」 《雜記》云: 斬 然在 「適,音的。」 某是未 孔 喪 衰經 之大 稱 氏 於 曰 「相 之 夫 葬 諸 須

死

日

「薨」,復日

「某甫復矣」。

某侯某」。 臨 也。 此 鄭氏曰:「稱國者,遠辟天子。」 祭 皆 祀 祝辭 孫,上本其得國之始而言。《武成》曰 ,内事曰「孝子某侯某」,外事曰 重 所 也。 稱 也。 日 曾孫」者,言己乃 日 「孝子」者,謂 祭 愚 「曾孫 始 謂 禰 祖 廟

> 神之稱,其 曰「孝孫」。 孫」,言於所祭者爲 「稱曾孫某,謂國家 惟有道曾孫周王發」,是也 實 内 事 重孫 自 也」,是也。 曾 也。 祖 以 此 上 郊特牲 若祭祖 雖 亦 爲 日 祭外 曾 則 日

字。 禄」』。 鄭氏 也。 侯復』,故呼其字,言『某甫』。」 退,故《雜記 曰:「復稱字,與大夫、士異,❶ 日:「日 不稱爵,與天子異,有所降 天子復曰『天子』,諸侯不可云『諸 孔氏曰:「若告於諸侯,則辭當 》云『赴 『薨』,亦史書策辭。 於諸 侯, 吕氏 日 也。 臣不 寡 某甫 君 大臨 且. 不 謙

既葬見天子,日 鄭氏 曰:「既葬見天子,代父受國也 類見,言謚 類 類

0 「與」下、《集説》有「卿」字。

之重

言謚 禮 國正 之禮 亦 相 後乃見,而 子命之嗣,列爲諸侯之位。是三年除喪之 謚者 猶 也 未葬之前,親使 亦不見也。 竟,故得見天子。 秋》之義,諸侯薨而嗣子即位,凡有三時 云『其子戍 有 聘而 而 是始喪即適子之位,二是踰年正月即 類。 君臣之位,三是除喪而見於天子 也。 ,序其行及 也。 蓋 日 行者皆 未受王命 類,象諸侯使大夫聘於天子之禮 行此 其禮 類見,象諸侯見於天子之禮也。 執 請謚 今云『既葬』者,謂天子巡守 言謚,謂將葬,就 皮、 日 禮 類,故祭禮有類 也。 並亡。 謚 於君」,是也。 人請之於天子,若《檀弓》 帛,象諸 ,不敢自居於諸侯之禮 未葬未正君位,雖巡守 所宜 愚謂:凡禮之象正 ,使大夫行,象聘問 孔氏 侯之禮 曰:「準《 ,朝、聘之禮 君請謚 曰類,言類 見 也。 \*, 也 至 春 言

諸侯

使人使於諸侯,使者

自

稱

日

寡君

之

《周禮 謂: 禮 免經之禮決之也 臣在國見君,禮自不同,未可以見於君 冕」,及《記》之《服問》推之可 故 不免絰」,恐未必然。 特不免絰而已,以《書》之《顧 王,其禮蓋下於先君。 其 而 麻不加於采,陳氏謂「 爲 朝、聘於天子皆 • 典命》推之可 之爾。 陳氏 日 諸侯始見於王 知也。 以皮、帛繼子男,以 祥 類 道 ?,言依 類見用吉 曰 : 其服蓋吉服 命》「天子麻 知 也。 於諸 一在 一,與 服 喪 侯 諸 愚 無 朝 之 而

老」。 鄭氏 卿。 老」,諸侯之卿, 之老」,皆所 子之三公,繫於天子言之, 《釋文》:「使於、使者,並色吏反。」 曰:「繋於君以 愚謂 ": 此 以 表其尊。 謂 繫於其君言之, 曰「寡 擯 爲 於諸 尊 也。 ○自「諸侯 侯 之 日「天子之 此 辭 謂 也 諸 見 侯

「鏘」,同七良反。● 僬,子妙反。」人僬僬。《釋文》:「濟,子禮反。蹌,本又作「鶬」,或作天子穆穆,諸侯皇皇,大夫濟濟,士蹌蹌,庶子」至此,明諸侯及其臣稱謂之法。

多也。 貌。 愚謂: 蹙。」 鄭氏曰:「皆行容止之貌也。 不如濟濟之安詳。《士相見禮》曰:「庶人 之斂飭,不如皇皇之輝光,蹌蹌之軒舉, 濟 庶人卑賤,都無容儀,並自直行而已。」 貌舒揚,不得 濟濟,徐行有節,不得莊盛也。 介北面鏘焉。」凡行容,尊者體盤,卑者體 『賓入門皇。』又曰:『皇且行。』又曰:『衆 皇皇之易見,不如穆穆之難 一貌。 穆穆,深遠貌。 諸侯皇皇,莊盛不及穆穆也。 孔氏曰:「天子尊貴,故穆穆 蹌 濟 蹌,舒 濟 也。 揚 皇皇,顯盛貌。 僬 貌 **僬**, 卑盡 《聘禮》曰: 士蹌蹌,容 僬 窮; 僬 之貌。 威 大夫 急促 濟 濟 濟 儀

天子之妃曰后,諸侯曰夫人,大夫曰孺人,士

曰婦人,庶人曰妻。

也。 也。」與人爲親屬。 日 侯得稱。 故配王言之,而曰后也。」夫人之名,惟諸 曰:『后,君也。 『某妃配某氏』,尊卑通 稱,故《特牲》、《少牢禮》大夫、士之禮皆 言屬,婦之言服,妻之言齊。」 鄭氏曰:「后之言後也。 「妃,邦君之合配。王、諸侯以下,通有 君夫人」,是也。 妻之言齊也。 《論 語》云『邦君之妻,邦人稱之 明配至尊,爲海内 庶人賤, 婦之言服,服 **^** 爾 稱也。 雅》曰:『孺, 夫之言扶,孺之 無別稱,判合 《白虎 孔氏 事 小君。 其 曰 : 通》 夫 妃

❶ 「七」,原誤作「士」,今據《釋文》改。

號,或古有之。考之經傳,未之有也。」夫曰世婦,士曰妻,未聞有孺人、婦人之齊體而已。」〇吕氏大臨曰:「《喪大記》大

公侯有夫人,有世婦,有妻,有妾。 謂二 子也。 餘從 天子之夫人同也。 之外更有妾,故 此世婦謂夫人姪、娣,其數二人。有妻者, 但得以一人正者爲夫人。有世婦者,謂 中。」 孔氏曰:「獨言『公侯』,舉其上者, 女之外,别有其妾。 人之姪、娣。故公侯之夫人無子,立姪、娣 氏 一婦同 可 媵及姪、娣也,凡六人。 有妾者,謂九 曰:「貶於天子。 《左氏》以夫人姪、娣貴於二媵,則 知也。 愚謂:諸侯之適妻曰夫人,其尊 也。 既下於天子,不得立 又其次曰 知 其次 上文天子八十一 此妾不 妻曰 無后與嬪,去上、 妻、《喪大記 在 世 婦 九女之 ,與天子 后 御 謂之 故 數 與 夫

> 文》:「童,本或作『僮』。」 下自稱曰「婢子」。子於父母,則自名也。《釋 夫人自稱於天子曰「老婦」, 寡小君」,自稱於其君曰「小童」。 世婦當爲夫人之姪、娣,而其餘爲妻也。 之,以姪、娣從。公羊家之説,謂左右 左氏家之説,謂夫人之姪、娣貴於二媵,則 於諸妾,則世婦當爲二媵,而其餘爲 諸妻」,與天子之御妻 諸侯一娶九女,娶一國 同 也。 自 .稱 則二國 於諸 自世 其 賤 妻也。 者 勝貴 侯 往 婦 以 媵 曰  $\Box$

妻也。 得自 當。」 言卑也。 朝諸侯之時。 人助祭,若時 鄭氏曰:「自稱於天子,謂畿内諸侯之夫 稱言老而服事也。 孔氏 助祭若 於其君稱此,以接見體敵,嫌其 曰:「此夫人,謂畿内諸侯之 事見。 小童,若云未成 獻 繭之屬,得接見天子,故 自 稱於諸 畿外諸 人也。 侯,謂 侯夫人, 婢之

對舅姑 與其自 嫁於諸 婢子 君 注 有喪 無知 之稱也。 穆公夫人自稱 君,故稱其夫人曰「小君」。 之事,故有擯於諸侯之辭。臣子稱其君 於天子,此謂王之姑、姊妹或姑、姊妹之女 助祭獻繭,皆無擯於天子之事。 見天子之禮。 而諸侯之内宗出嫁者,於其國又當有弔問 也。 立疏 專指 侍 而 也。 婢子,爲 諸侯 之 使 稱 侯,或歸寧,或使大夫寧於王,或王 執 婢之爲言卑。 稱。 老婦、寡小君,擯者辭也。 於舅姑者同 爲畿内諸侯夫人,非是。婦者, 人來弔 巾 相朝,夫人有郊勞、致餼之禮, 櫛」,是也。」 ,世婦自稱之辭,而《左傳》秦 曰「婢子」,蓋自貶 小童,未成人之稱 臣子一例,故夫人於天子, 則 有辭以接於天子也。 也。 晉懷嬴曰『寡君 諸侯,謂他邦之 愚 曰「寡」,亦謙 謂 夫人 而從世婦 自 外 小童、 自 謙 命 使 爲 稱 婦 言

> 夫人。」 夫人。」 夫人。 一、夫人自稱曰小童,邦人稱之亦曰君也。《論語》曰:「邦君之妻,君稱之曰夫也。《論語》曰:「邦君之妻,君稱之曰夫人,則於其父母稱名,不用「老婦」「寡小君」之稱其父母稱名,不用「老婦」「寡小君」之稱其父母稱名,不用「老婦」「寡小君」之稱其父母稱名,不用「老婦」「寡小君」之稱其父母稱之辭。子於父母則自名與子,蓋言而自稱之辭。子於父母則自名

反,本或作「使者自稱」。」
老」。使者自稱曰「某」。《釋文》:「使自稱,色吏「陪臣某」,於外曰「子」,於其國曰「寡君之列國之大夫,入天子之國曰「某士」,自稱曰

孔氏 之稱。《魯春秋》曰: 周,擯者曰『晉士起』。陪,重也。子,有德 於天子爲士。 鄭氏曰:「亦謂諸 王臣,己今又爲君之臣,故對王曰『重臣』 曰:「陪,重也。 曰『某士』者,如晉韓起聘於 侯之卿 某,名也。 『齊高子 也。 三命 來 其君已爲 、盟。」 以 下, 老」也 子陪臣 也。 之人與 名,敬異國 謂其名也。 稱之也。於其 稱之,文略耳。 自稱之辭也,某者其名也。某士亦當配 者之辭也,某者,其國也。 若襄二十一年晉樂盈 盈」,是 他國人言,稱此卿爲「寡 之君 此卿 也。 、國曰「寡君之老」,謂其 於外曰「子」,謂 也 出 使者自 使 他國 愚 陪臣某者,言 謂:某士者, ,與其君言則稱 稱曰『某』,某 辭於行人曰『天 他 國 君 之 國 之 中 人 名 擯 亦 而

天子不言出,諸侯不生名,君子不親惡。 侯失地,名,滅同姓,名。 諸

鄭氏 以 是 傳》曰『天王出居於鄭』,「衛侯朔入於衛」, 大 也。」 (惡,君子所遠。出、名以 天 下 (曰:「天子之言出,諸侯之生名,皆 爲家,策 孔 氏 曰:「天子不言出者,天子 書不得言出,祗得 絶之。 **奉** 稱 秋 有

滅紀

,楚滅夔,皆

[滅同

姓

而

不

衛

非 大

滅

同

姓。

朱子

一諸

侯

滅

絶。 「衛 之? 獲也。』此失地名也。 歸』、《公羊》云:『何以名? 謂犯王命。 無外,此其言出 之,諸侯大惡,書『名』以絶之。 之稱,諸侯 諸侯不生名者,諸侯南面之尊,名者質 也。」〇胡氏銓曰:「《春秋》晉滅虞、虢 秋》莊十年 秋》莊六年『衛侯朔 四年『天王出居於鄭』、《公羊》云:『王 『朔何以名? 人,若孔子書經,見天子大惡,書『出』 侯燬 曷爲 漁之? 滅邢』,《公羊》云:『何 稱爵 二荆 此鄭注皆用《公羊》義也。《春 絶。 敗蔡師於幸,以 · 何 ? 不 滅同姓也。」此 **曷爲絶之?** 犯命 稱 X 名。 於衛」、《公羊》云: 不 能乎母也。」《 君子 名,則 僖二十五 絶。 案僖 蔡侯 不親 滅 以 曷 同 爲 獻 名? 此 侯 姓 也。」 <u>二</u> 十 以 春 燬 名 惡 賤

禮記集解

以發其墨守也。 、未嘗書名,經文只隔『夏四月癸酉』,便國,未嘗書名,經文只隔『夏四月癸酉』,便國,未嘗書名,經文只隔『夏四月癸酉』,便

爲人 君惡 戇 請 臣 鄭氏 以 雖 諫,二曰順諫,三曰直諫,四曰争諫,五 聽,遂去之。」何休 謂明言其君之惡,不幾微。逃,去也。 ·戎將侵曹,曹羈諫曰:「戎衆以無義,君 一十四年:『曹羈出奔陳。』《公羊傳》云: 當 臣之禮,不顯諫,三諫而 諫。』凡 勿自敵 ,以奪君之美也。 義 諫 曰:「不顯諫,爲奪美 争, 則合,無義則離。」 諫, 也。」曹伯 亦 諷 當依微 諫 爲上 云:『諫有五: 曰:「不可。」三諫 納 君臣有義則合,若 ,戇諫爲下。 進善言,不得 不聽 孔氏 也。 ,則逃之。 顯,明也。 曰:「莊 顯 事 日 君 不 君 諷 日

> 權乎義之所宜,而行其心之所安,未可 輕重,故爲人臣者,或從容而諷 小,勢有緩 而 不聽,則不可以尸位 據《公羊傳》爲言,君 一律論也。 奔告,或不諫而遂行,或至死 諫 不聽,則待放而 急,誼有疎戚,位有尊卑,任 而 臣 去也。」 苟禄也。 一以義 合,諫不行, 愚謂 而 議,或倉卒 然事有大 不去,要 ": 以 有

《釋文》:「號,戶刀反。」子之事親也,三諫而不聽,則號泣而隨之。

鄭氏曰:「至親無去,志在感動之。」

嘗之。醫不三世,不服其藥。 君有疾飲藥,臣先嘗之,親有疾飲藥,子先

曰黄帝《針灸》,二曰神農《本草》,三曰素父子相承至三世也。又説云:三世者,一其藥,慎物齊也。」 孔氏曰:「三世,謂其鄭氏曰:「嘗,度其所堪。醫不三世,不服

者也。 身 病 也。」 或 嘗度其可否而 女《脈訣》, 未 ,其誤足以殺人。 無 必 則 所不 愚謂: 精,故 非 謂 又云夫子《脈訣》。 致 ^ 其 進之。 不 醫者之用藥 針灸》、《本 服 謹 其 故君父飲藥,臣 而 醫不三 藥。 於 疾 也 臣 草 一其效 則尤所 世,則於其業 子 鄭謂 於 君 可 脈 「慎 宜 父之 子 以 訣 慎 必 物 愈

**儗人必於其倫。《釋文》:「儗,魚起反。」** 

丈反。」

公孫 孔 聖,爲其心之倫而儗之也。子夏以有若似 也。 矣,•孔子俱以爲賢,爲 褻。」 鄭 當於大夫,比士當於士,不以其類 子,儗之以貌 氏 夷、惠、伊尹,迹不同矣,孟子  $\mathbb{H}$ 日 以管仲 方氏慤曰:「禹、稷、顔 比 比 前 孟 也。 不知聖賢之德不 子, 儗之以位 倫猶 其道之 類也。 回,位 倫 前 則 俱 而 比 倫也 不 大夫 以 儗 不 有 知 爲 > 口 所

> 事矣」; 薪矣」; 御 問大夫之子,長,曰「能御 矣。」問 問天子之年,對 曰 也。 未能 以位言,方氏以道德言,兼之乃備 王霸之業不同也。」 國君之年,長,日「能 幼, 幼, 典 問士之子,長,日「能 謁 曰「未能負 曰「未能從宗廟、社稷之事 也。 日 問庶人之子,長,日 「聞之,始 薪也」。《釋文》:「長,丁 愚謂:「倫」字, 矣」,幼,日「未能 從宗廟、社 典 服 謁 衣 矣」; 若 能 也 稷 干 鄭 幼, 負 之 尺 氏

尊所 鄭氏 主事 知 請 告 能。 者 曰 : 也。 御猶 「天子既不 ^ 謁 主 或 禮 也。 君以 請 也 \_ 《書》曰:『 下,皆言其能 四 + 謂 敢言年,又不 强 能 而 擯 越乃 仕 贊 . 五. 則 出 御 + 敢 長 事 服 斥 以 幼 官 事 謂 至 口

❶ 「位」、《集説》作「時」。

政 儀 禮 疏云: 》數射云『若干純』。 孔氏曰:「古者謂 鄭引此者 ,明大夫、士所以不問其身而 若,如也。 數爲若干,

問

求也。 大夫五十乃爵,故不問其年而問其子。 人 子、諸侯繼世象賢,其年不定,故問其年。 言事本不定常,如此求之也。天

君十五

|而生子,是十五以上爲長,十五

以

也。」 子,長則日 下爲幼。 吕氏 大夫子卑,長幼當以二十爲 『能從社稷之事』,『能執干戈以 大臨 曰:「《少儀》問國 君之 限

也。 能 衛 註社稷」,則成人以上也,幼子『能御,未 御」,能御 此章 以 能 則成童以上,未能 御、未能 御 爲大夫之子 御 則未成 長 童

大夫之子,長則曰『能從樂人之事』, 幼則 『能正、未能 蓋射御之學無貴賤之異也。 正於樂人』。 蓋男子十三學 《少儀》問

樂,誦詩舞《勺》,成童舞《象》。

十三以上,

也。」 《大夏》,則樂人之事備,故曰『能從樂人之 是能 故於大夫之子言『樂人之事』,文互見 事」也。 數始於一而成於十,『干』字從一從十,故 御,皆在所學,《少儀》以國君之子言『御』, 正於樂人,未十三則未能 陳 此章言御不言樂者,樂、舞、射 氏 澔曰:「若,如也,未定之辭。 也。 <u>二</u>十 舞

禮 · 鄉大夫》「國中自七尺以至六十,野自 人 謂當如此箇數。』意亦近之。」 言若干。謂或如一,或如十,凡數之未定 之度以見之也。人生十年曰幼。長謂 六尺以及六十有五,皆征之」、《孟子》言 問人之長幼,皆不斥言其年者,敬也。古 者皆可言。 否,又不敢斥言其身之長短,故言 五尺之童」,是也。 於年之長 顏注《食貨志》云:『干,箇也。 幼,多 以 於天子不敢論 尺 度言之。 愚謂: 其 《周 服 其 凡 已 衣

弟,恒 命,或 射、 冠,幼 薪者,庶人之所有事 御 者 使之典謁告之事。 謂 疑之,則典謁 典,主 未冠 也。 也。 御, 謁, 也。 乃冠者之事 御 告 車 典謁 也。 孔子使 也 卑於御,負 士 成 童 有 也。 童 子 隸 而 將 子 學 負

薪卑於典謁

問 夫之富,曰「有宰食力,祭器、衣服不假 士之富,以車數對。 釋文》:「數地,色主反,下『數畜』同。 力,謂 或 金銀、 士也。 鄭氏 祭器、衣 夫,祭器 地,土地 君之富,數 曰:「皆在其所制,以多少對。 食下民賦税之力也。 錫石之屬 食力,謂民之賦 造 服 廣狹也。 而 不 假,謂 不 地 備 也。 以 問庶人之富,數畜以 對,山澤之所出。 Ш 几 畜 有宰, 澤 命大 税。」 所 謂 出 雞豚之屬。 夫也。 衣服,祭服 畜,許六反。」 明 有 魚鹽 采 孔氏曰 三命大 地 一、蜃 宰,邑 問 對。 也。 蛤 間 食 問 大

《大宗伯》「四命受器 謂: 其用 故有國君之禄,則 同,故數畜以 此車也。庶人受田有定制,而畜牧多寡不 車、道車、稾車,以車數對,謂 服 不假爲非禮、對孤言之也。 則爲少,視士則爲備。 祭器不踰竟」。 物,莫非王有,天下共見,不須問 衰」,故以畜數對。 盛,不樹者無椁,不蠶 師》云『凡民不畜者祭 有百畝之田,則 士之禄,則有大夫、士之富,庶人無禄,而 不假」,對士言之也。 士已得造祭器,故曰「大夫、士去 ,其用足以 明其富。 行其禮,其禮足以稱 然惟四 有庶人之富 有國君之富; 不問 0 《禮運》言大夫祭器 無 者 〇先 命之孤乃得備 《士喪》記 大夫之祭器,視 、牲,不 天子者,率土之 不 此言「祭器、衣 帛,不績 王 其財! 其富足 禄 耕者 也。 以 有大夫、 士有 足以供 馭富, 其位, 以 者 祭 國, 故 無 備 乘 孤 愚 不

之患,紛然不可止矣。 民 後 是 田 世 以 連 馭 Ŀ. 阡陌 富 下各安其分,而無有 之柄失,諸侯 ,於是貧富相耀,而 王或 乘 餘不足之患 4 兼并争奪 車 加 齊

《釋文》:「徧,音遍,本亦作「遍」,下同。」 天子祭天地,祭四方,祭山川,祭五祀,歲徧。

是也。 帝也 也。 以 也。 穀於上帝」、《孝經》曰「宗祀文王於明堂 伯》「以禋祀祀昊天上帝」,《詩序》「春夏祈 享於明堂,所祭皆上帝也。《周 帝,立秋祭白帝,立冬祭黑帝,迎氣之祭 孟 天子一歲祭天有九:冬至祭天,正祭也。 配 春祈穀,孟夏大雩,季秋大享,祈報之祭 冬至及祈穀、大雩,祭於南郊圜丘,大 立春祭青帝,立夏祭赤帝,季夏祭黄 一帝」,是也。 凡言上帝,與五帝别。《周禮 周禮 • 小宗伯》「兆五 迎氣於四郊,所祭者五 一帝於四 禮 大宗 ・掌 郊,

次 春祭户,夏祭竈,季夏祭中霤,秋祭門,冬 山 川、丘陵、墳衍,各因其方。」《祭法》曰 得祭也。 祭社,社通於諸侯、大夫,而北郊非天子不 堂以文王配,迎氣以五人 服,祀昊天上帝則服大 物、皆曰神。 Ш 曰「天子有方望之事,無 「以玉作六器,以禮天地四方」、《公羊傳 各因其方而祭之者也。 夏至祭地於北郊方澤也。 如之。」此可以見之矣。南郊以后稷配 帝則張大次、小次。」 以 \* 川,謂嶽瀆之外小山 貍沈祭山 林、川谷、丘陵、能 「王旅上帝 四 方,謂 林、川澤。」《小宗伯》:「兆 有天下者事百神。」五 ,則張氊案,設皇邸 五嶽、四鎮、 又《司服 JI 出雲爲 裘而冕,祀五帝 《周禮 也。 所不通」,是也。 、帝配。 其祈報告祭則 《大宗伯》: \*: 三 王 風 四 ·大宗伯 雨 瀆之神, 祭地 祀,謂 見怪 一之吉 謂 明 亦 Ŧi. 其

然肅以 言,則 也。 則有 也。 祭行 天,況又附以緯書,如『北辰耀魄寶』之類, 天,又皆以星象名之,謂『昊天上帝者,北 帝之類 隨方而立名,如青帝,赤帝、黄帝、白帝、黑 帝者,氣之主也、《易》所謂『帝出乎震』,是 尤爲不經。是以王肅群儒引經傳以排之。 天成象,在 辰也, 五帝者, 大微宫五帝坐也』。 上帝、皇天上帝之類, 以氣之所主言,則 皇天、殷薦 無 也。 果以 ○楊 司 四 祀天饗帝之類; 時、 Ŧī. 四 帝爲五· 時 五人帝爲 氏 歲 其實,則一 五行,有四 上 地成形 者乎? 編者 復曰:「天帝,一 帝之類; 謂 人帝,則非也。 草木非 五帝, 天猶性也,帝猶心也, 天也。 時、五行 歲 以四字言 以二字言,則格 中祭此 則五人帝之前 地,則星象 康成分爲 也。 則有五帝。 夫有天地 諸 「,則惟 以 神 夫在 .皆徧 非 皇 於 字

以祭山 蜡祭言之者、郊特牲》「八蜡以記四 《大司樂》「舞《大磬》以祀四 實一 馬》「仲秋獮田致禽以祀方」,是也。 此言「四方」於「山川」之上一也。 祇,兆之各以其方者也。 Ŧi. 行之神言之者,《詩》「以祀以方」,《大司 有指四望言之者,此《記》是也。 方」、《祭法》「四坎壇 小宗伯》「兆 大宗伯》「以疈辜祭四方百物」、《 兩圭有邸,以旅四望,璋邸射以祀 帝猶仁義禮智信之心隨感而 此四方爲五官之神,五官之神,即 有指 天也。」 舞,帥 川」,皆言「四望」於「山 Щ 林、川澤、丘陵、墳衍言之者, 而 Ш 舞 愚謂:凡言方者,皆謂 川、丘陵、墳衍,各因 四 方之祭」,是也 一祭四方」,是 而 所指 望,舞《大夏》 川」之上,與 應者也,其 也。 各不 有指 Ш 説詳《月 舞師 典 方 Ŧi. 有指 111 瑞 同 其

在也。 西 氏之説,則諸侯之方祀,東諸侯專祀木神 之神 人,於四方非有所偏主,非 祀」觀之,則 諸侯專祀金神矣,其可通乎? 也 天子、諸侯之國,並 此 其義 雖 亦 謂 不 之方, 可 通 然以 當 如 蓋 兼 嶽 Ŧi. 祀,若 下 瀆 行 之有 諸 爲 功 如 侯 定 於 鄭 方

祀,歲徧。士祭其先。諸侯方祀,祭山川,祭五祀,歲徧。大夫祭五

下 祀」,士言「祭其先」,亦互見之也。 晉祭河, 侯守一國,則 夫、士皆得 方祀,謂祭四望之在其方者,若魯祭泰 曰:「一家之主,則 則天下之鬼神屬焉。」 是也 祭 一國之鬼神屬焉。 Ŧi. Ш 祀 川,境内 及其 一家之鬼神屬 先,於大夫言「五 小山 JII 天子君天 也。 〇朱子 焉 Щ 大

廢也。非其所祭而祭之,名曰淫祀。淫祀凡祭,有其廢之,莫敢舉也;有其舉之,莫敢

無福。

宜舉 非禮之祭,明神不歆 祀本以求 不在祀典,如宋襄公祭次睢之社,或越 所當祭之鬼而祭之也。 舉者爲不敬」,是也。 已 而 祭,如 廢 而 而 廢之則怠、《王制》「山 舉之則瀆,若魯立武宫、煬宫是也 魯季氏 福,不知淫 之旅 也 昏之鬼,不能福 泰 非所 Ш 淫,過也。 ,皆淫祀 祭而祭之,謂 川神 或其 祇 也 人,而 有 淫 不 神

羊豕。《釋文》:「索,所百反。」 天子以犧牛,諸侯以肥牛,大夫以索牛,士以

鄭 既不在滌 者犬豕,不過十日。』此大夫索牛,士羊豕, 觀射父云: 索,求得 犧,毛色純 氏 曰:「犧,純 而 三月,當十日 也。 用之。」 『大者 《周 毛 牛羊,必 禮 也。 孔 氏 以 牧人》: 日 肥,養於滌 上。 在 滌 案《國 三月;小 凡 愚謂: 時祭 也。

之牲 祭當以大牢,而士殷祭當以羊豕矣。 得 之大夫不得用大牢、《特牲禮》諸侯之士不 以 也。 之。」則諸侯之牛,未必不犧也。 也。 祭,祭以特羊,殷以少牢」,則諸侯大夫 擇其好者也。大夫以索牛,士以羊 馬 義》曰:「君召牛,納 爲 用羊豕也。 ,牛皆百匹。」大夫不得用肥牛,但臨 一、必用: 天子之大夫、士,蓋據《少牢禮》諸 襄公二年《左傳》:「萊人賂 天子言犧,諸侯 牷物。 」 然《左傳》鄭子張「黜 肥, 而 言肥,亦互文耳。 繋於牢 視之,擇其毛 而芻之三月 齊侯 索,簡 亥, 官 以 時 而 殷 薄 侯 疏 簡 索 擇 祭 1

日

支子不祭,祭必告于宗子。 宗子有故,支子 鄭氏 在 適 子之家, 曰:「祭必告于宗子,不敢 孔氏曰:「支子,庶子也。 而 當攝 庶子賤,不敢輙祭之也。 而祭者 也。 自 祖、禰 五宗 專。 廟 皆 謂

以

若宗子有疾,不堪當祭,則 猶應告於宗子然後祭。」 庶子 代 攝 可

因獨無美名? 色魚反。 粱,粢音咨, 如字,或音閣。 苦老反。 本, 合, 鮮 音良。」○疏云:隋秘書監 文》:「大武,如字,一 凡祭宗廟之禮,牛曰一元大武,豕曰 曰腯肥,羊曰柔毛,雞 黍稷非馨」、《詩》云「我黍與與,我稷翼翼,爲酒爲食 祀」。 疏 魚 一句,立八疑、十二證 鹽 粱 趾 曰 日 黍稷是五穀之主,粢盛之貴,黍既别 鮮,音仙。 鹹,本又作「醎」,音咸。 一,兔日 脡 薌 其, 鹹 一本作『明粱』、古本無此句。 《爾雅》又以粢爲稷,此曰 鹺 萁,字又作『箕』,同音姬,王音期。 明視, 稷 水曰 脡,他頂反,徐唐頂反。 音泰。 玉 E ,以爲無此句爲是。 日 脯 王劭勘晉、宋古本、皆無 明 清 腯,徒忽反,本亦作『豚』。 深,稻 嘉玉 滌 日 日翰音,犬 酒 尹祭, 槀 鹺,才何反。 幣 日 日 清 嘉 一稷 曰 疏,本又作『蔬』, 薌,音香。 蔬 酌 魚 日 日 量 有異號, 今《尚書》云 量,音亮,又 明築」, 羹 日 剛 幣。 黍 韭 一稷 商 獻 鬣 稷  $\mathbf{E}$  $\Box$ 稷何 以 雉 正 日 日 合 曹 薌 明 明

非其 書,妄生異同,改 其 雅 次」。 次也。」由 相 合 王劭既 「明視」,謂 又《士 一曲 亂經 背《爾雅》之説,又不見鄭玄之言 禮 虞 》有 兔腊 籍, 禮 深可哀哉! 也。 云 明粱」之文,故鄭注 明 今文日 築、 溲 『明楽』,楽, 酒 ○按: 鄭 豚 注 《儀 日 禮 稷 腯 苟

\* Z

信

或

E

也

明 爾

鄭

引《春

秋傳

》作

腯

」,則

此本作

「豚肥」, 傳寫誤

非

明 羹獻 也。 則 與 細 豕 幣,帛也。」 之屬也 秋 鄭 脡,直也。 兩 犬 肥 傳》作 氏 而 武, 足開 則毛鬣剛。 ,犬食之肥 柔 ,食人之餘 日 自牛至兔,凡 弱 迹也 『腯』。 張 雞 豐,茂也。 其,辭也。 號 趾 牲物者,異於 孔氏曰:「牛肥 肥 也。 相 肥肥 則 腯當作「豚」。 腯, 腯,充滿貌 去 鳴 有八物,惟牛云 則 疏 大鹹 聲 尹 充 嘉,善善 可 , 正 長。 貌 獻 兔肥 回鹺 也 也。 人 於 人將 也。 也 用 亦 則 鬼 一,今河 則 肥 翰 商 也。 腳 羊肥 Ħ 神 所 稻,菰 也。 猶 猶 迹 開 食 元, 頭 長 痕 東云 量 羹 則 雉 而 大 也。 也。 餘 蔬 春 肥 毛 而 視 頭

羹 唯有 粱也。 相合, 言 清 餒則 方 梗 道 各舉其美號,故 其大者牲、牢、 而 雞 豕 梁, 敢用柔毛、 祭之。 亦 日 潔 Ē 」、《儀禮》云「羹定」,《左傳》云「未 清 雉 以 也。 有 稷 敗 雞犬,或唯 可 爲 澈 下 氣息又香,故曰 香氣 稷, 也。」此 祭。 口 碎 膳 不 粱 脡,直 棋 酒,三酒 不 及 云 曰 粟也。 入腊,則 也。 酌 直。 剛 稟,乾也。 數 薌 等諸號,若一 也 酒、齊而 鬣,嘉薦、普淖」, 其者, 者 魚 此 也。 水,玄酒 也。 經 兔,及水酒韭鹽之祭, 明,白也。 不 皆 穀 愚 備 魚 數。 從 謂: 非獨米之芳烈,其 秫者曰 薌合。 酌,斟 載其名。」 乾魚商 鮮 言,故《 其 《爾雅》「肉 也 則 尹 所 祭 煮 酌 用 《爾 黍, 秫既 粱, 正 度燥溼得 少 熟 並 清 也 而 是也 也 牢 有 白 脡 雅》云: 滌,言其 言 陳氏 禮 粱、 清酌 直 數 謂 則 軟 割 一,若 也 黄 或 舉 萁 則 稱 中 裁 mi

之長 莖獨 黍與 守禮》云: 息香而 萁,莖也。 高 稷之色白,故曰 短廣狹合制度也。 稷皆今之小米。 莖高 大於他穀,今俗謂之高粱,以 犬肥 「制幣丈八尺,純四职。」酒 《漢書》曰:「落而 大,故曰薌萁。 則 肉 美 1明楽。 而 黍之性黏,故 《内宰》注引逸《巡 可 獻 量幣者,言幣 明,潔 爲 故 其。」梁之 日 白也。 羹 其氣 日 獻 清 薌

曰「不禄」,庶人曰「死」。 天子死曰「崩」,諸侯曰「薨」,大夫曰「卒」,士

酌,而《士虞》記曰「溲酒」,所傳異也。

鄭氏 王 壞之名,譬若 澌也,精神 不同然也。自上顛墜 者登遐,率土咸知 卒,終也。 曰:異死名者,爲人褻其 澌 盡 天形墜壓然,則 也。 不禄,不終其禄。 ,故曰崩。 孔氏 日崩。 曰:「崩者,墜 薨, 顛 四 薨者 無知,若猶 海 死之言 必覩 ,崩之 壞之

> 也。 以代耕,而今遂死,是不終其禄。死者,澌 夫是 崩 餘 令譽,死絕餘芳,精氣一去,身名俱盡 後 聲 也 澌 是 消 餘 有德之位,畢了生平,故曰卒。 聲,劣於形壓 諸 盡無餘之目,庶人極 侯卑,死 也。 不 得 卒,畢竟也 效崩之形 賤 生 任,但 士 一, 故 無 大 如

在牀曰尸,在棺曰柩。

曰死。」

柩,死事究竟於此。」
「是也。柩,究也。三日不生,斂之於故曰尸。《白虎通》云『失氣亡神,形體獨故曰尸。《白虎通》云『失氣亡神,形體獨然也。 孔氏曰:「死未殯斂,陳列在牀,

絡。漬,辭賜反。」 羽鳥曰降,四足曰漬。《釋文》:「降,户江反,又音

瀸汙而死。」 孔氏曰:「羽鳥飛翔之物,鄭氏曰:「異於人也。降,落也。漬,謂相

降 落 是 死 也 牛馬之屬,若一 箇死

則其

餘 更 相 染 漬 而 死。

死

概言 寇 其 病 氏 鄭 死寇曰兵,言其爲器仗所傷而 於死難者也。 褒者,如童汪 日 『凡死於兵者,不入兆域』是 後 而 氏 :「兵者,死於寇難之稱。 日 曰:「兵者,器仗之名。」 也 與 死者也。 兵 曰:「異於凡人,當饗禄其後。」 否,則自當論其事之何如,未可一 一踦『能 此但以爲 有兵死 執 而可貶者,如《冢人》 干戈以 死之異名,至饗禄 也。」 有兵 衛 死,異於疾 吕氏 社 愚謂 稷」,勇 死 大 而 臨 孔 可

祭王父曰「皇祖考」,王母曰「皇祖妣」,父曰 皇考」,母曰「皇妣」,夫曰「皇辟」。 《釋文》

鄭 氏曰:「更設稱號,尊神異於人也。皇, 辟,婢亦反,徐扶亦反。」

母也。 也。」 言 君 也。 媲 也,媲 夫是妻所取法,如君。」 孔氏曰:「王父,祖父也。 考,成也,言其德行之成 於考也。 辟, 法也, 妻所 也。 王母,祖 取 妣 之

生 曰 父, 異稱, 禮 《尚書》云『大傷厥考心』,又云『聰聽祖 嬪之官,並非生死異 之彝訓」、《倉頡篇》云『考妣延年』、《書》云 婦言、婦容、婦功。」 鄭氏曰:「嬪,婦人 『嬪于虞』、《詩》云『曰嬪于京』、《周禮》九 •九嬪》:『掌婦學之法,教九御,婦 出《爾雅》文。 日母,日妻,死 有法度者之稱 若通而言之,亦通也。 稱矣。」 曰考,曰妣 孔氏 曰:「此 也 曰 嬪 生 《周 考

壽 考日卒,短折日 不 禄

稱。」 鄭氏曰 而 : 愚 死從 「謂 謂: 有德行,任爲 大夫之稱 前云「大夫曰卒,士曰不 ''; 少 大夫、士 而 死 從 而 士: 不 之 爲

據

之以

爲

節

視

士者得游目旁視五步之

裼

爲常

`裼則露中衣之交領,故視天子者,

謂視天子也。

給,中衣之交領也。

古人以

愚

謂

此臣

視君尊卑之差也。

天子視,

禄」,而復言此者,記 異 (聞,博 異 語 也。

自「天子死曰崩」至此,記 死者稱 謂不 口

給,音刼。綏,依注音妥,他果反。」 夫衡視,士視五步。《釋文》:「上,時掌反,下同。 天子視,不上於給,不下於帶。 國君綏視,大

視以 中。 鄭氏 氏 視 平視,謂視 目 (曰:「執器以心爲平,故心下爲妥。此 ?,謂上於袷。視大夫又彌高。衡,平也。 不過此。 面 曰:「給,交領也。 視大夫以上,上下游目不得旁。」 爲平,故妥下於面,則上於給也。」 面 視國君彌高。 也。 士視得旁游目五步之 天子至尊,臣視之 綏,讀爲妥。 妥 孔

> 内,而 高 下 則 與大夫同 也

凡視, 文》:「敖,五報反。」○鄭注:「傾,或爲『側』。」 於面則敖,下於帶則憂,傾則姦。

愚謂: 視 受玉卑,其容俯。』卑、俯,替也。又昭十一 若視過下,則 不正 鄭氏 足,坐則視膝。」然則不下於帶,蓋言時之 欹側也。 年『會於厥憖,單子視不登帶』,是也。 年: 『邾子執玉高 之義也。 容則 也。」 曰:「敖則仰、憂則低。 ·《士相見禮》曰:「若不言,立 然。 視欹側 視人過高, 孔氏曰:「此解 似有憂。 則 其 似有姦惡之意也。」 容仰。』高、仰 則是敖慢。 定十五年:『魯公 所以視有節限 辟頭旁視,心 定十五 , 驕也。 一則視 傾

又作「肆」,同以二反。」 君命,大夫與 庫言庫,在朝言朝。 士肄,在官言官,在 釋文》:「『君命』絶句。 府言府,在 肄,本

鄭 氏 肄 習也 君 有 命 大夫則與

±

展 習 其 事 謂 欲 有 所 發 爲 也 官 謂 版 圖

文書之處。 府, 謂 寶 藏 貨 賄 之處 庫 一,謂

車 馬 兵 甲之處。 朝,謂 君臣 謀 政 事之處。

唯 君 命 所 在 就 展習之也。」 愚 謂 官,

謂 百 官 府治 事之處。 《玉藻》云「在官不俟

肄 屨 習 其 是 事 也 而 君命 隨 其所在 有 所 有相 爲,則大夫、士必 與 八謀議。 蓋 慮 先 無

後 時 ,思不出位,然後所治無不精 而 所謀

無 不 審也。

朝言 不及犬馬。

鄭氏 曰 :「非公議 也。

顧 ,君子謂之固

輟

朝

而

顧,不有異

事

必有異慮。

故輟

朝

而

鄭氏 志 不在 曰 君也。 · 「輟 古 止 調調 也 不達於禮 輟 朝 而 顧 心 吕氏大 不正

臨 E :「非所治者皆異事,非所謀者皆異

> 野 慮 陋 也。 者 非 君子不逆人以 姦則野 也 故 女好 君 也。」 子謂 之固

朝言 禮,問禮 ,對以 禮

在 也。 謂 鄭氏 在 日 或 朝 日 「於朝廷言,無所不用 : 當言禮 在朝當言禮 故 或問 凡問 .或 對 禮

大饗不問 ト,不饒 富

禮。

亦通

者當

對

皆當

以

禮

禮

愚

大饗,王饗諸侯 也。 《大司樂》「大饗不

祭祀 牲,其他皆如祭祀」,則大饗之禮樂,略 相 倣 祭祀 必 ト日,嫌 大饗 亦 ";故 與

《左傳》:「臣 特言 其不 1 卜其晝,未卜其夜。」彼是以 由饗 人 與 事 神 者 不同 也。

臣饗君,故特 1 以 重 其 事 非 常禮 也。 富,

也 禮數有常,既 備 矣 前 更饒益之,則

備

非禮 大饗尚 殿脩 《左傳》「饗以 而已矣」,則其不 訓 恭儉」、《郊特牲》 饒富 可 知

古

響。 無 其毛而卜之」,又曰『明王事天地之神明, 享大鬼,祭大示,帥 十日而卜日。又《大宗伯》:『凡祀大神 也。」 書『卜牛』,《記》曰『君召牛,納而 大宰》祀五帝,祀大神示,享先王,皆前 之饗先王,王饗諸侯,兩君相 也 非卜、筮之用」,則祭祀無不用卜矣。」 大饗不問 〇 鄭 陳 氏 氏 曰:「祭五帝於明堂,莫適 祥道曰:「明堂之饗帝,宗 卜,饗賓之禮也。 執事而卜日。』《春秋 見,皆謂 《周官 視之,擇 之大 期 廟 1

凡 至,徐之二反,本又作『贄」,同。 庶人之摯匹,童子委摯而 (摯,天子鬯,諸侯圭,卿羔,大夫雁,士雉 愚謂: 鬯爲摯者,所以唯用告神爲至也。 鄭氏曰:「摯之言至也。天子無客禮, 而 退,不與成 明堂祭上帝,非祭五帝也 人爲禮 匹,依注作「鶩」,音木。」 也。 退。《釋文》:「摯,音 説者 以匹 童子委 爲 以

羔、雁 匹,鶩 禮,必用鬯爲摯者,天子弔臨適諸侯,必舍 以威,死不可畜也。』士摯,冬雉、夏腒。 虎通》云:『雉,取其不可誘之以食,撓之 者,略可知也。 以朝王及相朝聘。 諸侯圭者,謂公、侯、伯用圭,子、男用璧 其祖廟,以鬯禮於廟神,以表天子之至也 其氣芬芳調暢,故因謂爲鬯也。 云:『雉,取其 之孤以皮、帛。」大夫雁 云:『羔取 『羔,小羊,取其群而不失類也。』《白虎通 云:『雁,取其候 雁,取飛有 生執 也。 孔氏 其 雉 野 行 鴨 群 守 則 列也。』士雉者,鄭注《宗伯 曰:「鬯者,釀黑秬黍爲 而 卿羔者,鄭注《宗伯》云: 曰鳧,家鴨 介而 時 死持,亦取 不黨。』《周禮》云:『公 此唯云『圭』,不云『璧』 而行。』《白虎通》云: 死,不 者, 日 見危致命 失節也。』《白 鄭注《宗伯 鶩。 天子無客 鶩不能 也。 酒

敬也。 《大宗伯》:「公執桓圭,侯執信圭,伯執躬 謂: 膳之。 摯於地 或尋朋 其摯。」」 見於尊者,以此致孝養之意,而 主,子執穀 而 初 致其養也。 主人皆食之,故《司 語》『自行束脩以上』,是也。 伯》云: 飛 言焉 騰 以鬱鬯降 了文略 摯之言致也,見於尊者,親致之以 如 一司 友,不 天子無客禮,無所用摯,而祭祀之 而 庶人 諸 退。 也。 璧, 吕氏大臨 ± \*: 故膳夫之職,以摯見者,受而 侯 神,有似 敢與 取 旧 男執 童子之贄,悉用 摰 卿、 其 守耕 『掌擯士 用 成 不 大夫、士摯用 蒲璧。」此 士》云:『掌擯 曰:「摯用禽者,所 玉 人相授受,但 飛遷。」童 稼 用 者,所以 而 摯之義 膳 己。 凡用牲爲摯, 其 言圭 、摯。」」 故鄭 子 故故 束脩、論 略以其大 禽者, 章 見先 士 奠委其 而 以 德 注 一者膳 不 此 || 宗 也。 及 爲 以 蓋 西己 愚

野

外軍中無摯,以纓、拾、 文也。 羔、雁: 亦猶 之摯見於 禮》「上大夫相見以羔,左頭如麛執之」,孤 帛 小 奠之,蓋事 童子於先生,不 帛者,用麛之皮而飾之以 軍在 氏 爲尊卑之差。 日 雉 商 野 繁纓 飾之以布,麛之皮飾之以帛,尊者彌 凡以客禮者授摯,以 不可生執 無物,故用此 執雞」,此 「非爲禮之處,用 此 師之敬與事 也。 矣。 拾,謂: 敢自居於賓客 《大宗伯》又有 而 麛 不言者,亦 用 重 死之意也 爲 射 不 矢可 · 君同 韓。」 可 摰 帛 時 執 可 也。 也 也。 臣 物 文略 也。 故 故故 禮者奠摯 相 孤 孔 **企** 執其皮, 雉無 也。 禮 其摯亦 不 氏 執 而 直 相 日 皮 飾 皮、 見 云

依舊 纓,馬 若土地 鄭 軍 中」而 禮 也。 無正幣,則時物皆可 云『野 此 舉 外』者,若 隅 耳,觸 軍 也。」 類 在 而 都 長之, 邑, 則 則 宜

俱 巾 婦 反。」 以羽反。 人之摯,棋、榛、脯 側 《巾反,《字林》仕巾反,古本又作『亲』,音壯 脩、 **棗、栗。** 釋 文》 棋,

之。 鄭氏 羔、 婦 榛六物,蓋皆饋食之籩實也。 殿、脩,其棋、 身早起 棗,早也。 訓 薑 脯 棋,即今之白 無 榛,木名。 法也。 、桂,乾 外事,惟 人用此爲 雁之屬 搏 榛,實似 肉 肅 無 榛訓 之如 棋,枳 敬 栗,肅 婦 動 骨 初嫁見舅姑,用此六物爲 也 摯, 人無外事,見以羞物也。 榛 石 栗 物 而 至也。 脯 曝之。 李 陽 所 而 亦以 也 也。 婦 用 也,形如珊 小。 ,有實,今邳、郯之東食 見 所 也 致共 無 脯,始 舅 婦人有法,始至,脩 以 ,故男子用之; 脩, 文。 以棗、栗,見姑以 用 孔 養 取 也。 此 氏 之意 肉 瑚 説見《郊特 六 曰:「婦 愚 味味 鍛 脩,治也。 物 謂: 治 也 者 甜 摯也 而 棋、 美。 牲》。 棋、 棋、 蓋 椇 加

> 物。 女摯不 過 脯 男女則以 養,而卿、 見者皆膳之,男摯用 用之,以配 棋、榛、棗、栗 棗、栗,見姑用腶、脩,而 而 亦有動静之異矣,故 榛、棗、 如此。 皆爲 雖 蓋皆以可食之物 出 於性體 過榛、栗、腶、脩, 婦 栗,植物,陰 大夫、 先儒 動 人之摯焉。 服 静 、脩也 四者,隨 然析 謂 爲 士則 皆有 陰陽 也,故婦 以 而 以 之分。 所取以 3,致於 禽,女摯 其  $\bigcirc$ 此配棋、榛、棗、栗, 乾之,則 大小 士: 無棋、榛。 人其 而 周 昏 無 尊者 禮》 禮 爲 爲義、未免於 人 制禮之意,不 地之所 用 棋 》婦 用之。 尊卑之别, 其視全物 王於 棗、 與 以以 《左傳》 見 棗 舅用 栗 以 爲 有 腶、 共 等 墊 蓋 而

漿」,於大夫, 反,又山寄反。」 納女於天子, 듸  $\exists$ 備百 備 埽 姓 灑 於 《釋文》: 國 君,曰 「灑,所買 備

酒

鑿

矣。

姓之數而擇之」,國君則曰「備酒漿之數」,與氏曰:「納女,猶致女也。壻不親迎,則如之,此其辭也。姓之言生女之家遺人致之,此其辭也。姓之言生故之家遺人致之,此其辭也。姓之言生者,皆天子之别子,故納女於天子,謂之者,皆天子之别子,故納女於天子,謂之者,皆天子之别子,故納女於天子,謂之者,皆天子之别子,故納女於天子,謂之者,皆天子之别子,故納女於天子,謂之者,皆天子之别子,故納女於天子,謂之者,皆天子之别子,故納女於天子,謂之人,女漿十有五人。吕公納女於高祖曰:「願爲箕帚妾。」古之遺語也。」 居氏大臨 即爲箕帚妾。」古之遺語也。」 居氏大臨 自以備數而擇之」,國君則曰「備酒漿之數」,則於曰:「納女,猶致女也。壻不親迎,則鄭氏曰:「納女,猶致女也。壻不親迎,則鄭氏曰:「納女,猶致女也。壻不親迎,則鄭氏曰:「納女,猶致女也。壻不親迎,則

禮記卷六終

大夫則曰「備埽灑之數」也。

以不知。

## 禮 卷 七

賜進士及第翰林院 國 史館纂脩 孫 希旦 編 脩

**弓上第三之一**《别録》屬《通論》。

也。」 著姓名 鄭氏 有 篇首記檀弓事,故以「檀弓」名篇,非因其 喪禮》之所未備,而天子、諸侯之禮,亦 善禮著之也。 時,仲梁子是六國人,此篇載仲梁子,故知 有 考焉。 檀氏。」 曰:「名曰《檀弓》者,以其善於禮,故 愚謂:此篇蓋七十子之弟子所作, 以顯之。 然其中多傳聞失實之言,亦不可 孔氏曰:「《檀弓》作在六國 篇中多言喪事,可以證《士 檀,姓,弓,名。 今山 略 陽

> 道也。 其 孫 本反,又徒遜反。」 免,音問。 也。」子游問諸孔子,孔 其子,檀弓曰:「何居? 我未之前聞 立其子,何也?」伯子曰:「仲子亦猶行古之 公儀仲子之喪,檀弓免焉。 而就子服伯子於門右,曰:「仲子舍其 《釋文》:「公儀,氏,仲子,字。魯之同姓也,其名未 腯 昔者文王舍伯邑考而立武王,微子舍 而立衍也。 舍,音捨。 居,音姬,下同。 夫仲子亦猶行古之道 子曰 仲子舍其孫而 · 「否。 腯,徐本作「遁」,徒 立孫。」 也。 孫 聞 趨 文 而

鄭氏 也。 禮,朋友皆在 助 弟之賢者而問之。 孫爲後。居,讀爲 也。 公儀,蓋魯同姓。 曰:「檀弓故 前猶故 他邦,乃 也。 姬姓之姬,齊、魯之間 子服伯子,蓋 檀弓去賓位,就主人兄 爲 非 袒 周禮,適子死,立 免。 禮 以 仲子所立 譏 仲孫蔑之 仲子 也 適

禮

記

卷

七四

言 皆在 也。 玄孫 似 子游之弔司寇惠子者推之。 子 者,未知其 諱 亦 下 後 布 若、公儀, 此 孫』,據周 子 廣一 未知是否也。 檀 廢 而 適子死,立其弟衍,殷禮也。 皆免,無服而 有子服 耳 「檀弓兔焉」,下言「仲子舍孫 立子 適立 繞 他邦者耳。 子服景伯 愚謂: 既 於髻」也。 寸,從項 禮。」 弔,方見仲子立孫 庶,故爲非禮之服 伯子,是魯人。 同稱公,故知公儀仲子 所 非 以免之意。 也。 免者,鄭注《士 (中面) 免者,惟同姓五 舍其孫而立其子者,仲子 蔑,魯大夫。 孔氏曰:「魯相公儀休。 檀弓於仲子,乃不當 喪禮,既 文王立武 前交於額 鄭氏謂檀弓以 春秋 小斂,自齊衰 以非之,蓋 王 而怪之,注説 然《記》文上 喪禮》謂 伯子 一,權 有公鳥、公 孔子曰『立 上,又卻 立子」,則 世及朋 魯同 ,爲親 也 以 仲 免 友 以 以 姓 微 者 向

適子 異常 孔 其弔 也。 主人未覺,後乃趨 來,當在小斂之前,初於西階下行譏弔,而 小斂之後,主人位 以質之,則人孰知夫禮之當立孫哉! 言仲子之非,遷就 子死,立其弟 伯邑考早死無後 而 之東,卿大夫弔位之所 立適 小斂前者 大夫在主人之南」,是也。 氏 拜賓,怪其非禮,故趨 死,舍適 也。 未小 位 孫 曰:「小斂之前,主人有 在 爲後,所 斂 ,以仲子 西 然則子游之弔惠子,是小斂後 而著免者,故爲 方,東面,見仲子之子爲喪主 衍者 孫 而 LI ,武王自當立耳。 初 向 立 在阼階下西面。 「, 殷 重 而爲之説,非夫子正 喪 門右問伯子焉。 庶 IE. 法也。 即即 子 在。 統 也 就伯子而 也。 IE. 檀弓,魯之士, 《士喪禮 非禮之弔,亦 一適、庶之位 事 伯子不欲 禮 門 在 右, 西階 適 微子 檀弓之 問己。 子 》 卿 門内 必 下。 死 滴 故 斥 知

免,即 也 也, 即 故 士之弔位,自 而 知 異 正 故 適、 檀弓弔 也 足以 著 斂 庶者也,何害於子游於既小斂 衰 若 前 示 在 而 謂 無 在 譏矣,不待小斂前著 小 在 仲 免 門 斂 門 子 法 西 前 東。」 初 ,檀弓非 東面,不 則司 喪 即 正 愚 寇 當 以 適、庶之位 惠 謂 小斂前 免 子亦初 之 疏 免也 説 而 喪 後 而 非

方,服 右就 致 事 左右 鄭氏 喪 子 親 戚 不 犯 ,徐上音佐,下音佑,今並如字。 則 養 容 有 勤 然 無 年。 稱 顔 曰 隱 至 方,服 無常 其 而 而 死 隱 諫 無 服 事 ,方喪三年。 犯,左右 也 君 謂 人。 勤 左 有 至 不稱 右,謂扶持之。 就養 勤,勞辱之事 犯 死,心喪 而 就養無方, 揚 有 無 其 事 方,不 隱,左右 養,以 過 師 三年。 失 無 尚反。」 可 也。 也。 服 犯 方,常 侵 無隱,左 勤 《釋文》: 就 官 致 至 無 養 喪, 也。 死 也 犯 有

道 30 故 犯。 也。」 有親 也。 事 無 方 之至,義之盡 故《孝經》曰: 尋 我之身,喪之雖各 哀如父母 義。」 也。 之 常之過 諛 有 師 服 喪 所 父子 ), 資 幾 以 而 疏,此義之至而情或有不至於其 也 事君者方喪三年,其服 恩 傷 諫 方氏慤曰 在 朱子曰:「事親者,致喪三年 於 於義 事 而 故 主 義之間爲 而 愚謂: 事 有 無 恩 無服,情之至 親 無 父也 者 教則 『父有争子, 、犯則 犯顔 ,故必勿欺 以 犯。 也。 :「君、親與 恩 幾諫謂之隱 不同 率 制。」 爲 若有 恐其 事師 心 -', 有 君 制 1,所以 喪 臣 大悪 也 而義 疑 者 事 責 孔氏 主 則 戚 而 則 善 如 心 師 君 一義 身不陷於不 犯之。 盡三年之隆 容 亦亦 有不得盡 問 相 父 喪三年 以 隱 而 日 直 如 母 傷 當 義 諫 無 則恐 喪 須 親 於 犯 爲 謂 父 師 而 盡 而 恩 顔 其 其 之 成 者 情 而

行

譏

弔

乎

也。 也。 隱 ,亦無所謂犯 曾子曰:「人未有自致者也,必也親 致,極也。 左右無方,言或左或 致喪,謂極其哀戚,以 也。 就養者,近就 右 而 無 而 奉養 定 在 喪 所

喪乎。」

皆同。」 皆同。」 皆同。」

皆文過之辭也。然古者葬於國北,季武子皆文過之辭也。然古者葬於國北,季武子,為人家墓以為,欲文過。」 愚謂:言合葬非古,以爲寢,欲文過。」 愚謂:言合葬非古,以以,以來有合葬之禮,解己所以夷墓之意,又言問 以 以來有合葬之禮,解己所以夷墓之意,又言問 以 以來有合葬之禮,解己所以夷墓之意,又言稱

未必然者。 成寢必在國中,而乃有杜氏之墓,亦事之

子上之母死而不喪,門人問諸子思曰:「昔 反,下放此。污,音鳥。」○今按:污,當音洿,烏瓜反 喪出母,自子思始也。《釋文》:「喪,如字,徐悉浪 不爲伋也妻者,是不爲白也母。」故孔氏之不 污,伋則安能! 爲伋也妻者,是爲白也 君子無所失道,道隆則從而隆,道污則從 者子之先君子喪出母乎?」曰:「然。」「子之 不使白也喪之,何也?」子思曰:「昔者吾先 如禮。 又云: 『出妻之子爲父後者,則爲出母無 後者不服耳。污猶殺也。 名白,其母出。 鄭氏曰:「子上,孔子曾孫,子思伋之子, 出母,自子思始,非之。」 喪服》「齊衰杖期」章:『出妻之子爲母。」 伋則安能,自予不能及。 孔氏 禮,爲出母期,父卒,爲父 有隆有殺,進退 孔氏曰: 母; 「案

母」,則 問 而從者 不能 服 服 猶 道 母之嫁者,其 上之母出 隨時隆、殺以合理者,惟聖人能之,而 妻當出則出之,是禮宜污而 親 服 以 讀爲洿,下也。 君子,謂孔子也。」 也。 。」是 有 其 ,不欲斥言,而但爲遜辭以答之,忠厚之 ,則使其子服之,是禮 ,故門人見其不服 也。 傳 義 可 絶 反 古 然其言「不爲 之服 也。 云 蓋伯魚之母出而在父室者也,子 有微 而 於其夫也 之義,出 前 已嫁者 子思既 無服 與 示其意者。 道之隆、污,謂禮之隆、殺。 尊 無 者 可知矣。 母 故故 而嫁 也 在,則子 仮也 愚 爲 ,疑而問之。子之先 嫁不從者之服,則 謂: 曰「不爲伋 《喪服》惟有 宜隆 則彼此 體, 蓋妻出 妻,則不 子思於門人之 污也。 隆,高也。 上爲 不 而 隆 敢 皆絶矣。 也 而未 爲 出母當 出 也。 服 妻」; 母 白 母 己則 其 污, 也 出 嫁 言 有 私

> 思始 母 記者不察其實,遂謂「孔氏不喪出母, 者,强奪之而使不服,豈 以 其 義 」,其亦誤矣。 不然,以天屬之恩,而 并 絶 於 其 子 也, 所 故 以處其子哉 於禮之宜 曰 示不 爲 白 爲 服 也

者。」《釋文》:『顙,素黨反。 孔子曰:「拜 而后 者,觸 也。 鄭氏曰:「拜而 是爲實,稽顙 可。」 孔氏 容,哀之至。 拜,此周之喪拜 頹 順順 拜, 是爲 頎,惻 也 地 **順乎其** 親 無 先拜 隱 而后稽顙,頹乎其順 痛 容 曰:「拜 (至也。 深 貌 爲己,先賓後己,頹然 也。 重者 也。 賓, 貌 也。 后 頹然,不 稽顙,此殷之喪拜 順 惻隱之至也。 頹,徒回反。 者,主 尚哀戚, 頎,至 先觸 三年之喪, 於 事 地 也。 人 逆之意 也。 無容,後 拜 頎,音懇。」 自 也。 稽 賓 先 吾從其 期 觸 知二 顙 而 也 如 乃 稽 地 而 順 也。 者 顙 拜 序 殷 后 拜 無

先拜者 容也。 拜,不 『殷朝 者。 蓋當 也。 是 拜者,以首 尚質故也。 自斬衰以 相 周人反哭而弔,殷 相 對 對。 周 殷、周之喪拜者 先拱 鄭、孔 禮 故故 時 ◎《周 ·期杖 士喪禮》、《雜記》每 而殯於祖 於禮 蓋拜所以禮賓,稽顙所以致哀。 故下《檀 也, 喪 知此 、兩手 下, 總麻以 拜 禮 加手 以下乃作殷之喪拜。」 則 以二者爲殷、周喪拜之異,非 周則杖期以 爲 有 亦 拜 至地,加首於手,又引首 順,而先稽顙者於情 此 放、周 一,周 大祝》「辨 而 弓 而 二法, · | | | | | 拜 已慤,吾從周。]又云: 以孔 后 朝 上,皆拜而 也。 稽 相 而 上,皆先稽 子所 顙 而 對 『殷 遂葬。』皆以殷、周 言「拜稽 稽 九 也。 孔子欲從其 非 顙 人 論 拜 專 者, 既 : 后 殷之喪拜, ,每以二代 爲 封 稽 殷 顙 觸 類 愚 爲 顙 ൬ 法 E 地 謂 而 至, 般 弔, 至 至 故 無 后 稽 明

爲,但 至重 凡 地 顙 尚右手。 爲之,而 范 或 奇拜,謂 者,亦如 後 則竦身 動,謂長跪 加首於手,首 地 睢 稽顙 育 以觸 肅 稽首皆 而 跪 一,頓首次之,空首爲輕。 拜 拜,或再 後以首 以 留 跪 地 而 稽首之爲。 尚 首 而 而 稽 稽首以首平至於地 一拜 再 也。 跪 請 引手而下之也。 右手者也。 而 吅 後 顙 拜 拜 教 不 起 加手,爲空首之拜 以 不 地 也。 而 若稽 稽顙皆 是 至 拜 致 而 也 後 各視其輕 手 也 其 地 不 拜 八日襃拜,謂 顙 但稽首尚左手,稽 者。 變 ,故曰空首。 稽 是 而 動 六日 Ŧi. 留 曰 後拜 也 拜,頓首、空首 蓋凡人有所敬 之意 日 也。 頓 重 吉拜 吉 首 稽首者,臣 凶拜,即 ,稽顙但 拜 則 而爲之。 **拜**,如 若 而 以稽 也。 先 如 再拜 日空首 四 稽 後 秦 以 首 引 稽 拜 頓 王 首之 七 顙 也 九 則 其 於 爲 觸 顙 顙 而

不墳

今丘

也

東

西南

北之人也,不可以

弗

識

也

。」於是封

之,崇

四

尺。

孔子先反,

門

孔

子

既得合葬

於防,曰:

一吾聞

之,古也

墓

而

卑者之 興 拜 拜 手 之,男子則 尚 於吉 輕。 非 寡 君 X 也。 左手, 之法。 日 吉 拜 常常 君 而 而郤 肅, 手 惟 又 事 事 禮 無 凡 拜,即 跪 則 皆 施 拜 所 也 至三 跪 與男子 拜皆跪,凡再拜者 故《左 於 尚 肅 則 稽首。」自 或 III 拜。 右手, 拜,凶 空首 喪 空首 肅 肅 F 年 拜 使者 傳 而 手 相 婦 以 自 学孟 已,不 也 拜 稽顙空首 若  $\Box$ 反 人 敵 区 期 則稽 故故 (有俠拜 耳。 肅 以 振 拜 武 以下皆吉拜耳 但 拜。 上 知 肅 動 爲 伯 婦 顙 肅 用 拜 則 但 重 皆 日 人之肅 無 爲重,手拜 頓 介胄 拜 吉 肅者 也 施於喪 : 跪 因事爲之, 首 惟 再 拜 非 而 ,尊者答 之 立 不 婦 拜 爲 天 士: 名肅 而 事 拜 子, 不 下 有 則 爲 婦 施

> 息暫反,又如字。 然 也 後 墳,扶云反。 ·? 流 雨 涕 甚, 曰 : 識 至, 防 吾 ,式志反,又如字。 泫,胡犬反。 墓崩。」孔 孔 聞 子 之, 問 涕,音 焉, 古不脩墓。」《釋文》: 子 不 應,應對之『應』。 體。」 日 應。 : 三, 爾 來 何 子 泫 遲

也。 築土 葬。 孔 之高 鄭 陳 蓋 謂 以 氏 子不應者,以其非禮也。 兆 氏 周之士制。 爵等爲丘 門人言所以遲者,防墓崩,脩之而 티 : 者曰 域,今之封塋也。 識 澔 日 記 曰 : 封。 「言既 墳。 也。 孔子父墓 封之度。』崇,高 封之,周 東西南 先反,當脩 得者 爲 墳 少少 所 北,言居 在 以 禮 古,謂 孤 防 爲 虞 不 也。 脩猶治 ,母卒,奉 記 事 也 知 殷 識,一 無 ^ 其 時 周 後, 常 高 墓 也。 也。 禮 處 四 待封 則 以 來。 **>** 也 恐 合 E 土

<sup>●「</sup>築」,據《禮記注疏》當作「聚」。

禮 記 集 解

之於始,以致違禮 培、示民有終也。」言此者、自傷其不能謹 意 也。」 人不 知 喪服 愚謂 而 誤 四 犯,一則恐己或忘其 制》曰:「苴衰不 古不脩 而 脩 墓,蓋 墓 也。 亦 喪 補 處 事 墳 即 而 墓 遠 難 不 > 尋

服反。」 遂命覆 既哭,進使者而問故。 孔子哭子路於中庭,有人弔者,而夫子拜之。 醢。《釋文》:「使,色吏反。 使者曰:「醢之矣!」 醢,音海。

也。 當如 故 鄭氏曰:「寢中庭也。 拜弔者,爲之主也。 孔子哭子路,與哭師同,或者哭弟子之禮 ,謂死之意狀。 醢 師,猶服 覆,棄之,不忍食。」 者, 愚謂:子路死於衛孔悝之難,事見 傷 之有 子路之死,而 醢之者,示欲啖 報乎? 使者,自衛 與哭師同,親之也。 王氏 不 陳 忍 安石 氏 來 食 食 澔 赴 其 티 : 曰 : 以 者。 似 怖

> 氏謂「與哭師同」。 姓之喪而哭之於寢者,其位皆如 友之間」,非也。 不於阼階下者,别於兄弟之喪 左傳》。 哭於中庭,於中 陸氏、吴氏謂 庭 南 也。 面 『哭以 此,故 而 凡 哭 於 也 師 異

曾子曰:「朋友之墓,有宿草而 不哭也。」 聞朋友之喪,或過朋 者,非謂 年,於朋友期可。」 鄭氏曰:「宿草,謂 立哭位以終期年,謂 陳根也。 孔氏 友之墓則哭,期外則 日: 「 不哭焉。」 於 爲 期而 師心 歲之内 喪三 猶 哭

並如字。 而 爲極,亡則弗之忘矣。 者,必誠必信,勿之有悔焉耳矣。 信,勿之有悔焉耳矣。 子思曰: 無 朝 極,徐紀力反。王以「極」字絶句,亡作「忘」,向下 「喪三日 之患。 故忌日不樂。」《釋文》:「極亡 而殯 凡 故君子有終身之憂, 三月而葬,凡 附於身者,必 喪三年以 附 於 誠 棺 必

按:「極」字句絶,亡當如字,屬下讀,孫氏得之。讀。孫依鄭作「亡」,而如王分句。樂,如字,又音洛。」〇今

之也。 以父母之遺體行殆 以爲極者,送死有已,復生有節也。亡,猶 微之失,將有悔之而無可悔者矣。 子之心之所能 信者,當於禮 其殯葬之事也。 患 器之屬。 鄭 亡,而子之心則不能忘也。 用舉吉事。」 愴怵惕,如將見之,故有終身之憂。 由 反而亡焉」之亡。 氏曰: ,毁不滅性。忌日,謂死日。 忘 言「三日」「三月」者,謂其時 親,故能 「附於身,謂 有終身之憂,念其親。 而 愚謂: 自盡者,惟在此時。 如 無所違。 誠者,盡其心 此 亡則弗之忘者,言親 ,故無一朝之患。 殯,謂 衣衾。 忌 蓋 日不樂,亦終身 斂尸 春霜秋 送死 附於棺 而 於棺 言忌日不 無一 大事 無所苟。 喪三年 苟有 足以 露, 謂 不敢 此皆 朝之 而 幾 治 悽 雖 涂 明

不忘親之一端也。

「鄒」。曼,音萬。」
「鄧」。曼,音萬。」,依注作「引」,羊刃反。 郰,側留反,又作「父,音甫。慎,依注作「引」,羊刃反。 郰,側留反,又作於郰曼父之母,然後得合葬於防。《釋文》:見之者,皆以爲葬也。 其慎也,蓋殯也。問孔子少孤,不知其墓,殯於五父之衢。人之

引,飾棺以輤,葬引,飾 慎 家,則見 子,顔氏 鄭氏曰:「孔子之父,與顔氏野合而 葬之地? 是時以殯引,不以 發問端 死於道路者,不得已之爲 人,人倫之至也,豈有終母之世,不尋求 孔子少孤,及顔 ,當爲『引』、《禮》家讀然,聲之誤也。 也。 者無 耻而不告,孔子亦爲 且 五父,衢名,蓋 母 由怪己。 死而 氏死,孔子成立久 葬 殯 引。」〇陳 殯於五父之衢,欲 於 棺 耳, 衢,必 以 郰 柳翣。 隱焉。 聖人禮法之 曼父之鄰。 無 氏 矣。 室 澔 孔子 生孔 殯於 廬 曰 聖 殯 而

宗主 必多有 得之? 其間 事 豈人情哉 野合與葬地,事不相涉,耻野合而諱葬地, 衢 夕不離殯宫,其慎之如此。 合者,謂 理之所必無者。 ,則與棄於道路何異? 不可據以爲實者多矣。」 ,而忍爲之乎? 在者, 既殯之後,孝子廬於中門之外,朝 不備禮 ! 孔子 即 顔 而婚耳,未足深耻也。 ,成立 氏不告, 豈不可 此經雜出諸子所記 時,當時送葬之人 此《記》所言,蓋 若殯於五父之 愚謂 訪問 而 且 野

鄰 相 有喪,春不相; 息亮反。」 里有殯,不巷歌。 釋文》:

説見《曲禮上》。

喪冠不緌。《釋文》: 鄭 下,而垂其餘以爲飾,謂之緌。 氏 曰: 去 飾 「矮,本又作「綏」,同耳 愚 謂 冠 喪冠不緌, 纓 佳反。」 結 於 頤

去

節也。

五服之冠悉然。《雜記》曰:「委

有虞氏 置翣。《釋文》:「即,本又作「堲」,同子栗反,又音稷。 武玄縞 瓦棺 而后蕤。」 ,夏后氏堲周,殷 則大祥冠乃有緌 人棺椁,周

人牆

何

云:『冶土爲甎,四周於棺。』 翣,所甲反。」

薪。 燒 鄭氏曰:「瓦棺,始不用薪也。 爲椁以替堲周,周 之外加堲周,殷則梓棺以替瓦棺,又以 之彌文。」❷ 言椁大於棺也。 也。《弟子職》曰:『右手折堲。』椁,大也。 扇,是後王之制以 以薪,葬之中野,有虞氏造瓦棺,始 土冶以周 然虞氏瓦棺,則未有椁也。 於棺也。 孔 氏曰:「古之葬者,厚衣 牆,柳也。● 凡此言後 漸加文也。 人 更於椁 或 謂之土周,由 傍 ^ 火熟 置 喪大記》注 夏后 柳、 曰 瓦 不 置 堲, 木 Ż Ŧ 是 翠 棺 用

彌」,據《禮記注疏》當作「制」。 柳 下, 據《禮 記注疏》當有「衣」字。

聚,諸飾之所聚』也。 則是以惟荒之内 木材等總名爲柳,故《縫人》注云『柳之言 云『在旁日 [帷,在 木材 上曰荒 是帷荒總名爲柳。」 爲 ,帷荒所 柳。 其實帷 以 衣 荒 柳 及

愚

謂

棺外之材,蓋以

柳木爲之,故

謂

笄而不爲殤。」

之心,而非徒爲觀美而已。 常,爲之牆、翣,而使人勿惡,凡以盡人子略,至後世而漸備,爲之棺椁,而無使土親略,至後世而漸備,爲之棺椁,而無使土親

之殤,生未三月不爲殤。」十二至十五爲中殤,八歲至十一爲下殤,七歲已下爲無服十二至十五爲中殤,仢丈反,下式羊反。十六至十九爲長殤,葬中殤、下殤,以有虞氏之瓦棺葬無服之殤。葬中殤、下殤,以有虞氏之瓦棺葬無服之殤。

后氏之堲周葬中殤、下殤,謂内有瓦棺,而鄭氏曰:「略未成人。」 愚謂:周人以夏

之殤 則周以 外又有堲周 喪服小記》曰:「男子冠而不爲殤,女子 列則但 前殤與成 用瓦 也。 棺 以有虞 人,其葬蓋未甚别與? 而 己。 氏之瓦 周 人葬殤 棺葬無 如 此 服

用白。 牲用 反。 玄。殷人尚白,大事斂用日中,戎事 營反,徐呼營反。」 夏后氏尚黑,大事斂用昏,戎事乘驪,牲 騂。 翰,字又作『韓』,胡旦反,又音寒。 周人尚赤,大事斂用日 《釋文》:「斂,力驗反。 驪,力知反,徐 出,戎事 騵,音原。 乘 翰,牲 乘 騂,悉 郎 騵 用

色黑。 戎,兵也 鄭氏曰:「夏后氏以 正,物牙色白 昏時 馬 亦 黑 黑。 色 日 日 中 驪。 建寅之月爲正,物 此大事, 時 亦白。 殷以 建丑之月爲 謂 翰,馬白色 喪 事 也 生

●「兮」,原作「志」,今據《釋文》改

· 有

所乘固 白腹。 后 襲禮也。 不同者,蓋欲各爲一代之制,以示其不相 也 氏駱 正 一物萌 《易》曰 騂,赤類。」 馬 有 此於所乘特言「戎事」,則非 黑鬣,殷人白馬黑首,周人黄馬 不盡然者矣。 色赤。 百白 馬 日 翰如。』周以建子之月 愚謂:三代所尚之色 出 時 《明堂位》曰: 亦赤。 騵,駵 戎事 「夏 馬

蕃鬣。」

蕭。」○鄭注「幕,或爲「幦」。」 離公之母卒,使人問於曾子曰:「如之何?」 灣衰」之字,後皆放此。館,本又作「飦」,之然反。粥,之 也,終幕,魯也。」」《釋文》:「齊,音咨,本亦作「齎」, 也,終幕,魯也。」」《釋文》:「齊,音咨,本亦作「齎」, 也,終幕,魯也。」」《釋文》:「齊,音咨,本亦作「齎」, 都公之母卒,使人問於曾子曰:「如之何?」

參之子,名申。子喪父母,尊卑同。幕,所鄭氏曰:「穆公,魯哀公之曾孫。曾子,曾

魯是天子之禮,以綃爲幕。 以覆棺 禮 **;** 上之幕矣。 謂:凡殯皆帷之,有在旁之帷,則當 幕,祇謂襯棺幕,在畢塗之内者也。」 在上曰幕,皆以 人》『掌帷、幕、帟、綬』,注云:『在旁曰帷 以覆棺椁也。 加椁以覆棺,已乃屋其上盡塗之。」是繡幕 云『加斧於椁上』,鄭云:『以刺繡於縿幕, 希曰粥,朝夕食米一溢,孝子以此爲食,故 父,父母情同,故云『齊斬之情』。 然,故曰『哭泣之哀』。齊是爲母,斬 曰『自天子達』。 曰『饘粥之食』。父母之喪,貴賤不殊,故 孔氏曰:「有聲之哭,無聲之泣,並 魯,天子禮。 上也。 注以爲覆棺之幕,非是。 終,縑 衛是諸侯之禮,以布 幕者,謂覆棺者也。 布爲之。」今謂 兩言之者, 僭已久矣。」 也 讀 如 案《周禮 綃 天子 厚日 衛, 1為幕; 用 下文 下文 一爲哀 有 饘 愚

禮》所 言加 以見禮文之小, 以 夫上之所言,乃其大體之必不可得 終爲幕,蓋當時禮俗之不同。 謂『夷衾』,非幕 斧 於椁上」, 國俗 蓋 或有少異,正以深 即《 也。 喪 衛以 大記》、《 布爲幕,魯 言此者, 士 而 明 孿 喪

音亦同。」 文》:「重,直龍 天下豈有無父之國哉! 行乎?」世子曰:「不可。 君安驪姬,是我傷公之心也。」曰:「然則蓋 晉獻公將殺其世子申生,公子重耳謂之曰: 「孋」,同力知反。 「子蓋言子之志於公乎?」世子曰 反。 弑,本又作『煞』,音試,徐云『字又作嗣』, 蓋,依注音盍。 吾何行如之?」《釋 君謂 驪,本又作「麗」,亦作 我欲弑君也 :「不可

言見譖之意。 當爲『盍』,何 (曰:「欲殺申生,信驪姬之譖。 不也 重耳, 申 志,意也 生異母 弟,後立 重 耳 蓋 欲 一。皆 爲 使

文公。 心。」 《左傳》云:『或謂大子曰:「子辭,君必辨 斃。 公。 誅。 也。 臨 酒經宿輙敗,何以經六日其酒尚好? 焉。」』杜預云:『以六日之狀自理。』謂 申生之事 祭之地,地墳,與犬,犬斃,與小臣,小臣亦 姜,必速祭之!」大子祭於曲沃,歸胙 四年《左傳》云:『姬謂 父,則皆惡欲 之母蚤卒,驪姬嬖焉。 云:『姬真鴆 至加 公獵,姬寘諸宫六日 姬死之後,公無與共樂,故云『傷公之 姬泣曰:「賊由大子。」」又《晉 驪姬,晉獻公伐驪戎所獲女也。 傷公之心者,言其意 毒 愚謂: 也。 也。 於酒、寘堇於肉。」是驪 弑 大子謂我若自理,驪 重耳欲使言見譖之意者, 父者。」 何行如之者,言負弑君之 何行如之,言人 大子曰:「君 毒 孔 氏 則驪 而獻之。 7日:「 姬 夢 案僖 姬 必 姬 申 語 有 於 誅 必 明 毒 齊 牛

拜稽首乃卒。是以爲共世子也。《釋文》:「少,君。伯氏苟出而圖吾君,申生受賜而死。」再吾君老矣,子少,國家多難,伯氏不出而圖吾言也,以至于死。申生不敢愛其死。雖然,使人辭於狐突曰:「申生有罪,不念伯氏之名,無以自立於天下也。

告狐 奚齊。 犯之父也。 鄭氏曰:「辭猶告也。 陷親於不義,而申生不能自理,陷親有殺 孝則未之有。」 謝之也。 落氏,狐突謂申生,欲使之行。 自臯落氏反後,狐 晉侯殺其世子申生」,父不義也。 突,乃雉經。 圖 伯氏,狐突别氏。子,驪姬之子 謀也。 前此者,獻公使申生伐東山 孔 言行如此, 突懼 不出 氏 狐突,申生之傅, 曰 : 乃 爲君謀國家之政, 稱疾。 「案《春秋》云 可以爲恭,於 今言此者 申生既 孝子不 舅 泉

> 法 》: 資仁厚而見理不明 受大惡之名,而晉國大亂 白,以姑息愛其親 所全者大矣。 感悟,則君全骨肉之恩,國泯争亂之禍,其 苟能入見獻公,自白見譖之狀,萬一 安宗社爲大,而 人之所難能 知父命之宜從,而不知其身之可愛,可謂 孝,但謚 子之惡,雖心存孝,而 『敬順 爲 事上 矣。 恭 乃以恐傷公之心而不敢 不以阿意曲從爲孝。 以 然爲人子者,以全君親、 日 而昧於大義,卒使獻 恭。」 其 也 順 於理 父 數世、蓋由其天 愚謂: 事 終 二非,故 而 르 申 獻 申 不 生 自 生 旧 謚 日 公

詩召反。

難,乃旦反。共,音恭,本亦作『恭』。」

每人有朝祥而莫歌者,子路笑之。孔子曰: 每人有朝祥而莫歌者,子路笑之。 孔子曰: 「又多乎哉! 」 一年之喪,亦已知, 不或作, 是此。」《釋文》:「莫, 音暮。已夫, 音扶, 绝知, 不或作, 已矣夫」。」

言以 也 除 者,下注云:"琴以手,歌以氣。]手在外 制》: 歌哭 彼。」 爲 能 夫子欲寬其責者,乃所以深慨夫時人之不 杖,故其祭謂之大祥。 再 遠,氣在内而 鄭 可歌也。 爲 期 要經,故其祭謂之小祥,再期 時 氏 い明之。 不同 又恐門人不喻其意,故於子路出 而殷祭之名也。祥,吉也。 如 日 『祥之日,鼓素琴。』不譏彈琴而 年 孔 此 故魯人朝祥莫歌,而子路笑之。 「子路笑之,笑其爲樂 氏曰: 喪 ,人行三年喪者希, 日 耳,非以 「, 故 近也。」 仲 「祥,謂二十 由笑之。 魯 祥之日,鼓素琴,未 愚 人爲得 謂: 五月 抑子路 案《喪 大祥者, 禮 喪 速。 而除 而許 期 服 大祥 而 以 孔 īE. 衰 而 喪 而 歌 子 JU 善

右。馬驚敗績,公隊,佐車授綏,公曰:「末魯莊公及宋人戰于乘丘,縣賁父御,卜國爲

内皆同。 無『驚』字。 有誄,自此始也。 績,是無勇也。」遂死之。 之卜也。」縣實父曰:「他 在白肉。 賁,音奔。父,音甫,人名字皆同。 隊,直類反。 公曰:「非其罪 《釋文》:「乘,繩證反。縣,音玄,卷 綏,息隹反。 也。」遂誄之。 幸 日不敗績,而 人浴馬,有 誄,力軌 馬驚敗,一 反。 今敗 流 本

益。 馬,非 鄭氏 夏六月:『敗宋師于乘丘。』《周禮》戎 者爲之。 之政,則 倅車之政,道僕掌貳車之政,田 養馬者。 馬未嘗驚奔。 車之貳日 相 對 御與右之罪,遂誄 孔氏 爲 戎 「縣、卜,皆氏也。 白肉,股裏肉也。公言流 佐。 馬驚奔失列,佐車授綏乘公。 車 異,散言 曰:「乘丘 ·之貳 二人遂赴敵而死 縣實父言,公他日 日 則 倅。 同 魯 其 稱 此 、赴敵之 地 佐 凡車右,勇 云 車 一僕掌: 佐 莊 也 1戰,其 幸 功 公 矢 佐 僕 + 以 周 年 中 車 戎 力

八八

申

而

敵之功 當舉其名,不當稱其姓也。 父,士也,不當有謚,莊公以其 之。公言此者,蓋欲 子 雖 死者但賁父耳,注乃言二人俱死,豈以御、 父耻其無 御,宛射犬吉」,是也。時公子偃自雩門竊 必卜之。《左傳》「晉卜右,慶鄭吉」,「鄭 謂:末之卜,言未嘗 大夫之喪,賜謚 右同乘,則當同 出,公遂從之,故於御、右不及卜而 士之有謚自此 注疏以末之卜爲責卜國,非也。 無 日 謚 : 以 而 誄者,哀死 爲謚 特爲之誄,故 勇,遂赴 讀誄 死 始」,不當言「士之有誄 與? 亦 敵 愐 1 非 」,則誄爲謚 而 以寬二人之責,而 述其 也。 也。 《周禮 死。 士之有誄 行之辭。」 又謂 據《記》文,則 凡戰,於御、 果爾 • 小史》「卿 捐 而設。 驅赴 自 「誄 則 果爾 此 當 其 遽 敵, 始。 賁 則 自 赴 賁 用 1 右 愚

> 反。 哉 ? 音極。」○鄭注:「睆,或爲『刮』。」 反席 愛人也以德,細人之愛人也以 之。」曾子曰:「爾之愛我 未之能易也,元起易簣。」曾元曰:「夫子之 **簣與?」曾子曰:「然。斯季孫之賜** 聞之,瞿然曰:「呼!」曰:「華 曾子寢疾,病,樂正子春坐於牀下,曾元、曾 云:『睆,漆也。』徐又音刮。 病革矣,不 坐於足,童子隅 睆,大夫之簣與?」子春 呼,❶音虚,吹氣聲也,一音況于反。 未安 吾得正 一而 可 没。 而斃焉,斯已矣。」舉扶 以 《釋 變。 坐 文 》: 簣,音責。 而 幸 執 「脘,華板 而 也 燭。 不 至 與,音餘。 が姑息。 於 如 而 童子 革,紀力反,徐又 正 反,明 彼。 旦 睆,大夫之 · 日: □ 而易之, 貌。 吾何求 請 君子 也。 瞿, 一曾子 敬 紀具 孫 之 易 我 華 炎

曰:「病, 疾 子春,曾參弟

鄭氏

謂

困

也。

呼」、《釋文》作「吁」。

此始」也

平瑩。」 安也。 言曾 也。 子。 澔 病 爲 H 子春止之,而童子又言者,以其言未達於 嘗爲大夫,則不當 之簣,言此簣華美,乃大夫之所用,曾子未 之簣連著於桄、故并桄亦謂之簣也。 席之屬。 「《爾雅 困 刮 以 曰:「華者,采飾之美好。 睆者,節目之 也。 元、申,曾參之子。 取 子 節 華、畫也。 不 病故也。革,急也。 安 病 釋器》云:『簣謂之第。』」 姑息,言苟容取安也。 目,字或爲『刮』。 可 然簣之爲第、見於《爾雅》,疑 也 以 愚謂:張子謂簣 雖 動 德,謂成己之德。 困 也。 一,猶 簣,謂牀 程子曰:「曾子易簣, 呼,虚憊之聲。 寢之,言此以 勤 於禮。」 隅坐,不與成 第也。 子春曰『止』, 在 變,動也。 E. 姑息,言苟 顯露,必簟 説者 斃,仆 孔氏 諷之也。 未之能 大夫 息猶 人並 陳氏 日 以 也。 要 牀 脘 以

> 正耳。 此。 理。 是緊要處。」 法,不以死生之變易其所守,便使人有行 此是切要處,只在毫釐頃刻之間。」又曰: 言,而必舉扶以易之,則非 爲非禮。 須如此乃安。 易簀結纓,未須論優劣,但看古人謹於禮 不義、殺一不辜而得天下不爲之心。 實見 但及其疾病不可以變之時,一聞人 朱子曰:「季孫之賜,曾子之受, 或者因 得是,實見得 人不能如此者,只爲不見實 仍習俗,嘗有其事,未能 非,必不肯安 大賢不能矣。 於 此

得。 祥 始死,充充如有窮。 而廓然。《釋文》: 心形 鄭氏曰:「皆憂悼在心之貌。」 事 既葬,皇皇如 · 盡理 充屈 屈 爲 如急行 窮。 有 「慨,苦愛反。廓,苦郭反。」 親 道 既殯,瞿瞿 望 始死,孝子 極,無所復 而 弗 至。 如有 孔氏 匍匐 練 去,窮急之 而 求 而哭, 慨 曰 : 而弗

九

0

之貌 至 子 又 容 漸 也 栖 也 栖 緩 如 至小 皇皇 殯 有 皇皇 後 所 祥, 無 失 心 但 所 猶 形 而 慨 稍 依 栖 求 歎 託 栖 覓 緩 日 之不 也 如望彼 月若馳之速 瞿 親 得 瞿 歸 然 人來 眼 草 目 土 既 而 速 葬 至 孝 不 膽

形。 朱。 之髽 邾 公羊 婁復之以 大 髽 婁,力 傳 祥 而 一,側 》與 帯也 而 瓜 俱 此 反。 寥 反, 《記》同、《左氏》、《穀梁 了,自敗 矢 廓 或 臺,音胡。 蓋 情 如 字。 自 於臺鮐始 意 戰 不 邾 鮐,音台。」 人呼 樂 於 升 而 邾 也。 陘始 己。 聲 》但 日 《釋文》:「邾,音 作 也 婁, 邾」。 故 魯 H 婦 邾 婁。 人

字之誤 敗 時 鄭  $\Box$ 有 喪 於 師 氏 臺 雖 日 必用矢者 也 駘 勝 而 戰 相 魯 死 ^ 於升陘,魯僖二十二 弔 春 襄 傷 秋 四 亦 時邾人志在勝敵 傳》作 去繩 年 甚 秋 而 也 無 紒 衣 狐 臺 曰 可 駘。 髽 當 以 0 矢是 招 爲『 年 時 魂 秋 家 壺 孔 也 也 心 家 氏

復,而 也。 用之。 禮 若身 之所 常 婦 則 家者 蓋 X 則 由 車之左轂,以其綏復。」復 記》曰:「大夫、士行 大 亦如 用 人 唯 事 × 兵 亦 首 影 齊 纙 矢 好 小 故 而 雖 矢乃軍中之所用,故推 此。 鄭 斬 斂之後,五服 而 不 然 招 而 廣 死 去之,但 無 故 殊, 其後邾人之復皆以 氏 婦 終 矣。 魂 相 喪者 身 用 時邾 人 幅 弔 曰:「婦人弔服,大夫之妻錫 因 首 所 有之。 髽者, 長 去 亦 傷 露 好 而 斷 師 六尺], 纚 然矣。 致 以 紒 其 死 絶 而 死,復有 婦 而 招 時 去 後 傷者多,不能皆 而 不 紒 死於道 己。 人皆髽。 魂 魯 韜髮之孋 遂 生 所以 此記 於 日 人家家 以 者 冀 髽。 軍 矢,蓋 可 此 用 韜 其 中 應 愚謂: 生之理者 或 爲 綏 則升 髮。 復 案《士 者, 既 無 有 「變禮 之 弔 而 雖 反 成 復 喪 禮 露 其 今以 死 義 以 其 ~ 故 服 冠 之 之 髻 於 禮 乘 雜 而 綏

謂: 總。」疏云:「吉笄無首素總」、《大戴禮》文。 相弔,服錫衰。 衰,士之妻其 命婦弔於大夫 《喪服》 傳曰 亦髽錫衰。」是大夫、命婦自 疑 其弔於士,亦疑衰耳。 : 衰 「大夫 與? **平於命婦錫** 皆吉笄無首 衰, 素 愚

笄。 寸,惡笄或用櫛,或用 總八寸。」 扈扈,謂 字子容。 鄭氏曰:「南宮縚,孟僖子之子南宮閱 故夫子 斬衰總六寸。』南宫縚之妻,爲姑總 大廣。 其妻孔子兄女。 稱『蓋』以 孔 氏曰:「束髮 總,束髮垂 疑 榛,故《喪 之。 從從, 爲 垂餘之 飾 賈 服》 謂大 氏 齊衰之 總 有 公彦 也, 高 八 櫛

> 傳》並 閱 節 孔子,然《家語・弟子解》、《史記・弟子列 必無相爲夫婦之理。 稍長於孔子。而仲孫閱生於昭公十一年, 年,孔子之兄,孔子未生時已卒,則其女必 子之子仲孫閱。 貜生南宫縚」,故鄭注以此 則大功以下不容更差降,故 笄長尺。 小功總麻同一尺,吉總當尺二寸,斬 八寸,以下雖無文,大功當與齊衰同八寸, 至其可昏之年, 家語 也。 ,皆一尺而已。」 愚謂:《世本》「仲孫 無何忌,不應獨 南宫縚之妻,爲 史記》 孔子兄女蓋 厠諸 然孔 載閱 閱與其兄 子生於襄 弟子之列者,必非 姑榛笄亦一尺, 南宫縚即 年 是孔子所妻, 五. 逾四十矣, 服略爲一 何忌同 公二十二 衰箭 孟 事 僖

「縚」、《釋文》作「韜」。

九二

比,必利反。」 日 孟 獻 子禫, 獻子 加於人一等矣。」《釋文》:「禮,大感反。 縣 而 不 樂, 比 御 ൬ 不 人。 夫子

平安意 鄭氏 常,而特異餘人,故夫子善之。其祥、禫之 **禫後吉祭乃復寢也。時人禫後即作樂,未** 自 禮》注曰:『禫,祭名也,與大祥間一月。 孔子云『踰月則善』,是皆祥之後作樂也。 是月禫,徙月樂」,又『魯人朝祥而莫歌』, 月爲禫,二十六月作樂。 月,先儒 恒 至吉祭 而 御 作,比 不 喪至此,凡二十七月。 婦人矣,尚不復寢。 日 恒作,至二十八月乃作樂。 而 也。」 :「孟獻 可 不 復寢。 以御 同 婦婦 孔氏 子,魯大夫仲孫 王肅以二十五月大祥,其 獻子既潭 人而不入寝,雖於禮 日 : 加,踰 以下云『祥而縞, **禫之言澹澹** 「禫祭暫縣 暫縣 也。 必省樂而 蔑。 又依禮, 又《士虞 省樂 可 然, 是 以 不

歌」,及《喪服四制》云『祥之日,鼓素琴』, 幣、《公羊》猶譏其喪娶。其『魯人朝祥 **禫謂是禫月而禫,二者各自爲義。** 縞,是月禫,徙月樂』,謂大祥者縞冠,是月 故以『中月而禫』爲間隔一月。下云『祥而 於妾祖姑,亡則中一以上而祔」,又《學記 年之喪祥、禫同月?《喪服小記》云『妾祔 五月禫。』爲母爲妻,尚祥、禫異月,豈容三 記》云:『父在,爲母 禫除喪畢。鄭以爲二十七月禫者,以《雜 云:『納幣,禮也。』故王肅以爲二十五月 幣」,僖公之喪,至此二十六月,《左氏》 間同。又文公二年冬,『公子遂 中,與《尚書》『文王中身享國』,謂身之中 畢」,又《士虞禮》『中月而禫』,是 又《三年問》云『三年之喪,二 云『中年考校』,皆以中爲間,謂間隔 爲妻十三月大祥,十 + 如 祥月 五. 文公納 年, 齊 月 納 之 而

吉祭? 祥,二十七月而禫』,故鄭依而用焉。」 先遠日」,則大祥當在下旬,禪祭又在 五月而 非正樂 據 莫歌,孔子謂「踰月則善」,而孔子既祥,十 謂:祥禫之月,鄭、王二説各有據依 後,何得云『中 盡 有 儒多是王氏,朱子亦以爲然。 二十八月。 歌」,并此 及『夫子五日 而 日 更延 喪 禫 祥、禫之不得同月亦 而 事先遠日 者,正以大祥 成笙歌,祥後 也。 畢。』據喪事終,除衰去杖,餘哀未 兩月,非喪之正也。 戴德《喪服變除禮》『二十五月大 獻 《三年問》:『三年之喪,二十 其八音之樂,工人所奏,必待 子 ,謂祥在下旬者,確不可易, 彈 月 禫縣之屬,皆據 琴 即 雖除衰杖,而餘哀未忘, 十日已 禫」? 而 不 可見矣。 成聲, 」爲踰 又禫後 《曲禮》『喪事 然魯人朝祥 月, 省樂忘哀, + 祥後所以 H 何 則孔氏 而 成 以 先 愚 容 祥 笙

> 者,又何疑於三年之禫哉 未忍 月,此正準三年祥、禫相去之月數 十三月而祥,十五月而禫。」祥、 而 可延,而一月之間 在一月,則祥後禫前不過 變除之漸而制禮之意也。若祥、禫吉祭同 之哀,以再 無節矣。 日 即 期爲 「父在,爲母爲妻十一月而 吉,故 正服,而 ,頻行變除,亦覺其急 再 延 以 餘 數日, 服,以 月爲餘哀, 禫相 初無 伸 而 其 制之 去二 哀 未 據 之 此

笙歌。 孔子既祥,五日彈琴而不成聲,十日而成

鄭氏 外 遠不吉則用近日。 月且異 祥是凶 世 以其未踰月 曰:「不成聲,哀未忘也。 旬 琴 事 也。 以 用遠 手,笙 五日彈琴,十日 日,故 也 雖祥後十日 歌 十日得踰 以 氣。」 笙歌, 十日 ,未得成笙 月,若其 孔氏 除 日 則 由

有子蓋既祥而絲屨、組纓。《釋文》:「屨,音句

組,音祖。」

子 鄭氏 葛』,無云『絲屨』者。 審 絢、繶、純 굸 有若。 ,故云『蓋』。 《變除禮》文。 「譏其早 之屬,有子蓋 孔 案《士冠禮》『冬皮屨,夏 縞 氏 (日: 日: 冠、 也。 素紕。 此云『絲屨』,以 既祥, 蓋 亦白 是 疑辭,傳 有子, [ 屨 以 履 無 素 孔 約,疏 絲 聞 絲 子 爲 爲 用 未

「玄冠綦 **繶**、 組,今用素 純 也。 組 組 纓。」知 縞冠 爲 纓,故譏之。 素 此 紕,當用 非 綦組 素爲 纓者 《玉藻》云 纓,未 ,若用綦 用

失禮之甚,不應直譏組纓也。」

組爲纓,則當以

玄色爲冠。

若既

祥玄冠

死而不弔者三:畏、厭、溺。《釋文》:「厭,于甲

溺

,奴狄反。」

有以説之死之者。孔子畏於匡。厭,行止鄭氏曰:「畏,謂人或時以非罪攻己,不能

所以守其身者可知矣。 謂 以 危 死,皆非正命,故 之,君子之於 而恐懼自 其輕身忘孝也 111 險 游 之下 而 裁者。 死 者。 溺 所 謂 弔 不弔。 厭, 琴張 不 不敢 謂 乘 愚 欲 覆厭 橋 觀 苟 謂 弔 船。 於此,則君子之 如 宗魯 畏, 而 此。 死 謂 7,孔子 者。 者不 三者之 被 迫脅 溺 止

子路 字,徐治慮反。」 弗忍也。」子路聞之,遂除之。 弗忍也。」孔子曰:「先王制禮,行道之人皆 子曰:「何弗除 有姊之喪,可 也?」子路曰:「吾寡 以除之矣, 《釋文》: 而 弗 除 兄弟 也。 「弗除,如 孔 而

申服 鄭氏 故於降制已遠, 得反服,推己寡兄弟,亦有申 庾蔚云: 『子路 日:二 過 期 也。」 行道, 而 緣姑、姊 謂 猶 愚謂 行 不除 義。」 非 ^ 妹 喪 無 其 在室之姊,欲 服》爲姑、姊 本服 主 孔 後 氏 之理, 猶 日 口

適人者 禮 其 本服 弟之爲父後者期 子路以己既寡兄弟,而女子子適人者爲 妹 前 、親之意,然而不得不除者,則以先王 在 也。 · 室 不敢過焉耳。 一期,適 孔子言服行道 미 以 人則大 除之,謂既踰大功之限也 ,故欲緣報服之義,伸 然《論語》稱子路爲 功。 義之人,皆有不忍 子路之姊,蓋 昆 己 制 其 季

路

則非

無兄弟,或雖有兄而早卒與?

周 義 於齊,齊日 鄭氏曰:「齊大公受封,留爲大師,死葬於 ,子孫生焉,不忍離也。五世之後,乃 仁,恩 也。 一營丘。 孔 君子言反 氏曰:「案 葬 Ŧi. 似 世 禮 樂 反 葬 之

夏》也。 反葬 所自 爲君 死,獻公山立,山死,弟武公壽立。 哀公是大公玄孫,哀公死,弟胡公靖立,靖 紀侯譖之周,周夷王烹哀公,亦葬周 生哀公不臣。』案《齊世家》,哀公荒 公之外爲五世。 者,五世之外則親 而 韶》,禹愛樂其治水廣大中國,樂名《大 自生,若舜愛樂 生爲五世,則武公以上皆反葬於周,若以 公伋,伋生乙公得,得生痼 又引古之人遺言云: 王業本由質 興,則 於周 生者,謂先 五世,則獻 禮,不忘其本者 制禮尚文也。 亦 而 是 興,則制禮尚質。 重本, 公以上反葬周。樂,樂其 案《世本》: 『大公望 其 王制樂,愛樂己之王業 盡 能 也。觀 紹 狐 禮樂皆是重本,今 故 堯之德,樂名《大 謂 引禮 死 公慈母, 經及注, 先 Œ 樂以 王 其首 王業由 制 若以 美之。 沼兴被 禮 而 慈 生 則 其 也。 所 繒 文 相 大

九六

1

禮記集解

之則 使齊之 於其 千餘 爾。 以 月之制,速反而虞,於生者爲不孝。 寒暑,自東徂西,以葬於封守之外,於死 使其有之,亦古人因 恩之心也。」 丘 Fr. 而 爲不仁。 『比及五世,皆反葬於周』。夫齊之去周二 齊,復入爲太師,薨而葬於周,事未可 」。 丘 衰 周之境 可 ,是有仁恩之心。 《記》以首丘喻之,亦已謬矣。 里, 不 經 寢,故曰『葬日 恭 孤 是 禹 見 古之葬者祖於庭,堋於墓,反哭 而 狐 葬會稽,其後王不從,而 ,勞民傷 則 而不見天子則不度,離 重趼送葬,曠月 使其已化之骨,跋 窟 不祥,若其 顧氏炎武曰:「太公就封於 穴根 財則不惠。 虞, 本 今五 薨 之處, 孤 弗忍 而 葬,不 淹時 世 不 行, 反 履 此數 死 葬 Ш 日 而 不 時 擇地之常 其 111 離 殺之南 者 獲 亦 猶 使 喪 觸 也也 且 遵五 乃云 卿 有 嚮 無 次 知, 者 攝 而 也 冒 此

之冢, 人於廟 本,實 千里 愚謂 也。 哉 陵, 記 在 亦必其死於周耳。 焉 因葬焉者也。哀公則被烹死於周,而 皆即其所國而葬,不必皆從其祖宗也。 太師,丁公爲虎賁氏,蓋仕於王 王葬豐、武王 周禮》雖 w 田 臨淄 者 有 而 也。 然則太公無五世反葬之事明 附 體魄 和 夏 而誤以爲尚與? Ŧi. 城 以 而 亦謚 會之説 后 皋之墓, 豈古 世,蓋 柩往 南 有 乙公、痼 不 則 十里」,與《記》所言不合,《史 族葬之法,然古之天子、諸 於墓,聖人所 一葬鎬 降,知氣 太公,豈《皇覽》所言者乃 葬者? 謂 爾。 太公至其玄孫 亦 若死 公無 又案《 在上,故古之事 謂 可 於其國 見矣。 可 人不 五世反葬爲不 考, 以 皇覽》「吕 知 達 使果葬 朝 ,豈有越 幽 太公爲 禮樂 哀 而死,而 矣。」 明之故 公也 之義 其 尚 因 周, 忘 數 文 周 侯

與哭 其 伯 甚 魚 者?」門 之母 也。」伯魚聞之,遂除之。《釋文》: 死 人曰:「 期 而 猶 哭。 鯉 也。」夫子 夫子聞之日 i E 「期,音 「誰

與,音餘。

嘻,許其反,又於其反。」

禫。 也。 皆 爲 魚在 爲 母 猶哭,則是祥後禫前。 聲者,謂 也 鄭 有 練、祥、禫之祭,亦 出 示 母 無 氏 思 在 出 <u>+</u> 禫 母亦 憶 此 ·曰:「伯魚,孔子子也,名鯉。 猶,尚 外哭,故夫子怪其 嘻,悲恨之聲。」 孔氏 時  $\exists$ 母 之哭,故夫子怪之。 期後全不合哭。」 非 月而 伯 家,直於 雖 應十三月祥,十五月禫。 責 魚 服 伯 服 杖 練,十三月而祥,十五 魚也。 期,而虞、祔、 已 十三月 無 除 所 祥外 時伯 甚 但以 謂 也。 而除之,無所謂 練、祥、禫之 魚母 除之者,謂 哀 無哭,於時 愚謂 曰:「悲恨之 或曰: 尚 練、祥之祭 出 未忘, 言期 一、父在 父在 一月而 爲 服 伯 不 猶 出 而

> 魚之母 疏 者,父在,爲母 之。 怪 復 則祥後禫 者非。今按:祥而 突耳 説 其 未可 此自父在 服 ·, 非 死 非 前 期 應聞其 除 也 内 服 而猶 ?應猶哭,夫子何以怪其甚? 爲 十三月而祥,十五 也。 母 哭方怪之也。 外無哭者,禫 之制當然,疏 哭,夫子以爲 若服 猶 未 除, 以爲 〇或 而 甚, 月而禫, 夫 内 謂 子 遂 無哭 出 除 應 伯

曰:「周公蓋袝。」《釋文》:「袝,音父。」 引 鄭 愚 梧,於周 妃癸比,生二女:霄明、燭光。』是也。」 『長妃娥皇,無子。 氏曰: 謂 季武子之言以明合葬之所自始也。 :記者引舜事 孔 南 「舜征有 氏 越之地,今爲郡。 曰:「三妃、《帝王 苗 次妃女英,生商均。 以證古無合葬之禮 一而死, 因 留 世 袝, 了葬焉。 紀》云: 謂 又 次 蒼

季武子

舜葬於蒼梧之野,蓋三妃未之從也。

禮 記 集 解

九

八

雜、恐難盡 朱子曰:「孟子所言,必有依據,二書駁 或 不反」、《禮記》有一 問 舜 卒 -於鳴 信。 條 然無他考驗, 「葬於蒼梧」之説 而《竹書紀年》有「南 則亦論 何 而 彻 闕 Wir

之可

也

曾子之喪,浴於爨室。《釋文》:「爨,七亂反。」 以 也。」 也。 乃 簣 以 聞 而 知意有所爲,故知因曾元之辭易簣 禮之人 鄭氏曰:「見曾元之辭易簣,矯之以 浴馬 斂且殯焉,既違喪事即遠之義,又將使 移 禮,豈有使之以非禮治其 有改焉者也。 」章觀之,則曾子之卒,在於正 禮 尸 ,應須 愚謂 ,浴於適 而 此 浴於爨室,又移尸 上下之達,即 浴於正寢,今乃浴於爨室,明 凡死皆於適室,因 室。」 曾子欲教其子,正當示之 孔氏 不知禮者, 喪耶 而反 曰:「曾子 即 ? 於正 寢 其 而矯之 以「易 明 謙 亦 中 寢, 矣。 不 富 達 儉

> 所必 新死 之所言也 間,無不精究而明辨之,恐亦不 然以《曾子問》一篇觀之,其於禮文曲折之 決不可信。 斂之奠在 弔,是也。言禮之失者二: 記曾子行禮之失者二:浴於爨室,襲裘 方,乃《禮》文之小失,固無害於曾子之賢。 而行禮,則尸與主人皆在 襚,就爨室而 子之所忍出 不 者 内外 可者,此所記 西方,是也。 遷 若襲裘而 也。 行禮 徙, 若時 ,則褻 杌 必 隉 弔,與小斂之奠在西 有君命之弔,賓客之 傳聞之誤 此章 隱 而 他 匿 所。 不敬;就 弔於負夏,小 與「負夏」章, 不 · 安, ·當如 此皆禮 必 〇此 此篇 正 非 室

大功廢 謂 鄭氏 而 弦 不 可以操琴瑟也。 業。 誦之業也。 日 : 或 許 E: 其 大 誦 功 可 故 誦 也者,謂 蓋大功之喪,有降 也。 可 也 可 愚 以 謂 誦 詩

而言之,故不同。《曲禮》曰:「喪復常,讀或弦誦並廢,或不廢誦。説者各據其一偏服,有正服,有義服,其情不能無隆殺,故

樂章。」然則父母之喪,除喪乃得業也。

故 鄭氏曰:「申祥,子張子。太史公傳曰: 猶不敢自信其不爲小人。 其所賦之理,則 而歸之,有始 以成形,而理具焉。惟君子全而受之,全 爲終,消盡 二者相近,未知孰是。死之言澌也。 『子張,姓顓孫。』今曰『申祥』,周、秦之聲, 日 歸 死。 之不易,以 吾今日其庶幾者,言未至今日, 爲 有 澌。」 示申祥,使知爲善之不可 但見其身形之澌滅而已, 卒,故曰終。 愚謂:天之生人,氣 蓋深明夫全受 小人不能全 事卒

以一日而怠也。與曾子啟手足以示門人

同意。

「奠,田練反。閣,音各。與,音餘。」曾子曰:「始死之奠,其餘閣也與。」《釋文》:

是也。 簡。 鄭氏 禮》「脯、醢、醴酒,升自 以鬼神之禮事之也。」 於倉卒之頃 則以仍其生前之食而不忍遽易,一則以用 飲食,始死即設奠,所以 朱子曰:「自葬以 蓋哀不能文,而於新死 曰:「不容改新。閣,庋藏食物。」 餘閣者,用閣上所餘脯、醢以奠, 而不及别具也。 前,皆謂之奠,其 作階,奠於尸東」, 依 愚謂:鬼神 神也。 者,亦未 禮 士喪 依 忍 甚 於 遽

禮記卷七終

九九九

## 禮 記 卷八

賜進士 國史館纂 及第翰林 脩 孫 希 院 日 編脩

## 檀弓上第三之二

思也亦然。」《釋文》:「倡,昌尚反。 子思之哭嫂也爲位,婦 曾子曰:「小功不爲位也者,是委巷之禮也 服 位,善之也。 謂 鄭 言思,子游之子,申祥妻之昆弟,亦 此 者,娣、姒婦 街 氏 以往,獨哭不爲位。」 **⊟**: 里 委 位 曲 禮 一,謂 所 小 爲,譏 一,嫂叔 以 功。 親 人倡踊。 之也 疏 倡 無 敘列 一, 先 服。 踊,音勇。」 也。 愚謂: 哭而 婦人倡踊,有 哭也。 子思 申祥之哭言 説者云 哭嫂爲 委巷 無 服 爲

调

踊。 也。 位者 故申祥於言思亦爲位而哭,而使其妻爲主 小功不爲位者,曾子非之,言此乃委 面,而 禮》主人在 人 己爲之主者。 人之禮,而非君子之所行也。《奔喪》云: 其南,是也 在阼階下西 而 而娣、姒婦相 小記》「哭朋友者於門外之右南 無服而爲位者惟嫂叔。」此謂 倡 倡 委,曲 以以 踊者 踊 妻之兄弟無服,而妻爲之期若大功, 吊者 也 親 疏敘列爲位,以 也 作階下,衆主人及 北 以其爲爲位之禮之所自起也。 面 凡 若不爲位,則爲 爲 面,後言「曾子北 子思哭嫂 · ; 而 踊 哭有服者必 小 疏者以 以 功,故使婦 婦 人 在家,嫂 次而 居 親者一人爲主 間 爲位,時 卿 主 人爲主而 在外聞喪 南,如《士 此 大夫 者 面 叔 皆使婦 面 而 無 皆 巷 是 有 弔 人 服 而 哭 南 在 喪

知也。 皆字子思,此 卒,故得 子相承,此云「子思哭嫂」,孔 必爲位之事。 小功不爲位 子,或幼而未能 嫂之喪,子爲之期。 今乃不使子爲主而 ?有嫂」。 ,故引子思、申祥之事 所 〇《孔叢子》,孔氏九世 爲 稱子思,或爲異人,未可 今案孔子弟子原 主 使婦 耳。 妻之兄弟,子爲之怨。 記禮者因 人者,蓋以 疏謂「兄早 憲、 以以 |曾子 燕伋 未 皆 證 哭 有

釋之。」

依注音横。」古也。《釋文》:「縮,所六反。縫,音逢,又扶用反。衡,古也。《釋文》:「縮,所六反。縫,音逢,又扶用反。衡,古者冠縮縫,今也衡縫。故喪冠之反吉,非

今,周 鄭 冠皆直縫,辟積攝少,故 今冠横縫,以其辟 氏 ,自殷以 曰:「縮,從也。 也。 上。 衡 横 縮,直也。 也 積多。」 今禮 周吉冠多辟積 一前 殷以 制 孔 讀 上質,吉凶 後 氏 直 衡 日 不復 丘縫之。 爲 古古 横。

> 冠 時 人因 ,猶疏 直 縫,但多 謂 辟 古 而 亦 直 縫。 作攝 喪 冠 是喪冠與吉冠 與 而并横縫之。 言冠 反,故 相反。 若 記 者 喪

曾子謂子思曰:「伋,吾執親之喪也,水漿不 子之執親之喪也,水漿不入於口者三日,杖 過之者俯而就之,不至焉者跂而及之。 人於口者 加 后 能 起。」《釋文》: 七 日。」子思曰: 「漿,子良反。 「先王之制 跂,丘豉反。」 禮 故君 也,

鄭氏 而 此曾子自言其居喪之過禮,而子思就 子思爲曾子言難繼 申之,以明中制 日 : 「曾子言此,以 也 ,以禮抑 疾 之。 時禮之不 愚謂 其 如如 意

而可乎?」《釋文》:「税,徐他外反。」曾子曰:「小功不税,則是遠兄弟終無服也,

鄭氏 已過 乃聞 曰 : 小 喪 功 而 服 不 日 税 税 據 禮 大 功 而 言 以 E. 也 日 月 小

已過 之制 謂: 之於禮 其 成 内 追 母、從祖 晚 ൬ 功 此 全服 情 即 止 在 輕 兄弟, 非 服 除 少 緦 不 曾子篤於恩,故 而 而 正 一,則以 王 小小 也 服之,則哀 可乎者,以己恩怪之。」 虚 以 服 服 父母、從祖兄弟爲三小 日 謂 ·功者則税之。」鄭義限内聞 加 其 肅 小 何 功 遠 人之可 之而 乃 實不以其文,故 族 名 謂 始 也 兄弟,言相 親 追 但 른 聞 服 服 微 也。 《喪服· 以 喪, 殘 疑 ? 而 通行者制之也 日。 《喪 不 小 若其 不 其 税之非 功恩輕,若 足以 離遠 小記》云: 義 若如 服 成 非 有 》從 服,服 者, 稱 其 功 也 孔 然 王義 乎其 祖 服 氏 聞 先 祖 先 日 未 喪 之恒 必 日 限 降 服 王 父 則 Ŧ 月 有 愚 得

日乘。」

使,謂 猶貸 是 何傅乎?」 鄭 虚有弔禮。 氏 也 曰 賻 : 賵 禮 者 伯 所 孔氏 高 若遣· 以 冉 死 副 曰:「代弔非 子 時 人 忠信也、忠信 在 重 孔 弔 衛 子 弟 未 彌 子 爲 知 孔 冉 何 不 子 而 有 本 或 可 無 意 攝 故

曰『徒使我不誠於伯高」。」

之外。 哭諸? 爾來者,爲,于僞反, 伯 伯 音扶,皇如字,謂丈夫,即 子貢爲之主,曰:「爲爾哭也來者,拜之。 則已重。 門之外。 高 高 而 死於衛,赴於孔 來者, 所知 兄弟,吾哭諸廟。 師,吾哭諸 夫由賜 ,吾哭諸野。 勿 一本作『爲爾哭也來者』。 拜 也見我,吾哭諸賜氏。」遂 也。」《釋 伯高 寢。 子。 也。 於野 朋 見,如字,皇賢 文》 孔 父之友,吾哭諸 友, 吾哭 子 「惡,音鳥。 則 Ħ 已疏 : 諸 吾 遍 於 反。 惡 夫,舊 寢 寢 平 命 門 知 廟 爲

伯

高

釋

使,

色

吏

反。

乘,

繩

證

反

JL

馬

鄭氏

「赴,告也。

凡

有

舊恩者

則

使人

馬

而

將

之。

孔子

日

異

哉

徒使

我

不

誠

於

伯

高之喪,孔氏之使者未至,冉子攝束帛、

乘

0

哭所 之。 重也。 門 也。 由也。 兄弟於 泛等於 野 者 恩本於祖父也。 深淺之間,疑之也。 於正主』。」 門之外,本於恩也。 曰:「凡喪之正主,則知生知死 哭師於寢,朋友於寢門外,所知於野 則 「别親 外 知 或於寢,或於寢門之外者,別輕重 今與伯高相知來者不拜,故鄭云『異 南 已 所 知伯高者勿拜,異於正主。」 於 疎者 吾惡乎哭諸 面 已猶大也。 廟,父之友於廟門外, 疎也。 一之位 知 野 也。 者,恩 \_, 不 愚謂:惡乎哭者,以其恩在 哭師 而 可遽 命子貢爲之主者,使居寢 拜賓 或於廟,或於廟門之外 淺 哭諸賜氏 ,以其交會尚 哭兄弟、父友於廟者 友於寢者,恩成於己 也 命子貢爲主,明恩 同 也。 於師友,而又不 於寢 知伯 ,哭於子貢 别 則已重,於 而 高 新 親 來,悉 而 孔氏 也。 别 疏 來 也。 也。 可 則 拜 所 輕 哭 寢

> 門之外」,與此 父,故哭師於寢。 於廟者,固周禮然矣。 廟 傳》「凡諸侯之喪,異姓臨 主 恩由己者哭諸寢。 兄弟於廟、哭 勿拜者,異於 ,同宗於祖廟,同族於禰 ,則知生知 ハ師へ 死 有服 異者,蓋 而來者皆拜之。 於寢爲殷法,非 之親 孔子少孤,事師 《奔喪》「師哭諸 也。 恩由 於外 廟」,則哭兄弟 哭有 父者哭諸 同 〇疏 服 也 姓 者 不由於 於宗 以 而 廟 廟 哭 爲

焉。」以爲薑桂之謂也。 曾子曰:「喪有疾,食肉飲酒,必有草木之滋

者,謂薑桂也。」以爲薑桂之謂,爲記者正曾子所謂草木滋鄭氏曰:「增以香味,爲其疾不嗜食也。

曰:「天乎,予之無罪也!」曾子怒曰:「商,之也,朋友喪明則哭之。」曾子哭,子夏亦哭,子夏喪其子而喪其明。 曾子弔之曰:「吾聞

各反。」 矣 ! 何無 珠,音殊。❶ 子 退 女何 《釋文》:「而喪,息浪反,下「喪明」「喪爾明」同。 也。 一而 老於 無 罪與?」子夏投其 罪 吾過矣! 喪 罪 泗,音四。 爾子,喪爾明,爾 也 西河 也。 ? 之上,使西河之民 喪爾 吾與女事夫子於洙、泗之間 吾離 罪與,與音餘。 親,使民 群 而 杖 罪 索居亦已久矣。」 而 未 三也 離,音詈。2 拜 有 曰:「吾 聞 疑 馬,爾 女於 女,音汝。 而 索,悉 日 過 夫 女 罪

道 説 於 也。 鄭 日 群 河 **沙妻子。** 辨辨 氏 德 : 謂 龍門 與夫子相似。」 罪二,言居親 日 疑 慧聰 同 明, 女於夫子者,既 至 門 再言『吾過 華 睿絶異於 朋友也。 陰之地。 目 精。 喪 人,使 矣」,謝之且 無 索猶 洙、 愚謂: 罪 異 不 泗, 稱。 稱 散 一,言其不 西河之人 其 子夏自言離 也 魯水 罪三,言隆 師 服 自 名。 罪也。 疑 孔 爲 稱 女 談 氏 師 西

> 明。 此記 群散 能,而學者之所 規過,子夏之聞 喪 不自 親 所言,有無不可知。 然曾子之責,安得辭 時 知 居 尚 無朋 0 强 張子 壯 友切磋之益,故至於有 其 當 義 日 取 而 喪 法 遽服,此則非賢者不 子, 子 也 然曾子之盡 也? 血 夏 喪明 氣 漸 7,必 衰, 愚 言以 故 謂 是 過 喪 初 而

皆反。」 夫晝 齊也,非疾也,不晝夜居於内。《釋文》: 可 也。 居 是故君子非有大故,不宿於外。 於内,問 其 疾 可 也。 夜居於外 「齊,側 非 弔 之

鄭 外 似 氏 有 謂 티 : 喪。 正 寢室之内 「畫居於内, 内, 謂 正 外 寢 似有疾。 也。 之 中。」 大故, 夜居 愚 謂 謂 : 有 於外, 内

② 「詈」、《釋文》作「利」。③ 「殊」、《釋文》作「妹」。

不

·見齒

則雖 中。 故 内,所以 於大故」,是也。 廬 喪 於 事業得其序,身體 既 大故 中門 不 小 必果有喪疾, 斂,主人 順 ,即喪也。 之外。 陰陽 之位 動静之宜,以 致齊 君子畫必處外,夜必 《孟子》「今也不幸,至 而 得 恒 與疾, 固 其 在 養。 可 阼 以 階 爲興居之節。 恒 苟反其常, 問 下。 在 其 正 (疾, 弔 既 寢 殯 處 室

君子以爲難。《釋文》:「見,賢遍反。」 高子皋之執親之喪也,泣血三年,未嘗見齒,

其

喪矣,可不謹哉。

今子皐 君子 凡人大笑 言泣 鄭 涕 氏 淚 ,以爲 無聲,如 日 必 悲 因 「子皐,孔 則 無 難,言人 悲聲 聲, 露 血 齒本, 出。 其 而 出、若血 涕 不能然。」 子弟子,名柴。 未嘗見齒、言笑之微。 中笑則齒 亦 出,故 出 云『泣 露,微笑則 則不由聲。 孔氏曰: 泣 血 血

皆放此,不復音。當,丁浪反。」
大功不以服勤。《釋文》:「衰,七雷反,後「五服之衰」衰,與其不當物也,寧無衰。齊衰不以邊坐,

喪,未有 使子貢説 孔子之衛,遇舊館 以邊 鄭 其 中 衰言 謂 物,則亂 疏,不可 之功沽。 衰,謂五服之衰。物,謂 則齊衰固 (嚴敬。 -席也。 精 氏 坐、服 不邊 麤、 曰:「寧無衰,惡 所 驂 得而 於喪紀 廣 不以邊 蓋敬 衰之物不 説 坐,則大功 不可,而 前 勤,爲 狹 驂, 賻之。子貢曰:「於門人之 亂 不應法 所 説驂 而禮亡矣。 也。 人之喪,人而哭之哀,出, 以 、褻喪服。」 坐,不以服 攝 小 同, 無 可 制。 其 哀, ·功可 於 也。 衰 亂 所 升數之多寡,鍛治 舊 而 邊,偏 而 禮 以 也。 館 褻 邊 禮 勤,皆所 大功不服 也 孔氏曰: 别 則 坐,謂 自若, 無 恩誼 倚 或 不當物, 也。 愚 忘 不當 之 謂: 坐 以 也 勤 親 不 致

南反。 乎 反,涕,音體。惡,烏路反。夫,音扶。」 而 釋文》: 出 涕。 鄉,本又作『嚮』,許亮反。 夫 「税,本又作『説」,同他活 子 予  $\Box$ 惡 : 夫涕 子 鄉 之無 者 人 從 出 反,徐又始鋭 而 涕, 也 哭 之, 小 出如字,徐尺 子 遇 反。 行 於 駿,七 之。 哀 遂

贈館 謂 不從。 耳。」 氏曰 以厚 人 門人,恩爲偏 鄭 喪 恩雖 行 用 氏 館 恩待 人 無 日 必當 「説驂於舊館,惜車於顔淵 輕, 於此 他 人 而 騑 輔 「館人,前 猶 不吝; 物可以易之者,使遂以 我,我爲出涕。 馬 氏 我 有物 舍 可 日 廣 人哭,見主人爲 頗。 驂。 見聖人 日 義 與 : 舊 之,顔 所不 遇,見也。 日君所使 子貢言説 義之所 時 處 可, 館 事 恩厚,宜有 路 舍之人 之 則 可 無 我盡一哀,是 驂大重,比 舍 孔子言舊 權 顔 厭 己。 則 往 衡 路 者, 故 也。 説 請 重 賻 車 驂 卻 顔 施 愚 之 淵 孔 館 凡 以 於 助 而

> 其哀 同。 馬 記 四 馬 他 虚 賻之,則 以 恩待孔子也。 壹而 誼 賻 大夫皆駕四。』孔子既 者, ,大夫三,士二。』古《毛詩》云: 物 偽 厚恩答之也。 也 疏 》則有 以 口 故子 致其哀也。 遇於一哀,言己入弔時, 而 恒切,今主人爲孔子而 錢 案《王度記》: 『天子 賻 無 疑於情之不 財 故 所自出矣。 愚謂 驂馬,若依《毛詩》説 貢以 爲 也。 常 孔子感之而 説駿爲 蓋主 情必資物以表之,若 〇孔 其 詩 重 足, 一人之於弔賓恩深者, 説
> 駿
> 以 氏曰:「孔子得 爲大夫,若依《 者 重而 大明》詠 而 乃 爲 鄉 用 駕 怪 致哀,是以 之出涕,是又 賻者,客 者之涕 遇主人之專 之。 車 六 則 武 馬 天子 馬 王 有 王 諸 有 幾 與 而 行 無 館 度 至 於 厚 侯 駿 無 以

0

<sup>「</sup>出涕」、《釋文》作「而出」。

之言不可 耳,非實有一乘駕六馬之法也。 大夫也。 語》昭公與孔子一乘車、兩馬,時孔子未爲 喪禮》下篇「公賵玄纁束、馬 駟」,此諸侯 領」,此大夫 龐」,此 「良馬五之」,「良馬六之」,不過極言其多 駟 騵彭彭」、《車 天子 《書》言「朽索馭六馬」、《詩》言 據。 然 駕 四也。 四 DП 也。 攻》詠宣 也。 《節南 惟 《采菽 士 王. 則 山》言「四 而 》言 兩。 駕二,故《士 曰 《王度記 四四 載 又《家 牡 牡 載 龐 項

子曰:「小子識之,我未之能行 反 曰:「夫子何善爾也。」曰:「其往 孔子在衛,有送葬者,而夫子觀之,曰: 識,式志反,又音式。」 也 喪乎! 如 疑。」子貢曰:「豈若速 足以爲法矣。 小子識之。」子貢 反 也。」《釋文》: 也 而 虞乎?」 如慕,其 「善

鄭氏曰:「慕,謂小兒隨父母啼呼。疑者,

之思 子貢 己未能行,自抑以深善之。 欲 葬 子以 祭祀 哀親 者禮之文,而哀戚者乃禮之本也。 遽 迎 慕 末也。」 恐反遲則虞祭或違於禮 還 精 親 之在彼,如不 其 往 也。 而反,不知神之來否,故遲疑 親 葬 於墓、欲從之 虞,祭名。 而啼泣也。 愚 謂 欲還然。 其往 其反 葬反,日 而 也如慕 不 ,而不知祭祀 也如疑者,既 哀戚,本 能,如 中 夫子言 **ぶ者**,孝 而 嬰兒 而 也

後食之。《釋文》:「饋,其位反。」 顔淵之喪,饋祥肉,孔子出受之。 人,彈琴而

樂,而 鄭氏 祥 顔 子爲 以前皆廢樂也。父母之喪,三年不 子之死,哀痛尤深,蓋心喪之如長子,自 故 顏子、子路,皆如喪子而 曰:「彈琴,以散哀 祥 彈琴而 之日鼓 後食祥肉,蓋 素琴。 夫子爲顏 也。 以 無 此 服 子心 愚 爲 謂 而 喪 心 其 於 夫 喪 爲

禮記集解

之節也。

市志反。」 故也。」二三子皆尚左。《釋文》:「拱,恭勇反。 嗜,孔子曰:「二三子之嗜學也,我則有姊之喪孔子與門人立,拱而尚右,二三子亦皆尚右。

尚 尚 鄭氏 右 也 嗜,貪也。 左。 手,反吉 左手,左,陽 吉尚左,左,陽 曰:「二三子亦皆尚 尚左,復正 也。 也 婦 也。」 人 其 則 拱 也。 吉事 亦 愚謂 右, 傚孔 喪尚 然。 尚 M 右,右,陰 右 凡 事 拜, 子 N N 則 也。 男 事 尚

其 既 孔子蚤作, Ш 吾 頹 歌 其 將 頹 而 抴,羊世反,亦作『曳』。 則吾將安仰? 乎 安放? 入,當户 ! 負 梁 手曳 木其壞 夫子 而 坐。 杖, 始將 梁木 消 乎 子貢 消 摇 1 摇,本又作『逍遥』。 病 其壞,哲人其萎, 於門, 也。」《釋文》:「蚤 聞之曰:「泰山 哲人其萎乎 歌 曰 : 頹,

安仗」五字。」今按:注疏並不解此句,殆後人所增耳。枋得云:「劉尚書美家藏《禮記》,「梁木其壞」下有「則吾將徒回反。委,本又作「萎」,同紆危反。放,方兩反。」〇謝氏

鄭 衆木所放。 門,欲人之怪己。 能以禮自持,並 矜莊,今乃消 曳之,示不復杖也。 曰:「杖以扶身,恒 病 也 氏曰:「作,起 詩 **>** 哲人,亦衆人所 曰 : 摇 放散,以自寬縱 將 也。 泰山 死 在 無 夫子禮度自守, 之意狀。 前 木 衆 負手曳 而 不萎。」 用,今反手卻 Щ 仰 所仰。 杖,消摇於 放,依 放 ,皆示若 也 梁木, 也。」 貌 孔 氏 恒

其意 將死 也。 愚謂: 也 ,故其見於歌者如 君子之居恒當户。 門,謂 寢 門也。 此,而子貢 夫子自知 當户 而 坐, 其 聞 病 鄉 而 知 明 而

后氏殯於東階之上,則猶在阼也。殷人殯於遂趨而入。夫子曰:「賜,爾來何遲也? 夏

之上 疾 昔之夜,夢 而 兩 七日 天下其孰 楹 之間 則 而 猶 没。《釋文》「阼,才故反。 坐奠於兩楹之間。 賓之也。 則與賓主夾之也。 能宗予? 而 予殆將 丘 也 殷 周人殯於西 夾,本又作『俠』, 死 夫明王不興 人 也 也。 !! 蓋 子 寢 疇 階

古洽反。」

異 死。 鄉 也。 鄭氏 愚 殷 澔 象 能 言奠者, 邓明,人 人。 日 謂 用 於 孰,誰 曰 生 由今觀之,萬世 我 此 「孔子其先宋人,成湯之後,故 : 東階,主人之階也。 孔子 ,故殯於東階之上,則 以 自知 君聽治 以 爲 孔子 也。 爲 以 人 將 凶 殷 宗,尊也。 君乎? 夢坐 死。 象。 正坐之處。今無明 人而 明聖人知命。」 疇 兩 王祀,亦其應 享殷 楹之間而 是我 發聲也。 兩楹之間,南 夏人 禮 飛家 猶 故 在 以 見 奠殯 昔 自 矣。 新 主人之  $\Xi$ 饋 死 知 自 陳氏 猶 食。 之 將 謂 誰 前 面

斂,奠 朝,其 政,則 也。 也。 上,則 也。 生不 位 而 必爲殷家喪殯之兆矣,故以此自卜其將 無尊我以爲 言夢坐安於 夾其兩旁也。 應居尊位,故殯於兩楹之間,而賓 牖之間,南面之位 士喪禮》小斂卒斂,「男女奉尸侇于堂」, 也。 小斂奠設於尸東。 鄭氏 同 堂上之位,以此 猶 聽政不敢南 其正 在 君 西 室。 在賓客之處也。 而 謂 階 每 坐 鬼 奠爲 君 兩 日 賓客之階 是 神之位 在 奠,定也。 楹 視 者,則非 殯 兩 饋奠,非 一之間 朝 所無 面,避人 ,其東西直 楹之間。 於治 爲最尊。 在 若奠爲喪奠,則夫子 而 也。 西,故 南 設奠之法 坐 也。 朝, 兩 明 面 八君也。 周 聽 王不 奠,猶言 楹之間, 大夫 退 《士喪禮》大 殯 殷 兩楹之中 人 治之象,而 適 人以 於 以 ·興,天 夫子 雖 路 也。 主 西 死 之位 有 寢 安 鬼 謂 者 階 自 坐 間 下 私 聽 神 之 與

是周 死 ? 知命, 乎? 郭 知 死 於門 死 子嘗自言「天生德於予」,又曰 死,而見之於歌,非 自 何 而 此,尤不 聖人 ; 璞之流 滴 固 固 知 稱 不 若是。 (末七十子以後之人將以尊聖人, 其 所 所 則 以 言 且以『哲人』爲稱、泰 周 (德容,至死不變。今負手曳杖, 況 視死 將死 泰 自知,又豈待占夢 自 卑之也。」 小 旋 得以奠爲饋食也。 人 耶? Ш 知 斂 君 生如晝夜,豈自爲歌辭以 中禮者,似 是是 、梁木之擬 聖人清明 而 侇 於路 無 尸 即 惟負手曳杖,非周旋中禮 , 待於夢,則夫子豈管輅 志氣如神之效。 寢 所 而 愚謂 聽 乃 在 謂 不 亦亦 政 一躬,志 以 如 自 而 夫子 是。 其 殷 悲其 Ш 無 〇吴氏 知將 飲 家 足 梁木爲 氣 聖人 自 食 之 疑。 死 如 死 若謂 斯 殯 世 知 澄 初 神,生 ? 文 其 悲其 樂天 占 逍 日 不 爲 而 在 夢 將 谣 在 牛 夫 不

> 之容 誠 有 如 旲 氏 所 言 者 其 或記 者之

失與

子貢

曰 :

「昔者夫

請喪夫子若喪父而無服 子之喪顔淵,若喪 孔子之喪,門人疑 以夫子 薄, 曰 : 也。 鄭氏 情 己之功,與君父並。 同, 爲  $\equiv$ 居則經, 下云: 『孔子之喪,二三子皆 師弔服 年。」 而已。 事之大小處之。 但經出與不出有異,則 爲 日 師 聖人,與凡師 師 不 出 「無服,不爲衰,弔服 下至曲藝,莫不 孔 及朋友,皆 加麻者、案《喪服》:『 立 則否。」是弟子相 氏曰: 服 不 子 所服。 「依禮 而 可 如顔、閔於孔子,其 其次 不同 無 既 立 服 葬除 喪 也, 有師 各 喪 故 師 有淺深, 喪子 當以 爲 之。 師 綷 疑 無 豊可 加 與 朋 與 所 而 服 麻 情 爲 朋 友 出 服 麻。」 之 門 稱 夫 程 友 成 子 口 子 概 其 群 知

然。」錫衰,大 問 弔 制 舊 於總麻之經,其 友 衰、素裳。 亦 得服 説 朋 服 服 謂 以 友之義, 公爲 朋 加 葛 友相 愚 麻者信矣。 爲 弔服之經,在五服之外,當又小 卿大 謂 經 夫 而 爲 亦以 相 朋 用 夫 服 喪服 其 弔之服 友 錫 緦 五分去一 弔 則 衰 之經帶,無所 士之弔服,素冠 影記 服 用 以 以 也 居 麻 云 爲之也 居 爲之差 朋 大夫相 「則謂 大夫相 友 據 麻 也。 與 而 爲 ? 疑 用用 亦 服 蓋

披,周 孔 子之喪,公西赤爲志焉。 置 也。 知知 吏反。 設崇,殷也 披,彼義 反。 綢練 綢,吐 設 飾 棺牆 刀 旐 反,徐 夏 置 也 直 留 反 設 釋

旐,直小反。

家。 引 謂 鄭 氏 章 棺 者。 識 日 翣,以布 「公西 崇,崇牙, 牆 衣 柳 一赤,孔 木, 衣。 旌 如 牆 子 旗 襵 之障 弟子 飾 與? 也 ,字子 柩 披, 猶 綢 練 柩 華 垣 行 牆 夾 志 練 暲

翣,以 荒, 法,以 之飾 韜 綢 旐 建 加 西 旗 旒 漢 角 維持之,此皆周 王 縫 之禮 此 赤以 日 謂 高 旌 牆 緇 盛 旌 中 人 旗 、衣以 也 旌 之 扇 車 章 布 則 木爲筐,廣三尺,高二尺 **>** 央 『素錦綢 》,刻 尊 旗 飾 杠 爲 注 廣 邊 明 夏 材 鄭注 之 棺榮夫子,故 灄 云 之。 (白布, 禮 置 充 僧爲崇牙之飾,此 志識焉。 木, 也。 此 翣,恐柩 幅 也。 障 柳, 以 之法 旌 總 杠。』夫子雖 長 柩之牆,即 畫雲氣,柄 素錦, 知 孔 尊崇夫子 而言之,皆 尋 葬 聚也, 此 於是 氏 也。 車 日 日 乘 旌 曰 : 爲 於 傾 車 旐 乘 盛禮 其 以 杠 虧 諸 孔 所 柳 故 送葬 車 素爲褚,褚 殷 長 首設 飾 則殷 ^ 建 也 而 謂 人,兼 所 子之葬 四 ,備三王之 Ŧī. 爾 所 兼 也 以 之爲 寸, 建 尺 雅 聚 乘 長 法。 外 用 繩 者, 如 用 也。 旁帷 尋 方兩 車 説 旌 左 柳 扇 代 之 所 外 之 案 又 旌

牙也。 其 反也。 之旌 旜, 壙。 刻 建 廞 銘 夫之禮耳。」 初 赤爲志者,以 人之爵  $\mathbf{E}$ 車 既 旌。 也。 載 旌 車 死 於 勺 「案《既夕》,士禮有二旌: 即明器之旌,至壙,從明器納之壙中。 亦在 之旌。」廞,謂 ,載於柩車 二是乘車之旌 朝 旗 禮 書名於上, 曰某氏某之柩 行,故 其大夫、諸侯 服 夫子用三代之禮不爲僭者,用 樂虡有崇牙,以縣鐘磬之紘,此 杠 司常》 》陳 稟 柩 之首, 車 前,至柩 愚謂: 葬之有飾,所 車載 其習於禮樂之事 謂 門 云:『共 而還,言送形 之志。 内 以 興作之,則 蓑笠」,故 右 注 則 入壙,乃斂 則《既夕禮》『乘 北 無文。 旄 銘 孔子之喪,使 面 者 旌 知 與? 。」又云: 明器之車 乘 而往,迎 其天子亦有 此 也。 車 乘 旌 ず葬則 是銘旌 載 〇 孔 車 以 崇,崇 乘 旜 公西 表 其 精 所 車 車 『建 也。 人 載 載 氏 則 識 大 所 道 而

> 耳。 謂: 也。 路,葬時皆 有遣 又 并遣車之旌及銘旌爲十一 乘,并銘旌爲十二旌。 遣車九乘,車各有旌,并銘旌當有十五 載 1 大常,至 若諸 士 車, 禮 是天子三旌 惟 既 即有 侯則 有 用爲魂車 壙 旗 乘 亦 心,故 同 廞 車 載 姓自 旌, 載 也。 乘 之 旜 車 ,則每路各建其 而 亦有三 熊氏 金路以 載 則 異 歸, 旜。 天子 姓自象路以下, 旌 但《禮 以 下, 也 旌也。」 爲 若天子有 亦 大夫 又遣 當 文 有 (旗,又 以 車 不 乘 旌 上 具 五. 愚 車

蟻,魚綺反,又作蛾」。 於四隅,殷士也。《釋文》:「褚,張呂反。幕,音莫。子張之喪,公明儀爲志焉。褚幕丹質,蟻結

錯。 翣。 鄭氏 子張學於孔子,傚殷禮。」 畫褚 蟻 日 虬 : 以 之 蜉 四 丹 也。 角,其 布 幕 殷之蟻結,似 爲褚 文 如 葬 蟻 覆 孔 行 今蛇 棺 氏曰:「公 往 來 不 文畫 相 牆 交 不

褚之四 褚。 然則 布爲 子 師 十子之徒亦學焉,故公明儀 錦 今公明儀於子張之葬 置 師 往 布 敬 以 明 大夫、士之葬皆有牆、翣,上章云「飾棺牆 帛之 其 蓋 一霎,周也」,是 祇 尊之,兼用三代之禮。 一來,不牆不翣,用殷禮 爲之,又於 上 儀 其形 褚 殷 師,故特爲褚,但似幕形 是子 用 亦崇儉尚質之意與 屬 角,此 自 ,覆於棺 殷 形 與? 大夫 如 禮 似 張 幄,上下 乃殷之士禮,故 幄,士 而 弟 褚之四 以上,其褚 孔子 子。 己。 上 也。其自大夫以 而 則 褚 兼習 不 角 ,不置牆、翣,但用 四 無 謂覆 愚謂: 四四 周, 畫 也。 褚 今公明儀雖尊其 ? 周,而 三代之禮 蓋 蚍 用 以 日一般 亦 夫子聖人,弟 蜉之形,交結 ,而以丹質之 棺之物 今公明 周禮,人君 殷禮以葬其 素 四 畫 錦 周 上,又有 蚍 1: 前 爲之。 儀 而 也 蜉 大 用 於 丹 尊 夫 七

之仇 遇諸 夫子 遥 仇如之何?」曰:「不爲魁,主人能,則 子 而 使,雖遇之不鬭。」曰: 反。 生也。 執 魁 喪 鄭 陪 夏 門之内,兵器不入公門,此得持 朝,不待 日 昆弟之仇,銜君命不 :「不反兵 兵 也。 如之何?」曰:「仕弗 市朝,不反兵而 日 問 猶 氏曰:「居父母之仇,雖 使,色吏反。從,如字,徐才用反。 其後。」《釋文》:「苫,始占反。 陪 首也。 於 干,盾 不反兵,言雖 孔 其 寢苫枕干,不 反 後,爲 子曰:「居父母 還 天文北 而鬭者,恒執殺之備,雖 也。 取 兵,即 其 弗與 鬭。」曰:「請 「請問 負, 一鬭,爲 斗, 適 ·仕,弗· 當鬭 共 當 與 魁 市 之 天下,不 除喪,居處 居從父、昆 共 成 負 爲 朝 枕,之鴆反。 也 國,銜 與 仇 之。 陪,步回反。」 而 首,杓 不釋 共 廢君 如 兵入朝者 然朝 問 之 天下 可 居 君 兵 爲 何 命 猶 以 孔 執 在 在 朝 弟 命 昆 也。 末。 也。 也。 弟 若 氏 並 直 兵

四

爲有 禮自 案《閻 鬭 即 也。 之讎不反兵」,謂非公事或不仕者,故恒執 之讎不反兵』,此云『父母之仇不反兵』者, 以上,不必要是矛戟。 有公事之處,皆謂 皐門外,説見《玉藻》。 出使,遇之不鬭,故不得云『不反 殺之備。此文『昆弟之仇』,據身仕爲君命 父母、昆弟之仇皆不反兵。 廣,設朝或在野外,或在縣、鄙、鄉、遂,但 一文相互乃足。」 一者,兵器不離身,遇之即鬭,不待反而取 不 與 君 不仕者,父仇未報,故無 處也。枕干者,報仇之器不離於身 人》『掌中門之禁』, 共戴天之意。 事則於報仇或妨也。 其大詢衆庶,在皋門内,案大詢衆庶在 之朝。 則得 愚謂:寢苫者,恒以 遇諸 上《曲禮》云『兄弟 人也。 但兵器不得 兵者,亦謂 市朝不反兵 《曲禮》『昆弟 弗與共天下, 心於仕宦,且 且朝 兵 也」。 文 入中 佩 喪 既 mi 刀

> 則否。《釋文》:「經,大結反。」 孔子之喪,二三子皆經 《周禮》「朋友之讎視從父兄弟」、《曲 者,此自有主人,故但助之而 同國 兵 不爲魁者、《曲禮》據死者無子,無親 公事也。 朋友之讎不同國」,此言從父、兄弟之讎 世 耳 0 昆弟 若非銜君命,亦不反兵而鬭矣。 銜君命則遇之不鬭 有 仇 猶 而 可 出 以 仕 群居則經,出 已。 ,不以私 但 不 與 一禮》言 於己 仇廢 仇

鄭氏曰 子相爲,出乃不服者,蓋以孔子之喪,既経 問》:「公爲卿大夫錫衰以居,出亦如之。 謂 出與居皆服之,朋友相爲亦宜然。今七十 爲,皆錫衰,則亦當有絰。 大夫相爲亦然。」《司服》總衰、錫衰、疑衰, 其首服皆弁経」。 七十二弟子相 :「尊師也。出,謂有所之適。 爲 公爲卿大夫,及大夫相 朋友 服 是弔服加経者 愚謂 《服

口 而 於 出 師 故 之意 於 朋 蓋酌 友 之服 乎禮之宜而變之也 微 殺之, 以 示 其 不 敢

易墓,非古也。《釋文》:「易,以豉反。」

禮 子 敬 而 路 有 ,與其敬不足 禮 體 者 鄭 也 魄, 「,使 餘 有 氏曰: 也。 餘 有草木 無所 也,不 孔 吾 易, 氏 聞 事 日: 如丘 於易 而 - 若禮 諸 謂芟治草木,不易者 禮 夫 「墓,謂冢旁之地 也。 子: 陵然。」 有餘也,不若禮 不 足 喪禮 即古不脩墓之意 而 哀 愚謂: 與 有 其 餘 也 哀不 不足 墓 不 丘 以 而 足 藏 易 陵 祭

哀敬 日: 「 戚 有 鄭 喪禮 氏 寧 日: 「 則 儉之意。」 有 謂 有餘,謂 口 其 俎 自盡 禮 喪主哀,祭主敬。」 豆 也 無 明器、衣衾之屬多也 牲 愚 其 牢 謂 此 財 之屬多 夫子反本之論 則 禮 禮或 有 也。」 餘 有 謂 孔 所不 陳 氏 財 亦寧 祭禮 氏 物 日 上, 之 澔

> 餘。 曾子弔 降婦 也?」《釋文》: 曰:「夫祖 反,又吐回 者而 矣。 所未 未盡 爲有餘矣。 定,然第務 繁多,儀 夫,音扶,下同。」 人 盡也。 行禮固 較其 , 此 而 於負夏,主人既 后 反。 者且 節 雖 得失,則又以 行禮。 於禮 「填池、依注音奠徹、盧、王並 之 柩,其 未足以言備禮 以 此於禮 若哀敬 也。 詳 本末 人久反。 盡 而 從者曰:「 且 也 有餘 兼 之末 哀 祖 一胡爲 敬 從, 盡者爲至,若就 填 得其本者爲貴 喪 雖舉二 不足以 才用反,下 池 而 其 前 祭之禮 推柩 於儀 禮與?」 不可 其 而其本 稱之, 如 本 物 . 同 字。 而 以 則 或 古 反之, 一曾子 反 也 推,昌 其 則 有 與,音 有 則 已 宿 得 所 有 見

鄭氏 奠,設祖奠。 也。 處 爲 行始 曰:「負夏,衛地 既 也。 祖 推柩 而 填池 婦 人 而 當 降,今既反柩 反 ,榮曾子弔,欲 爲『奠徹 祖 謂 移 柩 婦婦 謂 車 更 徹 去 始 遣 載

六

奠,謂: 之辭。」 猶北 階間 北 位 還 子之來,乃徹遣奠,更設祖奠。 祖之明 啟殯之後至柩車出之節也。 遺奠,然後徹之,苞牲取 遷祖之奠於柩西,至日側乃卻下棺 鄭注云『是 後,柩遷於祖 人,蓋欲 於 極 又 首 降下。 階間,乃設 繒 遣 啟殯之奠也。 外 日 ,乃飾棺設披屬引,徹去遷祖 矜賓於此 婦 徹 而 孔氏曰: 時 人 遷祖之奠,設於柩 祖 爲行始,謂之祖。 一,升自 (升堂,至明 柩 奠、設遣奠之時,主人榮 社奠。 北 婦 首二, 西階,正棺於兩 「案《既 質 人,皆非 至厥 明 下體,遂行。 設奠於 7旦,婦 徹去啟奠,乃 明 夕禮 曾子之弔,在 也。 7,徹祖 車 婦人降,即 人從 又推 柩 西。 》啟殯 且. 又 西 奠,設 之奠, 載 楹 堂 此 柩 時 降 未 間 曾 於 設 之 更 繒 是 柩 此 定 婦

> 奠也 降婦 期乎 欲頻 俄 既 謂 位,本在堂下,非爲欲矜賓於婦人 兩 奠,徹之者,因推 反 婦人辟推柩,故升堂,柩既 車爲行始之後, 而 設 頃 階間之東 : 動 ? 此 遣 曰「反宿」者,曾子既弔之後, 人而後行禮者,以 口 章之義 奠,則 柩 畢,豈 疑所謂 車 也。 ,至明日乃始還車嚮外 必還 葬 難 而 「既祖」者,謂葬前一夕,還 日 曉 行禮 柩 非 柩 也 , 而 祖 而 反 辟之也。 ,曾子行弔禮 注 之明日 宿 既祖之後,婦 葬 疏 以以 日 反而復降,立於 之説 必 違其 也。 1, 降婦人者 如 主 也。 奠謂 素 也 而 此 베 人不 ト之 弔 行 遣 祖 事

祖於 於牖 而 從者又問 無 庭 下 退。」曾子聞之曰:「多矣乎 ,葬於墓,所以 小斂於户内, 諸 子 游 曰 : 即 大斂 禮 遠 與 也。 ??\_子 於阼,殯 故 ! 游 喪 於客 日 予出 事 : 有 「飯 進

降

而

後行遣車禮。」遣車,疑當作

「遺奠」。

愚

者。」《釋文》:「飯,煩晚反。 牖,羊久反。 斂,力驗反, 禮

家凡「大斂」「小斂」之字皆同,不重出。」 飯,以 米、貝實尸 口 中 也。 小斂、大斂,皆

疑。 己也。 謂曾 不爲 以衣 非曾子之所 諸子游,而子游告之如 殯,斂於棺而塗之也。 命引之,三步則止」,則柩於將葬,雖君弔 多猶勝也,言子游所言出祖之事 即 斂尸。 反 子 且反柩之失,曾子豈有不知? 心 也。 ○下篇云「君於大夫將葬,弔於宫, 就也。 知 此乃爲曾子而 出 其 衣少曰小斂,衣多 非, 也。 從者疑曾子之言,故又 而給説以 然則此 此,則反柩非 周人殯於 事 反柩,殊 答從者 蓋亦傳 曰大斂。 西階之 勝於 禮 注 爲 聞 則 問 疏 明 尤 而 口

曾子襲 而 示 人日 裘而 「夫夫也,爲習於禮者 弔,子游裼 裘 而弔。 曾子 ,如之何 指 子 其 游

失其實者與?

矣! 裼裘 反。夫夫,上音扶,下如字,一讀並如字。 趨 而 出,襲裘、帶、絰 而弔也?」主人既小斂,袒、括髮,子游 我過矣! 夫夫是也。」《釋文》: 而 人。 曾子曰:「我 袒,徒旱反。 「裼,星 调 歷

古活反。」

之也。 也。 既變,則襲而 玄冠,緇衣、素裳,又裼 之所止息,而其經、帶亦饌焉,故 帶、経者,死者之寢門外,蓋張次以爲 笄、纚、深衣,至小斂,乃 括髮、去纚而約 夫夫,猶言是人也。袒,袒 主人既成服,則 叔及婦人降 朋 友麻。」《奔 帶、絰,服 凡弔者,主人未變,則吉服 而 加経、帶,其 喪 無 弔服之葛帶、經 其髮以 服 服者麻。」此 弔衰。 無 而露其 麻也。 服 袒、括髮,始變服 冠與衣猶是也。 0 衣 而 爲 而露其臂也 二者之麻,皆 中衣。 始死,主人 喪 位 也。 出 者,惟嫂 服》記: 羔裘 而 出 取 弔 服 而

服 也。 士爲 皆對葛 弔 帶、絰備有,不獨朋友矣。 弔,不言其 帶、蓋未成服 而 葛絰、帶。」祝乃公有司,其所 喪大記》「弔者加武,帶、経」,則凡弔者皆 喪服》記「朋友麻」及《奔喪》所言之「麻 ·葛経、帶則弔服之経、帶,於此 惟 服 朋 冠,葛絰、帶」,以麻對 有 也 又注謂子游「所弔者朋友」,疏謂 喪 友麻 經 而言麻矣。 服》記「公子爲 而 爲 朋 若弔 特言麻, 則弔者猶玄冠,麻不加於采 友 何 乃 人,安知 於未 加帶」, 《士虞禮 可 以 其 成 見凡弔經之非 母 其 葛 服, 非 練冠 服 而言,可以 爲 也。 則 固 朋 「祝免,澡 可 亦 麻, 弔 子 友 見 葛 服 游 乎 爲 弔 矣。 經 也 見 其 ? 所 麻

弗 子夏既除喪而見,予之琴,和之而不 而 敢 不成聲,作而曰:「哀未忘也,先王制 過 也。」子張既除喪而見,予之琴,和之 和 彈之 禮 而

> 或胡卧反。 不至焉。」《釋文》: 而 和 彈 之而 忘,音亡。」 成 聲 「見,賢遍反。 作 而 曰 : 予,羊汝 先 王 反。 制 禮 和 不 敢

同。 傳所言,未知孰是 其喪親之不能 有聞,特謂 至與不至,固當異矣。 以《家語》及《詩》傳爲 子與琴。『援琴而 而 而 除喪,既 務外,而子夏誠篤,則其居親之喪,其哀之 語》及《詩》傳皆言: 援琴而弦, 衎 就之, 跂而及之也。 能 子夏居 自節,子張 祥也。 未 喪無 聞 盡哀 衎 和,調 哀已盡 其 異聞, 弦,切 而樂』。 喪明 也。 子夏喪畢,夫子與琴, 弦 曾子謂子夏喪親 正。 ○孔氏曰:「案《家 切 耳,未可 而 此 而 也。 閔 能 閔子騫喪畢,夫 與《家 而 子 哀』。 自 子夏 愚謂: 騫 勉, 語 據 至孝,當 與此 哀 所 此 子張 謂 未 而 疑 未 不 盡 俯

司寇惠子之喪,子游爲之麻 衰,牡麻 經。 文 僞反。 辭。 就 彌 游 子 服,又辱 面 敢 客 牟 趨 辭 而 辭 -之弟 位。 子 適,丁歷反。」 立、曰:「子辱與彌牟之弟游,又辱爲之 而 日 游 子 就 : 臨 《釋文》: 「子辱 諸臣之位。文子又辭曰:「子辱 游 游 |其喪,虎也敢不復位。]子游 日 又辱爲 與彌 古 「彌,亡卑反。 禮 以 牟之弟游,又辱爲之服, 請。」文子退,扶 也。」文子退,反哭。 之服,又辱 牟,莫侯反。 臨 其 /適子 爲之,於 喪, 趨 與 子 南 而 敢

子名。 衰。 鄭 爲 游 弟 南 深譏之。 當 惠 爲之重 氏 面 叔 然,未覺其所譏 子游名習禮,子 E 而 立 文子覺所譏,親 蘭 大夫之家臣,位 一司 服 也 則諸 以 ,生虎者。 寇 一機之。 臣 惠子,衛 位 在 游曰『禮』,文子亦以 麻衰,以吉服之布爲 門 扶 趨 惠子廢適立 將軍 内 而 在 而 北 辭 就 賓 文子彌 面 後。 諸臣之位, 敬子游也。 明矣。」 虎,適 一庶,子 牟之

已行

而

復

其

正

也

哭也。 方東 大夫 衰爲 以 復其 而 絰 已,其恩未至於朋友,而乃爲 重 而 愚 故 一經以 已。 就 爲 謂 輕。 爲喪主之位也。 諸 諸 面,《 胸 以其重而 一譏之。 子游以 子游於司寇氏爲異國之士,位 麻 臣 臣 前 之位 朋 衰,用吉 之位,蓋門東 士喪禮》「士西方東面」,是 之衰也。 友 (麻,其 文子言子游 惠子 一,變位 辭之。 布十五 廢 士弔服 非 以 趨 適 反哭者,反 朋 深譏之。 北 立 而 友,弔 升爲弔服 面 庶,故 就客位者,所 疑 但 東 衰 服 與 上 麻 其 朋 特 服 復 與? 其 用 友 弟 爲 位 位 之 葛 視 在 游 輕 而 ,謂 也 趨 麻 西 經 Щ 而 又

也。 將軍 深衣、練冠,待于廟 , 將軍文氏之子, 其庶 其 文子之喪,既除 動 也 ]中。」《釋文》:「涕,他計反。 垂 喪 幾乎 一涕洟。 而 后 ! 越 亡於禮者之禮 子 人來 游觀之曰 洟,音夷。 弔 ·; 主 自

Ħ  $\exists$ 

涕

自 |鼻日 洟。 亡,音無。 中,竹仲反。」 命與? 此

喪服 弔也。深衣,十五升布,連衣裳爲之,其 也。 除吉祭之後,新主已遷於廟,故就 在吉凶之間。 衣、練冠,凶 中,中禮之變。」 已除,吉服又不可以受弔。《聘禮》: 「主人,文子之子簡子瑕也。 服變也。待于廟,受弔不 練冠,小祥之冠也。 時文氏 愚謂:除喪,蓋禫 廟 迎 而 服 賓 深 受

祥 禮,此吉中受凶禮,故放其服 遭 而 喪,大夫練冠長衣以受。」彼凶中受吉 外 無哭者, 禫而内無哭者 故 而 略變焉 但 垂涕

能不 之子 洟 也。 以 失乎 處 致 其哀 禮之變, 酌乎情文之宜 蓋除喪受弔,乃禮之所未有,文子 禮意,故子游善之。 而已。 庶幾,近也,言其 而行之,而 案《士喪 近於

> 主人 待 于 廟 不 迎 者, 蓋 弔 者 非 越君之

===

幼名,冠字,五十以伯仲,死謚,周道也。《釋

文》:「冠,古亂反。」

以上有 不當五 也。 字。 道 别 孔氏曰:「名以名質,生若無名,不可分 某甫,仲、叔、季』,此云『五十以 則死後別立謚。案《士冠禮》二十已有『伯 以伯仲别之,至死而 一十之時,雖云『伯仲』,皆配『某甫』而言 川朋 ?,故生三月而 五十耆、艾轉尊,又捨其二十之字, 然則自殷以前,爲字不在冠時,伯 友等類,不 生號,仍爲死後之稱,更無别謚 十,以殷 尚質,不諱名故 加名。 可 復呼其名,故 加謚。凡此皆周 二十有爲人父之 伯仲」者, 也。 冠 又殷 而 周 道 仲 直 加

若異國君之使,其敬之當與己君之使同

》:「君使人弔、襚,主人迎於寢門外。」

<sup>「</sup>竹」、《釋文》作「丁」。後文「竹」皆同。

質家稱仲,文家稱叔。』上《曲禮》疏引《含文嘉 愚謂: 也者,實也 伯某」,是「伯某」之稱,尊於「某甫」可 其 氏 也。 之稱惟四,其昆弟多者,質家則積於仲,文家則 與此同,據《白虎通》,「稱」當作「積」。 五 至五十而後稱曰「伯某」也。《特牲禮 叔、季惟所當,而其後稱之則但曰 去『甫」配『仲」,而稱之曰『仲尼』是也。」 之時,兼字而言,若孔子稱『尼甫』,至五 叔等,末者稱 「《檀弓》『五十以 以爲是。 一十直稱『伯 祖曰「皇祖 周代是文、故有管叔、蔡叔、霍叔、康 五十以伯仲,賈、孔之説不同,蓋賈 冠時 某 仲」耳。 聃 字之,雖已曰「伯某甫」,仲、 甫」、《少牢禮》則 季也。」 伯仲,周道 《禮緯 賈氏公彦曰: 也」,是稱伯 含文嘉》云: 蓋伯、仲、叔、季 曰「皇祖 「某甫」, 入積於叔 知 仲 稱 +

鄭氏曰:「所以表哀戚。」 陳氏澔曰:

絰

以 則不然。蓋古者未有喪服之時,但 衰裳冠帶之屬,皆因吉服而易之,惟首 有忠實之心也。」 麻在首在要皆曰 表哀戚,後世聖 人因 絰。 敖氏 而 絰之言實, 繼公曰 不 去,且 異 凡 明 加 其 孝子 喪服 此 經 經

良輙反。」

日反,又求勿反。雷,力救反。綴,竹劣反,又竹衛反。躐,出于大門,殷道也。學者行之。《釋文》:「掘,求拙中霤而浴,毀竈以綴足,及葬,毀宗躐行,

小之制,以

爲輕重云。」

也。 死者無用,二則以牀架坎上,尸於牀上浴 鄭氏曰:「明不復有事於此。 行之, 傚殷禮。」 而 中雷,葬不毀宗躐 令水入坎中也。 出,行神之位在廟門之外。 死 而 掘室中之地作坎, 毁竈綴足者,一則示死者 行。 孔 氏曰: 毀宗, 毀 一則言此室於 學於孔 周人浴 中霤, 廟 門之 室 子者 不掘 中 西

霤。 謂: 道,謂 毀宗而 神,車躐壇上 死 毁 不 無 所毁宗之外。 可 廟 前 者 著 可 復 無 門 屨 著 綴足用 飲 朝 坊記》曰: 殷 也。 屨 出 事 西 食 廟 禮 邊牆 之事 ,故用毁竈之甓,連綴其足,令直 也 仍 從 宗,廟也。 燕几,不毀竈。殯於正寢,至 一而出 得 則行神之位在 正 若生時出行,則爲 而出於大門,一則明 浴 周 躐 門出, 浴 則 ,使道中安穩。 此 於中霤。」是周 用 行 恐 殷人殯於廟,至葬, 盤承浴汁,不 不 壇 死 · 毁宗 人 如 廟 冷彊 生 門 也 時 西邊 足 足 今柩 壇告 人浴 彻 此 · 掘 廟 辟 當當 亦 愚 中 行 行 戾 殷 於

哉 ? 既葬,子碩欲以賻布之餘具祭器。 子 如之何 柳 在 · 子 中雷,但不掘 之 母 其 碩 死, 粥 日 人之母 子碩 請粥 耳 請 以葬其母也? 庶弟之母。」子 具。 子 柳 曰 : 子柳 不 柳 可。 何 日 F 以

兄弟之貧者。」《釋文》:「鬻,本又作「粥」,音育。」 不 班諸 氏澔 以 而從其 何以 弟。具,謂葬之器用,明器、柳、翣之屬 通布 嫁之也。 鄭氏曰:「子柳、魯叔仲皮之子,子碩 人 幸,下篇所稱「顔柳」 葬其母,忠恕也。 具,謂葬之器用。 貧守禮如此。」 而『不家於喪』之言,確然不易,古人之安 可 母 爲利 0 貨財。 以 者,言貧 曰:「欲粥 兄弟之貧者,以分死者 吾 、儉也。 非義也 葬其母 聞 妾賤,取之曰買。 之 不家 無以 也 君子愛其親以及人之親 非仁也。 庶母 愚謂: 於喪,惡 君 爲 何以 賻布,所以送死,兄弟之 古者謂錢爲泉布,所 子 以治喪,則乏財可 是也。 葬具,欲稱家之有 不 ,言無其財。 子柳,孔子弟子 家 家於喪,謂 因 不粥人之母 於 所矜也。」 死 子碩,子柳之 喪 者 以 請 粥, 爲 因 班 粥 知 也 利 以 陳

貧者,亦死者之所矜,故以賻布之餘班之,

緣死者之意以廣其恩也。

邦邑,危則亡之。」
君子曰:「謀人之軍師,敗則死之。謀人之

之死 邦 請 師 與亡之義 見危人之國者,亦不敢自保 哀放於居喪。 國,離宗廟,去邦族,其禍 楚之大夫若成 大夫死衆。謀人之軍 邑。 死, 萬二千五百人爲軍,二千五百 辱國,而其義不可以 則 蓋 無 此 也。 輕軍 義 也。 謀人之邦邑,危則 得臣、荀林父等,皆以 師。 陳 亡,去國也。 氏 思其危之亡,則 師 祥 獨 道 生矣。 而至於敗,則 等於失國,其 其家,亦國 曰:「思其 亡之,以 春秋晉、 人 大夫 爲師 軍 無 敗 喪 去 敗 亡 輕

「樂哉斯丘也! 死則我欲葬焉。」蘧伯玉公叔文子升於瑕丘,蘧伯玉從。文子曰:

下樂五教反。瑗,于卷反,又於願反。」「璩」,其魚反。從,才用反,又如字。樂,音洛,下同,一讀曰:「吾子樂之,則瑗請前。」《釋文》:「蘧,本又作

鄭氏 請 欲害人良田。」 取」,豈其 則公明賈謂公叔文子「時然後言,義然後 之孫,名拔。 之地,以 前行以去,示不欲聞其謀 曰:「二子,衛大夫。公叔文子,獻 然 爲葬地,故言吾子若樂此,則瑗 乎? 瑗,伯玉名。 愚謂: 伯 則瑗 玉 也。 以 請 文子 觀於此 前 刺刺 欲 其 公

反。 弁人有 也,故哭踊有 哀矣,而難 傳,直專反。」 其 母 爲繼也。 死 節。」《釋文》:「弁,皮彦反。 而孺 子泣者,孔子 夫禮,爲可傳 EI: 也 爲 孺, 「哀則 可 而

鄭氏 曾 中 也。」 子 日 : Ė 「孺子泣、言聲 「哭父母 孔 氏 □: | | 有常聲乎?」曰:「中路 雜記 無節。 **\***: 難 曾 繼,失 申 問 禮 於

踊有節也。」 節。此所言在襲、斂之後,可以禮制,故哭曾子所言是始死之時,悲哀志懣,未可爲

户 叔 袒 孫 叔 髮,乃反於室,而男女奉尸以使於堂,今武 者所以爲變,冠者所以爲敬也。 也。始死笄、纚,至小斂乃加素冠,蓋殯斂 州 鄭 小斂卒斂,馮尸之後,主人至東房,袒、括 者喪之大節,故不敢以 冠 既 、者出户也。下云「出户」者,武叔出 袒 ,素委貌。」 仇,毀仲尼者。出户,乃變服,失哀節。 氏 ,且投其冠,括髮。 武叔之母死,既小斂,舉者出户,句。 出户,乃出户而袒,則主人不與於奉 、括髮於舉 曰:「叔孫武叔,公子牙之六世孫,名 愚謂:上云「出 尸 出户之後,失禮 子游曰:「知禮。」 不冠 臨之。 《士喪禮 户」者 笄、纚 也。 出 户

猶素冠也。 見大夫以上至大斂乃弁絰 之,可以見小斂前之有冠,又可以見大夫 謂小斂前,大夫、士皆素冠, 素爵弁而加此絰。」《曾子問》疏引崔氏説 經, 斂環經,君、大夫、士一也。」鄭氏云: 禮」者,反言以譏之也。○《雜記》: 尸,失禮二也。袒、括髮既後,故不復至 知,可以見大夫以上喪服之有弁,又可以 大斂,子弁経,即位 括髮,以見其悤遽失節之甚。 房,遂於出户爲之,失禮三也。 「大夫與殯亦弁絰。」與殯弁絰,則已喪 士小斂之同素冠也。《喪大記》言:「人君 士加素冠,大夫加素弁。 喪大記》所言大斂之弁経,皆謂大鬲之苴 股而環之。 至《雜記》所言「小斂環 小斂時,士素委貌,大夫 于序端。』《雜記》云: 今以武 ,而未大 小斂括髮後 子游曰「知 言投其冠 叔投冠觀 經 斂 以 \_, 及 前 可 東

絰,而注疏乃以弔服之環絰、弁絰混之,則

誤甚矣。説各見本篇。

無「師」字者,誤也。前儒如字,卜人及醫師也。」舉。《釋文》:「卜,依注音僕。師,長也,謂大僕也,本或扶君,卜人師扶右,射人師扶左。君薨以是

於生也

禮 之誤也。 用 手」也。三代之世,侍御、僕從罔非正 氏炎武 位 人 人即濮人」,蓋「卜」、「僕」、「濮」,古字皆通 人」,王氏應麟《補注》引《太平御覽》謂 者卧異矣。」 愚謂:《周 綴衣、虎賁皆爲吉士,與漢高之獨枕一宦 鄭氏曰: 也。《大射禮》:「僕人正 ·射人》:『大喪,與僕人遷尸。』」 者。 師 相 小師。」正者其長,而 曰"「此所謂『男子不死於婦 君薨 「謂君疾時也。 僕 人、射人,皆平生時贊正 以 是舉,不忍 書 ト當爲『僕」**,** 王會解》「ト 徒相大師,僕 師者其貳也。 變 也。 人之 君 ^ 顧 周 服 聲

死以僕人、射人者,未復之先,猶未忍遽變於牖下也。襲、斂遷尸,皆喪祝之屬,而始而并以其師也。君薨以是舉,謂始死遷尸此於僕人、射人皆言師者,言不但以其正,

人,音扶。爲,于爲反。緦,音思。」言也。或曰:同爨緦。《釋文》:「從,才用反。夫從母之夫,舅之妻,二夫人相爲服,君子未之

爲 服 母 舅之妻則 母小功,而從母之夫則無服, 孤稚恩養,直如父母,不可無服,所以 張子曰:「甥自幼居從母之家或舅之家, 也。 家 二人者服也。」● 同 非是從母之夫與舅之妻相對,乃 居者,又有夫之甥依舅家同居者 無服。 時有妻之姊妹之子依從 吴氏澄曰:「禮,爲從 爲舅緦,而 爲 甥 此

●「二」下、《集説》有「夫」字。

族曾祖父緦,❶姑之子,姊妹之子,女子子 若以從母之夫、舅之妻相爲服 之姊妹之子,下不言夫之甥,避文繁也。 母之母,母之兄弟,恩止於舅,故從母之 之子,皆由父而推之也。母族三,母之父, 日 則 從其甥立文也。且此二人者若相與同爨, 而 言,以爲有同居而食之恩,則雖禮之所無 無,故曰『君子未之言也』。 甥與舅之妻也。此二人者相爲服,禮之所 故 夫、舅之妻皆不爲服,推不去故也。 妻族 云「妻之兄弟之妻,夫之姊妹之夫」,不當 人,謂妻之姊妹之子與從母之夫也,夫之 一,妻之父,妻之母。乍看時似乎亂 "「先王制禮,父族四,故由父而上,爲 瀆 可以義起此服也。」 愚謂:上不言妻 一爲從母之夫服, 亂 無别甚矣,其可訓乎? 一爲舅之妻服。 又記或人之 而言,則當 0 朱 雑無 二夫 子

> 母之服 紀,子 者皆 不服 應服 服 大功,子從服總。惟從母,母服大功,子從 服 妻之所爲大功者,降三等則 遞降之,則亦無服矣。 無服矣。母爲世叔父母服大功,己降二等 加」者也。 而服者,視母降二等。 妻降三等,妻爲父母期,夫從服緦。 黨、妻黨之服,皆從服也。 小 期,己從服 無 緦,而不服者,蓋 也,舅之妻,母爲之報服小功者也,二 功,僅降一等、《喪服》傳所謂 細 乃加服也。 可從者也。 看 自餘母所爲小功者,降二等則 則 小小功。 皆 有 而 義 舅及舅之子,母爲之 至親 外親既遠,據本服 存 從母之夫,母之所 外祖 焉 從妻而服者,視 以 無服矣。 父母,母爲之 期 斷,世叔 愚 謂 以 自餘 從母 母

❶ 「族」、《朱子語類》作「從」。

野,鼎鼎爾 雖 喪事欲其縱縱爾,吉事欲其折折爾。 不 陵節,吉事 則 小人。 雖止不怠。 君子蓋猶猶 故騷 爾。 《釋 騒 故喪 則 事

郭氏曰:「縱瀆爲『總湏一之總。縱縱,趨「縱,依注音摠。折,大兮反。騒,素刀反。」

也。 之實,而 疾之中者,惟 而 而 可 舒疾之中。」 提。」陵, 事 鄭氏曰:「縱讀爲『總領』之總。 野矣。 以 貌。 息,怠則不足於敬之實而 騷騷 過於急而陵節 折折,安舒貌。 外適乎節文之宜也 躐也。 吉事固欲其舒,然不可以過 ,謂大疾。鼎鼎,謂大舒。 君 愚謂: 止,立 子能之,由其 ,陵節則不足於禮之文 喪事 俟事 《詩》云: 固 小人 時也。 欲其疾,然不 内盡 矣。 『好人 縱縱, 乎 怠,惰 猶猶, 哀 得舒 於緩 敬 提 趨

子弗爲也。 一日二日而可爲也者,君喪具,君子耻具。一日二日而可爲也者,君

鄭氏曰:「喪具,棺衣之屬。耻具,辟不懷

冒,死 孔氏 也。 不以久生期其親也。」 時 不 制,八 時頓 曰:「喪事 一日二日可 而後制」,是也。」 十月制,九十日脩,惟絞、紟、 具,故《王制》云『六十歲制,七十 ,棺則預造,衣亦 爲,謂絞、給、衾、冒 陳氏澔曰: 漸制 衾、 ";但 嫌

萬反。」
也,蓋有受我而厚之者也。《釋文》:「遠,天叔之無服也,蓋推而遠之也。姑、姊妹之薄喪服,兄弟之子猶子也,蓋引而進之也。嫂

大功。 鄭氏曰:「或引或推,重親 之"兄弟之子 是《儀禮》正經,記 妹之薄,欲其一心於厚之者。 夫爲妻, 期,姑、 期。 者 録《喪 姊 孔氏 妹 遠 出 服 曰 : 嫌。 姑、姊妹 適 》中三事 大 =功, 喪 姑、姊 嫁, 服 釋

❶ 「嫌」、《禮記注疏》作「别」。

期 恩也。 不報 也。 愚謂 其妻爲之服小功,其子爲之服 爲母同 「人有嫂之喪者,其父母 姑、姊妹之所以出 姑、姊妹於我,爲之服 姑、姊妹之薄,謂姑、姊妹之適人者, 至夫之昆弟,則不從夫而服,夫之昆弟亦 其子同於己子。 旁尊,不足以 而 喪服 贵 降爲大功也。受我 猶子,謂與己子同也。 然爲夫姊妹服 |有己身立於父母妻子之間,而 》經文 兄弟之子爲 妻爲夫之昆弟、姊妹、皆應從 推 情篤 而 遠之,所 嫂叔 加 於夫家,則恩殺於本宗,此 尊,故 引而進之,所以篤親親 而降也。 世叔 無服、喪服 小 以厚 功, 如其 齊衰、杖期,與父在 而厚之,謂其 父期 爲之服大功小功, 而姊妹亦報 爲己之服 男 兄弟 〇吴氏澄曰: 而 女之别 》。傳 齊衰、不杖 世 文。 叔 體 獨 夫 服 由 以 父 也。 服 服 受 同 期 之 者 13 報

> 嫂叔 乎 ? 謂「弔 也。 復常 或期、或大功、或小 子之服除 然同於無服之人也。 制服,而 相爲弔服加麻、《禮》有明據矣。 者,惟嫂叔及婦 後吉服。 父在爲母之例。 麻,不飲酒,不食肉,不處 於無服之人哉?❶ 相爲 則情雖 且若從其 服 愚謂:《喪服》記曰 哭則爲位,又弔 加 心喪,亦皆俟其子之期 而後吉服」,則父母 推而遠之,文雖殺而 麻 甚厚,而揆諸 0 重者 人降而 ^ 俟父母妻子之服既 奔喪禮》云「 功, 則 雖 然吴氏 無服 日 將以 爲 服 内, 無 昆 制服之義,亦已 加 朋 者麻 服 弟 謂 麻 如 何爲之斷 妻子之爲 友 無 情未嘗不隆 常當用 第子爲 服 「俟父 嫂叔 服 麻, 則 」,則 服 期 除 固 而 除,然 服 13: 鄭氏 而 非 雖 嫂 爲 而 後 欲 限 嫂 妻 恝 不 叔 位 加

0 服」、《禮記義疏》作「喪」。

上疑脱「孔子」二字。」食於有喪者之側,未嘗飽也。應氏曰:「「食」字

「爾將何之?」曰:「吾父死,將出哭於巷。」曾子與客立於門側,其徒趨而出。曾子曰:朱子曰:「哀有喪,不能飽也。」

曰:「反哭於爾次。」曾子北面

而

弔焉。

子之徒也。《聘禮》:「聘君若薨於後,入人使專之,若其自有然。」 愚謂:徒,曾以爲不可發凶於人之館。次,舍也。禮館鄭氏曰:「徒,謂客之旅。將出哭於巷者,

境則遂也。赴者未至,則哭於巷。」時曾子之徒蓋亦以赴者未至,故欲出哭於巷。曾之徒蓋亦以赴者未至,故欲出哭於巷。曾百於主人、衆主人之南,此乃北面而弔焉,面於主人、衆主人之南,此乃北面而弔焉,而於不爲位者之禮也。《奔喪禮》曰:蓋弔於不爲位者之禮也。《奔喪禮》曰:「聞喪不得奔喪,乃爲位。」若聞喪即奔,則不爲位矣。哭而不爲位。」若聞喪即奔,則

禮記卷八終

## 禮 記卷九

或 賜 進 史館 士 纂脩 及 父第翰林 孫 希旦 院 編 脩

## 檀弓上第三之三

曷反。 成用 器,神明之也。」《釋文》:「知,音智。 竽笙備而不和,有鐘磬而 孔子曰:「之死而致死之,不仁而不可爲也。 縢。味當作『沫』。不和 鄭氏曰:「成,善也。 ,瓦不成味,木不成斲,琴瑟張 而致生之,不知而不可爲也。 斲, 陟角反。 和,胡卧反。 竹不可善用,謂邊無 簨,息允反。 ,無宮商之調。 無簨虡。 味,依注音沫,亡 是故竹不 虡,音巨。」 其日 而不平, 明 無

其器如 不可彈 死,不可用則不致生,其謂之明器者,蓋以 也: 也; 瓦器則麤質而不成其黑光之沫,木器則樸 器以送死者,竹器則無騰緣而不成其用, 之,是無燭理之明,故爲不智。 故爲不仁。 者,而極以死者之禮待之,是無愛親之心, 不成沫,謂瓦 之,言神明死者也。 而 「之,往也,謂以禮往送於死者也。 明之道待之也。」 不成其彫斲之文。 所謂 雖 有鐘 此。 也 備物 往於死者,而 **学** 笙 雖 磬 器無 而 孔 而 不 無 氏 光澤也。」 可 備具 曰 : 縣 神明者非人所知 琴瑟雖張 用也。 挂 「沬, 之簨虡,不可 而 極以生者之禮待 不 備物 黑 和,不可 弦 先王爲 劉 光 而不平, 往於死 則不 氏 也。 日 吹 明 致 擊 故 瓦

有子問於曾子曰:「問喪於夫子乎?」曰:

簨

處,不縣之也。

横曰簨,植曰虡。

神

明

神

也。 其貨 子夏,又申之以冉有, 都,四寸之棺,五寸之椁,以斯知不 爲敬叔言之也。」曾子以子游之言告於有子。 朽之愈也。』死之欲速朽,爲桓司馬言之也 昔者夫子居於宋,見桓司馬自爲石椁,三年 游。子游曰:「甚哉,有子之言似夫子 則夫子有爲言之也?」曾子以斯言告於子 曰:「子何以知之?」有子曰:「夫子制於中 有子曰:「然。 南宫敬叔反,必載寶而 而 曰:「參也與子游聞之。」有子曰:「然。 子也。」有子又曰:「是非君子之言也。」曾子 是非君子之言也。」曾子曰:「參也聞諸 聞之矣: 喪欲速貧,死欲速朽。」有子曰 不成。 昔者夫子失魯司寇,將之荆,蓋先 也,喪不如速貧之愈也。」喪之欲速貧, 夫子曰:『若是其靡也,死不如 吾固 曰非夫子之言也。」曾子 以斯知不欲 朝。 夫子 ·曰:『若是 速貧 欲速 之以 也 也 朽 谏 然 夫

下「爲桓司馬」「爲敬叔」並同。朝,直遥反。」《釋文》:「問喪,問或作「聞」,喪,息浪反。有爲,于僞反,

鄭氏 於楚。先之以子夏,申之以 馬、宋向戌之孫、名魋。 卒後問此,庶有異聞也。 於仕得禄也。」 爲司空,由司空爲司寇。 孔子嘗爲之宰,爲民作制。 反,載其寶來朝於君。 孟僖子之子仲孫閱,●蓋嘗失位去魯,得 君子之言者,貧、朽非人之所欲也。 魯昭公孫于齊,曰:『喪人其何稱?』是非 小司寇。」崔所以知然者,魯有孟 『夫子爲司空,爲 曰:「有子,孔子弟子有若也。 小 孔氏 司 空 曰:「崔 中 也。 靡,侈也。 喪,謂仕失位也。 將之荆,將 都,魯 孔子由 冉有,言 從 靈 小 、叔、季三 邑名 中都 司 恩 敬叔, 空爲 汲 應 云: 桓 也 汲

「孟」上,據《禮記注疏》當有「魯」字。

問 莊 喪,問 魯司 往者 也。 是失 遠。 公十 家 則 不欲速貧,何也? 仕於楚,爲道 故 卿 而 焉。 亦 子 利 也」,是故「三月無 仕 知 爲 司 '寇,將之荆』者,則哀公六年之荆,亦 孔子 死 四 不祭」,「士之失位 者未嘗 ,將以觀楚之可仕與否。」 且失司寇之後,嚮宋不嚮楚,而云『失 司 IMI 失位 荷禄 年, 徒、 , 赴於魯, 魯人欲勿哭, 繆公召縣 陳氏 寇之後,非 縣子曰:「古之大夫,束脩之問不 爲小司 司 而 之楚 而 不得 澔曰:「將適 也,非 所以 馬、 亦豈以 寇也。 在哀六年。 禄。 司 處之之道也。 謂失司 蓋聖人雖不爲禄 空, 爲 君 禄也。 孟子 矯語貧 也, 則弔」。 又有 孔子 一楚,而 寇之年即之 猶諸侯之失國 日 滅氏 失司 其間 而 賤 惟 君子 使二子繼 以 爲 孔子之將 愚 寇 爲司 士 此 年 高 謂 一、在定 而 無 雖 月甚 爲 乎 寇, 仕 田 荆 ? 不 喪 問 子

> 交政 之。」公曰: 聞之,哭有 出竟,雖欲哭之,安得而哭之? 曰:「請哭諸異姓之廟。」於是與哭諸縣氏 釋文》:「繆,音木。 於中國 「然。 二道: 雖欲勿哭,焉 竟,音境。 然則如之何 有愛而 焉,於虔反。」 得而 哭之, 而 勿哭? 可? 今之大夫, 有畏 且 縣子 而 哭 臣

也。 境,言其無外交也。 脩,脯也。 縣子名瑣。 遣使弔之而 記》有大夫、士赴於他國君之禮,而莊子之 子 鄭氏曰:「君無 迫 在 赴,魯人欲勿哭,蓋諸侯於他國臣之赴,但 於勢。 ,齊大夫陳恒之孫,名伯 大夫,專盟 愛而哭之者, 齊强魯弱,而陳氏專政於齊,則 十脡爲束。 縣子知禮,故繆公召 不親 會、征伐之事,以 哭鄰 哭,爲其分 出於情。 交政於中國者,言 國大夫之禮。 束脩 卑而 畏 微 交接於諸 禮 而 愚謂 哭之者, ,尚不出 而 恩 問 疏 陳莊 之。 也。 政

陳

IIII

諸 其 諸 哭於異姓之廟者 喪固 縣 侯 臨 氏 者 於 不容於不哭矣。 外,杜 因其禮之所自起 預謂「於城外向 ,别於哭諸侯之禮 **企** 也,與 」傳》魯 其 八孔子哭 或 爲異 也 哭 此 姓

伯

高

於賜氏之義同。

然乎! 知 之,示民疑也。」曾子曰:「其不然乎 仲憲言於曾子曰:「夏后氏用明器,示民 古之人 也。 (胡爲而死其親乎?] 殷人用祭器,示民 夫明器,鬼器也。 有知也。 祭器,人器也。 周 人兼 其不 夫 用 無

知,所 鄭氏 之,表示其 言夏后氏用明器送亡者,以不堪用之器 仲憲之言,三者皆非。」 以以 曰:「仲憲,孔子弟子原憲。示民 有 示民疑,言使民 謂『致死之』。示民有知,所謂『致生 用之器送之,表示其有 無知 也。 殷人用祭祀之器送亡 疑 於 孔 無 氏 知 日 知也。 與 有 原 知。 送 憲 無 周

> 無知者 與人異 爲有知 之間 是死之義也。 古人雖質,何容死其親乎? 用鬼器,不用 兼用二器。 周家極文,言亡者亦應鬼事 雖與人異,恭敬應同,故用恭敬之器送之。 世兼用夏、殷之器,示民疑惑於有知無 也。 7,故純 譏 與 曾子言三代送死之器不同者,非 無知,質文異也。 然周 一則餘從可知也。」 用 人器也。 憲言三事皆非,而曾子獨 鬼器送之。 惟大夫以上兼 古,謂夏時也。 ,亦應敬事 若是無知 殷代質,言鬼 夏代文,言鬼 用 耳,士惟 丁,故 則 譏 言 知

死,問 游曰: 樹反。」 魯人則爲之齊衰。」狄儀行齊衰。 公叔木有同母異父之昆弟死,問於子游。子 狄儀之問 於子夏。 「其大功乎。」狄儀 也。《釋文》:「木,式樹反,又音朱,徐之 子夏曰: 有 「我 同 母 未 異父之昆弟 之前聞 今之齊衰, 也。

可

解

巾

子矣。 異父 狄儀 者,則 杖期 親也 之也 母 爲 之服 鄭 之齊衰三月,則必 昆 公叔文子之子。」 衰三月者而 子學於聖人,而其繆於禮 弟 而 大 氏 同 必不得已,援同 服 不可 嫁 也 母 曰 其 而其父母則不服 之也。 母 繼父有子 前 同母 然昆弟之名,從同 所生之子乃路 「木當爲『朱』、《春秋》作『戍』, 考。 且 絶 所 兄 爲 族 生之子。 異父昆弟,一爲 差降焉,其 弟 無 父後者,出 公叔木,衛之大夫,必 大功者,視昆弟降 之服 則 施服,母嫁 不 愚謂: 乎? **| 爨緦之義** 爲 爲 此 亦可已。 其 不同 人也 ,則必不從而 雖名 父而 母 子 魯 齊衰者 乃 一,何 服 居 爲 且 而 繼父之子,一 爲 生, 如 秉 不 服之,視齊 繼 從者,爲 昆弟、 齊衰、大 若不 服之有 父, 禮 此 服 以 等 ",又何 之國 本之 不 殊不 從 僅 服 昆 實 而 從 功 13: 之 ? 爲 其 非 弟 服 衛

> 君子 曰: 之後 按當音「盍」,何不也 財,君子弗行也。 子思之母 弗行 吾 也 何 死 也。 四 慎 於衛 方 哉 於子乎觀禮 吾 柳若 何慎 有其 吾聞之: 哉 八禮,有 謂 子 子 」《釋文》,蓋,無 思 其 有 蓋 日 (財,無 慎 其 子 諸。」 禮 其時, 無 子 聖 音, 其 思

禮者以 子思之母, 姑,不奉 服 曰:「父没則母 日 渠 而 以 人不爲制 故 : 議 不可 無 可 當 不 不 慎也,故曰「吾何慎哉」。 答之,蓋禮所不得爲, 問 : 服 服 祭祀,不下 服。 · 慎。 嫁 周 也。」宣帝 「父卒 母 玄成議是 而 無出義。 也。 爲 子 父後 · 母 思自 慈子,是自 嫁母 詔 嫁 則 也。 曰 王者不 言其 何 無 不服 婦婦 服 服 則 時 ? 絶 愚謂 ·爲無 之不 雖 故 〇漢《 也 韋 蕭 不 欲 柳 玄 若 太 故 義 慎 得 養 《喪 成 傅 石 戒 制

者 然後 IE. 杖 嫁 則 嫁 爲 適人,則其情既可原,而又有撫養之恩焉 夫 其 之,而彼乃自絶於其夫,且自絶於其子,則 服 父,不得已而去者也,命之反則反矣,猶未 服,嫁母 不言 自絶於其夫與其子也。 期 爲 母 死子幼,無大功之親,不得已挾其子以 尊 而 嫌 而從者之服,特言「繼母」,蓋但言「母 與出母之不得已而去者 》「杖期」章「父卒繼母 矣。 之杖 親 從 齊衰三年之服服之也。《喪服》於母 爲之服,然猶 母 繼 遠之服,又皆非 者 母 嫁 不服 降 嫁 之 期 不從者之服,則 此 則 服 而 則或爲旁親 從者之猶不服 又有 何也? 嫁而不從者,必不亦 止 加於此 一於杖期,不得以 所以服其母 蓋出 嫁母者,父未嘗絶 嫁,從爲之服 遞降之服,或爲 不 也。 不同 母 耳,非謂 服 者,見 母 矣。 也。 也 嫁 惟 父没 爲 而 因 絶 出 , 之 其 從 於 母 母 而

> 齊衰, 親。 子瑣 儒 欲以 滕伯 其 曰:「吾聞之,古者不降,上下各以 叔 出母之服例諸 文爲孟 父 也。」《釋文》:「瑣,息果反,依字 虎齊衰,其 嫁母,誤矣。 叔父也; 爲孟

其

皮

作

縣

「璅」。

爲,于僞反。」

文。 也。 伯 也。 降 鄭 親 弟之子,皆著齊衰,是上不降遠,下不降卑 伯,是皮之叔父。 降之,各隨本屬之輕重 下,謂從子、從孫之流。 庶,惟不降正耳。 卑。 長 氏 文叔父。 上,謂旁親族曾祖 長之意。 曰:「古,謂殷 孔氏曰:「周 朱子曰:「夏、殷 伯文, 孟皮,是滕 殷 到周 時 滕伯上爲叔父,下爲 殷 時 來 滕 禮 世 、 又添· 也。 、從祖 以貴降賤 君 以 而 而 彼雖賤,不以己尊 伯 也,爵 服之。 上 上,大概 E 兄弟之子。 出 · 雖 不降遠 及伯叔之班 許 貴 多貴 爲 虎,是滕 以以 不降 只 伯 下 下 適 是 '',名 兄 滕 降 不 親 賤

降。 諸侯 禮 公搜剔出來,立爲定制,更不 不 之子,不臣諸父而 絶 數 不降。 如如 此皆天下之大經,前世所未備 絶,大夫降。 始 封之君,不臣諸父、昆弟, 姊妹嫁諸 然諸 臣昆弟,期之喪,天子、 侯者,則 侯 大夫尊同 可易。」 亦不 則 到 絶 封君 周 不 亦

不深 后 釋文》:「易,以豉反。」 木 長 日 : 思也。 「喪,吾聞 買棺外内易。』我死則亦然。」 諸 縣 子曰:『夫喪,不可

《世本 鄭氏 買 好 喪,不可不深思 『厚』,此云『后』,其字異耳。 無名木者,故鄭直云其後。 世 棺,孝子之事,非所託。」 本》: 『孝公生惠伯革,其後 曰:「后木,魯孝公子惠伯鞏之後。 》云『革』,此 ,使之平易。 長慮 、故買 云『鞏』;《 棺之時,當令精 后木述之以語 縣子言孝子居 惠伯之子孫, 孔氏曰:「案 世本》云 爲厚氏。」

> 易也。 十歲 者 則 屬託 其 與? 有 子, 死 制 譏 言我死亦當如縣子之言, 此是孝子所爲之事 而 后木 後買棺者,豈 則棺固不俟死 也。」 愚謂 謂 而後具矣。 貧 ,非是父母豫 ^ 王 而不能預 制》言「六 買棺 據此, 外 具 所 内

仲梁 曾子 曰:「尸未設 子 曰:「夫婦 飾 方 ,故帷堂,小 亂, 故 帷 堂 斂 而 小 徹 斂 帷 而

徹

帷。」

謂: 既 徹 之儒」者。 言『方亂』, 鄭 小斂 氏 帷 仲梁子,疑 日 此 :「斂者動 而 徹 據 帷堂有 非 襲、斂 帷 也。 即《韓非書》所謂「仲梁 摇尸,帷堂,恐人褻之。 時 則 仲 帷堂 將 時 : 梁 大 子, 斂 而 則 言 帷 魯 也。 將 堂 人。」 既 襲 設 帷 斂而 飾, 氏 愚

<sup>0</sup> 恐」, 據《禮記注疏》當作「爲」。

分堂上堂下之位 故 謂 主人主婦馮 帷堂。 襲、斂也。 夫婦方亂 尸,在 襲、斂 也。 小斂徹帷之後, 謂 必 然男女奉尸 動 男女同 摇 尸 ,恐人褻之, 在尸側 侇 則 於堂, 帷 堂

末失也。 西方。斂斯席矣。」小斂之奠在西方,魯禮之 小斂之奠,子游曰:「於東方。」曾子曰:「於

之不爲夫婦方亂明矣。

席。」 猶 室 堂,疏云: 鄭氏 有席故也。 方,非也。 於其右,象生人以右手食 南首 後 ,然後設席。 也。 曰:「曾子以俗説非。 愚謂: ,尸東,尸之右也。 「當云『奠於室』。」此後人傳寫之誤 魯末 小斂奠無席,是時 至大斂,尸已在 《士喪禮》小斂 禮失,曾子見當 言小斂有 也。 席 凡奠於尸者,必 柩 户在床,床本 又大斂 「奠於尸東」。 曾子謂 亦 時 ,而設奠 非 所 也。 行, 奠於 乃 在 在 末 西 有

爲禮本如此,故記者言此以正之。

上去逆反,下七回反。繐,音歲。布細而疎曰繐。」縣子曰:「綌衰、繐裳,非古也。」《釋文》:「綌

鄭氏曰:「

非

時

尚

輕

涼

慢禮

愚

謂

服 者,諸侯之大夫爲天子用之爲 絡,麤葛 不依五服升數,但以 也。 總,縷如 小 輕細爲貴,故 功 而 成 齊。 布 周 四 以 末 升 絡 喪 半

子蒲卒,哭者呼滅。子臯曰:「若是野哉爲衰,以繐爲裳,非禮也。

哭者改之。

謂 : 鄭氏 哭其父呼 唯復呼名。子臯,孔子弟子高柴。」 而 曰 : 反。 此哭者,蓋子蒲之尊屬,非子蒲之子 「野,不達禮 日: 「 哭則 滅也 滅、蓋子蒲名。 敬鬼神,不 也。 唯復呼名,冀其 復 呼 野哉,非之也。 其 名。」 孔 聞 名 氏 愚

杜橋之母之喪,宮中無相,以爲沽也。《釋

文 >: 羔裘、玄冠,夫子不以弔。《釋文》:「易,音亦,徐 夫子曰:「始死,羔裘、玄冠者,易之而 母 鄭 子喪親悲迷,禮節事儀皆須人相導。 「相,息亮反。 死,不立相,故時人謂其於禮爲麤 氏 日: 「沽猶略也。」 沽,音古。」 孔氏曰: 「禮,孝 略。」 杜 己。

橋

以豉反。」

衣也。 既成 則 之前者皆吉服,以主人尚未 方以吉服至者也。 有羔裘、玄冠者 已深衣,而至此特扱其衽明矣。 上衽」,但言扱上衽,而不言改衣,則前 之玄端而深衣也。《問喪》云「親 喪大記 **弔衰皆襲麑裘也** 服 則 羔裘、玄冠, 吉服也。 》「疾病,男女改服」,謂改其養 不以 謂謂 吉服 易之者,改而素冠、深 疏親不與於養,至死 吊矣。 喪服也。 羔裘不以弔, 弔於未成 此始 始死 死 主 人 服 扱 疾 而 13 此

無。 縣,音玄。 非之者哉?」《釋文》:「稱,尺證反。 亡,皇如字,一音 苟亡矣,斂首足形,還葬,縣棺 曰:「有亡惡乎齊?」夫子曰:「有,毋過禮 子游問喪具。 於庶 便也。 鄭氏 富 齊 而塴 謂衣衾足以藏形體而已,襲不必三稱,小 氏曰:「縣棺而窆,謂但手 也、《春秋傳》作『埔』。」疏云:《左傳》昭十二年 封,不設碑經,不備禮。 鄭簡公卒,將爲葬除」,「司墓之室有當道者 惡,音鳥。 一而踰 ,謂厚薄 ,弗毁則日中而塴」,杜注云:「塴,下棺也。」 曰:「惡乎齊,問豐省之比。 封,依注作『窆』,彼驗反,徐又甫鄧反。」 禮 言已斂即葬,不待三月。 齊,才細反,又如字。 厚 之劑 夫子 葬也。 愚 謂 量 日 也 斂, : 稱, 「稱家之有亡。」子 藏 毋 隨 封當爲『窓』,下 也。 過 毋,音 縣棺 也 禮 而封,人豈 者,不可以 無。 斂首足形, 而下之,同 亡,無 ,毀之則朝 還,音 還 縣 棺 之言 也。 旋。 棺 有 游 而

備 下 能 之禮然也。其餘則亦各視其禮之所當爲 斂不 母者矣,亦豈所以安其親哉 極 **室者**,謂 而 葬,斂畢 而下之,庶人之禮也。 禮 儉其親,然無 及者,人固不之責也。 其力之所能爲者,具之而已,力之所 用 繂 以 引棺 必 則 + 不 即葬,不待三月也。 將 九 用繂 有 稱,大斂 取 ,使人卻行而下之。 之以 財不可以爲悦,苟必 而 卻行下棺 非 不 義 此所言,謂 必三十稱 蓋君子雖不 如粥 1,但以 士葬 庶 雖 縣 母 其 繩 也 亡者 以 期 以 縣 棺 葬 於 天 不 棺 還 而

司 人。」《釋文》:「賁,音奔。 諾。」縣子聞之曰: 士賁告於子游曰:「請襲於牀。」子游 氏 死 鄭氏曰: 、子游 廢牀。 字。 「請襲於牀、時失之也。 當言『禮然』,言『諾』,非也 孔 「汰哉叔 汰,本又作『大』,音泰。」 氏 曰:「案《喪大記 氏 禮,唯 專以 日 》始 叔 始 許

> 大也。 聞 禮 諾之,如似禮出於己然,是自矜大,故縣子 據禮以答之。 死 襲在 而 廢牀,至遷尸及襲,皆在於牀。 譏之。」 叔氏,子游别字也。 ·於地,故司士賁告子游。 子游不據禮以 愚謂: 司士,夏官之屬 凡諮 答, 而 禮 汰 當 專 自 事 時 輙 許 當 矜 失

曰明器矣,而又實之。」宋襄公葬其夫人,醯醢百甕。曾子曰:「既

賁,蓋以官爲氏

者

多,但 六年,猶有襄 鄭 皆實,是 夫人』者、蓋 秋》,宋襄公卒在僖公二十三年,至文公十 之,是亂鬼器與人器。」 亦 實明器 氏曰:「言名之爲明器,而 亂 ,故《既 鬼器 初取夫人。 夫 人人在。 與 夕禮》云『甕 器 也。 此云『宋襄 曾子不 孔 氏曰:「案《春 士 與 無 譏 祭器皆 祭器 公葬 醯 與 其 、祭器 器 其 之 實 則

禮記集解

器 氏 侯 屑 以專用 兼 ,則分半以虚之。」 用 又云『甒 鬼 鬼器,則分半以實之。 器、人器,則空鬼而 <u>-</u>: 醴 酒」也。 實 殷人專用人 若大夫、 夏 諸

「可也。」 孟獻子之喪,司徒旅歸四布。夫子曰:

也。 徒,皇氏以 還 布 乃司徒之旅也,故主爲孟氏 宰,則宰夫屬 夫在天子爲冢宰之考,諸侯以 貪,善其能廉。」 鄭氏曰:「獻子,魯大夫仲孫蔑。旅,下士 司 諸大夫之喪,使其旅 徒。《左傳》昭二十四年,●叔 其人也。 ,謂四方之賻布。 司徒使下士歸四方之賻 爲國之司徒,熊氏 可也者,善其不家於 於司徒。 愚謂 歸之者,以喪用 帥 其治大夫之喪者, 《周禮 有司 歸 布。 以 而 • 宰夫》: 司徒兼 孫有司 喪。 四 治之。」宰 爲 時 家 布。 之餘 人皆 臣 之 司 四 冢 馬

> 臣司 鬷 司 謚敬子者,以此駁皇氏之説。案《記》但 有 可 旅 戾。 解 徒,初不言司徒敬子,而疏説如此, 徒敬子。 也。 ,則疑國之司 既有司馬 又謂魯司徒爲季氏,季 徒 則 耳。 亦有 司徒。 孔 氏 以 司 但 徒 此 氏 爲 司 不 無 家 徒

讀贈 賓奉 子譏其禮之繁也 時 行 送死者曰 史又讀之,所以 鄭氏曰:「祖 主人之史當柩 也。 而 ,曾子曰:「非古也,是再告也。」 又讀之,故曾子以 幣 殷 總 禮 賵。 殯 將 不讀赗 而讀赗, 讀賵,謂書賵物於方 東前束讀之也。 命,是已告於死者矣,至 存録 之。 至 賓致命將行,主人 周 爲再告。 禮 愚謂: 始有之,而 然致赗之 古, 以 謂 車 將 之 殷 馬

四

❶ 「四」,據《春秋左傳正義》當作「五」。

革,紀力反。」 於人,吾可 成子 食之地而葬我焉。」《釋文》:「遺,于季反,又如字。 也,生有益於人,死不害於人。 至乎大 高寢疾,慶遺入請曰:「子之病革矣,如 病 則 以 死 如之何?」子高 害於人乎哉 ! 曰:「吾聞 吾縱生 我 死 則 擇不 無 益 之

賢乎。 耕。」 遺,慶封之族。 鄭氏曰:「成子高,齊大夫國成伯高父也。 夫樂瑕丘 人,薄葬 愚謂: 尚 而欲葬,爲石槨而三年者,不亦 儉 蓋 大病,謂死 革, 近於墨氏之意。 急也。 也。 不食, 子 然 高 謂 之 以 不 視 爲 墾

氏曰:「「喪」下當有「如之何,子曰」字。」處、言語、飲食衎爾。」《釋文》:「衎,苦旦反。」〇陳子夏問諸夫子曰:「居君之母與妻之喪,居

壤,而丈反。」

不能至。」 陳氏澔曰:「君母君妻,皆服鄭氏曰:「衎爾,自得貌。爲小君喪,惻隱

齊衰、不杖期,然恩義則淺矣,故居其喪如齊衰、不杖期,然恩義則淺矣,故居其喪如

賓客至,無所館。夫子曰:「生於我乎館此。衎爾,和適之貌。」

死

於我乎殯。」

《聘禮》:「賓人竟而死,遂焉 生而 之禮然 而殯。」客死於館,而使之就 論 語》曰:「朋 無 也 所館則館之,死 友 死 無無 而 所 無 歸 於我 ,主人爲之具 而殯焉,館人 所歸則殯之。 殯。」蓋

周於棺,土周於椁。反壤樹之哉?」《釋文》:弗得見也。是故衣足以飾身,棺周於衣,椁國子高曰:「葬也者,藏也。藏也者,欲人之

子高 鄭 深邃,不使人知,不當更封 高之意,以人死 氏 意 曰:「國子 在於儉 可惡,故 高 非 成成 周 禮。」 子 備 高 衣 壤 也。 衾 孔 種 樹以標之。 棺椁 氏 成, 日 z,欲其 謚 也。 端與? 量耳」。 也。 及此者, 豈陵冢 之、宜其慮未及此也。莊子言「儒以《詩》 圭、璋、璧、琮之屬,朱子謂 外而已,不必大也。《周禮 意 《禮》發冢」,而子高之言如此,亦若有 身,言僅足以 在 棺周於衣, 椁周於棺, 言僅足以 於 儉 蓋椎 非 埋發冢之事,周公時尚未有 唐 飾身,使勿露而已,不 禮之法。」 發掘之禍,當時已有其 「周公要是 ·典瑞》斂 愚謂 衣 未思 周 預 P 必 足 防 用 其 多 以

謙辭。」

馬及,如字,讀下屬爲句,故《釋文》無音,王肅讀平聲,屬上何觀焉?」《釋文》:「燕,烏田反。」○案「與」字,鄭注訓何觀焉?」《釋文》:「燕,烏田反。」○案「與」字,鄭注訓見曰:「聖人之葬人與? 人之葬聖人也,子孔子之喪,有自燕來觀者,舍於子夏氏。子孔,在心。

異聞。若人之葬聖人,與凡人何異,而子王氏肅曰:「若聖人之葬人與,則人庶有

禮。人葬聖人,則未必皆合於禮也。蓋亦其宜也。子夏以爲聖人葬人,則事皆合子,夫子尚往觀之。孔子之葬,燕人來觀,何觀之?」 陳氏澔曰:「延陵季子葬其

「坊,音防。鬣,力輙反。」
「苦者夫子言之曰:『吾見封之若堂者矣,見若覆夏屋者矣,見若斧者矣。」 「苦者夫子言之曰:『吾見封之若堂者矣,見 「昔者夫子言之曰:『吾見封之若堂者矣,見

鄭氏曰:「封,築土爲壟。堂形四方而 蓋 殺刃上而長。孔子以爲刃上難登,狹又易 坊形旁殺平上而長。 斬止之。旁殺,蓋高 爲功,故從若斧者。 屋,今之門廡也,其形 廣二尺,長六尺。 馬鬣 斬板 旁廣 四尺,其 覆,謂 謂 封,俗間 而 斬 茨 卑。 廣袤 其 瓦 名。 縮 斧形旁 也 也,三 未聞 高。 夏

與 板。」 高 北門外西, 之袤,則 板斜 此 俗稱 板 兩邊 封形似之。 之,故兩下屋名爲夏屋。 也 夏言夫子欲從若斧者,恐燕人不識,故舉 之形,故鄭舉漢 注。』殷人始爲四注,則夏后氏屋但 世 原 平, 八 室, 則 葬墳 一孫據 殺, 九 用用 馬鬣封以語之。馬騣鬣之上其肉薄 墳 則 殷 尺,全 賈 未 惟 成 斬 繩約板令立,内 人 同。」 當 氏公彦日 墳四方, 聞 高 而 斷 重 時 三斬板者,築墳之法,側 也。 四 已止 無 所 所 屋 尺耳。 馬 約 法爲況。」 見 四 孫毓云: 其 鬣 板 前高 呵 ,其墳或後人增益,不 :「案《匠人》『夏后 封 封 繩 其 也。 之形,●不 而 土板中築之,土與 後 鄭 漢時門廡 東 孔 更置。 下,形似卧斧, 云: 西之廣,南北 板廣二尺,三 孔 子墓,魯城 氏 四 三徧 日 止於三 爲 兩下 四 板 兩 子 如 於 下 爲 氏 几

> 婦 人不 · 葛帶

之。 也。 質,故於其所重者有除 敖氏 経不 首,婦人重要。 子首經、要經皆變之,婦 至小祥而除之。 間 皆 也。 而 而 傳》云: 變。 五服 麻帶」、《士虞》記婦 除之。 繼 非 愚謂: 此言「婦 公曰: 專爲齊斬婦 皆然。 蓋 『男子重首 婦 其 帶, 喪至卒哭,而變麻服葛, 人質,於所 人不葛帶」、《少儀》云「葛 緦 齊衰 婦 注疏惟 要經 麻 人言也。 者, 期 --, 婦 指 也。 無變。 以 據 卒 人 Ŧī. 人重 齊 至 重 則變首經 説首經,不説 凡 服 哭 斬 小 者 婦人雖不葛 其三年者, 之 絰 要。」❷婦 婦 既 功,則皆終 有 男 親 人言之, 退 除 言 子 而 無 而 也 要 男 重 人 變 除

喪

非

絰

據 禮 記 注疏》當作「今」。

要」、《禮記 注疏

四

四

哭之帶,必去其故 帶 絰 爲大小之差也。 而 其 (受服之 經 大 帶五 小 分之一,乃得與 與 初 喪之帶 同 其 卒

有 薦

者。」 同 則 謂 若 禮 鄭 大斂,士則特牲三鼎 殯後朝夕奠,醴、酒、 言。」 愚謂 矣』、《少儀》云『未嘗不食新』,皆指五 物,若《月令》「以 士,但 盛饌 也 氏 新,如 穀之新 》注曰:『薦 曰: 也 朔 朔奠。 孔 「重新物,爲之盛饌。● 熟者也。 而 氏 若薦 不 曰:「大夫以 薦新,以 新, 望。」敖氏 新穀於殯宫,其禮 雛嘗黍,羞以 薦 ^ 其 脯、 春秋傳》云『不 五穀若時 五穀爲 一禮盛 醢 上,朔望大奠。 而 繼 象 己。 主 公曰: 含桃」是也 果 生 而 又《 物 朔奠 與 兼 食 土 「新 新 朔 朔 及 穀 他 喪 奠 食 視 新 出 而

> 者,不 鄭 上,亦皆 除者,謂 氏 日 視主人。」 : 除 既 卒哭當 其 葬卒哭,則緦 重 服 變, 而 愚 受以 謂 衰 麻 輕 麻 既 者 服 除服 葬,各 變 也 之, 小 以 或 功 其 有 以 服 除

池視 重雷。 《釋文》: 「重,直容反。」

雷人此 爲池。 宫中 也。 鄭氏 重 爲之,形如籠,衣以 注,去後餘三。 木爲之,用行水,亦宫之飾 池,柳車之池也。 雷 曰 : 以竹 有 天子 重霤者, 木中,又從 承 「池,如 雷, 爲池、衣以 四 云以 注, 大 屋 屋之有承 大夫惟前 木 承 銅 四 青 在車覆鼈 青 中 霤 面 爲之。」 布 也。 布, 而 爲 後二,士惟 霤 以 雷也。 縣 重 於地 也。 以 承 甲 雷 銅 木爲之,屋 鼈甲,名之 之下, 孔 魚 故故 柳, 氏 諸 焉。 承 侯 謂 霤 織 딩 : 宫 在 四 爲 竹 象 以

既

葬

各以

其

服

除

盛饌」、《禮 記注疏》作 殷奠」。

前。柳車象宫室,池象重霤,方面之數,各

視生時重霤。」

蒲歷反,徐房益反。」
君即位而爲椑,歲一漆之,藏焉。《釋文》:「椑,

鄭氏 惟 即 甓 棺 之不合。」 侯則王可知。 三云漆 麗然 中 位 不欲 日: 而 造此 也。 杝,則知 「歲一漆之,若未成然。 空虚 人君 棺 孔氏曰:「君,諸侯也。 椑, 她棺親尸者, 漆之堅强 1,每年 不漆杝棺外屬 無論 如 急有待也,故 少長,體尊備 漆,示如未 等。 藏焉,虚 藏物 物,故 藏 成 言諸 焉, 也。 於

「楔,悉節反。綴,竹劣反,又音竹衛反。飯,煩晚反。」復,楔齒、綴足、飯、設飾、帷堂並作。《釋文》:

其

中。

令著屨不辟戾也。飯,以米、貝實死者口含時不閉也。綴足,以燕几綴死者之足,復,招魂也。楔齒,以角柶拄死者之口,使

之。 也。 後,故退在下以見意。 之前,故以「飯、設飾」繼「楔齒、綴足」言 貝于笄,實米于筐,饌于西序下,皆在沐 雖在帷堂、沐浴之後,而陳襲事于房中 齒、綴足、飯、設飾、帷堂爲次者,蓋 乃帷堂,又沐浴,乃含而襲。 並起也。 中 也。 帷堂雖在飯含前 作,起也 設 案《士喪禮》復後而 飾, 謂 並 襲 作者 也。 ,而徹帷則在小斂之 謂 帷 堂, 以 上 張 楔齒、綴足, 此 諸 帷 以 於堂 事 復,楔 含、 -,實 浴 襲 時 1

父兄命赴者。

《士喪禮》「乃赴於君 兄爲 孝子喪親,悲痛 命 赴者,拜送」,是也 命之。 惟 赴 迷亂,故凡赴告之人,皆父 於 君 ,主人西階東,南 則 親 命,敬君 也。 面

●「合」,原誤作「令」,據《禮記注疏》改。

君 也。 己。」 門 嘗 事 鄭 復 正 后 寢 以 所 以 於 氏 天子 有 内 小 下 日 0 愚謂 寢 事之處皆復焉。 賈 廟 小 氏 復 小 大 及寢 尊 寢 處 公彦 祖 寢 小寢, 者 Ŧi. 亦 而 兀 求 · 正 小 日 : 自 己。 親 祖 之 燕 門 寢 廟 備, 「尊者求之備 大 寢 婦 以 卿大夫以下 0 祖 也。 人無 亦 大祖 内, 諸 他 庫 侯 大寢,正 外 廟 門 H 大廟 事 小 及 所 四 寢 寢 故 自 復 嘗 郊 也 寢 自 凡 有 而 Ŧ

僕》: 鬼 郊。 門 以 亦 「復於小廟。」諸侯復於庫門, 冕 隸 當復矣 服 僕 復 \* 於 其 大廟 復 亦夏采爲之與? 於 以以 小 乘車 寢、 大 建 綏復於 寢 則 天 子 祭 四

庫

門,諸

侯之外

門

也。

始

於小

寝,而終於

兀

郊,

自

内

以

及

外

也。

《周

禮

夏采》:

不 剥 奠 也 與 ? 祭肉 也與? 釋文》: 剥 邦

角反。

與,音餘。」

禮 愚謂 埃。 之, 醴、 醴 既 可得倮 酒 巾 爲 氏 其 鄭 脯 有性肉 盛 久 之也。《士喪禮》又云始死,『脯、 日 ,奠於尸 『奠於尸 氏 酒不 酒 此亦 醢、 此脯、 也 設 日 皆 有 露 塵 : 剥 醴、酒 不 巾 脯 牲 無 也 埃 猶倮 ф 東、祝受巾 剥 醢 也。 醢 肉 東 與,語 牲 加 之奠不 猶 之奠巾之者, 則 以 肉 案《士喪禮 也 露 如 倮 牲 案《既夕禮 其 而 無 也。 辭。 初 也 肉 禮 旧 脯 ψ̈́ 巾者, 設 與 略 ,巾之」,是有牲 有 喪奠脯、醢 醢 謂 有 醴 也 脯 不 又殯 》,小 之奠 喪不 牲 醢 酒皆巾 據 ·巾。』是 以 \* 肉 朝 室 其 斂,陳 不巾 後 倮 則 則 廟之奠巾 内 在 朝 之, 露 不 巾 脯 堂 醢 也 脯 夕 奠者 設 之, 以 0 恐 肉 醢 鼎 醢 奠 醴 巾 其 塵 則 孔 與

既 殯,旬 而 布 材 與 明 器

鄭 氏 티 : 「木工宜乾腊 且. 豫 成 材, 材

也。」 班 椁,獻明器之材於殯門外」,是也。」 其木預暴乾之、《士喪禮》筮宅吉,『左還 布告,下覓椁 孔氏曰 材 布 及 明器之材。 班 也 殯後 或云: + Ħ 布 而

朝奠日出,夕奠逮日。

時也。 使 之後,哀至則哭,或一日二日 除朝夕哭之外,廬中思憶則哭。 種:一是未殯之前,哭不絶聲。 事 鄭 万,反 氏 曰:「謂 君使之也。 必有祭。」 此云『哭無時』,謂 既 練。 既小祥,可 孔 或時 氏 티 : 爲君 小祥之後也。 一哭 一,而 爲君使。 二是殯 無 服 三是 無朝 金 時 革 夕之 有 小 《禮 祥 後 之

> 還也 期 運 | 云: 不使。 爲 『三年之喪 使還 期 内 家,必當設祭告親,令知其 不使 期不 則 期 - 使。』《: 外 可 公羊 使 也 - 傳》亦 反

反,亦出必告、反必面之義

也。」

練 三」同。 絇,其俱反。 瑱,鹿裘衡、長、袪。 「縓,元絹反。❶ ,練衣黄裏、縓緣,葛要經,繩 袪,起魚反,一音丘據反。」 瑱,吐練反。 緣, 悦絹 反。 衡,依注作『横』,華彭反,下『衡 袪,裼之 要経,一遥反,下大結 . 口 也 屨 無 《釋文》: 約, 反。 角

也。 外除 鄭 則 縓 衡當爲『横』,字之誤也。 爲 先 氏曰:「小祥練冠、 飾。 時 練 而 瑱,充耳也,吉時以 狹 爲 短 黄之色卑於纁 裘,横廣之,又長之,又爲袪, 無 袪 可 知。 練 中 吉時 袪,謂褎緣袂 玉。 衣 縓 靡裘。」 纁 以 人君· 黄 之類,明 有 爲 瑱。 内 孔 П

●「元」、《禮記注疏》、《釋文》並作「七」。

八

麻屨也 色, 微飾 外除 裏用 也。 也。 賤 衣 氏 小 耳,人君吉時用玉 屨,卒哭受齊 去首經,惟餘 正 其 祥 「, 黄 故 有 服  $\Box$ 與 少,但 、袪也。」 黄 縓爲 稍 小 異 爲 喪 祥 而 飾 承 飾 練 角爲之。 中 練 相 喪時 約, 淺絳 之前 領、緣用 則 小小 見 衰 衣 也 宜 更易 外 屨 衰 要 裹 而已,故小祥而爲之黄袷 祥 也。 愚 則 色,緣,謂 也。 頭 裘 蒯 經 也 練 也 謂 同 作 爲之,初喪亦 飾 縓者,領、緣外也。 狹 衣 冬時衣 蔍 也 衡 用大鹿皮爲之,鹿皮 横 葛要絰者,小祥,男子 也,吉有喪無。 IE. 者 屨 小 而 小祥謂之練者,始練 廣 横 繩屨 服 ,至小祥受大功 祥 短 中衣領及褎緣也。 練 大者,又長之,又 也。 一, 袂 裹 不 而 爲 者, 可 有 著練 中 又 袪, 變,中 裘,吉時 無 謂父喪 衣。 無 ~,至小 冠、 褎緣 袪 瑱, 明其 黄 衣 練 繩 祥 貴 充 菅 裏 非 至 惠 中 

縓。」 哭 灰 布 卒哭受以不杖齊衰之疏屨,既練受以大功 也 裹,則吉服 中衣與深 以采色爲之, 爲之,而染爲 緣各視其冠。」練中衣之緣,亦用其冠之布 飾 爲母冠九升,皆加灰練之。 大 小祥,以其冠言之曰 冠六升 變麻 升 爲 功 練之,又染爲黄爲之裏,以 也 |緣,中 布 中衣也。 繩 ,皆不練。 縓,淺 爲 屨 服 鍛 冠 ,大功之屨 葛, 中 衣同制,然深 衣 也 而 衣 始喪 之緣 縓 絳 至 爲父小祥, 勿 其中衣升 色。 有 色。 練, 喪冠 灰。」爲 裹 也。 無 [練。 除首絰 也 可 蓋吉 ^ 采, 不練,故《喪服 爾 衣 ^ 知 喪服》 雅 父 至 斬 禪, 練 時 數 衰 \* 小 以其祭言之曰 前 衰始 是 與 七 葛 衣者,練大功 中衣之緣,皆 其在 而練 升,爲 要 衰 而 傳 要 父 経者, 漸 同 喪菅屨 冠 日 經 染 中衣 内 飾 謂 猶 可 母 傳 而 升, 也 在 有 差 加

飾 常 時 繩 其中衣也。 之,又飾其袪也。 已有裘,而短狹無袪,至練而横廣之,又 物飾之、《詩》言「羔裘豹袪」是也。 同用角爲之,貶於吉也。 夫、士以石之似玉者。 屨 麻 有爲焉 以 無 屨 麻 ,則雖裼而 裼 屨。 約,去 爲常, 爲母 則 袪,裼之可也者,裼爲見美,吉 而 飾 露其中衣亦可也。 袒 無 有 也 始喪薦屨,卒哭受以大功繩 變 爲焉則 裼者,袒上服之衽 小祥裘 也。 瑱,吉時人君 初喪去瑱,練,貴 約, 屢頭 襲。 既 裘之袂口,以 有袪,差 喪事 飾 以 前 以 也 玉 襲 向 此 而 文 長 他 賤 大 爲 露 雖 喪

鄰 有 不往 殯 居 往 鄭氏曰:「兄弟必往,親骨肉也。 者 疏 ,聞遠兄弟之喪,雖緦必往。 也 無 親 三年之喪不以 也。 愚 謂 弔, 遠 兄 惟兄弟之喪, 弟 非兄弟, 謂 雖鄰 不 口 雖 不

> 弔。如有服而將往哭之,則服其服而往。」 弔也。《雜記》曰: [三年之喪,雖功衰不雖怨必往,蓋以己爲之有服而往哭之,非

所識,其兄弟不同居者皆弔。

羊支反。」 反。被,皮寄反。厚,胡豆反,度厚薄曰厚,皆同此音。 她, 起棺一,梓棺二。 四者皆周。《釋文》:「重,直龍 天子之棺四重,水、兕革棺被之,其厚三寸,

物爲 鄭氏曰:「天子之棺 棺二,所謂 棺,所謂椑棺 能溼之物。」 重,四 屬 也。 物則四 與大棺。 愚 謂 《爾 重 四 天子 雅》曰: 周, 也。 重,尚深邃 之棺四 市 此 也。 『椴、他。』梓 與 數席之重 凡棺 重 也 者 用用 杝

皆以 凡厚二尺三寸也 寸。」是大棺皆以二寸爲差。天子大棺宜 屬六寸。 被之者,言其最在 兕牛之皮爲之表裏,合之而 數 底、蓋也。 即椑也,以 八寸,屬六寸,椑四寸。 尺,併屬六寸,椑四寸,水、兕革棺三寸, 物爲一重明矣。《喪大記》曰:「君大棺 而 司 梓 耐溼,故用之以爲親身之棺。杝棺, 木爲之。 水、兕革棺,蓋以 下大夫棺六寸,屬四寸。 杝木爲之。 上言「四重」而下言「四者 四者皆周,言其 内 而被體也。 梓棺,謂屬與大棺 上大夫大棺八寸, 木爲幹,以水 其厚三寸也 二牛之皮 士棺六 皆并有 二,此 牛、

棺 又而鴆反。 束 鄭 縮 二衡三,衽每束一。《釋文》:「衽, 」鄭注:「衽,或作『漆』,或 愚謂: 衡, 古棺 亦 當 無 釘,用皮束之。 爲『横』。 作『髹』。」 衽,今小 而 縮 審反

> 材也。 衽三東,大夫、士二衽二束。」 子棺制也。諸侯亦然。 每東之處用一衽,亦縮二横三也。 作坎,内小要其中以 似深衣之衽,故名焉。鑿棺身與蓋合際處 材也 縱 也。 衽,小要也。 横者三,以 縱者二, 以固棺之首、 古 其形兩頭廣,中 連之。 棺之兩 《喪大記》:「君三 衽與 旁與底、蓋之 尾 與 東 底、 此謂 -央小, 相值 蓋 天

柏椁以端長六尺。

尺。 作四 上始爲 鄭氏 材作椁,並葺 黄腸爲裏,而 士雜木。 孔氏曰:「天子 E: 知方一尺者,以庶人四寸之棺,五寸 呵 題凑。 也。 「以端,題凑也,其方蓋一尺。」 鄭注《方 長六尺者,每段長六尺而 表以石焉。』端猶頭也。 材 凑, 總 椁用柏,諸侯松,大夫柏, 頭 也。 相 職 也,言木之頭 椁材 》云:『天子椁柏 並 從下 相 壘, 積柏 方 嚮 而

尺有一寸與? 謂: 者椁七寸,棺八寸者椁九寸,棺一尺者椁 寸,庶人四寸,每以二寸爲差,則天子大棺 尺也。 諸侯與上大夫大棺八寸,大夫、士六 (寸」,則天子之大 ,椁厚於棺一寸。 以椁厚於棺一寸差之,則棺 棺 案《喪 或 當 大記 九 寸。 》 君大 六 4 愚

鄭氏曰:「服士之祭服以哭之,明爲變也。『緇』,又作「純」,同側其反。爲,于僞反。」有司哭之,爲之不以樂食。《釋文》:「紂,本又作天子之哭諸侯也,爵弁絰,紂衣。或曰:使

服」也 弁,以 間 或 曰: 爵 可 鄭氏曰: 弁、紂衣,即《周禮 虚 爲之。不以樂食, 爵色韋爲之。 使 愚 經, 弔 「服士之祭服以哭之,明 有司哭之,非也。 謂: 哭諸 服之葛絰也 侯,謂 司 蓋 服 遥 同 哀戚之事,不 爵 謂 哭之也。 ,黑色帛 所謂 弁、紂衣而 殯、斂之 爲 「韋弁 變 也。 也。 爵

之差也。 而 薨,令去樂。 食,此又記者之言也。 服者,又當 朝莫哭者,哭諸侯亦如之」,則諸 者,哭諸侯亦如之」、《外宗》「大喪 則非使人代哭明矣。 覲、會、同,則爲上相,王哭諸侯亦 或言使有司哭之,非也。《大宗伯》:「朝、 服之弔服 國,赴於王而哭之,則聞喪即哭,故用未成 於王國,而弔之於成服之後者。若薨於其 巡守所至,遇有諸侯之喪,或諸侯來朝,薨 諸侯、大夫皮弁加経,天子爵弁服加 亦用之。 加 經 去樂者暫 蓋 《司 天子弔於未 士弔於未成服之前 也。 爲 ,蓋諸侯雖尊,然其爲 服 大臣死,令弛縣。」弛縣者久, 位 哀戚之事,非可代爲之者, 》:「王爲諸侯緦衰。」此 而 哭之也。 成服 《内宗》「大喪 《大司 之服 爲之不 朝 樂》:「 故 侯與 服 人衆,而 敘 哭諸 如之。」 經 加 諸 以 序哭  $\pm$ 内 禮 外

弁耳。 以 韋 其 兵 手然,章 曰 : 以 之喪,赴告之及於王,必在既殯之後,蓋 爲 士不 在 亦 曰:「考經傳物色之言『爵』者,惟爵 六 弁」,孔安國曰『雀,韋弁也』,則爵弁即 事 耳。 祀 配 師 韋爲之與?」 聞 公卿,當 情 「士之服 , 章弁服。」《詩》云:「韎韐有 與 韎 。」是韋弁 得 喪之日斷 亦 若布 戎 古文『弁』字象形 其爲諸侯,蓋比殯不舉樂 視 韐 服 其質,爵其色也。」 冕,則 , 章弁之尊次於冕, 故軍事服之。 是爵 内 如 與絲則不聞 臣 止於爵弁,而荀 諸 爲 服 爲之限 弁即 以 侯之爲 稍 配 愚 此 疏 韎 韋 謂 爲上服,而服之以 幹。 與 ? 故 弁明矣。 卿 以 一司 其 其 大 爵名,豈爵 ^ 降 制 夫, 服》云: 士 殺 卿 冠 上鋭,如 敖氏 陳 與。 比 國之大事 如 云 奭, 禮 氏 卒 此 》爵 韠 繼 士 以 凡 祥 諸 哭 弁 公 作 助 弁 果 爵 合 韋 韋 道 即 侯 不 王

祭

斧,謂 鄭氏 也。 黑文 以 者,畢,盡 椁,使上 龍 也。 已乃 天子殯以 而 人 覆於棺,故云『加 也。 椁者,天子之殯,以龍 下,四面 屋 也 龍 用 曰:「菆 繡覆棺之衣爲斧文也。先菆 木 其 以椁者,亦 輴 與 也,斧覆既竟,又四注爲屋,覆 者 菆 輔車 上 以 盡 棺 殯 盡 刺 棺 齊,而 塗之也。」 木 繡 而 塗之。」 時 畫 以 於終幕 四 題 用 轅 周 斧於椁上」也。 上猶開 面塗之,故云『菆 湊鼓 輴 爲 龍 車 龍。 輔載柩 楯 上 孔氏曰:「菆 愚 木,象椁之形也 載 以 謂 加 斧 如 柩 棺 椁 前 謂 椁 其 菆 衣 以 之 而 畫轅 外 畢 從 涂 几 塗之。 黼 覆 菆 龍 塗 椁 面 塗 白 棺 爲 木 1 屋 爲 + 楯

爲

哭位

别

於

朝

朝

來

時

朝

覲

爵

可

同

位

其題 記》日 子也 棺 之,裁猶冒也。」是君之夷衾 緇冒 用 儿 覆 畢塗屋者,菆 兀 夕禮》「幠 左傳》宋葬文公,「椁 於棺 故故 周 ZII 夷 凌 赬 念以 象葬 可 飲 斂 不 : 乃 殺 知 天子 之狀 君 用 覆 用。 時之椁 以 錦 椁有四阿,其菆塗象椁, 夷 自 棺 中 木 木 念」, 賈 小 冒 高 則 與 題 其 斂以往 黼 而 凑 棺 殯 然 上 殺 齊,以 也。 時 畫 而 四 疏 有四 大夫玄 用夷 下, 盡 爲 用 云: 塗之。 加斧於椁上, 斧 夷 夷衾從椁上人 阿」,言其 象 念覆 畫 「夷衾本 文 衾,夷衾質殺 屋 冒 也 黼 一之形 棺 黼 屋者,言 也。 《喪 明矣。 殺 个僭 亦爲 擬 ^ 也。 既 天 覆 大 謂 +

列 唯 鄭氏 天 子 日 之喪,有 : 使諸 别 侯 同 姓 姓、 而 哭。《釋文》: 異 姓、 庶 姓 相 别, 從 而 彼

門哭。 上,西 禮 》: 外, 兄 婦 以 户 西 外 西 方,有司、庶士哭於堂下,北 子坐於東 諸 繼之,北上 外,北 方,内 弟皆 命 人即 前之哭位也。 拊心,不哭。 面 侯 愚 西 加 謂 婦率外宗哭於堂上,北 「主人人,坐於牀東,衆主人在其後 方東 婦人俠牀,東 面 位於堂,南上 爲 即 婦 面 命婦、姑、姊、妹、子姓 北 别 方,卿、大夫、父、兄、子姓立於東 哭 位 人 ,衆兄弟堂下,北 門 上。 面 姓 踊 位 北 如 而 也 東北 外兄 主人 上。 外位。 又《士喪禮》:「朝夕哭, 哭, 主人堂下直東序 面,親 拜賓 面 謂 主人 弟在 哭。 喪 西 分 大 卿大夫在主人之 上,門 者 别 ,旁三,右還, 即 其 記 丈夫 面。」此未 南, 在 面,夫人坐於 同 位 面。」《士 室, 衆婦 立 姓 西 即 辟 南 既 於西方, 北 位於門 異 門。 上。 西 正 姓之 面 小斂 尸 面 喪 東 婦 賓 人

甫。」

此之别 門東,異姓者 以下,皆無别 外兄弟、卿 言者 公、卿、大夫之位 位,在諸侯當爲 之位,在諸 殊,則朝 然未小斂以前,諸侯哭位 小斂以後已然。 在門外,在 南 西,少進。」門外之西方東面者 面 1,從可 立,位皆北 諸 姓而哭,惟諸侯之位 公 夕哭位 1門東, [侯當爲寄公之位; 士禮門 知 大 西 在門西,而皆東上也。 姓 方 夫 也 上而 鄰國弔賓之位,士禮丈夫、 而 東 各 亦 少進 諸侯 宜亦與諸侯 然。 哭之法也。天子之喪, 示 此 面 統於君耳。 雖 相統,而諸 ,則在門内 朝夕哭位雖不可考, 其異 朝夕哭位 他 與士禮大略 或 一,則同 者,士禮 一之異 以 「, 士 是自諸侯 侯則諸 亦 丁其實 下 爵者 然。 姓 也 無 門東 者在 一西之 異。 不 臣 不 自 門 士 父,音

稱 也。」與此 不能用,死而誄之,非禮也。 呼哀哉! 傳》哀公誄孔子曰:「旻天不弔,不憗遺 之之辭也。 相 左氏不同者,皆當以左氏爲確 老,俾屏予一人以 而爲誄,誄之不必有謚,於此見矣。按《左 助 孔 丘者, 也。 所載 尼父! 言孔 君臣 尼父,孔子之字也。 不同。 子死 之辭 在位, 榮榮余 無自 而 大約《檀弓》所載 也。 無 律。」子贛曰:「生 助 耆老 稱一人,非名 我之位者 孔子無 在 謂 疚。 孔 子。 與 嗚 傷

國亡大縣邑,公、卿、大夫、士皆厭冠哭於大 廟三日,君不舉。 釋文》: 鄭氏曰:「軍敗失 「縣,郡縣之『縣」。厭,于葉反。大,音泰。」 或曰: 地,以 君舉 喪歸 而 也。 哭於后 厭冠,今

喪冠 ,邑之大者。 其 服 未 聞 《左傳》: 后土,社 「克敵者,上大夫

也。

愚

謂

魯哀公誄

孔丘

曰:

「天不遺耆老,莫相

子

位

嗚呼哀哉

尼父。」《釋文》:「相,息亮反。

縣

牲盛食 自 受之先祖故 H 群 於軍門之外。」則 厭 受縣,下大夫受郡。」公,  $\vdash$ 服則素服。 冠,蓋即 往社 不舉 臣皆 而 日 奉 也。 主 中哭之,以社主土 厭 日 舉者,非也。」 素冠,其制 舉。 車。」下篇 冠 《周禮 也。后土,社也。 必哭於大廟者, ,哭於大廟三日 軍敗失 此 大司 厭伏,與喪冠 云:「軍 厭 地,以 冠 當素服 故 四命之孤 馬 有 也 以土地、人民 ,君又爲之三 喪禮處之,故 或言君舉而 憂 明矣。 則 師 同 應 素 不 世 也。 服 氏 功 殺 其 鏞 哭 則 厭

孔 野 於家而哭於野,是惡凶 鄭 子惡野哭者。《釋文》:「惡,烏路反。」 之道者。』」 掌禁嘂 ,又若奔喪者,安得不哭於道?」 氏 曰:「爲其變衆。 呼 歎嗚 張子曰:「有服者之喪,不哭 於國 中者,行 《周 事 也。 禮 歌哭於國 所知當哭於 銜 枚氏 中

> 《釋文》:「稅,始鋭反。」 未仕者不敢稅人,如稅人,則以父兄之命。

之。」 所謂 鄭氏 之所不得已而當遺者 不可專家財 陳 氏 賻 曰:「不專家 也。 澔 愚謂: 曰:「未仕者,身未尊顯 ,外則不可私恩惠。 税, 財 謂 也。 以 ,則稱父兄之命 財 税,謂 物 助 人喪事 或 遺 故 於人。」 有 情 内 而 即 則 行 義

士備入而后朝夕踊。

哭,人 入即 鄭 士卑 朝夕即位哭踊 喪 禮 氏 位 最 日 則踊。」 哭,必待 後,故舉 : 朝 夕哭,主人「入門哭,婦 備 踊 盡 孔 諸 土 也。 須 氏 臣皆入列位 一人爲 相 日 或 視爲節。 畢。」 或 君 之喪,嫌 君之喪, 乃 愚 嗣 謂 俱 君 踊 群 主 雖 **企**士 踊 也。 先 臣 人

●「父兄」,四庫本《禮記大全》作「尊者」。

二 五 五.

位 他 主 國之異 卿 堂 大 下 一爵 夫在主人之南。 直 者 東 門 序 西 西 [少進。 面,兄弟皆即 諸公門東少 敵 則 先 位 拜 如 他 進 或 外

之賓。 待衆賓畢人,乃拜賓,拜賓畢乃 外,燭先入,升自阼階,丈夫踊」。 是主 君尊,或不待群臣畢入而踊,故明之。 凡異 爵 者拜 諸其位 一,徹 踊 者 盤 也。 於 人 門 嫌

祥 而 縞

大 鄭 祥 氏 也。 日 : 縞,縞冠也,大祥日著之。」 縞冠素紕 也 \_\_\_\_ 孔 氏 日 : 祥

是 月禫 ,徙月樂。

潭 始 耳。 之正 鄭 極  $\mathbf{E}$ 一歡 氏 「《鄭志》日 踰月 也。 也 得 曰:「言禫,明月 京哀 備 孔子五 可 殺有漸,是以樂亦隨之也。」」〇 以 而 歌 一、『既 在 ,皆自祥踰 日彈琴,自省樂,哀未 心 猶 禫 口 未 以 徙月而 能 用 月所爲 歡 樂。」 徙 樂作, 月之樂 也。 孔 既 禮 氏

> 而 月 愚 猶 而 謂 未 可 : 祥之日鼓素琴, 作 以 也 笙 瑜 歌 月 而 而 尚 金石之樂作 未 備 而 尚 縣 未 也 口 歌 禫 也 而 此 除 踰

喪作樂之漸 也。

君於士有

賜

**帝**。《釋文》:「帝,

音亦。」

皆有帝 愚謂: 諸侯再重,孤 綬之事。」《掌次》:「凡喪,王則 則張於殯上。 鄭 氏 日 《周禮·幕人》:「掌帷、幕、幄、帟、 幕 人 自 卿、大夫不重。」是大夫以上 幕之小者,所以 大夫以上,幕人職供馬 以 其職共之。 士本無 承 張帝三重 塵 賜之

禮 記 卷 九 終

君所加恩,

則有

賜之以帝者也

## 記 卷十

賜進士 國史館纂脩孫 一及第翰 林院 希旦集 編

## 檀弓下第四之一

大夫之適長殤,車一乘。《釋文》:「適,丁歷反,下 君之適長殤,車三乘。公之庶長殤,車一乘。 適室」同。長,丁丈反,下同。乘,繩證反。」 言 乘。 者 以 大功之殤,中從上。」 愚謂:凡遣車無直 鄭氏曰:「皆下成人也。自上而下,降殺 也。 車者,此車 兩:成人遣車五乘,長殤三乘,下殤一 尊卑以 《士喪禮》薦車三乘:「乘車載皮弁 此差之。庶子言公,卑遠之。 謂 生時 所乘,葬 時 用 爲 魂 車

> 殤。」則送死之物,中殤、下殤爲一等,君之 下之,則天子十二乘,諸侯 禮,車九乘,故以七乘 服 殤,大夫之庶殤,士之殤,皆一乘與? 自一乘以下,不容復降,則公之庶中、下 適中、下殤,車皆一乘也。 棺椁葬長殤,以夏后氏之堲周葬中殤、下 大夫適子降於大夫,車宜三乘。 殤降於成 成人,故三乘。庶殤降於適殤,故 乘。君之適子降於君,車宜 葬莊公,「下車七 人,故一乘也。上篇云:「周人以殷 道 車 載 朝 服,稾 乘」,説者謂 車 八爲貶。 載 蓑 然葬必有魂車, 公笠。」《· 五乘。 七 以此 齊 乘,大夫 舊 左傳 殤降於 差 用 人之 而 上 五. Ŀ 公 齊

公之喪,諸達官之長杖。 也。 有位於朝者曰達官。達官之長,謂 達官爲君皆杖,而曰「諸達官之長杖」 即位也。《

大夫

者,謂以杖

喪

大記》曰: 君之

二五七

Ŧi.

也。 已,安得 屬 達 注 即位 「衆臣杖、不以 長杖 特 喪 於君,爲府、史之屬 謂「有官職 輯 ,特庶人在官者耳,其爲君齊衰三 也。 既有官職 之而 可 大 知 夫 《喪 與公、卿、大夫論 己, 寢 此 門 服 則 而 達 即 ,豈有不 之 得 不達 》傳 官 位, 外 以 而 曰公、士、●大夫之喪, 杖, 杖 於君 二,亦 非 則諸侯之士杖,不以 服 即 長,則不 寢 位矣。 斬 非 門 則不 者? 其 也 之 杖不杖之 此達官之 内 服斬」,非 杖 疏謂 府、史之 也。 輯 月 之。 而

如之。 則 君 宫, 岸 柩 於大夫,將葬 命引之者,命人執引以引柩車也。 將行, 柩所 《釋文》: 如 是者三,君退。 朝 而 之廟 朝 君 弔 ,直遥反 之也 也。 將 葬,弔 出 朝亦 謂 如之,哀次亦 柩 於 宫 出 廟 **弔於葬** 謂 門也 葬 北 Ħ

差乎?

設奠 於祖 時 謂 禮》「主人揖 朝 者 也 皆如弔於宮之禮,命引之者三也。 柩 行,踊無算」,是也。 次,則孝子哭踊 居喪之所次 每 也 謂 尚 朝廟、 引 必 「宫爲殯宫」,非也。 八萬車 昧 君 又鄭 執  $\equiv$ 葬前 固 使 爽,君之弔必不能 之時,或當 步 引 無 人 之後,乃 氏謂引之爲 可 一日,柩 君 引車 就 舍, 行弔 引 尊 次」,是也。 廬、 以 一,特以 則 故 禮 柩 云「質明 致 朝廟之時 九 堊室之處 使 之節 已出 君之來時不一,或 其哀,《士 以 《士喪禮》啓殯即 步 人 致其 義奪孝子」, 遽及乎此 也。 引 宫至喪 滅 之以 哀 也。 而 、執縛 《燭」,則 禮 也。《 次 柩 喪禮》「乃 者, 成 次之時 致 至 次,孝子 助 時 於三。 祖 其 士 葬 亦 啓 鄭 柩 而 意 廟 當 之 非 殯 遷 氏 喪 來 至

❶ 「士」,據《儀禮注疏》當作「卿」。

賓 意 非 客之處 有 他 亦 義 也。 非 是 又 鄭 説 見《曾子問 氏 以次爲大門外 接

Ŧi. + 無 車者 不 越 疆 而 弔

筋 鄭 力爲禮 氏 曰 : 故 氣 力始 不 越 疆 衰。」 而 弔 人 愚 謂 : 老者不 以

綺反。」 其門 『税」, 道 季 「不亦善乎 武 也 徐 而 ,將亡矣。 子 又音 歌。 寢 疾,轎 ! 《釋文》: 申 鋭 君子 反。 士唯公門説齊衰。」武子 古 不 「蟜,居表反。 見, 表微。」及其喪也,曾點倚 説 賢 齊 遍 衰 反。 而 説,他活反,本 倚,于 人 見,曰 綺 反, : Ė 「斯 徐 亦 其 作

父。」 武 鄭 能 子 守 上 氏 而 卿, 無 禮,不畏之,矯 E 歌 \_; \_ 愚 如 强 謂 之 明 且 季武子,魯大夫 何,佯若 己 專政 蟜 不 古 或 與 不 失 善之。 也。 以 人事之 俗 强 也 點 臣 季 表, 之勢奪 字 如 孫 道 皙, 明 君 夙 猶 也。 也。 禮 蟜 其 也。 所 參 倚 古 世

> 記之。 萬氏 武 王之禮 之辭 門,非失禮之小,而武子之言如此,亦自 矯諂 守二 孔 此 之微小者,唯君子能表明之。 幼矣,倚 下,子路 不畏季氏之意。 子卒, 見禮之可以守身,而無畏於强 子方十 而 斯 也。 畏、警僭 又自言其 然歌於有喪者之門,則非禮矣。 ,故不能以爲非, 大曰:「季武子卒,在 少孔子九歲,時 而曾點倚其門而 武子雖 七歲。 而 歌 竊 (故,以 必必 者 故記 恨 四子 深 嬌固 無是事。」 矣。 IE. 者因 侍坐,點齒 一,而 君臣之分,其 方八歲,曾點 而 微 歌, 蟜 反 其 魯 税齊衰 古 蓋 小 以 所 昭公七年, 之事 暴 據 也 亦 爲 在子 以 也。 善。 者乃 而 示 於 言 所 路 及 以 於 文 併 其 私

大夫弔,當 事 而 至 則 辭

門

鄭 也 氏 主人 日 無事 辭,告也。 ,則爲大夫出。」 擯者 以 主 孔 有 氏 事

始 喪哀 戚甚,小斂以前,不爲大夫出 也

斂後踊 斂畢 正 云:『當袒,大夫至,雖 當小斂之節,大夫來弔,則辭之以 當踊之時 時而 來,則亦絶踊 絶 踊 而 拜之。 踊,絶踊 拜之。 或大夫正 故《雜記 而拜之。」 有 事

即拜之。若當事未得拜,則宜告之以 後,然後拜之。」 若士來弔,雖當斂,不告以有 也。主人雖未拜,弔者皆入即位矣。 「子游裼裘而弔,主人既小斂,袒括髮, 愚謂: 大夫尊,來弔 事 事 故上 其故 畢 當 踊

子游趨 雖有 》云「士於大夫,不當斂則出」,則不當 事未 而 得拜賓, 弔者已先入也。《喪大 出,襲裘帶絰而入」。 是知主人

事 唯君命出」,謂未襲以 未 前 也

丁, 雖

小斂,固爲大夫出矣。

**^** 

士喪禮

弔於人,是日不樂。《釋文》·「樂,音岳,又音洛。」 鄭氏曰:「君子哀樂不同日。 子於是日

哭,則不歌

婦 人不越疆而 弔人。

婦人無境外之事也。 惟三年之喪,

則

而 弔。

行弔之日,不飲酒食肉焉。

鄭氏曰:「以全哀也。」

者必執 引。 若從 柩 及 壙 皆

執

《釋文》:「引音胤。● 壙,苦晃反,又音曠,後同。」

鄭氏 從柩,贏者。」 曰:「示助之以力。 孔氏 曰:「引,柩 車 Ħ 引, 車 柩 索 日 也 紼

也。 引者,長遠之名,車行遠也。 紼是撥舉之義,棺惟撥舉,不長遠也。 紼,引棺

也。 **弔葬本爲** 餘 人 、不得遥行,皆散而從柩。 凡執引用 助 執 事,故 人,貴賤 必 有數,若其數足,則 助 引 柩 至壙下棺穸

車。及,至

<sup>0</sup> 胤」,原 避雍正諱作「允」,今回改。下同,不出校。

故 輔, 時,則 禮》「屬引」,鄭注云:「在軸輔 謂 則謂之引。」是也。 其繒體, 棺 愚 孺 之引; 記謂: ,謂之紼。《王制》疏云:「停住之時,指 亦不謂之引而 謂朝廟時也。 子蘋」章注 不限人數,皆悉執紼,示助力也。」 引、紼 則謂之紼。 載 時 及至 爲 物也。 謂之紼 説,非確 朝廟時 此疏以 若在塗,人挽而行之, 一壙,説 在塗時 也 義 紼 柩雖行而不遠 載 也。 爲 除 日 屬於柩車 撥舉,乃據 飾 紼。」在 又《既 皆屬 軸 勺 於

文》、「臨,如字,徐力鴆反。」也。 弔曰:「寡君承事。」主人曰:「臨。」《釋喪,公弔之,必有拜者,雖朋友、州里、舍人可喪,公弔之,必有拜者,雖朋友、州里、舍人可

里 之君弔之也 此 舍人,謂 謂 謂 在 死 他國而 死者今在 者 口 州 死者也。 拜,謂 里之人,今同 他國所館舍之人也。 爲 公弔之,謂所死 主以 拜賓 在 他 也 或 者。 死 州 或

> 於他 也。 故 弔,固必有拜賓者矣。嫌君尊,其禮或異, 有 此 「臨」者,尊君之辭,蓋曰君辱臨某之喪。 里之人同在此國者,或又無朋 以明之。 無 國所館舍之人,皆可爲 曰「寡君」者,稱於異國臣之辭也。 後,無無主,則死 國者,其親屬或不從行,則朋 承,助 也, 弔以助主人之喪事 於異 主 而 國 拜君也。 友、州里 者,雖非 友及州 一,則 喪 H

君遇柩於路,必使人弔之。

使人弔之,所以廣仁恩也。 常:大夫、士之喪,必赴於君,君當弔於其謂:大夫、士之喪,必赴於君,君當弔於其謂:大夫、士之喪,必赴於君,君當弔於其

大夫之喪,庶子不受弔。

曰:「不受弔,謂不爲主人也。適子爲主,鄭氏曰:「不以賤者爲有爵者主。」 孔氏

不敢受弔,明己卑,避適也。言『大夫庶子受弔拜賓。若適子或有他故不在,則庶子

不受弔」,則士之庶子得受弔也。」

反,又如字。」

哭、踊者,冠尊,不居肉袒之上,故 者,爲昆弟之爲父後者不降,故姊妹 氏 知者。 則 舅緦,故命己子爲主受弔拜賓也。袒、免、 爲之哭於適室之中庭。子,己子也。 鄭氏曰: 人立於門外告來者,以門内有哭,則鄉里 踊 曰:「適室,正寢也。 踊 哭於妻之室,不以私喪干尊。」 必 「哭之適室,以其正 先袒 ,祖必去冠而 禮,女子子適人 也。 加 免 狎,相習 凡哭哀 也。 之夫 甥服 孔 使

子爲主者,常禮也,無子乃使婦人倡踊

耳。

者也。 階上 婦 踊者 少 也。 面,而以親 中 舅服緦,故使之爲 異室,總皆曰寢。」 適室及異室者,寢是大名,雖適室及妻室、 由父,故但於妻室之前而哭之,亦子爲 父在,哭於妻之室者,此夫若父在,則適 弔人與此亡者相識狎習,當進 來弔者,述所哭之人也。 聞之,必來相弔,故主人使人出門外告語 南。 人倡踊 庭 之位 西面,夫入門 ,哭有服之親之禮然也。 案《奔喪禮》『妻之黨哭諸寢』,此哭於 子爲主者,妻之兄 凡哭而爲位者,哭者與 但 。此哭妻之兄弟,婦 疏爲敘列也。 子既 而 主而 爲 右 愚謂:此亦爲位 主,則: 拜賓。 亦 狎則 申祥之哭言思 弟無服 西 其子 面 人亦當在 爲主者,在 袒、免、哭、 人共哭 入哭者,若 ,在其子之 主人必 ·倡踊· ,而子爲 而 也 百 哭 主

主乎? 皆然。 者,則 辟 室 面 以二主爲嫌 故知此當北 爲主,康子立於門右,北面」,辟主人之位, 又《曾子問》云衛靈公弔季康子,『魯哀公 在阼階下西面,父若又西 子,故哭諸側室。○鄭氏謂「夫入門右,北 同宫者也。 而 使 面」,孔氏云:「鄭 士喪禮》主人、衆主人、衆賓皆西面,初不 也。 弔哭 主人之位 ,故季康子於衛 人立於門 告以 異室,側室也。非爲父後者降於適 也。 狎則入哭,謂所親狎之人,則當 君弔 所爲哭之人,蓋 (何以 若父子異宫,雖父在 父在,哭於妻之室,此謂父子 面,辟主人之位也。」 外告來者,謂 也。 於臣 知 鄭 宝靈公之弔亦然,初不 ,主人之位皆在 此父與子同 此 氏 北 謂「夫入門右, 面,便似二主也。 面 人有 一者,子既爲 凡哭人 西 聞 亦哭諸 面 愚謂: 門右 者之禮 哭 則 嫌 而 主 以 北 北 谪 來

> 有殯,聞遠兄弟之喪,哭于側室。 弔,乃弔於不爲位者之禮,非 言, 面 蓋蓋 殊失鄭義。 據 曾子 但 北 鄭 面 注本非,曾子 而 弔」之文,孔 可 以 無側室,哭 例此也 北 疏 面 所 而

于門内之右。

同國則往哭之。

或 常爲主,當 謂 之,喪無外事。」 内之右,近南者爲之變位。 鄭氏 不 之喪,雖緦必往 往哭,異國則否者,以其已有喪,不得嚮 此云「有殯,聞遠兄弟之喪,哭于側室」,以 右,是非常 云『近南』,則猶 同 也 異國也。 或 曰:「哭於側室,嫌哭殯 而謂之遠也。 愚 哭之處,繼門 在 《内則》云:『庶人無側室。』尋 謂: 阼 西 」,以不同居 階 上篇言「有殯,聞 孔氏曰:「遠兄弟之喪 東,西 面,但近 側室,室在寢室之旁 而 面 南 近 ,今稱門内之 而謂之遠也。 同 於 也。 耳 或 南 遠 則 同 哭於門 也 兄弟 往 或 哭 他 則 鄭

四

位 爲内 喪而 未啓 内之右 側 之他室,入奠。卒奠出,改服即位 於哭殯之位也。 之禮。」 者 親 至 以 也 也。 也。 謂 前 兄弟 ,於廟皆無 在 《雜 門内,殯宮之門内也。 中 哭 記》曰: 庭之少南而 不哭於寢門之外者,以其 於 廟 事 「有殯,聞外喪,哭 焉,不宜忽 此 不 西 於 面 廟 所 ,如始即 者 哭于門 以 哭 以 喪 别 邨 自

哉!」《釋文》:「與,音餘。」曰:「齊衰不以弔。」曾子曰:「我弔也與子張死,曾子有母之喪,齊衰而往哭之。或

以自 子 其 之喪,雖 雖 哭與弔不同。 張 服 功 致其哀。 猶兄弟,故援有殯哭兄弟之義而 衰 前 不弔。 往。」孔子於門人猶父子,則曾子於 緦 必往。』《雜記》云:「三年之喪, 弔者所以慰人之戚,哭者所 上篇云:「有殯,聞遠兄弟 如 有 服 ൬ 將往哭之,則服 往哭

> 其服者,禮之所不容過也。 服其 由父 異 衰而往,不服 姓 非 (服矣。 也,其 而 弔 推,故可 也。 哭之者,情之所不可 恩由 其服者,蓋兄 爲 以釋 朋 己 友 而 成 服 弔 服 而 則 弟骨 服 加 不 其 麻 口 服 肉 已。 以 而 也,其 曾 釋 朋友, 不服 服 子 齊 而

有若之喪,悼公弔焉,子游擯由左。 禮者。. 鄭氏曰:「悼公,魯哀公之子。 尊,則宜處右。 也。』案立者尊右,己傳君之詔辭,詔 辭,己自居右 己自居左。 ~ 而 皆 少儀》『詔辭 由 喪禮廢亡,時人以爲此 右,是善子游正之。」 當時禮廢,言相喪 ,子游知禮,故正之。」 若喪事,則惟賓主 自右』,鄭云:『爲 儀當 亦如傳君 擯,相 孔 居 君 氏 如 出 辭 詔 侑 日 詔 爲 而 辭

魯嫁,故爲之服姊妹之服。或曰:外祖母齊穀王姬之喪,魯莊公爲之大功。或曰:由

也,故爲之服。《釋文》:「穀,音告,又古毒反。爲,于也,故爲之服。《釋文》:「穀,音告,又古毒反。爲,于

**僞**反。」

之無服 母 莊公舅妻,不得爲外祖母。假令爲外祖 齊桓公夫人。 告王姬之喪」,故知是襄公夫人。王姬 二年書『王姬卒』,是襄公夫人。此言『齊 以桓公夫人經無『卒』文,是不告於魯。 齊』,是由 年『秋,築王姬之館於外』,下書『王姬 母。外祖母又小功也。」 孔氏曰:「莊 襄公女弟文姜之子,當爲舅之妻,非外祖 嫁,卒,服之如内女服姊妹,是也。 周女,齊襄公之夫人。 鄭氏曰:「穀當爲『告』,聲之誤也。 了, 正 非 也。」〇趙氏 合小功,不服 ,嫁於王者之後乃服之。 魯嫁 知此王姬非齊桓公夫人者, 也。 汸 莊十一年,王女共姬 大 日:「 功。 《春秋》周女由 齊告王姬之喪, 此或人之言 莊公, 天子爲 王姬 歸 莊 有 是 爲 於 元 齊 魯

> 亦不可失也。孺子其圖之。」《釋文》:「重,直龍 雖吾子儼然在憂服之中,喪亦不可 晉獻公之喪,秦穆公使人弔公子重耳,且 曰:「寡人聞之,亡國恒 禮,而桓公不可以非禮説,故弗爲也。」 亦魯主之,而卒不書, 妹之服,故書『卒』,同内女。 我主其昏,欲以説齊耳。 魯莊公爲之服大功,此禮所未有,魯人以 嚴,魚檢反,本亦作『儼』。喪,息浪反。」 於斯,得 可見主昏脩服 公爲之服姑、姊 後齊 國 久也,時 恒 桓 一於斯。 之非 王 姬

之。 謂喪代之際也。 譖,出亡在狄,而 耳,獻公子,後立爲文公。文公爲 晉獻公名詭諸,秦穆公名任好。 公,故勸 且曰者,致弔辭之後復言此也。 其因喪代之際以 喪,失位也。穆公欲納文 獻公薨,穆公使 啚 反 或 公子重 驪 就弔 姬

舅犯曰:「孺子其辭焉! 喪人

以告舅犯。

之謂 無 爲利,而 不拜,哭 父死,不得與於哭泣之哀,以爲君憂。 公子重耳 寶 何? 而起,起 天下其孰能説之? 親 對客曰:「 或敢有他志,以辱君義。」稽顙 以 爲 寶。 一而不 君惠弔 父死之謂 私。《釋文》:「與,音預 亡臣 孺子其 何? 重 耳 辭 又 焉 父死 身 因 喪 而 以

拜。 耳 子 顯 ! 親 則 賓,蓋庶子在外受弔之禮也。 其言也。 親之心矣。 父死以求反國,則是利父之死,非人子 舅犯,文公舅狐偃,字子犯。 也。 以 拜 夫稽 而 致 稽 言爲人子者,當以愛親爲寶。若 顙。 起 命於穆公。 顙 稽顙 則 圃 舅犯 起 愛父 不拜,則 而 而 不 不拜,但自致其哀而 勸文公辭秦使,而文公從 也。 穆公曰:「仁夫公子重 私 ,與使者無私言也 未爲 起 而 後 不 仁親,仁愛其 也 適子受弔 私 故故 則 不 不拜 遠 成 愛 因 利

侯與?

符。遠,于萬反。」

相 可以 鄭 然仁者之心。 愛親者。 爲後者,文公不受穆公之命,故不敢 者名、字相配、顯當作「韅」。」」 主之禮自居也。文公譎 去 氏 得國之勢,而不欲因喪以 遠 曰:「使者,公子繁也。 矣。 然當時晉 此 其視惠公之重賂 所 以 人與之,秦 卒 而 能 不正 反 盧 伯 或 非 以 啚 氏 愚謂:未 助之, 求 利 而 云 : 能 入者, 霸 則 以 誠 古 諸 居 喪 有 於

帷 鄭 靖 殯,非古也,自敬姜之哭穆伯始也 遠色也。 姜 子思念其 禮》:『朝夕哭,不帷。』」 少 氏曰:「穆伯,魯大夫,季悼子之子公甫 也 寡 辟 敬 親 嫌 案《春秋》文十五年『公孫敖之 姜,穆伯 故 故 朝 朝 夕哭 夕哭 妻,文 不 時 寒徹 復 伯歜之母 徹 孔氏曰:「孝 帷,表 其 帷 夫之 也。 敬

也

」《釋文》:

「顯,依注音韅,呼遍反,徐苦見反。

夫,音

敬姜始。 聲己怨恨穆伯而帷堂,人不取法。 喪,聲 行此,人以爲知禮,而慕效之,故言帷殯自 伯 人無堂下哭位,聲己之哭亦當在堂上,但 在堂下,是帷堂,非帷殯也。」 不云『聲己之哭穆伯始』者,聲己哭 己不視,帷堂 而哭」。 公孫 愚謂: 敖 自敬 亦 是 姜 婦 穆

喪禮,哀戚之至也。節哀,順變也,君子念始

之至極 傷 鄭氏 孝子悲哀,使之漸變也。」 有節算,裁 或悲哀,未是至極,惟遭父母 一,而 其 自復至於虞、祔、皆歷 性 曰:「始猶生也。 此 也。 節 則 節其哀 既是至極 孔 總釋 氏 曰 : 喪禮之義也。 也。 一、恐其 「凡人或 所以 念父母生我,不欲 據 愚謂: 節 傷性,故 喪禮 喪 哀者,欲 有禍災, 禮 《大宗伯》 是哀 下 而釋 文所 辟 其 順 踊 戚 雖

> 殯則 也。 外無哭, 潭而 練 禮爲哀戚之至,蓋人之哀戚莫甚於哀其 生我之心,必不欲其如此,是以雖至哀 爲之節限,必將至於滅性矣。 順變者,謂順其哀之隆、殺,而漸變之而 母之死也。 以 不 X 蓋人之於其父母也,至 復朝夕哭,但有思憶無 有 禮哀邦國之憂」,其目 朝 夕與 節哀者,謂始死哭不絶聲,既 内無哭,所以 無時之哭,卒哭有 節 死 有五 時 君子念父母 限 不窮,若 之哭,祥而 其哀 加 朝 夕哭, 惟 也。 而 車型 喪

文》:「禱,丁老反,一音丁報反。」 求諸鬼神之道也。北面,求諸幽之義也。《釋復,盡愛之道也,有禱祠之心焉。望反諸幽,

必爲之節也

「求」,據《禮記注疏》當作「反」。

鄭氏曰:「復,謂

招魂。

望求諸幽,●鬼神

0

復與禱 之生,故曰「有禱祠之心」。 也。 面 死,至情迫切,所以求其生者無所不至,故 疾 北 處 病 ,北者幽 面 幺幺 ,「行禱 暗 禱祠,禱於神 .爲事不同,而其爲心一也。 望 愚謂 工其從 陰之方 五祀」,是也。 鬼 盡 神所 以 一愛之道 也。 祈親之生、《士喪 人死 來。 復,亦所以求 人子於親之將 謂 禮 則 盡 有 愛親 復者升 鬼神 復者北 之道 禮 親 之 屋

拜 飯 稽 用米、貝, 鄭氏 者皆爲至 愚 顙,哀戚之至隱也。 日: 拜 「隱,痛也 痛 所 弗 而 以 忍 禮 虚 稽顙之痛 賓,稽顙 也。 稽顙 稽顙,隱之甚也 不 以 爲 所 食道, 尤甚。 觸 以 地 致哀,故二 無容。」 用美焉

孔 鄭 氏曰: 氏 曰 : 「飯用米、貝,不忍虚其口 尊之也。 食道 褻,米、 貝 也。 飯

爾。

《釋文》:

飯

,扶晚反。」

《士喪禮》用貝三,依《雜記》則 文。 壁將 美。 食人 所以含, 諸侯七,天子九。」 小。』是天子含用璧。 飯玉、含玉』,鄭注云:『含玉 子飯用黍也。 筐」,是也。 諸侯之士用稻、、士喪禮》『稻米一豆,實於 沐粱。」飯用沐米。 云: 士沐粱」、《士喪禮》沐稻、蓋 ,而士或不能備有,故隨所有而用之,非 飯用 『食珠玉 案成十七年公孫嬰齊夢贈 命。」是諸 案《喪大記 所造作, 米、貝」,「飯 通而言之,則米、貝 以 ,含象。』則卿 《周禮 爲 侯 次差之,天子當沐 \* 褻。 亦含以璧也。 士用 君沐粱 用沐 愚謂:米所 ^ • 典瑞》云『大喪,共 米、 雜記》云: 粱,謂天子之士。 貝 米」。 大夫 大 天 皆謂 列 大 如 夫 性 蓋 國土宜 卿 瓊瑰, 喪 黍,是天 夫 『含者 自 之 以 用 沐 璧 大夫 大記 稷, 飯 飯 當 珠 形 也。 Ŧi. 不 貝 注 無 執 而

道

鬼鬼

神

處

於

幽

陰,故望其方而求之也

貝也。 皆用貝,是大夫以上兼用貝、玉,士則惟用 《詩》毛傳云:「瓊瑰,石而 必 是大夫含亦用玉也。 傳》哀十一年:「齊陳子命其徒具含玉。」 以 爲 天子、諸侯之士之異也。 愛。 不以食道者, 《雜記》自天子至士 又 所 弗忍虚 次玉。」又《左 以 爲 者,所 敬 也。

如字。」《釋文》:「別,彼列反,本或無「已」字。識,式志反,皇識之。愛之斯録之矣,敬之斯盡其道焉耳。銘,明旌也。以死者爲不可别已,故以其旗

不見。」 則 常,諸侯 鄭氏曰: 各以其物。』又《司常》云『大喪共銘旌』, 云二王 銘旌亦然。 則 建旂,孤 「明旌,神明之旌。不可别,形 孔氏曰:「案《士喪禮》:『爲 大常。』案《司常》云:『王建大 《士喪禮》士長三尺,大夫五 卿 建旜,大夫、士建 注 銘 貌

周 此 殷人作主,而聯其 喪禮》士有重 乃埋之。按鄭據《祭法》,以 曰:『虞主用桑,練主用栗。』綴 重,既虞 鄭氏曰:「始死未作主,以重主其 人作主,徹重埋之。」 據天子、諸侯有主者言之。始死作重 而 埋之,乃後 無主 重縣 ,而此云『重,主道』者, 諸 高祖爲顯 作 孔氏 廟 主。 也。 曰:「案《士 考 ^ 説 春 猶 去顯 見本 秋 神 聯 考, 也。 也 篇

文》:「重,直龍反。綴,竹劣反,又竹衛反。」

七〇

亦所以 其 禮 遷 褅 也。 也。 去離 死 殯 也 必 云: 年 改塗 祭 喪 廟, 謂 》以其 廟 者之廟。 ,置重於廟庭,作虞主訖 若 「先生校毛本、改「不」爲「因」。」故 『烝、嘗、禘於廟。」」杜、服皆以爲三年 〇 孔 以 畢 周 顯 木 主 乃遷此 以 考, 依神,故曰『重,主道也』。 練者,以文二年「作僖公主」,《 人 主 乃 傅 次 可也。」范 於練焉壞廟,壞 班 遷 作 氏 霖 乃埋其重及主,以 而 主 死者世世 主者 祔」之下云:「練而 曰 廟 日 廟 遷 故 則 吉 0 大 鄭 遷 育云: 僖 埋 禘, 將 則 祭 廟早 其 三十三年《左氏 一遞遷 納 當依 以爲 所 重於門外之道 新 晚,左 以 廟之道,易 疏 親過 ,則綴重縣於 ,其重常 神 練時 依 作『不 其既遷 神 鄭 故 高 遷 氏 則 注《 禘』。」 在 以爲 示 祖 廟 殷 因 在 喪 有 士 則 檐 穀 禘 無 人 鏘 傳 梁 鄭 左 新 始 所 毁 虞 廟 至 重 口 Щ 鳴 0

後, 矣。 服。 禮 廟 同 節 卒哭祔廟,然後神之。 廟 梁》云『易檐』『改塗』,《禮 主,至三年 用賈逵、服虔之説,則以三年爲斷。 復於寢,至三年 加 [異得失,雖未有考,然《穀梁》但言『壞 鄭氏 , ● 其 」,不言『遷 0 主復於寢,而至此方遷於廟矣。 其辭 則 諸 則是必先遷高祖於太廟夾室,然後 是 是三 變 侯遷 鄭 用《穀梁》 但 有漸,故始死 之 而 一告遷 年 所 廟 新主」,則安知其 納 大 據 常篇 新 而 祥 而 『練 主 遷 云: 不 之後,既 耶 於 而 言袝,則 然猶未 全用 朱 ?又曰 『君及從者 廟 遷 子 志》云『 也 廟」之説 事 曰 除 非 盡變,故 : 生之禮 其 是 喪 練 : =遷 吉 更釁 既 而 而 如《 皆 大 其 杜 [X] 袝 後 遷 廟 穀 玄 戴 舊 之 口 其 之 遷 舊 間 氏 主

<sup>「</sup>禮」、《朱子禮纂》作「際」。

廟 《大戴禮 速。 考於新 時 寢,新主練、祥之祭皆於寢,而 遷其親盡者之主也。 三年喪 告於皇考某侯:成 明 袝之主矣。 以 廟之虚而遽壞之,恐非人情。」 所謂『練 日上食矣。 穀梁傳》云「練 或 文、《國語》「日祭」,自謂未葬之奠耳。 祭、左傳 壞釁其故廟 一<u>,</u> 而 語》有『日祭』之文,則是主復寢後,猶 《禮志》所謂釁廟而移故主,乃不俟其 其 畢, 廟,然後 而 • 遷 、祝辭 壞廟」,乃在三年之内,似 愚謂: 以新 2》所謂 如《左氏》云『特祀於寢 南 前 日 而壞 可 》篇首言「成 既葬猶朝夕哭,不奠、《士喪禮》有 死 「特祀於主,烝、嘗、禘於 納祖考之主。 以 一孝 者之主遷之於 廟將徙。 廟」,此謂 壞釁其故廟, 蓋既袝之後,主還於 嗣侯某,敢以 廟,將遷之新 敢告。」此謂 宗廟則 既練之後, 但《穀梁 又俟遷 愚謂 而 廟 嘉幣 恐大 復 納 也 行 而 新 祖

> 廟」也。 氏 遷舊廟、《穀梁》之説確然可據,不容復 舊主固已先遷矣。 之廟焉。若天子三昭三穆,而 禮言之: 中間宗廟有三祫祭或二祫祭,如 疑於其間 但言新主之入廟,而不言舊主之去廟 中容三給,其遞遷之法亦如此。《遷廟禮 塗、易檐而脩之矣,至喪畢 之主於高祖廟,於是祖之廟虚, 大祖之夾室,於是高祖之廟 有二袷,則於第一袷祭畢而遷高祖之主於 烝於曲沃」者,未可以其出於春秋之亂世 塗、易檐而脩之矣。 》所謂「烝、嘗、禘 至練,距大祥尚一年,姑以諸侯之 而 喪中於宗廟 於廟 以是知練後因給祭 第二次袷祭畢 」,及「晉葬悼公, 非 · 而納 虚 竟不祭、《左 練、祥相 前 新 而 主 可 而 可 以 於 以 遷 距 致 而 則 祖 改 祖 改

奠以素器,以生者有哀素之心也。唯祭祀之

而

非之也。

禮 人有齊敬之心也。 ,主人自盡焉 爾,豈知神之所饗? 《釋文》:「齊,側皆反。」 亦以 主

性,故

辟

踊

有算,爲準節文章。

準節之數

其事非

-

每一踊

三跳,三踊

九跳,爲

辟,跳

躍

爲

踊

孝子喪親,哀慕

至

懣

男

踊

女辟,是

哀

痛

之至極。

若

不

節

限,恐

傷

其

之禮。 已,故 鄭氏 器 自 飾 之素器 奠主哀,故 籩、豆、俎、敦之屬,皆用吉祭之器矣。 祔、練、祥皆立尸而行祭禮也。 而 瓦敦、毼豆、無縢之籩,皆素器 已。 日素。 盡,謂自盡其敬神之心,而不敢 日 日奠。 也。 葬前 愚謂:祭則有尸,有 「哀素,言哀 哀則以素,敬 器無 豈知 不立尸,直以饌 祭祀之禮,謂既葬之後,虞、 神之所饗,必 飾,祭主敬,故器 痛 則以 無 飾 具奠置 飾 也。 於此 也 尸則有 禮 奠用素俎、 凡 有 用 至虞而 於 由 有 物 初 飲 飾 地 人 飾。 蓋 之 喪 食 Ľ 無 而

踊 乎? 哀 之至也。 亦 以主人自盡其齊敬之心 有算,爲之節文也。 耳。 《釋

辟

鄭

氏

曰:「算,數也。」

孔氏曰:「撫心爲

「辟

,婢亦反。」

也。 反,徐又音鬱。 襲,哀之節 袒、括髮,變也。 節。 孔氏曰:「袒衣、括髮者,是孝子形 非一」也。 踊 去其吉時 至士多少有差。故疏云「準節之數,其 有二:一是每踊三者三爲一節, 袒、括髮,去飾之甚也。 ,故云『爲之節文』。」 悲哀、 士三踊,大夫五踊,諸侯七 也。 去,羌吕反。」 服 愠 飾者,是 《釋文》: 恚 愠,哀之變也。 者,是孝 去其 「愠,庾、皇紆粉 子哀 華 愚 美也 有 謂 情 所 去飾, 踊,天子九 有算之 一是天子 之變 袒,有 反,又紆 去 貌之 飾 去 也 所 美 義 雖

有多途,而袒、括髮爲去飾之最甚也。 孝

愚謂: 明,不煩 以 情之變於中也。上以二者並言,而下乃專 蓋哀甚 子悲哀,理應常袒,何以有所袒,有所襲? 袒、括髮言之者,以哀情之變,其事 袒、括髮者,飾之變於外也。 則 中釋也。 袒,哀輕 則襲,哀之節 限 也。 愠者, 易

人弁而葬,殷人哻而葬。《釋文》:「唱,況甫反。」 弁経葛 也。 所 弁明矣。 葬,殷人哻而葬」,以 三者皆士之祭冠也。下文云「周人弁而 士三月而 踰 諸 鄭氏曰:「接神之道,不可以純 時則哀,久 侯變服 《士冠》記云:「周弁、殷哻、夏收。」此 而葬,與神交之道也,有敬心焉。周 弁經,紂衣」之服也。《士 弁経葛,謂 葬,未 而葬,既虞卒哭,乃服受服也。 而敬生,敬則服 踰 時。 弁與 爵 弁 哻 而 愚 並 加 謂: 有 言,其 葛經,即 飾 凶。 弁, 爵 一喪禮 大夫、 天子、 弁 前 爵

> 歡主人、主婦、室老,爲其病也,君命食之也。 不敢以 服 問》世子生,告殯,大祝、大宰、大宗皆冕 天子在喪,有用吉服以行事者。而《曾子 尊近,致其哀而已。天子、諸侯之父,兼乎 不敬也。 神之,故變服而葬,以交於神明者,不可 交之道者,始死全用事生之禮,將 不變服,弁經 君者也,其尊遠,故至葬則哀久而敬生,而 ,皆此義也。 凶服接之。 蓋大夫、士之父,全乎父者也,其 葛而葬,人君之禮也 既葬反,喪服 觀於《書》之《顧命》,則 爲,于僞反。 而 反哭。 葬 與神 而 以

音嗣。」 《釋文》:「歠,徐昌悦反,一音常悦反。

日

也。

歠

歠

粥

也。

歐粥 鄭氏 其貴臣也。三人者,爲大夫未殯,皆不食, 愚 也。 謂 此謂. 「尊者奪人易 主人主婦,死者之子與妻,室老, 大夫之喪 也。 歠 謂 未 殯前

一七匹

故 以 而 鄰里爲之糜粥以飲食之。」蓋士無君命, 粥 鄰里爲飲食之也 有 以 時 歠 尊者之命奪其情也。 粥 者, 蓋 君 爲 其 困 病 故 問 喪》云: 命 食之

諸其所養也。《釋文》:「養,羊尚反。」 反哭升堂,反諸其所作也。 主婦人於室,反

於是爲甚。

升自 皆謂 適 平祭祀、冠、昏在於堂也。 所以升堂者,反復於親所行禮之處,謂 食之處。」 鄭氏 死 人於室者,反復於親所饋食供養之處。 而哭,以致其哀 反哭者,葬時 者平時祭祀、冠、昏所行禮之處,而 殯宫」,故知 西階,東面,主婦人於室』,下始云『遂 曰:「堂,親所行 在廟也。 孔氏曰:「謂葬訖 極從廟 故《既夕禮》主人『反哭,入 初反 也。 哭 反諸其所作者,反 禮之處。 而去,既葬則反 在 廟 主婦 也。」 室,親 反哭於 反哭所 愚謂 哀親 於 所 廟 此 於 廟 以 生 饋

殷既封

而弔,周反哭

而弔。

孔子曰:「殷

E

反哭之弔也,哀之至也。 饋養於是 之不 死者平時 復 行 也 行饋 禮 於 食祭禮之處,而哀親之不復 是 也。 反諸 反而亡焉,失之矣, 其 所養者,反於

尤甚。 《士喪禮》反哭:「賓升自西階,弔曰:『如 之何!』主人拜 盡哀而 亡矣喪矣,不可復見已矣! 而弗見也,上堂又弗見也,入室又弗見 止矣。」故弔無不 稽顙。」《問 哀, 喪》 故哭泣辟 加 日 反 「人門 、哭爲 也 踊

慤, 在义作「殼」, 苦角反。」 慤, 吾從周。」《釋文》:「封, 依注音室, 彼驗反, 下

「殷之禮,窆畢,賓就墓所弔主人。周禮則者,得哀之始,未見其甚。」 陳氏澔曰:鄭氏曰:「封當爲『窆』。 窆,下棺也。慤

者,蓋 禮 也。 也。」 於墓 而 遽 生所居止之所 則「已慤」之慤同,言其質有 俟主人反哭而 節 而 弔,則反而亡焉,既足以深致其哀, 蓋葬 者 無從容之意,故曰「已慤」。 亦不至於迫蹙而 親之在土 ', 不 愚謂: 慤,與七介以 事 . 如 甫 後弔。 畢 弔 而 一,固爲 即即 於 不得,其 家 行弔禮, 無 可哀,不若求親 孔子 者 序 之情 哀 也 謂 相見 爲 餘 則 殷 尤甚,故 文 不若 於禮 而文 禮 也 爲 大 不 兼 質 反 節 不 而 於 哭 足 平. 慤 於 悤 然 杰 弔

也。《釋文》:「首,手又反。」葬於北方,北首,三代之達禮也,之幽之故

冥 葬 鄭 故 於 氏 或 也 日 北 北 殯 及北 時 方, 首 仍 國北 南 者 首者,孝子猶若其 鬼神 也 0 尚 幺 孔 罶 氏 往 日 : 生, 言 出出

既封,主人贈,而祝宿虞尸。

不

·忍以

神

· 待之。」

> 形體 宿尸,以主人之贈爲節 來 死 下 鄭 祭於殯宫 是虞有尸 又《士虞禮》記云: 幣贈死者於壙之時 既夕禮》主人『贈 也。 ·棺也。 者 贈 氏 既 祝 而 日 主人贈而祝宿虞尸者,言祝之反 事 藏,孝子之心無 先歸。 」 也。」 主人贈 之。 贈,以 以安神也。 宿,進也,進之使於 愚謂: 幣送 而 孔 『男,男尸。 ,祝先歸宿戒虞尸 祝宿虞尸者,謂 用制幣、玄纁、東帛」。 氏曰 死者於壙 也 虞始有尸 所繫,故立 虞,安也。 : 既 女,女尸。」 封 也 , 蓋 门,謂 戸以 祭 葬反 主 親 時 葬 於 既 象 以 而 案 主 而 而

奠於墓 既 鄭氏 反哭,主人與有司 也。 巾 舍奠墓 曰:「視虞牲,謂 左,反,日中 周 禮 左,以 冢 而 視虞 父母 虞。 『凡祭 牲。 日 形 《釋文》: 中將 體 有 慕 在 司 虞,省 「舍,音釋。」 爲 此 以 禮 ) \_\_\_\_ 几 其 其 筵 舍 神 牲

孔

舍,釋 氏 曰:「几, 也。 奠,置也。 依 神 也。 墓道 筵, 向 南 坐 神 以 席 東 也 爲

也。」 也。 左,有司以 舍奠之有司,則於主人之反,留於 愚謂: 几筵及祭饌置於墓 視牲之有 司,與主人偕 左 禮 反者 地 墓 神

蓋虞祭以釋奠者之反爲節也。 之有司, 而舍奠者也。 亦可以 主人歸 反矣,於是 而反哭視牲,則 耐 行虞祭 主人贈 舍奠 也。 而

遽 祝 不凌節 治宿虞尸,有司反,日中而虞,所謂喪事 者,於此可 以 見之。 日 中 而 虞 雖

地 往 稍 葬 遠,則虞之過乎日中者,固當有之矣。 而 歸,非 日 中不足以蔵事也。 其或墓

《釋文》: 「離,力智反。」

葬日

虞,弗忍

一日離

也。

是日也,以虞易奠。

也。 虞以 行祭禮 葬前 安神,葬日即虞,不忍一 ,故曰「以虞易奠」。 無尸 ,奠置於地 ·, 至 **^** 雜 虞 日 始 記》云「士 離 文 親 之神 尸 以

> 日矣。 卒哭。 虞》記 謂後 儒以「他用 虞皆用柔日。 則己日 三虞,大夫五,諸侯七」,則天子 「三虞卒哭,他用剛 僧子 一虞改 問》、《 「他用剛日,哀薦成事」之文,專屬 卒哭,他用剛日, 再虞,辛日 剛日」兼蒙「三虞卒哭」言之,故 用 雜 假如 剛 記》皆云「卒哭成事」、《 日。 日,日 三虞。 士三虞,丁 此 不然也。 則知三虞皆用柔 『哀薦成事』。」先 《士虞》記云 日 當 葬 九虞 此篇 而虞 也。 1: 及

音附。」 日袝于祖父。《釋文》:「易,以豉反,徐音 卒哭曰「成事」。 是日也,以吉祭易喪祭, 亦。 明

祭,其 也。 鄭氏曰:「虞,喪祭也。既虞之後,卒哭而 吉爲成。」 前此朝夕哭於殯宫,至是則止殯宫爲 辭 蓋曰『哀薦成 愚謂: 卒哭亦祭名。 事」,成祭事 也。 卒,止

往祔於 哭之祭,此言「以吉祭易喪祭」、《曾子問 也。 是 辭 不用 月 此 祭易喪祭」。 西 大夫以上,虞與卒哭異月,士虞與卒哭同 位 而 而 而 而 其 卒哭。 也。 所稱 差之,則天子七月而葬,九月而卒哭也 因 卒哭改用剛 葬,三月而卒哭。大夫三月而 之哭,惟朝夕哭於次 、吉祭特牲 則以 牲 至卒哭而改用吉祭之禮,故 内 以爲其祭之名也。 升左胖 《士虞禮》主人即位於西階,亨於門 事 廟 末虞之明日卒哭。 諸侯五月而葬,七月而 《士虞》記卒哭,曰「哀薦 以 柔日 用剛 凡言吉祭有二: 」,是也 進 日,以死者之神將自殯宮而 柢,魚 之例也。 日 者,取 進 而 《雜 是喪畢吉祭、《士 已,故曰 鬐,皆喪 其變動之義,故 日 記 虞皆用 「成 一是喪中卒 事」,謂 卒哭。」以 日 葬,五月 「士三月 「卒哭」, 祭之禮 成 以 柔 事 日, 吉 祝

> 而遷 新主於廟。 祥、禫也。 主,特祀於主,烝、嘗、禘 父者,祔必以 而祭 明日祭之名。 廟禮》「乃擇日 虞》記「是月 左傳》曰:「凡君薨,卒 新主 死者,使其神附屬於祖父也。 也 喪畢,遇三時給祭,則因給 大夫、士無給祭,則亦因吉祭 也吉祭,猶未 其 祔 而吉祭焉」,是也。袝,卒哭 昭 猶 穆也。 附 也,就死者祖父之廟 哭 既 於 配」、《大戴 廟。 而 祔 袝 而 特祀, 反於寢。 袝 必於祖 而 • 而 謂 遷 遷 作

不 其 、變而 吴氏 忍一日末有所歸也。《釋文》:「比,必利 袝 虞祭之例, 廟 故袝 矣。 祭 澄 前 之吉祭也,比至於祔,必於是日 "; 此 翼早,急宜 日 必 : 與 相 「卒哭之末,有餞禮 卒 日 隔 哭 親 就 日 之 相 祖 而 接 神 廟 無 始祔祭,則卒哭後 也 迎奉其神。 所 依 送神適 歸,孝子不 愚 反。」 也 若 祖

哭皆 之間 以必 於是三 爲變。 迫促, 以 者。 無所 後,卒哭之前,其日 日 : 必 也 改 而後卒哭。』彼據士禮而言。 而 見 (於是卒哭之日相接連,不忍親之神一 也 至吉祭 《虞禮 用 間二月,中間未聞別有他祭,則士之 其 無 必 依 變,謂 喪服 或事 既虞,比至於祔,必於是日 之,往 爲 剛 虞卒哭之間,剛日 於是日 所 歸 變禮之意。 依 日接之者,孝子不忍使親 也 也 有忌 小記》云:『赴 所謂 變常禮。 歸 也。 也 是 諱 一他 接 日 鄭 變而 未及 愚謂: 消謂 卒 尚 用 所以 氏 且大夫以 , 不 剛 曰:「日 之吉祭,由 袝 哭之日 而 葬 葬者赴虞,三月 此 日」也。」 用卒哭之明日, 有變者,或時 連接其祭。 期,死 可 所言 速葬速 無祭,謂 也。 F. 有 一,虞 也接,謂 喪祭 所 每一 而 初 接 虞 即 孔 用 未 連 卒 所 日 有 之 葬 有 氏 接 日 變 而

> 殷 還 殷 鄭 練 赴 而 練 氏 於寢,至三年喪畢, 袝 虞 而 ,於卒哭之明日 而 日 袝 而 祔,於練祭之明日 未卒哭者,中間 ,周卒哭而 期 而 神 之, 袝 而 人情 而後祭 孔子 亦不 祔 而 也 也。 袝 善 當 於廟,則 也。 有 殷 袝 祭也 畢 周 愚 丁,主皆 卒哭 謂

於生 禮 君 釋文》: \*\frac{\times}{\times} 臨 也 臣 『苕帚。』惡,烏路反。 「茢、音列、徐音例、杜預云:『黍 喪,以巫祝桃茢執戈,惡之也,所以異 喪 有 死之道 難,乃旦反。」 焉,先王之所 穰 也。」鄭注 難言 也。 《周

周之所同

也

桃、茢 祝 愚 鄭氏曰:「桃、鬼所惡。 祥,爲有凶邪之氣也。 喪祝》「王弔則與巫前」,是也。 並 謂 前 三物, 臨 喪 周 用 蓋使巫 禮 巫 • 祝 男 者, 祝 巫 生人則 》三王甲 亦 執 茢, 萑 之。 與 神 無凶 則 苕, 王 交之道 與祝 諸侯則至 弔 可 邪 則 埽 前 也。 巫 不

《士喪禮》大斂而 茢。 事而 也。 有澌 也。 廟 之,小臣二人執戈先,二人後』。 將大斂」,君往,『巫止于門外,祝先入』。 恃以袪其疑畏,正所以使其得盡弔哭之情 之恩誼至矣。然必用 於殯斂必往焉,臨其尸 之矣,所以與 戈,臨死者則 二人執戈先,君之常儀也。 巫 門 止」,無『桃、茢』之文。《喪大記 往 〇鄭氏曰:「君聞大夫之喪,去樂,卒 滅之道,先王之所不忍言,故 難言,不忍言也。 丽 小斂及殯無文,明與大斂同,直言 孔氏 一,未襲 巫 止,祝 曰:「案《喪大記》『大夫之喪, 臨 加 也。 以巫祝桃茢者,人死,斯 生者之禮異也。 代之,降於 往,『巫止于廟門外,祝代 其已襲 巫祝桃莂者,蓋以 君於大夫、士之喪, 而撫之,其於君 則 天子 臨生者但 止 此皆大斂 巫,去桃、 也 死,澌 必 雖 有 有 小 臣 滅 所 死 惡 執 臣

> 祝代 巫,去 諸 祝代之,無桃 襲之後,斂殯以來,天子、諸侯同,並 **茢亦去之**,與天子同。 天子禮也。 以巫祝 故鄭注《士喪禮》引《檀弓》云「君臨 未襲之前,巫止 巫祝桃莂執戈,三者並 巫執茢」,亦謂未襲以前也。 左傳》隱五年: 君於卿大夫大斂焉,爲之賜則 侯禮,是 巫 桃、茢』也。 桃茢執戈」,天子禮也。 執 明 茢 天子亦 鄭注《士喪禮》云『諸侯使祝代 居 茢。」 愚 前,下天子也」。 祝執茢 衆仲卒,●公不與小斂 然,故 此 經 是天子臨臣之喪 具。 小小 所云, 謂"《喪大記》" 鄭云『已 臣執戈。 諸 若已襲之後 侯臨 謂 諸侯 知此 小斂焉。」 天 襲 子 巫止, 臣 臣 若既 文 則 則 喪, 據 使 止

「衆父」。「五年」,據《春秋左傳正義》當爲「元年」,「衆仲」當爲

0

八〇

《喪大記》皆謂大斂而 者。 斂者 矣,亦不 此 也 乃 於 故 巫 巫 止,則 因 與 有 不 茢,故 也 桃 其 鄭 衛 其 獻 氏 相 H 小 必 謂 **茢者**,蓋君 未 以此爲未襲之禮。 從 公 以 斂 專 爲 至 於 是 金士 於 焉 未襲, 以 廟 君 柳 患 Tri 此所言爲天子之禮 門 一喪禮 於卿 莊之卒,不税祭服 難 止 時, 於 非 爾,未 而 ×, 大夫恩意之厚者 也。 卿大夫爲 然,非 亦巫祝、桃 往者,故無 喪 聞 諸 然《士 大記》皆 可 有 侯 據 未 之 至 茢 襲 廟 賜 桃 一喪禮》、 爲 世 而往 並 が一対 常 門 不 而 而 有 典. 往 而 小 至

祖 也,故至於祖、考之廟而 喪之朝 一,周 禮 喪 出 之朝,謂 必告親,順死者之孝心而爲之也。 ,出必告,反必面 朝 也, 而 遂 順 葬。 將 死者之孝心也。 葬 《釋文》: 以 柩 柩之朝 朝 后行。 朝,直 廟 也。 遥 廟,象生人之 反。」 其 殷朝 爲 哀 人子之 離 而 其 又以 殯 於 室

喪,朝 所,故 喪》記 廟。 神, 之廟 喪禮 至 徧 之喪、祝斂群廟之主,而藏之大廟,尤 日。 子、諸侯之葬,每一 婦 亦 意 死 釋其義。 朝 者之 也 歷 朝廟否?」焦氏 未廟見,則 鬼神以 是不以一 周 群 而 ,其下十五條,似皆據喪禮之成文 廟又 以 有二廟 廟 至葬而 廟 人以 心 後 則 下至此,凡十六條。 然證以《士喪禮》多不合。 而 行 必 遠於 兼 爲 死者之心不欲遽 以 朝之也。 之蹕。 不朝廟。」 者,朝 後 有 以 日限朝 離 朝 此義 人爲尊,故 致 其 曰 : 廟。 其 日 室 祖 是母 也。 徘 朝一 爲 畢  $\sim$ 廟 ○崇精問:「 徊 自「喪禮 哀 愚 内竪 即 喪 矣。 殷 而 廟, 朝 謂 朝 亦 故 第一 人 不 離 而 天子、 禰,不 職》王 非 朝 至 以 忍 孔疏 其 遂 哀 也。 廟 於 遽去 條 死 寢 殯 如一歠 明 祖 后之 諸 言天 無 待 葬 處 則 總 戚 於 也 之 明 13: 之 爲 祖 考

之禮。 與? 也一 無疑。 喪,以 疑 贵 禮》之一篇,不當錯 端,而以 然此十六條文體相似,又首以「喪禮」發其 主人、主婦、室老,爲 逆變服 於此,以俟學者更考焉。 條,因 今於前 巫祝、桃茢、執戈」,則當爲大夫 又注 至「弁経葛 而葬,虞 下逐 疏 重言 文已 節釋之,似 謂 而 人君方有主 主,亦當爲人君之禮矣。 用 而葬」,則注 作主,大夫以 有諸侯、大夫之禮 其病 舊説釋之,謹 其 也,及「 所據者乃《 ,則「重,主道 「疏以爲 上皆 復 君 之禮 人君 臨 然 儀 其 則 臣

祭器之所以可哀也。

殉乎哉 也」。 孔 子謂「爲 之 用 鄭 用 其器 氏曰:「殆,幾 哀哉,死者 明 器 者 《釋文》:「殉 ,明器者知喪道矣,備物而不 非 小漸 幾 殷 而 之用 於用 也。 用 ,辭俊反。」 生者之器也,不殆於用 祭器 殺人以衛 也 愚 謂 備 死者曰 物, 此 可 既 善 殉 以 用 夏

> 道也。「哀哉」以 死 致 生人之器也。 者之異於人。 其 事 死 如 事 用其器則近於用其人,此用 生之意,不可用,又 此 下,記者之言也。 用明器者之所 爲 以 祭器 知 見 喪 送

「爲俑者不仁」,不殆於用人乎哉!《釋文》:「爲俑者不仁」,不殆於用人乎哉!《釋文》:之,明器之道也。孔子謂「爲芻靈者善」,謂之,明器,神明之也。」塗車、芻靈,自古有「其曰明器,神明之也。」塗車、芻靈,自古有

之非 是古 鄭氏曰: 俑,偶人也,有面 芻靈,束茅爲 之言,記者引之,以 之道待之,而異於生人也。 也。 而 芻靈,皆送葬之物 非 「神明之,神明 其 周 H 0 人馬。 明 器,神 目機發,似於生人。孔子 愚 起 謂 謂 下 明之者,言以 之靈者,神 死 此 文 也 者 又譏 此二句, 所 異 論 塗 周 車 之 於生人。 末 之類。 事 孔子 即 神 爲 遣 明

偶,寓 俑 俑 明器之備 塗車之芻靈」,是也。 爲 車 車之馬,及葬埋之。」鄭云「言埋之,則是 踊 車 由 也。 也。 采 芻 F. 「言鸞車象人。」又《校人》:「飾 色塗飾之,以象金 物而 御 靈 以其 以 而 右之屬,及爲 其 爲 不 有機發 寄寓 俑 可 蓋 用 人形 芻靈 也。 周 而 末之禮然 能 駕車 不能運 玉 於木,故 俑 跳踊 木 一之馬。 芻靈 偶 ,故謂之 動 也 日 人 亦猶 東草 ^ 偶。 也 馬 遣 冢 孔

于僞反,下『爲君』『爲使人』皆同。 有舊 思曰:「古之君子,進人以禮,退人以禮 穆公問於子思曰:「爲舊君反服,古與?」子 墜」,直媿反。」 膝 退 君反服之禮也。 又 何反服 人若將隊諸 之禮之有?」《釋文》:「爲舊 淵,毋爲戎首,不 今之君子,進人若將 與,音餘。 隊,本又作 亦 访故 善 加

子以

其象

人而

用之,故謂

爲不仁。

進人若 也。 以道 若 去而 不以 之義也。 以 君同,庶人爲 如 公以舊君反服爲問,而子思之所以答之者 氏引《喪服》「仕焉 爲舊君。 去國者,其妻、長子爲 服之異,豈仕焉 喪服 條,仕 道 仕 此 去國 去君 道 此與 即 焉 則 而 絶 遇 將 齊衰三月」章 知當時 焉 退人 已者 其 而 而 傳曰:「何大夫之謂 孟子告齊宣王之言相 加 也 而 (臣,臣 服 未 不 諸 國 已者爲 以 其 絶 「,爲 膝 待言矣。 而已者反得不服 君齊衰三月,未 之服 舊君者,乃《喪服》第三條 也。」穆公所問 禮 而已者」解此,非 舊君之服, 亦不以道 退 即 舊君; 人 此 舊君,第三條,大 爲 若 以道去君之謂 服 戎首, 舊 將 者,蓋 是去其君, 第二 君 隊 與庶 凡 蓋謂 乎? 諸 兵戎之首 乎? 聞 似。 一條,大 已寡矣。 淵 有 世 人 條 一; 而 爲 則 大 言 服 也。 鄭 夫 夫 夫 不 其 君 其

哉 爲 字,下音嗣。」 臣者之不能居公室也,四方莫不聞 食?」敬子曰: 悼公之喪, 瘠 則吾能 我 則 季 食食。」《釋文》:「夫,音扶。 ,毋乃使人疑夫不 昭 「食粥,天下之達 子問 於 孟 敬 子曰 以 情 禮 : 矣。 居 也 食 「爲 瘠 食,上如 者乎 勉 吾 君 而 何

鄙 不以 禮 鄭 言,麤倍 食食。三臣不能 哀 等不能居公室以 三年,始死,三日不 孫、叔孫、季孫也。 子,武伯之子,名捷。 倍」之戒歟 瘠之貌,而無哀戚之實心也。 氏 禮 티 : 也。」 喪之,則 如此,曾子 昭 愚謂: 子,康 其 居公室 臣禮事君也。三臣,仲 存時不 罪 所以 食,既殯 不以 子之曾孫, 敬子言,鄰 又 一,其 加 有 情居瘠,言 盡 甚焉。 「出辭氣 罪 食粥,至 忠 大矣。 爲君 喪又不 名 國皆知 敬 强。 斯 子之 没 練 斬 虚 遠 又 乃 衰 爲 盡 吾 敬

子 : 哭。 往。 衛 司 子夏 主人未改服 子游 徒 敬 弔 子死,子夏弔焉,主人未 曰:「聞之也與?」曰 焉 ,主人既 ,則不經 小斂,子游 小 出 斂 聞諸 絰, 經 反 夫 而

弔 服 麻 謂:改服者,主人既小斂,始服 鄭 則 也。 氏 衰。 日 弔者加經帶。 凡弔者之服 司 徒,官氏,公子許之後。」 ,隨主人 主人成服 而 變。 則 未 主 成 服 人 服 改 之 愚

有焉。」曾子曰:「晏子可謂知禮也已,恭敬之曾子曰:「晏子可謂知禮也已,恭敬之

知禮。以恭敬爲本,晏子能恭敬,故曾子許其以恭敬爲本,晏子能恭敬,故曾子許其鄭氏曰:「禮者,敬而已矣。」 愚謂:禮

遣車五乘。晏子焉知禮?」《釋文》:「遣,棄戰反。墓而反。國君七个,遣車七乘;大夫五个,有子曰:「晏子一狐裘三十年,遣車一乘,及

禮記集解

傳寫誤耳,今正之。若」。按孔疏,有子,孔子弟子有若。是記文本作「有子」,乘,繩證反。焉,于虔反。」○舊本及石經「有子」並作「有乘,繩證反。焉,于虔反。」○舊本及石經「有子」並作「有

具。」 反也。 人持以 設 少 奠之牲體 體 不以命數,喪 車之差,大夫五,諸侯七,則天子九。 鄭 九苞,苞九个。」 大牢加以馬 分爲二十五,苞五个。 反,言其既窆而 也。 造奠。 之數 氏 曰:「言其太儉逼下,非之。 凡牲 及 如 賈氏公彦曰:「大夫三牲九體,折 也。 墓 既奠,取牲體包之,載以 墓,置於椁之四隅。 而葬之者也。 '性,則十二體,分爲八十一个, 體一段謂之一个。《特牲禮》 而 <u></u> 禮 反者 雜 略 歸,不留賓客有 也。 愚謂: 遣車,載所包遣 記 ,藏器少,故葬速 諸侯苞七个。 个,謂 葬時,柩車將行, 所 遣 包遣 事 乘,言 車 遣 及墓 也 車 視 奠 諸 而 -,使 即 其 牢 牲 侯 遣 而

牲取 體,折分爲四十九个,分爲七包,每包 奠二牲,每牲取三體,分爲二包,每包有 遣 奠亦大牢,每牲取三體,折分爲二十五个, 持之以 取臂、臑,後脛折取骼。」士包三个。 者。」又云「苞牲取下體」,鄭云:「前 有子言晏子儉不中禮,不足爲知禮也。 包九个,包用 分爲五包,每包五个,亦包用一車載之,故 个,包用一車載之,故遣車七乘。 个,則皆全體 云「苞二」,鄭氏云:「所以 夫五个,謂每包所有之个數也。《士喪禮 左肩、臂、臑 佐食盛所俎,俎釋三个」、《少儀》「大牢 車  $\equiv$ Ŧi. 一體,折分爲八十一段,分爲 如墓。 乘。 若天子遣奠,兼 折九个」,是也。 也。 一車載之,則遣 諸 侯遣奠大牢,每 士 無 遣 車,每苞 用馬 裹羊豕之 國君七个,大 車 九乘也。 九包,每 牲,亦每 性取 大夫遣 用 士 脛 肉 遣 折

注: 其語意,似以一个爲一包也。 段,又與《記》所言五个、七个者不合。 《士喪禮》無遣車,賤 凡九體。大夫分九體爲十五段,三段爲一 牲取三體。 士少牢二牲,則六體,分爲三 孔 鄭 言「苞二」,而鄭氏云「苞三个」,則是个乃 語殊不可曉。 五个,皆謂 車馬之賜也。 車馬者乃有遣車」,則爲大夫者未必皆 天子分爲二十七段,凡九包。」 包,凡五包。諸侯分爲二十一段,凡七包。 「士二牲六體,分爲三个,一个有二體」,其 氏 氏 一个有二體。大夫以上,皆大牢三牲, 『前脛折取臂、臑,後脛折取骼。』是一 曰: 人 「案《既 所 臣 包之牲體之數也。 士包三个,國君七个,大夫 又謂大夫、諸侯每包皆三 賜 夕禮》『苞牲 車馬者, 而禮略耳。 乃 有遣 然《士喪禮》 取 孔疏 下 鄭謂 愚謂: 車。」 體 乃 詳 謂 有 賜 鄭

> 在包之中者, 而个非苞也。 《儀禮 賈 疏

曾子曰: 得之。 「國無道,君子耻盈禮 焉。 或

奢

則

示之以儉,國

儉則示之以

禮

子、婦人安位?」子張曰:「司徒敬子之喪, [昭子之母死,問於子張曰:「葬及墓,男 鄭氏 過,或抑之大甚,惟聖人之言爲得其平。 其一偏之見言之,故其於晏子或予之大 大儉爲不知禮者,以禮之文而言也。 之失,無害爲知禮也。蓋曾子以晏子恭敬 救奢之失,亦未爲得禮之中也。二子各就 固。」又曰:「晏平仲 爲知禮者,以禮之本而 謂:曾子言晏子所以爲此者,所 豆,賢大夫也,而難爲下矣。」蓋 曰:「奢則不孫,儉則固。與其不孫也, 日 : 時 齊 方奢,矯之是 祀其先人,豚 言也。 有子以 也。」 儉 以 固 肩 矯 孔子 可 不 當 以 掩 寧 愚

或

毋,音無。 焉,主爲主焉。」婦人從男子皆西鄉。《釋文》: 毋 相,息 子 相 亮反。 日 斯,音賜。 男 鄉,許亮反。 子 我 西 喪 沾,依注音覘,勑廉反。」 鄉 也 斯 婦 噫,本又作『意』,同于其 沾,爾 人 東 鄉 專之: 日 賓 爲 噫 人反。 賓

之聲。 覘,視 婦 視 鄭氏 子自以 葬時男子皆西鄉,婦人皆東鄉,禮 視之,欲人 口 夾羨道爲 曰:「昭子葬 , 使主自爲主, 賓自爲賓。 當 知矣。」 人從男子皆西 曰 : 也。 有 毋,禁止之辭。斯,盡也。 齊之顯家,今行喪禮 所 「或 位 昭子自 更改以示人,故使子張 觀 愚謂 也。 其母,以子張 昭 之,法其 子,齊大夫。 鄉,則女賓從男賓皆 夫子,孔子也。 謂 葬時男子皆西鄉 齊之大家,有事 所 爲。 相禮,故問之。 人 於是昭 東鄉、 必 噫,不 沾讀 也。 陳 專主 盡 婦婦 西 氏 子 人 東 來 鄉 昭 盡 寤 人 鄉 其 覘 澔 E

> 壙,而 之南,又所以爲親疏之序也。 皆 疏之序,失禮甚矣。 自爲主,賓自 東鄉 男賓在衆主人之南,女賓在衆 所 以 爲 爲 賓,既無男女之别,又紊親 男 女之列 也。 今昭子使 以 親 婦 者 主 近

鄭氏曰:「喪夫不夜哭,嫌私情勝也。」孔子曰:「知禮矣。」

室。 夫!」《釋文》: 内人皆行哭失聲。 有斯子也,吾 文伯之喪,敬姜據其牀 今及其死 「夫,音扶,本亦有無『夫』字者。」 以 也,朋友諸臣 將 爲 斯子也,必多曠於禮 賢 而不哭,曰:「昔者 人 也,吾未嘗 未有出涕者,而 以 就 吾

鄭氏 妻妾也。」 季氏,魯之宗卿 未嘗就公室,言未嘗與到公室觀 曰 : 以以 孔氏 爲 ,敬姜有會見之禮 賢 曰:「曠,猶疏薄 人,蓋 見其 有 才 其 也。 藝 内 行 也。 也 疏

不敢 季 康子 薄 見 於 見姑。 公賓客朋 之母 死 將有四方之賓來,褻衣何爲 ,陳褻衣,敬姜曰: 友之禮,故未 有 感 戀 「婦 出 涕者。」 人 不 陳 飾

於斯?

」命徹之。

母。 姜命 褻衣 斂 鄭 衣,故敬姜非之。 而 几 用 不 方之賓,嚴於 氏 也。 陳,季氏但欲以 去褻衣者,蓋婦人之褻衣,雖 褶 日 衣。 愚謂:《喪大記》君小斂用複衣,大 君斂用褻衣,則大夫可知。 褻衣,非 複 衣、褶衣 舅 姑。 上服,陳之,將 多陳衣爲榮,并 即即 敬 袍、褶 姜,康子 之屬 用 以 從 陳 以 而 皆 斂。 祖 斂 敬

吕反。」 矣。 曰 : 有子與子游立,見孺子慕者。 壹 「予壹不知 情 在於斯,其 夫 喪之踊 是 也 夫!」《釋文》:「去,羌 也。 予欲 有 子 去之 謂 子 游

一,專 也。 言予 專 不 知夫喪之何 以 有 踊

子游 情 於滅 其號慕 也。 者,志不在於酒食,所以使之覩物思哀,而 興 有爲爲之也。 微 喪致乎哀而已,而不必爲之節文也 情,即在於斯,其是爲人之真情也夫,何 人率其情以行,則賢者無以 直行,不知禮之節有定,而人之情不 所以使之殺其情而不至於過哀也。 而徑行者,戎狄之道也。 爲踊乎。 久欲去之。 不至於怠而忘之也。」有子之意,在於徑 ,殺也。 物,若荀卿言: 曰:「禮有微情者,有以故興物者,有 性 或哀毁以傷生 迫 蓋喪之踊 不肖者 切之情 微情,謂哭踊 今觀 物, 無 於孺 而 「斬衰、菅屨、杖 謂衰、絰之屬 以 ,或朝死而 有 不 企 子之慕,而 自 節,孺子之慕,則率 而 禮道 之節,變除之漸 知者。 及 俯 必必 夕忘。 則 而就 有子 相率 也。 不然 知孝 而 故,謂 以 且 啜 子之 苟 可 以 而 故 首 必 使 齊 情 粥 爲

於悖死忘親矣。

愠斯 同 句。 此 斯 節 愠 愠」,凡十句 相 舞斯 對。 温二 ,亦當新足耳。」 禮 斯 喜 王《禮 戚 温 則 》本云『舞斯愠』者,凡有九句。 中 ,紆運反。 斯 句 斯 間 斯 并 之謂 戚, 》本又長,云『人喜則 『舞 句 ,當是後 陶 注 者,取 斯愠 戚 皆衍文。 禮。 此喜怒哀樂相 陶 斯 人所加 義 斯 歎,歎斯辟, 不同。 《釋文》: 句,是哀樂相 咏 辟,婢 耳 咏 鄭 斯 盧 對。 斯 又一本云『舞 亦 「猶、依注作『揺 循 禮 反。」〇 猶 生。 循 ~ 首 本或於此句上 辟 末各 斯陶」,與 猶 亦 而 斯 孔 有 鄭 斯 四,正明 疏 踊 『舞斯 諸 斯 舞 굸: 矣。 本 蹈 盧 亦 舞 愠 有 音 鄭 蹈 哀 有 如 「無 遥 品 斯 不 斯 無 樂 鄭

歌 欲 外 近 誤 鄭 發 境 氏 不 也 Ė 也 順 辟 曰 心 摇 則至於身體 拊 「咏, 謳 咏者,喜發於外 而 謂 心 喜 身 也。 踊 動 也。 躍 摇 陶 動 也 者 猶 也 摇 喜 動 而 當 秦 心鼓 爲 爲『摇』, 人 摇 愚謂 咏 猶、 不已,則 歌 盪 摇 於内 也 喜者, 聲之 至 而 咏 相

制

絞衾,設蔞翣,爲使人勿惡也。

始死

脯

人 死 之初感 之情 或 意 斯 對 咏 其所 之有 於拊 悲 而 於 哀、樂各四 徑行,故先王 温」 舞 無此 與 戚 ,詳文義 遂 起 ,斯惡之矣。 歎 其 心。 至 止 等級,爲 舞 不已,則發爲歎息。 與 也。 對, 於 句,或本 而 也 句 踊 由微 拊 愠 不過, 7,似不 在其 句, 對,哀樂之動 哀 心不 陶 也 愠 之 因 而至著者若此 樂之發 與 係衍文,如 無 中間,言哀樂 是乃 節 人情 怒 Ė 當著 戚 愠怒不 意 能 而 相 對 則 使之有 也 而 也 於聲 所謂 對 此 ,哀樂之盛 起 斯斯 於四 立制,爲之品 己 ,喜與愠 歎 而 樂 陸氏之説 倍 音 禮 孔 跳 裁限 息 則 極 體 之矣。 也。 疏 循 也 然情 踊 不 至 則 也 謂 環 對,哀 於 已 於 哀 摇 此 故 鄭 相 蓋 不 與 獨 中 悲 是故 生之 與 節 情 故 他 則 而 口 哀 也 戚 樂 舞 辟 至 使 以 樂 舞 得

二八八

訾也。 使人勿倍也。 其饗之者也 之奠,將行 《釋文》: 遣 故子之所刺於禮者,亦非禮之 「惡,烏路反。 自上世以 而 行之,既 來,未之有舍也,爲 倍,音 葬而 佩。 食之,未有 絞,户交反。 見

蔞,音柳。

食,音嗣。

舍,音捨。訾,似斯反。」

焉。 之情 所謂 飾。 鄭氏曰:「絞衾,尸之飾。 此 之情,又因以故興物之意而 病也。」 有遣奠。 見禮之不使人直情而徑行者,皆有深意 飾、奠祭之禮,而使人得以 言先王因死者之易於倍棄,而制 句通結二節之義 《周禮》蔞作『柳』。 故有子之所刺,不足爲禮之疵病也 而品節之,所謂「禮有微情」者也 「既葬而食之」也。 食,反虞之祭。 愚謂:《士虞禮》曰「特豕饋食」, 將行,將葬也。 上言先王因 舍猶廢 盡其 蔞翣,棺之牆 廣言之,所 事 爲喪葬之 也。 死 哀 如 樂 以 此 葬 生

> 之何 當問焉? 於師 然其所以互易者,則由記者傳聞之誤耳。 非簡册錯互矣。 夫差謂行人儀」,可言簡册錯互。至下文又言「大宰嚭」,則 當云『陳行人儀使於師,夫差使大宰嚭問之』。』 陳遣使者,止用行人,則儀乃陳人也。 扶,下初佳反。與,音餘。」〇洪氏邁 矜而赦之,師與 子,則謂之何?」曰:「君王討敝 不謂之殺厲之師與?」曰:「反爾地, 不殺厲,不獲二毛。 言「行人儀」者一,言「大宰嚭」者二。上言「大宰嚭使於師 竟,音境。 吴侵陳,斬 ?」大宰 ,夫差謂 大,音泰。 師必有名,人之稱斯師也者,則謂 祀 蓋嚭實吴人,儀實陳人,洪氏之説得之。 嚭 殺 行人儀 有無名乎?」《釋文》:「還,音旋 嚭,普彼反。 厲。 曰:「古之侵伐者,不斬 今斯師也,殺厲 師還 曰:「是夫 出 使,色吏反。 曰:「嚭乃夫差之宰、 竟, 記《禮》者簡册錯 陳 也多言。 邑之罪, 大 夫差,上音 與? 宰嚭 愚謂 歸 此章 互. 其 又 使 爾

位有屋樹者。厲,疫病。大宰、行人,官名鄭氏曰:「吴侵陳,以魯哀公元年。祀,神

之心而 宰果有反地歸子之言,則陳行 問行人以衆人稱此師之名。名以 之,終其 子,謂所 係 師者,欲吴人耻 重人也。 也 虜之。 「夫差内 夫差 誘勸之也。」 意。 獲民臣。 欲微切之,故其言 ,吴子光之子。 二毛,鬢髮斑 行惡 吴、楚 其名之惡而 事, 師 僭 與 而 號 白。 有 外欲 稱 嘗, 無 王 改 :似若 名乎,又微 止言『殺 試 得善名, 人因 悔 也 也 不審然 殺 其 吴 獲 好名 吴大 氏 厲 厲 故 之 使 潛 勸 謂

顔 不及其反而 及殯,望望 貌。」 鄭 T 有 始 北 氏 善居 曰:「顔 , 充充 喪 不得之心,彼此各舉其一也。 孔 焉 息。 氏 如 始死,皇皇焉 如 日 Í, 有 有 從而 窮」,謂形 魯人。 皇皇, 弗及; 從, 猶 如 貌窮屈 彷 有 既 隨 徨 求 葬 也 而 亦亦 上 慨 弗 慨, 篇 上篇 彷 得 徨 云 憊 如

既葬迎 然』。」 反,而 甚,故 也。 時 此 更説 皇皇 此 皇』,是輕,故云『望 及」,亦同 謂 止,不説練、祥,故既 而 Z 而 言居喪哀悼之心 不 不及,似 云『始死,如 既 變者 復可 如 既葬,如 練、祥,故云『 章,辭 止息 殯 如 精 有 愚 有 及,所 也。 如 如 而反,如親之精氣,不及與之偕 望 謂: 有 以待之,所謂「其反 求 有 此,與上 而 不 雖 可及之理,既 而 求 有 此『始死 慨 以 不 及其反 所 不 求 而 然 文異 至」,此 指 而不至」也。 得 不 而 葬則慨然。 如 練 不 自始死 篇「始 得 不得 也。 不 而息者,上 而 皇皇」,是皇 同, 上 及其 一云『既 葬 據 慨 」,據 篇 上 死,充 其 至既 慨 外 然, 也如 篇 云 反 大歸 然如不 貌 上《檀弓 此既 内 葬, 郊,其 云『既葬, 而 祥 所 既 充 殯 疑」也。 心 息者 求 如 後從 而 皇 則 如 葬 所 葬 也 之 有 因 廓 皇 不 求 則

子張問 曰: 讙』,有諸?」仲尼曰:「胡爲其不然也! 者天子崩,王世子 讙,音歡。」○今按:《書·無逸》作「言乃雍」。 「《書》云『高宗三年不言,言乃 聽 於冢宰三年。」《釋文》: 古

曰 : 鼓 知悼子卒,未葬。 鐘 朝。 不言 張問有此與,怪之也。 鄭氏曰:「時人君無行三年之喪禮者,子 夫子告以聽於冢宰,則禍亂非 庶人,子張非不 天 官 在 杜蕢自外 ,則臣下無所稟令,禍亂或從而生耳。 卿 寢。」 ご又 胡 貢 氏 杜 曰:「三年之喪,自天子達於 王事者,三年之喪,使之 責 來, 平公飲酒, : 知 入寢,歷 也。 聞 調 鐘 飲斯。」又酌,堂上北 讙,喜悦也。 聲, 蓋以爲 階 師 曰: 而 曠、李調 所憂矣。」 升 「安在?」 人君三年 酌 冢宰, 日 侍, 聽

> 如字、《左傳》作『外嬖嬖叔』。 坐飲之,降,趨而出。《釋文》:「知,音智。 蕢,苦怪反。 飲,於鴆反,下 李調

飲曠」「飲調」「飲寡人」皆同。」

面

與君飲 人君 謂: 也。 蒯 皆與,此惟師曠、李調二人獨侍,而杜 非 獻 鐘 卒。飲酒,與群臣 鐘聲,乃知 鄭氏曰:「悼子,晉大夫荀盈,魯昭 也。 而樂闋。 ,樂作也。 飲酒,私燕 飲食皆奏樂。 杜蕢,或作『屠 寢,路寢也。 也。 燕禮當立賓主,卿、大夫、士、庶子 非 獻君亦如之。曰『安在』,怪之 《燕禮》記曰:『請旅侍臣。』鼓 《燕禮》賓入門,奏《肆夏》,既 燕禮之正明 也。 燕。 蒯。 歷階,即栗階,謂升 鄭氏 杜蕢,《 平公,晉侯彪。 三酌皆罰。」 引《燕禮 矣。 左傳》作 鼓,擊 解此 一費聞 九年 也 階 愚 屠

0 不不 知,四 庫本《論語纂疏》作 :「疑此

曠

飲

斯

酌

曰

禮

記

卷

二九

不聚足也。

樂。 爲,于僞 敢 也 調 也 以 平公呼而進之曰: 與 食,忘 何 不 大師 與 知悼 知 也?」曰: 反。 **公爾言。** 防 也,不 君之疾,是以飲之也。」「爾 子 Ľ, 在堂, 是 必 以 爾 也,宰夫也,非 以 季 調 飲 飲之也。」《釋文》: 反。 詔,是以飲之 斯 也,君之褻臣也 曠 蕢,曩者 其爲子、 共, 何 也?」曰: 音 供。 爾 卯也大矣。 刀匕 與, 心 也。」「 或開 音 子、 是共,又 一,爲 樂, 預。 子, 飲 爾 防, 如 卯 字。 何 飲 飲 矌 是 音 不

樂爲 子死 鄭 肉,比卒哭不舉樂。』詔,告也。 H 氏 ,桀以 曰 吉事,所 雜記》曰: 開 Z 卯 以 謂 Ė, 君 自 諫 争, 戒 王 爲 懼。 者謂之疾 有 卿大夫, 所 大臣 發 起。 日 大師 比 喪 不 葬 重 紂 不 典 於 以 以 奏 舉 甲 食 疾

> 有以 溢。 樂。 諷 言,己不當言而言,所以皆罰之,蓋用 事 於堂上西序也。 者,以公之必將 公也。 也。 開 褻, 蕢言平公飲酒非禮,二子當言 發之, 愚謂: 嬖 也 故 平公見蕢 怪 近臣 不 與 · 與 而問之也。 知 亦當 八之言。 防,預知 三舉 規 罰 君 蕢不 防閑諫 在堂, 爵 意 防, 言 謂 即 争之 此 其 而 以 不 出 放 殯 必

之杜 杜賷 平公曰:「寡人 必 毋 洗 舉。 廢斯 而 《釋文》: 爵也。」至于今,既畢 揚 觶。 亦有過焉。 「鱓,之豉反、《字林》音支。 公謂 侍者曰:「 酌 獻 而飲寡 斯 如 我 揚 人!! 死, 觶 謂 則

房,又扶放反。」

鄭氏 戒。 謂 君 也。 平公自 謂 曰 之杜 揚,舉 平 知其過,故 舉,因杜 公 也 聞 義 毋 則 廢 賷 命爵 斯 服 以 爵 爲 欲欲 揚 而 名 自飲, 觶, 也。」 後 世 舉 又命 爵 以 爲 愚 於 禮記卷十終 體記卷十終

九三

## 禮記卷十

或 賜 史 進 館 士 纂 及 第 脩 孫 翰 希 林 日 院 集 編 脩 解

## 檀弓下第四之二

四 乎 衛國 時,將葬矣,請所以易其名者。」君曰:「昔者 夫子貞惠文子。」《釋文》:「難,乃旦反。」 亦貞乎! 公叔文子卒,其子戍請謚於君,曰:「日月 鄰交,衛國之社稷不辱,不亦文乎 1 凶饑,夫子爲粥 昔者衛國有難,夫子以其死衛寡人,不 夫子聽衛國之政,脩其班制 與國之餓者,是 不 以以 故 亦 謂 與 惠 有

也。

大夫、士三月而葬。

君,靈公也。

鄭氏曰:「謚者,行之迹。

有時,猶言

有數

之節。」 拔歟? 豹作亂 豈 謚 至戦 後 謂 貞子,朱鉏 朱鉏諸 則趙武在春秋時已有獻文之稱,而公孫 文、莊襄等王,而 能,故曰文。班,言上下之序。 日 齊豹作亂,公如死鳥。 至大者 後 不言貞惠者,文足 魯昭公二十年,盜殺衛侯之兄縶也。 至三字,尤古今所未有也。 「脩其班 或 時, 人,平亂者爲北宫喜。 事甚詳,當時 大 字以 愚謂: 謚 喜 周 制,以 成子,初不言拔 及朱 有 爲 謚起於周公,皆取其行之 威烈 謚 與 鉏 從公者爲公南楚、析 所謂「節以 始此。 四鄰交,非博 以 王、慎靚 賜 班制,謂尊卑之差。 兼之。」 謚 事 有衛君之事 然據《檀弓 ^ 衛侯賜喜謚 王, 制,言多寡 而 左傳》敘 壹 誤 方氏 秦 惠」也 聞 以爲 有 者 慤 拔 惠 時 齊 不

者,曰 者乎?」不 石 玉。石祁子曰:「孰有 仲 ·卒,無 沐浴佩 沐浴 適子,有 佩 玉 玉。 則 庶子六人,卜 兆。」五人者 執親之喪而 石祁子兆 衛人 皆 沐 所 沐 浴 以 以 爲 佩 浴 龜 玉 佩 後

知

也。

《釋文》:

「駘,大來反。」

反。

養,羊尚反。」

辭。 鄭氏 福 得 幼,直以 法:「年鈞以德, 心 子六人,莫適立 人,未必皆同 吉兆。 正 也。 且知禮。」 石祁 曰:「石駘 卜決之,蓋駘仲之遺命也。 子不沐 沐浴 爲 年 佩 蓋蓋 也。 仲,衛大夫石碏之族。 知者 浴 德鈞以 愚 玉則 佩 謂:《左傳》言立子之 既 石祁子不沐浴佩 ,所卜得其 玉,守禮而 兆,掌卜者謂之之 皆庶子,故 ト。」駘仲庶 人也 不惑於禍 不 兆,謂 ※子六 論 玉, 庶 長

定 陳 mi 子 車 后 請 死 陳 以 於 子 殉 衛 亢 葬。」子亢 至。 其 妻與其家大夫謀 以 告曰:「夫子 日 以 殉 葬, 疾,莫養 以 殉葬, 非 禮

以

龜

有

也。 爲之也。」於是弗果用。 則吾欲已; 雖然 ,則彼疾當養者,孰若妻與宰? 不得已,則吾欲以二子者之 《釋文》:「亢,音剛,又苦浪

使其 夫。」 孔子弟子。 將擊子 鄭氏曰:「子車,齊大夫。子亢,子車 故知孔子弟子。 止,以斯言拒之。 人不 「《論語》:『陳亢問於伯魚。』與伯 齊師 懼而自止。 可 圍成,魯師 以 愚謂:家大夫,即宰也。 車,子 理 下,地下也。 一争,故言欲以二人爲殉,所以 車 射之, 殪。」故 又昭二十六年《左 及 已猶止也。」 齊 師 戰 子亢度諫之不能 於炊 知是齊 子亢度 鼻。 孔氏曰 魚相問 」傳》: 魯人 · 弟

謂 爲禮也。」孔子曰:「 子路曰:「傷哉貧也! 孝。 斂首足形 還葬 啜 菽 而 生 無椁 飲 無 水 以 稱 盡 爲養,死 其 其 財 歡 が、斯之 斯 無 之 以

禮記集解

九

六

尺證 也,王 謂 禮 反。 云: 0 | 《釋 「熬 文》: 豆 耐 啜 食曰 ,昌劣反。 啜 菽。」斂,力檢 叔,或 反。 作『菽』,音同 還 一,音 旋。 大豆 稱

之貧 謂: 牆 信 鄭 亦 薄 貧 孔 務乎其 也。 氏 氏 而 翠,奚 雖 食有 也 曰 無  $\Box$ 儉 飲 害 而 於孝。 黍稷之屬,今但 當 本 養 有 啜菽 還 無歉 焉 而 漿 而 猶 己。 醴之屬,今但 能 以 疾 於 葬 盡 也。 菽 禮。 不 而 其 爲 然雖日 能 歡 謂 粥 夫所 稱 不 啜 而 則 其 及其 菽 常 謂 飲 先 用 財 啜 孝 意 水 而 = 則 之。 日 與 已, 牲 承 而 必 月 已,飲 禮者 一,備飾 志 食之 誠 必 雖 愚

有 而 后 衛 私 從 獻公出 人 ? 也 柳 如皆從,則孰守社 毋 莊 奔,反於衛,及郊,將 乃不 曰: 可 如 乎 皆守社 ! 一稷? 弗 稷, 果 班 班。 則 君 邑 於從 孰 反 《釋 其 執 羈 者 文 》: 或 而 勒 而

從,才用反。

勒,丁歷反。」

從者 被 君也 也。 若一,有 鄭 所以安反側之心。 行 出 六 氏 者無保其力,居者無 年復 獻公行 而 日 則居者之心懼矣。 卒 然觀於 : 私 能 歸 獻 則 反 事,備見於《左傳》,蓋 於衛 生怨。」 公以 (國者, 此,則 魯襄 甯武子宛、濮之盟 靮 蓋 猶 亦 [聽用 愚 + 紖 懼 有 莊 謂 四 也 其 由 年 忠言, 諫 罪。」正 與? 反國 公以 出 莊言從、 奔 其 無 而 弗 齊 所 偏賞 道 此 曰 班 : 以 之 意 守

潘 變 與 請 莊 衛 當祭必告。」公再拜稽首請於尸曰 ,普干反。」〇今按: 縣 往 也 有 也。」《釋文》: 者 大 潘 史日 不 ,非寡人之臣,社稷之臣 氏 釋服 書 柳莊 而 「革,本又作『亟』, 而往,遂 納諸 縣 寝疾。 ,如字。 棺 以襚之,與之邑裘氏 日 公日 : 居 世 力反。 也。 世 「若疾革 : 一萬子 「有臣 聞之死, 縣, 孫 柳 雖

革,急也。不釋服而往,蓋使人攝祭以終

314

何異? 方祭而 而 尊賢之心,然棄祭祀而不終,以諸侯 死者,亦非 書之於券。 以 輟祭而 事 勿班邑, 君於卿大夫大斂焉,爲之賜,小斂焉。」莊 襚其 襚 也。 大夫,書 (臣,其 往 卒,祭畢 柳莊之事,不見於《左傳》,觀 裘氏,邑名。 固 一, 則 亦 禮 書券而納之於棺 可 也。 非 紊亂王章,與曲縣繁纓之賜 封邑之券而 而 以 禮 往,猶在小斂之前,今乃 爲賢矣。 矣。 陳氏 潘氏,縣名。 侯伯祭服驚冕,而 澔 然《喪大記 納諸 曰:「此 ,所以要言於 棺, 書,謂 皆 雖 命 其 非 服 有 諫

玉 百 陳乾昔死 陳乾昔寢 如我死,則必大爲我棺,使吾二婢子夾我。」 一反。」 棺 乎? ,其子曰: 疾,屬其 弗 果 殺。 兄弟而命其子尊己 以以 《釋文》: 殉 葬,非 草, 禮也 音干。 況 曰 : 屬,之 又

禮

矣。」

鄭氏曰:「婢子,妾也。善尊己不陷父於

不義。」

B反。」 尼曰:「非禮也。卿卒不繹。」《釋文》:「去,羌仲遂卒于垂,壬午猶繹,《萬》入去《籥》。仲

故 皆人,去文舞 猶者,可已而不已之辭也。《萬》者,文、武 襄仲也。 仲遂卒于垂,壬午猶繹,《萬》入去《籥》,此 但 不繹者,繹祭輕於正祭,而公卿君之股肱, 以示殺樂之意 夜》」,是也。《萬》入去《籥》,言文、武二舞 重,文舞爲輕,《祭統》「舞莫重于《武 二舞之總名。 春秋》宣八年經文也。 )卿卒則不繹。今宣公既不廢繹,於樂又 去其輕者 垂,齊地。 「,則 而 《籥》,文舞 而 獨 其無恩於大臣 其 用武 繹,祭之明日又祭也。 重 舞,蓋但去其輕者 者猶不 仲遂、魯大夫東門 也。 甚矣。 去也。 舞以武舞 卿 宣公 卒 宿 爲

皆 爲武 舞 或用 也。 權 正 羊傳》謂「去其有聲者,廢其 夏》,武舞 以爲文、武二舞之總名,朱子從吕氏之説。 正 嘗 繹 立 曰:「先君以是舞也,習戎備也。」此《萬》 今以經傳考之、《詩・簡兮》言「公庭《萬》 萬》人去《籥》,蓋但去其 樂 以 一,於仲 有聲者也。 》、《公羊傳》皆以《萬》爲武舞,東萊吕氏 有手足腹心之誼 以 《左傳》楚公子元爲宫振《萬》,文夫人 四節,合舞之前,有升歌 其武,而皆謂之《萬》也。 舞 古 薄 而下言「執籥」「秉翟」,此《萬》爲文舞 也。 其 寵者,其亦可 送生則 恩 爲《大武》,舞以《大武》爲 惟《萬》兼文、武,故或用其 蓋 但曰「《萬》入去《籥》」,則於 賜 但 以 氏 也。 權 以 以鑒矣。 勢 重 然則人臣之欲 輕 爲 其 無聲者」 者 寵 重 、下管、間歌, 而已。 文舞爲《大 一輕,而 没 ○《夏 則 」非也。 實 不 《公公 重。 文 小 擅 未 廢

前三節皆不去矣,則去《籥》之意,豈以其

有聲耶?

初:公室視豐碑,三家視桓楹。《釋文》:「般,音封,將從之。公肩假曰:「不可。夫魯有季康子之母死,公輸若方小。斂,般請以機

班。封,彼驗反。」

之桓。 幼。 鄭 **縴二碑,士二縴無碑。**」 重 盧,下棺以 石 者,時僭天子也。 其技巧。 者,見若掌斂事而年尚幼,請代之,而欲嘗 下天子也。 鹿 碑,於椁前 氏曰:「公輸 斂,下棺於椁也。 盧 諸侯四繂二碑,碑 也 初,謂 繂繞。 桓楹 三家 後四 若, 故 視桓 豐 天子六繂四碑,前 角樹之,穿中於間 事 匠 碑 一楹 師。 般,若之族,多 , 斲大木爲之, 形如 言『公室視豐 時 如 如 孔 氏曰: 桓矣。 大楹 方小, 僭諸 侯,諸 言 大夫一 四 豐碑, 技 年 植謂 後 巧 尚

緘,從 公肩 謂: 但 碑 是 亦謂 龍輔,從羨道 之『方中』。 也。 負縛 斲 桓 重 兩 也 楹 一鹿 去 大 謂之隧。 公肩 之碑。 定。 形不得麤大,所以異於諸侯也。」 不 凡天子之葬,掘地爲方壙、《漢書》 盧者,以棺之入椁,南北豎長,用力 碑 木 頭繋棺 上下 聽鼓 柱 似 桓, 中 爲 爲 假 碑形 豐 之木使空,於空中著 碑,於椁之前 **聲**,以 即 棺 《喪大記》云諸侯、大夫二碑, 亦 方中之内,先累椁於南畔 碑 緘,以 碑 以 而 今之橋 天子 魯 ,故云『如大楹』,通 蜃 人,至方中乃屬紼於棺之 而 椁 人。 漸卻 車 施 中, ·載柩 下 <u>~</u> 頭繫 鹿 旁 行 於此 史記 棺所 盧 後 表 而 至壙,説 及 鹿 柱 下之。 影孔 時 用 大夫 盧 兩 也。 人各 用 旁樹 鹿 子 而 碑 亦二碑, 盧 而言之, 諸 弟 魯 而 知 一,以 之, 繂 子 侯一 背 君 前 載 爲 也 有 愚 謂 深 碑 紼 用 後 穿 以 羨

> 繂之屬 疏謂 孔 加 謂 至 之,故曰 人」,非也 子、諸侯之葬,以 而 而 遂 疏 茵 在壙中載之,非 擴側, 説載 假 三家用之,故曰 師 謂 於其上, 以爲故事 「葬用輁 「屋車 注 於棺緘, 視豐 屋 至壙,説 軸者,先以輁軸從羨道人,乃 乃下 除 車 碑。 者, 飾,用 至 而 輴 載以 棺於 視 壙 不 僭 車 桓 乃 屬 先 而 竊 碑 桓 入壙 楹 説 其 於輔 載 從羨道 已 繂 楹 諸 中」, 更 以 下 久 也。 侯下 龍 亦 故 載 棺 最 此 輴 入壙 也。 輔上。 以 可見 皆 爲 棺 從羨 既夕禮 龍 柩 明 所用, 僭 輴 矣。 道 車 天

毋 般 釋 以當 ,爾以人之母 文》:「其毋,音無。」 巧 者 平,則 嘗 巧, 病 者 則 乎? 岢 不 噫 得 ! 以 弗 句。 果 其

鄭 與「已」字本同 氏 「僭於禮 噫, 有 似 不 寤 作 之聲。」 技 巧 非 也 孔 氏 以

乃 巧,則於女豈有 强逼於女,豈不  $\Box$ 更噫而傷歎,於是衆人遂止,不果從般 嘗、試 也。 病乎? 得 言般 休已 以人母試己巧,誰 ? 假既 其 告般爲是言 無 以 人 母 有

尼。 弗能 踦 之雖病也,任之雖 戰于郎,公叔禺 能,弗亦作『不」。 殤也,不亦可 往 ,或爲「談」。」 仲尼曰:「能 ,皆死焉 死也,不可。 '乎!」《釋文》:「禺,音遇,又音務。 重,依注音童。 人遇負杖入保者息,曰:「使 魯人欲 執干戈以衛 我則既言矣。」與其鄰 重也,君子不能爲謀 勿殤重 畸,魚綺反。」○鄭 社 汪 一稷,雖 踦 問問 也,士 欲 於 重 注 弗 勿 仲 汪

休息者。 師 鄭氏曰:「郎, ,將入保,罷倦,加 帥 師 伐我」,是 保,縣邑小城。禺人,昭公之子, 魯近 也 邑也。 其 遇,見也。 杖頸上,兩手掖之 哀十一 見走 年『 齊 辟 齊 或

> 之辭。 也。 赴敵 之。 役。 國,故欲以成人禮治 謂:禺人言魯既無善政,大夫、士又不能 事,有士行,欲以成人之喪治之。 踦、《春秋傳》曰『童汪錡』。 魯人見其 禺人耻之,欲敵 盡忠,故無以禦寇而安民。不可者,非之 重,皆當爲『童』。 春 秋傳》曰『公叔務人』。 任之重 言魯人者,死君 魯政既惡,復無謀臣,士又不能 而 禺 死,以踐其言也。 人是士,既 調調 宜 時 也 齊師踐其言。 童,未冠者之稱,姓 賦 非當 其喪。 税。 事,國爲斂 魯 時 君子,謂 使之病 人以汪踦能 孔子善之者 士不 鄰, 葬。」 能 孔子善 卿 謂 里也。 死, 死難 大夫 死 汪 時 名 故 君 繇 愚

子路 哭,展墓而人。」謂子路曰:「何以 「吾聞之也,去國則哭于墓 去魯, 謂 顔 淵 티 : 何 而 以贈 后行 我?」曰 處我?」子 ,反其國不

以其變禮

而

得

路曰:「吾聞之也,過墓則式,過祀則下。」

視之。 是矣。 惡 之心 居者主 由 謂 君言 則不 鄭 於 敬 神 氏 推之,則 位 不宿於家。」過墓,謂他家墳壟。 得哭墓。 於墓祀者推之,則必思無慢於人,無 有 於敬。」 處,安也。 「贈,送也。 屋樹者。」 而 所以脩身 必 故 思不 上《曲 孔 去國 氏 虧 哭,哀去 日: 愚謂: 而 其體 禮》云:『已受命, 無 「有君・ 君事 免 ,不辱其 由不忘墳 患者,皆 也。 主於孝。 事 展,省 去 祀, 先。 或 墓 在

工 之,又斃二人。 子 尹 尹商陽 射諸 商陽 孔 朝 子 不 與 曰:「王事也,子手弓而 曰 : 坐,燕不與,殺三人亦足 陳棄疾追吴師,及之。 射之,斃 每斃一人, 揜其目。 殺人之中,又有 一人, 韔弓。 可。」手弓, 禮 陳棄疾謂 又及, 焉。」《釋 以反 止其 命 謂 御

遥反。與,音預。」〇鄭注:「陳,或作「陵」。」又及,本或作「又及一人」、「又一人」,後人妄加耳。朝,直文》:「射,食亦反。斃,本亦作「弊」,婢世反。韔,勅亮反。

之也。 也。 不忍殺: 彼 者在 以 曰 : 徐以懼吴。於時有吳師。 鄭氏曰:「工尹,楚官名。棄疾,楚公子棄 商 下,然則商陽與御皆士也 使蕩侯、潘子、司馬督、囂尹午、陵尹喜 善之,因 疾 也。 陽 爲 勍 「案《左氏傳》『戎昭 左,戈 敵 韔弓,不忍復射也。 有 行仁,而孔子善之者,《傳》之所言,謂 朝、燕 禮 決 以魯昭 人,以王 「號焉。 也。」 戦, 盾 此 於 在 八年帥 事 至十二年,楚子狩于州來, 是 寢,大夫坐於上,士立 愚 右 勸之。 吴師 謂 御 師 手弓, 既 果毅,獲則 在 斃,仆 滅陳、縣之、楚 揜其 走 棄疾 中 兵車 而 央。」 謂 目, 不 謂商陽仁, 也 以手執弓 參乘, 逐奔,故 不忍 取之」。 韔 孔 氏 於 視 韜 韋

子「攝 庭,三 乃 陽 也。 多殺爲功也。 謀 政 夫 子射諸者,商陽既執弓,棄疾又使之射 念,亦可 謂之,棄疾 立於堂下,不 云「朝不坐」。 也 以 於此,乃能 議 ,卿大夫入與君圖 以 ,豈得謂之有禮哉 禮 手弓者,商陽 ,則命之坐矣。 上得坐者,蓋 子手 一朝並 亦足以反命者,言位卑禮薄,不必 齊升堂」,是也。 遇微薄,不 謂 弓 又謂 安 無 而 制 得與於堂上之坐,故 存 《燕禮 坐 蓋敗北之師,本易窮追,商 口 商 矜 法 愛人之心,而 陽 欲致 棄 節 君 從 事 者矣。 如 疾 》,大夫坐於堂上,士 棄 士不得特見圖 既 此 前 此時君或與之從容 ,則升路寢之堂,孔 謂 力,則是不忠之大 云 疾之言 視朝,退 也。 商 朝 陽 若勁 不以 不 凡朝位 可 而 坐, 適路寢 執 敵 執弓 云 邀 弓 事,故 在前 「燕 功 似 立 以 也 也 於 以 不 聽 大 射

> 襲。 侯 《釋文》: 伐 秦 曹 「桓,依注音宣。 桓 公卒于 會 含,胡闇反。」 諸 侯 請 含 使

諸

諸侯? 是也。 也。 公襚 使之襲,則益甚矣。 卑於含,諸 之。」諸侯 宰》「贊贈玉、含玉」,注云: 人親含,襲、斂則皆商祝爲之。《周禮 請含者,朋 鄭 則諸侯之喪,亦必其子親含而上卿贊也。 喪大記》云:「君之喪,大祝是斂 氏曰 而 襲,賤者之事。」 :「魯成十三年,『曹伯 終以 廬 使襲之事,恐未可 無 謚 侯請 友有 相 宣,言『桓』,聲之誤 取辱,曹之弱 爲含、襲之禮 爲曹伯含,已爲 相 啖 然以楚之强 食之道。 愚謂: 信。 小, 助 前 何能 《士喪禮 廬 使之襲 非禮 襲之事 也。 卒于 王爲之。 一,使魯 衆祝 得此 前 大 諸 師 非 美 尤 於 襄 又 佐 侯

襄公朝 人曰:「非禮也。」荆人强之,巫先拂柩 于荆、康王卒、荆人曰:「必 請 襲。」 魯 荆

人悔之。《釋文》:「强,其丈反。」

諸 柩」。 《左傳》襄公二十九年:「公在楚。 者是,而《記》言「請襲」及「拂柩」者非 殯必已久矣。是《傳》言「使襚」及「拂 及漢、聞康王卒。 本號,猶晉之本號爲唐,鄒之本號爲邾也。 拂 言之。荆人請襲者,欲使襄公衣之。 大夫、士三日 二十九年正月言之。 襚」,此言「請襲」,《傳》言「拂殯」,此言「拂 布幣也。」乃使巫 公親襚。公患之,穆叔曰:『祓殯 鄭氏曰:「康王,楚子昭也。 柩,君臨 有遣 案《左傳》襄公以二十八年冬如 而悔之。」即此事也。 使 臣喪之禮。」 相襚之禮,使者委衣於殯 ,諸侯五日。 以桃 而楚人使公襚,《傳》於 禮,死日即 **茢先拂殯**。 愚謂:荆者楚之 計 但《傳》言「請 楚言荆者 此 時 襲,殯則 而襚 楚人使 楚人弗 康 巫祝 也。 王 東 楚, 殯 一, 州 則 之

> 爾,豈不信哉! 君 今荆 而 不之禁,設有知禮之臣,於魯君入襚之時 也。魯君雖從其親 襚之禮如 止 臨 巫於門外,則其禮將有不得行矣。然 臣 人欲公親 喪之禮,又所 此 致襚 荆 然當 人使魯君親 衣於柩前 襚 以 時 前 楚 卑 使 適 荆 巫先拂 蓋 襚,所以 無 也 知 臣 禮者 出 於君致 演,用 爾 卑 而 反

爲介。 滕成公之喪,使子叔敬叔弔,進書,子服惠伯 政也,不可以叔父之私不將公事。」遂入。 鄭氏 伯之叔父。」 椒。 敬 懿伯 書 奉君弔 叔,魯宣公弟叔肸之曾孫叔弓也。 介,副也。 是 曰:「滕成公之喪,魯昭三年。子叔 及郊,爲懿伯之忌不入。 敬叔從祖 書。 劉氏敞曰:「忌,只是忌日。 郊,滕之近郊也。 惠伯,慶父玄孫之子,名 適及滕郊而 遇 惠伯 懿伯 此 日,故

則拂殯之事亦倖耳

三〇四

鄭氏 日。 伯見 也。 者。 難 爲 忌, 也。 忌 所 欲 愚 一子乃送葬之使也。 1魯之大夫,若果相殺,其事何不見於《春 惠 而 動於彼,則哀有不得專於此也。然以 ,則又當爲之忌也。 惠伯之叔父,禮,自期以 謂 緩 劉氏 疏云 (其明公私之義,可謂各盡其道矣。 伯 謂 此 敬叔之欲不入,體惠伯之情也。 稽 敬叔於懿伯,乃絶 叔弓爲正使,故云進 :《左傳》云: 至次日 不 敬 君 以爲忌日,是也, □ 「敬 事於敬叔見其有和衷之雅,於惠 敢 叔 命,則 有 乃人。 人也。」 怨於 叔殺懿伯,恐惠伯殺 非 禮 懿伯,恐惠伯報怨而 叔弓 故 書,謂 ,此禮之又當變通 惠 愚 忌日 族者,不當避 伯 謂: 如 上皆諱,爲 而 滕 以 此 書方賵物之目 不用,蓋 其 懿伯、敬叔, 葬 禮 賵 説 成 曉 物之書。 有 之。 公。」是 过,故 懿伯 之諱 其 未 心 有 不 者 私 忌 盡

穆」之誤也 鄭 也。」 爲從祖。 勘《世本》,敬 之,皆穿鑿無稽之談耳 下乃又出此 而 之説,則立文太簡,指不分明,使後人讀之 則「爲懿伯之忌」句,辭義 椒,欲爲避仇。」而 近人情。 受命之日,不當避之於至 秋》之經 公六世孫,則 亦微異。 人所殺」,敬叔 不得其説,必不然也。 氏 云 一懿伯 愚 傳 謂: 惟《左傳》杜 大約 注云『敬叔 ? , 殊不可 叔是 敬 叔 且 惠 「欲惠伯 皆傍緣鄭氏之説, 叔 敬 父 伯 疏申其説,則謂 呼 桓公七世 叔果 自 之叔父」,是矣。 惠伯 以 曉,不獨 惠 報 氏 懿伯爲叔父』,誤 難 伯 且以忌爲忌 仇 已足,若如 注 滕 爲叔父,呼 〇孔氏曰:「 惠 指 」,與杜 孫,惠伯 之時 云:「叔弓禮 伯 其所言「 懿 當 伯 , 其 「懿伯 而 氏 辭 鄭、 而 之 懿 是 之 説 而 言。 日 檢 意 伯 杜 於 昭 其 栢 爲

322

注: **弔焉**。 執。 也。 無所辱命。』」《釋文》:「辟,音避,又婢亦反。 柩於路而哭之哀。 哀公使 君之臣不免於罪,則 「奪,或爲『兑」。」 君之臣免於罪,則有先人之敝 齊莊公襲莒于奪,杞梁死焉。 曾子曰:「蕢尚 弔 肆,殺三 費 尚 日 遇 陳 莊公使 諸 八尸,音 將 不 道 如 肆 ,辟於路, 四。 杞梁之妻之 諸 人弔之, 朝,直遥反。」〇 市 朝, 其妻 畫 廬在,君 對 畫,音獲。 而 宫 妻 迎 知 曰 而 妾 禮 其 受 鄭

之位。 梁 鄭 傳》曰:『齊侯弔 年:『齊侯 於 還 即 氏曰:「哀公,魯君。 讀 市 殖 載 爲 也 甲 行弔禮於野,非 闢 無 夜人且于之隧。』隧、 襲莒。』《春秋傳》曰:『杞植 所 肆,陳尸也。 謂 辱 闢 諸其室。』」 命,辭 除 道路。」 不受 畫 也。 大夫 宫,畫地 命 魯 陳 愚 奪 以 也 襄二十二 氏 謂 聲 E 爲 澔 於朝 相 春 宫 君 日 近。 秋 遇 室

> 異 臣 弔,而曾子譏之。齊莊公與魯哀公雖皆 殯 君 非 柩 葬乃弔, 今哀公於蕢尚 玄纁束,馬兩至邦門, 弔,至葬時柩 及俟其至家,哀公於蕢尚,則怠 必使人弔之。若有位之士死,計 及於君 也。 當弔於其家。 禮 於路 於道,然杞梁戰死,莊公急於行弔,而 而 往 者 又《士喪禮 ,君不能悉弔也,惟遇其柩於路,則 ,爲之賜,大斂焉。」故蕢尚 蓋 則赗 必 使 無 贈皆闕可 位之士及庶 人弔之。 出 ,
> 弔之
> 既 在 《喪大記》:「君 》君大斂 道 乃弔之, 使宰夫贈玄纁 而 知 緩,又不親 此 民之喪,赴告不 而 此不獨蕢尚之 以 至 事 在 葬,「公賵 日 於 路 於君 於 在 禮 而 受弔爲 了, 且 士 道 東」。 情 而 り則 受 既 則 弔

0

<sup>[</sup>植],據北大本、《春秋左傳正義》、《禮記注疏》當作

一〇六

也,而 故設撥 中 反。 孺 天子龍 ,竹仲反,又如字。 子 不 知 其 蘋之喪,哀公欲設 ,勅倫反。 君 禮 司 何學焉?」《釋文》: 輴 三臣 也 而 而 幬,大報反。 椁幬,諸 哀公之無恩於其 者 君之三臣猶設 學,如字,或音户教反,非。 廢 輴 而 侯 沈,本又作『瀋』,同 撥 設 輴 問問 頭, 撥, 而 設 竊 之。」顔柳 於 臣 吐 幬 孫 禮之不中者 有 亦 反。 爲榆 可 昌審 撥,半末 見矣 日 有若 沈 反。

也。 也。 之汁 也。 柳 殯 輴 輴 鄭 以 殯 氏 止 車 一,有 諸侯 所 三臣 椁 其學 殯 曰 車 禮 覆 謂 「鷬,魯哀公之少子。 急 也 大夫菆 於禮 輴 棺 非 紼。 以 不 而 禮 天子 達之, 播 書 去 三臣,仲孫、叔 也。 龍。 置 輴 地 畫 西 今有 所謂『菆 於引 1序,士 榆沈, 轅 孔 爲 紼 輴 氏 龍 以 掘 車 塗 是 水澆 肂 孫、季孫 撥,可撥 滑 龍 用 幬 見 輴 輴 榆白 袵 廢, 僭 覆 以 喪 椁 也 也。 皮 顔 禮 去 引

> 輪。」 紼矣。 棺,而 記 則自下 殯則去之。 其 性 性 據 時 周 紼 王制》言「越 輪 本 用 沈 殯 也 謂 重 輴綍,殯 時 難 『大夫二綍二 遂用 助 之輔 又《既 蓋 而 也。」 其行。 轉, 所載 吴氏 升階 輴 愚 以殯。 **企** 車 謂 亦 與 紼 夕禮 又重,爲 澄 時 也 以 若輁 所 陸 用 此 行 日 喪禮》不言 〕難,故 天子、諸 榆 氏 事」,則 大夫、士以 Ⅰ:「榆 輁 注: 載 不同 碑。 木 佃 軸,不 軸 沈 難 爲 曰: 使 輕 者,大夫 「大夫以 轉 爲 也, 是大夫 輪 人居旁以紼撥舉 用 侯殯,以 ·得用 移 輴 則無所事此矣。 轂, 輴 升 故 榆 輁 故 車之輪轂, 以 棺 其 設 性 有 軸 輴 以 殯者 Ŀ 設 用 質 婦,此 升 堅 綍 撥 輴 柩 撥 始 沈 忍, 紼 棺 以 車 固 以 朝 綍 有 重 有 載 撥 木 撥 然 文 廟 即 而 而 几

<sup>0</sup> 「輪」、《集説》作「輔」。

妾齊衰,禮與?」公曰:「吾得已乎哉! 悼公之母死,哀公爲之齊衰。 人以妻我。」《釋文》:「爲,于僞反,下「弗爲服」同。 禮 顏 婉,恐哀公不喻其意,故又正言以止之。 言三家僭禮,以 合法式。 一無輔 柳 ,孔子弟子 而設撥 撥 爲 輴 顏幸,字子 微止哀公。 ,則僭禮而 車 而 設,三家 柳。 不中矣。 顔柳以 有若曰:「爲 不中,謂 設撥 其言 有若 爲 微 僭 不

也。 《左傳》公子荆之母嬖,欲以爲夫人。 也。 鄭 如 魯人皆名之爲我妻。重服嬖妾、文過,非 齊衰,有若譏而問之。 其妾服妻之服,哀公不辨於適、妾之分 氏 此 士 ,此孔子所以有大昏之對歟? 曰:「妾之貴者爲之緦耳。 愚 爲貴妾 謂:爲之齊衰,以妻之服 緦,大夫以 魯人以妻我者,言 上 爲 哀公爲 妾無 此又 服 服 之 妾

葬,後難繼也。」《釋文》:「長,丁丈反。」 不以是棄予,以吾爲邑長於斯 季子臯葬 請庚之。」子皐曰:「孟氏不以 其妻,犯人之禾。 申 是罪予,朋 祥 也 以 買 告 道 日 而 友

應民,非也。 體,不欲行小惠以悦民爾。鄭氏以爲恃寵愚謂:子臯不從申祥之言者,蓋以爲上有成邑宰,或氏季。犯,躐也。庚,償也。」 鄭氏曰:「季子臯,孔子弟子高柴,孟氏之

作「饋」,其位反。使,色吏反。」君」。違而君薨,弗爲服也。《釋文》:「餽,本又仕而未有禄者,君有饋焉曰「獻」,使焉曰「寡

禄,謂 也。」 鄭氏 賜 是 也。 而 日 曰:「違,去 初適 獻 君有 愚 ,君使焉 謂: 他國 饋 位定然後 謂 而 也。 有 未 饋 不 有定位, 若孟 弗爲 於此 Ė 禄之, 仕 君 臣 服 而 也。 曰「寡君」 以 其 而 子 君 在 未 恩 不 有 齊 輕

寡君。」時荀寅在 君」,正與此 臣 去 左傳》陳成子謂荀寅曰:「將以子之命告 國 待之, 而 君 而己 薨 合。 ,則不爲反服 亦 不 齊 以 ,而成子與之言稱「寡 純 臣 之義 蓋君不敢以純 自 處 也。

虞而立尸,有几筵。

子既 云『喪・ 夫以木鐸命於宮」,「自寢門至于庫門」,則 子、諸侯則葬前有 中,右几』,是也。 雖大斂時已有,虞祭更立几與筵相 内,有吉几筵,今葬畢虞祭,有素几 席素席,故前云『奠以素器』。 不立几筵,大斂奠但有席,亦無 孔氏曰:「未葬之前,殯宫雖有脯醢之奠, 士虞禮》云『祝免,澡葛經帶,布席於 爾 事 ,諸侯亦然。」 素 几了,鄭注 此謂士、大夫禮。 几。 云: 『謂殯奠時。』天 故《周禮 愚謂: 此下言 其下室之 · 司 几 筵。筵 也 配。 几筵》 若天 字字 此 室 故

> 筵也。 奠亦 設几筵矣。 設,以虞之几筵乃素器也。 則已神之,蓋亦虞祭之几筵爾。 祭易喪祭,則殯宮設吉几筵,而下室 葦席右素几」,與《士虞禮》同。 之禮言之。《周禮 諸侯之禮也。 無 几也。 虞雖有几筵,而下室之吉几筵 喪奠無几,以下室之奠有 然則 • 此虞有 司 几 筵》「凡喪事,設 几筵,亦據諸 至卒哭,以 設几而右, 是天子喪 不 復 古 尚 几 侯

門至于庫門。《釋文》:「舍,音捨。」夫執木鐸以命于宮曰:「舍故而諱新。」自寢卒哭而諱,生事畢而鬼事始已。既卒哭,宰

愚謂:周人以諱事神、卒哭而諱者、爲明至于庫門、百官所在。庫門、宮外門。」始、謂不復饋食於下室、而鬼神祭之。已、始、謂不復饋食於下室、而鬼神祭之。已、鄭氏曰:「諱、謂避其名。生事畢而鬼事

也。 《周禮•宰夫》:「大喪小喪,掌小官之戒 以告之也。 其名,恩有所殺也。新,謂 道 日 室,自寢門之外至庫門之內皆有之,故徧 自寢門至于庫門者,諸侯之喪,其爲廬堊 令。」木鐸,鐸以木爲舌,奮之以宣政教者 夫,於天子,天官之考也,諸侯其上士歟? 事之,故 將 故,謂高祖之父當遷者。 袝, 而 廟祭之禮 曰「生事畢而鬼 自此 始,始 新死當祔者 事 廟遷則不諱 始也。 以 鬼神之 也 宰

徵,言徵不稱在。 一名不偏諱。 夫子之母名徵在,言在不 稱

鄭氏曰:「稱,舉也。 ^ 雜記》曰:『妻之

韔。《釋文》:「羹,音羔。 軍 有憂,則素服哭於庫門之外,赴車 諱 不舉諸 其 側。二 韔,本亦作『韔』,敕亮反。」

木

載

櫜

氏 「憂,謂 爲敵 所 敗 也。 素服者,縞

也。 也。 也。 亡,日凶札,日禍 以喪禮處之。」 冠 古 車」,則素冠皆厭 大廟」,《大司馬》「師 于殽,秦伯素服郊迎」,蓋皆以喪禮處之 則素服哭於庫門之外」、《春秋傳》「秦師敗 五者,同爲 「大札、大荒、大烖素服」、《檀弓》「軍有憂, 以凶禮哀邦國之憂」,其列有 年不順成,則天子素衣,乘素車。」又曰: 國亡大縣邑,公、卿、大夫、士皆厭 年不順成,君衣布,搢本。」《周禮・司服》 也。 當報,然亦當視其事之何如 櫜,甲衣。 素服,謂素衣、素冠、素裳也。 方氏慤曰:「素服哭於庫門之外 赴,謂還告於國,以 凶禮,其服皆素 韔,弓衣。 裁, 曰圍敗, 曰寇亂。 愚謂:《周禮 伏 如 不功, 喪冠之制 兵不戢,示當報 告喪之辭言之 服 則 厭 《玉藻》: 若非 也 五三曰 大宗伯 而 冠哭於 《檀弓》 軍 奉 有 此 死 敗 主 讎

= 0

耻之當雪,而忿兵不已,此秦穆彭衙之役,

《春秋》之所不取也。

火,亦三日哭。」 有焚其先人之室,則三日哭。故曰:「新宫

魯宣公廟。」 傳》云:『人火曰火,天火 新宫火,在魯成三年。」 哭者,哀精神之有 鄭氏曰:「焚其先人之室,謂火燒其宗廟。 陳 宫災」,諱火耳。 氏 澔 曰:「哭者,哀祖宗神靈 陸 災非人之所能 氏 一虧傷。 佃曰:「《春秋》書『新 曰災。』新 火,人火之也。 孔氏曰:《左 爲 之無 也。」 宮者, 所

爲不去也?」曰:「無苛政。」夫子曰:「小子吾夫又死焉,今吾子又死焉!」夫子曰:「何重有憂者。」而曰:「然。昔者吾舅死於虎,或而聽之,使子路問之曰:「子之哭也,壹似式,過泰山側,有婦人哭於墓者而哀。夫子

託

也。

音 識之,苛政 何,本亦作『荷』。 鄭氏 氏慤 舍其 人無可逃。此所以寧受虎之累傷,而不忍 政之無苛也。」 曰:「虎之害,人可逃,而苛政之害, 曰:「而,乃也。 猛 於 識,申志反,又如字。」 虎 也 ! 「釋 夫之父日 文》 重 舅。 ,直用 反。 方

其不 哀。 氏未 禮義、忠信、誠慤之心以 人作誓而民始畔,周人作會 也 魯人有周 起 曰:「有虞氏未施信於民,而民信之。 「不可。」公曰:「我其 魚反。 |?||對曰:「墟 解乎?」《釋文》:「夫,音符。 社稷宗廟之中,未施敬 施敬於民,而民敬之。 解,佳買反,舊胡買反。」 ,豐也者,哀公執 墓之間,未 己 涖 摯請 夫!」使人問 之, 何施 於民 而 施哀 虚,本亦作『墟』,同 民始疑。 雖 見之, 而 而 古 於 民敬。 得斯於民 結之,民 民 而 夏后 苟 而 日 無 殷 民

畔矣。 作會, 有其可 之者。 此 君 者真也。 則自哀,履可敬之地則自 中 盟誓所以結衆以信 處 家始有惡,●懼將不安。 則 君 尊就卑之義,下 徒 尚 以尊 ,恃乎言辭約誓之末也。 ?者,欲公反求諸己,積誠意以感人, 、則悲哀,見莊敬之處則莊敬,非 辭。 臣之間 則民 書》夏啟 德不足而 見卑。 解,離散 敬 墟, 已,止也,重强變賢也。 畔疑之。」 虞、夏之所以能使民敬信者, 相 可信之實而 廢 作《甘誓》,《左傳》夏啟有 疑 滅 相 士禮,先 賢也。 也。 以敬信强 無 侮 後之地。 ,其後外恃衆而信 ,故其問 愚謂: 時哀公與三桓 已。 生異爵者, 豐 豐言民 百『不 其民,而民 敬,其所以感之 殷 ○孔氏曰:「案 民 豐如 人作誓,周 會,謂 履 時公與三 見悲哀之 可』者, 此 可哀之地 必有使 請 盟 有惡 豐言 見之 反 不由 而 也。 疑 亦 毋 人 辭

> 是也。 周盛 殷、周 誠信, 之會, 恤 戒 德教而徒恃誓會,故民始疑 誓會之助於教,豈小 而一之於末,民其不解乎?」 有 列則 一時,以 盟 始 民不怠。《司盟》『盟 徒作 又 其民始於不敢欺, 有 禹 會 以 禮義 誓會也。」 會 盟 塗 聽 誓, 其 Ш 道 政。 而 其民 補 民 此 哉 馬氏 始 言 ^ 大司 而 殷 疑 而 萬 又 畔。 晞 畔 終於不忍欺 周 及其末也 有誓以 徒》『以 民犯命」者, 孟 者 者 不脩 曰 耳, 場據 Ⅰ:「殷、 誓教 其本 致其 非 身 無 謂 無

喪不 毁不危身,爲 前 入於廟也。 慮居,謂謀居處之安也。 ,主未入 慮居,毀不危身。 廟, 無 蓋 後 喪畢 則不當預謀其所處之安也 也。 雖將 《釋文》:「爲,于僞反。 喪不 復 ·慮居 無 寝,然未吉祭以 廟, 爲 謂新主 無 廟 也 未

0

<sup>「</sup>家」,據《禮記注疏》當作「桓」。

之於官,安得賣之以奉喪乎? 謂賣宅舍以奉喪」,非也。 而 危 身,謂 其 害於孝 滅 性 則 也 也。 二者雖有賢、不肖之殊 鄭氏 古人田宅,皆受 云:「慮居

同。 於禮也,其合矣乎。」《釋文》:「長,丁丈反,下「官長 也。 隱,於刃反。 其斂以時服,既葬而封,廣輪揜坎,其高可隱 禮者也。」往而觀其葬焉。 嬴 無不之也。」而遂行。孔子曰:「延陵季子之 延陵季子適 骨肉歸復 句。 、博之間。 深,式鴆反。廣,古曠反。 既封,左袒,右還 號,户高反。」〇「右還其封且號者三」八字爲 于土,命也。 齊,於其反也,其長子死, 孔子曰:「延陵季子,吴之習於 其封 若魂. 揜,本又作『掩』,於檢反。 其坎深不至於泉, 且號 氣則 者三,曰: 無不之也 葬於

「吴公子札聘於上國」,是也。季子讓國居鄭氏曰:「季子,名札,魯昭公二十七年

高也。 也。 其高 也。 也。 吴季札子墓,在汶 時之服,不改制 不至於泉,以生恕死。 延 揜坎,不過 封,加土也。横曰 深不至泉者,足以藏棺椁而已,不過深 七年。」 愚謂:《水經注》:「奉高縣北 歲,此云『孔子往觀其葬」,故知 年,季子皆出聘。 左袒」是已。 凶皆左袒。 陵, 可隱,亦節也。還,圍也。 封可手據,謂 孔子往而觀其葬者,往弔之也。 因 袒,袒 孔氏曰:「襄二十九年、昭二十七 號 大 焉 **企** 還, 遶也。 衣 也。 喪禮》飯尸,「主人出 而 嬴、 節 襄二十九年,孔 人俯 廣,直日 露 高四 水南 也。 博,齊 其臂 斂以時服,斂以行 而 尺 輪,從 右還者,季子在 曲 也。 所。 可 地 輪。 中。」坎,壙 以 今泰 凡禮 號,哭且言 也。 廣輪 手 廣輪纔足 爲 憑,不過 子纔 昭二十 Ш 隱,據 揜坎, 南 坎 縣 也。 也。 有 九 面 是 )鄭注:

「考,或爲『定』。」

于,易、于雜者,未之有也。」《釋文》「易,以豉反。」 有司曰:「諸侯之來辱敝邑者,易則易,于則 邾婁考公之喪,徐君使容居來弔、含,曰: 寡君使容居坐含,進侯玉,其使容居以 者。 往、迎 踦之勿殤,季子之葬其子,皆變禮而得**正** 意 也。 其視常禮,蓋有所殺矣。 如 道 而不質言,正以見其能隨時斟酌而得乎禮 不之,以冀其精氣之隨己而歸,亦送形而 H. 遶之也。 東,西 也。 何,以愍其尸柩之不能還吴。 號哭者凡三匝而 所謂「禮從宜」者,於此可以見之。 言骨肉歸 精而 此篇所言,如將軍文氏之受弔, 面,又 右遶其封且號者三,謂還繞其 反之意 復于 轉 而 也。 止,以將還吴而與之訣 土,乃始終之命,無 南行,又轉 季子在塗葬其子, 故孔子善其合禮 言魂 而 北 行, 含。」 氣 汪 無 口 封 而

之。 而辭 及,遂城夷,使徐子居之,是已失國而爲 曾孫」,按隱公當魯哀公之時,傳至曾孫考 禮,徐自比天子,以 謂 含於諸侯之辭也,故邾之有司,以其非 曰「使容居坐含,進侯玉」,蓋天子遣使 命曰「寡君使某含」。 徐使者之名也。《雜記》諸侯相含,使者致 文、宣之時,作『定』爲是。」 公,其尚能 滅徐,徐子章禹奔楚,沈尹戍帥師救徐 公,其去春秋已遠。而魯昭公三十年,吴 <del>用</del>且含也。 臣 之。 禮 謂 顧氏炎武曰:「注『考公,隱公益 大夫來弔, 易,謂 于,謂 行王禮於隣國乎? 時徐 簡 君 僭 略。 禮。 位卑而簡易 稱王,自比天子。 大夫敵諸侯,有司 今容居不用此辭,而 于,謂廣 容居以

鄭氏

曰:「考公,隱公益之曾孫。

弔、含,

臣

欲

行

君

拒

則行

簡

大。

則

禮

致

寓

弗

愚謂: 容居,

定公在

.

經,旋 也。 諸 爲 僭竊 之間 禮雜 襲、斂之後,疏見注「親含」之説不可通,故 常典也。 鄰國之喪皆遣 乃自比天子之大夫,以敵諸 含」,亦非 公卒於師,諸侯請含,因 大,則行廣大之禮也。 君行 殯 此 含; 説以 後世 東 也。 容居之見辭於邾人,以其辭之僭擬 則親含,大夫歸含」,非也。諸侯 非 以從齊爲楚所伐。 南 于則于者,謂諸 若但 敢 孔疏 曲 也 徐入春秋爲小 隅 相習而不知其非耳。 僭 護之。 之禮 擬 致命以璧授主人,謂之不 鄰 謂 使、無自弔、含之禮 天 ,無所謂 國弔、含之使,其至必 「親致璧於柩及殯上,謂 八子者 然《雜記》致含,惟有 容居,列國之臣,今 蓋蓋 侯來 在會偶爲之耳,非 親含不親含之别 ·國,僖二年始 其後依倚吴、楚 其 侯,是易、于之 市,位 先 世 曾强 尊 鄭 曹 前 氏 親 見 天 在 於 官 大 委 謂 廣

> 無所 不敢 容居 子 斯言」, 不 遺 對曰:「容居聞之,事君 非 其祖 用 以其親含也。 斯言 則當時之所争者可 昔我 也。 先君駒 容居,魯人也,不敢忘 視下文言「 Ξ, 不敢忘 見矣 西 討 無 濟於河, 其 所 君 不 小亦 用

其祖

愚謂 鄭氏 子致命於諸侯之辭 也。 魯,●鈍 [日: [] 濟,渡也。 無所 也。 駒 不用斯言者 言魯鈍 王,徐先君僭號,容居其子孫 言西討渡於河,廣大其國。 也 者,欲 謂 自 無 明不 所 不用此天 妄。」

門人 於他 子思之母死於衛,赴於子 廟乎?」子 至 e 思曰:「 「庶氏 (之母死,何爲哭於孔 吾過 矣,吾過矣!」 思,子 思哭於 遂哭 氏之 廟。

❶ 「魯」、《禮記注疏》重文。

天子崩 鄭 也 也 13: 與 氏 爲嫁母無服,蓋當申心喪十五月 ,三日祝先服 廟 曰:「子思之母,嫁母 愚謂:子思之母嫁庶氏,非姓 絶 族。」 方氏慤 ,五日官長服,七日國 日: 也,姓 一他 庶 室, 氏。 歟 異 庶氏 中 嫁

男女服

,三月天下服

官者。 服,服杖 士。 鄭氏 王 成 者,天子七日而殯,殯後 Ŧī. 而 祝 夫 杖 服 日 也 佐含、斂、先病、故先 衰,既 也。 也。 也。 曰:「祝佐含、斂,先病。 官長,大夫 國中男女,庶人。 服 也。 三月天下服者,謂諸侯之大夫爲 官長服,亦服杖也 國中男女者,謂畿 孔氏 謂 葬 杖是喪服之數,故呼爲 齊衰三月而 而除 曰:「祝,大祝、商祝 之也。 天下服,諸侯之大 杖。 嗣 除之。 近者亦不待三 王成服,故 内民及庶 ,服在祝後,故 若子,亦三日 必待 民 七 人在 也。 服 得 H

> 士 制》「七日授士杖」,是也。 卿 杖。』則知今云『三日』『五日』,是服 云: 『君之喪,三日,子夫人杖,五日 何以 者,文略也 服,無不杖者也 矣。其七日及三月者,唯服 殯,授大夫世婦杖。』又《喪服 月,今據遠者爲 『三日授子杖,五日授大夫杖 大夫 與大夫同 愚謂 知其 也。 : 五日官長杖,官長,達官之長,謂 或杖服 若士,則七日 以五 言耳。 日 或 此及《喪大記》皆不言士 而 衰 杖, 服? 然 若諸侯之喪,則 四 而 以 條 而已,無杖。」 案《喪· 杖,《 諸 (),七日 四制》云 皆 侯 《喪服 云『服』, 五. 大記 日 授士 杖 成 既 ЛП 明

粉反。」者,廢其祀,刎其人。《釋文》:「刎,勿粉反,徐亡虞人致百祀之木,可以爲棺椁者斬之。不至

鄭氏曰:「虞人,掌山澤之官。百祀者,畿

記 集 解

刑一, 其 既 而 者,蓋社木 神 祇 周 諸 内 君者 高 祀, 人,蓋設此 等其哀也。」 棺之椁者送之。 殯 臣 白 大也 是也 旬 采 縣 一德著 如 而 地 之 誓 布 之 祀 神之所憑 幽 師 材,故 祀 也 顯,存則 辭以令之,以見王 而 也 愚 日 謂 吴氏澄 虞 無 必取祀木者,賀瑒云 言 孔 人斬 ,常時不伐,以 人神 爲椁 百 氏 敢 者,舉 日 日 不 百祀之木可 均 ]:「廢 必 : 供, 其慶,没 斬 其 百 喪 女 百 其祀, 全 祀 則 祀 尤 其 數 之木 以爲 歲 有 重 則 畿 也 刎 大 於 靈 内

右 龃 有 齊大饑,黔 日 而 二子 餓 謝 執 者 飲 焉 其 蒙 唯不 嗟 티 : 袂 終 也 敖 輯 不 可 食 爲 嗟,來 屨 食 去,其謝 嗟 食 而 來之食,以 貿 於路 死。 貿然來。 食 '!」揚 也可食。」《釋文》: 以 曾 子聞 待 至 其 黔 餓 於 之曰: 目 者 敖 斯 而 左 而 也。 視 奉 食 之, 之。 食, 從 微

> 音餘。」 嗣 本 又作 貿,徐 飢 Ľ. 同。 救 反, 黔 又 其 音 廉 茂, 反, 徐 渠 音 嚴 牟。 反。 奉, 而 芳 食 勇 奉 反。 食 同 音

鄭氏 謂 辭。」 就 嗟 雖 斂屨,力 曾子之言, 嗟 來 미 也 食, 去, 來之言雖 日 : 陳氏 微 憊 雖 其 蒙蒙 猶 関 不 謝 得中 澔 能 袂,不欲 無 而 則 日 不 屨 呼 也 一之道。 可 敬,然亦非 也 食 食 微與,猶 之, 矣。」 無 人 貿貿 與, 餓者之操,賢者之 見 非 也。 目 敬 止 大過 言 吴 辭 細 其 不 氏 輯 也。 明 故 狂 故 澄 之貌 末 斂 狷 其 從 日 節 也 之 嗟 猶

過也。」

洿其 嘗學 子 瞿 邾 弑 然 婁定公之時,有 父,凡 斷 宫 失 斯獄 席 而 日**:**「 豬 在 矣。 焉。 宮者 是 臣 蓋 殺 寡 弑 弑 無 君 其父者, 人之 君, 赦。 踰 凡 月 罪 殺其人,壞其 而 在官者 也 有 后 司 曰 舉 以 殺 爵。 告。公 写寡 無 室 赦 人

反。斷,丁亂反。殺其,如字。壞,音怪。洿,音烏。豬,文》:「殺,本又作「獄」,同式志反。瞿,本又作「懼」,紀具

音誅。」

父,凡 無問 也。」 其 罪 位 鄭 也 也。 宫 無 氏 貴賤 티 : 南 赦,諸臣子孫皆得殺之。 民之無禮,不教之罪。 在宫者, 明 孔 方謂 其 「定公,貜且也,魯文公十四 氏曰: 皆得 大 都 逆,不 無問尊卑,皆得殺此弑父之 爲 「臣之弑君,凡在官之人, 殺 豬。 此 欲 弑 踰 人 君之人。子之弑 復 月 弑 舉 處 父、弑 爵,自 之。 壞其室,洿 豬, 君 貶 年 ,其 損 都 即

哉輪 斯 或 京 晉獻文子成室,晉大夫發焉。 聚國 世 族 於 焉 北 斯 族 。」文子 面 於 美哉奂焉 再 斯 拜 是全要 日 稽 : 首。 ! 武 歌 領 君子 也 於 以 得 斯 從先大夫於 謂之善頌、 歌 張老曰:「 哭於 於 斯 哭 斯 美 善 九 於 聚

音原。」《釋文》:「奂,音唤,本亦作『焕』。要,一遥反。

京,

高大。 之言。 困,言 規 謂 謂 鄭氏曰: 稱 輕 故重美之。 其後復爲。 祭祀、死 之,謂賀也。 大夫之墓 「原」。 祭祀 頸 與國 人之美。 故爲善頌。 刑。」 高大。 禱,求 中 作樂。 奂, 善頌 喪、燕會於此足矣。 「文子,趙武 僚 地 謂 領,頸 全要領者,免於刑誅也。 禱者,祈己之福。 友及宗族聚 在 愚 也。 諸 奂爛 謂張老之言。 奂,言衆 哭, 謂: 九 文子聞義則服 大夫皆 原。 孔氏 也。 謂 衆 獻、文蓋 多。 居 也。 京,蓋 多。 古者 發 喪 會飲 曰:「輪 禮 作室成, 哭 既 言此 心 泣 罪 高 善禱,謂 字之誤, 以 食 張老因 ,故爲善禱 譏 益 重 又 往 也 要斬 者,欲 其 聚 多 也。 晉君 謂 文 輪, 或 奢 頌 文子 當 頌 輪 晉 者 族 歌, 飾 世 寓 禾 爲 卿 防 輪 獻

使其 也。 仲 也 畜,許六反,又許又反。 ),敝帷 尼 封,彼劍反,出注 丘 首 也貧,無蓋 陷 不棄 焉。」路 狗 死 ,爲埋 し,使っ 馬 一,於其 貢,本 馬 子 死, 也 貢 亦作『贛』,音同。 対 埋 埋 敝蓋不棄 之以 之, 也,亦予之席,毋 日 帷。 八爲埋 《釋文》: 吾 爲,于僞 聞 之 狗

間 蓋 故 帷 馬 陷 而 乘 鄭 矣。 或敝 則 不 其 氏 并及埋路馬之法。 馬塹而 謂 死 曰:「畜 不以其敝者也。記者因孔子之事 能 没於土。 而 或不敝,大小輕重之差,亦 以 埋 死 帷 ,以帷裹之。」 之也,猶 蓋 狗, 路馬,君所乘者 馴 守。 方氏 有 蓋犬馬皆有力於人, 恩 封,當 慤 焉。 愚 謂: 曰 : 而 爲『室』。 魯 其他 或 寓 埋之以 子其 帷 昭 或 狗

閣 季 人 孫 爲君 之母 死 在,弗内 哀公弔 也。 焉。 曾子與子貢入於其處 曾子 ,與子 貢 弔 焉

視斂

既斂而復東

方西面之位。

鄉,許亮反。辟,音避。」〇今按: 辟之,辟當音闢 皆辟位,公降一等而揖之。 矣。」曾子後入,閻人辟之。 而 盡飾之道,斯其行者遠矣。」《釋文》:「內,音納 霤水處 閣人,掌門者。 脩 西 在 加 辟之者,閻人之職然也。 夫、命婦之出人,則爲之辟。」則弔賓 辟之,爲之辟 者,君行弔禮 而脩容者,敬君 人哭踊之時,於禮 中 階 蓋 容 庭北 東 而 焉。 也。 北 後至。」哀公弔 面。 子 面 視 貢先人, 閽 也。 畢, 喪大記》:「 既哭拜稽顙 肂。 不内二子者,君弔,方與主 而 已告於 ^ 更自 不得 若 周 卿 時 禮 整攝 内弔賓也。 人 即即 大 沒擯者 • 君 内雷,大門之内 成踊 涉内雷, 日 閽 君子言 夫則 也。 於 位 人》:「凡 外 而 於阼,主 ,主人乃 鄉者已告 斂 鄉 命婦 内之也 婢 時 之 卿 者 入於廐 亦反。 升 大 已告 就 既 而 夫

皆辟之,二子進 然不知二子之所以見敬者,以君、大夫素 容,而君、大夫敬之,故有盡飾行遠之説 退就己之弔位也。 其北行而及内霤也。 就之,故既入門折而東行,又折而北行,於 也。 其賢,而非一時脩容之故也。 其位 在 西方東 而 就君,君降一等揖之,乃 當時之君子,以二子脩 面 卿大夫在西面之位 ,時二子以 君在 阼 而

知

蒲北反,本又作『匍匐』,音同。」 之?」《釋文》:「説,音悦。 聞之曰:「善哉覘國乎! 喪,扶服救之。」雖微晉而已,天下其孰能 而 之覘宋者反報於晉侯曰:「陽門之介夫死, 陽門之介夫死,司城子罕入而哭之哀。晉人 子罕哭之哀,而 民説,始不可伐也。」孔子 扶服,並如字,又上音蒲 《詩》云:『凡民有 下音 當

士。 鄭氏曰:「陽門,宋 宋以 武公諱 司空爲司城。子罕,戴公 國門名。 介夫,甲衛

> 謀 ? 《左傳》襄公九年:「宋災,樂喜爲司 非 子樂甫術之後樂喜也。 爲政。」是時晉、宋方睦,晉安得有伐宋之 之險,而在人心之和,於此可見矣。 無能當之。 矣,非獨晉而已,雖天下有更强於晉者,亦 夫之喪,則其平日之恩澤及於民者必深 者,以其能即小以知大也。 子罕能得人心,故知其不可伐。 也。 記言恐誤 孔子善其 守國者不在於甲兵之利,山 知微。」 覘, 闚 子罕能哀一介 愚謂 視 孔子 也。 覘者 城以 善之 微 以 猶

既卒哭,麻不入。 魯莊公之喪,既葬,而絰不入庫門。士、大夫

也。」 鄭氏曰:「時子般弒,慶父作亂,閔公不 居喪,葬已,吉服 微弱之至。 吴氏澄曰:「莊公薨,歷十一月始 群 而反。正君臣,欲以 臣 畢虞卒哭,亦 除 防 敢 喪 遏

鄭氏 者。 則 葬 按《春秋》閔公二年:「夏五月乙 除」,不當但云「麻不人」也。云「絰不人」, 吉禘爲尤甚、《春秋》何反不書? 以譏之,若果以期 之國,雖國家多故,豈有服其君父不至期 之喪,閔公既葬即除,群臣既卒哭即除 閔公矣。」 於莊公。」吉禘者,禫除踰月,新主遷於廟 不當但云 是喪不至期,其爲短喪也甚矣。 二十二月,遽行吉禘。後年八月,慶父弑 服父喪三年。 立,不君生君 猶 之説 時関 有 且莊公以二十二月吉禘、《春秋》尚 帶 り則記 公幼 矣。 「經不人」,於群臣 愚謂: 因 至閔二年五月 云「麻 弱,莊夫人外淫,慶父謀 於閔公當云「既 亦不天死 喪服先君,則其失禮 如鄭氏之説,則是莊 不入」,則猶有葛矣。 君,故不令閔 當云「卒哭而 ,距莊公之薨 葬而 魯爲秉 酉,吉禘 且果 除 則 禮 如 視 書 公 篡

數。」又「齊衰三年」章注 以二十一月除要絰衰杖,至二十二月禫 則其 之期 異 月者,亦天子、諸侯、卿、大夫、士虞、卒哭 者,天子、諸侯、卿、大夫、士虞、卒哭異 氏《喪服》「斬衰」章注云:「斬衰不書受月 而 氏謂慶父「不天死君」,則是時 不能如禮者,鄭氏謂閔公急「正君臣」,吴 既 則恐不然。 十七月而 而 二十二月吉禘,視常禮短六月,是其祥、禫 行禘祭於寢」,皆非是。 數。」又「大功」章注云:「凡天子、諸侯 畢,而遂行吉祭與? 慶父專政,吴氏之説爲得 行吉祭也。 喪 有 制之 不 能 禫 疑閔公既以十一月除首絰 短固 如 ``, 杜預謂 禮者。 月始吉祭。 可見矣。 喪以二十五月大祥 「莊公別立廟 《春秋》書吉禘之速 至莊公之喪,所以 云:「齊衰不書受 然謂 其 莊公之喪,以 而 情。 閔公幼弱 服 吉禘」,胡 期 又按鄭 而除 遂 氏謂 祭

祥、禫變除之節,專言卒哭受服則不該,兼 所以不書受服也。 言練、祥、禫之服則文繁,此齊、斬之喪之 服,而齊、斬之服,卒哭受服以 卒哭受服,喪畢而除,卒哭以後,更無 衰、齊衰之喪不言受服者,蓋自大功以下, 以 不如禮之甚者。 卿、大夫既虞,士卒哭,而受服。」今以莊 而天子亦當無異禮矣。 之喪觀之,其葬也以 二十二月,而喪主以既葬便除首絰,可謂 卒哭,則諸侯受服亦以卒哭,於此 然而 十一月,其吉禘 群臣變麻服葛 所以《喪服》於斬 後,有練、 7,猶必 可見, 也 他 以 公

平 原壤 孔子之故人曰原壤,其母死,夫子助之沐椁。 弗 日 聞 :「貍首之斑然,執女手之卷然。」夫子爲 ?」夫子曰:「丘聞之,親者毋失其 登木 也者 曰:「久矣予之不託 而過之。 從者曰:「子未 於音 可 也。」歌 爲 以 親 己

汝。卷,音權,本又作「拳」。從,才用反。」也,故者毋失其爲故也。」《釋文》:「女,如字,徐

音

然壤 自作 卷然 也。 鄭氏 子:「原壤登木 之。夫子以爲親故之人,雖 之卷然,言孔子手執斧斤,如女子之手卷 斑然,言斲椁材,文采似貍之首。 及其夷俟,則以 遽失其爲親故,隱惡以全交也。 已,絶也。 吴氏澄 木文之華。 如 壤之歌,乃是大惡,若要理 歌此 此歌 謂叩 而柔弱。」 曰:「沐,治也。木,椁材 曰:「此舊歌辭而壤歌之耳,非壤 也。」 木以 必 從者以壤無禮已甚,欲夫子絶 女手之卷,言沐椁之滑膩。」 有疑義,劉氏 作音。」 而歌,夫子爲弗 杖叩脛,莫大過否?」曰 愚謂: 劉氏曰:「貍首之斑,言 歌辭之義 孔 氏 之説爲 有 ☐ : 也。 過失,未 會,不可但 聞 ○或問朱 「貍首之 不可 而過之, 執女手 近是。 託 知 寄 可

琴張 謂 直 忘,曾鳥獸之不若者,聖人豈容之哉! 痛 多如此。 則 而 略其 是不 在 責之,復叩其脛,自當如 只得 原壤母死而 心而禮有所不必拘耳,故夫子原其 臨 が跡 喪 要管他,卻 且休。 前 然壤之心實非忘哀也,特以 而 歌 姑以是全其交也。 相 至其夷俟,不 歌 類 ,與子桑户死,孟子反、 非朋友之道矣。」 ,蓋當時爲老氏之學者 此。 可 若如今説 若朝 不教誨 爲哀 死 愚 夕 心 故

系,名华。乍,记也。 愚谓:吾准與昴,鄭氏曰:「叔譽,叔向也,晉羊舌大夫之可作也,吾誰與歸?」

於晉國 叔 父,音甫。行,舊下孟反,皇如字。 譽曰:「其 言吾將以誰爲賢而歸之也 孫,名肸。 ,不没其 陽 作,起 處父乎?」文子曰: 身,其知不 也。」 愚 ·足稱 并,必正反。植,直吏 謂 也。 吾 `」《釋文》: 「行并植 誰 與歸,

> 反,又時力反。 其舅犯乎?」文子曰:「見利不 也。 也。 保身之知,不足爲賢也。 立己意。 鄭 氏 謂剛 티 : 愚 「陽處父,襄公之大傅。 知,音智。」〇鄭注: 處父以此 謂: 而專己,爲 并者,兼攬 招衆怒而 狐射姑所殺。 「植 衆 或 權 殺 爲 顧其君, 其身,是 特」。」 植者,獨 并猶 没,終 無 其 專

我則隨武子乎 不 遺其友。」晉人謂文子知 之未定,是無愛君之仁,不足爲賢也 也。 安君之心,及河授璧,詐請亡,要君 鄭氏曰:「謂久與文公辟難,至將反國,無 愚謂: **.**! 舅犯 利其君不忘其身,謀 圖 利其身,而 人。 不顧 以 君 利 身 位 是

知,有謀身之知而不遺其友則仁,故文子季。」 愚謂:有愛君之仁而不忘其身則鄭氏曰:「武子,士會也,食邑於隨、范,字

仁不足稱也。」

其 先蔑 出 子 故 至其在秦不見先蔑 而 雍,懼其同罪,禍及於己,故不見之,非 友,而云『不遺』者,彼謂 及士會 得 以 (友也。 ,既以 奔 先蔑奔秦。 雍 相 其 爲 前 ,蔑蓋與於立雍之謀者 (俱迎公子雍,『在秦三年,不見先 賢 遺 當 而 也。」 還晉,遂不見先蔑 也 自明 從蔑 歸之。 〇 孔 ,而亦所以全蔑,亦不得 奔秦, 士會非與謀立雍,可以不必 愚 謂文子知人者,所 謂 氏 ,所以 所謂「不遺 曰:「文七年,士 晉趙盾 初明其 共先蔑俱 而 ,故晉立靈公, 使先蔑 歸。 無相 其 是遺 私 友」也。 迎 論 爲遺 黨之 迎 公子 蔑。」 會 賢 無 其 與 否

音退,本亦作『退』。 家,生不交利 文子其中退 其 口。 所 然如 舉 死不屬 於 勝 音 不 晉 勝衣,其言呐 升。 國,管庫之士七十 其子焉。 呐,如悦反,徐奴劣反。 《釋文》: 呐 然 如 追 有 不 屬 然 餘 出

> 音 燭。」○鄭注: 「退,或爲 「妥」。」

鄭

僭 也。」 士。 寸以 問,生僭侈之世,相習成風,而 之,廉潔之至。」 亦可謂賢者。 而生則不與之交利,將死亦不以其子屬 下,官長所置也。 鍵鍵 也。 ,見譏於世。 氏 爲侯中。』退,柔 曰 : 生不交 也。 陳氏澔 庫,物所藏。 中,身也。 利, 然以宫室之侈、《肆夏》之 蓋其 曰:「雖 廉 愚謂: 舉之於君,以爲大夫、 也。 和 天姿雖美,而 ^ 鄉 貌 有舉用之恩於人, 管庫之士,府史以 死 射 趙文子之爲 不 呐 記 屬 呐,舒小貌 日 不自知其 其 : 弓二 未嘗 子,潔 學

曰 : 衰 退 叔仲皮學子柳。 ,使其妻繐 而 繆 昔者吾 經。 叔 衰 喪姑 仲 而 叔仲皮死,其妻魯 環 衍 姊 經。 以 妹 告, 亦 釋文》: 如 請 斯 繐 末 衰 吾 而 人 教反。 禁也 也,衣 環 經 衣

非

衰,依 字。」〇鄭注: 「衍,或爲「皮」。」 繆,依 注 讀 口楼,居 虯 反。 喪,如

同。 衰。 也。 必 以 禮 也。 鄭 自 妻服之。 知禮之本,子柳亦 口 衍蓋皮之弟。 士 勝學。 主妻爲 以 兩 加 額 氏 於首 向 時 繆,當爲『不樛垂』之樛。 爲 股 子柳,仲皮之子。 曰:「叔仲皮,魯叔孫 後 婦 舅姑之服 綷 而 愚 姑、姊妹 叔仲 後 也。 也。 而 謂 人 能 交結於項 好 樛,結 舊説 衍 月,不纓絰。」又《喪服》「大 古 繐衰,小功之縷 輕 喪 也。 結 以告,告子柳,言此 細 以 在 服 謂環經 前 爲 凡絰皆然,一股者 室齊衰,與婦 也。 也。 言其妻雖魯鈍 傳 然,而 多 衣當爲『驚』,壞字 日: 服 樛 環經 氏之族。 一股,非 經 此 請 齊衰、繆經 而 長 於衍 者 爲 以 四 「, 衍 殤 繩 爲 也。 之 升 其於 非也。 九 舅 半之 如 一條 使 既 月, 姑 繩 環 其 不

言 所 纓。 知 退 斯 婦 爲 略 絰 説 以 纓者,其 功」章曰: 而 大功九月,則自小 無 爲 禮 使 服 其 上之経。環経者,小功以下之経 爲 相 不 謂 差善、故當 ,反以 其 然 舅姑同。 環 爲之如 似 有禁止 大小 經 妻 而 而 環 專 繐 請 齊衰、樛經爲非,子柳 其 總衰 疑 絰 牡 用 環,故 衰 改之。 我者, 時 縷 亦 麻、纓 歟? 子柳言己昔服 於弔服,亦 而 多服、 輕 如齊衰之經 四 環 功以 細 無纓。 升有半,與齊衰 以 經。」 姑、姊妹 樛之,故 經,言衍 之。 環 見其 下 絰 叔 經皆 経之有 非 則樛 無纓, 可 仲 也 但 姑、姊妹 在 與子 垂 服 衍 不纓矣。 経者,大 室齊 其 也。 爲 亦 習 此 纓 亦 柳 餘 以 見當 視 之升 之如 爲 也。 者 衰 於是 亦 衍 樛 舅 以 止 功 之 數 環 環 爲 如 與 時 經 舊 於

成人 有 其 兄死 而 不 · 爲 衰者 聞 子 臯 將 爲 成

纓

經

中

殤

£

則 宰,遂爲衰。 而 蟬 有 成 矮,兄則死 人曰: **香** 而 子皐 則 績 而 爲之衰。」《釋 蟹有匡 一,范

「成,本或作『郕』,音承。」

腹 也。 鄭 戲 歸 初 蠶 子臯爲之,非爲兄施,亦猶蟹匡 矮,矮自著蟬 自著蟹,非爲 有 臯至孝,來爲成宰,必當治不孝之人,故懼 如 而 下。 夫民之爲 於 不作衰,而 則 物 制 蟹 氏 范,蜂 須 蠶 似 服 有 曰:「蚩兄死者,言其衰之不爲兄死 匡 冠 匡 以 也。 蟹背殼似 一, 蟬 孔氏 也。 也 服 貯絲,而今無匡,蟹背有匡,匡 非 後畏子臯,方爲 叠 有矮,不爲蠶之績,范之冠 者 蟬喙 티 : 蟬,蜩也。 設。 不出於誠 爲 應 成成 蜂 匡。 長 蜂 氏 一設。 在 冠 人不爲兄服 范,蜂也。 鏞 腹 無 矮,謂蟬 亦如 心,實以 日 下,似 派矮,而 制服 蟬矮,各不 成 此 冠之矮。 人兄死 蜂 謡 蟬 喜 喙 聞 服是 子皐 雖 П 長 頭 子 以 有 上 在

友之君陳。風化之機,不在多也。」康叔,以克敬典爲急,而分正東郊,必以孝之孝足以感不友不悌之俗。故周公之告

之。 樂正 釋文》:「惡,音烏。」 自吾 子春之母 母 而 不 死,五日 得 吾情,吾惡乎用 而 不 食,曰: 吾 吾 悔

也。 有所 皆賢者之過也。 學於曾子者也,故其喪母 以 鄭氏 有所不逮矣,故以不用其 謂:曾子居喪,水漿不入口者七日。 吾實情, 實情,勉强至五日。 勉强,子春 曰:「子春,曾子弟子。 孔氏曰:「禮不食三日。子 更於何處用吾之實情 則勉强 然曾子則出 言自吾 以 也,五 情 求過禮,而 爲 惡乎, 乎至情 悔 13: 日 乎。 死 也 而 春 猶 而 不食, 子春 情 不 悔 於 而 非 得 何 或 愚 不

吾欲暴尪而奚若?」曰:「天則不雨,而暴人歲旱,穆公召縣子而問然,曰:「天久不雨,

作『繆』。 疾子,一讀以「子」字向下。與,音餘。」○鄭注:「凡穆,或 之疾子,虐,毋乃 雨,于付反。 不可與!」《釋文》:「縣,音懸。 暴,步卜反。尪,烏光反。 暴人之

天哀而雨之。 鄭氏曰:「然之言焉也。尪者面鄉天,覬 上。 杜 氏 預曰:「尪者,病瘠之人,其面 錮疾人之所哀,暴之是虐。」

而望之愚婦人,於以求之,毋乃已疏 然則吾欲暴巫而奚若?」曰:「天則不雨, 鄭氏曰:「已猶甚也。 巫主接神,亦覬天 乎?

雩。 』 甚疏遠於道理矣。 哀 不雨,而望於愚鄙之婦人,欲暴之以求雨, 巫,在男曰覡。』《周禮•女巫》:『旱暵則舞 「貳者」,始得爲巫,而云 『愚婦人』者,據末 而 雨之。《春秋傳》説巫曰:『在 孔氏曰:「天道遠,人道近。 按《楚語》『民之精爽不 天則 女日

> 徙市則奚若?」曰:「天子崩,巷市 世之巫,非復是精爽不攜貳者也。」 七日。

《釋文》:「爲,于僞反。可,或作『善』。」 諸侯薨,巷市三日。 爲之徙市,不亦可乎?」

鄭氏曰:「徙市者,庶人之喪禮。今徙市,

而謂 市。 仲之言而 其説。然僖公以大旱欲焚巫、尪,聞 責也。縣子以其求諸己而不求諸人,故 須之物,不得不求,故於邑里之内 侯之喪,庶人憂戚,無復求覓財利,要有 是憂戚於旱若喪。」 孔氏曰:「天子、諸 徙市爲可,則亦疏 陳氏澔曰:「徙市,以居喪之禮 止,縣子不能舉其説以對穆公, 矣。」 而 臧文 爲 自 口 巷 必

之,善夫!」《釋文》:「夫,音扶。」 孔子曰:「衛人之祔也離之。魯人之祔也合

鄭氏曰:「祔,合葬也。離之,有以間其椁

攜

中。善夫,善魯人也。祔葬當合。」 孔氏中。善夫,善魯人也。祔葬當合。」 孔氏學人合之者,言死異於生,不須復隔,『穀則異室,死則同穴』,故善魯之祔也。」 愚則異室,死則同穴』,故善魯之祔也。」 愚問毒之者,穿爲二壙,夫婦之棺椁各藏門盡之者,穿爲二壙,夫婦之棺椁各藏門養合藏於其中也。離之則乖祔之義,故孔中。善夫,善魯人也。祔葬當合。」 孔氏中。善夫,善魯人也。祔葬當合。」 孔氏

禮記卷十一終

## 禮記卷十一

國史館纂脩孫希旦集解賜進士及第翰林院編脩

王制第五之一《别録》屬《制度》。

授 鄭 作《王制》。』」 其後。』盧植云:『漢孝文皇帝令博士諸 云:『孟子當赧王之時,《王制》之作,又在 是周亡之後也。 又有『古者以周尺,今以周尺』之語 『正聽之』,鄭云『漢有正平丞,❶秦所置』, 《王制》之作,蓋在秦、漢之際。下文云 禄、祭祀、養老之法度。」 氏曰:「名《王制》者,以其記先王班爵、 秦昭王亡周,故鄭答臨 愚謂:《史記》言漢文帝 孔氏 則 티 : 生 知 碩

> 盡合,悉目爲夏、殷之制,誤矣。 益,不純用古法者。鄭氏見其與《周禮》不 蓋將自爲一代之典,其所採以周制爲主 中,豈二戴之所删去與? 皆王者之大經大法,然獨 授田、巡守、朝覲、喪祭、田獵、學校、刑政 而亦或雜有前代之法,又有其所自爲損 事」,則此篇作於漢時明矣。 令博士刺六經作《王制 》,謀 漢人採輯古制 封禪不見於篇 其中言封建 議 封 禪巡守

王者之制禄爵,公、侯、伯、子、男,凡五等。

<sup>● 「</sup>丞」,原作「承」,據《禮記注疏》改。

者也。 也。 異,中、下大夫命既同 同 蓋在王國則三等之士殊命,而中、下大夫 言上大夫即卿也。 此制禄爵之説,本取 三等,而大夫則以中從下而止爲二等也 上、中、下,此上大夫以下惟有下大夫者, 國者,不及君者,尊君也。 上大夫卿者, 及天子者,尊王也。下五等,爵之施於一 後言禄也。 田」以下至「小國之君十卿禄」,制禄之法 孟子》不同者,則漢 命,在侯國則三等之士命雖 爵定而 上五等, 爵之通於天下者, 後禄之輕 《周禮》大夫與士,皆有 人所欲斟酌而變通之 諸《孟子》,而 而禄亦同,故士區爲 重隨之,故先言爵 同,而 稍有 禄 與 則 而

附於諸侯,曰附庸。 子男五十里。不能五十里者,不合於天子,天子之田方千里,公侯田方百里,伯七十里,

庸。 倍附 名通 鄭氏曰:「不合,謂不朝會也。小 之者也。 十五里,又方一里者二十五也。天子之地 之地亦當倍元士。 庸」,「諸侯大夫之禄倍上士」,則天子大夫 下文云「天子大夫之田 國,不能 五十里也。 爲方七十里,積方十里者二十五,則爲 百,則爲方百 方百里者百, 縱横皆千里也。凡言方者,不必正方。 積 子男倍附庸,此即大夫與上中下士之禄遞 百倍於公侯,此 也。」 附 庸,而附 庸者,以 自 公侯之地倍伯,伯之地倍子男, 通 愚謂: 庸與墉同,城也。 庸半子男之地,蓋爲 於天子,而附 里, 積方十里者四十九,則 則爲方千里,積方十里者 或 即 以 事 君十卿 田 附 随地· 此推之,則子男之地 視子男,元士視 於大國,未 禄之法,而 也。 屬 於諸 附 方千里者, 城 墉不成 能 地 侯也 又十 方二 以 曰 附 附 其

唐 國之制。」 孟子未見《周禮》,不可以此破《司徒職》封 是 言,封疆方五百里,以周遭言,其徑止一百 子 維,一 地 言「分土惟三」,此自唐、虞、夏、商以迄於 以百里、七十里、五十里爲三等,《武成》亦 侯之類,極分明。」直卿因問:「《武成》『分 建國? Ŧi. 是夏、殷制,《周禮》是成王時制。陳君舉 何 相 土惟三」,與孟子所言似 語 方五百里,其食者半。侯之地方四百 初得天下,事勢未定,且大概 十里。 ·與周制不合?」曰:「先儒以孟子所言, 初之舊制 倍之法也。 **三類**》直 則取其 《職方氏》所載千里四公,千里六 卿 如 也。《周 愚謂: 問 此 貢賦之足以相給也。 蓋 則 「封國之制,孟子所言如 男國 孟子王制言 則取 禮 ·大司徒》:「公之 止 合。」曰:「《武 其 似 形勢之足以 一耆長,如 建立 Ŧi. 等 ○ 《朱 封 規 成》 地, 何 相

田 也。 封。 附庸 廢 及子産答晉人言「大國一同」,皆以舊制爲 宋、齊、魯諸國,土地甚廣,必皆不止百里, 周公所立之法也。孟子王制所言,除 之一。 男之地方百里,其食者四之一。」 四之一」相合。然孟子之告北宫錡、慎子, 而子産言周制列 食者三之一。子之地方二百里,其食者 里,其食者三之一。 言者,蓋周公雖立爲此 「食者半」,侯伯「食者三之一」,子男「食者 滅削奪者,然後 附庸」。 故《魯頌》言「大啟爾宇,錫之山 而 《周禮》所言,兼山 計之者也,故 以《魯頌》及《左傳》觀之,晉、 尊貢重,亦與《大司徒》公 可以 伯之地方三百 曰「名山 其 法,然必諸 川附庸 地增封,齊既封 大澤 而計之者 侯 里,其 川,土 之有 不 Ш 111 此 四

❶ 「百」下、《朱子語類》有「二」字。

封,則鑿爲「斥大九州」之説,欲言周公「斥 能及乎其數,其 行者,故或仍 而 三千里」之説,而展轉而益其繆矣。 大九州」,則又鑿 蒲 鄭氏不察乎此,而以 姑 氏 滅 則 以 其 雖 益 能 舊 欲 爲 齊,魯 如《大司徒》之所言者 益 而 一封,而 殷承夏末,封疆僅 未能益,或益之而 既 爲 勢 封 周公實已增 有 而 不 奄 可 滅 得 以 方 寡 未 益 而

天子之三公之田視公侯、天子之卿視伯 子之大夫視子男,天子之元士視附庸 夫之田 也。 縣 之田 以 師》:「以家邑之田 視,比也。 公卿 地,以大都之田 也。 小都,卿之田 倍 以下遞相倍之法推之,其受禄之差 公之田 元士 元士,上士也。 ,中士、下士不必皆有 倍卿,卿之田 也。 任 任稍地,以小都之田任 畺 家邑,大夫與元 地。」大都,公之田 《周 倍大夫,大 禮 天 田 +: 載

以 也。 等之號相混。祭公、州公、周公亦皆以 比也,謂其禄秩與之等而已。《春秋》所 渭曰:「天子之大夫雖 等,則漢人之所欲變而 言卿、大夫、元士受地,皆視孟子而 之禄本少,故大國之卿必四之而 天子之卿 亦 伯 以爲寰内之諸侯,是亦 『伯』者、《公羊》以爲天子之大夫、《穀梁 天子之三公,獨子、伯之説 王. 無五等之號。視公侯、視伯、視子男,視 子大夫之田已優,故卿第倍之而 季、叔爲字無異説矣,惟公、伯、子與五 臣 可 至杜 來接於我者,如南季、榮叔之類,先儒 得 曰『伯爵』,而伯 而 見矣。 僅倍大夫,何也? 預 注《左 ○大國之卿 傳 》,於 通之者也。 於是乎 曰 以伯爲五十之字 縣 祭伯、凡伯、單 内 四大夫禄 互異。 蓋侯 始 諸 住侯, 有 乃 爲爵矣 遞降 餘。 國大夫 足。天 其 ൬ 胡 此 E 爲 書 猫 實 氏 而 侯,而 蓋文、宣以後尊王卿士之稱,非五等之子 子,自文十年蘇子始。 説,以伯與叔、季皆爲字,人以其晚 也。天子之公、卿、大夫、元士禄視外諸 未遠,已不從其説,奚待黎錞乎? 伯、毛伯皆以伯爲字,不以爲爵。 内有伯、子之爵。● 復以子爲爵矣。 七年『單子』注云『單伯稱子,蓋降稱 而 子云『王卿士』,是亦與《公》、《穀》無異。 子云『周卿士』,於單子云『王官伯』,於尹 其 又於『尹子,王卿士』下云『子爵』,成十 曰『子』者、《公羊》《穀梁》無説、杜於 余考《穀梁》范注,於凡伯、渠伯糾 無 五等之封,❷虞及商、周未之或 學者多宗杜氏,遂謂 至宋趙鵬飛據黎 子者,男子之美稱 王臣 范去杜 出 錞 周 而 稱 單 之 則 蘇 畿 疑

反。」〇鄭注:「分,或爲『糞」。」
文》:「分,扶問反。食,音嗣,徐音自。差,初佳反,徐初宜食五人。庶人在官者,其禄以是爲差也。《釋次食八人,其次食七人,其次食六人,下農夫

《王制》之所食有 起也。 制也。 胥食六人,徒食五人,是也。○《小司徒》 授地爲三等,以所耕之肥瘠 上農夫,食九人」,則府食八人,史食七人, 徒之屬也。 者,地惡而功寡也。庶人在官,府、史、胥 食之多寡爲等級也。 制者,言自庶人在官,上迄於君,其頒 所食多者,地美而 先言農田者,以其爲禄之所自準 其禄 五等,以所收之多寡爲差 以是爲差者,以是農夫所 《周禮疏》謂 力勤也。 爲差者 「下士視 所食寡 禄之 也 而

制農

田

一百畝。

百畝之分,上農夫食九人,其

改也。」

<sup>「</sup>十一、『馬賣進旨》作「虎」。

<sup>「</sup>封」、《禹貢錐指》作「號」。

家有

不及五

人者,而下地

但

助

其

(家長

也

其

糞

多

前

力勤,

其餘

故雖

有

夫

有婦,

矣。

田。

如此

則

田

古

七人爲斷也。一家之中,除老幼者一人, 必可任者二人乃能耕之。 必可任者二家五人乃能耕之。 人、六人、五人者而恒歲餘二人之食焉,所 人者,則擇其餘夫之長者而授以二十五 ,中地可食八人,下地可食七人,視其七 男女各半,約家五人,乃有可任者二 故雖家有不止七人者,而上地 乎七人,受中地下地而家 其人口減損者,亦但退其餘夫之 以耕,而受餘夫之田焉。故雖 不必歲更,而多寡 而未至於五人,則亦 則受上 耕之。 必以家 也? 其或受上 地者可 過乎六人 下地百 中地 蓋 五人爲 止以家 上 無 百 食 地 地 不 畝 畝 白 九 均 畝 Ŧi. 而 確。 歟 ? 爲差,而其家之人數,則不可以五人、六 所食者五等也。庶人在官者之禄,以四 六人、五人而止。 則 是以又有士田、官田之授。《漢書・食貨 官者之所可例。是皆將不免於不足之患, 爲稍優,然其吉凶禮俗之費,又非庶人在 夫,而又有圭田 至,則上 謂 禄視大夫則倍之、三之、四之,君之禄視 自下士以至大夫,遞加以一倍之禄。 人。」度庶人在官者之受田 志》云:「士、工、商受田,五 人、七人、八人爲限。 至下士之禄視上農 耕 十之,制禄之差然也。 蓋自徒以至下士,遞加 庶人在官者之禄,當以賈氏之説 地、中地、下 年則有一 五十畝,雖視庶人在 此所以授地 年之食」也。 地適足以 至府、史、胥、徒 以 ,其法亦 口乃當農 一人之食; 有三等,而 食乎七人、 若人功不

之田。

家過

畝

可任

者三人乃能

者

也。

其 所

以

不

同者何

如是

爲

夫

卿之

官

者

君 四 士倍 諸侯之下士視上農夫,禄足以代其耕也。 其租。 + 大夫禄,君十卿禄。 四 有公儲。」 君所私用。 於官,如田之人而已。」又曰: 禄,皆助法之公田 萬六千畝。」 君二萬四千畝。小國卿一千六百畝,君一 畝、君三萬二千畝。 徐氏曰:「下士田百畝,中士二百畝,上士 -卿禄。 百畝 下士,上士倍中士,下大夫倍上士。 易、再易通率之,爲十六井之公田 士之無田與庶人在官者,則但受禄 ,大夫八百畝。 小國之卿,倍大夫禄,君十卿 若貢賦、賓客、朝聘、祭享,别 愚謂: 朱子曰: ,藉庶人之力以 次國 大夫田八百畝,以不 次國之卿 大國 一君 卿二千四百畝 以 卿三千二百 君 ,三大夫禄, 下所食之 + 耕 卿 而 禄 收 卿 中

> 也。 之國,乃有百乘之家。斯制 大國已益封土者乃能有之與? 大夫以下禄薄,不可復殺,故三等之國 厚,故三等之國,視地之大小而區殺之。 大 公擴大諸侯之後,而 而又有所謂百乘之家者何 人國卿 丘 〇此 之地 四 言諸侯 丘,則 也。 小 (卿、大夫之禄止於如此 或 成 卿二 亦 之地 惟 丘 魯、衛、齊、晉諸 也? 也。 也,蓋起於周 次 或 蓋有 君 卿 卿之禄 千乘

中當其上大夫,下當其下大夫。 其上大夫。 次國之上卿,位當大國之中,中當其下,下當 序 鄭氏曰:「此諸侯使卿、大夫頫、聘並會之 大國卿下。 希冕,大夫玄冕,卿不得在大夫下也。」 在大夫上。 也。」 小國之上卿,位當大國之下卿, 孔 大國 知者,以 氏 曰 是大夫,小 同 卿執羔,大夫執鴈, 是 卿,則 國是卿, 小 或 則 卿 卿 卿 在

子男也 伯 里,故公侯皆爲大國。 愚 ,同爲七命,故侯伯並 大國,公也。 蓋 制禄則侯 次國,侯伯 上而從公, 制 爲 次國。 爵 則侯下而從 也。 上大夫, 同爲 小 國, 百

也。

此一節又申言制爵之事也。

下大夫之上者、《大射禮》所謂「小卿」是

其有中士、下士者,數各居其上之三分。 卿 下,中士、下士各三倍其上士之數也。 之説爲是。 下者也。 上士,不當遽以中土、下士爲言也。 義既不分曉,且上節止言「下大夫」,未及 中當其下,小國之上士當大國之下」,於文 士出會之禮,謂「次國之上士當大國之中, 下,錯簡在此。」 徐氏師曾曰:「此當在『上士二十七人』之 而上士二十七人,每卿九人,則中士、下 數各居其上之三分者,謂三卿之 中士、下士、謂其屬於三卿之 愚謂:注疏以此節爲命 徐 氏

士,每卿二十七人也。

文》:「間,音閑。」
、八州,州二百一十國。《釋以爲附庸、間田。八州,州二百一十國。《釋十,凡二百一十國。名山、大澤不以封,其餘三十,七十里之國六十,五十里之國百有二三十,七十里之國六十,五十里之國百有二

負固 增減也。 此言畿外八州,每州之内所封之國 鄭氏曰:「名 專掌之。」又《立政》云:「夷、微、盧烝, 局,亦不必每州封國必取足於此 有廣狹,山 然立法如此,至其 財,不得障管,亦賦稅之而已。」 疏云:「名山、大澤不以封,故 財利而不與民同,一 也。 名山、大澤不 《周禮 JII 形勢 山、大澤 ·夏官》有山 有迂曲,不必皆整 行之,須有變通。 則恐其據 一不以 以 封,一 封者, 險 天子設官以 師 川 則恐 數 阻 與民 而 而 師 數也 其 如 蓋 謂 易 不 賈 於 共 口 州

言制禄之事也 以下至「曰采曰 蒲 亳 姑氏因之,而後大公因之』。 若武王不得 弟,須有空地方可封。《左氏》載齊地『蒲 蓋世守其地、未肯遽從他人。 襄王以原田與晉文,其民不服,至於伐之。 與少者,則彼未必服,或以生亂。又如周 夏時封建之國,至商革命,必削其多者 青、兖、徐、豫,則疆界有不足者矣。 屬焉。❶ 算法。九州之地,冀州極闊 朱子曰:「封國之制,只是漢儒立下一箇 之,三毫等之尹,其即主治間田者與? 阻者與? 阪 姑之地,即大公亦未有安放處。」○自 尹 雍州亦闊,陝西五路皆屬焉。 阪險之地立尹 畿外之間田,天子亦當遣吏治 流」,承前言封國之法,申 、蓋即 (河東、河北 主 若封王子 山澤之險 設 此 以 如 若 皆

> 十有 名山、大澤不以 釋文》:「朌,音班。」 ,五十里之國六十有三,凡九十三 胎,其餘以禄士,以爲 間 田 國。

人少 之田也。五十里之國,大夫之田也。 孔氏曰:「名山、大澤不以 禄者也。元士受地視附庸,此不言者,於 大夫人多而國少者,容有不受田而但賦之 百里之國,三公之田也。七十里之國,卿 之地、言「縣内」者、舉其 義,故云『不以盼』。」 財,不障管也。 禄士中包之也。 封之國數也。 云『不以封』。 /而國· 多者,容有以 畿内之臣不世位,有肦賜之 畿内之國,在稍、縣、都三等 畿外諸侯 畿内之間田、《周禮》「公 愚謂:此言畿内 功德而世 中以 有封建之義,故 胎,亦爲 該 國 内外也。 與民 [者也。 公卿 所 共

0 「東」、《禮記義疏》作「南」。

天子之縣内,方百里之國九,七十里之國二

更受地也。其不能爲公卿大夫者,雖亦必爲公卿大夫,則即受公卿大夫之地,不必封王之子弟」。然王子弟之賢者,未嘗不邑」之地也。○鄭氏謂三等之國,「兼以待

之附庸不與。《釋文》:「與,音預。」
凡九州千七百七十三國,天子之元士、諸侯

有

田

以養之,而恩或從其殺矣。

萬國 爲 湯因之,更制中國,方三千里之地界,亦分 謂 天子巡守,朝於方岳者,不過當方諸侯,未 復唐、虞之舊域,要服之内方七千里」。 此總言畿外、 萬 有舉天下之諸侯而盡朝於是者也。 不經之説也。禹會諸侯於塗山,執玉帛者 夏 九 或 一時 州,而建 之數,地方七千里乃能容之,而在 ,雖《左傳》魯大夫之言,實不可據。 萬 國,地方七千里,夏末減少,「殷 畿内 此 千七百七十三國。 所封之國數也。 至周公 ○鄭氏 鄭推 此

爲分明。 地。所謂四海者,九州之外,東夷、西戎、 里之地也。 内者四百,然《禹 里,兩面合爲方五百里,每 貢》之甸服,畿外分爲九服,每面二百五 五千里之外者也。 之,禹所謂 蠻,西方曰戎,北方曰 五服,至于五千」者也。 則并數要、荒而爲方五千里,禹所謂 侯、綏三服之地 爲方三千里,此據中國言之,《禹貢》甸 南蠻、北狄,王者之所不治是也。」此言極 云:「古言中國者,《禹貢》甸、侯、綏三千 地已適盡,而天子將安所容乎? 且王畿方千里,封 《王制》九州之地方千里者九,合 外 所謂四夷者,要、荒二千里之 薄四海,咸 也。千里之外日采日 貢》五服,不 方五 周 制王 一狄,則 東方曰夷,南 十里之國 建五 畿千里,當《禹 以二服當《禹 過 極 長」,又在 五. 乎 几 千 胡朏 四 白 里 方日 弼成 海 耳。 流 明 而

一共,音恭。」

爲四 分五 地 里 不可考。《國語》云: 荒服、《大行人》言「九州之外謂之蕃國,世 侯、衛,要服分蠻、夷,荒服分戎、翟,此 又云「賓服者享,荒服者王」,與《商 服,侯、衛賓服,夷、蠻要服,戎、翟荒服。」 言「六服群辟」,是也。 服、《大行人》言「要服六歲一見」、《周官》 言「六年五服一 貢》之一 來享王」者合,疑此乃 一百五十里 工,肇域 見」,是也。至於通道「九夷、八蠻」,則 ,方五千里,與夏時無以 工服爲. 海之地, 服 彼 九服之漸與。 四 前 而禹所咸建五長者也。 其多於《禹貢》者,藩服 海 以 一,則 朝」,是 衛服 「邦内 四 以夷、鎮、藩三服爲 《商頌》言「邦畿 内 殷制 也。 海之内爲五 爲 、異矣。 甸服,邦外侯 中國,《 以蠻 也。 賓 服 區頌》言 周 爲要 服之 服 殷制 每 官 分 則 面

天子百里之内以共官,千里之内以爲御。

國以 十六正,百六十八帥,三百三十六長。八伯 千里之外設方伯。 二百一十國以爲州,州有伯。 九十 之數 於百 以 以待 府》: 禄。 而千里以内之所入,與爲御之數相當也 官者也,其餘則爲御者也。 以待喪紀,幣餘之賦以待賜予。」匪頒 以待賓客, 畿内之地百同,百里之内四同,千里之内 待 爲 一六同。 里 連,連有帥。 相當也。 幣帛,邦都 匪 爲 「關市之賦以待王之膳服、邦中 御 以 頒,邦甸之賦 内, 四郊之賦以待稍、秣,家稍 以給天子 共官,以共百官 而 爲御者非必取於千里以內, 之賦 百 五國以爲屬,屬有長。 三十國以爲卒,卒有 里以 以 以 之用。 待工 内之所入,與共官 待祭祀 共官者非 八州八伯,五 事,邦縣 無 · , 山 周 采地者之 禮 澤 則共 之賦 必 之賦 之賦

右,曰二伯。《釋文》:「帥,色類反。卒,子忽反。」各以其屬屬於天子之老二人,分天下以爲左

於師 人也。 以 以 以 鄭氏曰:「屬、連、卒、州,猶聚也。伯、帥、 之國」,是也。」 之,則伸於諸侯,故稱伯,《王制》謂 『方伯 州之長,人天子之國曰牧」,是也。 内言之,則屈於二伯,故稱牧。 國, 分其土也。 公主之。」 曰:『自陝以東,周公主之。 自陝以西,召 上公。《周禮》曰:『九命作伯。』《春秋傳》 正,亦長也。凡長皆因賢侯爲之。老,謂 天下爲一家而 聯其國,爲長、帥、正、伯以聯其人,故能 中國爲 田 古者什五之法,於州、鄉則聯其民, 則聯其徒,於宿衛則聯其官,故能 一人而 陳氏祥道曰:「上文千八百 無外虞。伯皆稱牧者,自 無内患。 此繼以方伯、連帥,合其 愚謂: 管仲言「大公賜 爲屬、連、卒、州 《曲禮》『九 自外言

> 青、兖、豫,而其 謂 西只是關 荆州,正與東伯各主天下之半。 朱子疑陝 西,有雍州之地,而北則連并、冀,南 故舉楚北之穆陵耳。 鹽 穆陵關,荆 陝 至於無棣」,此 履,東至於海,西 以 西河雍、冀二州之界,西至於河,所謂 山縣,周 東 也。 中雍州之地,蓋未詳考耳。 幽州 州之北 元和 周 、南當盡 地 至 時東伯所主之地 郡 也。」是東伯所主者,幽、 境也。 於河,南至於穆陵,北 縣志》云:「麻 西 揚 伯 州 無棣,今滄州之 ,但以 所主,自陝 對楚言, 也。 城 則 縣 得 以 河

之外,夷狄流移,或貢或否。《禹貢》荒服之内地,取其美物,以當穀税。流,謂九州鄭氏曰:「甸,服治田,出穀税。采,九州

千里之内日

甸,千里之外曰采,曰流。

●「千八百國」、《集説》作「千七百七十三國」。

遠者。 謂: 魅 口 《禹貢》之荒服「二百里流」,言其爲流放 也。采即《禹貢》之「侯服百里采」,言但采 采,曰流,此《禹貢》侯、綏、要、荒四服之地 其田賦入於天子,故謂之甸。 言之,故曰「千里」。甸,田也。 貢》據一面言之,故曰「五百里」,此據兩面 之最近者; 莫遠於荒服,而 地 之地、《大學》言「放流之,屏諸四夷,不與 取美物以貢天子,而不共其田 之外,『三百里蠻,二百里流』。」 日 曰:「千里之外,莫近於侯服 [中國」、《左傳》言「投諸 ,悉在其内矣。 甸,即《禹貢》之「五 」,是也。 此據《禹貢》之法言之也。 舉此則要、綏之服在其 自采 上言九州之地,僅爲方 以及流 百里甸服」也。 則 流 四四 而 畿外 千里之外日 賦 又荒 裔,以 千里之内 千里之内 中。一 也。 采 四 方氏 服 又 服 流 之最 侯 《禹 > 螭 X 即 服 殼

天子三公,九卿,二十七大夫,八十一元士。 之流 公、卿、大夫、元士之數,以人而計者也。 數三倍於公,故放而遞倍之也。此大夫、 九人。其所以必皆三倍之者,亦以九卿之 事,故欲於九卿之下,各置大夫三人,元 禮》,徒聞九卿之名,而不知三孤之無 九卿,三孤與六卿也。此蓋漢初未見《周 周官三百六十,而 位》曰「夏后氏官百」,以職而計之也。此 於此也。 天子止有官百人,豈足以理天下之事耶 百,殷二百,必非 上士八人者,非謂天子大夫、元士之數止 之下,小宰中大夫二人,宰夫下大夫四人, 元士,惟謂其屬於九卿者。 三千里,此又言甸服千里之外,極乎荒 而 止,而其 鄭氏以 地不盡於九州 此爲夏制,非也。 一職 其 人 止一人爲之。 數則 若《周禮》大宰 多矣。 也 《明堂 夏官 服

與其命數之異,又申言制爵之事也。○自此以下至「下大夫一命」,言設官之法

上人。 七人。 大國三卿,皆命於天子,下大夫五人,上士二十 大國三卿,二卿命於天子,一卿命 大國三卿,二卿命於天子,一卿命 大國三卿,二卿命於天子,一卿命

子, 徒 事,立司空,兼司寇之事。故《左傳》云: 詔 鄭氏曰:「命於天子者,天子選用之,如今 五大夫,謂司徒下置小卿二人,小宰、小司 立司徒,兼冢宰之事;立司馬,兼宗伯之 見畿内之國 季孫爲司徒,叔孫爲司馬,孟孫爲司空。』 也 書除吏矣。小國亦三卿,一卿命於天 一卿命於其君,此文似誤脱耳,或者欲 司馬 司空下亦置二小卿,小司寇、小司 事 二卿與?」 省,惟置一小卿,小司馬 孔氏曰:「三卿, 也。

《左傳》齊管仲曰:「有天子之二守國、高 《大射禮》:「小卿賓西,東上,大夫繼而東 其殷」,非謂一國之大夫、上士止於此 《周禮·大宰職》所謂「設其參,傅其伍,陳 夫、二十七元士,亦惟 宰,而小宰之事,小司徒兼之也。 弗忌爲宗伯,則下大夫當有小宗伯 以黻冕命晉士會爲大傅是也。 若無三卿,何上中下之有 小 小 在。」此侯伯之國二卿命於天子也。 夫之不止於五明矣。 東上之大夫,又有東 上,即此「下大夫五人」是也。 上,若有東面者則北上。」小卿乃下大夫之 命於天子者,謂天子加 國有上中下三卿,位當大國之下大夫 或 亦三 卿,此言『二卿』,誤也。 面北上之大夫,則大 次國,亦謂 謂其屬於三卿者。 以 乎?」 愚謂: 爵命,若周定王 而又有繼 魯有夏父 侯伯也。 此五 案前云 而無小 也。 大 或 而

或 者,數各居其上之三分」,宜承此下。 子」者,文省也。〇上文「其 當其上大夫,下當其下大夫。」此惟言「小 亦 故前文云:「小國之上卿,當大國之下,中 卿,皆命於其君」,不言「一卿命於天 卿 卿 命於天子 卿 有中士下 命 於 其 君 土

人。《釋文》:「監,古蹔反。監於,古銜反。」
天子使其大夫爲三監,監於方伯之國,國三

伯之國設三監,經傳皆無其 鄭氏曰:「使佐方伯領諸侯。」 成以管、蔡、霍三叔 及《尚書》孔傳以武 内千里,分其地以 放而設之與?三監之説,見於《書序》及 此篇,豈其聞周 漢書·地理志》。 書》云「王啓監,厥亂爲民」、《周禮 初 封武庚、管、蔡等。 有三 蓋武王既滅殷,殷之畿 爲三監。監即諸 庚、管、蔡爲三監,鄭 監監殷之事 事,而 愚謂:方 惟見於 ・大宰 y, 故欲 侯也 班 康 古

> 前 伯,而又立爲三監以 監於武庚之國者,而漢人遂欲於方伯 監也。」此言是也。 手足,此乃末世猜防之術,曾謂先王之世 皆設三監,亦異於先王之制矣。 管、蔡、霍三人叛,故曰三監。 職》「立其監 云:「凡封於殷者,皆監殷者也。 「三監」者,據其爲亂者三人也。 有是乎? 是是 也。 後世失其説,謂三 窺伺其 殷之監 動静,牽 不 其實武 仁山 止於三, 既 其後 使 十制 爲 之國 監 庚 金 其 獨 氏 方 亦

召、單、劉之屬是也。凡祭亦畿内國,而富侯雖不世,然其有功德者亦得世之,若周、侯嗣者,畿外諸侯得繼世而立也。○内諸侯嗣者,畿外諸侯得繼世而立也。○内諸疾,謂天子之公、卿、大夫,受地視縣內諸侯,謂天子之公、卿、大夫,受地視

天子之縣内諸侯,禄也,外諸侯,嗣

也

矣。 耳。 田 世 諸 皆人學」,鄭云:「群后,三公及諸 則 熊 方 地,参之一 使之世者,則 大夫之上 旧 辰 卑而貢 百 或 侯 共 ,以爲之禄 侯、豹侯、諸侯 其 與 里 也 蓋 麋侯。」諸子掌諸 里以下 而 所 列 周禮 此篇言 前 居 ; 總 制 或 重 别 其 而言之,則天子之卿 有 之 並 者,甸 食」  $\pm$ • 司 而 位 諸 田 數 食其 Ŧ, 而 有 言之,則 者 此 侯, 「群后之子,卿大夫 以 王 是 裘》:「王大 所 服 則共 無 爲 爲 乃 四之一。 也。 貢 畿 則 也。」畿外之國,男之 所 卿 食其參之一,故曰 公 内 諸 於王、《司勳 侯、卿、大夫、 取 大 熊侯、豹 卿 世國 亦 侯 左傳 焉。 夫 之 有 與卿 也。 者 射 畿 禄 # 若予之國 内 大夫,皆 侯 則 者 爲諸侯,不 或 子 大夫 卿 「,則 之國 共 之 八之適子 》「凡賞 産 侯。」 大 卿 士 虎 明 夫 大夫 有 不 庶 日 自 重 證 地 之 卿 : 子 世 内 别 而

> 無等也 矣。 也。 卿大夫,得 諸 勳 若 養之,而其恩之隆殺,澤之久近,亦 同 子孫皆教之,教之而 節焉,初非 而子爲士,則食士之禄 大夫之禄 世禄之説而 公卿之子,父死 者 》所謂 諸 侯之爲卿大夫者,反不如其不爲 夫然 無 侯 其不可用 論 人 故 加 而 已,如父爲 爲 遂 以 失其義 田 不必食卿之禄矣。 卿 地不虞其不 食其父之禄,使得 全 則 無 大 食 得 或 夫, 雖 [征] 是· 也。 其 食其父禄」,此蓋 成材則官之。 卿 不 則 田之人矣。 而不必食大夫之禄 得 而 先王之世,仕者之 又 也 - 給,而 仕,亦 子爲大夫, 加 賜 蓋 父爲 之 恩 傳之無 必 不 父子 不 必 有 諸 田 如 則 , ~ 患 有 禄 大 狃 疏 是 侯 其 夫 食 於 之 其 窮 謂 削 司

命 制: 三公一命 次國之君 不 卷,若有加 過七 命 小 則 或 賜 之君 也, 不 不 過 過 九 Ŧi.

命。《釋文》:「卷,子賣几,生角一日泛。」命。《釋文》:「卷,音衮,古本反。」

謂 亦 君 順 爲 色,作服。」此王之服十二章也。 粉 象,日、月、星辰、山 非 命 謂 鄭 衮冕以下,今於衮冕之外更 衮冕之外, 冕,九章之服 而 或 裦 米、宗彝、黼黻、絺繡, 兼 常 則爲上公而服衮冕。若有 王. 不 11 氏 制,謂 錫 有 過 衣 畫 於 制 H 以 加 Ŧi. 九 者 星 也。 也。 也。 命 玄衮是也。 賜 辰 卷、俗 命數 更加餘服,則出於王之特賜, 者 者與? 之 ^ 也。 虞 不過 服,若《詩》言「韓侯 ,侯伯服鷩冕,子男服 次國之君不過七 之制 書》 讀 三公八 也,其 九命者 龍、華蟲作繪,藻 曰:「予 加 也。 然服 賜 以 命,服 通則 於 1,言服 卷 雖 五采彰施 命 有 欲 加 與 加 H 服 加 命 則賜 鷩 冕 觀 公之服 而 衮 衮。」 雖 之外 賜 小小 古 同。 命 入覲」, 加 /",則 毳冕, 者 加加 亦不 人之 於五 或 火、 而 所 謂 之 命 其 而 衮 愚

舉下 服 章、六章、四章之服 希冕 也。 弁,而毳冕以上皆玄冕與 服,皆視 士 夫 八 命卷,則三公之未加命者服鷩冕矣。三公 命數」之文,與《司 公、卿、大夫、士,蓋以《典命》有「衣服 下」,皆據諸侯之臣言之,而不及天子之 臣 加 則 四 命 再命、下士一 言「三公」 故 於外臣言「次國」「小國」而不言大國 以 以 命 而 爵 見 而 服 下, 其 弁者玄端,玄冕者朝服,希冕者爵 上也。 不 服希冕,上 鷩冕,則 命 卿大夫玄冕以 過 而 而 命而並 七 不言 遞 ◎∥周 命 服》可 孤 降 ,故天子公、卿、大夫之 卿 士 卿 一等。 服 禮 大 六 不 互參耳。 爵 命 夫, 舉 • 命 调 下, 弁也。 司 而 而 若其 五. 服》孤 服 服 命 士 上以 玄冕, 毳冕,大 爵 禮無 三公一 自祭之 之服 見下 各 弁 於 以 内 中 如

大國之卿不過三命,下卿再命。小國之卿與

下大夫一命。

之也。 晉侯以三命命先且居將中軍,以 茅之縣賞胥臣,以 《周禮》公、侯、伯之「卿三命,其大夫再命, 之下大夫再命者,以小國之「下大夫」互明 者,以大國之「下卿」互明之也。 不言大國 者,次國與大國同也。不言小國上卿 是公、侯、伯之卿以三命爲極,而其初升者 重爵賞之意。 極,而其初升者或惟一命也。此蓋先王 或惟再命及一命也。 子初以再命爲卿,及伐莒克之,更受三命。 孫穆子爲卿,止於再命。季平子、叔孫昭 子、男之卿再命,其大夫一命」。《左傳》: 言「大國之卿」 一命命卻缺爲卿。」魯叔 子、男之卿以再命爲 而 不言次 再命命先 再 國 命 慎

後爵之,位定然後禄之。凡官民材,必先論之,論辨然後使之,任事然

庸」,所以慎名器而 也。初入仕者,必先試之以事,若後 也。 民 此 故《虞書》言「明試 守之法,視其才之果可用也,而後 任事,謂試之而堪其事 者」,是也。 年大比,則 材 因上文言設官,而因言入官之法 論,謂考論之。《周禮 ,謂庶民之材者,出於鄉學而官之者 考其德行道 辨,明也。 杜僥倖也。 以 功」, 使,謂試之以事也 也。 藝, 鄉大夫》「三 而 爵,定其位 而 後「車 興賢者 加爵 也。 世試 服 官 以 次

(亦)。 爾人於朝,與士共之。刑人於市,與衆棄之。 是故公家不畜刑人,大夫弗養士。遇之塗, 弗與言也。解之四方,唯其所之,不及以政, 弗與言也。解之四方,唯其所之,不及以政, 不,必政反。○○政,舊如字,今音征。石經(示)作 「塗」。屏,必政反。○○政,舊如字,今音征。石經(示)作 「塗」。居,必政反。○○政,舊如字,今音征。石經(示)作

氏曰:「必共之者,所以審慎之也。屏,

鄭

三四五

所之 也。 也。 不畜 庶人 夫以 謂 州 千里之外。」四裔,即 刑 者,天命天討,皆非君之所得私也。公家 罪 之外,即 餘 而 放 八也。 適, 人 虞 刑 孔傳云:「大罪四裔,次 M 上,則命之於廟。 並及刑人。爵人於朝 "此承上「官民材」 唯 去 不授之以 墨者使守門, 其 所居千里之外,非王 書》云「五流 惡之人,賤 人,大夫弗養士, 也 不 若大夫則於朝。 所 要服之二百 爲 之者,既 之 施 田 授 刑 而 田 木 荒 則 有宅,五宅三居」, 劓者使守關,宫者使 至 遠之 乏又 里 服 放 1里蔡。 流 刑 而言爵 弗與言者,以 也。 之二百里流。 之棄之,役賦 人於、 放之所,則 與 謂 也。 無 九州之外,次 士共、與衆棄 畿千里之外 賙 士也。 千里之外, 市 周 人,又因 屏 餼 之四 禮 亦 也 若大 任 其 謂 其 是 九 方 爵 不

諸

侯

之於天子也,比

年一小聘,三

年

大

五.

年一朝。

《釋文》:

朝

直

遥反。」

謂 此者,以示不欲使其生,故外之於王化,所 材 守 以政,不及以征役之事 棄之也 之稍 内 刖者使守 可 用者 用之,其 有 髠 者 餘則 也 使 守 所 屏 之也 積。 以 待 蓋 刑 人如 不 擇 及 其

聘使 守. 伯》: 服 爲 文霸 鄭 見,衛服五歲一見,要服六歲一見。」 夫問之。 王之法。 常期 氏 則衆 歲 卿 日 時 時 : 也。 所 使大夫視之。 朝 見, 殷頫 聘 時 制 比年, 則 聘 日 大 也。」 男服 君 問 日 日 行 自 每 視,謂: 問 殷 人 》: 三歲 行。 年 謂 頫 愚 也。 曰 是不 十二年王有故 謂 王 然 視。」此 《周 侯 室有 此 見,采服 小 服 以 大 聘 聘 歲 比 事 使 禮 諸 年、三 與 大 • 四 則 侯 見, 夫, 朝 大宗 是諸 歲 使 聘 不 洲 大 甸 年 於

服,甸 言五 以 天子 年荒 大聘 侯 比 又 典》言「五年一 也 侯之朝於天子,以六歲 之 其 年 如 年侯服 禮 邦 制 與 服 此《記》所言,非 E 一小聘,三年 服 年一巡守」,實虞、夏之制 施之天子也 交 諸侯之法,蓋即《大行人》所謂「諸 朝,五年王 然以《書》考之,則 朝 而 爲王畿,其餘四服 爲 朝,二年綏服 唐 ,歲相問 晉文霸制 則 巡守,群后 每 一巡守。 殷 服 周 大聘,則《聘 朝 蓋 相聘」者,而 制 朝,三年要服 而徧, 王 據《左 明矣。 明年,侯服 四 五 相 ,分四年 朝 年 距 而 0 傳》子 各 鄭氏 不 也。 朝, 義 虞、 Ŧi. 漢 以 而 》以 朝,四 年 又 夏 與下 人欲 朝 大 以 Ŧi. 《舜 矣。 朝, 爲 年 此 叔

天子五 年 一巡守。《釋文》:「守,手又反,本又作

鄭 「天子以 四 海爲家,時一巡省之。

> 覲諸侯,問 歲二月,東 散,政 守。」 多,供億繁,故行之十二年不爲 之世,其事 衛少,征求 政 五. 虞舜之世 次,此 治 年 者, 治 攝 吕氏 百年者就見之。《釋文》:「柴,仕佳反, 巡守,至于岱宗,柴 新 久則必缺,一次巡守,又提 服 虞、夏之制 其 煩,其人衆,其於巡守也,兵 輕,故行之五歲不爲 新不已之意。」 人心之道。 祖 八事簡 . 謙 日 ,其民寡 : 巡守之禮 周 大抵 則 ,其巡守 十 二 而 楊 人 望祀 疏 氏 心 數。 歲 攝 久 乃 時 也,兵 Ш 成 則 整 維 ]1] 衛 周 : 巡 頓 易 持

於常祀 天也。 歲,謂當巡守之歲 嶽之首 之月也,下放此。 「,故 曰 不能 王者 親舉,故將出 一歲 宗。 祭天有九,巡守在 宗者 岱宗,東嶽 也。二月,據 尊也。 有 類 也。 祭,而 柴 其 至 ,燔柴祭 岱 外, 方岳 每 爲 至 兀 則

依字作『祡』。」

之諸 則别 謂 諸 之,亦欲 方岳 也 人》言「王巡守殷 王 歲,王因 見曰會,殷 文已也。 百年之人,所 望祭東方之山 事父母,不敢 方 甚多。 塗山之會,宣王東都之苗是也。殷見, 侯,若成王岐 岳 王巡守至方岳之下 《周 侯也。 散 則 之下又舉其 禮》言 以 則通、蓋其 時 ○《周 有 以 訪 事 見 諸 車 覲禮行之,故 瀆,亦不 問 閲 而 H 侯朝 ]1] 辇 巡 陽之蒐,康王酆宫之朝, 禮》四 政 出 天下之義 同 國」是也。 禮 也 馬牛衆庶之作,有革 守」者甚 · 於所· 治之得失,非徒 所 王 爲雖異,而其禮則同 覲 敢 王者之事 而大合諸侯、《大行 時常朝之外,有「時 時見,謂 四 諸 曠 有 時 理多矣, 也。 少 其名皆曰 侯 事 會、同之名,對 一,而 禮異,至朝 者 之 覲 望祀 天,猶 非 地 言「會同 敬老之 巡守之 就 見當 而 一觀也 山 大 子之 而 路 ]1] 穆 合 見 於 方

> 皆謂 事,出 則 並 覲」是也。 者 使人聘王,或親 供,所舍有梐枑、藩 三成」、《觀禮》之末有諸 明矣。若王十二年 之祀,所 士: 會 言 ,於國外爲壇而 庶子之從,有 此也。 同之禮亦 ,蓋大朝覲 則有宜 至 《司 有 《周 造,歸 禱 可見矣。 儀》「王大合諸 禮》每 之禮 任器之載, 朝 祠之祭,則 命之,《周 於王。 或有故 則 盾之設,所 即 以 有舍奠,所 放會同而 「大朝覲」、「會同 侯覲於天子之禮 王於諸 不巡守,諸 禮 會同 有 侯,則令爲 》所謂 糧 居 之 食 调 有 爲之者 侯 即 有 賣 委 大 儥 來 侯 巡 積 Ш 增 朝 朝 或 守 111

之所 亦反。」 命大師 日 大,音泰。 同 好 律、 惡 陳 賈,音 志 詩, 禮 以觀 樂、 淫 嫁。 好 好,呼報 制 民風。 辟。 度、 命 衣 反。 命市 典 服 惡,烏 禮 納 正 考 賈, 路 之。 時 反。 以 《釋 月, 辟,匹 觀 文》 定 民

事 謂 見風 貴 典 貞 年五 不 日 大 侯 也 鄉 風 風 市 鄭 之甲 禮 司 移 者 Ė 史 天子之大史,從王 謡 淫、美刺 氏 時 職 於 + ,命諸侯大師之官各陳其所采國中之 ,謂大史,下云「大史典禮 市 市 日 俗之美惡,好尚之邪正。 則侈物貴、民 賈, 之官各納其 ,謂司市之官。 邑,邑移於國 無子者,官衣食之,使之民間求詩。 何休《公羊》注云:「男年六十、 》云:「大會 謂 愚 謂: 陳 四 市賈有貴 謂 律 時 詩 物 十二律。 大師 貴 謂 月,謂 之志 賤 采 市 同、 而 掌教六詩,命大 其 厚 賤、質侈,觀之所 國以聞於天子。」是 賈之貴賤 命市納賈者,命 出者 詩 月之大小。 淫 薄 朝覲, 禮,五 邪 而視之。 也 也 則 禮 典,主也 以 質 也。 是 其 書 周 也 所 則 市 日 協 好 禮 詩 師 用 女 謂 以 有 禮 此 陳 者 物 典

> 謂 得 之六典、八法、八則,正 之同,凡此皆所以 失謂之考,齊其參差謂 制 度,城郭宫室車 正 其 歲 旗之屬。 年以序 不正 之定, 也 事 大史 其 訂 邦 其

度衣服 爵。 地。 加 Ш ][[ 地 宗 進 變禮易樂者爲不從,不從者君流 神 律。 者 廟 祇 爲 有 有 畔,畔者君討。 不 不 順 舉者爲 者 爲 不 不 孝,不孝 敬,不敬者 有功德於民者, 者 君 君 削 革 絀 制 以 以

以 敬 政 切要,故以爲不從,君 神,故云『不 鄭 日 也。 治之急,故以 表明爵等,故 氏 後 曰 : Щ Щ JII ]1] 是外神,故云『不舉』。 不 律 順」。 在國境,故削 -順者 法 絀 爲 也 畔 以 不順 謂 君 爵。 ,謂 惟 若 不不 須 法 流 逆 禮樂 以 度 誅 放。 孝 昭 地。 即 討 穆。」 也 雖 制 宗廟 大 不舉,不 此 度 宗 事 兀 衣 是 孔 廟 而 罪 服 内 П

以 者,若子男以 斿』之等是也」。 上公九命、『繅藉 七 爲 節,則進之以九也。」 Ŧi. 爲 九寸,冕服 節 馬 , 則進之以 氏 晞 孟 九章,建常 日 七; ]:「進 侯 伯 律 九

禮反。」 假 月 五. 月北巡 西 月 于 巡 南巡守,至于 祖 守,至 禰, 守, 用 至 于 于北 西 特。 嶽 南嶽,如東巡守之禮。 《釋文》:「假, 嶽,如 如如 南 西 巡守之禮。 巡守之禮。 音格。 禰, 十有 八 歸 73

告至 禰 鄭 後 皆 歷 氏 也。 告 日 牛。 群 :「假,至也。 廟,至禰 先告於大廟, 愚謂: 而 畢 歸 特,特牛也。 而 至於祖、禰之廟 反齊車之主,然 祖下及 而

報反。」將出,宜乎社,造乎禰。《釋文》:「禷,音類。造,七將出,宜乎社,造乎禰。《釋文》:「禷,音類。造,七天子將出,類乎上帝,宜乎社,造乎禰。諸侯

鄭氏曰:「類、宜、造、皆祭名,其禮亡。」

歷至七 道 還 仍 載于齊車。今告出,先從卑起,然後至祖 誅殺 孔 王 先應反主 尊者之命 也。』皇氏申之云:『行必有 卑,不敢留尊者之命,至禰,不 祖、禰。今惟云禰者、《白虎通》云:『辭 者,造,至也,謂至父、祖之廟 上 主於地,又爲陰,而誅罰亦陰,故於社。 書》云『弗用命,戮于社』,是也。 及 帝 無 取 氏 惟 自 遷主 謂 内 告 封 日 廟 相 外 : 廟,前云『歸格祖、禰』,明 割,應載社 祭告天 「將出 祖廟故也。 則 朝、盟會、征伐之事也。 故 ,不告天地者,《白虎通》云: ,爲不敬也。 行。 不復告也。」」諸侯將 也。 若前一 謂 主,令誅伐得 巡守初 宜乎社者, 然出告天地、祖、禰 至祖,後 若還 出 主,無 則 也。 時 先 至 嫌 宜 巡行 也。 祖後 出 禰 不 則 出 此 不 造乎禰 也。 是留 得告 主命 方事 至 亦 出 謂 類 禰 從 告 社 祖 應 平.

禮,其詳不可得聞,要之劣於正祭與旅也 祖 帝,小宗伯、肆師掌之,則禮之隆殺著矣。」 觀 天,故從社始,亦 及載 祀天、旅上帝,而大宗伯掌之,類、造上 主也。」 載 陳 社 氏祥道 主 也。 曰 造乎禰 :「類、造之 亦 告

類 侯 正 言「誅殺」,非是。天子將出爲巡守, 將 禮而爲之也。 愚謂:凡禮之類 出爲 類乎上帝,就 朝會,疏兼言「征伐」,亦非 宜 南 ,求行事得宜也。 Œ 郊 禮而爲之者,謂之 而 告天,類郊 是。 則 祭之 疏 諸 專

天子無 德,以尊于天子。 事 與諸 侯 相見曰 朝,考禮、正刑、

天子 以 之常朝 用之刑,所脩之德,考之以 無事,謂無寇戎死 防 也。 其 也。 偏 **念孟** 枉,一之以範其乖 諸侯來 子》所謂 喪之事 朝, 「諸侯朝於天子 而 也。 以 訂 所 違 其是非 一,所以 朝,謂 行之禮 -,正之 Ė 尊 兀 述 事 所 時

> 乎侯國 失,職 先王所 職 之所以出於一也 」,是也。 事有 以 朝 整飭 覲 脩 蓋諸 則自諸侯而上質於王朝 廢,故巡守則自天子而 天下之具,而禮樂征伐之權 侯各治 其 國,政治 有 下 此 察 得

樂,則以鼗將之。《釋文》: 天子賜諸 侯樂,則以 柷 將之。 「柷,昌六反。 賜 伯、 鼗,音桃。」 子、 男

自擊。 禮器制度》,柷狀如漆筩,中有椎,將作樂 敔」、《詩》言「鞉磬 伯、子、男之命。」 大者於地,執其 節樂者。」 鄭氏曰:「將,謂執以致命。 侯之命。 先擊之。鼗如 大射》諸侯禮言「鼗倚於頌磬,西紘」,而 柷節 鼗節 孔氏曰:「凡與 曲之始,其 小鼓、長柄、旁有耳、摇之使 小者以 唱之終,其事狹,故 柷 愚謂:《書》言「合止 圉」,皆天子之樂也 致 命 事寬,故 於人。 人之物,置 柷、鼗皆所 以 按《漢 以 將 柷 將 諸 其 以

有以賜之,故此下三節皆言賜予諸侯之樂與?諸侯來朝,其有功德者,天子必侯之樂,其輕者但有鼗,故以將伯、子、男不見有柷,是樂之重者乃有柷,故以將諸

之事。

文》:「鈇,方於反,又音斧。 諸侯賜弓矢然後征,賜鈇鉞然後殺,賜 古字。』圭,今字。瓚,才旦反。」 者。 諸 瓚,故《周禮 衛 晉文雖受弓矢,不受鈇鉞,不得專殺,故執 爵 鄭氏曰: 也。」 爲 侯歸之於京師。 侯璋瓚。』按《玉人職》『大璋、中璋、邊 鬯。 賜鈇鉞,賜圭瓚,皆謂上公九命者。 「得其器乃敢 孔氏 未賜 ·小宗伯》注云:『天子圭瓚, 圭 曰:「賜弓矢,謂八命作牧 費, 圭,字又作『珪』、《説文》:『珪. 若 則資鬯於天子。 未 爲 賜 圭瓚,則 其 事。 圭 瓚, 圭 用 璋 鬯 費

,黄金勺,青金外,朱中,鼻寸,衡四寸」,

賜鈇 有秬 《詩》言「武王載斾,有虔秉鉞」、《書》言「武 薫。」 故《王 伯者也。 鄭 公者也,孔疏謂「賜弓矢者,爲八命之牧, 文侯、襄王賜晉文公,皆有弓矢而無鈇鉞 周宣王賜召穆公以圭瓚、秬鬯,平王賜晉 王左杖黄鉞」。 不以鬱和,直謂之鬯。既不得鬯,則用薰 釀秬黍爲酒,和以鬱金之草,謂之鬱 注又云:『有流前注。』此是圭瓚 又《明堂位》注云:『以大圭爲柄。』《玉人》 槃大五升,口徑八寸,下有槃口,徑一尺。』 三璋之勺,形如圭瓚。』又《典瑞》注:『瓚 注云: 鬯而 鉞、圭瓚者,爲九命之上公」,是也。 度記》云:『天子 愚謂:天子在軍,乃 『鼻, 召穆公則天子之三公加命爲上 無圭瓚、蓋文侯、文公皆命爲 勺 諸侯非受賜者,不得用也。 流 也。 凡 以 流 鬯, 用斧鉞, 皆 之形 諸 爲 龍 侯 鬯。 也。 故 侯 以

也。 又謂 用,《王度記》之言,未可 天子賜以秬鬯而用之,若晉文侯、文公是 未 弑 罪 得 -當殺 賜 、其君父,人人得而 而 諸侯之未賜 圭 誅之」,則 賜 前 瓚,不得爲鬯,故資鬯於天子,謂待 鈇 非亂賊若衛成公者耳。 鉞,然後鄰 非是。 秬鬯者,其灌未知何 誅之,不待賜鈇鉞 賜 國 鈇 據 臣 也 鉞 弑 然後殺,謂 君,子弑 若臣子 父者 也。 所 有

《釋文》:「辟,音璧。頖,音半。」左,大學在郊。天子曰辟廱,諸侯曰頖宫。天子命之教,然後爲學。小學在公宫南之

或, 郊。」 教,是諸侯 鄭氏曰:「學,所以教士之宫。 ,然後爲學者, :『百里之國,二十里之郊。 九 里之 王 氏 未有 安石 郊。 何也? 不命之教者。 曰:「天下不 Ŧi. 十里之國 曰 : 教 《尚 所謂 可 七十里之 不 , 三里之 可 書 命之 日 不 傳 無 資

下。 門直北 半水者,蓋東西門以 人之小學。《周禮 水 傳、鄭箋之説。 箋《詩》之説爲確。 注云:「辟,明也。 廱、頖宫,天子、諸侯大學之異名也 廱水之外, 圓 云:「水旋 學在郊,即 司王朝,凡國之貴遊子弟學焉」,是也。 謂:小學在公宮南之左,此 之天子,資之天子,道 《禮記》時,未見《毛詩傳》,當 詩‧魯頌》作「泮」,鄭云:「泮之言半也 東西 類之言頒也,所以 一百步,南北六十步。 道西,宫中有臺 丘 · 類 宫 如璧 如 《水 璧, 也 廱, 日 ·師氏》「居虎門之左 經注》曰: 朱子《 四方來觀者均也。」類 南通水,北 辟 廱,澤也。 德 領政教 和也。 ,高八十尺。 廱。」鄭云:「築土 所 詩集傳》亦 世 以 以毛 所以 子 「泮宫,在 也。」 臺西水南 《詩》毛 無也。」辟 與國子 也 傳 蓋 明 及 鄭 用 鄭 和 傳 大 所 高 毛 鄭 注 天 此 愚 子」至此,明朝覲巡守之事。 塾 文所謂 鄉之庠。 廱 左者爲小,以辟 小,以鄉之虞庠爲大。 各有大、小。 子、諸侯皆 其臺東亦當有水,蓋久而 小學者,皆於國之小學,其入大學,則在 兀 ,而遞升於州、黨之序,其入大學,則於 類宫。 白 所謂『思樂泮水』者。」此 「俊造」是也。 東 其俊異者乃升於國 士庶之子入小學者,皆於間 有 西 鄉學以間之塾,州、黨之序爲 或 六 學、鄉學,而 + 廱、頖宫爲大。 步 國學以在公宫南之 ○自「諸侯之於天 臺 池 堙 國學、鄉 咸 「學而教之,下 魯泮宫之制 塞 結 胄子之人 耳。 石 爲 〇天 學 之。 之 辟

於所征之地,受命於祖,受成於學。 天子將出 馮,馬 怕 反,又音百。」 征 一, 類 乎上帝,宜乎社 ·, 造 乎 《釋文》: 禰 满

鄭 氏 曰 「禡,師 祭也, 爲兵禱。 其 禮 亦

> 文》:「訊,本又作『誶」,音信。 或爲[國]。」 出 征 之祭, 也。 謀 而卜之也。 尤,或曰黄帝。」受命於祖,告於大 貉」,鄭注云:「祭造軍法者。 執 也。」 卜吉然後定謀,謀定然後行類、宜、造 受命於祖 有 而奉社主與遷 罪,反,釋奠 愚 受成於學,在大學之中定其 謂: 告 碼,《 祖 廟 于學,以 馘,古獲反。」○鄭注: 也 主以 周 受成 禮 行 訊 也 於學, 其 馘 肆 祖 神蓋 告。 師 之 定 馘 謀 廟 作 兵

出 席于阼,薦脯醢,三獻」。 祭,輕者釋幣,重者釋奠。《聘禮》使者 於先聖先師,而告之以克敵之事 獲當訊問者。 釋奠,設薦饌 乃至于禰,筵几于室,薦 師 之時,受成於學,故有 而酌奠,不迎尸也。訊,所生 馘,殺之而 此大夫釋奠之禮 割取其 脯 功 而 醢 反 觴 也。 ,則釋奠 左耳者。 酒 凡告 陳

禮》不云『獻愷於學』,皆文不具也。」 也。 樂獻于社。』此《記》不云『祖』及『社』,《 伯》『師還 合,謂合樂 天子 文王世子》曰:「凡釋奠者,必 曾子問》曰:「 天子、諸 將 出征」至此,明天子出 ,獻愷於祖」。 也。 侯 凡 釋 **草**,則 告 孔 用 氏 牲 曰:「《周 有 司馬職》云: 幣, 牲 反 牢 有合 ·, 則 亦 師 禮 如 有 祭 〇自 也。 · 宗 之。 慢慢 舞 告 周

遲 殺 也。 孔氏 賓客,三爲充君之庖。 下殺者 天子、諸侯 云乾者,謂作醢 。」又《車 射 曰:「乾豆,乾之以爲豆實。 髀 二爲賓客, 骼,死 也。 無 攻》傳 范 事,則歲 差遲。 甯 中 及臡,先乾其 云 云 殺 者也。 三田: 自 下殺 『上殺中心 《釋文》:「乾,音干。」 左膘 中腸 三爲 一爲乾豆,二 肉,是上殺 而 污 射之,達 ,死速。次 充君之庖, 豆 泡,死 非 脯 于 最 者 爲 而

> 守也。 《公羊》之學,故其爲説如 狩 ? 也。 未出 則四 杜氏 則此《記》之言之所自出 云: 三田,與《周禮》、《左傳》不合,惟《公羊傳 夏苗、秋獮、冬狩,是天子、諸侯皆歲 次賓客,尊神敬賓之義。」 于右艄,爲 右 大司馬》及《左傳》臧僖伯諫 」隅,爲 時之田之所以名也。 ,而《左傳》傳者尚 獮,殺也, 云:「蒐,擇 — 曰 春日苗 冬物畢 上殺。 乾豆,二日賓客,三日充君之庖。 下 ,秋曰蒐,冬曰狩。 .殺。」 以 成,獲則取 射 殺爲名,順 取 右耳 是有三等之殺。 不孕者。 本,次之。 少,作 也。 此 之,無 此言天子、諸侯 隱公,皆言春 愚謂 秋 蓋 苗,爲 是 氣 所 漢 諸侯曷爲必 篇者,本爲 也 射 擇 初《周禮 《周 先宗廟 苗 左髀,達 也。」 狩, 四 除 禮 田 蒐 此 韋 害

鄭氏曰:「不敬者,簡祭祀,略賓客。」無事而不田曰不敬,田不以禮曰暴天物。

孔

所 氏 圍』至『不覆巢』皆是也 生之物。 田 不 以 以 禮 禮 田 殺 者,則 傷 過 下文『天子不合 多 是 暴 害 天之

諸

侯

不掩

群。

則

下

大

車 綏 天子不合圍 掩,本又作『掩』。 車。 ,諸侯殺則下小綏,大夫殺則 但 止則百姓 云: 當爲『緌』。 鄭氏曰:「不合圍,不掩群,爲盡物也。 云 時 『大夫不掩群。』下,謂獘 是畿内諸侯爲天子大夫,故 秋冬三時 則抗之,已 韋 或 『天子發,抗大綏。 而 不合。 孔氏 君 田 得 春 曰:「天子四 獵。《釋文》:「合,如字,徐音閤 下, 綏,依注音矮,耳佳反。」 圍,圍亦不  $\mathbf{H}$ 殺 若諸侯惟春田 不 獵 謂 圍澤。」諸 止 獘之。 則 諸侯發,抗小綏。』 獘之。 合,故 仆於地 時 天子殺 佐 下《曲禮》云: 侯 田 不 止 車 獵 不 . 得 下 故《詩 也。 佐 掩 量 皆 ^ 驅 車。 曲 群者 了,其 得 逆之 初殺 禮 傳 韋 夏 綏 佐

音

也。 麾。 旄綏 染旄 獸之車止。」但夏時佐車 殺則 「驅 是 之綏」,是也。 失前禽」是也。 謂圍其三面而不合,《易》所謂「王用三 後大夫、士發」,是也。」 子殺然後諸侯殺,諸侯殺然後大夫殺。 時,佐車止 獵,此云『佐車 《詩傳》云『天子發然後諸 大 也。 5驅出 司 《大司馬》又云『夏車 綏然,故謂之綏。 爲 1 周禮 馬 佐 小綏,諸 黑色,注之竿首 禽獸。 **※** 云: 車, 則百姓 巾 則 以其可以指麾,故又謂之大 止則 大綏,天子田 侯 車 逆,逆要不得令走。』大夫 天子、諸 設 田 \*木 田 百 驅 獵所 獵 姓 路,「建 《明 逆之車。」 而 田 止,百姓 侯殺,未 以 獎』,注云:『 建之旌 侯發,諸侯發 無 愚謂 堂位》「夏 獵」,謂 此 旒 獵所建之旌 大麾 推之, 終 不 制制 以以 注 未 冬獵 止 以 合圍 得 后 則 佐 云 田 其 如 驅 然 故 天 大 之 驅 車 垂 田

綏 而 稍 小者也

以

月

老反。」 同 達反,又他 卵 後 獵 獺 人 祭 靡,本 魚 Ш 鳩 殺胎,不殀夭,不覆巢。 化爲 ,然後虞人入澤梁。 林 瞎反。 又作『麂』, 鷹, 昆 尉,音尉,一音鬱。 蟲 然 未 同 後 音迷。 蟄,不 設 罻 羅。 妖夭,上於表反,下烏 以 豺祭獸 零,本又作『苓』,音 火 《釋文》:「獺,徐 草 田,不靡,不 木零落, 然後 然 田 他

魚者。 鄭氏 + 覆 傷 然後虞人入澤梁 祭魚。』《孝經緯 而 豺 · 月 中 以敗 藏。 未 乃祭獸」、《夏 曰 : 成 也。 昆,明 也。 不靡,不卵, 物 也 取 是獺 孔氏 也 物必 》云『獸蟄伏, 殀, 謂 小 明蟲者 曰 : 順 歲再 不 正》十月『豺祭獸 斷 + 時 殺 -月時。 殺 「《月令》正月: 候 祭魚 胎,不殀 也。 一,得陽 也。 獺祭魚」,則 《月令》九月 少 梁,絶 而 此 長 夭 生,得 獺祭魚 日 者 水 夭。 『獺 則 重 陰 取

> 得火田 後至仲 也。」《 是 於是乎講眾、罶」,則虞人入澤梁在冬時 聞言之耳。 魚未必有二時,《月令》、《孝經緯》各據 春時特甚,其實 落之時。 虞》云『仲冬斬陽木,仲夏斬 此時官民 秋:『草木黄落』。 國語》里革 鳩 田 九月末、十月初 獵 化 爾雅 || 云: 一,《司 也。 春 爲 皆得 昆蟲未蟄,謂 總 鷹 《月令》二月『鷹化爲鳩』, 馬 《月令》季冬「命 取 云「古者大寒降、土蟄 職》云春『火 材 四 ^ 火 『鳥罟謂之羅。』《月令》季 説文》云: 木。 時 田 也。 其零落芟折則在 也。 皆然。」 若依 未十 然後田 不麛、不卵之等 -月時。 獘』,從十月 時 陰木』,不 漁 取 罻 愚謂: 一獵 師 者 白 發,水虞 捕 十月 始 上十月, 則《 獺祭 在 鳥 漁 則 姓 以 Ш 削 零 網 可

鳥」,原本誤作「鳥」,今據 《禮記 注 疏 》、《釋 文》改

0

## 禮記卷十三

其餘以一

再易、一易、不易通計之,而

據

其

出

國史館纂脩孫希旦集解賜進士及第翰林院編脩

## 王制第五之二

量,音諒。」
之通制國用,量入以爲出。《釋文》:「杪,亡小反。制國用。用地小大,視年之豐耗。以三十年級國用,必於歲之杪。五穀皆入,然後

山陵、沈斥、林麓、城郭、邑居之不爲田者,对,是也。杪、末也。歲末五穀皆入,财用」,是也。杪、末也。歲末五穀皆入,以用,是也。杪、末也。歲末五穀皆入,

之通 年之間,大約有閏月十三,足爲一年,故惟 於不足矣。 焉,則三十年之通,得有十年之蓄,而無 數,以制爲所出之數,而常留其四分之一 之豐凶通融 無常,故必以二者相參而制之。 賦之實地也。 之蓄,而言三十者,舉成數也。兩義皆通 有九年之蓄。』王肅以爲二十七年有九年 國用也。 一制國用者,預度三十年之所入,以 量人以爲出者,量每年所入之中 相 然地之小大有定,歲之豐凶 孔氏曰:「崔氏云:『三十 較,而酌用其中數,以 以三十年 制 患 爲

祭用數之仂。《釋文》:「仂音勒,又音力。」 未知孰是。」

記》云:『石有時而泐。』《考工記》又云『以一。」 孔氏曰:「仂是分散之名,故《考工鄭氏曰:「筭今年一歲經用之數,用其什

或 其 。 此 祭 圍 所 之 用 云『什 阞 亦什 捎 其 藪』, 」者,以 也。」 彼 注 民 税 阞 歲 謂 + 分之 則

祀,皆 愈。」 紼。 葬之前 越 鄭 雖 Ŧi. 天子、諸侯之喪,惟不祭宗廟 社 誠 哀死,故祭雖 地 尊, 一稷』云: 猶 祀 社 氏 至則忘哀, 年不祭,唯祭天地社稷,爲越 稷 躐 不尊於宗廟也 H 而有所不行,外事由文,故社稷五祀 不 范氏 也 屬 廢 吕 須 『不以卑廢尊 也。 氏 祭天 紼 越 化伯崇 紼, 祭而 大 至重 於 腦 天地 臨 輴 輴 地 此 日 誠 以備 一,亦有所不行。 蓋祭 日 車索。 社 紼 一、「人事之重 可言尊於宗廟 不 稷,不 但 而 一至則 鄭 内 往 火災。 也。」此 氏 事 祭所,故 不如不 敢 解 孔 用情,故宗廟 爾,郊、社 『唯 以 紼 氏 今既祭天 説 一,莫重 卑 而 曰:「未 祭 祭之爲 · 社 云 非 廢 行 天 稷 五 是。 事 地 而 於 越

祭。 其必 己。 隨其 情 敬 己私 者,百神是主。 衰 事 不 神皆祭也。 尊者言之,故云「唯祭天地社 而 非若子孫之於祖考,不得 社稷,大夫之於五祀,皆禮文之不可已者, (曾子 而 不 無文,又不可使人 Ĥ 可 祭。」五祀卑尚祭, 可 情 有所不安於此。 輕 而其 廢 喪 廢 問》曰: 其 禮 久 重 以臨祭,又不 ,以子孫哀戚之情,推祖考之心, 愚 祭。 祭也,必 廢其祭』,其 而 亦明矣。 謂 言「唯」者, 使 ^ 喪三 君薨 人 曾 天子之於天 攝 以 子 外事 五. 則餘 年 焉, 問 吉服 可 攝 而子 、説優 不祭,不親 以 事,必也 對宗 祀之祭不 期 疏 神可 由文者,有 釋 吉禮,故 謂「外 以 孫之於祖宗, 於 於鄭 衰 地、諸侯之於 私 廟尚 無 稷」,其 知。 而 親 喪 廢 氏 神 -行,既 吉服 未祭 久 其 祭。 矣。 此 不 不 祭 廢 或 實 文 得 可 舉 也 其 家 狥 知 其 内 以

作主。 之,非 也。 雖 殺之法。《大宗伯》「以饋食享先王」,鄭氏 祭者,皆使人攝之,而 遷廟之禮,亦必因練後 傳》晉葬悼公,「改服脩官,烝於曲沃 而皆飲之。」晉既烝於曲沃,而是冬穆叔言 寡 周禮 「始禘自饋 人君但用饋食之禮與? 君未禘祀」,❶此使人攝祭宗廟之證 《曾子問》所言「既 左傳》云:「凡君薨,卒哭 對其 •量人》:「凡宰祭,與鬱人受斝,歷 特祀於主,烝、當禘於廟。」又《左 餘 食始」,則在 外 神也。 殯 其禮皆有所殺焉。 給祭也。 既 而祭」,五祀 喪而 袝之後,宗 。凡在喪而 祭宗廟者, 而 祔 袝 廟 有 降 而 而 亦

喪用三年之仂。

潭除喪,其所用總爲三歲之仂也。謂:喪禮繁多,自始死含、襲,以迄於祥、鄭氏曰:「喪,大事,用三歲之什一。」 愚

大祀 事不 也。 有餘 之有 有 儉 鄭 而 之通數,而祭常用其仂,故豐年不奢,留 故曰暴。 而 不儉矣,而曰 喪 大祀、中祀、小祀,凶年於小祀或殺,而 用不給,由於用之無度 ,常用數之仂。」 氏曰:「暴猶 縣 於凶 祭之事爲大,且其 則 節 此制用豐凶相 未嘗有 祀 而 有餘,謂 儲蓄豐羨 也; 以 下 所 [X] 耗也。 牲, 「凶年不儉 儉 年不 財多 則豐 也 也,故曰 補之法也。 愚 浩猶 儉,資其 而 費爲繁,故此上 謂 國用 固 用 而 不奢 一,何 浩。 饒 不 不 物 不 也。 足 也? 盡 力 止於喪祭, 不足於 然 以三十 而 謂 , 由 傷 X 不 IXI 奢 蓋 歲 其 財 則 四 未 祭 豐 其 年 用 匱 不

● 「穆叔言」,原誤作「叔言言」,今據《左傳注疏》改

通,雖 或 之食,九年耕必有三年之食。以三十年之 三年之蓄 無 節 九年之蓄日 特以 有凶旱水溢,民無菜色,然後天子食, 日國 喪祭明 非 其國也。 不足,無六年之蓄 制 用之法。 三年耕必有一 日 急, 年 無

之蓄。 備,而 餘食。 也。 年 獨 年之蓄,則曰急。又少焉,而無三年之蓄, 故 則無以待意外之變,而國非其國矣。 三十年而 九 ·耕則 國 至之蓄者,三十年之通所用之餘財也。 雖有凶旱水溢,而民無食菜之饑色也。 少於此,謂之不足。又少焉,而 家之所蓄者如此,其 或 以三十年之通,則國與民皆有九年 其 有一年之餘食,九年耕則有三 有餘 、藏富 有九年之蓄者,乃制 儲,又可以行 於民者,既 在民 足 以 免,賙 者,亦必三 用之常 爲 凶 囏 然非 年之 一年之 無六 阨, 法

> 五月而 而 天子七日而殯,七月而葬。諸侯五 葬。 年, 樂。 病,則常時 謂既有三十年通制之規模,雖凶災而民不 氏 舉,鼎十有二,物皆有俎,以樂侑食。」 牲盛饌以食也。《周禮・膳夫》: 如 冢宰制國用」至此,明制國用之法。 鏞 此,然後天子之食,每 則 日 : 不然 葬。 雖 有 「此非謂早乾水溢 則有 大夫、士、庶人三日而 可以 備 前 所不安於是 日舉樂耳。 亦 贵 敢 Ħ 用 樂 也。 亦不廢 舉 若夫偶 乎?」〇 王 而 舉, 殯,三月 日而 侑之以 樂 值 日 謂 殯, 白 應 IXI 殺

日

舉以樂。

外姻 鄭氏 尊重,送終禮物多,許其申遂,故日月緩。 月,同盟至。 曰:『天子七月而 至。」 曰:「尊者舒,卑者速。《春 大夫三月,同位至。 孔氏 葬, 曰:「天子、諸侯,位既 同 軌 畢至。 士踰月, 諸 秋傳 侯五

則殯日 大夫、 其 者,以大夫與士名位既異,變文以示等差 死 傳 亂故而緩,於僖見無故而緩,於成見順禮 公」,是諸侯之五月也。諸侯五月而葬,自 年八月『公薨於路寢』,十二月『葬我君成 皆通數之也。文八年八月『天王崩』, 疏 遽,義許奪情,故日月促。]又孔氏《左 言『書順』者,欲以包群公之得失:於莊 是正禮,不假發傳,而『葬成公』之下傳特 二月『葬襄王』,是天子之七月也。 日 實月數同 月亦三月也。 發三者,則其餘皆 曰:「天子七月,諸侯五月者,死月葬月 而 後間二日而小斂,又間二日而 士禮數 數死 小斂,又間 也。」 日可知。 既 士與大夫不異,而 卑,送終物 一日而 愚謂:葬月連數死月, 可 五日 知 殯也。 也。 而 少,又 殯者,死後間 士踰 七日 成十八 職 別設文 月,通 殯 惟 而 九年 傳 也 見 殯 促

餘説已見《曲禮上》。

三年之喪,自天子達。

如字。 三年之喪爲父,父没爲母,爲祖父後者,爲 祖父母,爲長子,雖天子、諸侯之尊,不絶 成人縣封,葬不爲雨止,不封不樹。《釋文》: 庶人縣封,葬不爲雨止,不封不樹。《釋文》: 三縣共之喪爲父,父没爲母,爲祖父後者,爲

封,謂 止矣。 卑無 鄭氏 謂 得 非 葬,明日乃葬、《左氏》以爲禮、《穀梁》以 度 禮。 引縛 與其樹數。』則士以上乃 庶人葬不爲雨 飾 曰:「封,當爲『窆』。 聚土爲墳。 《春秋》葬敬嬴 徐 也。《周禮》曰:『以爵等爲丘封之 下 邈引《士喪禮》「稟車載蓑笠」,謂 · 棺。 雖 不封之,不樹之,又爲 雨 止,則自 猶 及定公,皆雨 葬,以其禮 懸窆者,至卑不 得 士以 封 樹。」 上皆爲 儀少。 不 克 ह्य 愚

以 子,大夫、士亦皆私臣、公有司之屬,而 千人,諸侯五百人,大夫三百人,若冒 之用者也。 笠,乃以 患於不供,何有冒 物既多,而其助葬者,天子、諸侯則皆其臣 雨 執紼之人,送葬之賓,不可以久稽,其不爲 行,其危甚矣。惟庶人卑賤,儀物既少,而 則廢」,況於葬乎。 「人君之張 其 止,蓋不得已焉爾。自大夫、士以上,儀 親 痁患乎? 死 者之物 設 《曾子問》「諸侯旅見天子, 當 周 柩車重大,天子執紼者 雨 載之魂 備 而 倉卒成禮,且疑 非 車, 也 非 稾 以 車 備 雨 生 載 於 無 蓑 而 雨

不貳 達 也。 王氏安石曰:「『喪不貳事』,當連『自 於庶 事 也。 事,自天子達於庶人。 愚謂:舊以「喪不貳事」屬上「庶 人』爲句。 金革無辟,上使之,非也,或 三年不貳 事、欲 其 一於 天子 制

> 喪從死者,祭從生者 非獨庶人也。 大夫、士既 喪,三年不從政,則大夫、士亦不貳事矣, 三年,則 節 ", 非 天子、諸 練 也。 而 其人君,既卒哭而從王 從 侯 君薨,百官總己以 君 固 事者,乃權制 不貳 事矣。 也 父母之 聽 冢 室

謂: 若喪祭,仍從死者之爵。」故《小記》云: 曰: 盧氏之説,而又謂「子孫無官爵者,用 祭,顯與《小記》、《雜記》相違。 也 少牢,卒哭成事、祔皆大牢。下大夫之虞 則不易牲。』又《雜記》云:『上大夫之虞也 夫而卒,而後其夫不爲大夫,而祔於其妻, 『士祔於大夫則易牲。』又云:『其妻爲大 鄭氏曰:「從死者,謂衣衾棺椁。」 特性、卒哭、成事、祔 盧植 盧氏 以祭爲吉祭,是也。 云:『從生者,謂除 皆 少 鄭氏 牢。」 服 孔 後 疏 以 吉祭 孔氏 死 既 爲 者 引 愚

夫禮矣,而可乎? 用士禮,父爲大夫,子爲庶人,喪祭反用大伸注説。果爾,則父爲大夫,子爲士,喪祭之禮,生者有爵,則從生者之法」,欲以曲

支子不祭。

放此。」 侯五 庶人祭於寢。《釋文》:「昭,常 天子七廟,三昭三穆,與 三廟,一 説已見《曲禮下》。 廟,二昭二穆,與大祖之廟 昭一穆,與大祖之廟而三。 大 祖之廟 遥 反,凡言『昭 而 五。 而 士一廟。 七。 大夫

大祖 謂始受封之君也。 也。二昭二穆,自 大宗子爲大夫者,若非大宗子,則 而 以 昭三穆,四親 曾祖 l,别子始爵者也。 大夫有 備 廟 廟 也。 高 與高祖之父、高祖之祖 祖以 昭一穆,祖 士,謂三等之士 下也。 大 大祖 祖 及 無 禰 大 廟 也。 謂 祖 也。

> 禮》『建國之神位,左宗廟』,則五廟皆在公 矣。」 朱子曰:「以諸 之,宗無數也。 其正法可常數者也。 卑,故自上以下,降殺以兩。天子七廟者, 寢。」●○劉歆曰:「德厚者流 爲士,得立祖、禰二廟」, 若適士則立二廟、《曾子問》疏 宫之東南矣。 大宗,大戊爲中宗,武丁爲高宗。 功德則宗之,不可預爲設數。 立廟,其奉先之處謂 室有 無逸》之戒、舉殷三宗以 在 東 北,二昭二穆以 西 廂 其制則孫 然則所以 曰 廟, 宗不在 之寢。《 無 次 毓 侯之廟言之、《 是也。 勸 勸 東 而 以 帝者之功德博 成 西 南,是也。 爲外爲都宫, 光,德薄者 此數中,荷 故殷大甲爲 王。 爾 廂 云「大宗子 庶 雅 有 周公爲 人不得 繇 室 是 日 周 流 日

「室」,原文誤作「堂」,今據《爾雅注疏》改。

尊之位 蓋 昭 列 北 室。 世 世 大 大 主 其 餘 昭 而 而 而 之君 之南 一之君 廟 遷 向 北 南 遷之也 四 牆 祖 二世祧則 則 而 者 之 凡 於北 字 之 廟 向 向 左 南 室 廟 居之。 廟,四 廟,始 則 四 居 爲 取其深遠,故謂之穆。 爲 中, 之。 群穆之入乎此 群昭之人乎此者,皆列於北 主 一,新主祔於其班之南 周 廟 南 昭 六 穆 四 焉。 在 向 ,右爲穆。 則惟 世之君居之。 封之君居之。 北 世 也。 世遷昭之北 本 穆之北 廟皆南向,各有門堂 者 廟 之後,每易 廟 大祖 大祖 親 取 之中 昭 盡 常 其 廟,三 之廟,百 東向 者 皆東向,及其給於 爲 給祭之位 向 則遷於大 明, 廟,六世祔昭之 ,皆列於南 昭,穆常 穆之 自 一世 世 昭 故謂 之 如 廟 世 之 蓋 而 南 南 北 而 不 君 則 群 廟之夾 之昭。 爲 遷 寢 廟 居 廟 廟之 廟之 牖 墉 爲 北 遷。 自 五. 室, 之。 最 爲 下 下

易,唯 之次, 廟,則 常在 尊 於曾之東 特設 未 其 也。 晉、應、韓爲武之穆,則雖其 考,成王稱武王爲昭 子孫之列亦以爲序。 昭 南 而《春秋傳》以管、蔡、郕、霍 穆之南 尊。 卑。 者 有 廟 考焉。 宗廟 位於 0 右,而外有以不失其序。 不遷,此 四時之給,則高祖 則凡已毁未毁之主,又畢 昭 必大給而 故 廟  $\equiv$ 不見穆,穆不見昭,而 但以 世 也 祖之西。 Ŧī. 與。 昭 祧 意 廟 所 左右爲 者 則 或 同 以祔必以班,尸必以孫, 祔 會於 Ŧī. 然則天子之廟 如 爲都宫 世 禰 則 此 考,則自其始祔已然 穆者 昭 之下無穆 若武王謂文王爲 遷穆之北 則 一室,然後 有 穆 則 高 一,而 不遷 時 既遠 爲文之昭,形、 昭常 之 而 内 不 河 上 廟, 在 ,穆者祔 制若 陳 序其 世自 而 有 以 無 在 穆 猶 特 以 昭 而 七 」, 其 左, 昭 設 各 爲 尊 穆 不 世 何 無 全 易 穆 卑 穆 袝 而 所 而 順

别

Ŧ.

王

大

祖

 $\pm$ 

日

皆且 穆之南 之説 宗,不在數中者,劉歆之説 其詳 之時,后稷爲大祖,而祖紺居昭之北廟,大 甚異者。 不同,然其位 之説已有不同矣。 而王,故三廟 季桃  $\Xi$ 紺 居 時 : 文 桃 也。 唐之文祖,虞之神宗,商之七世三宗, 爲 祧 ,則文王 今不可考。 穆之北 五廟。 廟 武 文王 王 廟,猶 但如諸儒之説,則武王初有天下 謂三昭三穆與大 於 季遷 王 西 廟,王季居 一親 遷 爲 不毁,與親 而祧者藏於大祖之廟。 遷 置遷次,宜 北 盡 獨周 而 mi īfii Ŧi. 從 謂 武 而 康 成 廟 桃,而 謂 王 Ŧ. Ŧ. 而 制猶 后 袝。 已。 昭之 之文世室,於是成 稷 廟 亦 祖而 以有功當宗,故 有可言,而 四 始封,文武受命 與諸 也。 自 至昭 至康 南 至 而 此 成 廟,文王 七、文武 七者,諸 雖其數之 侯之 以 王 王 王 上 時 時 時 至穆 廟 漢儒 一, 亦 則 則 居 爲 無 儒 則

藻棁 其 之制 也。 侯而殺其二,然其 歆,愚亦意其或然也。 之上,此爲少不 於三穆之上,至孝王而始立武世室於三 幸 商 復藏於大廟矣。 藏於文世 王袝 廟 武 王遷,昭 制 廟 ,即增立二廟於二昭二穆之上,以 於 王 、亞圉,如前遞遷,至懿王而始立文 不降 適士二廟, 東 親 而 ,猶大夫也。 複廟、重檐,諸侯有 則視 爲 北 盡 Ŧ 何 室,昭之祧者藏於武世室,而 七廟矣。 ,而謂之武 從桃,而 一袝 大夫而 也? 而 則 同 爲 如劉歆之説,周自武 日: 耳。 以 六廟矣。 曰 : 殺 視 自是之後,則穆之祧 大祖昭 世室,於是康王遷 其二,然其門堂寢 大 有功當宗,故 降也,天子之山 夫 廟之降殺以 大夫三廟,則 前代説者,多 不得爲者矣。 而殺其 穆之位 至共王時 一猶諸 别立 兩, 是 世 官 視 祀 王 穆 而 劉 昭 克 則 師 侯

有守祧 以不 夫之倉 苟 年立 魯周 與王 雖 至 異 然後可名爲宫,則其制有不 侯 以文武受命,親盡不祧,則不止於七廟矣。 外,即劉歆之説也。 韋玄成諸儒之説 由 廟制參《明堂位》、《穀梁傳》。」獨門堂寢室之合, 魯之 天子之廟 一哀公時 廟 命 之黝 武 、公廟爲大廟,魯公廟爲世室。 至成六 得 肅 則有 士 一 僧禮 而 楹 宫,至定元年立煬 八人,姜嫄之外,已有 爲二 以上,父子皆異 堊 尚未毁,并 降 不得 斲 説。 也。 止於七,魯人雖 ,然必周 礱, 桷, 盡 鄭謂 也。 大 士又 其 愚謂: 夫 有此 四 《周禮》作於周公,時 事生事存之心者,是 文武 王謂 有 不得 親 宫,生異宫而 宫,而 不 禮,而後魯僭之。 廟 天子七廟,鄭 在七廟之中,即 文武在七廟之 得 得 爲 而爲十廟。 僭,必不踰周 七廟 而 矣。 爲 桓、僖之廟 者 殺 前 傅霖曰: 耳。 矣。 死 其後 此 氏 蓋 不 大

言之,則自繼禰 玄之受重於高、曾者,當爲之服斬,除喪之 出 意」。 有 夫止 及二 者備 如 盡 制 後,可使不獲享一日之烝、嘗乎? 有功德者不止於二廟,既 之祖,其多少不可知。 世,與諸侯同,既非降殺以 更及乎高祖之父與祖 而 一於高 服 於服 此 止 而 數,而 ,不可不祭」,朱子謂 廟,則七廟且不備矣,而 於三廟,士止 過之矣。 蓋以服制言之,同高祖者爲四緦麻 而 祖者 如鄭氏之説,則三代之初,止 制之所及,極乎高 王者更及乎始祖之所自出 功德之祖又 有服,則 蓋 以上,至於繼高祖 報 於 本 高 追遠 廟, 祖 今七廟必以 必必 蓋德厚 必無 以二 無 祖 之意 「最得祭祀之本 而 兩之義,且 可乎? 以 而 程 不祭,況曾 廟 止,而 處之,倘 子謂 流 極 限之, 光 爲 以宗法 有 乎 一高 四小 功 功 祭 自 王 親 始 倘 德 德 者 祖

宗,皆 也。 矣。 侯三時皆給,大夫、士雖祭高、曾,然犆 則 禰,而以之祭高 廟以奉先,而可 宗,祖遷於上,宗易於下,宗未易則 不給,則 祭也如之何? 曰:就祖、禰之廟 何以别於諸侯之祭五世者也? 以 高、曾之必有祭,又何疑乎? 鄭引逸《中霤禮》:「祭五祀皆於廟。」 其 族 亦何 主 人 之所 高 患其 祖 、曾,又何不可之有? 宗 以祭外神,則 以 上僭乎? 也。 下之祭也。 族 人之 廟 尊 所 主於 而 然則 以 曰:諸 祖 祖 宗之 祭之 故 祖 然 而 其 遷 敬

嘗,冬日烝。《釋文》:「杓,餘若反。」 天子諸侯宗廟之祭,春曰礿,夏曰禘, 春 鄭氏曰:「此蓋夏、殷之祭名,周 也 烝嘗,于公先王。』 此周四 日 祠,夏曰 孔氏曰:「皇氏云:『初,薄也 禴。 **《詩**· 小雅》 時祭宗廟之名 曰:『禴 則改之: 秋日 祠

> 天子祭天地,諸侯祭社稷,大夫祭五祀。 配社 氏公彦曰"「鄭依《孝經緯》" 社者,五 鄭氏曰:「社稷、后土及 舊,故《魯春秋》書「魯禘」,皆時祭也。 進品物也。」」 也。 《白虎通》云:『新穀 物未成, 配稷 棄爲 不可 之總神。 祭,故改春夏祭名以辟之,而諸侯祭名仍 時 物雖未成,宜依 冬時物成者衆。 而 遍舉,稷者五穀之長,立稷以表神名。 而 堯時稷官,主稼穡之事,有功於民,死 食。 食,名爲田 祭品 句龍爲后土之官,有功於民,死 稷是原隰之神,宜五穀。 鮮 愚謂: 薄 正 時 也 也。 熟而嘗之。」烝者,衆 次第而進之。 」。』禘 孫炎云:『烝,進 周以天子有大禘之 田 者,第 正之神。」 愚謂: 也。 社祭五 嘗者 五穀 也, ± 賈 夏

<sup>●「</sup>第」上,據《禮記注疏》當有「次」字。

路 其養人之功尤大,故其位獨配 也 生: 大 原隰。」《小宗伯》「祭山 以 土 之總 其 門外之左,於五 后 方一, 曰 五土皆生物以養人,而 稷 Щ 神 配 林,日川澤,日 而不言「原隰」,蓋原隰之神即 食。 以 后 土 大 土爲獨尊 配 司 食。 徒 川、丘陵、墳衍,各 丘 \* 稷 一陵,曰 也。 「辨五 原隰 祭 社 原 墳 宜五穀, 隰 地 而 衍, 之神 之物 建 於 稷

諸 諸 天子祭天下名山 侯。 侯 祭 因 諸侯祭名山 國之在其 大川,五嶽視三公, 地 大川之在其地者。 而 無主後 者 四 瀆視

祭主者 鄭 俎 王 大 111 簋 先 在 氏 或 之 其 公 籩豆之數也 日 有 在 地,若魯人祭泰山 「視,視其牲器之數。 功德 其 愚 地 宜 謂 而 亨 無 視,謂 世祀,今絶 上公九獻,侯伯七獻 主 後 謂 ,晉人祭河是也 用 其 所 獻數,及其 無 因 祭名 後,爲之 之國,先 Ш 大

> 浸。 禮 蒲 鳩 獻 祀 乃祭之爾 王先公不必皆祭,必其有 參,唐人是因。」齊晏子對景公曰:『昔 商丘,主辰,商人是因。 後者,《左傳》子産對 武曰:「天子、諸侯祭因國之在 地 止於嶽瀆,嶽瀆乃其尤鉅者爾 「江、漢、睢、漳,楚之望 姑 辰 氏始居此地,季萴因之,有逢伯陵因之, 職 ,視諸侯者 祇 《爾雅 星,是祭因 氏因 不 灌 方氏》九州 之。」是也。」 \* -而 相 五. 以 土 國先公之事 梁山,晉 獻 瘞 封商丘 以 埋 皆 叔 降 有 其 也。」則名山 向 神 遷實沈於大夏,主 無 山 为 因 望 功德 愚 日 鎮, 也。」《左傳 謂: 則 也 閼 灌 : 視 而 『遷 有川 伯 故 大 地 無 上公者 故 也 閼 主後 國之先 大川 而 顧 澤,有 或 伯 無 氏 爽 周 主 不 於 炎

特。治,音治。」
天子植初,治禘,治嘗,治烝。《釋文》:「植,音

於

太

論

後袷。 爲常。 謂先二而後三。 袷大於禘,王肅謂 後,則鄭康成、高堂隆謂先三而後二,徐 秋冬物多禮盛 先君之主於祖 或祖 r, 特 祭二名,禮 再般祭,一禘一祫也。」 明明 祖 鄭氏之説曰:『魯禮,三年喪畢 袷之説,先儒聚訟 禘爲 也。 凡袷之歲,春一礿而已。 明年 〇 鄭 天子先袷 年春,禘於群廟。 或 殷祭。 禰 春 氏 禘 無 ,而不合食也。 物未 廟 ,則升群廟之主而合食於大 曰:「天子、諸侯之喪畢,合 於群 差降。 辨祭之大小,則鄭康 而後時祭,諸侯先時祭 而祭之,謂之袷。 禘大於給,賈逵、劉 魯禮,三年喪畢而 成, 廟 其 矛盾相攻,卒 久矣。 禮 自是以後,五 自是之後,五 林氏之奇曰 不 袷,合也。 盛,特 論年 周改夏 後因以 之先 而 無 歆 成 袷 祭 年 謂 貌 於 年 袷 定 謂 夏 而 年經 褅 爲 有 明 廟」。 補 禘 年 尊 而

礿,以

太

祖

而

犆

廟

廟

也

宣公八年皆有禘而云,愈繆矣。 經無『三年禘』文,何以知之? 未可以袷而袷,一惡也。 三年冬十二月薨,至文公二年喪制未 書,其書者皆亂常悖禮之事。 亂,魯之祭祀,皆妄舉也。《春秋》常 禘,并前爲五年禘也。」不知春秋時諸 是三年春禘,六年秋祫。 公薨,文公即位,二年秋八月,『大事於大 二年亦皆有袷。僖、宣二年有祫,則 愐 再 何耶? 可知。 春禘、雖無正文、約僖八年、宣八年 書『有事於太廟』,則是常祭也,而以 殷祭,一 大事,大給也。 給卑矣。 蓋以文公二年給,則知僖、 禘、祫之文不詳,所可知者, 褅 禘者,推始祖 袷。」 爲之説 是喪畢給於太祖也 躋僖公,二惡也。 是三年 僖公以三十 所自出之君 徒約僖公、 者曰:『僖 況宣公八 祫, 事 明 侯 八 畢 年 年 宣 皆

也。 疑。 其文,惟《公羊傳》言『五年而再殷祭』,大 也。 未毁 袷 袷也。三年一袷,五年再袷,猶天道三年 臣,而禘則功臣皆祭。』至禘、祫年月,經無 祭於武王之廟。』何休謂:『祫祭不及 以下,穆之遷主祭於文王之廟,昭之遷主 謂:『袷則毀主、未毀主合食於太廟 而 太王、王季以上遷主祭於后稷之廟,文武 『歲袷及壇、墠,禘及郊、宗、石室。』鄭康成 曰:『天子袷禘、袷嘗、袷烝。』此時祭之祫 曰: 『袷祭於祖則迎四廟之主』。《王制》 祭時之先後,則經 ,則天子、諸侯皆有之。 追祀之,此天子之禮,魯用 《公羊傳》曰:『毀廟之主,陳于太祖, 漢儒混禘、袷而并言之,馬融 廟之主,皆升合食于太祖。」此大給 楊氏復曰:「祫祭有二:《曾子問》 無所據,學者當闕其 至年數之久近, 之,僭 也 ",禘則 言 功 若

乎? 據此以 其小者爲夏祭,天子則祫禘,諸侯則一犆 禘 惟 謂: 禘有大小, 祫亦有大小。禘之大者, 之主,則禘與祫異。 禘其祖之所自出,而以其祖配,不兼 合食於太祖,則禘、祫無别矣。 烝』是也。 食於后稷、文武以下各祭於文武二祧之分 郊、宗、石室之分乎? 又何太王、王季合 自太祖以下皆合食於太祖,又何 給相去各三十月。』夫既混袷於禘,皆以 一袷者也。 『三年而袷,五年而禘。』徐邈則曰:『禘、 其祖之所自出,而以其祖配之」,是也。 閏 天子得行之、《大傳》曰「不王不禘、禘者 五 給祭則功臣皆與、《司勳》謂**『**祭於大 證禘、袷相因之説。 年再 誰謂給祭功臣不與乎?」 大給則天子、諸侯皆有之、《公 閨 也 ,於禘祭 大給兼群廟之主 何與 鄭康成則曰: ? 不知禘 壇、墠 漢儒 者 爲 與 則 廟 13

者

「謂以

之異也。

曰犆

E

1,謂以

爲合祭則

也。

遷廟之主而

合群廟之主

袷」,誤矣。

袷

氏乃以給爲大給,謂「夏、殷每歲三時皆大 者也。《王制》於禘則言夏祭, 烝之下,記者文便,非有義例也。 于太祖,未毁廟之主皆升,合食于太祖 礿、禘、嘗、烝皆爲特祭之名,離 於禘、嘗、烝之上,諸侯則言給於禘 而再殷祭。」是也。 其小者,則三時 於給則言三時之給,而未及大給 給祭而爲禘、嘗、烝也。 **植祭而爲礿也**。 廟之主合食於太廟,而 袷者,合祭之名。 祭於太廟,所祭有多寡,而 而祭於太廟,大給,合群廟 者,大袷 袷者,祭禮之别也。 且初、禘、烝、嘗者,祭 也。 袷禘、袷嘗、袷 毁 三時之袷 天子 而未及 不 廟之主 給於締 鄭氏乃 及 則言 犆 毁 五五 名 及 鄭 大 之 烝 礿 其 廟 陳 嘗、烝 禘也。 於武宫」,定八年「從祀先公」,傳曰「禘於 者二:昭十五年「有 禘、袷之歲月,此其所以誤也。 又礿乎? 若謂袷禘爲袷而又禘,亦可謂犆礿爲犆而 祫」,則尤繆之甚者。 僖公」,是也。 於經者二:閔二年「吉禘於莊公」,僖 已詳矣。蓋《春秋》所書「魯禘」,皆夏祭 至其據魯禮以推周禮之失,則林氏之説 既爲祫 而後時祭,諸侯言給於下者,先時祭 禘於太廟」,是也。經不言禘而傳 治禘、治嘗、治烝」之文,與「犆礿」一例 春秋》魯禘皆時祭,而非 而二之,謂 鄭 祭,又爲犆祭,豈 氏 無 不 論其他,於文義亦自不通 經所不書而 知 大神 「天子言給於上者,先 事於武宫」,傳 祭不 不及

禘。

年

祭,升群

其

煩

瀆

若

此

欲數,一時之間

而

袷

羊

-傳》曰

「大事

見於傳者一:

之

固

大祭,而

據以

推

魯之禘

見

以

爲

禘

年

日一

褅

群

廟,

又不

知

褅 有袷 莊公與焉,故得祔哀 廟,此時祭之犆禘,非大禘也。 昭 廟者,嘗、烝皆給,必於太廟 於嘗、烝皆不書所祭之廟,禘必書所祭之 則禘致夫人之非大禘,尤可見矣。 年「禘致夫人」,始以哀姜祔 大廟」,宣八年「有事於大廟」, 經於文二年大祫書「大事」。 僖八年「禘於 昭十五年、二十五 大禘祭始祖之所自出於太廟,而閔二年、 「大」,此時祭之袷禘,非大禘也。 不言禘 :宣八年夏六月「有事 ,故必别而書之。 廟者,犆 禮也。」則天子大禘之禮,魯蓋僭用 五年 而 以 傳「禘於襄公」, 褅 時 也。 推 年、定八年之禘,止祭群 之,可 《禮 姜,大禘不及群 於太、 運》曰: 於大廟」,是也 以 是也。 廟 可 廟 知 知。 者 禘大於袷, 也。 其 ,袷禘也。 「魯之郊 皆不 且僖 《春秋》 爲 褅有犆 經傳 袷褅 褅 廟 者 皆

之矣。 祭之祖 月,則給祭五年再行,《公羊》所謂「五年而 之以釋《論語》,自是禘、祫之大小,與其 郊之説謬,而 自鄭氏誤以《大傳》之禘爲祭感生帝,於是 祭群主,而并及於 始祖所出之帝,而以始祖配之,祫祭則 傳》及《周禮 祭之年,四曰祭之月。 然以《大傳》《公羊 禘」,皆時祭而 袷之説亦混。 給小,禘止於天子,祫逮於諸侯,禘 大袷之説,先儒聚訟 袷之歲月者,其説可不攻而破也。 〇大禘 祭不書, 曰二祭之大小,二曰所祭之多寡,三曰 皆坦 然不見於《春秋》之所書、《春秋 因 事 •司勳》之所言考之,則 一然而 禘之説亦晦。 乃 至趙伯循始正之,而 非大祭,則鄭 書也。 無疑義矣。 、功臣。 一,其所 **^** 其 義 春 論 諦之説 所據 秋 若其 大約 本自明白 **\** 所 以 朱子 祭之年 有 書 晦,而 惟 禘 四 所 常常 祭

之月: 令司 侯 五 欲 以 言 + 再殷祭」也 於嘗,辟天子之禮也。 大給因秋嘗行之也。 言「大嘗禘」,又曰「莫重於嘗禘」、《中庸 烝,則天子之大給因冬烝行之也。 加 数数故 秋。 月」, 礿 年 」,此所謂嘗必大祫之祭也。 大禘因其 禘嘗之義」,以嘗配禘,而又謂之「大 `勳》「有功者祭於大烝」, 烝祭謂之大 再 則 大禘以夏,大祫,天子以 也。 遇大祭之月,則時祭不復舉,祭不 行推之,亦必不每歲行之可知 不 此 禘,禘則不嘗,嘗則不烝,烝 雖 惟大禘之年不可考,然以 名,則禘必於夏行之可 於 張 經 純 傳 謂 無 禘 諸侯大袷不於烝 大禘大袷皆因 明 以夏 文,然禘 四 月 是諸 冬, 本夏 洽 《祭統 知 諸 矣。 袷祭 侯之 以冬 時 也 則 侯 祭 而

鄭氏曰:「虞、夏之制,諸侯歲朝,廢一時

不礿

諸

乎? 禘。 愚謂 來朝 后四 禮則不書,非本 歷 非歲朝也。 也。《春秋》所書「魯祭」,皆譏也。 降於天子止三祭,豈大夫、士又降於諸 上 之祭,可使冢宰攝 言「夏礿、秋嘗、冬烝」,皆讀《春秋》而 侯歲廢一時之祭,而《明堂位》於魯祭 春秋》但書「禘、嘗、烝」 一,此必宗廟之祭有鬱鬯之灌 人受斝歷 攝 朝」,謂 西方諸 作是篇者,本傳公羊《春秋》之學,見 廢烝。 祭,何 孔 歲四祭,上下之達禮 氏 《周禮 侯秋來朝 四 日 而皆飲之。」量 以 東方諸侯春來 服 遂 無 「南方諸 分四年來朝,虞、夏諸 廢 春祭也。 祭, 量人》: ,廢嘗 則諸 時 一而無 之祭乎 侯 侯 人 《舜典 朝,廢 夏 春祭,故謂 「凡宰祭, 朝覲 與 者 也。 北 來 鬱 也。 方 朝 常祭 礿。 人飲斝 》言「群 若諸 諸 亦 誤 亦 闕 侯 與 者 旧 得 侯 夏 侯

降於丟子也。若大夫、士四時皆犆,又遠禘一犆一袷,謂一歲犆祭,一歲祫祭,所以諸侯礿犆,禘一犆一祫,謂一歲

天子之土,听祭者畿内之也祇也。 者卖之「大,音泰。少,詩照反。」 天子社稷皆大牢,諸侯社稷皆少牢。《釋文》:

祭主之。 故其禮有尊卑。若天下之地祇,則北郊之社,所祭者國内之地祇也。所載有廣狹,天子之社,所祭者畿内之地祇也。諸侯之

大夫、士宗廟之祭,有田 《月令》四月『以彘嘗麥,先薦 鄭氏曰:「有田 氏 用羔,所謂『羔豚而祭,百官皆足』。」 時,薦以仲月。 士喪禮》: 『有薦新,如朔奠。』大斂、小斂 曰 : 月令》天子祭 者既祭,又薦新。 士薦牲用特豚,大夫以 則 廟,又 祭,無 田 寢 有薦新, 則 廟 祭以 薦 又 故 首 孔 1

徒因田 許, 曰: 薦猶獻: 也。」 《晏子春秋》云:「自天子至士,皆祭以 孔氏謂「《周禮》四仲祭,因田 冬狩田,獻禽以享烝,則人君祭以 時。」然《周禮》仲夏苗田 尸,大略如《聘禮》使者反釋奠之禮而 者稷饋,稷饋者無尸 故 新 以 簿正祭器 有黍稷,而薦則惟饋稷,祭有尸,而薦 正祭」,非也。 )鄭氏云「祭以首時,薦以仲月」,孔疏 特性, 用 也。 特豚。 獻禽也。 也。 愚謂:無田 士祭用特性,薦宜貶 「唯君用鮮。」魯人獵 而云『薦新』,是有田者既祭又薦 。《大戴禮 是人 大夫祭用少牢,薦 鄭豐卷將祭, 大夫、士必助君祭,乃可 君 四時之田 ,謂失位而無田 ,無尸者厭也。」蓋 天圓》篇云: ,獻禽以享礿,仲 降,不用成 皆以 獵 較 請 而 田,子産 而 仲月矣。 獻禽,非 則 孔 「無 禄也。 用羔 子先 則 引 無 禄

旧

庶

人

不

得

用

犢靡

故

泰以豚

則大夫、士之祭有至於季月者矣。自祭家廟。人君卜祭,或用仲月之下旬,

卵,麥以魚,黍以豚,稻以鴈。 庶人春薦韭,夏薦麥,秋薦黍,冬薦稻。 韭以

乾魚 時爲 成 魚 落 魚 故 犢麛」,鄭云:「羔豚,物生 熟,黍秋熟,稻冬熟。 詩》言「四之日其蚤、獻羔 而 而 羽 韭以卵。 薄,其 也。 性定。」鱐即乾魚 」,鄭云:「腒鱐,暵熱而 曰:「庶人無常牲、取 充。」蓋 以鴈。 愚謂:春,穀未 周 時 一 羔 豚 、 犢 春祭名礿,庶人春薦,亦視三 《庖人》又云「春行羔豚,秋 禮 然 也。 庖 麛 夏不 人》「夏行腒 羽 春物未成而 ,於春秋 成 即鴈 取 而 與新物相宜 而 祭 魚鱉,此 肥 乾 也。 韭 韭 時 可 皆 鱅,冬行 犢靡,物 卵易得, 魚鴈,水 故麥以 食, 充 魚 肥 夏 謂 故 而

牛角尺。《釋文》:「繭,字又作「蠒」,公典反。」祭天地之牛角繭栗,宗廟之牛角握,賓客之

諸侯 不殺犬豕,庶人無故不食珍。 尺。此禮之以 地 栗,謂牛 鄭 地之牲用犢,貴 氏 無故不殺牛,大夫無故不殺羊,士 ,故牛角握。 티 : 角初 握,謂 出 小爲貴者 賓客又卑於宗廟,故 ,若蠶繭、栗實然也 誠之意也。 長 不出 膚。」 宗廟 愚 卑於天 謂 無 4 祭天 故 角

鄭氏 常食 故 牲,故無故不殺羊。 大夫、士老者得 之,未知是否。八十常珍,珍爲養老之物, 珍用八物」,鄭氏以《内則》淳熬、淳毋等當 食止少牢,故無故不殺牛。 不殺犬豕。 ,若庶人則無故 曰:「故,謂祭饗。」 珍之物未詳。 食之,但未至八 不得食也 士朔食止特豚 愚謂: 大夫朔食 《膳夫》云「王 十則 珍非祭祀 諸 故 不 止 侯 無 朔

「無故不食珍」。「無故不食珍」者,蓋見養孝之珍具」,是也。非是則不得食,故曰於學,則有珍物,《文王世子》「適饌省醴,享燕所用,而曰「無故不食珍」者,蓋見養

古者公田

藉

而

不税

物。 鄭氏 此 愚 常安而 葉氏 牛,大夫祭以少牢,而無故不殺羊,即 牲,祭牲也。 義當從葉氏。 而 庶羞 謂: 厚於事先也。 ,明天子以下喪葬祭祀之法 一夢得 曰:「祭以羊,則不用牛肉爲羞。」 燕衣常用而踰祭服 不 注 踰 ·踰牲」也。 義 EI: 廟,嫌於享親。故禮皆不與。」 固 諸侯祭以大牢,而無故不殺 「庶羞常薦 善,然以下二句例之,則其 庶羞,謂 白自 此三者皆言薄於 「天子七日 生人常食之羞饌 ,嫌於事神。 而 踰 牲, 而 嫌 殯」至 自 寢所 於備 所 謂

> 之制 譏。 鄭氏 之文。《公羊傳》曰:「初稅 公田,借八家之力以治公田,美惡取於此, 惡取於此,不稅民之所自 而不税民之私田。」 曰:「一井之中,凡有九夫,中央一夫以 而藉」。 何譏爾? 也。 ○自此以下至「墓地不請」,皆陳 曰:「藉之言借也。 蓋自税畝之法行,則 譏始履 愚謂: 畝而 借 民· 治 税也。」「古者什 此約《公羊傳》 畝,何以書? 力治公田,美 也。」 藉 而 復税 孔 氏

其物。市,貿易之所也。」鄭氏曰:「廛,市物邸舍也。市廛而不税,

税其舍不税

關

譏

而

不

征

異言。征亦税也。」 賈氏公彦曰:「王畿鄭氏曰:「關,界上之門。譏,譏異服,識

關。 千 之人,而不税其貨物之往來者也 惟界上有之。 之關」,疏云: 關 里 主 齊於竟内更置關,不與常禮 則 城 十二關。 在 譏 中, 「國之正法,竟界之上 而 面 不征,謂譏 有 愚謂:《左 五. 百 里。 察異言 一傳》「 界首 同。 異 乃 是 介 面 服 關 有 偪 置

林、麓、川、澤以 愚謂: 鄭氏 征 征 日 林」,獺祭魚,然後虞 不禁者,與民 梁傳》:『林屬於山 云"「竹木曰林 N N 「,澤梁無禁。」 然考之 《周 一。」又曰:「文王之治岐也,關 、荒、札、 市廛 日: 以時 「麓,山 而 喪 入者,「草木零落,然後入山 時 不 共 注 征 入而 則 財 足也。」 市 法 不不 瀆曰川,水 爲麓。』鄭注《大司徒》 不禁, 無征 而 障禁也。 人入澤梁」,是也。 不廛。 一而作 禮 孔氏曰:「《穀 布。」《司 鍾 司 鬍 市 ○《孟子》 日 市 譏 譏 澤。」 **※**云: 而 而 關 不 不

> 鄭 本未 之時,隨時 征,乃文王治岐 救一時之急也。 與《孟子》不同,蓋《周禮》所言者常法也。 之賦以待王之膳服,山澤之賦以待 禁」、《澤虞》「掌國澤之政令,爲之厲禁」, 鬍 廛 已甚,故孟 文王治岐之政,行於商紂苛虐之時,所以 則林麓川澤有禁。《大宰》九職,「八曰 市之賦,九日山 云:「司貨 氏 一、凡貨不 市有征。 八見《周 以爲殷法、非也。」 賄之出 制宜 禮》,其 子亦欲以此法行之。 出於關者、舉其貨 **企**山 一, 所 時事 澤之賦」。❶ 虞》「物爲之厲,而 入者,掌其治禁,與其 《所言即本之《孟子》,而 朱子云:「關 以不同也。 《周禮》乃 《大府》「關 (,罰其 作《記》者 成 戰 市機 或 爲之守 周 喪紀」, 人。 民 大 而 備 影 則 木 市 征

0

乍「\」。「職」,據《周禮注疏》當作「賦」,「八」當作「七」,「九」當

八〇

皆

夫圭田無征。

之也 使八家出什一之税,故陳古 收,既入於卿大夫之家,而 田 中  $\mathbb{H}$ 以 子 之人。若圭 白 主、土田 某 者,入於有 奉祭祀 一夫爲公田,八家耕之,而 畝 圭 爲 蓋自 爲 夫 五十畝。」井田之法,九夫爲井 也。 而  $\mathbf{H}$ 哀薦之。」圭田 圭, 周 圭 《孟子》曰:「卿以下必有 末税 ,則九夫之中,其 田 潔 者之家, 也 畝之法 士虞》 在田禄之外, 或 制 而 行, 家 君 或 如 記 圭田 一夫爲 又履 取 家 此 云: 其 之所 畝 復 夫 征 圭 孝 而 圭

用民之力,歲不過三日。

孔 旬 (周禮 用二 不 氏曰:「用民之力,謂使民治 得 過 日 均人》云:『 無 日 年旬 世 用 豐 日 年 旬 一年歲不 用 城 日 郭 同, **中** 道 渠。 雖

 $\mathbf{H}$ 

里

不

粥

墓

地

不

請。《釋文》:

粥,

音

育,

後

别井二 之 ? 鄭氏 其 畝 爲 竈 也 息勞守畝之所,不占公田二畝 郊之外,必使遠棄 界之意。 去二十畝,止存 聚居也。」 之居亦二畝半,廬則各在其 也 中。 處, 」○《穀梁傳》 ,八家分之,得二畝 蔥 廬舍。」趙氏《孟 請, 非皆取焉。」班 所謂 取 農民 十畝,以足百 於便農功而已。」其説似是 求 「皆受於公,民不得 一而彭 而又以 廬者 也。」《周 所居,必是平 Ш 一、蓋 八十畝,則制 邑處農民,亦有 Ĕ : 季氏非之,謂:「公田 田 子注》云"「公田二十 古 就 禮 疇,徙 畝之數,失先王 云: 「古者公田 半  $\mathbf{H}$ 学注 中 以 ·原, 「以公田二十畝 入國邑,人誰 苫 爲 曰:「里, 禄之時 田 私 小 另以 廬 半, 中, 也。 茅 元便。 舍。 爲 舍 而 Ŧi. 而 而 居,井 粥 邑 畝 以 正 當 邑 城 實 滴 中 邑 非 爲 經 則 居 賣 當 爲 遠 割

《孟子》言「耕者九一」,此於公田 不取 於國 則十 虚 計之之虚 於經界乎? 樹焉,果蓏植焉,車牛息焉,田器藏焉,禾 之日舉趾,以至於秋成,皆處於廬,且桑麻 文》云:「廬,寄也。春夏居,秋冬去。」《月 如季氏之説,所謂「苫小茅舍」者,亦不 稼納焉。 令》孟夏「令民勉作,毋休於都」,則民自四 人,則有遠郊之邑,曷嘗使之棄田疇 郊以至於五百里之縣,隨處有之。 也 一」,此於公田 數則公田 於公田 室,大則千室,或 中哉! 邑者,人之所聚處,猶今之村落然,小 若苫小茅舍, 豈足以 數 爲百畝 ,雖不占二畝半,亦何能 也。 蓋計地之法有虚數,有實數。 《詩》言:「中 除 廬舍計之之實數也。 又言「貢、助、徹、皆什 圭 有城,或無城,自 田 爲五十畝。 田 有 容哉! 中并廬 廬 遠郊之 計 而 且 實 舍 妨 能 説 徙 近

民」爲句。

司空執 度度地」爲句、「居民」下屬、今以「司空執度」爲句、「度地居 慮反。 壯者之食。《釋文》:「度度,上如字,下大洛反。 地 者藉 遠近,興 度地居民之事,而以此發其端 + 數則百畝者 畝 任,而鴆反。 度,度地居民,山 而不稅」至此,歷陳古制,蓋將言司 初未嘗割他 事任力。 正 食壯,音嗣,又如字。」○舊以 爲 八十畝,五十畝 凡使民,任老者之事,食 井以 Ш 足之也。 沮澤,時 也 者 四 ○自「古 止 司 時 沮,將 爲 空 兀

尺也。 鄭氏 謂 空執丈尺之度,以居處於民,觀 者之食,寬其力,饒其食。」 沮,謂萊沛。 築邑、廬、宿、 ,沮澤浸潤之處,又當以 曰:「司空,冬官卿掌邦事者。度,丈 Ш JII 沮澤,時四 量地 市 遠近 也。 制 任老者之事,食壯 時時 ,觀寒煖燥 邑井之處。 孔氏曰: 時 候此 Щ 川高 四 時, 事 溼

政 任老者之事,寬其功程,食壯者之食,優其 役事,任民力,而築爲 氣 宜 知 廩給,此又承「興事任力」,而言其寬恤之 處,此皆度地之事 也。 ,沮澤有 候寒煖之異,量遠近以定其廬井邑居 其 寒 煖 水 泉灌 愚 謂 也。 溉 之利 山 城 度地 III 郭宫室以 候 有 既 陰 兀 定,然後 陽 時 以 向 居 驗 背 之。 興 之 其 之

易其 Ŧī. 制,民生其 凡居民材,必 ,胡卧反,下『和味』同 味異 俗 1,齊其 和,器 八間者 因天 政 械 異俗 異 不 易 制 地寒煖燥溼。 其宜。《釋文》: 衣服 ,剛柔、輕重、遲速 異宜。 廣谷大川 脩其 「齊,才細反。 (教,不 異 齊 異

爲。 材 者,廣川大谷,風 民材質之所宜 謂材質。 居民者必各因天地寒煖燥溼之異 寒煖者天之爲,燥 而 氣 居 之也 間隔,形勢懸殊,背陽 廣谷大川異 溼 者 地 視視 制 之

者寒, 也。 生。不易其俗,不易其宜者,俗各有 器,謂用器。 鹹,各有偏嗜,故其 之地不同,而俗因之而異,即 各自爲制度然。 宜裘,地煖則宜葛。 廬,胡無弓車」之類。 利直庇,柔 之屬乎陽者也,柔、重、遲,質之屬乎陰者 互言之也。 七教,所以正民德。 「不火食」,「不粒 衣羽毛」之等,則異宜之甚 行山者欲侔,行澤者欲杼」、《車人》「堅 異 (和」「異制」「異宜」是也。 齊,分量也。 向 陽 者煖 地 居之因其材,治之隨其俗,此 械,謂兵器。 利 句 民生其間者異俗者,所生 居 食」, 異味者,謂酸、苦、辛、 庇」,及「燕無 調 高 政,謂八政,所以厚民 下文言「被髮文身」, 衣服異宜者,地 和 者 則 不 燥 異 異制,若《輪人》 同。 和之甚者 者 居 剛、輕、速,質 下文「異齊」 也。 下者溼 若下文言 函,秦 所宜 教, 寒則 也 無 地

被

衣皮,有不粒食者矣。

北方曰狄,衣羽

東

方

日

夷,被髮文身,有不火食者矣。

南方

鑾

雕

題

一交趾,有不火食者矣。

西方

臼戎,

司徒》「因此五物者民之常,而施十有二教聖人之政教,所以不强民而民樂從。《大

《釋文》:「推,吐雷反。」中國、戎夷、五方之民,皆有性也,不可推移。

焉」,亦此

義

也

文》:「被,皮義反。雕,本又作『彫』。

衣,於既反。」

狄,皆有安居、和味、

宜服、

利

用、備

毛穴居,有

不

粒

食者矣。

中

或、

夷、

戎、

戎。 邨 剛 異者言之也。 中 蠻、戎、狄也。不言蠻狄者,文略 或 鄭 七戎六狄,謂之四海。」五方,謂 重、遲 ·國,外舉四 氏 勁,南方柔弱是也。此一節申上「剛柔、 謂緩服 夷,九 曰:「地 速 異 夷 以 也。 齊」之義 海,不及要荒者,舉其俗 内方三千里之地 氣 性,質也。 使之然也。」 《爾雅》曰:「九夷 也 各有性,若北方 中國 也。 愚 也。 戎,七 謂 與 内舉 之尤 夷、 中

額也。 之害」。 舜。 鄭氏 西方 卧 書 居 故穴居。 正 南方俱近於海,故俱文身。 氏曰:「文身,謂 氣寒,少五穀。 Ŧī. ,所和之味,所宜之服,所利之用,所 北多羊,故衣毛。 穀 時 •地理志》云越俗『斷髮文身,以避 無絲 不火食,地氣煖,不爲害。 故 頭 曰:「交趾 嚮 謂 故刻其肌,以丹青涅之。 不粒 中國與夷、蠻、戎、狄各有所安之 外,而足嚮内相交,故曰『交趾 以 麻, 丹青雕刻其額。 惟食 食。 其 ,足相鄉,浴則 以 事 東 禽獸,故衣皮;氣寒少 凝寒至盛,林木又少, 丹青文飾 雖異,各自足。」 北 方多鳥,故 雕 趾 刻 其身。 不粒 同 一、足也。 ]1[ 也。 以 衣羽。 食,地 東方 卧 蛟 ^ 題, 漢 孔 鑾 則

明。 璞云: 海虞衡 之器 交 不 安 得 出 其人形必 中。 爲 自室之。 地 地 或傳安南 云: 全南 起。」《 趾 其 可 南定 簡 而 『夷 攀躋。 范氏 狄者 慢。 地 出 廣,而欲以一山當之,可乎? 地 其 **『**脛 念志》曰 縣 乃 者 山 事 人物 漢、 小異。 口,辟 以爲其形必有異,是也 有 足 戎者,兇也。 蠻者,慢 無 腳 海 雖 播 中 愚 曲 也。 唐 經》亦言『交脛國 節 :「『交趾』與『雕題』並言 異 也。 詭 有 流 調: 戾相交。』故謂之交趾。 郡 無骨,身有毛,卧者更扶 《交州記》云:『交趾之人 怪 土 Ш 各自 其行 縣 也。 東 一、不與 ,環數百里,皆 交趾 田,惟一竅 ,其人百骸 方人 充 邪辟。」 斬 君 足 之 外通 伐 臣 好 也 説 殺 司 生 人交脛」,郭 可人,而 111 一,萬 與 生,不得 注 疑 如 華 范氏《 風 而 疏 物 蓋 然 此 鐵 無 俗 古時 交趾 殊 觗 異。 韋 通 産 不 古 常 始 則 其 極 觸

方曰

譯。

《釋文》:

「鞮,丁兮反。」

其欲: 五方之民,言語不通,嗜欲不同。 體遂 器用 名。 交趾 異 和」三句之義 東方日寄,南方日象 變。 其後 也。 之人 器,戎 漸 此乃事 其 染華風 足 器也。 也 趾 理之常,不足 必 與 與 此 中 華 或 不 西 節 方曰 通 同 申 達 怪 婚 故 上五五 其 也。 嫁 狄 以 鞮 志 故 此 用, 味 北 通 爲

譯,陳 鞮,知 惡殊 傳 氏曰 鄭氏 四者、周 之言知也。今冀部有言『狄鞮』者。」 人,曉達五 寄 别,故 外内 日 也 也 「五方水土各異,故言 -: 「皆俗間之名,依 禮》總謂 謂 言 言 方之志,通達五方之欲。 嗜欲 傳 陳 語 説 通 不 外 夷 象, 之「象胥」,故鄭氏以此 同。 狄之語 内之言 謂 帝 放 王 其 象 與 立 語 事 外 中 此 類 不 愚 内 或 傳 耳。 謂 寄,謂 通 之言。 相 語 知。 此 之 好 孔

以

民

氣

和

樂

興

於

禮

義

而

尊

君

親上之心

皆

有

以

自

遂其生,而

得以

安居

而樂業。

節

爲俗間之名。 《周 禮》有鞮 鞻氏,掌 四 夷之

凡居民,量 舞。 狄 鞮 地 蓋 以 亦 制 以 邑, 其 度 服 地 名之與? 以居民。 地、邑、

興學。 時,民 民居,必參相 其居民 者制 其 稱 地 宜 也 量 民 也, 寡 地 【咸安其 則民 《釋文》:「度,大洛反。 使之以農隙,故 度地 也 其 以 而 邑 宜 制 邑 無 足以 也,民居也,三者大小衆寡必皆相 多 以 邑者,地之形勢廣 民 游 居 (居,樂· 得 多 ,地狹則 居民者,地 宜 民。 耕 也。 則邑 大,地 其地 限 事 無曠 宜大、民 勸 事 之 可耕 而 狹 參,七南反。 得 以 功,尊君親 Ĩ, 無 廣 者 其 禮 曠 之田 則 無游民 制 時。 制 少則 + 可 狹不同,地 其 一,地 耕之田 少,其居民 、邑居 樂,音洛。」 故 如 邑宜 上,然後 食節事 食 足 此 則 以 宜 有 小。 任 廣 其 小 民

> 惡。 八政以 恤 司 孤 徒 以施 之事 自一司 油 《釋文》:「防,本又作『坊』,音同 脩 獨 然 教,故 , 所以 六禮 以 防淫,一道德以 而 空 逮不足,上 生 度 以 也。 養民 下文承此 地 節民性,明 至此,皆言居 於是 也。 賢 乃興學 同俗,養耆老以致孝, 以 而 養民之道備 詳言立學之事 崇德,簡 七教 校 以 四 以 民、 興民德,齊 不肖以 教 而 授田 之。 後 絀 里 口

其溺 也。 不 以 以 鄭 節之,使賢者俯而 民氣質之性 上 敢 氏 興之,感 人倫之德,由 章『興學』而言。 簡,差擇也。」 日 放 於欲,則齊八政 肆。 「司徒,地官卿 發 恐 有過、不及也,於是脩六禮 其 其 良 物 入於 心,鼓 欲 就,不肖者企而及焉。 司 以防之,使知禁戒,而 徐 而 徒 邪 薄 掌邦教者。 氏 掌 舞 也 師 則 六鄉之政 其 一,於是 曾 德 道 曰 : 行 德以 明七教 焉。 逮,及 此 以教,以 可 恐 以 承

以 不 此, 感 之孝,使之興孝也。 以 絀 鄉之孤 倍 其 崇 有 爲 而 使 孝, 惡 其 也。 淺深,不 學 其 ,所以 德,所以 獨 術 又合鄉之耆老而養之,推 所 身教既至,又恐資稟有厚薄 而 歸 以 恤 示懲 可 爲 之,逮及人 示 而 無勸懲,故率教者上升之 教 也。 勸 不 皆 敢 也; 幼吾 異向。 以 詳見下文。」 叛教者簡去之以 身 幼以 之不足,而 先之: 教法之 爲慈 致 老 之,又合 吾 詳 使 吾 觀 之 心 老 如

習射 執 命 弟者。 事 鄉 也。 也。 鄭 此 焉。 庠 氏 簡 E 謂 功 皆 耆 曰:「帥,循 不 習鄉 朝 老 帥 司 《釋文》: 鄉學也。 于 徒 教者以告,耆老皆朝于庠,元 致 `庠,將習禮以化之,使之觀焉。 使 上齒。 仕 「帥,音率。 鄉 及 也。 簡 鄉 鄉 擇 大司 不帥 中 謂 朝,直 以告者 老賢者。 飲酒 徒帥國之俊 教,謂 遥反。 也。 鄉 敖 與,音 屬 鄉 朝 很 禮 猶 司 預。」 1: 不 春 孝 與 日 會 徒

德 之以 徒帥 序 ; 謂: 故 飲 則 位之禮。 大司徒帥 上 日 徒 秋 國學者 俊士與之以爲榮,惡者慕之而 功,自勵爲功,觀 以曰『尚 一, 故 爲 爲 ,示之以長幼之節 酒之禮者也。 命 射 黨 習射、習鄉 進 不 鄉 國之俊 日『上齒』。 不帥教之人習鄉射之禮,中者在 或 正 帥 中 退 ,今還使 功」。 蜡 然州長習射以 正齒位以 教者特舉之,而 領國之英俊之士,與 耆老皆聚 揖 而 士皆與焉,皆異於尋常習射、 讓 飲 又習鄉 之儀 蓋 執 酒 國之俊士由 其上齒, 欲 事 養老。」 用州 蜡祭,而 會於鄉學之庠 , 豔之以俊髦之榮, 所 開 使 於鄉學之中 飲 不 長習射, 之以 皆在 春秋, 帥 酒之禮,老者 則 在黨之序。 教之人觀 知 孔 志 鄉 鄉 自 執 尊 氏 正 學。 而 黨正 學 也 勵。 其 長敬老。 乃 曰 體 在 而 事 州 直 īE 其 蓋 升 又司 擇 之 使 善 範 於 之 监 F 居 此 리

## 以誘掖而激勸之者至矣。

變,屏之遠方,終身不齒。移之郊,如初禮。不變,移之遂,如初禮。不變,移之遂,如初禮。不變,不變,命國之右鄉簡不帥教者移之左,命國

之外日 移,易其藏 遠之。後中年,又爲之習禮於郊學。遠郊 鄉學,使之觀焉。 之習射、習鄉 功,庶幾其 使居遂、又爲習禮於遂之學。 居,覬其見新 鄭氏曰:「中年考校而又不變,使轉徙 右,欲新其耳 王有六鄉,國之左右各有三 齒猶 遂,遂大夫掌之。又中年,復移之 化 脩 録 之禮 自以 也。 人,有所化也。 游息之所,新其 也。」 郊,鄉界之外者也,稍 也。 化之也。 愚謂: 陳氏 郊, 澔曰:「左 謂 鄉 左 如初 亦復習 郊 也。 遠方, 鄉 師友講習之 内六鄉之 禮, · 右鄉者 移左移 九州 如 右 禮 初 對 出 於 其

絀惡之法也

校時。 同,非 方,終身不齒。 遂,遂大夫掌之。 餘 不變,則其人爲終不 不變,謂五年考校時。三不變,謂 初入學時也。 又言四郊,即 如六遂之有公邑,設吏治民 小司徒》「大比六鄉四郊之吏」,言六鄉 地。 六鄉所能 四不變,謂九年考校時。 蓋 六 鄉之地 與 初不變,謂三年考校 盡 遠方,謂要荒也。 此 上云「簡不帥教者」,謂 ,故其在鄉界之外者,亦 郊一也。遠郊之外 在 可化矣,然後 郊,然 郊 而立學焉 蓋 内之 屏 此鄉 至 七年 時。 之 地 此 學 遠 Щ 再 IIII 四

文》:「選,宣練反。造,才早反,下『皆造』同。」 命 征於鄉,升於學者不征 士之秀者而升之學, 鄭 鄉論秀士,升之司徒,曰選士。司 氏曰:「升於司徒,移名於司 日俊士 於司 徒, 曰 升於司 造 徒 士。《釋 也。 徒 徒 者 論 選

三八七

夏教以《詩》、《書》。王大子,王子,群后之大 禮》、《樂》以造士。 工崇 者也。 者也。 俊。 能 造士,謂其學業有成,故免其繇役 學而復教之者也。 名而已。」 在鄉學。 曰:「升於司 不征,不給其 者與焉,是也。 鄉之繇 國之繇役。 《鄉大夫》征役之所舍者有六,而賢者 選士、俊士、皆鄉大夫所賓之賢者能 四 大夫所考有德行道藝者。 升於學,此才之可以大就 升於司徒,此留於鄉學而將即官之 術,立四 升於學,謂身升於大學,非惟 役。 愚謂: 徒,謂録名進 蓋選士、俊士,二者皆謂之 俊士,不征於司徒,而 徭役。 教,順先王《詩》、《書》、 此鄉學崇德之法也 春秋教以《禮》、《樂》,冬 選士不征 俊,美也。 造, 成 在司徒,其身 於鄉,而 也。」 千人謂 學,大學。 ,升於國 以 免於 孔 優 免於 異 猶 氏 之 升

凡人學 子,卿、大夫、元士之適子,國之俊選皆造焉。 鄭氏 《禮》、《樂》,則秋教《禮》,春教《樂》。 《禮》、《樂》,是先王之道路。 此同。若云『春夏教以《樂》、《詩》,秋冬教 孔氏 人學以齒,皆以長幼受學,不用尊卑。」 群后,公及諸侯。 者,皆以 也。《書》、《禮》者事,事亦陰也。 也。 於小學,長者教之於大學。 崇,高也。高尚其術以作教也。 教以《詩》、《書》,則冬教《書》,夏教《詩》。 『年十五始入小學,十八入大學。』春夏,陽 文王世子》云『秋學《禮》,冬讀《書》』,與 《詩》、《樂》者聲,聲亦陽也。 以 曰:「術,是道路之名。《詩》、《書》、 曰:「樂正,樂官之長,掌國子之教。 齿。 其術 《釋文》:「適,丁歷反。 相成。 皆造焉,皆以四術成之。 王子,王之庶子也。 《尚書傳》曰: 春秋 幼者教之 秋冬,陰 互言之 冬夏 教 以

以其爲· 也。 暫時 教胄,但言 於學,則曰「四 大司 受學,雖王大子 教《樂》、《詩》。 不教《禮》、《書》,秋冬但教《禮》、《書》,不 以《書》、《禮》」, 樂教胄子,周以 士由選士而升,故謂 將君 書》、《禮》、《樂》並 詩》、《書》未 成於樂。」大學之教,以樂爲終,故虞以典 而 樂掌成 愚謂:大樂正 我, 但言教《樂》之事,而 人所共 闕 而 但視其陰陽以爲偏主耳。 和聲作樂之事。 均之政,乃大學教人之事也 與 興、《禮》亦未 (由,則 教」。俊選,即 今交互言之,明四 亦然。 則是春夏但 我 司樂掌 盎 列爲 百四四 之俊選。 一於《周禮》爲大司樂, 讓,何也?』是其 故《文王世子》云: 成均。 四教,然《大司樂 // 備,故舜 教《樂》、《 他未有及焉 至周以《詩 」;以其爲教 俊士也。 〇 孔 唐、虞時 術 子曰: 命 《詩 變以 不可 長幼 事 俊

者也。 樂語 無專 事 掌者,乃國學之政。 德 故其職掌不見於《周官》也。 别使公卿之有道德者入教於學,以 乃其專職,而教《詩》者爲 以爲樂祖、祭于瞽宗。 子弟焉。 教者,大司 以《文王 正、小樂 書》、《禮》者以各司其教,所 掌成均之法,以治建國之學 禮》爲執禮者,教《書》爲典書者,而總 ', 所 爲 職,但 教國子,以樂舞教國子。」是大司樂 師 謂大司 大司 世子》考之, 正、胥之屬,教《詩》者爲 而使掌其政令之煩,則非 凡有道者,有德者,使教焉 有道 成 成與執禮 成也。 也。 德 而 蓋《大司 至於教人,則惟 又 精於其業者則充之, 則 、典書之人,無定人, 以樂 别使他官之習 教 其屬之大 樂》者 樂之職 德 謂 政,而合國之 大司 教國子 執 禮、典 大 爲 所 成 師, 師 死 總 樂 大 以 以 日 尊 道 書 於 其 所 其 教 樂 舞 則 ൬

其屬 精 其 王 師 前 設 聲 而 》,鄉 容 以掌學政 官 重 亦非 舞 道 之 學 蹈 精 或 人所 審音識 而 學 意 前 兀 皆以 也 術 能 專 之 司 盡 此 微 ^ 教 詩 教 爲 非 故使樂官之長 樂之事 × 教 惟 專 ^ 書 但 其 樂 示焉 業者 》 爲 教於國 尤 禮 不 此 深 學 先 率 能

一,爲

尤備

耳

于大樂 如字。 屏,必 將 變,王三日不舉,屏之遠方。 卿、大夫、元士皆入學。 E 寄, 出 郢反。 學,小胥、大胥、 終身不 正,大樂正以告于王,王 棘 ,依注音僰,又作『僰』,蒲北反。」○棘 齿。 《釋文》:「胥,息餘反,又息呂反 小樂 不變,王親視學。 Œ 簡 西方曰 不帥 命三公、 教者以 棘,東方 周氏 不 九 告

貢 之屬 此 或 也 學絀 0 小 樂 樂 師 惡之法也。 Œ 掌 於《 國 學之政,大胥掌學 周 禮》爲 大胥、小胥,大 樂 師,大樂 士之 正 樂 之 正

化之。 氏慤曰 子孫。 不變而 之時。 其易治 適子。 也。 也。 年大成之後。 以衆庶之家爲易治,世禄之家爲 者至於二不變遂屏之者,陳氏 大子、王子、群后之大子,卿、大夫、元 版 一不變屏之可也。」 僰」。 小 示其 示其 九年大成,學止 胥 不變,王又親爲之臨 後 以其難化也,故國子之出學常 也 王命公卿 僰之言偪,使之偪寄於夷 不舉,去食樂,重棄 掌 解之。 「賤者至於四不變然後屏之, 雖屏 雖 故故 學 屏之,特寓於此耳。」 鄉、遂之所考常在 士 之,欲 以三年之近而考焉,故 一之徵 以九年之遠 以下入學,亦謂 急 也。 令。 周 於 氏 悔 人人也。 此 諝曰 視,重棄 调 所 而 鄭 簡 謂:『先 簡 氏 三年 戏。」 使習 難 寄者, 棘,當: 者, 焉 「棘,  $\Box$ 愚謂 化 在 大 賢 禮 士 則 謂 必 寓 比 貴 者 之 九 以 Ŧ. 以 方 出 雖 兀

謂 周氏 遠 爲其太遠」,孔氏云『《漢書·地理志》『南北 南 百粤未開,南北不遠於東西 萬三千里,東西九千里』」,亦非也。三代時 不云「棘」「寄」,與此文詳略互見耳。 方, 北者,文略也。 世族之親與庶人疎賤者異,非 之説,未 亦 謂 要荒 知孰 也。 鄭氏云「不屏於南北者」 是。 棘 之義 前言「屏之遠 也。 未 詳 也。 鄭 方」, 不言 陳氏 氏、

馬,曰進士。 大樂正論造士之秀者,以告于王,而升諸司

以 之中者也。 鄭氏 鄉學之中者也。 子及庶民 夏官卿掌邦政 德 愚謂 曰:「升諸 爵 以以 之俊 此國學崇德之事也。 司馬之屬,有司士掌群臣之版 功詔禄。 士。 者。 司 造士之秀,謂秀出於國學 馬,移名於司馬。 前云「秀士」,謂秀 進士,可進受爵禄 升諸 司馬,移名於司 造士,謂 司 出 也。」 馬 於 或

馬而將官之也。進士,言其可進於王

朝也。

定其 定然後禄之。《釋文》:「任,而金反。」 司馬 官也」。 材能高 遂之官,此論進士之賢者,則 義與前 於樂者署擬於樂官。 各署其所長。 又論進士之賢者,以告於王,而正定其 司馬,司馬得此 秀者,以告於王,王以樂正所論之狀授 之,命之。」 其論,各署其所長。 鄭氏曰:「辨其論,官其材,觀 論 辨論官材,論進士之賢者,以告於王 「官民 下,堪任何官,故曰『官材』。 論定然後官之,任官然後爵之,位 愚謂:自「論定後官」以下,其 材」同。 孔氏曰:「大樂 若長於禮者署擬於禮官,長 所論之狀,更辨論之,觀 官之,使之試 但官! 官之,試之以所能 民材則 江流論 用 其所長。 爲 用 造 守。 王朝之 爲 士之 司 與 定 馬 其 爵 而

二途: 與鄉 材 至 司 蓋 學而官之者也。此論進士之賢者,則國子 升於國學,則論選之法與國子同,二也。」 世家、編户之别也。 在 升曰進士,則命爲朝廷之官,而爵禄之權 鄉、遂之吏,而選用之權 或 官 而 徒,固 司馬。 一九年學成,乃升於司馬而官之。 之秀者,止爲鄉、遂之吏。升於國學而 而 不 鄉之賢能,鄉大夫考而興之,上其名於 學教國 愚謂:前云「官民材」,此鄉人之出於鄉 也 即 安於小 所升之俊士出 可爲選士者,司徒試用之,一也。 官之者,雖仕進稍速,而不過 一可由 此鄉學、國學教選之異,所 劉 氏 成者,則司徒論而升之於學, 此 敞曰: 鄉學所 而入仕矣。其有材質秀異 於國學而官之者也。 然庶人之仕進,亦有 ❶「古者鄉學教庶 升日選士,不過 在司 徒。 其出於 國學所 爲 以 用 爲 民 爲

> 大夫廢其事,終身不仕,死以士禮葬之。 鄭氏 及不任其官則黜爵之事。」 自「司徒脩六禮」以下至此、言教民之事。 子等,而公、卿、大夫或亦出 曰:「此因上文『任官而後爵之』之言,因 後官之者, 致仕而退,死得以 曰:「以不任大夫也。」 雖 仕 進 稍 大夫禮葬。」 緩,然選用之法 乎其間 孔氏曰: 吴氏 與 澄 或

有發,則命大司徒教士以車甲。 也。 鄭氏 車甲,教以乘兵車 日 : 「司徒掌教,司 造士則司馬辨論官材,有發 曰:「有發,謂 馬掌政,是分 衣甲之儀。」 有軍師 發卒。 則司 職 方氏 教士 而

0 敞」,四 庫本《禮記義疏》作「舞」。

凡執技

論

力,適四方,贏股

肱,決射御。

士以

車甲,是聯事而通之也。」

徒教

辨

之

慤

以

₹之。. 文》: 「技,其綺反,本或作 『伎』。 赢,本又作 『嬴』,力

遺也。 地因上「教士以車甲」而因言執技論力之 此因上「教士以車甲」而因言執技論力之 此因上「教士以車甲」而因言執技論力之 此因上「教士以車甲」而因言執技論力之

不與士齒。仕於家者,出鄉不與士齒。工。凡執技以事上者,不貳事,不移官,出鄉凡執技以事上者,祝、史、射、御、醫、卜及百

則齒 七"祝一,史二,射三,御 技 鄭氏曰:「不貳事,不移官,欲專其事,亦 百 工七。 不德。 論力」而備陳執技之人也。執技之人凡 一, 親 親也。」 射、御上文已見,而重言之者,因 出鄉不與士齒,賤也。 愚謂: 此又因上言「執 四、醫五、卜六、 於其鄉 中

> 也。 五者而 此,明官人之事。 等之官也。不貳事者,欲其專精 類而并言之也。○自「司馬辨論官材」 以貴賤計者,若出鄉 成而上,藝成而下,在鄉黨宗族之中,有不 謂列年齒爲坐次也。 不移官者,不欲强試之以其 周禮》大祝、大史、射人、大馭、醫師、大卜 陪臣 並列之也。 亦賤,故 亦出 此 則 出鄉不與 皆謂執技之賤 鄉 不 不 得 與 與 所 士 士 士齒者, 不 一齒,賤 盎 能 於所業。 人,非 一, 因 齿, 其

禮記卷十三終

## 禮記卷十四

或 賜 史 進 館 士 篡 及 第 脩 翰 孫 希 林 日 院 集 編 解 脩

## 王制第五之三

刺 簡 司 十 不 寇 智反。」 聽 īF. 附 刑 明 從 辟 輕 以 赦 聽 從 獄 重。 訟, 《釋文》: 必 刺 「辟 有旨 婢 亦 反 無

從 附 誠 也 鄭  $\vdash$ 也。 訊 重 氏 施 群 日 雖 刑 刺 臣 : 有 是 也 其 罪 以 司 意 日 附 求 寇, 可 訊 無 重 從 民 秋 群 一,猶 其 輕 情 吏,三 官 誠 斷 求 赦 卿 者, 之。 出 其 掌 一日訊 一之使 不論 獄 刑 訟 萬民。 者 孔 從 之中 以 氏 輕 辟 爲 티: 罪。 簡, 罪 赦

其輕

罪

而

附

之也。

赦從

重者

謂

罪之當

赦

之。

附

從

輕

者

謂

罪之疑

於輕

重

者

則

從

殺也。 也。 旨意 亦當問 之也。 求民情 訟。 時 所 附 罪 法 書》云『告災肆 司 從 之, 犯之罪 在 使 寇 、無誠 可 附 刑 重 則 刑 IE. 《春秋》: 輕 之。 法 從輕者,謂 罪之上 刑 不 刺 刺,殺也,謂 宜 罪 可 本 明 實之狀,則 差 求 慎,不 重之間 非 疑 雖 辟 民 以 故 惟 者 「公子買戍衛 赦」,是也。」 而 情 殺 輕 爲 法 施 可 赦之,謂 既 謂 爲 則 而 不 專 刑之時,此人所 是 得 欲 當 不聽之,不 本 當 人 傾 制 也。 其 殺 IE. 重 求 故 邪 其 犯罪之人,三問 所 定 其可 其 罪,今放赦 犯之罪 赦 被 刑 必 以 不 意 刑不 從 愚 書, 須三 ,輕之罪 聽 論 輕故 卒 重者 謂 以 天 明 戍 殺 犯 刺 下 爲 雖 斷 者 刺 也。 之 之 刺 謂 罪 有 獄 ПП 以 罪

者,雖 事 罪 重 可 猶 輕 赦 之也。 可 重 則 從輕 或 罪 二句 而 附之,從 止 是 重

罪而赦之也。其義亦通。

凡制 倫』。」〇今按: 論,音倫。 Ŧi. 刑,必 郵,音尤。」〇 論,如字。 即 天論,郵 鄭 注: 「即,或爲『則』。 罰 麗 於事。 《釋文》: 論,或爲

汎」,爭劍反。

比,必利反。」

怒。」 郵 刑 必 理 事 罰 之意,論議 人罰人,當各附 論,言與天意合。 鄭 别 氏 不 就 而 其身,皆依 已矣。 簡 天 雖 曰:「制,斷 假 理以 Ē, 孔氏 輕 他 於 於 事 輕 五刑皆天討,故其出 論之,而 日 五. 五罰 附 重 以 刑, 於 爲喜怒。」 制 於其 也。 郵, 五. 郵 所 亦 不 謂 五. 必 犯之事,不可 過 罰 事 即, 可 斷 刑 附於事,以求當 也。 不服 與以 之時,必就 人 不 就 罪過 愚 口 麗 正於 也。 私意也。 附 謂 假 测 人輕 必即 他 離 天者, 也 Ŧi. 以 其 謂 上 重, 過。 五. 其 本 責 天 喜 過 天

實罪也。

之。 之。 凡聽 與衆共之,衆疑赦之。 以 權 《釋文》:「量,徐音亮。 悉其 之。 Ŧi. 一刑之訟,必原父子之親 聰 意論 明 輕 ,致其忠愛以 重之序,慎測淺深之量以 必察 别,彼 盡之。 小大之比以 列 立 反。 君臣 疑獄 氾,本又 之義 成 氾 别 作

大,猶 故 服。 之情。立之者,所以嚴其不可犯之分。事 時,丕蔽要囚」也。 謂 鄭 之輕重,各有次序,意論之,以審其上下之 人倫之大者也。 論,若《書》言「要囚,服念五六日 氏 俱 過之分。 情之淺深,各有分量,慎測之,以辨其 有罪,本心有善 曰:「權,平也。 輕重。 權乎父子、君臣者,衷之於倫 已行故 原之者,所以 父子有親 事日 悪。 意, 比。 思 盡 盡 念也 本其不得已 君 愚謂: 其 臣 ,至於旬 情。 有義 淺 深, 意

聽之訟 於刻。 大, 之成」也。 下比罪」是也。 謂 疑 其 則 之於情 常 所謂 則廣詢 忠愛,  $\overline{\underline{H}}$ 以觀之於其大。 刑之疑有赦,五罰之疑有赦」也。 輕 事,以 亦 忠愛者,不至於過厚而 如是則 則所 重 庶乎 之於衆,衆疑則赦之、《吕刑 此謂罪之無疑者,其或輕 也 析之於其 謂 本 能 成猶定 比,附也,《吕 聰明者,不至於過察 盡 末 其 兼該 别乎輕重、 情 也,即下文所 微 矣。 明明 也。 氾,廣 恕交盡 刑》所謂 失之愚。 悉其 淺深者,察 也 謂 聰 或 而 而 明 「獄 Ē 所 獄 所 傷 致

寇以 以 成 文》:「又,義作『宥』。 成告于大司寇,大司寇聽之棘木之下。 獄 獄之成告於王,王命三公參聽之。 辭,史以獄 之 成告於王, 成 告於 王三又,然後制刑。 正,正聽之。 正 大司 以 《釋 獄

必察其所當附之罪以定其獄

也

之。 禮 失,三宥曰遺忘。」 夫位 其死 之屬 鄭 期』、《遂士》掌六遂之獄,『若欲免之,則 者,謂遂 者,鄉謂 獄吏初責 當作『宥』,寬也。 使三公復與司寇及 面三槐,三公位焉。 命三公會其期』、《縣士》掌野獄,『若欲 周禮》:『王欲免之,乃命公會其期。』又, 》鄉 氏 掌 焉。 刑 日 朝,王之外朝也。 師 六 之罪 : 屬 周 士、縣士、方士之屬。 鄉 鄉 「史' 、 覈罪人之辭,已成定也。 右九棘,公、侯、伯、子、 禮 士 地官,不掌獄訟 之獄 而要之,職 也, 》鄉、 司寇吏也。 ,『若欲免之, 師 師 謂 孔氏曰:「成獄辭,謂 王命三公參聽之,王 宥 之屬 正 士 日 共平之,重刑也。 師也。 左九棘,孤 聽 不 「辨 而 正, 於朝 ·識,再 《周 於 其 云『鄉、師 則 云『之屬 男 周 獄 禮 育日 司 王 卿、大 按《 位 訟 鄉 寇 會 免 周 调 其 鄉 聽 異 師

之,則 斷 制 縣野,六卿會之。」 公」,舉中以見上下 其 刑,王命以三事宥之,其不在三事,然後 刑 王命 也 六 卿 會 其 愚謂:王三又,然後 則六鄉,王自會之, 期 經 云『王 命三

凡作刑罰,輕無赦。

無 者 孔 鄭 小。二 輙 氏 氏 赦,則 日 法雖 此 犯 者 非 輕,不赦之,爲 1衆也。 疑 獄,故雖 故《書》云: 輕 不赦。 人易犯 『刑故 若輕

子盡 刑 者 者 就 爲 孔 君 形貌 子 不 侀 氏 侀 心 焉。 體 曰: 也。 盡 可 續,死 一言刑 心以 形 《釋文》:「侀,音刑。」 侀者 貌 刑 聽 是 罰 者不可生,故云『不可變』。 成 刑 成之後,若以 加 刑 也。 ,則上云『悉其聰明,致 人 罰 侀 侀 體 成 是侀 也 而 刀鋸鑿之,斷 不可變,故 體。 侀 體 訓 是 刑 人 其 成 罰 君

> 赦之法,以禁於未然之前。 不至於犯罪,盡 忠愛』是也。」 法,●以應於已然之後。 心 陳氏 則 吏不至於濫 祥道 此民之所以 日 有 無 刑 盡 赦 心 畏 有 則 之 罪 無 民

而親上也。」❷

析言 文》:「亂名,如字,王肅作『循名』。」 不正道 鄭 析、 言 謂 左道 名改作, 邪 破律 氏 破 謂 道。 ,若巫蠱及俗禁。」 日 謂 國家之舊 爲 : 謂變易 亂名改作,執左道以亂政,殺。 地道尊右,右爲貴,故正 「析言破律,巧 左。 以 巧説 官與 愚 謂 典 分散,破壞 故 物之名,更造法 事 言,如「史載言」之 賣 也 孔 法令者也。 氏曰:「左 其義 律 也。 法令也。 道 爲 道, 度。 右, 亂

「法」,據《集説》當作「吏」。

「罪」、《集説》作「法」。

如「黄 政 若 名 也。 楊、 則失實矣。 帝 墨、 正名 申、 百物」之名。 改作, 韓 一之類。 變易 Ŧi. 法 名 者 度 所 皆 也。 以 足 指 左道 實 以 亂 亂

以機窆。」 聚鷸冠、瓊弁也。奇技、奇器,若公輸般請鄭氏曰:「淫聲,鄭、衛之屬也。異服,若作淫聲、異服、奇技、奇器以疑衆,殺。

以疑衆,殺。《釋文》:「行,下孟反。」行僞而堅,言僞而辯,學非而博,順非而澤,

破。 其 以 單 鄭 才又足以 拒 動 氏 衆。 習學非 行詐偽之事 爲詐僞之言而 諫 日 飾 「皆謂虚 非。 順 從 濟其姦者,後世若宋之王安石 違之晝 非 此 違之事 而守之堅固 心術之邪,學術之偏,而 華捷給 辭 而 見 理 ,而文飾 聞 明 無 辨,則攻之而 廣 誠 博 則 者 光澤 持之而 則 也 可 則 以 足 謱 難 難 愚

蓋如此。

假於鬼神、時日、卜筮以疑衆,殺

信時 鄭 陳 文 書,使 邪 馬氏 氏 티 : 日,畏法令, 術、恐懼於人、假託 晞孟曰: 民悖禮 今時持喪葬、築蓋、嫁取、 「卜、筮者,先 違 而不以正告,則謂 制 \_0 吉凶 孔 以 氏 王 듸. 所 求 之假。」 以 財 使民 謂 1 利 數 妄

此四誅者,不以聽。

聽, 鄭氏 謂 於故,故誅之不疑,而不復聽 之」,是也。 即 四誅 曰:「爲其爲害大而 上文「正 謂上所言亂 不以聽者,爲其罪大而 聽 之, 司 政 辭不 寇 者 聽 一,疑衆者三。 也 ·可明。」 之,三公聽 情 必 愚

凡執禁以齊衆,不赦過。

禮 鄭氏 曰宫禁,二曰官禁,三曰 士 師》:「掌五禁之法以 「亦爲人將易犯。」 國禁, 左右 愚 謂: 四 刑 罰 日 周 野

所治者輕,故不論其過、故而期於必行,然赦,而禁不赦過者,蓋刑之所懲者重,禁之禁略言之也。過,謂過誤。刑於過者有禁,五曰軍禁。」下文「關市之禁」,蓋舉國

不粥於市。市、宗廟之器不粥於市、犧牲不粥於市,戎器市、宗廟之器不粥於市、犧牲不粥於市,戎器有圭璧、金璋不粥於市、命服、命車不粥於

東嚴

而

人不

敦

輕犯

也

民與?

字從玉 孔氏 事 者、《考工記》大璋、中璋、邊璋之屬,皆 有 也。 民 金勺,青金外」,是也。 周禮 之僭僞 稱章,皇氏之義非 則 皇氏 曰:「此皆尊貴之物,非 受法於司 ,圭璧之類。 縣師》「若將有軍旅、會同、田 以爲 也。 用金爲印章。 金璋,即《考工記》金 馬,以 也。」 且周 作其衆庶及馬 戎器,矛戟之屬。 時 愚謂: 稱印 民所宜有 按定本『璋』 曰 金飾 1璽,未 牛車 役之 飾 防防 丁黄 璋 璋

「甸出長轂一乘」,而兵器則由官給而藏之於市」,則是兵車民間所具,《司馬法》所謂「戎器不粥於市」,又云「兵車不中度,不粥帥而至」,則兵車、戎器乃民間所有。此云輦,會其車人之卒伍,使皆備旗鼓兵器,以

於市。 粥於 用 中,丁仲反,下皆同 器不中度,不粥於市。兵車 市 布帛 姦 精 色 麤不 亂 Œ 中數,幅 色, 不粥 廣 於市。 不 狹 不 中度,不 中量,不 《釋文》: 粥

聞 少。 鄭氏 得粥之,不合法度者不得粥也。 升之類。 者,若朝服之布十 耒耜、飲食器也。 鄭注《周禮》引《逸巡守禮》:『幅 曰:「凡以其 孔氏曰:「此經之物,其合法 廣狹者,布廣二尺二寸,帛 度,丈尺也。 不可 五升,斬衰三升,齊 用 也。 用器,弓矢、 數,升數多 布帛 度 則 衰 精 則 四 四

釈。<u>。</u> 紅紫之屬也。 尺四寸。」 寸 爲 狈 愚 鄭 謂: 謂 姦色,不正之色,若 四 當 爲 = 則 帛 廣

於市 錦文、珠玉成器不粥 於市。 衣服 飲食不 粥

也。」 奢。 鄭氏 貴者之器,非 珠玉』連文,據華美者不得粥之,若尋常飲 多,故不粥於市。 等是華麗之物,富人合有,但不得聚之過 食則得粥之。 飲食不粥,不示民以貪。」 曰:「不示民以奢 孔氏曰 民 錦文衣服等不粥,不示民以 :「前經言『圭璧、金璋』,是 所宜 此『衣服飲食』與『錦文、 有。 與貪也。 此『錦文、珠玉』 成, 善

關

五. 木不中伐,不粥於市。 穀不時,果實未孰 鄭 氏 曰:「物未成,不利人。」 ,不粥於市。 禽獸魚鼈不中殺,不

自

明

粥

於市

不獻。 小也。 中用。 執禁以譏,禁異服,識異言。 鄭 事,皆所以齊其衆 不得食。」〇陳氏澔 木不中伐,謂 一仲冬斬陽木,仲夏斬陰木。」殺之非時,不 氏 日 《周 先王之制,魚不滿尺,市不得粥,人 《毛詩傳》言: : 禮 伐 之非 》:『春獻鼈、蜃。』」 小 而未 而使風俗之同 時, 曰:「此所禁凡十有 成材。 田田 不 中 獵 用 之禮 不中 也。 -殺,亦 不 周 愚謂 禮 成 禽 謂 四

故直曰『禁』。 姦僞,察非違也。 服者則禁之,於口爲異言者則辨識之,防 上之所禁,以 司關》「掌貨賄之出人,以聯 「司寇正刑明辟」至此 譏察其違禁者。 語言 難知,故必 劉氏曰:「衣服易見, 刑禁之法 門市」,故執 日『識』。」〇 又於身著異

也。 記 對曰: 『魯、衛惡之。』」 諱惡之事, 書在 年:「晉侯問於士文伯曰:『誰當日食?』 傳》襄二十八年裨竈曰:「歲棄其次,而 惡 鄭 於明年之次,以害鳥帑,周、楚惡之。」昭七 死,諸侯薨,國之大憂之類,皆是也。《 嶽崩,大傀 簡記,簡策所記也。 惡,若日月食,四 官,典掌禮事,執此簡記策書,奉其諱惡之 大史執簡記,奉諱惡。』是亦諱諸侯之祖父 『天子適諸侯,必以禮籍人』,鄭注云:『謂 「方慝,四方言語所惡」,是也。」<br/>
愚謂 誦訓》云『掌道方慝,以詔辟忌』,鄭注云 ),忌日,若子、卯。」 故 氏 奉,進也。 惡,謂忌日及子卯,亦兼 티 : 大史於歲終之時,執此簡記,奉一歲 簡 1異裁,大札、大凶、大裁,大臣 記,策書 諱,謂先王之名。 孔氏 也。 曰:「大史之 諱,先王名。 謂 餘 《禮 事 鎮 運》 簡 左 Ŧī. 旅 故

> 二節遂言歲終受成之事也。 是之,於所惡而戒懼脩省,王則齊戒以受大之,於所惡而戒懼脩省,王則齊戒以受大史之所諫也。蓋上文言制田里,興學校,

休老勞農,成歲事,制國用。《釋文》:「會,古外以百官之成質於天宇,百官齊戒受質。然後各以其成質於三官,大司徒、大司馬、大司空子,大司徒、大司馬、大司空,大兴正、大司寇、市三官,以其成從質於天大樂正、大司寇、市三官,以其成從質於天武會以歲之成,質於天子,冢宰齊戒受質。

百官,大司徒三官之屬也。百官齊戒受市也,於周司徒之屬。從,從於司會也。受之也。大樂正,於周宗伯之屬。市,司質,平也,平其計要。冢宰齊戒受質,贊王鄭氏曰:「司會,冢宰之屬。成,計要也。

反。勞,力報反。」

受而 其屬 平斷 書,則 也。」 會。 伯、大司徒之屬,今乃不致於其長而徑達 親自質於天子也。 既大,雖司會進其治要,仍須各受質屬官 質於王; 於天子者,以三官當司事少,徑從司 事,故齊戒贊王受群官所平之事,謂共王 奏上文簿,聽 所以司徒、司馬、司空各質於天子,不由司 論定也。 官治要,故以 ,受平報也 考焉。 唯大樂正、大司寇、市三官從司 報下, 司會總主百官之歲會,小宰贊 司徒、司馬、司空簿書亦司會掌之, 愚謂 司徒、司馬、司空總主萬民,其事 以 大樂正、市,於《周 "《周禮》歲終,六官之長各考 百官齊戒受天子所平之要 周 一歲治要之成,質於天子 天子平斷之。冢宰貳王 法言之,司會 孔 百官齊戒受質者,天子 氏 日 : 司 總 禮》則 主 會總主 一群官 會以 會質 大宗 冢 室 簿 治 謂 群

正也。 禮 謂 於司 杪」,然則蜡祭飲酒在夏正十二月明矣。 其會。」凡《周禮》言「正歲」「歲終」者,皆夏 齒位之禮,以休老人,勞農夫也。成歲 卿,故欲立爲制如此。其言大樂正、大司 誓》、《立政》,皆止有司徒、司馬、司空三 宰、司會考群吏之治,又見今文《尚 及古文《尚書・周官》之篇,但聞周 皆與《周 市 而特舉之也。 寇、市,則以上文言興學聽刑及市之所 聽 並 • 歲 列; 會 大宰》:「歲終令百官府各正其治,受 又上文云「冢宰制 終 禮》不合。此蓋漢初未見《周 春官 大司寇,六卿之一, 所 致之事,而 休老勞農,謂於蜡祭而 不見其 (長, 而 行 或 廢 但言大 而與大 用,必於歲之 置 也。 制以 樂 樂 《周 行 正 正 牧 禁

凡養老,

孔氏曰:「皇氏云:『人君養老有四種:

夫

七也。」 也。 菜,合舞,秋頒學,合聲。』通前爲六。 視之」,亦必養老,此養老於季春者也。若 歲養之也三: 仲春也,季春也,仲秋也。 養三:國老也,庶老也,死政者之老 季春大合樂,天子視學,亦養老。 必遂養老」,注云:『大合樂,謂春入學,舍 四時凡四。按《文王世子》云『凡大合樂, 氣,凡食養陰氣,陽用春夏,陰用秋冬』,是 七。』謂四 熊氏云: 『天子視學之年養老, 一歲有 是致仕之老,四是引户校年養庶人之老。』 《文王世子》云『大合樂,必遂養老』,鄭謂 春合舞,秋合聲』,此養老於仲 、簡不帥教,出征受成,以訊馘告,凡天子 是養三老、五 《月令》季春之末『大合樂,天子親 時皆養老。 陳氏祥道曰:「天子之於老,所 更,二是死國 故鄭此注『凡飲養陽 難者父祖 春仲秋 是總爲 也。 又 往 者 孔

矣。」 而已。 政」,申言養耆老以致孝之事。 必有此。 《周禮·大胥》止言「春合舞,秋合聲」,若 其實《文王世子》止言「大合樂、必遂養 也。 其間,皇氏離 季春「大合樂」,惟見於《月令》,則周法未 則非大合樂,雖視學,固未必養老矣。又 老」,無視學必養老之文。大合樂必養老, 夏養老之文,《周禮》、《禮記》特言『春饗』 人學,莫不養老,此又不在歲養之數者 三老、五更,乃群老之尤者,致仕之老固在 『秋食』而已,熊氏謂『歲養有七』,亦誤 而其言入學必養老,則本孔 愚謂: 陳氏駮皇氏、熊氏之説是 〇自 然則先王養老,惟仲春 此 而二之,誤矣。《月令》無冬 以下 至「九十者其家不從 仲 疏之説 秋 也 時

有虞氏以燕禮

氏 曰:「崔氏云:『燕者, 殺烝於俎, 行

當用 其 姓。 然凡 燕則 厭 子 故 仕之老,宜 同姓 至 輕 燕者、《毛詩 道 11 燕 群 養 夜 不 醉 ,升堂行 宏 獻 故《詩 於寢。 大,故 老 燕禮 之禮 飲 可 諸 臣 異 則 若 也 成之。 始 不 見。 之禮 姓之燕禮 燕 侯 用 ^ 龃 同 有二: 用 養 醉無歸。」《燕禮》云:「宵則 儀 . 坐 前 燕禮 燕禮 然《湛露 姓則 其 傳》云: 獻 湛 禮》 老 正 而 其 臣 兼 禮 燕 露 以 飲 庶姓,讓之則止。」此燕致 則 子, 夜 猶 及 畢 之禮 燕 鄭 酒 《燕禮》 折 飲 是 於燕四 有 》天子燕諸 及諸 禮 『燕,安 愚謂 俎 而 以 箋云:『 燕 諸 其 其 脱 至 侯《 同 凡 侯 老人不合夜 於 屨 一篇,乃諸 於 牲 方之賓。 姓 自 異 升堂 正 老人宜安坐, 燕 也。」 醉 用 夜飲之禮 姓 饗 相燕,其 侯云:「 禮 狗。 讓 一, 坐 食 是 其 **\*** 虞 在 燕 若 侯 之則 飲 禮 謂 氏 篇。 飲 廟 庶 禮 天 北 異 以 最 厭 爲 帝

> 禮 兄 旧 子 · 疏 炭 燕 執 異 燭 以 姓 以 於 夜飲 則 燕 阼 公在 階 禮 不 上 養老, ·夜飲 阼 0 階 是 為言, 古 上 異 燕 當 姓 則 用 亦 同 非 有 燕 姓 也 夜 異 則 飲 姓 公與 之 之 禮 燕 父

夏后氏以饗禮,

禮 食。 薦。」《國語》云:「王公立飫,則 薦 盈 孔 飫 職》云「上公饗禮 虞,是三王之首 云「饗有食米,則饗 相 即 是王親戚及諸 是諸侯來朝,天子饗之、周 而 氏 體 故《春 饗 不 日 薦 養敬也。』皇氏 一:「崔氏云:『饗則體 也 飲、依尊 則 房烝。 人》云「凡饗食, 立 而 卑而 」, 貴 成禮 九獻」,是也 侯之臣來聘, 故《左傳》云: 禮 尚 爲 日 謂 兼 於 獻 二、凡 之 禮 數 燕 飫 共 故 與食」,是 薦而 其 其 禮 饗 夏既受禪 王饗之禮 養 有 有 食 禮 其 不食, 老 米」, 大行 房 饗 牲 亦 四 烝。」 有 以 有 則 種 也 鄭 體 於 爵 飯

謂

賓客飲

食之禮

有三

老

人不宜

久

立

,當用折俎之饗也。」」

IF.

響之禮

其饗死事之老,不必有德。

燕

忧

食禮

車

度。

故《酒

正》云「凡饗士庶子,饗耆老

子,皆無酌

數」,是也。

饗致仕之老,宜

也。

几

是饗宿

衛及耆

老

孤

子,

則

以

醉

.裔之使來,王不親饗,但以牲全體委與 於質,燕禮專乎文,饗則兼 國子男同,故《小 曰響也,食也 以《國語》及 委與之」, 三是 皆折 之。 異 愚 又 用 孤 爲 宴 則 實 事 凡祭祀,共其籩薦 米,此饋 是賓客之饗亦有灌、有獻、有酳矣。 宰》又云:「凡賓客之裸、獻、瑶 鄭云:「酳尸,后亞獻,爵 職》「大祭祀,后裸獻,則贊,瑶爵亦如之」, 饋食,食畢而 饗,蓋其禮大略 禮輕,故易之以饗。 飲 也。《舂人》「凡饗食,共其食米」,饗禮有 人》上公「饗禮九獻」,侯伯「七獻」,子男 廟之祭謂之大饗,賓客之重禮亦謂之大 王公立飫,則有房烝」,此 五獻, 丁, 共 食,備質文,其禮 ,凡祭祀,共薦羞之豆實,賓客喪紀 八 其 薦 食之禮 此 自灌 籩、羞籩」,《醢人》「掌 酳 而以 也。 相 至 似: 羞之實,喪事及賓客之 **酳之獻** 爲 饗禮雖 **籩人**》「掌 尊卑爲獻數。 始而灌 最 重。 以 數 朝 亡不 瑶 也 夏后 踐 爲 爵 四籩之實, 次朝踐, 薦 可 飾 ,皆費。 《國 四 氏 腥之禮 《大行 《内宰 。一《内 考, 豆之 亦 以 語 如 次 燕

之。

故《國語》云「坐諸

門外

而

體

四

俎饗也。

其饗朝廷之臣,亦當然也。

左傳》,

知王親

戚及諸侯之臣

來聘

是也

若其君來,則與中

行人職》掌小賓小客,所

陳牲

牢,當不

響,則

有

殽

烝。」謂

以

燕

禮

而

饗

則有

左傳》定王饗士會,用折俎

折

俎

亦

日

殺烝。

故《

或

語

| | | | | |

親

戚

亦

有

飯食及酒,其

酌

數亦當

依

命

其

牲

禮 范 参用 所謂 倚 同。 籩, 語》云「王 而 、以食禮、《釋文》:「食,音嗣,下文「食之」並同。」 飲 宣 之牲牢、 」,是也。 有 酒 子 燕禮 但祭祀 「饗射則 加 矣。 賦《黍苗》,武子興,再拜 豆 一公立 而 禮 獻 加 但燕禮牲 行之。 又有因饗而 尸 有 數, 鷩冕」是也。 籩, 坐 飫 朝 則 響 」、《左傳 有 踐 《左傳 以 羞 之 禮 爵 用 豆 豆 行射禮 則 命之尊 狗,惟一獻,而 》晉侯 羞 籩 若折 立 云「設 籩, 而 有 , 卑爲 稽 者 享 俎之饗 成 皆 饋 首 李 《司 禮 與 机 食 差耳 武 則 祭 之 而 則 服 享 或 坐 不 祀 豆

飲 孔 一般 食禮九舉」,及公食大夫禮是 氏 亦 人質素 其 有二種 曰:「食禮者,有 臣 禮 下自與賓客旦夕共 以 ,威儀簡少,故養老以 食爲 是禮 主,故 飯有殺, 食、大行 日 食。 食。 雖設 也 崔 食禮。』食 二是 按 氏 酒 鄭 諸 云: 而 燕 注 不 殷

人

又有 無樂, 禮 客 與諸侯之自相食,固 禮》無舉數,而《大行人》上公「食禮九舉」 樂」、《鍾師》「凡祭祀享食,奏燕樂」、《公食 事之老,當用 食之禮,則亦皆不可得而 夫之自相食。 養老之享食,則天子袒而 侯伯「七舉」,子男「五舉」,則王之 曲 則 燕食之禮。』食致仕之老,當用正 禮 與享食之常禮不同 諸 而 《周 侯 酒 食 漿 禮 來聘大夫之禮 處 燕 至於天子食諸侯 右』云: 食。」 樂 師 與《公食禮》不同。 》「饗 者矣。 愚謂 割牲 見矣。《公食禮 此 食 大 而 :公食大 ,冕而總干, 夫、 諸侯,序 與諸 兼 食諸 及 食。 士 侯 於 與 其 大 夫 至 侯 相 死

周 人脩 而 兼 川之。

周 養 鄭 陰 氏 人極文,故脩上三禮 氣 日 : 陽 備陰陽也。 用 春 夏,陰 用 凡 而 秋 飲 兼 冬。 養 用 陽 謂 氣 春 愚 則 凡 謂 食 或

用饗,或用燕,秋則用食也。

於諸侯。八十拜君命,一坐再至,瞽亦如之。五十養於鄉。六十養於國。七十養於學,達

· 青公郎,景公园,胃一口,九十使人受。

首: 坐 之。 享、食之禮養之於學者,「有虞氏養國老 親受,彌 瞽者無目,故亦如之。 所賜 學中行養老之禮則及之。拜君命,謂君有 養於鄉,養於國, 於其家以養之者,「八十月告存,九十日 食之禮養之也。 上庠,養庶老於下庠」之等是也。 食以養之也。養於學,謂於學而 坐 六十者,一國引年則及之。 而 而 而 以 拜受之也。 優之也。 首再至於地,殺其禮以優之也。 一拜,興 謂引户校年,而行糜粥飲 五十者,一鄉引年則及 而 凡拜君 〇養老之法,有以 又 九十者,於君命不 坐 一拜。 命者,必再拜稽 以 七十者, 八十者, 有致 燕、享、 燕、 有 物 於

《司門》「以其財養死政之老」、《遺人》「門其家不從政」,是也。有共給之終其身者,十不與服戎,八十者一子不從政,九十者有免其征役以養之者,「五十不與力征,六秩」,及《月令》仲秋「行糜粥飲食」,是也。

十常珍,

《釋文》:

粮,陟良反。離,力智反。」

焉 不惟貳 之以供其求也。膳,善食也。 精鑿也。 粻,糧也。 九十年益高,隨 宿肉,又有美善之食以 ,則所以養之者益至矣。 、膳,又 宿肉者,六十非肉 異粻者,少壯 得常食珍物 其 所居所 副 疏 貳 食,五十者别 行 也。遊,行也。 之也。 不飽 而 七十者不惟 膳 飲不 恒 八十者 宿 離

六十歲制,七十時制,八十月制,九十日脩。

給,其鳩反。冒,忘報反。」唯絞、給、衾、冒死而后制。《釋文》:「絞,户交反。

者。」 也。 絞 制 具 衣 故 鄭 衰,始制 制 不待六十 人大小 八於每 也。 物易得者。」 歲 氏 彌 單 制 曰:「絞、給、衾、冒,一日二日而 備 被 月 孔氏曰: 斂既 歲有 既 爲送死之具。 也,大斂 制,於 也 此謂 至九十,又於所制者 襲所 斂 所 大 時 以韜尸者 ,所以收束衣服爲堅急者。 每 制 愚謂: 「歲制,謂 夫以下,人君 制、衣物難得者 刑之。 也。 月 有 至七十八十,而 時 歲 所 衾,大小斂之衾 制 制 制 棺 者,謂送死之 於每 也 也,不易 即 日 位 六 時 脩 月 爲 + 可爲 有 也 制 椑 成 所 所 E

珍從。《釋文》:「從,才用反,又如字。」
杖於朝,九十者天子欲有問焉,則就其室,以五十杖於家,六十杖於鄉,七十杖於國,八十

得杖 十不 杖 陳氏祥道曰:「大夫七十而賜之杖,此五 庶之朝,庶人之老或與焉,其八十者或 於朝、《祭義》「七十杖於朝」是也。 + 於 而 而 與? 聽致 致事,八十杖於朝,此常法也 朝 杖者 則 事 ,蓋杖於家及鄉、國者不必 非 賜 則必賜之几杖,七十 不可也。」 愚謂: 一若 大夫七 大詢 亦 之待賜, 得 亦 杖

七十不俟朝,八十月告存,九 之即 孔 也。 不俟朝者, 氏 君每月使 退,不待 九十老極 曰:「此謂大夫、士年老 朝君之時,人 朝 人致 ,君日使人以常膳致之。」 事 畢 膳,告問 也。 門至 告,問 十日 存否。 朝 而 位 聽致 有 也。 秩 秩, 事 出 揖

Ŧī.

+

始衰

+

非

肉

不

飽,七十非帛不煖,八

非人不

·媛,九

+

雖

得

人

不煖矣。

Ŧi.

十始衰,故養老者

自五

十以上。

俟 不 服 愚謂: 不俟朝,有 朝 與於朝政故 而 有 朝 致 是是 朝 仕 政 也。 而 則 也。 朝君 使 則就之」,是也 不俟朝固 人就 若八十,則雖未 者、《論 而問焉、《祭義 以 語 優老,亦 》「吉月 致 必 仕 以 朝 不 其

客之事 Ŧi. 預。」〇政,音征。 十不從力政,六十不與服 ,八十齊喪之事弗及也。 戎,七十不 《釋文》: 「與,音 ·與賓

十

問

長幼 也。 其子未能受役,於非竭作之役猶不免供 皆行,故於五十即 過家 者,以其爲竭作之役 力征 免征,野六十 甸徒」,是也。 一,謂田 六十免役 而 一人,役 皆爲役之所不及矣。 與 追胥之役、《祭義》「五十不爲 其 Ħ. 《周 分則 免征 子 免之。 則 禮 不 與 免其 也。 田 ·鄉大夫》國 服 與追胥免之獨 然五十之人,如 蓋凡起徒役,毋 戎,不問 父,竭作則父子 八十不齊,謂 其子之 中六 役 早

> 并衰 孫,至八十,祭亦 子代之祭,是謂宗 不祭也。 七十之時,祭祀 麻 不 不喪者, 服 也。 不爲。」 猶 七十惟 子不 親爲之,其視濯 鄭 氏曰:「八十不祭, 孤。 衰麻爲喪,八十 孔 一概則子 氏 日

爲喪。 五十而爵,六十不親學,七十致政, 唯

麻

氏 老 有 養國 禮也、 於右學,養庶老於左學。 虞氏養國老於上庠,養庶老於下庠。夏后 親學。 十,其 學,謂至學受業。 喪者,備喪之服,而 謂:爵, 鄭氏曰:「不親學,不能備弟子禮。」 老於東序,養庶 假 德業已成,則不必親學。惟 曲禮》謂 謂命爲大夫。 祖 廟 而 「飲酒食肉、處於内」是也。 命之則 六十筋力已衰,則 不 彩於西 必其飲 爲大夫者不 必待 周 序。 人 食 Ŧi. 養 居 + 殷 國老於 必皆 人 衰 也。 處之如 養國 麻 不 東 能 爲 親  $\mp i$ 

Щ

0

又作『皇』。冔、況甫反。縞、古老反、又古報反。」

周

人冕而祭,玄衣

而養老。

《釋文》:「型,音皇,本

祭,燕衣而養老。

殷人冔而祭,縞

衣

而養老。

膠,養庶老於虞庠。虞庠在國之西郊。鄭

注:

「膠,或作『絿』。」

學皆在 與? 養庶 大學 殷以 故 養國老於國學,養庶老於鄉學者,周代文, 以 而 夏之東序、西序,殷之右學、左學,皆大學 國之大學也。 (孟子))夏之鄉學名校,殷之鄉學名序,則 虞庠在國之西郊」, 周 非 一庠、下庠、東序、西序、右學、左學,皆在 辨 老獨於西郊之庠,亦取其與殷禮相 鄉學矣。蓋古者天子皆不止於一學, 於貴賤之禮 也 西爲尊,夏人以東爲尊。 周之東 立 虞、夏、殷養國老、庶老皆於國學,周 西 四 、下庠、東序、左學皆在 學推之可 虞庠,鄉學也。 此 也 歷言 知也。 則其 四代之學,而獨 四 上庠、 餘皆 郊 皆 在國 有 東。 西序、右 庠 一, 而 膠, 虞、 矣。 戀

有虞氏

皇

而

祭,深衣而養老。

夏后氏收

而

也。 子言「禹美黻冕」、《大甲》言「伊 夏、殷可推矣。皇、收、冔者,虞、夏、殷士 以祭之冠,而衣則或異也。《樂記》「食三 言養老,而乃言祭之冠者,蓋 周人以祭服,後王彌文也。」 干」。養老,夏后氏以燕服,殷人以 據『卒食玄端 陸氏佃曰:「燕衣,燕居之衣,玄端是也。 奉嗣王歸於亳」,是也。 助祭於君之冠也。 老、五更於大學,天子冕 『朝服之以縞,自季康子始也』。 享射則鷩 據『食三老五更於大學,天子冕而 冕」, 以 居」。 則周 虞、夏、殷祭亦用冕, 人養老以冕,即 縞衣,朝衣 此 而 總干 獨 舉 四代養老皆 愚謂 尹 士之祭冠 玄衣,冕 以 也 朝服 此主 冕 服》 總 據

之,尚 者,謂 虞氏 夏、殷未 屬 侯 禮 用響、食、燕三禮,此玄衣養老,謂響食之 冕而玄衣,則其禮益隆矣。 之深衣,殷之縞衣 以士之祭冠養老,而夏之燕衣,則尊於虞 衣者,六冕之服皆玄,祭服也。 之以養老也。 五. 燕之服:有 縞衣者,皮弁服之衣,天子之朝服 朝服 也。 其服 升白 鄭氏曰:「皇,冕屬 以皇爲士之祭冠,用此配深衣,而 黑 其 若以 布 聞 皆玄上 所 而 連 凡朝、燕 黑 用 燕禮 衣裳爲之,而純 虞氏質,深衣 衣 凡養老之服,皆其時 以 燕衣,燕居之服,玄端服 裳 纁下,虞十二章,周 養老之冠 養老,則天子 ,則尊於夏之燕衣 同服,天子、諸侯 殷尚 也,畫羽飾之。 白 也。 而 然周人養老兼 而 以采者也 已;夏而 縞 皮弁 深衣者 虞、夏、殷 衣 與 也。 裳 九章 服 至 凡冕 群 也。 諸 也。 玄 周 改 臣 周 服 有 +

> 服 朝 皮弁,而 響之服 惟有虞氏用燕禮,宜 之説 之,未知 鄭 委 則 子養老,冕 之冠,殷制不可考,若以周制言之,則當 之服皆與 次謂「畫 貌 服,其誤三也。 兼用之, 九章」者,亦非是。 爲是,而 也。 用 是否。 鄭氏 羽 群臣 玄衣 食禮則食之服,而 飾之」,蓋以《周禮》皇舞之義 而 愚 鄭氏之説 以爲章甫,其誤二也。 總 燕之服」,其誤 謂:皇、收、 至四代 素裳,其冠 干,而鄭 又其言「虞服十二章、 用 説詳《郊特牲》。 燕 誤 養老之服 氏 服,若用饗 甚 以 則 **冔之制** 鄭氏謂「養 爲 牟 四 服 也。 追、 代 則 諸 養老 章 未 院侯之 禮 周 縞 詳 甫 天 老 氏 周 推 用 則 衣

凡三王養老,皆引年。

鄭氏 老人衆多,非賢者不可皆養。」 七十不得養於學,而七十者亦 曰:「已 而 引户 校 年,當 不 行 能皆養之 愚 復 調:未 除 也。

當復除其家,如下文所言也。賜,然後所養無不徧。而其尤老者,則又於學也。故必引户校年,而行糜粥飲食之

期不從政。《釋文》:「期,音基。」 將徙於諸侯,三月不從政。自諸侯來徙家, 所徙於諸侯,三月不從政。自諸侯來徙家, 三年不從政。齊衰、大功之喪,三月不從政。 以母之喪,

家於此也,期不從政,以其未有業次也。 侯,謂將 三月不從政,既葬而後從政也。 類 類言之也。 除老者之法,「廢疾」以下,又因不從 來不從政,所以安之也。」 周 **淫**也。 行 氏 計 諝 也。 日 徙於他國 三年不從政,除喪而後從政也。 :「將徙不從政,所以寬之。 自諸 廢疾,謂廢 侯來 也,三月不從政,以 徙家,謂自他國 於 人事,若瞽者之 愚謂 將徙於諸 此言復 其 政 當 而

期不使。」
《荀子・大略篇》:「從諸侯來,與新有昏

文》:「少,詩照反。矜,本又作『鰥』,同古頑反。」 者,天民之窮而 少 而 有廩餼 之所 而無父者謂之孤,老 也。 子》謂「文王發政施仁」,必先鰥 鰥,魚名,魚目不閉。 無妻者謂之矜,老而無夫者謂之寡。 寐,目恒鰥 此言 生 也。 以 恤 給之,以其不能自 鰥然,故曰 孤獨 皆有常餼 無告者也,皆有常餼。《釋 以逮不足之事。 而 無妻之人,愁悒不 鰥。天民者,民皆 謂 無子者謂之獨,老 四者之民 養故 寡 也。 孤 獨,是 7,皆常 此 孟 能 天 几

侏,音朱。」之。《釋文》:「瘖,於金反。躃,●彼我反。躄,必亦反。瘖、聾、跛躃、斷者、侏儒、百工,各以其器食

■「躃」、《釋文》、《禮記注疏》作「跛」。

口 非 民 《外傳》瘖與僬僥『以實裔土』,此瘖『以 《晉語》文公問八疾,胥臣對曰:『戚施直 絶。 器食之』者,古今法異也。」 告,不可 孔 實裔土。』是各以其器食之。《外傳》不云 鎛,籧篨蒙璆,侏儒 養,故各以 司火,其童昏、囂瘖、僬僥,官師 ·跛躄」,此不云『籧篨』『戚施』,設文不具。 也。 疾 氏 亦恤孤獨之類,因上文而并及之。 民 侏儒,謂 跛 曰:「瘖,謂 郷 而並言之者,因以器食之,其 特 器能供官役,使以廩餼食之。 與 容貌 足不 常 餼 П 能行。 短小。 不 然既 扶盧, 矇 能 言。 有 斷者,謂 此等既非 愚謂: 病,又不 聾,謂 瞍 脩聲,聾 所不材,以 肢 耳 養疾 百工 可 老 節 不 事 其 瞶 不 無 聞 斷

鄭氏曰:「道中三塗,遠別也。」 萬氏斯道路,男子由右,婦人由左,車從中央。

横者,以南爲右,以北爲左。左右有一定,大曰:「塗之從者,以西爲右,以東爲左。

而往來皆由之。」

長者也。朋友不相踰,雖有少長,肩隨父之齒,年長以倍者也。兄之齒,十年以父之齒隨行,兄之齒鴈行,朋友不相踰。

而已。

輕任并,重任分,斑白不

提挈。《釋文》:「并,必

性反,本又作『併』。 」下有「者」字。 任,謂負擔也。斑白,老人頭半白黑者。 路同行之禮。蓋上之於民,既 不及之,則 老,則不以其任行乎道路,雖提挈之輕,猶 而以其重者與少,輕者與 并與少者,若重而 二人並行,各有負擔,而年有少長,若輕則 重者可知矣。 契,本亦作『挈』,苦結反。」〇石經「斑 一人不能獨任,則分之, 長也。 此上三節,言道 富而教,而 至斑白之

以孝弟之義,頒白者不負戴於道路」,亦此 其 禮 又 養耆老、恤 而 一端也。 敬事其父兄,其見於道 《孟子》言「謹庠序之教,申之 孤 獨以化之,則民皆知謹 路之間 者, 乃 於

意

也

君子耆老不徒行,庶人耆老不徒食 也。 庶人耆老不徒食,皆緣類及之也。 不徒行,出必乘車也。不徒食,食必宿肉 六十日 老不徒行,又因君子耆老不徒行而并及於 此因上文言行道之禮 耆。 君子、大夫、士也。徒、空也。 而及於君 子耆

大夫祭器不假。 篇 氏 燕器,急奉先也。此節與上文不相屬,陳 祭器不假,説見《曲禮》。 二之脱 謂當在 簡耳。 寢 不踰廟」之下,愚意其直爲他 祭器未成,不造燕器。 祭器未成,不造

方一里者,爲田九百畝。方十里者,爲方一

里者百,爲 者百,爲 田 九十 田 九 億畝 萬畝。 方百里者,爲方十 里

數也。 億也。」 萬。」 或 也。 鄭 品,萬官億醜,皆以數相十」。 氏 亦可放此 《毛詩傳》云:『數萬至萬曰 曰:「一里,方三百 孔氏曰:「《尹文子》云:『百姓千 舉百里之國,而七十里、五十里之 愚謂:此言一國之内,爲田之大 推之矣。 自此以 步。 至篇終,皆所 此謂 億。」此 億, 今十 小 億

方千里者,爲方百里者百,爲田九萬億 以 億畝,百箇百里之方爲九千億畝。 方既爲九十億畝,則十箇百里之方爲九百 鄭氏曰:「萬億,今萬萬也。」 云『九千億畝』,若以萬言之,當云『九萬 「計千里之方爲方百里者百, 「九萬億畝」,與數不同者,若以億言之,當 申釋前文,而且以補其所未備也。 一箇百里之 孔 今乃云 氏 畝 日

億」者,即今之『萬萬』。」 遂 萬 畝。 『萬 此 億 經上 下 鄭 或 不 顯言 萬 或 億,字 故 愚謂 云 此 相 此言 經 交 涉, 萬

爲 盡 西 自 河,千里而近。 自東河至於東 江,千里 田 不盡流沙,南不盡衡山,東不盡東海,北不 恒 恒 州 山至 之内爲田之大數 八十萬億 山 ,凡四海之内, 而近。自江至於衡 於南 海 自西河至於流沙,千里而遥 河,千里而 萬億畝。《釋文》:「斷,音短。」 ,千里而 也 斷 長補 遥 近。 Ш 短,方三千里, 自東河至於西 一,千里 自南 河 而 至於 遥

澆 應氏 西 開 不 挂 及也。 , 雖 域之内, 南 也 鏞 北 流 各 河 日 沙 : 南 獨 有 亦 而 以 舉 海獨言東 與 不 西 江 東 河 盡 南 與 西 一、蓋聽 接 北 衡 南 也。 則 Ш 者,河 海者,東海 夷 爲限 四 當先王盛 徼之外, 夷居之。 了百越 流 縈 帶 猶 疆 在 時 故 而 理 中 外 東 周 盡 有 或

理之略 東過 薄 數之下云『萬億』,又云『一萬億』也。 千里而遥矣。」 孔氏曰:「爲田八十萬億 渭 縣 億」言之。」 文誤爲『萬億』,此 萬億畝,九箇千里九九八十一,故有八十 而 行不滿千里,故 田之大數,而 日 萬億畝 萬億畝 日 西北,極三十七度。 北 『外二二字,而 四 海 如九,爲方千里者九。 大伾 行,西去宿 者也。 「禹河自華陰折 至於五千里者,此 ,以一州方千里,九州方三千里, Ш 但《記》文詳具,故於『八十』整 南,至白 愚 疆 四 謂 治之詳 曰『千里而近』。 理之詳者 胥口又一百五 海之内,方三千里,此 因前文之誤,更以 南 恒 馬 河 Ш 而東行,至大伾 略 縣之長 也。 在今真定府 可 區域之大數 東 見矣。」 河、 觀於曰『内. 箇千里有 十里,則 壽津,始 若漢 西 河 皆 曲 河 胡 而 一,所 萬 主 九 折 則 氏 民

四

六

里而 冀 城 冀 海 濱海,古爲 中,若據成 海,青、徐、揚之海 七度二分。與江 府北,極三十二度三分。 水,至揚 約 十四度六分。 行,其最南者在今蒲州府永濟縣界中,極三 二度五分,約爲 記》 (州之南,冀州 也。 州 、王屋、孟 千二百七十五 爲六百里,故 言之。 一一一 近。 東二度二三分。 州入海,其所 淮 Ш 衡 與恒 海 津、洛 禹 夷所 一、蓋 東海計之,其地太遠,而徐 Ш 南 河 在 曰「千里 六百二十五 Ш 北 與 里 自 也。 居 今衡州府 汭 據 南 相距 豫州 故 華 禹河自大伾 湯州 與南 而至大伾 今青、沂等府所濱之 北 行最 陰 青州之成山斗 曰「千里 相 爲五度一分,約爲 而 之界也。 東 距 則 近 河 折, 北 里 衡 又雜 爲二度四 南 者 故 爲 Ш 歷 而 北 北 在 江自 縣,極二十 底 遥」。 亦 南 以 南 折至大 相 今鎮 柱 百 曰 河 河 距 會漢 千 分, 海 爲 所 州 東 在 析

八分。 故道 恐非《記》之所據 遥。 五. 所行最東者,在今絳 相距 州 陸,又北 今哈密東南之大 分,爲二千八百二十五 西十七度左右。 以爲居延澤,在今嘉峪關 河,在冀州之西,冀州 今大名府 云「流 千 十里,故曰 與兖州之界也。 里而 與東 約 ,以《記》文參考今地 沙,大磧 顏師古謂「流沙在燉煌」,薛氏 四 遥」。 至九河, 潛縣界中,西二度。 度三分,爲一千七十餘 河 與西河 千里 東 也,在 河 西 1自龍 也。 爲 沙 相 今河 海 東 東 而 沙 州 距 門南 近。 河 自 與 爲 州 西 河 里,故 自 雍州之界也。 恒 流 西 相 外, 度 津 圖 在 孟 流至 Ш 沙 距 縣 其 冀 流 八分,爲 與東 津 日索科鄂模 ず、其 至衡 十里」,皆指 爲 界中 曰「千里 沙、《漢 州之東, 以 華陰 最 + 東,久 里, 地 海 西 山約 ,西 太遠 度三 者 九 爲 東 季 故 志 Ŧi. 其 + 百 西 西 在 失 H

至衡山 江 界,不與徐界,而 州 沙 自 《記》文之繁也。 爲冀、豫、雠、 十一萬億畝」,而云「八十萬億一萬億畝」, 短 兖、青、徐、揚、荆、豫、梁、雍、《爾 河,冀州域。 田 而 九 度,爲二千五百 三千里,九州皆在其中,鄭氏據《禹貢》五 2,雍州 北 地域分之,非記者本意。且東 東河至西河,亦冀州域。 八萬一千億畝,承上文之誤,則當云「八 ,爲方三千里也。 南 度三分有餘,爲 北 五六百里也。 一,荆州 縮,而 域。」 域。 自南 其地皆有所不盡,故斷長 荆、 愚謂:《記》言九 里,自東海至流 荆 ○鄭氏曰:「自恒山 自東河至東海,徐州 揚、兖、徐、幽、營,《周 河至江 四千八百餘里,東 州 ○《禹貢》之九州爲冀、 方三千里之地,當爲 北 以 一,豫州 荆 自西 Щ 爲界,尚在 州之内 域。 沙約 雅》九 河 河至 與 自江 三至南 一 十 西 域。 州 兖 流 方 補 贏

記 長 禮 若除去要荒,止計緩服之内,則 雍尤爲遼闊。 青、揚、荆、梁、雍則不止於千里,而冀、梁、 言之,如兖、徐、豫三州皆不過千里,若冀 九州在内者皆狹,在外者皆廣。以《禹貢》 爲方三千里,此九州爲中國者之實數也 之大界也。《王制》「九州,州方千里」,合 間,皆爲要荒之地,而在 同。《禹貢》之嵎夷、黑水,《職方》之毉 流」,用《禹貢》之法,則九州亦當與《禹 前云「千里之内曰 州名,又不言其 幽、冀、并,而 爾雅》爲殷制。 短 九州之内爲田之大數也。 職 相補,大約每州皆千里而已。 方》之九 每 蓋此 州 州 封 《王制》言「九州」而 封 爲 域 甸,千里 六州皆外包要荒之地 域 揚、荆、豫、青、兖、雍 未 亦各不同。 九 知 州之内,此九 用 之外日 何代之制 九州之地 〇此 説者以 采, 曰 不言 州 總 邓

四一八

十億畝 方百 澤、溝瀆、城郭、宫室、塗巷三分去一 里者 爲 田 九 + 億 畝 Ш 陵、 ,其餘 林麓、 六 Ш

以此準之矣。
 以此準之矣。
 以此準之矣。
 以此準之矣。
 以此準之矣。

二寸二分。 步。古者百里,當今百二十一里六十步四尺步。古者百里,當今百二十一里六十步四尺步。古者百畝,當今東田百四十六畝三十古者以周尺八尺爲步,今以周尺六尺四寸爲

時 爲 言之也。 畝,當今東田 齊、魯人,自據其地言之,故曰 古者,謂周以前也。今,記者據當時 如此,至景帝改以二百四十步爲畝 晦,三百步爲 東田,東方之田 百四十六畝三十步,蓋漢 一里,方里而井。 也。 漢初 東  $\dot{\mathbb{H}}$ 古者 儒 者皆 漢 步 百 則 初 百 法

寸, 云:『桓圭九寸。』是周猶以十寸爲尺。 十二寸。以此計之,古者百畝,當今東 十四寸。今以周尺六尺四寸爲步,則 六國 未詳 經 經皆不相應。 有五十二寸,是今步比古步,每步剩 八寸爲尺,以周尺八尺爲步,則一步有六 里,當今百二十五里。」 孔氏曰:「古 畝,當今百五十六畝二十五步。 更爲八八六十四寸。 曰:《玉 今百二十三里一百一十五步二十寸,與此 百五十二畝七十一步有餘,古之百里,當 大於古之畝 云以 則謂 聞 時多變亂法度,或言周尺八寸,則 也。 人 周尺六尺四寸爲步」,乃是六十四 周八寸爲尺也。 職 按禮制,周 矣。 **\*** 云 經文錯亂,不可用也。 「鎮 鄭 以此計之,古者 猶以十寸爲尺。 氏 主尺 鄭即以周尺十寸 日 有二寸。』又 周 尺之數, 古者 出 又 者 步 百 H 步

之二十里,爲今之二十五里,故鄭云:『古 步,剩今一步,則古者四里,剩今一 之,總積得六百二十五步,六百步 應南 亦總爲 古者八十里,爲今百里,百里之外,猶有古 畝,餘有二十五步。故鄭云『古者百畝,當 二千五 畝之田,從北 步,古之四十步,爲今五十步。 尺八寸爲尺,八尺爲 今百五十六畝二十五步』也。 五十畝。 爲尺,八尺爲 十六寸也。是古之四步,剩出今之一 畔 長百步,得爲今田一百二十五步。 畔所 所 百步,從東總西 二千五 剩之數,計方二十五 又西南一角,南北長二十五步, 剩之數,東西亦長二十五步 嚮南,每畝剩二十五步,總爲 步,則 百 1步,相 步八十寸。 步,則今步 併 每畝剩二十五步, 爲 Ŧi. 步。 千步 古一 又古者 鄭 少於古 )則爲 里。 開 又 ) 總爲 畝之 方 方百 以 是 六 几 乘 應 止

田

西

也。 者百 後人誤 分。」 愚謂:此疏本爲二説:其前説,以 於八十寸之中去其十六寸,而爲六尺四 尺四寸矣。今疏之前説,既以八尺之步 爲尺,八尺爲步,以十寸之尺約之,止有六 古者以周尺八尺爲步,此本十寸之尺,而 步,有八十寸,六尺四寸爲步,有六十四寸 與六尺四寸之步皆爲十寸之尺,則八尺爲 則八尺爲步,止六十四寸,六尺四寸爲步, 八尺之步與六尺四寸之步皆爲八寸之尺, 分,是今步比古步,每步剩出一尺二寸八 周尺六尺四寸爲步,則一步有五尺一寸二 周尺八尺爲步,則一步只六尺四寸。今以 曰:「疏義 |五十一寸二分也。其後説,以八尺之步 觀經文及鄭注之意,則後說爲是。 里,當今百二十 謂 周尺 所算亦誤。 止 八寸,用此 Ŧi. 古者八 里。」 制 寸爲 步,則八寸 陳 氏 澔

六畝 《管子》及《司馬法》皆云:「六尺爲  $\mathbf{H}$ 詳不可盡考耳。 周。而尺度又有不同,故夏之五十畝當 所算五十二寸之失,則亦未 去其十二寸八分,而爲五尺一寸二分,與 之七十畝,殷之七十畝當周之百畝 畝,而步之大小不同,夏大於殷,殷大於 而助,周人百畝而徹。」蓋三代皆以步 也」,少於古時二尺矣。是周步六尺。又 于首,以弦其内,六尺有六寸,與步相 經、注之意皆不合。 陳氏第據前説而辨其 寸,又以六尺四寸之步,於六十四寸之中 (記》特言「周尺」,則古尺、周尺疑亦不同。 (孟子》曰:「夏后氏五十而貢,殷人七十 考工記》「車人爲耒,自其庛緣其外,以 數之參差,其義又何疑哉? ○自「方一 有 餘,不啻多三分之一,則夏、殷、周 古時百畝,當漢初百五 爲 甚 晰 但 百 步。」 也。 + 其 殷 爲 中 至

「閒,音閑,下同。」

者十,方十里者六十。 國,其餘方百里者七十。又封方七十里者六 以禄之。其有削地者,歸之閒田。《釋文》: 餘以爲附庸閒田。諸侯之有功者,取於閒 里者百二十,爲方百里者三十,其餘 方百里者四十,方十里者六十。又封方五 十,爲方百里者二十九,方十里者四十,其餘 方千里者,爲方百里者百,封方百里者三十 里者」 公侯之田」而詳釋之也。 至此 詳言 田 數,因 名山大澤不以 前言「天子之田 方百 封 里  $\mathbb{H}$ + 其

天子之縣内,方千里者,爲方百里者百,封方 地者也。 功者,取於閒田以禄之,有功德於民 此申釋畿外八州建國之法也。諸侯之有 祇有不舉者爲不敬,君削以 其 有 削 地者,歸之閒 地者 田 也 Ш 111 而 加 神

百里者九,其餘方百里者九十一。又封方七

十里者二十一,爲方百里者十,方十里者二十一,爲方百里者十五, 十九,其餘方百里者六十三,爲方百里者十五, 又封方五十里者六十三,爲方百里者十五, 十里者二十一,爲方百里者十,方十里者二

方伯之地。方伯爲朝天子,皆有湯沐之邑於視諸侯之卿,其爵視次國之君,其禄取之於天子之大夫爲三監,監於諸侯之國者,其禄此申釋諸侯以下制禄之法也。

天子之縣内,視元士。《釋文》:「爲朝,爲,于

僞反。」

此言三 之邑」也。 周千八百諸侯,盡京師地不能容之,不合 文之所 京 朝宿之邑,在泰山下者爲湯沐之邑,其實 子之縣内者,即《左氏》、《公羊》所謂「朝宿 事理之宜。」 則否。慎謹按:京師之地,皆有朝宿邑, 公之後,鄭,宣王母弟,皆有湯沐邑,其餘 師有朝宿之邑,泰山有湯沐之邑。魯,周 之邑。《左氏》説,諸侯有功德於王室,京 之郊皆有朝宿之邑,從泰山之下皆有湯沐 許氏慎曰:「《公羊》説,諸侯朝天子,天子 給齊戒自潔清之用,浴用湯,沐用潘。」 師 及泰山下之邑,皆爲 監之禄與方伯湯沐之邑,又以補 未 備 《左氏》、《公羊》以在京師 也 愚謂: 鄭氏曰:「湯沐之邑, 方伯湯沐之邑在 朝 王 而居宿,皆 者爲 前

亦嘗爲 方伯 有 士: 所 東都,泰山 蒐。」有閻之土,京師! 立 泰 以 供 山之祊, 不 齊 方伯 得 戒 王職,取於相土之東都以 有 自 下湯沐之邑也。 潔清 也。 ,故《左傳》云:「 則以 也。 魯爲方伯 懿親 湯沐之邑也。 方伯 特賜 故 有湯沐邑,則非 也。 鄭非 取 有 會王 於 許 方伯, 有 相土之 田 一之東 閻 之 而 衛

功。 諸 侯之大夫不世爵、禄 侯 未 世 賜 子 ,世國。 爵,視天子之元士,以君 大夫不世爵 使使 以 其 德,爵 國。 諸 以

德,此 其子孫,此諸侯之所以世國 有 補 此 德則使之爲大夫,而不 夫,謂天子之公卿 申言 功,故爵之爲諸 其 未 大夫之所以 備之義 内諸侯禄、外諸 也。 侯,而 大夫也。 不 諸侯 世 爵 能必 侯 謂 有 也。 嗣 功之賞宜及於 畿外諸 使以德者,有 之制 也。 其子之亦有 爵 以 諸侯除 侯。 而且 功者, 大 以

族,邑 受命 喪, 得 也。 也。 司 冠已爲 君之所恃以立國。故 世爵、禄者,所謂 卿」之説。 爵、禄,此亦本於《公羊傳》「《 而禄則有世者,諸侯之大夫,爵、禄皆不世 不待天子之命之也。 空之屬 世禄,故隱 以士服見 言此者,以明諸侯雖得世爵,而 蓋 而《喪服》有「大夫爲昆姊之長殤」,未 也。 未賜 〇孔氏曰:「諸侯大夫有大功德,亦 亦如之。こ 爵 大夫,必其高 視天子之元士,謂 爵 可 謂 其實先王時 世 謂 之官,卿、大夫、士謂之爵。 天子,天子命之, 八年:『官 而 諸 一世臣 官 侯初 不 愚謂:諸侯大夫 勳 天子之大夫不世 · 可 世。 滕 與國 嗣 大族 ,諸侯大夫未 有 行 位 同 世 世 未 ,世爲大夫者 其 司 休戚」,乃人 乃 禄 功, 春秋》譏 徒、司 車 見 用 孟 則 服 天 諸 子 嘗 不 之 有 未 子 侯 嘗 善 制 無 世 # 之 而

目

官而 爲 徒,叔孫氏爲司 泰誓》 司 城以聽政 不言 數 殷紂之罪,齊 世 一爵。 (,鄭罕氏之爲冢宰以當國 馬、孟孫 世官 桓 氏爲 謂 公五禁,皆 若 司空,宋樂氏 魯季 氏 言 爲 司 世

亂反。」 六禮:冠、昏、喪、祭、鄉、相見。《釋文》: 「冠,古

世

居是官

而

不易者也

愚謂: 宗伯掌禮之在上者,則有 禮 其别少,故分之爲六禮,而冠、昏、鄉 禮,而冠、昏、鄉皆屬於嘉 無軍 鄉其禮 李氏格非 禮。 也。 禮,而冠、昏、鄉 祭,吉禮 禮之在國者其别多,故總之以 同,故五禮。 ○此下三節,詳六禮、七教、八政之 Ë 也。 「冠、昏、鄉,嘉禮也。 相 此言 其 見,賓禮 事 禮 異,故六禮 禮之在民者 軍 禮,而 也。 禮之在 《周 冠、昏、 喪,凶 各 民 「, 則 官》 爲 者 Ŧi.

> 賓客。 七教: 《釋文》:「長,丁丈反。」 父子、兄弟、夫婦、 君 臣、 長 幼、 朋

賓客 客即 序,朋友有信,謂之五教、《書》 則其情尤親,故分兄弟於長幼而爲二。賓 父子有親,君臣有義,夫婦有别,長 五教」是也。 此 則 朋 七教之所由 所 友之類,然同 該 者 然旁親皆謂之長 廣,故 名 志者乃謂之朋友, 分賓客於朋 也。 幼 所 謂 友 而兄 「敬 而 幼 弟 有 爲 而 敷

數、制。 八政: 飲 衣服、 事爲、 異 别、 度、 量

尺也。 所頒以任民者也。」 方異俗,四民異業,貴賤異禮之類。 食、衣服、事爲三者,而事各不同者,若五 項氏安世曰:「事爲者、《冢宰》之九 司徒》之十二事、《考工》之六職 量 斗 數,百十 愚謂: 異别 也。 省司 即即 制,布帛 度,丈 上 職, 飲 徒

制不容異也。

禮記卷十四終

國 賜 史館 進士及第翰林院 篡 脩 孫 希 日 編 脩

月令第六之一《别録》屬 《明堂陰陽記

法。 鄭氏 多不合周法。」 孔氏曰:「周無大尉,秦 首章,禮家好事抄合之,其中官名、時、事 政之所行也。 氣 來歲受朔日」,即是九月爲歲終,十月爲受 官有之。此云『乃命大尉』,是官名不合周 ,此是時 則 秦以十月建亥爲歲首、《月令》云『爲 曰:「名 用 大裘 不 曰《月令》者,以 合周 ,乘玉輅 本《吕氏春秋》十二月紀之 法。 建大常日月之章, 周 有 六冕,郊天迎 其 紀十二月

天以 《吕氏春秋》十二月紀正與此同。 祥道曰:「天人之道雖殊,而象類之理 位,其來已久,秦文公獲黑龍以爲水瑞,何 集諸儒所作,爲一代大典 德施惠,春不興兵? 後以十月爲正。 周 不先時而起,不後時 怪未平天下前以十月爲歲首乎?」 立舊章,但秦自不能依行耳。 無不順 辰、霜露之變,俯察 『諸侯』? 而《月令》服飾車旗並依時色,此是事不合 一。聖人將有行,將有爲,仰觀日月、星 法也。 授 民 因 愚謂 案不韋死 秦好兵殺害,毒被天下 事、《周 [物性而 是篇雖祖 又秦并天下立郡,何得 官》『正歲 無不適。此《堯典》若昊 蟲 十五 鄭必謂不韋作者, 而縮,以之授民時 魚、草木、鳥獸之化, 述先王 年,秦并天下, ,亦採擇善言, 年 以序事』之 一之遺 又秦爲 - ,何能 且不 以其中 陳 水 澊 韋 而 則 氏 布 云

Ŧi.

禮記卷十五

亦過也 事,有唐、虞欽若之遺意。 以三代之制通之。 多 公所作者固 雜 秦 制,又博採 非,而柳子厚以爲瞽史之語者 然其上察天時,下授民 戰國雜家之説,不可 馬融 輩 以 爲 周 盡

上記引:「是事者,更三建五之引己。秦文》:「參,所林反。」 孟春之月,日在營室,昏參中,旦尾中。《釋

孔氏 度有 十度。日行一 六宿 以 紀者丑之次,玄枵者子之次,娵訾者亥之 以 爲三百六十五度四分度之一,今法爲三百六 夏正也。」 以 万 日 二 十月爲 夏 人數得一 餘,積二十四 ,而娵訾之次也。 曰:「孟春者,夏正建寅之月 氣之所行爲 天,周雖 愚謂:營室者,北方玄武之第 歲首,此 歲 而 氣 周 建子,其祭祀田獵亦用 不用秦正而用夏正者, 一次,凡爲十二次。 而爲 每歷二氣 天有二十八宿,分 一歲。 明 而行三十 時者因 也。

《三統書》,正月節,日在危十六度,正月 下閎《太初書》。 差」也。漢《三統書》雖作於劉歆,實即 轉,約六十餘年 中,日在營室 月日之所行,躔於亥宫營室之星也。 無常,而其 其所在,而 則爲玄枵,故以玄枵爲子,而其餘亦皆 之所自始。 次,析木者寅之次。蓋古之明時者上推 尾者巳之次,壽星者辰之次,大火者卯之 申之次,鶉首者未之次,鶉火者午之次,鶉 次,降婁者戌之次,大梁者酉之次,實沈 日在危十六度,則秦時立春日在營室初度 一月朔夜半冬至爲元,以爲日月五 百三十餘年,歲差二度。 此時 名 配以十二支之名,自後雖 十四四 不易焉。日在營室者,謂 而 自太初元 7日躔 差一度,明 度。 在北方子位,而其 日道 年上 《三統書》立春 東行,恒 時家 距 所謂 不韋 星運 星 案漢 運 是 行 大 次 行 西

中。 星。 也。 秦 志》中 H 參 時 候 真 春 者,東方蒼龍之第六星 日 度,必皆當 雖 立 八之度, 百里 參 春昏畢 中星者,必以 時 爲 時 躔 有 明 中 要,其實昏後旦 星 秦時 也 也。 將没,而 發 中 星與《三統書》中 星 Ħ. 時 者 斂 昏 加 一當 者 星無時 立 度 中 + 參者, 星 人晨 其 而 必 相 中, 春當昏畢十二度中,立春 也 度中,則立春後七 東 之見於南 中,故星之見於此 正 測 距 昏 西 旦尾七 南之位 西 昏刻之所行,以 七度 中星之所在 不有中者,以昏 又按《後漢 去日爲近,易 星、旦星爲主 方 前亦未嘗不候之以 白虎之第 則 方 東東 也。 星 度 秦 午 中。 率 西 時 位 案《三統書》, 書 相 據 去 立 者 《後漢 距 加 於推 日參 七 求日 者 其 日 春 也 律志》立 時 五度,與 謂 旦尾 尤以 出 星 距 0 初見, 算 星 行之 之中 後 人之 日 H 故 律 昏 香 + 尾 Ŧi. 相 出 道

之南端 云: 大陽 於 + 從 北 南 古 政 所 之 几 寅之辰也。」蓋日日 則 日 而 中中 七 中 端 以 運 度 日 九分度之七,至二十九 北 玉 教 繼 「孟春之月者 所在 測日 前 中也 極 民 以 而 政 星推之。 衡之器,以 自北南面望之,則昏時某星 之運 與之會,謂之合朔。 昏 事之所 星者,所 尤 上,星 自南 也。 0 在 旦之中星。 以 南 王 行 輝隱伏,不知所行 測日 畫考諸日 故《月令》於每 者敬 正 北 由 皆 玉 午之地,故謂之中 面望之,則北 以 以 日日 爲管,横設之,以二端 可 行爲主。 泛授人 行 起 IE. 得 此定時 月 者也 四 八時,必 會 度,月日行十三 而 景,夜考諸 時 日 於娵訾, 推 日 日行之所在 有 測 成 月首言日 矣。」 極 測 每 中星者 餘 在 歲之本, 行 Œ 陳氏大猷 日 何 正值 對 月 則 而 中星 處 一次之 鄭 管 追 斗 星 躔 及 度 建 氏 管 紫十 亦 辰 而

朔所 禮 矣。 斗 指 孟 視 指 短 之次,故《記》不言辰 之,如立春在 中 至 二月之名久矣,而古今歲差 至日在 寅,謂斗柄初昏指於東方寅位 也 夏 寅。 柄 H. 春 星 其 • 必 《至午月,斗柄初昏已指未、申間 矣。 指 在 大師》,亦皆以斗 建 如在二日以 指 昴,則冬至初昏斗柄指丑,季冬指寅 然 與 故《漢 卯。 建星 而 不 寅 朔 月 前 [知其次。]而鄭氏注《月令》及《周 且 可定指 日 ,斗柄指子,則季冬指 日 今時憲書立春日在女,則斗柄 有 會, 立 朔日 志》云:「斗建下爲十二辰 有 定, 春後畫刻 永 後 爲 所 以前,日月固 而 短 ,則合朔 何宫何宿。 謂 節 即即 而 建配十二月。 氣 日 但言 漸 以 月 先 多,斗 漢 不 乃 所 後 日 同。 也。 時 在 會謂 不 也 會於 以 孟 前 同 見 H. 漢時 堯時 IF. 春 宫 然十 漸 孟 之辰 亥宫 初昏 斗建 月言 玄枵 則 矣。 晚, 春 冬 合 H

齊同。 參星 焉。 晚 及 明 廣 舉 但星 氏 然,不須因斗建也。 歲 沈 月終在星分之終。 之時,則日在星分之初,月半在星分之半, 度,月半,日在營室十四度。 説 星 之時 狹,相 月 以 没,暗者昏晚見而旦早没。 謂 存 差,春爲 中云: 次 有 初度,昏得中也。 初,或舉月末,皆據其大略,不與律 日月之會及斗建言十二月者,皆 斗 〇孔 昏參中 , 前 西 明 去 杓 暗,見 氏曰:「立春之時,日在 流 有 所建 星 寅 「正月寅,二月卯 遠 日 卯 已 ·、依《三統書》,立春後六日 不不 近。 行 有早晚, 调 辰,夏爲 東轉 十二月,日之所在,或 於午,後 必用 其説是也。故今於鄭 或月節月 但二十八宿星體 此 東 明者昏早見 已午未, 説 西 星 營室號 所以昏明 相 謂 未 中之日,昏 逆。 緣斗 之建。」 至 危 理 正 娵訾 月 + 自 而 無 建 南 中 有 數 初 六 當 其 日 取 有

之内 中。 是月 月中 有中者即 可 之西,至有相距六七度及十餘度者,殊不 合者皆舉月初,其不合者乃皆在漢時中星 漢《三統書》考之,合者少而不合者多。 者,亦非是。至昏旦中星,則以孔氏所引 合。 月 計歲差,直以漢時之日躔中星爲《月令》之 星,不可正依律 在 日躔中星,其説非是。又《月令》日躔皆舉 曉。 :《三統書》推之,而於《月令》之所以不合 初 三十度之外,何耶? 孔氏謂 應中之星,必無不當是次者也。 宿 星暗 有中者,即 無舉月半月終者,以《漢 度 星體 相 得 可舉月末,不當舉已過之星以爲 「載之」,則月初星暗可舉月中, 固 早 距 雖 有 得 其大略,不正與律 法,皆大 明暗 或 載之。」 微 然既 遠,然一月三十度, 今於每月中星,悉 略 而言。 愚 云「一月之内 謂: 志》考之皆 孔氏不 但一月 齊同 今乃 其

其日甲乙, 者,姑闕其疑。

安得 雖本 行,而甲乙爲木,故日之值甲乙者屬於春。 道 藏萬物,因以壬癸爲名」。此謬之甚 熟萬物,因 物茂盛,因以 物,因以 物,因以甲乙爲名。夏,南從赤道,長育萬 曰:「春 志》曰:「出 高氏誘曰:「甲乙,木日也。」 記》之所謂 愚謂: 前 鄭氏謂「日之行,春,東從青道,發生萬 以 以在天之日行而 無 在 時 丙 青赤白黑; 日以十干循環爲名,十干分屬 天日行解之? 萬物皆解 以庚辛爲名。冬,北從黑道 丁爲名。 甲 日 戊己爲名。 ,謂積十二時 於 甲,奮 黄道 四時之間從黄道 孚甲,自 得名,然所指自殊, 軋 秋,西從白道 出 且日 於 而 入於赤道,但 Z<sub>°</sub> 乙軋 成者也。 《漢書 行但有 而 鄭 出 萬 閉 此 律 黄 五. 氏

故 孔 也? 道 有 四 删 ~,秋 疏 方之宿 南 去之,而但節存其十干之説云。 雖 北 行東 鄭氏所言,本《河圖帝覽嬉》之謬説, 曲 而 無 以 爲之解,而 陸,宜 名 東 西。 日 道 日 若 青 亦 則 謂 道, 已明言其乖違,今 春 因 行 H 而 西 躔 又反之, 陸 之 厅,宜日 所 在 何 白 按

之帝謂 謂 謂 鄭氏曰:「此蒼精之君,木官之臣,自古以 屈 少昊氏之子,曰重,爲木官。」 孔 來著德 皥 之帝 而 · 皥,廣大之貌。 天 有 以 《易》所謂 之大 立功者也。 芒角 四 時 皥。 故故 Ħ. 行 主木之官云句芒。」 句芒者,木初生之時, 帝 化 東方元 大皥, 宓戲氏。 生萬 出 乎震 氣 物,其氣之所主 也。 盛 大,故東方 氏 春之帝 句芒, 日 愚 句

語

**※**云:

「虢公夢神人,面白毛,虎爪

執

鉞

坎

執

權

而

司

冬。」此豈

人帝

之謂

乎

?

或

中央 春,炎 人官。 芒,祭木神則以 亦曰 禮》五帝爲天神,而 既以大皥等爲人帝,則不得不 仰等爲五帝,故不得不以大皥 地,木行之神,重爲木正 在天,木德之帝,伏 帝,自其質之各有所 之質麗 而 而 曰 復 司 大 大皥,祭木帝則 下土,少昊乘兑執矩 有 日 皥 帝 《漢 神者 黄帝、《周禮》所謂 乎 乘 夏 地 離 日 書》云: 執 蓋 炎 自 配 帝 四時之氣運於天,而 衡 其 食焉。 而 氣之各 戲 大 五 秋 司 司 以 氏 祀 日 夏,黄帝 皥 則 乘 配 爲 少 鄭 五 ,而其官 而 乘 木德 有 爲 食 地 皡 據 司 帝」也。 震 所 焉 五. 以 等爲 祇 緯 秋,顓 冬日 而 神, 主 執 也。 乘 句芒等 書 王 亦 句 則 規 坤 以 人 一,其 故 顓 大 日 芒 爲 有 帝 Ŧi. 頊 執 而 靈 頊 乘 繩 爲 威 旬 在 號 皥 周 Ŧi. 帝 司

爲主, 於西 鱗物 與社 之四 方」,冬田 社」,夏田 爲尊,其位 南 而 而 陵、墳衍,各因 于 此 掌建國之神位 是人官之謂 ,金神於西,水神於北,各因 几 兀 四 墳衍 類。稷者,五土原隰之神。五土原隰 類所 郊,四 於東,丘陵宜 相 行 而 周 配。 分兆 其 祀 「獻 禮 宜 亦在中,故亦兆於路 獻 位 望、 者,木火金水之神也。 而 於四 介物 禽以 禽 在 乎? 其 四 四 大 ,右社稷,左宗廟。 以 中 方。」社者,五祀之土神 土分兆於 郊 類 司 於 享礿」,秋田 羽 享 故 馬 北 亦 ○《周禮 物於南,山 烝 木 兆 如之。 春 神於 《詩》言「以 於 四 方 田 路 方 即 東,火神於 門外之右 兆 小 致 其 門外之右 獻 林 四 宗伯 類 山 兆五 五行土 禽以 禽 宜 Ш 行 故故 川、丘 澤宜 以 社 毛 帝 祀 祭 以 物 謂 几

> 必祭社 望、四 祀之土 互舉 夏之田 言 伯》皆言「社稷」,又言「五祀」,蓋以 社 而 配,五祀 土 Ŧī. 以 稷 之神,兆 祀、五嶽者合,若日月星辰,豈當錯序 以 几 爲 類 類爲 主,故 神 ,皆春祈而秋報 相 以 亦相 並言,正與《大宗伯》敘 也。 備。 祭宗廟 之 日月 川」之間乎? 配,故重言之,非 各 春 鄭氏 蓋 秋 因 祭社者必祭方,祭方者 星 爲主。 之田 其 不知社與 辰。 方 也。 以祭社稷 者 夫《小宗伯 春言社、秋言 也 《左傳》、《大宗 0 四 社 類 或 地 外 爲 即 以 祇 社 又 主,冬 宗 Ŧi. 之 以 有 稷 廟 祭 相 亦 四

立

於

西

阿

史

嚚

以

爲

蓐

收

天

之

刑

神

也

其 蟲 鱗

於

「四望」「山

亢、氐、房、心、尾、箕七宿,有龍之象,故凡 故 馬 動 氏 春 物之有鱗者屬 則 睎 其 孟 蟲 曰:「蒼龍,木屬 鱗。 木。」 吴氏 澄 愚 也 謂 曰 : 其 「東 鱗蟲 類 方 爲 角、

介,謂 理 不 羽 几 而 一,今不 謂 時 游 之 象 象物從 得 蟲: 蟲 陽 物 毛, 之 閉 風 蟲 少 謂 藏 鼓翼。 鱗 者 地 象 也 中。」其 物 謂 應 象 故 蟲 涼 物 屬 倮, 説 氣 乎 春 尤 謂 申 而 穿 備 象 將 鑿 寒。 物 鄭 解 無 露 氏 義 蟲 見 蟲 解

其音角 過宫, 卑, 宫。」 謂: 濁 故屬 鄭氏曰:「音,謂 角,觸 以 中, 取 其音 生角, 蓋黄 八十 春 民象也 細 象 也,物觸 Ŧi. 不 角者,五 鐘 角 過 行 史記》云"「九九 爲 數六十 羽。 (宫,其長九寸,寸爲九分,故 此黄鐘實積之數也。 數多者濁 春氣和則 地 樂 一音分 而 器 四。 出 ^ 之聲也。 配 漢 ,戴芒角也。」 數數 Ŧi. 書 角聲調。 屬 行 木 少 八十 律 者 者,以其 三分羽,益 而 志》 清 角 凡聲 爲 以 黄鐘 愚 曰 : 大不 木, 爲 尊 清

> 謂「春 於四 本。 林 下 尊,而從律成文,亦未嘗偏有 之始,故五音之數,獨 蓋十二律雖旋相爲宮,而黄鐘爲十二律之 角,姑洗七寸九分寸之一,故角數六十四 寸之一,故羽 鐘 生 黄鐘一均,相生而 時 林 上 調樂,以角爲主」, 大簇下生南吕爲羽 雖各有分屬,然作樂則 生 鐘 大 爲 徵 簇 數四十八。 爲 林 商 鐘 六 大簇 據 寸, 爲五 非 此 南 八十 ,南吕 故 也 以言之。 吕 音, 微 所 上生姑 必 數 主。 以宫聲 乃十二  $\overline{\pi}$ 故 五 寸三分 商 + 數 孔 五. 洗 四 均 疏

豆反。」律中大蔟。《釋文》:「中,丁仲反,後放此。蔟,七

律 吹 應 鄭 灰 也 氏 長 八寸。 也。 曰 一:「律 孟 大蔟者,林鐘之所生,三分益 春 凡律空圍九分。 氣 候 至,則大蔟之律應。 氣之管,以 銅 《周 爲之。 語 應, 中 謂 猶 室

灰

加

爲案。 律。 律志》 應於大蔟之管,又計大蔟 重,户閉,塗釁 於寅,在正 處,言正月之時,候氣之管,中於大蔟之 音,律審 乙」,下終『其祀户』,皆總主一春三月之 蔟,奏也。 「東風 「大蔟 飛 律 一内,十二辰以 之,爲大蔟之鐘。 此「律 中猶 其 而 解 所 E 管通。』如蔡所云 每律各一案,内庳外高,從其方位 上,以葭灰實其端。 春時之氣,音氣相須,故角、律 凍』相連。 以 應 戸。 中大蔟」,唯主正月之氣,宜 言陽氣大,奏地 金奏,贊陽 「三分林 也。 必 候月氣。 周 蔡邕云:『以 孔氏 必在此者 密,布緹縵 鐘 是大蔟之鐘,元 出滯 曰 : 益 ,則是爲十二律布 正月 律 一, 上. 「上從『其 而達物 其月氣 數倍 ,角是春 候 法爲室,三 室中,以木 生 加 氣 也。 漢 飛灰 至, 生於 更半 時 日 書 蔟 位 則 同 之 與 甲

灰。 案隔之,然後實土案上,以 達,黄鐘、大吕先已虚,故唯大蔟一律 寸而 之名,必有深義。 可以生之。」是古律以 制十二筩以 埋律其下。」 正月陽氣距 上齊,人地則有淺深。冬至陽氣距 大蔟之律。 曰:「雨水則大蔟八寸。」 黄帝使冷綸 候 律中此大蔟之 」,據漢時言之耳。 氣之法 止,唯 先治一室,令地極平,乃埋律琯,皆使 地有疎密,則 黄鐘一琯達之,故黄鐘 聽鳳 蔡氏 地面八寸而止,自大蔟以上 取 隋 愚 鐘」, 竹 書 以 之鳴,比黄鍾之宫,而皆 謂:《漢書·律志》云: 不 國語》漢 嶰 爲 能 竹爲之。 谷, 非 志》 先 無 也。 朱子 有 以 差 論 水平其槩,然後 鐘 爲 沈 志》所言支離 謂 之 沈 黄鐘之宫。 故 鄭氏謂 -十 二 甚 氏 蔡氏 有律 爲之應。 先 詳 括 地面 以 元 H 律 飛 皆 定 用 木 九 其

己。 附 中氣至之一日也。後放 十干、五音之義亦然。今亦姑存其説 會 \_, 不 每月有三十日,孟春律中大蔟者,謂 必深 究。 愚 謂 此 非 獨 + = 律 而

其數八,

數也。 成 次序也。 土,地十成之。 八成之。 之。地二生火,天七成之。天三生木,地 與九合,五與十合。故天一生水,地六成 天五地六,天七地八,天九地十,此天地之 行之次序也。水火木金土者,五行生成之 八者,木之成數也。天一地二,天三地四, 而 後功用著 一與六合,二與七合,三與八合,四 。地四 四時 皆以 也 生金,天九成之。 蓋木火土金水者,五行 成數言者,木火金水既 天五 運 生

其味酸 鄭 氏曰:「酸、羶,木之臭味也,凡物之酸、 ,其臭羶、釋文》:「羶,失然反。」❶

> 若麞鹿之屬。」則木之臭羶可 物以木化,則其氣爲羶。」 臭,在口者謂之味。 春秋》「草食者羶 生於形,臭生於氣。 **羶者皆屬焉。**」 孔 」,注云: 氏 曲直作酸,故其味酸。 曰 : 馬 「草食、食草木、 氏晞 通於鼻 愚謂 知 孟 《吕氏 티 : 者 謂之 「味

其祀户,祭先脾。

尊。 肉 盛于俎西、祭黍稷、祭肉、祭醴、皆三。 先設席于奥。 之先祭脾者,春爲陽中,於藏值脾,脾 户者,廟室之户,五祀之一 之西,乃制脾及腎爲俎,奠于主北。 日 凡祭五祀於廟 「春,陽氣出,祀之於户,内陽 一,腎再。 祀户之禮,南面設主于户内 既祭徹之,更陳鼎俎,設 ,用特性,有主有尸 也。 也 又設 鄭 爲 祀 氏

C 「失」,原本誤作「尖」,今據《禮記注疏》、《釋文》改。

所

往

來

世

中

·雷

者

人

所

也

Ŧi.

祀皆宫内之神。

也

竈

者

人所藉

以

養

央

祀

中

· 霤

秋

當

特

羊

也

愚謂:

位

耳。

此『特性』,謂特

祭祀、奉牛牲」。

此

等直據牲之五

藏

所

在

前

央

主心

\_, 從

心

稍

却

而

當

肝

祀門,冬祀行, 若諸侯或亦當然,其大夫 春祀户 春,從 牛,故《小司徒》『小 祭宗廟 稍却 門户者,人之所 祭之者,以春爲 最尊,故先祭之。 》文,後同 居以 也。 夏,腎最 當 有 故 而 夏祀 下腎 此 神。 春夏秋冬之 安其 秋 當 之儀。」 行者,人之 所 稍 位 心 謂 前 在 祭户之 身 主 竈 Ŧi. 故 後 而 孔 世 肝 疏 陽 # 祀 中 中 當 氏 而 云 肺,凡 專尚一 此 祭牲體,則當祭其所尚之藏 祭初降神之時 祭其所勝 之五藏以 祭,謂祭之於地也。 於人所居之處則恐其褻,故祀之於廟也 始,故祀門。 故祀户。 下 不 士虞禮》祝祭黍稷及膚於苴 祭肉、祭醴」以 也 可 Ŧi. 更 離,故 户奇,陽 者皆有神以主之,其於人最 陳 祭皆然。 藏。 春 鼎 )脾爲 也。 門偶,陰也 秋 俎 以 而 者, 祭 也,且春 此 户, 祭五祀則 以 夏后氏 先 五 上,祭初 秦制或與三代 陽 列 下, 尚 也。 祀 爲 陰 未入 三, 且 祭先脾者,言所 必皆 五祀, 正祭之禮 出 祭 脾屬 時 秋時 降 所 主 内 心,殷 前 於 祭 神之禮 之 土 出 而 也 廟 主 不 祝 交,故 者。 其 者,蓋 不同 春木 祭 出 也。 爲 口 内,内從外 鄭 禮 爲 肝 從

當冬。

從冬稍前

而

當

脾,故春位

當脾。

從肺

牲

位

南首

肺

最

在

前

而

當

時

脾

腎

俱

有

, 先用脾以

日

户

是

人之出

入,户

則

饌

于

, 筵前。

迎尸

略

如

凡

祭五

祀於廟」以下,皆《中霤禮

通

乎上

祀門

内

始,

切

近

而

中,於藏

值

脾

",脾既

春

時

Ŧi.

也;

偷

氏

所

勝

祭牲

祀之

者

此

·; 亦

當

周

祭

祭之,若

若尸

之禮 是諸 謂祭 祀 與 之小祭祀皆用牛也。《詩》言「取羝以 氏 蓋 卑 疈 地 户 ? 卑之别與 謂「如祭宗 其 也 辜 示 則 非 禮 侯 五. 降 也 祭五 祀 三獻 其 春三月 神 Ŧi. 天子、諸侯祭宗廟之禮 《大宗伯》祭地 用特 正 祀 祀於每月言之,則不限何月,如 Ŧi. 祭之禮 ,與特性、少牢祭禮 用 廟之禮」,謂大夫、士祭宗 祀 皆 牛,蓋據天子禮言之, 特 降 可 羊, 神 户 祀 不用 也。 則大夫、士 入而 示,以血祭、 此 抑或 飯、既 法 者 也。 略 以先後 飯 用 同。 以其 而 貍 特 以 軷 孔 沈 酳 爲 豕 王 疏 廟 鄭 神

來。 東 北。 風 《釋文》: 解 鄭注:「今《月令》『鴻』皆爲 凍 蟄 「上,時掌反。」〇 蟲始 振, 魚 鴻雁來、昌氏春 上冰 「候」。」 獺 祭 魚 秋 》作 鴻 雁

尊

鄭 正 氏 日 『正月啟蟄,魚陟負冰。』漢始以 「皆記 時 候 也。 振 動 也。 夏 蟄 小

屬,應 月節, 後。 於冰, 逐温 動, 置 爲 以 中 彭 誘 正月中』也。 曰 東風 始振」。 -, 驚螫 水邊, 應八節 : **桑** 日 也 正 至二月,乃大動 凡記記 來,北 暖。 正月中氣之時,蟄蟲 月 即即 陽 劉 故 中。 鴈自 東 歆作《三統書》,始 四 爲二月節,故鄭云『漢始 而 曰 漢時以驚蟄爲正月中,雨 條 正 風釋凍, 動 時候,先言者在前,後言 『魚 過 面 經 月陽氣既 南 此 風 ,上負冰。 魚當盛 至北 陳之,世謂之『祭魚 止於孟春言『東風』,季夏言 方 時 也。 上 來,將北 魚 冰 冰泮釋也。 極之沙漠也。」 肥 八 而 寒之時 也。 Ĺ, 美,獺 風之氣,生於八方, 出 獺獲水 反其 得 魚 改 對 游 陽 將 伏於水下,以 方 雨 居。」 二月, 食之, 魚,鯉 於水上,近 氣 禽 氏 水 以 慤 初 取 驚蟄 爲 水 者 故 孔 鴈 鯉 鮒 先 日 IF. 爲 始 高 爲 月 在 氏 從 魚 云 振 氏

衣,服

倉

玉,食麥與羊

·, 其

疏

以達。《釋

天子居青陽左个,乘鸞路,

駕

倉

龍

,載青旂,

言分之,補湊割裂,毫不出於自然之意,不 間 應 也。 其 之殊,氣候有南 六候,爲後世明時家七十二候之所本。 夫 月之中,而《時 如《月令》之爲善也。 有厚薄,感氣有早晚,則同 時候之變固 同者,特 亦見於《 言其方, 温 則致某災,有是理乎? 人僞作,《 一日之間 風」, 《時 訓》 記 周 或言其氣,或言其 孟 書 時 秋 乃定以 有後 時 翕 言『涼 而 訓》 訓》一篇,蓋 然皆 北温 時 已。」〇《月令》所記 先,然而 則 訓 Ŧi. 風」,仲秋 應者, 分五 一日爲 寒之異, 。《月令》總言於 地勢有陰陽 日爲 爲是物,不能 時 《周書》本秦漢 乃理之所 即 一候,謂某候 而 言『盲風』,或 取《月令》所 而 一候,一月 物之稟 有詳略不 時候 必 向 使 不 然 氣 背

> 後放此。 文》:「路,本又作『輅』。 作 「蒼龍」、「倉玉」作「青玉」。 器,本又作『器』。」○《吕氏春秋》「 載,音戴,後放此。 路 衣青 作 「輅」,「 於既 反

龍

之車, 秋》「朝 也。 也。 皆所 謂 陽左个,以 方之室也。 之,以聽 用周人順時聽朔之制 告朔於上帝及文王,而 上帝,而以文王配焉。 於个而退。」青陽左个者,明堂東方之北 「,順 聽 明堂在國南門之外,周以季秋 朔 以 室之夾堂者謂之个。 木色也。」 有鸞和之節 也。 順 於廟」之「朝」,謂告朔也。 朔焉。 時 出春令」,義尤 《淮 氣也。 高氏 南子 此云「居青陽左个」,蓋 鄭 青陽, 誘曰:「衣服 • 氏 而 ,孟春則 時 飾 曰:「鸞 每月之朔, 各 分曉。 明 則 之以 **定**左 順 堂 訓 其 、聽政 作 傳 東方之堂名 青, 路 月之方 佩 朝,即《春 出 朝 取其 於此 有 玉皆 於 則 置 春令, 東 於 於 居 氏 北 亦 此 享 室 饋

變焉 屬 是 非 木,而《月令》屬火,孔疏所謂「陰陽之説 Ŧi. 穀,羊爲木畜也。 朝」,與此皆殊。」 服各以其事 璜 耳 『天子龍衮以祭,玄端而朝日,皮弁以 青」者,欲見 金 行分配之。 也。《月令》四時所食之穀與牲,蓋 有 也 爲 愚謂:此車 取 ,非周制也。 龍 ,彘之屬水,與《周禮》合。 春言 火,而《月令》屬木,雞 凡 於古也 此 凡 鸞,冬夏言色, 亦 不 所服 車 青也,遠望則倉。 然 人功所爲,故以近色言之。」 一馬 馬 以 衣服 五. 食麥與羊者,蓋以麥爲木 玉,謂冠 衣服,乃秦自所爲制耳 《周禮》朝、祀、戎、獵 《淮南子》「春,其畜羊」, 四 牲則 時爲 孔氏曰:「龍與 ,皆所取於殷 惟 互文。 異。 飾 牛之屬土 及 則《周 又《玉藻 所 若羊則《周 旂與 佩 馬 時 者 八 禮 一,犬之 玉 尺 亦 衣 日 而 之 ₩ E "; 車 屬 U 視 以 有 衡

矣。 筵。 《孟子》、《荀卿》、《考工記》、《禮 塗」 也。 度九尺之筵,東西九筵,南 門堂三之二,室三之一。 四步,四三尺,九階, 后氏世室,堂脩二七,廣四脩一。 以達,順春氣之發舒也。 之使通氣也。 釋者釋之,其餘亦無足深究也。 理,屬金」之類,皆穿鑿無義理。 七尋,堂崇三尺,四阿,重屋。 語》,其制不見於經。 鄭氏所言「麥實有孚甲 明堂之名,見於《周頌》、《孝經》、《左傳 者。 夏世 夏度以步,殷度以尋,周度以筵,則 五室,凡室二筵。』此三代 至 室,殷重屋 Ŧi. 達者 穀 所 西己 一,直而 一,周 特《考工記》曰:『夏 四 ,屬木」,「麻實 其 旁兩 無回 明堂,則 ○陳氏祥道 義 殷 北 尤 人重屋,堂脩 七筵 夾窗 曲 多 周人明堂, 明 今就其 也 五室,三 記 疏,疏 不 一、堂崇 堂 制 白 可 之别 器 有文 漸 日 ^ 家 刻 文 疏 口

説

蓋

有

所

傳

登以爲

以應門,此明堂之大略也。 成、蔡邕之徒,其論 賓階,旁四門,而 五室十二堂矣。 三階,東西北各二階,而 、崇而不言四 曰:『夏堂崇一尺,殷堂 不言廣,言四 《月令》中央大室,東青陽 在國之陽三 韓嬰、公玉帶、淳于 九階,環之以 北玄堂,皆分左右个,與大廟 ,火室於東 夏言 然 於中央,其外别之以 堂 也 阿,其言蓋皆互備。 《明堂位》前 南門之外又有應門 脩、 311 里之外,七里之内,其 明堂者多矣。 何 南,金室於西南 而 四門,而南門之外加 廣 則 不言室,周言堂脩 而 爲 ? 不 廣 登、桓譚、鄭 九 《大戴禮》、《白 言崇,殷言 聽 階矣。 中 九 朔 階、 南南 尋」,理 十二堂 必 獨 水室 則 明堂 阼 蓋木 於 鄭 淳 則 階 或 南 康 堂 明 干 康 瀆。 當 辟 咸 堂 堂 而 路寢異實同 廟、路寢 夾、又東序、西序、東堂、西堂 見於《公食大夫禮》,有東 廟、路寢異實同制」,蔡邕 於鬼神之宫,享天神於 明堂在 廟 列四 在 一,而《玉 有九室,如 教學飲射於其中,則莫之容, 廱」,異名同實,豈其然哉? 諸侯之廟 朱子曰:「 東之南 天子路寢,見於《書》,亦東西房、東 謂 國之南可 明堂、大廟、辟 國之外 門之外,朝寢之間 無五室十二堂矣。 藻 爲 制,非也。 論明 井田 Ĕ 青 知。 可 『聽 陽 知。 之制。 堂之制 右个,東之北 成 朔 廱 王朝 鄭 於南門之外 宗廟 人鬼之室,

通之以

虎

通》,

同

實異名,非

也

則

失之

處學者

東之中

·爲

青

陽

者

非

,某

竊

意

於西北

土室

室於東北

然

也。

西總章,

成

康

成

謂

『明堂、大

有是制

乎?

則

諸

侯,四

夷之

君

則

明

謂

『明堂、大廟

西房、東西

夾

而

廣

脩

而

漸

廣 矣。

爲

青陽

而

已,則

大

西

謂

明

堂、大廟

居雉門之内

个。 堂之旁爲室,室之居中者爲大廟大室,居 《考工記》、《月令》、《大戴禮》與夫朱子之 開門耳。 堂之右个乃青陽之左个,但隨其時之方位 陽之右个乃明堂之左个,明堂之右个乃總 个,其在兩室之間而居乎四正者爲堂,則 乎四隅者爲青陽、明堂、總章、玄堂之左右 章之左个,總章之右个乃玄堂之左个, 室。凡四方之大廟異所,其左右个,則青 九筵,南北七筵,四 所言者推之,亦可以得其概矣。 明堂東西 也是。」 廟,西之南爲總章左个,西之北爲總章 个,北之西爲玄堂左个。 南之西爲明堂右个。 北之中爲玄堂大廟,北之東爲玄堂右 南之中 古人制事,多用井田遺意,此恐 愚謂: 爲 明堂大廟 明堂之制 面有階,階之上爲堂, ,南之東爲 西之中爲 雖 中央爲大廟大 不 可考,然 總章 明 堂 大 以 玄 左

> 迫隘 青陽、 以 俎、簋陳焉,獻、酬、酳、酢行焉,而不患於 止爲一堂,故於此享上帝,配祖考,牲、牢、 則《月令》之十二室也。 四隅之四室,隨方開門爲八室,又合四堂, 大室合四隅之室,則《考工記》之五室也 而堂則四周相通。分之爲十二室,而合之 四堂合五室,則《大戴禮》之九室也。以 也。 明堂、 總章、玄堂之大廟 室有壁以爲界,别 也。 以 大 廟

同。」○《吕氏春秋》「反」作「乃」。 是月也,以立春。先立春三日,大史謁之天 以迎春於東郊,還反,賞公、卿、諸侯、大夫於 以迎春於東郊,還反,賞公、卿、諸侯、大夫於 以迎春於東郊,還反,賞公、卿、諸侯、大夫於 以迎春於東郊,還反,當公、九卿、諸侯、大夫於 以迎春於東郊,還反,當公、即、諸侯、大夫於

史》:「掌正歲年以序事,大祭祀,與執事立春,正月之朔氣也。謁,告也。《大

四

秦

前

大

侯,孟 也。 郊六里。」 於此 也。 命 時所命者也。 路門外之朝 1 是月」者,或 「木數也。」 「東郊 時 法 期 文 配 Ħ ,迎青帝大皥,祭之於東郊之兆,而 簡 食焉。 所賞 + 孟 異 時賞賜之,順陽氣而 賞公、卿、諸侯、大夫,謂 。」先三日告天子,容齊三日 秋賞軍 日而 春賞公、卿、大夫,孟夏行賞,封諸 時 故 不 者 三日 《周禮》所謂 同者 齊,散 蔡氏 也。 也。 帥 里,南郊七里,西 事 孔氏曰:「周法四 别言「是月」者,事既異端 武 二,蓋 凡言「是月」之下不 邕 順 後皆 相 人,孟冬賞 齊七日 日 : 時氣也。」〇鄭氏 散齊二日 爲首尾,或異 放 「東郊 「祀五帝」,此其 此。 布仁恩 致 死 有 齊 「, 致齊 事、孤 去 郊 功德者,則 三日 時 也 邑八 九 也。 高 事 迎 里 氏 ·别言 日日 氣 伏 日 而 迎 一, 北 里, 皆 誘 春 命

氏

祀。 音然 孔氏 制 彰 帝 明 時,行庶政,故言帝者居處之宜 初 著,五行爲用於人,然後宗 物有形可見,然後聲音可聞 五. 外皆謂之郊。 蓋 王居明 天道 布 十里之遠也。 王 氣之序也。 ,此句疑有誤脱。 ,立帝然後言佐,言佐然後列昆蟲之別 殷 此以 後 禮 居 曰:「自『孟春之月』訖『其 政之節 清 也。 也。 明堂禮 《堂禮》未可 上記事之次也。 濁 先建 周 ,所以 可聽,故 周 則 二者既 **>** 日 高氏、蔡氏之説近之。 時 故 近 春以 定 奉 兆 陳 郊 出 夫 言 Ŧi. 其 五 酸 立 奉天,奉天 時 帝 鐘 爲 羶 郊 + 然後 『東風』以下, 也。」 於四郊,必 而祀之,故陳 之屬。 何代之制, 律。 里。」 + 故 五. 人君 音聲可 陳 日 里 一、衣服 然後 甲 群品 音。 愚 迎 承 Ż, 不 歲。」 然 謂 有 之 立 在 天 以 効 Ŧī. 以 或

德和令,行慶施惠,下 及兆 民 慶 賜

相

布

始豉反。當,丁浪反。」遂行,毋有不當。《釋文》:「相,息亮反。施,如字,又

孟 當者 鄭氏 賞之後即 之相。」 惠 天子之相也。]至六國時,一人知 善教也。 言「是月」也 命樂師習合禮樂,命大尉 謂 秋「命將 孔 氏 ,言使當得者皆得,得 曰:「相,謂三公相王之事 恤 曰:「《公羊傳》云:『三公者 其不足也。 愚謂: 令,謂時禁也。 命之者, 帥選士厲兵」,皆於迎 此與下節 以其 天子日 與迎氣同日,故不 慶,謂: 命 者無 贊傑俊」之屬 兆 大史」, 民 也。 休其善也 事者 非 氣還反行 其 毋 德,謂 孟 特 何? 人。 有 夏 謂

乃 離 六反,徐 一。」○《吕氏春秋》「貸 不貸,毋失經紀,以 命大史守典奉法, 音 秀。 離、依注 |作「忒」。 音 司天 儷, 吕計 初爲 ○今按: 日 常。 反。 月 貸, 星辰之行, 《釋文》:「宿,息 離 吐 ",如字。 得反, 徐 宿 音

其占 典, 氏 常,言當循用舊 天 所會 也。 有 治,正歲年以序事。」其屬 史之職》: 無差失,恒星之動甚微,而辰者即日 所次,故二十八星謂之宿。離,謂月之所 各有行度,大史主審候之也。 有二歲、十有二月、十有二 治,掌法以 歷、《詩》言「月離 辰,十二次 與 八星之位,辨 六典。 經,謂 候不 也。 星 掌天星以 辰 可 日 在 「掌 大綱。 也。 逆官府之治,掌則以 法, 有 以 其 永 建邦之六典,以 有 中 志 八 其敘事,以 司 法 所差 短 · 矣。 紀,謂為 于畢」,是也。 法 而 日 主也。 盈 月 也。 無變也。 失, 縮 初,舊 星 月有 條理。 馮 日月之行 星, 辰之變動。」是 天 會 辰、十日、二十 相 也 與 天位。」保章 宿, 朒 氏:「掌 逆 周 逆 蓋天 日 + 貨, 朓 都 邦 以 禮 謂 月 審 遲 運 月之 差 初 鄙 或 日 宿。 之 之 本 加 之 爲 而

皆於迎 此 典、法與天文皆大史之所掌也。 政 節 特重故 於 順 氣日命之,上節爲順 時 也 氣之義無與,以典、法、天文於 時 布政之首 此與上節

或

是月也,天子乃以元 謂 郊 鄭氏齊 之用甲,當時 帝,次社稷,尊卑之序也。 即 鄭 自新。』 日 云『郊之用辛』,鄭云:『凡爲 周 郊而 昊天上帝。 祈之於上帝,仲春又祈之於社稷。 "『夫郊祀后稷,以 氏 曰:「謂 戒自 後耕。」」 掌次》見之。 愚謂: 新 以 必 凡言「上帝」,與五帝别,於 之説,未免於鑿 É 有其義,但今無 辛郊 歲事莫重於農,故孟 日祈穀于上帝。 孔氏 祈農事,是故啟蟄 祭 曰:「案《郊特牲 天 郊之用辛,猶社 也。 人君,當齊 也。 《春 可考耳。 上帝, 秋 先上 傳 春 戒 而

乃 澤元辰 大天子 親載末 耜 , 措之于參保介之

> 御 推,吐回反。勞,力報反。」〇《吕氏春秋》「于參」作「參于」, 勞酒。《釋文》:「耒,力對反,《字林》力隹反,又力水反。 爵于大寢,三公、九卿、諸侯、大夫皆御 天子三推,三公五推,卿、諸侯 一帝藉 間,帥三公、九卿、諸侯、大夫躬耕 」作「藉田」、「卿、諸侯」下有「大夫」字。 九 推 命曰 反,執 帝 藉

者之間 猶衣 必 曲 也,故以 大寢,路寢。 所 鄭氏曰:「元辰,郊後吉亥也。 耒,耜之上 元日』。 日,甲至癸也。辰,子至亥也。 使勇士衣甲居右而參乘,備非常也。保 也。 治之田 甲 也。 保介,車右也。 ,明己勸 · 乙 丙 日。 子丑 介, 也。 藉 甲也。 T 御,侍 既 寅卯之屬 田 農非農者也。 等謂之日, 耕 陰也 而宴飲,以勞群 帝藉,爲天神借民 也。 置耒耜 故故 謂之辰 用 郊 盧 辰 於車右與 用 人君之車 氏 郊天,陽 辛, 植曰: 臣 孔氏 上 用 也 吉 云 力

者之間 以《陰 保 帝 饗禮在 置 記 其尤尊者表之也。 稷之粢盛 具 故 皆是王參乘,言置此耒器於參乘保介 月 事 云「親 一, 重其 介爲 會辰 故故 藉 而 知 一也。措之於參保介之御間者,車右 故云『元辰』。元者,善也。 燕 ,猶藏粢盛之委謂之神倉也。宗廟 行 陽 載 用 車 也。 庇則利推」,是也。《國 廟,燕禮在寢,此云『執爵于大寢』, 也。 在亥,故耕用亥。』未知然否。 燕禮。」 耒 事也。王之車上,惟有車右與御 天倉也。 式法》『正月亥爲天倉』,以其 一。皆取 右審矣。 耜,措之于参保 《國 案《國語》耕後『宰夫陳 於是,而獨 語》云『饗』者,蓋用 皇氏云:『正月建寅,日 愚謂:供粢盛之田 推,以 親 載, 耜 親 曰「帝藉」者,以 介之御 入土也、《考工 執 語 知用亥者 而 載之車 間 饗 一謂 饗」。 之饌 及 與 御 則 社 之 御 耕

異與?

三公五推,卿、諸侯九推」,則秦禮與周卿九發,大夫二十七發。」此云「天子三推,卿九發,大夫二十七發。」此云「天子三推,如一發,班三之,庶人終於千畝。」賈逵耕一發,班三之,庶人終於千畝。」賈逵

「繁」。
《釋文》:「上,時掌反。」〇《呂氏春秋》「萌」作上,由動。《釋文》:「上,時掌反。」〇《呂氏春秋》「萌」作是月也,天氣下降,地氣上騰,天地和同,草

發。」 《易》,各分六爻,以象十二月。 天,坤爲地,天居地下,故云『天氣下降,地 乾體在 從十一月爲始,正月三陽既 之陰陽,一年之中,或升 鄭氏曰 生,故耕藉之後,當勸農 書》曰:『土長 二、此 下,坤體 孔氏曰:「此論 陽 冒 氣 在上,故正月爲 橛,陳 蒸達 可 事。 少陽之月,務其始 根 耕之候 或降。 上,成爲 可拔,耕者 天地之氣,謂 陽氣之升, 也。 聖人作 乾卦。 《農 急

諸 交而 氣 生湯 也。 E 爲 騰 泰」也 ,氣之始也。 愚 天地 謂 天 孟春: 交則草木 地 和 草木萌動,形之 同 通矣。 所 謂 天 仲 冬 地

準直 道 所 徑、術,善相丘 王命布農 ,音導。」○《吕氏春秋》「王」下無「命」字。 殖 ,農乃不惑。《釋文》:「術,依注音遂。 以教道民,必躬親 事 陵、阪險、原隰土 命田舍東郊,皆脩 之。 田 地 事 封 既 所 疆 宜 飭 阪,音反。 審 <del>五</del>. 先定 穀 端

遂上 説 郊 鄭 壞 疆 小 之分職。 氏曰: 順 以 所 正》曰: 也 有徑。 爲 以 時 一井一 命 徑、遂, 氣而 田 術,《周禮》作『遂』。 田 『農率均 遂,小溝 舍東郊之意也。」 謂 居,以 邑之界,脩之者,懼 以 田 爲 』「。田 畯,主農之官也。 命其事也。 一夫之别,審之端之 也。步道 田 事既 夫間 封疆 日 飾以 愚 徑 其 謂 有 有 田首 舍東 **《**夏 下, 遂 附 封

> 定矣。 大阜日 謬於土宜 飭 喻樹藝之成法也。 繩 有 者,恐其有侵越也。 原,下溼日 矣。 也,命樂正 也 所殖,若黍宜高燥,稌宜 準所以 陵,陂 田 相 土 事飭則不亂於經界,準直定 ,此民之所以不惑也。 濕。 地 入學習舞。 者曰 爲平,繩所以爲直。 五穀之所宜 土 地 封疆、徑、遂治 阪 端,正 各有 ", 山 澤曰 所 以教民 也。 下溼是也。 宜 險,高 故 故 土高 則 則 此 Ŧi. E 借以 則 平. 準  $\mathbb{H}$ 丘 Ħ

舞,與 故 與季春之合樂爲終始。 舞,以舞教國子而使習之也。 不及舞,言樂則 冬之合吹爲終始。言舞則 ĪĒ. 習 ,樂官之長,掌國學之政者。 入學習 舞習樂,象陽 仲 春之習舞爲終始。 兼 氣 有 之發 舞 與 季秋之習吹,與季 揚 吹 不及聲,言吹則 仲春之習樂, 也 也 ○孟 春 秋 春之習 爲 爲 陰, 陽

是月

四 四 六

盛樂 學樂之事。 故 但 習 而預習之,與國子無與 吹 順 唯 陰 孟夏習合禮樂,則 氣之安静 也 也。 此 以 皆 一零帝用 爲 國 子

乃脩祭典

鄭 氏 曰:「重 祭禮,歲始省録 也 \_\_\_

命祀 祭之,犧牲或用牝,唯此月特禁之。 林川澤」,地示之中祀也。 祀,犧牲皆用牡 鄭氏曰:「爲 山林川 澤,犧牲 傷妊生之類。」 一毋用 《大宗伯》「以 牝 其神卑,故餘 愚謂: 貍沈 大祭 祭 月 Ш

禁止伐木。

月 禁」,是也。 若國家所需,雖非十月,亦得 非十月不得取、《王制》云「草木零落,然後 林之政令,爲之厲禁。 鄭氏曰:「盛德所在。」 山 ?,亦得採取,《山虞》「春秋 林」,是也。 若禁外四野之木,雖非冬 木在厲禁之内者, 愚謂: 之斬木不 山虞掌山

> 毋覆巢,毋殺孩蟲、胎、夭、飛鳥,毋麛 《釋文》:「覆,芳服反。夭,烏老反。」 者。 之。 《硩蔟氏》云:『掌覆夭鳥之巢。』此月亦 《王制》云『韭 材 斬 但於此月尤甚。 鄭氏曰:「爲 餘月皆無覆巢,若夭鳥之巢則覆之。故 不禁」,是也。 禁内之木、《 胎,謂在 飛鳥,謂初飛之鳥。 腹 傷萌幼之類。」 Ш 以 中 若須薦獻,亦得取之,故 唯正月則皆禁之。 虞》「凡邦工人 未出。 卵, 庖 靡、卵 人 夭,謂 秋 行 四 孔 Ш 生 時皆禁, 犢靡』, 氏 毋 而 林  $\exists$ 日 而 卵。 禁 出 掄

毋聚大衆,毋置城 是也。 郭

鄭氏 曰:「爲妨農之始。」

氏 春秋》: 「埋胔」 作「霾髊」。

掩

骼

埋

胔。

《釋文》:「骼,江百

反。

胔,才賜反。」○《吕

鄭 氏 曰:「爲死氣逆生也。 骨枯 曰 骼 肉

骴 腐 曰 司農云:『胔,骨之尚帶肉者也,及禽 胔 孔 氏 曰 : 蜡 氏 》云『掌 除

獸之骨皆是。」

田:

起,不可從我始。 是月也,不可 義。 亂人之紀。《吕氏春秋》「必」下有「有」字。 故 干陽,是變天之道 陽 時 絶 鄭 反 地之理也。 陰、爲剛、爲義。以正月而稱兵,則以 不利,主人則可。 《易》三才之道 唯不得已而 地之理,易剛 ,立地之道曰 氏 而舉義事。」 春之德爲陽、爲柔、爲仁,兵之事 以 稱兵必天殃,逆生氣 以 稱 應 義 毋變天之道,毋絶地之理, 兵。 柔 柔之宜。亂人之紀,仁之 一,而 敵 而 愚謂: 變天之道,以陰政犯陽。 也。 與 反仁,是 則 天殃必及之矣。 稱兵必天殃。 剛,立人之道 可,若兵自我起,則 以 立天之道曰 剛 亂 而 人之紀也。 逆柔,是絶 也。 百仁 兵戎不 孟 爲客 陰 陰 爲 .與 與 秋 而

> 選 春言之者,生氣之始,尤在 土萬 兵,則 春 夏皆非 興兵之時,獨 所 戒 也 於 孟

恐。 氏春秋》「落」作「槁」,「時 孟春行夏令,則風 風雨,舊本皆作「雨 雨不時,草木蚤落,國 水」,據孔 作「乃」。 疏 當爲 「風 雨 時 有

鄭氏 書,不爲義例也。 害輕者後言之。 天,或先民,或先地,大抵害重者先言之, 日 曰:「施令失,則三才俱應。 促 也。 曰:「巳之氣乘之也。 國時有恐,以火訛 亦有 風 雨不 唯二才應者,隨 時者, 相驚。」 草木 三才中或 風 蚤 雨 孔 少不 應則 氏 生

蓬、蒿並

興。

《釋文》:「姦,必

遥反,徐芳遥反,本又作

行秋令,則其民大疫,猋

風

暴

雨總

至,藜、莠、

得

應時。」

民 鄭 疫。 氏 日 П :「申之氣 風 爲焱。 乘之也。 藜、莠、 蓬、 七 蒿 月 始 並 興,生 殺 故

四 四

注云: 或 則戎 箕 直 主 也 隄 則草木零落」注云:「八月宿直昴、 其 則 氣 云: 「 天獄,主殺。」「季夏 雨 仲秋 六月宿 了,箕好 防, 大 武 。」「季春 、國大水」注云:「八月宿直昴、畢, 一房、心,心爲大火。」「季 猋 亂 兵乃來」注 水」注云:「六月宿直 事。」「仲秋,天子乃難,以 風 此 行 謹 「九月宿直 月 暴 月 春令, 風 物 直鬼,鬼爲天尸。」「仲 雍 宿 宿 雨 其 茂 塞 行 直 直昴、畢 總 也 夏令,則 以 畢 氣 則 至」注 云 備水 畢 逆 秋 一奎, 奎爲 0 「十月 也。」「仲春 雨 行秋令, 好 鄭 一,得 潦」注 云 不 雨 民 氏 高二二孟 降 大陵 於「孟 多 秋 宿直 正 溝 疾 東 行 注 則 云:「備 瀆。」「孟 積尸之氣。」 疫」注 井,氣多暑 達秋 夏行 月 行 夏令,則 丘 云: 營室,營室 春 秋 宿 隰 秋 行 行冬令, 氣」注 畢,爲 秋令, 令,則 水 直 秋 卯 八月 云: 畢 秋 尾、 潦 令, 其 宿 完 好

斗 宿直虚、危、虚、 削 不 Ħ. 不能致災,而 之,初不知 時 天,無時 初昏所指之宿 宿直箕,箕 春行夏令, 阿 云:「西 六月建未,未 仲冬行秋令,則 月,若 相 初見 指 斗 注 涉 柄所指之十 卯而大火則在寅 云: 孟 而 不 宿 孟 而 冬 識 直 有 有 「申宿直 則 春 斗 好 行 其 昴、 晨 所 斗 獨 風 風 柄 秋 值 而 指。 所 昏 危 初 指 與 雨 令, ·二辰 井 畢 天 爲 指 日夜之分也 昏 内 寅 星 季 不 言也。 ,井主水。」此 時 ",以 參、 則 自人言之, 有 畢 次 所指,乃能 夏「大 而 時」云: 與星 ,孟夏斗指巳而 雨汁,瓜 小 相 瓜 析 好 伐 定 兵 值 瓠 木 時候 雨 夫 辰 雨 參、 則在 0 時 者,又唯 北 之十 時 孟 孔 又云: 瓠 起 伐 致 則 斗 何 皆 子,仲 疏 不 行」云: 春 土 災 自 因 運 爲 以 以 於「孟 成 建 兵 鶉 季 次 乎 斗 其 轉 斗 地 餘 寅 注 ? 尾 春 初 時 於 柄 侵

斗指戌 斗 則 則 斗 則 指未 指 在 在 在 H 午, 子 午,仲 仲 而 而 而 仲冬斗指子而玄枵則 鶉首 星紀則在戌,則何以 降婁則在辰,孟冬斗指亥而 秋 夏 斗指 斗 則 指 在 酉而大梁則在 午 西、孟 而 鶉 秋 火 斗 則 能相 指 在 在 申 申 寅 申 值 而 季 季 娵 而 實 季 冬 些 秋 相 沈 夏

《釋文》:「擊,音至。種,章勇反。」行冬令,則水潦爲敗,雪霜大擊,首種不人。

感

耶

拘,而 稷。」 春 故 於人,則 異,然必確 鄭 『首種』。」〇人 秋》本 孔 氏 子論 曰:「亥之氣乘之也。 反 孔氏 戰 天 有 六經,記 國 道 指 不 曰:「百穀之内,稷先種 可 其 雜 廢 君行令有失,固 必 家之書,所言行某令失則 所 者。 以 異 應爲何事, 天參 而 歐 説 陽子云:「 人, 不 書。」《吕 則人事惑。 則其 足 首 以 種, 故故 説 絶 致 氏 天 调 % 謂 云

> 復論焉 注,而删 致 家之言 某氣之説 其 去其 義 支 宿直之謬説,其餘得 無 離 足 深究。 破 碎,蓋 今 出 但 於 存 陰 鄭 失則 陽 氏 Ŧi. 之

仲春之月,日在奎,昏 訖 弧 中 度,弧 近斗,故舉弧、建以定昏旦之星也。 令》中星皆舉二十八宿,此舉弧、建,獨 月中日在婁四度。 統書》二月節 六度,距度濶遠,不可的指,而弧近井,建 二十八宿外者,蓋井三十三度,南斗二十 案:漢《三統書》,二月節 奎,西方白虎之第一宿, 十度,是二月節昏 人井十五度訖二十九度,建星入斗四 則秦時昏井二十四度中,旦斗七度中, 星在輿鬼南,建星 昏井二十二度中,旦斗五度 秦時 弧中,旦 時 弧 二月節 在 而 H 星 建星 降 南 在 得中,旦時 斗上。 婁之次也。 奎五度,一 日在 中。 案《三 奎 ^ 月 度 在 建

度也。」 而又以 十六 井第 去 及今《欽若書》、《恒星表》,亦皆不合也。 星在斗十度」者,考之晉、宋兩朝《天文志》 星 刻多寡不同。 初言之,二月節 六十五度餘 刻,約有十七度餘 始昏,不盡二刻半爲明,昏明相去,少晝五 應一百八十二度餘。但日入以後二刻半 十二度,計春秋分昏中之星,去明中之星, 星 日 相 記中星與記日躔不同: 得 度 距 十五度,得九十一度,是弧星當井之 九 中 也。 十 春分中星距日之度,及春分昏旦中 之度言之,皆欠分曉。 也 愚謂 從井十六度,至斗之初一百七 度,從奎五度爲二月節 ,則建星不得在斗初,在斗十 孔氏既據奎五度爲二月節 :《月令》日 孔 與春分相去十五日,晝夜 氏 ,則昏明 曰 : 春 躔 記日躔必以二 中星相去 分,昏 中 又其言 星,皆據月 中 數至 之 建 星 百

> 在二十八宿之外也。 中星兼記五車、天狼、軒轅等十五星,亦 星體明大者,皆可表之以 星則 + 令》記弧、建、《夏小正》記 八 宿,以 不 ·然,但 日 之所 值 初 歷 昏 唯 時 此 見於子午線上,而 爲中星。 南門,今時 一十八 星 也 故《 憲 月 書 中

音角,律中夾鍾。 其日甲乙,其帝大皞,其神句芒,其蟲鱗,其

絲。」鄭以十分之寸計,蔡以九分之寸計, 志》曰:「夾鍾,言陰夾助大蔟宣四方之氣 十五。仲春氣至,則夾鍾之律應。 鄭氏曰:「夾鍾者,夷則之所生,三分益 定曰:「春分則夾鍾七寸四分三釐七毫三 而 曰:『夾鍾出四隙之細。』」 出 ,律長七寸二千一百八十七分寸之千七 種物也。 位於卯,在二月。」 《漢書 ,後放此 《周語 蔡氏 · 律

其數八,其味酸,其臭羶,其祀户,祭先脾。

始 》一始 होशं 水 」作「李」。 桃 始 ○按: 華 倉 雨,去聲 庚 鳴 鷹 化 爲 鳩。 吕 氏 春

節。 鷹 則 鳩 來改 漢 鷙擊也 黄 也 自 不鷙矣。」 有 蟄,據其 反 月節」,證 歸 初驚 也。 喙 參 小 H 《左傳》: 差 雪 鈎,善搏 雨 舊形之謂。」故 鼠 蟄 鳩,搏 高氏誘曰:「鷹化爲鳩、喙正直、不 鄭 故 水 雨雪,至 八早 作· 化 爲正 氏 爲 也。 爲駕 此 孔 日 陳 正 攫 在 『鷞 穀 月 雨 : 月 氏 氏 ; 正月,若其 「皆 也 中 水 此 鴽 中 應 鳩 澔 陸 爲二月節 驚 始 復 鷹 陽 氏 曰:「孔 氏 記 雨 漢 「言『漢 化 雨 化 而 水爲二月節。 時 佃 蟄 司 始 變,則 爲 水, 爲 候 曰 : 爲二月節 寇。』鷹感秋氣 以 晚 田 鳩 氏 也 也。 陽 雨 始 在 鼠 云: 喙柔,仁 鷹 鳩 水 升 二月。 以 雨 倉 爲一 於 復 若 雨 由 庚, 水、 名 化 化 水 地 腐 至 故 者 鷞 一後 驚 月 爲 氣 爲 鸝 草 而 上

説

爲是。

喙 鸇 氏之説 本 爲 氏之説合。 形者 直 ,鸇之爲 螢 雉 而 不同。 也。」 不 爲 搏 布穀, 蜃 蓋化 了擊,則一 爵 愚 案《列 者,變其舊形之謂 布 爲 謂 不當謂之化,疑鄭 穀 蛤,皆不言化 子書》云: 鷹化 久 、復爲鸇 爲鳩,鄭 也 鷂 是 之 氏 若 與 不 之 鄭 爲 高 旧 復

衣青 天子 其祀 青 謂 日 之廟。 居 衣 大 陽大廟,明堂之東堂也。 ,服倉 青陽 天告朔皆於堂,以其爲事神之所,故 廟 者 ,明堂十二室,十二月分居之,而 大廟, 玉,食麥與羊,其 乘 鸞路 駕 明堂之四堂 倉 器 龍 疏 載 以 達 青 旂 皆

「少,詩召反。」 是月也,安萌芽,養幼少,存諸孤。《釋文

物 鄭 之始 氏 曰: 生 者 助 生 幼 氣 少, 也 動 物 之 愚 未 謂 成 萌芽, 者。 存 植

物 故 謂 死 Ë 事 存 存 成 諸 卹 之。 孤 故 養 仲 幼 夏 衰 而 老。 物 無 方 父 盛 日 仲 故 孤 冬物 養壯 仲 皆 春 佼。 藏 物 始 故 仲 生 飭 秋

反。

掠

音

亮。」

擇 之配 誥 牲 業 鄭 元 社 但 侯 營洛邑始成,非 土之總神,句 也。 言「祭社 以 》:『戊午, 氏 日 」,則天子、 》云祀社,『日 食 逮 日 命民 祀社 焉 於大夫以下成群立社,皆得 社 社 嫌嫌 日 曰 ,后土也。 諸侯祭之可 龍 乃 「命民 用 《吕氏春秋》「民」 常祭 社 爲后土之官,能 用 若唯 甲。」 于 甲 也。」 新 社」者,社 國家得祭, 用 邑。」用戊, 孔氏曰: 使民 日之始 知 矣。 愚謂: 「作「人」。 祀焉, 自 平 也。 曰「命民 天子、 九 社祭 周  $\sim$ 神 土,以 祭之。 郊 公告 其 諸 Ŧī. 農 召 特

文》:「省,所景反,徐所幸反。

图,音零。

圄,魚吕反。

去,

命

有

司

省图

吾

,去桎梏

毋肆掠,止

獄

釋

以禁守繫者 鄭 在 氏 日 「順 ,若今别獄 陽 寬也。 省,減 矣。 桎梏,今械 也。 囹 圄

睘 者 睘 以 高 法,桎梏 刑之桎梏, 增築之,至此則減省之也。 敢 日: 有司視其 人未服,或 大司 氏 睘 土」者,其罪 ,乃《大司寇》 縱 足 土,皆加 誘 日 土聚教罷民,秦時謂之囹 意 「肆掠 寇》所 也。」 티 : 桎,在手 而 可赦者赦之,故省去囹 當當 坐諸 桎 宜 「肆,極。 謂肆意笞箠。 謂 一件,而 拷問 無 本輕,此時行寬大之政,命 愚 一罷 》所謂 嘉石」者也 日 去 謂 梏。 法,此 民 掌囚 而 「罷民 有司 之有 掠,笞也 不得 掠, 守之。 云「去 之害 罪 蓋 謂 古者五 理 肆意捶治 毋 過 雖 捶 吾 官 肆 其 桎 X 而 輕 治 吾 世 掠 未 梏 而 人 刑 刑 應 人。」 也。 仲 者,罪 麗 ۲, 置 冬 氏 令 不 周 而 也。 一, 所 謂 之 時 Ŧi. 鏞 於 吾 時 不

三者,所以寬之於已犯,止獄訟,所以禁之《周禮》注曰:「争罪曰訟,争財曰獄。」上

於未然。

帶以 是月也,玄鳥至。至之日,以大牢祠于高 天子親往,后 禖,音梅。 飲 世 從往侍祠。 楳之禮,祀天於南郊,而 謂先帝始制爲嫁娶之禮者,蓋伏羲 禖,祈嗣之祭也。 天子所御,謂今有娠者。 鄭氏曰: 玄鳥,鳦也。 《詩》云「天命玄鳥,降而 於 三韣,授以弓 婦,有女御,獨云『帥 高 韣,大木反。」○《吕氏春秋》「帥」作「率」。 禖之庭,以 「變『媒』言『禖』,神之也。 妃帥 《周禮》天子有夫人,有嬪,有 古以玄鳥至爲祠 矢,于高禖之前。《釋文》: 九嬪御。 高,尊 神惠顯之也。 九嬪』,舉中言 以禖神配之。 也。 禖者, 禖神, 生商」,是也。 於祠、大祝酌酒、 乃禮天子所御 高禖之候, 帶 也。 御,謂 以弓 也。 禖, 高 高

> 《周禮·大宗伯》「國 禖,是祭天,高禖爲配祭之人。 娶之禮。』既用以配天,先媒當是伏 禮》曰: 免於瀆矣。 中蓋兼有此祭。 來舊矣。意者天子繼嗣不 言高禖之祭,然以《生民》、《玄鳥》之詩 此用大牢者,謂配帝之牲也。」〇《周禮》不 天材。」 韣,授以弓矢,求男之祥也。 『媒』字從女,今從示,是神明之也。 本》及譙周《古史》云: 『媒之言謀也。 王居明堂禮》證之,則祠禖祈 『帶以 孔氏曰:《周 弓韣,禮之禖 謀合異類,使和成者。』《世 若以此爲歲祀之常,則未 有故,則旅 『伏犠 禮 蕃,乃特行之。 下,其子必 • 制 媒氏》 《王居 祭天特牲 嗣 以儷 上帝」,其 之禮,由 祭高 明堂 皮嫁 注 及 得

啟户始出。《吕氏春秋》「啟」作「開」。 是月也,日夜分,雷乃發聲,始電,蟄蟲咸動, 也 月 此 漸 孟 蔡邕云:『季冬雷 書》『日中 書 爲 謂 後 乃發聲者 有 時 鄭 而 不見之漏 春動 蟄 月 有 五. 畫 記 候 升於天之下,其 夜,日人後三刻 ,故言乃。」電 氏 陽 啟 蟲 五十 + 時 夜 者 日 候,以 户 氣 於地上 刻 咸 漏 庾 雷 據日 始 四十五刻」,與蔡校 星鳥」,謂『日 動 漸 六刻,夜有 刻。 又 蔚 出 盛 是陽 記 則 應二分二至也。』」「日 云 ,則蟄蟲應 馬 謂 出 以 時 IE. 是 融 『先記 發所蟄之户而 氣之聲,將上 月 擊 在 人爲限。』蔡邕以爲星見 候 陽 氣 日 云:『晝 未 於陰,其 四 地 光 發 出 皆動 見 + 下, 陽 揚 時候 而 之 前三 四 孔 也。 振 則 有 微 也 漏 刻 氏 光 出 雉 則 刻 。」「户謂穴 刻 五. 以 Ŧi. 與 H 以 出 乃見。此 皆 光 應 + 鄭 陰 + 明 : 也。」「雷 雷 至 「爲書。 不 刻 注 夜 而 相 五. 應 出 此 重 . 見。 刻, 夜 分, 雊 衝 節 有 尚 高 記 月

> 益 愚 升 共九十六刻,春秋分晝夜各四十八刻 古法: 晝夜共百刻,春秋分晝夜各五 夜分」,則當以 光,故畫刻常饒 人之後 五 氏 於畫 + 謂 誘 刻 日 始發 以 容 將將 明明 : 以 日出 止者, 聲。 出 時 冬 昏明之限言 之前 家所謂「晨 陰 人之度言 日出入言,不計晨昏分 生子 以 ,夜刻常乏。 震 閉 令兆 氏 距 氣 古 春秋》無「木」字,「令」下 不備,必 爲 地平下十八 陽 民 「,則 雷, 昏 則 日 伏 分 減 激 春 十刻。 於 然《記 有 也 夜之 氣 秋 下 雷 凶災。」《釋 分 爲 今法: 將發 度皆 Ŧi. 畫 是 》言「日 蓋 電 月 日 度 夜 晝 也 以 各 有 初 陽 有

文》:「先,悉薦反。」○《吕 有不戒其 先雷三日,奮木鐸 于」字,「將」作「且

雨 先雷三日,謂先 容止 必變,所 猶 動 以 静 畏天威也。 春分三日 孔 氏 日: 也 小 人不畏天威 君 子 鄭 迅 氏 日 其

变分,則司变、量,鈞衡、石,角斗、甬,正子支節性情必不備,其父母必有凶災也。」『有不戒其容止者』。言此時夫婦交接,生懈慢褻瀆,或至夫婦交接,不可斥言,故曰

權、概。《釋文》:「量,音亮。甬,音勇。概,古代反。」日夜分,則同度、量,鈞衡、石,角斗、甬,正

○《吕氏春秋》「甬」作「桶」。

鄭氏 正 甬,今斛也。 三十斤日 一,皆謂 高 氏 誘 平之也。 「因晝夜等而平當平 日:「 鈞,稱 稱 鈞,等也。」 錘 上 丈尺 日 日 權。概,平斗斛者。」 衡,百二十斤日 曰度,斗 陸 也。 氏 斛 佃 同、 日 曰 : 石。 量。 角、

陸之説是也。鈞、均字通,均亦平也。「鈞,讀如『四鍭既鈞』之鈞。」 愚謂:高、

毋作大事,以妨農之事。○《呂氏春秋》無「之」字,是月也,耕者少舍,乃脩闔、扇,寢、廟畢備。

鄭氏曰:「舍猶止也。因耕事少閒而治門

役之屬 若出耕廬舍,則不暇及於是矣。 户 寢、廟之闔、扇皆備 廟,奉先之所也。 而 而門户之功易畢,故乘此時 未往 也。 用 處 木 於田 愚謂: 曰 闔, 中之廬 庶人 用 也 少舍,言 竹 祭於 此時 葦 也。 日 猶暫 寢。 少 耕 寢, 扇 息 事 居 畢 得 而 猶 大 脩之。 室 備 止 事 未 息, 亟, 也。 兵

文》:「漉,音鹿。陂,彼宜反。」是月也,毋竭川澤,毋漉陂池,毋焚山林。《釋

故也 愚謂 不能 通水 也。 鄭 二者主漁言之。 氏 若民間 取,若陂池,則 Ħ 티 : 《周禮》春田 池。 「順 焚 陽 方氏 Ш 毋焚 養物 林則有禁,以 用火 慤曰:「川 漉 也。 山 以 了; 此 林,主田言之。」 網罟,可盡之矣。 畜水 國家大蒐之禮 澤非竭 日 蟄 陂, 蟲已出 其 穿 水 地

天子乃鮮羔開冰,先薦寢、廟。《釋文》:「鮮,依

注

1氏春

獻

音獻。」〇《吕 藏冰 後賦 鄭 愚謂 之』,藏時祭司寒,明啟時 受冰。」 火出而畢賦,自命夫命婦至于老疾,無不 冰、祭寒而藏之、獻羔而啟之。 食肉之禄,冰皆與焉。大夫命婦,喪浴用 也,桃弧、棘矢,以除其災。其出入也時, 藏之也,黑牡、秬黍,以享司寒。 朝之禄位,賓食、喪、祭,於是乎用之。 窮谷,固陰沍寒,於是乎取之。 其出之也 祭司寒也。 地示之尊者,而用羔祭之,告祭禮輕也。 詩・七月》言「獻羔祭韭」、是也。 氏 之。 E : 西 司 陸 《春秋傳》曰:『古者日在北 「鮮當爲『獻』,聲之誤也。 寒、杜預以爲玄冥之神。 孔氏曰:「《左傳》云『祭寒而 朝覿而出之。 祭司寒而出冰。 秋 》 鮮 作 亦祭司寒也。」 其藏冰也,深 薦於宗廟,乃 公始用之, 其出之 ○蘇氏 玄冥, 獻羔, 陸 其 藏 Ш 而

> 不及。 四 恃 冰啟冰,亦聖人輔相調燮之一事耳,非 不作,民不夭札也。」 風,秋無苦雨,雷出 於是乎大發。食肉之禄,老疾喪浴,冰無 之。至於四月,陽氣畢達,陰氣將絕,則 發,其盛在下,則納冰於地中。 常有以解之。 夫陽氣之在天 轍 陽作,蟄蟲啟,陽始用事,則 日 此以爲治也 : 「古者 是以冬無愆陽,夏 藏 十二月陽氣藴 地、譬猶火之著 冰 發 不震,無災霜雹,癘疾 冰 胡氏 以 無 節 伏 安國曰:「藏 啟 伏,錮 陰,春 至於二月, 陽 於物也,故 冰而 氣 三公、 之 而 無 廟 薦 車 凄 冰

夫」字。 上丁 九卿、諸侯、大夫親往視之。《呂氏春秋》「習」作 人」、「釋」作「舍」、「菜」作「采」、「帥」 鄭氏曰:「將舞,必釋菜於先師以禮之。 ,命樂正習舞,釋菜。天子乃帥 作「率」,無「大

本亦作

一一。

仲丁,又命樂正

人學,習樂。《釋文》:「中,音仲,

樂」以 氏曰: 於日夜分之後者,欲其與下文「仲丁」「習 之。蓋樂觀其學業之成就,而因以考察其 芹藻之屬。釋菜於先師,而以國子學業之 材否以鼓舞激勵之也。 季春合樂,天子與公、卿、大夫皆親往 公、卿、大夫、元士之適子也,故仲春習舞, 成告之也。 至此又命習之,以觀其學舞 者,上旬之丁日也。孟春既命國子習舞, 合樂,天子親往,餘則否。」 節奏齊同,謂之合舞。 舍菜,合舞』,一也。 夏小正》曰:『丁亥,《萬》舞入學。』」 類 「此仲春習舞,則《大胥》『春入學, 相從 樂正所教者,王大子,王子, 也。 據人所學,謂之習舞, 仲春習舞,季春大 此事在上下,乃言 之成也。 愚謂:上丁 菜, 孔 視 行反。

政,爲國子命之者也。而使習之也。凡言「人學」者,皆國學之國子之學舞者已成,又命樂正兼教以聲容仲丁,中旬之丁日也。樂兼舞與聲而言。

是月也,祀不用犧牲,用圭璧,更皮幣。

更,古

谋』是也。」 「應祀之時,用圭璧更易此犧牲,非 氏曰:「應祀之時,用圭璧更易此犧牲,非 氏曰:「應祀之時,用圭璧更易此犧牲,非

來征。仲春行秋令,則其國大水,寒氣總至,寇戎

氣動也。」
鄭氏曰:「酉之氣乘之也。寇戎來征,金

鄭氏曰:「子之氣乘之也。十一月爲大行冬令,則陽氣不勝,麥乃不熟,民多相掠。

四五七

行夏令,則國乃大旱,煖氣早來,蟲螟爲陰,民多相掠,陰姦衆也。」

鄭氏

曰:「午之氣乘之也。

蟲

螟

爲

害,暑

季春之月,日在胃,昏七星中,旦牽牛 中,旦 星,南 時 度。 當張 氣所 氏 昏時,七星已西過 中,旦斗二十六度中。 之第二宿。 胃者,西方自虎之第三宿,而 在昴八度。 案《三統書》,三月節日在胃七度,三月中 Ł 星 四度中,旦 生爲災害也 以 方朱 女二度中。 「自胃 在 日 漸 南 鳥之第四 案《三統書》,三月節 秦時三月節日 長 方之中。」 七 一時當牽牛二度中 度 H 至七星 二度,秦時三月節 没 據 之 此 宿。 時 三月中昏 則 初 牽牛 愚 稍 漢 在胃 謂 度,有九 在 大梁之次也。 時 ٠, 西北 九度。 三月 也。 昏 北 三月節, 翼 張二 中。 方玄 初香, + 〇 孔 四 故 節 昏 九 度 度 武 七 初

> 明 至張 半 中 矣。 星 四 與 得 度,爲 日 九度 相 距 當當 一百七度,則七星 九 爲 + 九 百 度, 七 再 度。 加 不 昏 從 得 分 目 九 刻 度

其日甲乙,其帝大皞,其神句芒,其蟲鱗,其

音角

律中

·姑洗。

《釋文》:

「洗,素典反。」

鄭氏 洗七寸一分。」 辰,在三月。」 「洗,絜也,言陽氣洗 姑洗之律應。 百物,考神納 一,律長七寸九分寸之一。 曰:「姑洗 賓。」 周 者,南吕之所生,三分 蔡氏元定曰:「 語 **∀**⊟: 物辜 漢 書 姑姑 絜之也。 季春 洗 律 穀雨 所以 志 氣至, 位 則 日 脩 於 益 姑 則

其數 反。」○蓱,或作「萍」,誤。 桐 始 「鴽,音如。 華, 八,其味酸,其臭羶,其祀户,祭先脾。 田 鼠化 虹,音紅,又音絳。 爲 鴽 ○《吕氏春秋》「蓱 虹 始見, 蓱始生。 見,賢 《遍反。 |作「萍 蓱, 步丁

也。」 謂 鄭  $\Box$ 之虹。 氏 日 桐 愚謂: 皆記 蓱,萍 梧 桐 虹者,陰氣之交於陽氣而見 也。 時 也,其大者 候 也。 郭氏 鴽,牟 蘋。」 璞曰 無 : 0 高 氏 螮 鸙 誘 蝀

青陽右个,明堂東方之南室也。 衣青衣,服倉玉,食麥與羊,其器疏以達。 天子居青陽右个,乘鸞路,駕倉龍,載青旂,

者也

), 故

陽盛

而

見,陽衰

而藏

無「命」字。

是月也,天子乃薦鞠衣于先帝。《釋文》:「鞠,居

六反,又去六反。」 轅氏。 土 大 功統於帝,故祈蠶之祀主於先帝。 鄭氏曰: 色黄,蓋季夏所衣之黄衣也。 桑之服。 一祭而 德 而 王,而 薦之,若獻之於神然也。 蠶事始於軒轅氏之妃 「爲將蠶 先帝,大皞之屬。」 配 食於黄帝,薦黄衣者,所 求 福祥之助。 西 愚謂: 先帝,謂 軒轅 陵氏,后之 鞠 薦,謂 衣,黄 鞠 氏 以 乘 軒 衣

象其德也。

子焉。 實。《釋文》:「覆,芳服反。爲,于僞反。」〇《呂氏春 命 治舟牧 天子 覆 舟,五覆 始乘舟,薦鮪 Ŧī. 反,乃告「舟 于寢 廟,乃爲 備 具」于天 麥祈 秋

不親 先薦 漁也。 於五 尊所御,故 舟牧,主舟之官,蓋冬官之屬也。 伯諫,以爲阜隸之事,非君所及,則諸侯猶 爲麥祈實。 而 視其底,又反之以視其面 美,故又 一、恐其 漁也。《月令》季春季冬天子皆親漁 寢廟,是月 鮪,王: 其慎 有 特薦之。 《左傳》魯隱公矢魚於棠,臧 穿漏 鮪也,似鱣 又薦: 之如此。 也。 麥將 鮪 乘 者 而 熟,故 ,反覆視之,以 天子 鮪 舟 小。 本 以 乘舟,示 危 季冬嘗魚 大 是月始 事, 覆之以 薦 鮪 而 親 僖 至 至 至 而

● 「牟無」、《禮記注疏》作「鴾母」。

與周典異矣。

者盡 是 春 秋》「句 鄭氏 月 達 也 不不 生氣 曰:「時當宣 作「牙」。 可以 方盛 ○按: 内。 陽 《釋文》: 出,不可收斂 内,當音納,季秋「務 氣發 「句,古侯反。」〇《吕 泄 , 句者畢 也。 内 同 句, 出 屈 萌 氏

發故生氣盛,不可以內,所以順發宣之氣,之曰「生氣」,自天地言之曰「陽氣」。陽氣生者。芒而直曰萌。」 愚謂:自萬物言鄭氏曰:「時當宣出,不可收斂也。句,屈

士,禮賢者。《昌氏春秋》「廩」作「命」。 絕,開府庫,出幣帛,周天下,勉諸侯,聘名天子布德行惠,命有司發倉廩,賜貧窮,振乏

下文所言是也。

之人,聘而禮之,將與興化致理也。」 藏 居 高 氏 也。 而 貧、鰥、寡、孤、 無食曰 誘曰:「方者曰倉、穿地 周 賜。 絶。 勉,進。 獨 振,救 日 窮。 也。 有名德之士,大賢 行 府 而 日 庫,幣 無資 窌。 日乏, 帛之 無 鄭 財

> 乏絶; 賢不止於名,禮不止於問 賢者,有德之稱。 則 者,周天下,言其所聘所禮之廣。勉諸 絶。」 無 問 氏 宣散之時,當順 財 也。 又欲諸侯之致 曰 日 : 開府 1貧,無 名 方 周 士,不 氏 庫 謂 慤曰 親 而 給 天散物,不 仕 日 不 出 力焉。 : 窮。 聘以 者。」 幣帛 「發倉 足 也 暫 ,以聘名士。 問之,禮 名士,有 廩 無 可 孔 勉 以 日 積 氏 猶 乏,不 賜 聚 勸 日 以體之。 貧 實 在 也。 之稱。 以 窮, 内也。 禮賢 續 侯 振 物 曰

下孟 聲 循 開 是月也,命司 行國 後文「壅塞」 通 反。 道 邑,周 道達,音導。 路 毋 「閉塞」皆同。 空日:「時 有 視 障 原 障,之亮反,又音章。」〇按: 塞。 野 脩 《釋文》:「上,時 利隄 雨 將 降, 防,道 下 掌反。 達 水 溝 上 瀆 騰 行

之也。 時 雨 將 隄 降 防 者 所 夏 以蓄 時 恒 水,故 多 水 備 潦 水隄 , 故 於 防 此 爲 預 先。 備

道 得 溝 Ш 然水潦之既盛,有非可專恃乎隄防者,故於 以歸 達之反。 也 :瀆則道達之,所以使田 ; 於道 於畎 路則開 障塞則 澮 也。 障者,開通之反; 通之,所 水無所歸,必泛溢 間之水得以 以 使平地 塞者, 之水 於溝 達 於

門。」《釋文》: 合,疑古今本異。 於僞反。」〇《吕氏春秋》「獵」下有「罼弋」字,無「畢翳」字, 田 (月令》,疏以爲即《吕氏春秋》。 九」作「國」。 獵 置 果、羅 鄭注"「今《月令》無『罘」。」〇按鄭注引今 「置,子斜反。 罔、 畢 翳、 罘,音浮。 然與今《吕氏春秋》多不 餧 潤 翳,於計反。 之藥 毋 出 餧, 九

瀆

而害禾稼,停積於道

路而

妨車徒矣。

門猶沿舊制

故曰

1九門。

畢 獸 鄭氏曰:「爲鳥獸方孚乳, 獸之藥所不得出 天子城十二門,東方三門,王 苦日 翳 ,射者 置罘,鳥 所 器日 以 也。 自 隱 羅 嫌餘三方九門得 也。」 罔。 傷之逆天 小而柄長謂 高 氣 氏 所 誘 在 時 日 候 出 也 之

> 故 侯降於天子,則九門。 此月則皆禁之。」 正 特 門,平日此等之物皆不 戒之。」 吴氏 愚謂: 澄 曰 : 秦本侯國,其 得 天子 出 南 一,餘門 十二門,諸 三門,王之 則出 時 或

曲 反。 植,直吏反。 蠶事既登,分繭稱絲效功,以共 鄉躬桑。 勝降于桑。 是月 有敢惰。 植、籧」作「挾、曲、蒙」,「使」下無「以 省,所景反。 也 命 《釋文》: 禁婦 籧,居吕反,亦作『筥』。 野虞毋伐 具曲、植、籧、筐、后妃 共,音恭。」〇《吕氏春秋》「勝 女毋觀,省婦 「柘,之夜反。 桑柘。 戴,音帶,本亦作『載』。 鄉,許亮反。 鳴 使, 字。 郊 鳩 以 廟之服 拂 齊 勸 戒 其 作 觀,古 **警** 羽, 任 親 毋 事 東 戴 唤

農急 鄭氏 言降者,若時始自天來,重之也。 伐桑柘, 也。 曰:「野虞,謂 愛蠶 戴 勝,織 食 也。 紅之鳥 主田 鳴 鳩 及 飛 是 山 且 林之官。 時 翼 二者,蠶 恒 相擊 在 透趨 桑。 毋

也。 耕 底 者是 也。 所以 功 組 一件 婦 不 帥 將 於桑,是月,其子强 執養宫事。』 遊遊 r', 后 日 紃之事。登,成 留 生 先天下也。 以 内子 春 謂 [蒙,方底日 也 是月拂擊其 養蠶,故禁民 養 曲 之 也。 妃 勸戒之。」 詔 世婦及諸臣之妻也。 蠶 候 薄 女 后 親 戴 也 巾 也 帥 也 麵 毋 勝,《 外、 孔 東鄉 觀 留 曲 植 氏 以 筐,皆受桑器 羽 以也。 夏 内 養者 爾 ,去容飾 高 一,槌 植 日 不 爲 直 者 飛,從空桑 小 命婦始蠶 雅 氏 天下 . 得 也。 正 「, 所 籧、 槌, **※**云: 敕往蠶 刺 鄉 誘 斫 | | | | | 時 上飛數十丈乃 日 伐 筐 先, 也 后妃 1 《内 懸 氣也。 於北 夫 『妾子 所 薄 也。 中 鶠 者蠶 勸 鳴 婦使,織 宰 人 親 柱 來 鳩 桑 以 衆 鳩 與 郊。」女, 職 採桑 也 王者 。」部 是明其 與 畢 養 下。 民 世 始 Ĭ: 蠶 班 將 柘 蠶 一,示 婦 也 親 復 課 紅 器 云 圓 牛 鳩 皆

> 使 皆欲 器 薄。 説不 九 惜 事 繅 繭 爲之,所以籍 也 言 婦 之勤 0 也 嬪 無 則 香虫 則 稱 謂 同,高 籧、筐 也。 觀 食 其 事 稱 絲 畢 # 專勉 惰 或 齊戒,重其 愚 效 其 次記蠶候,次言具蠶器 將 婦 也。 謂: 外、内子女,即《周 則尊者不在禁限,故 有 絲 功 課 以 氏 及 之重 不 力於蠶 者 功,以 蠶 諸 竹 蓋 蠶成在 戴勝降 未繅 可闕者 0 爲 以目驗得之。 臣 輕 事 之,所 之妻』者 事 植,以木爲之,所 加 也 戒飭之也 則 故 也。 孟 于桑 分其 呈 夏,此於 以 禁容觀 但省之而已。 效 容觀直禁之,婦 鄭氏、高 盛桑葉。 禮》之内、 其 繭 以 知無夫 曲 (功,以 之多少 經 次言 初 此 ,省婦使 云 以 節 蠶 外宗 皆 以 課 禁 萑 氏 后 首 時 與 之 其 懸 葦 婦 妃 預

● 「籍」,當爲「藉」之誤。

之親 桑」。 親 更躬 者,以仲 浴 採 躬 月又浴 浴于川」,注云:「大昕,季春朔日。」是三 云: 氏 事 三時,而 敕之事。 二月浴種 蠶 桑 桑 爲 種 曰:「此 香蛙 時,后 桑 尤亟 東鄉 餇 麵 孔 始採 非也。」 蠶 浴 是 春 蠶事 次言 氏 也。 故 蓋農桑爲衣食之本,然農 也。』皇氏云『二月浴之,三月乃 經 躬 龍 麵 謂 既 妃 必待三月,故《詩》言「蠶月 桑時 桑」。 也。 季 記 成 親 二月、三月皆躬桑,非 精,月值 帥 .. 婦 《祭義》云「大昕之朝,奉 春躬 之鄭 於一月,故蠶興之時 命 往,故《内宰》言仲 ,后妃又往,故《月令》於季 愚謂: 女之專於蠶 故 婦 天子於親 桑,《 熊 重 躬 大 浴種 而 氏 桑 火則 内宰》云『仲春 詳 云: 浴種,至季春 悉 耕 雖 浴其 『 馬 而 如 僅 有二時,若 此。 終之 種。」是 功 春 也 質 舉,而 其 成 以 詔 條 注 又 后 初 種 趨 於 戒

『于時』、『作爲』爲『詐僞』。」

監,古 毋 毋或不良。 皮、革、筋、角、齒、羽、箭、幹、脂、 是月也,命工師令百工審 或作爲 夫人世 桑皆親 甸 内外命婦,而 后 銜反。 徒 妃於蠶 也 「婦之屬,其人尊。 巧,如字,又苦孝反。」○鄭注:「今《月令》無 其事,非徒以 淫 其 事乃再往 百 巧,以蕩 人卑; 而 I. 示之以不敢獨逸之意也 一咸理 |者,蓋| 上心。 監工 人蠶 倡 率天下,而 Ŧi. 於蠶室者, 耕 故 日號 《釋文》:「量,音亮 庫之量,金、 藉 后 田 毋, 妃 膠、丹、漆 以 於 亦 悖于 終畝 則三宫 以 浴 勸 種 鐵 時 厲力 採

鄭 猶 則 咸,皆也。 之木也。 物之舍也。 氏 監之,日號令之,戒之以 逆 日 也 :「工師,司 凡 白 於百工 量, 輮 工作器物 幹, 謂 物善惡 皆理治 空之屬 有 當 各 用 有 其事 之舊 也。 脂。 此 時 之時,工 法。 五. 良, 事 逆之則不 庫 也。 幹, 藏 善 也 師 諸 悖

鬻獸之皮角及魚膘爲之。 記》: 笴。 也。 五<u>。</u> 牢,過於巧則生泰侈,故又從而戒之。 五. 物,當因氣序,無得悖逆於時,使物不堅牢。 巧,然而不良,則不時也。]故百工所作器 蕩,謂動之使生奢泰也。」 冬奠體』之屬也。 上,使生奢泰之心也。」 又當依舊常,毋得作爲淫過巧妙,以動蕩在 一,角、齒三,羽、箭、幹 五庫各以類 庫 了,若《弓人》『春液角, 之量 幹,弓幹也。 皮去毛曰革。 「革欲其柔滑,而腥 則可 孔氏 ,所以預察其材之美也。 以 曰 : 爲良矣,然或逆於時 相從:金、鐵一,皮、革、筋 「《考工記》云:『材美 脂,亦以 淫巧,謂僞飾 箭,竹之小者,可爲 夏治筋,秋合三材 四、脂、膠、丹、漆 愚謂:金,銅、錫 丹,朱砂 脂之則需。」膠, 柔 熊氏安生日 众及革。 不如 也。 則 材美 《考工 法 不 也 堅 審 箭 Ι. 而

> 卿、諸侯、大夫親往視之。 是月之末,擇吉日大合樂,天子乃帥三公、九

重於習舞也。 以觀其學樂之成也。必擇吉日者,合樂又仲春既命國子習樂,至此又命合而作之,

春秋》「累」作「纍」。《釋文》:「累,力追反。」〇《呂氏駒、犢,舉書其數。《釋文》:「累,力追反。」〇《呂氏是月也,乃合累牛、騰馬遊牝于牧。犧牲、

在廐牡 高氏 此 之,明出時無他故。 物皆産乳,故合此相累之牛、騰 之牡而合之。 生息之多少也。」 合牛馬,謂繫在 |繋廐之牝於牧田之中,就牡 鄭氏曰: 誘曰:「累牛,父牛。騰馬,父馬也。」 馬須擬乘用者,則不放之。 「累、騰,皆乘匹之名。 舉書其數,以在牧而 一廐者。 孔氏 至秋當録 其牝欲遊 曰:「季 而合之。 内,且 逐之馬,遊 列則 春 既遊牝 是月 校 陽 以 録 就 其 所 知 書 牧

乘 牛 時 牧之牝,合之可 之後,畜皆 用 馬或在廐,或在牧,廐之牡者留之,以備 ,當知其舊數及生息多少也。」 牛之犢,皆 前 取其牝 在 書 野 知 者游於牧而合之。 所 其 也。 見 有犧 在之數,以至秋 牲,及小 馬 若其 愚 之駒 謂 畜 本

反。 命 國人難」。又此下有「行之是令,而甘雨至,三旬」十字。 或 盛 舒 或 難 氣 而 而 於天地之間,其 磔,竹伯反。 一而陰 「難, 九門磔攘,以 達 鬼 爲疾病,而厲鬼乘之而爲害。 難 ,索室驅疫 ,又歲之終,則 於地 又 者,命國 陰 氣 類 上 穰,本又作『攘』,如羊反。」○《吕氏春秋 沈 《也,恒 也,《 滯 人 則 爲 邪 故 天子始難,季 命 難 乘平 沴 周禮》方相 畢春氣。 有 陰 也。 不正者,恒 司 寒之氣 陰 大 蓋陰 以 難 《釋文》:「難,乃多 出 氏掌之。 陽 爲 故仲 冬陰 然陽 能 季 之氣 害 春 中 爲 陽 氣 秋 氣 乎 流 甚 氣 最 陰 發 行 命 祚

磔,磔 勝天 春氣。」 盛 《王居明堂禮》曰:「季春出疫于郊,以 或 往 也。 云: 云: 云: 毁事,用駹可也」,則是用牛 徒》云『小祭祀,奉牛牲』,又《牧人》云『凡 也 災,禦止 盛 春氣,謂 其 外,因磔牲以祭國門之神,欲 往 而 一面 凡 『凡幾、珥、沈、辜,用駹 蓋大難 地 (喜樂之氣,使人之和 感 亦 裂牲 熊氏安生曰:「磔攘之牲 春 難 不正之氣,亦先王 禳 沈、辜、侯 疫 畢 吴氏 者,蓋感 温 體 鬼,勿使 止 共雞牲。』是 用 之氣 也。 春 澄日 4, 時 而發,故 其 九門磔攘 冬寒之 攘,共羊 :「難者,聚 不正之氣 復 餘 入也。 難用羊用犬,小者 用羊、用犬、用 氣 V 氣 可 燮 者,逐、 畢,止 充盈 難 牲。』《犬人》 而 也。《羊人》 也 也。』《雞 理 衆 以 不 其 ,案《小司 , 則 驅 即 戲 之一事 鄭氏 疫至 攘 也 之也 劇 病 足 除 者, 雞 以 攘 引 於 畢 凶

也。 於仲 則 亦 蓋 可如是乎? 仲 陽氣,陽是君象,則諸 季秋『天子乃難』,●唯天子得 日 几 云: 昴、畢, 也 用 命之,若言天子自難 季春云『國難』,唯天子、諸侯 司之氣。」鄭氏 或 唯 仲秋之難 躔言難,亦鑿 雞 「難陰 人 諸 秋之難 是月,日 難爲歲 、皆得 侯得 得 大 鄭 氣 難 行之,而 ,唯天子 事之常,諸侯之難,不待 也。 陵 云:「難 氏 行 積 於 秋難陽氣,本鄭氏之謬説, 歷 一説耳。 但不若季冬之大難,其 以斗建言難者固謬,其 此 季 尸之氣。」於 昴 月日 不及國人者也。 得行之,若諸侯之國 春 ,有大陵積 而 陽 侯以下不得 孔疏引 之 曰 氣 歷虚、危,有 也。 難 「命國難」,立文 云 難 有 熊 季 是 尸 以以 或 氏 冬之 月 之 難 難 説, 爲 宿 季春 天子 其 墳 氣 陰 "非 難 難 謂 以 墓 難 直 氣

> 大恐。 季 春 行 冬令, 則 寒 氣 時 發, 草 木 皆 肅 或 有

鄭氏曰:「丑之氣乘之也。肅,謂枝葉縮

鄭氏曰:「未之氣乘之也。山陵不收,高行夏令,則民多疾疫,時雨不降,山陵不收。栗。國有大恐,以水訛相驚也。」

鄭注:「今《月令》曰『衆雨』。」
行秋令,則天多沈陰,淫雨蚤降,兵革並者暵於熱也。」

起。

淫 鄭 陰氣勝也。」 霖 氏 曰 : 也。 「戌之 雨 三日 氣 以 乘 上爲霖。 之也。 九 兵革 月 多 並 起, 陰。

禮記卷十五終

■「季秋」,據《禮記注疏》當作「仲秋」。

索

爲

尤

徧

耳

## 禮記卷十六

賜 或 史 進 館 士 纂 及第翰 脩 孫 希 林 旦 院 編 脩

## 月令第六之二

文》:「婺,音務。」 孟夏之月,日在畢,昏翼中,旦婺女中。《釋

宿 朱鳥之第六宿。婺女者,北方玄武之第三 畢者,西方白虎之第五 兀 日 秦時四月節,日在畢十四度。翼者,南方 案漢《三統書 也。 度, 虚 三度中,則漢時立夏初昏翼星已西過 旦時婺女已西過三度,秦時立夏初 案《三統 》,四月 書》,四月節,昏軫四度中, 節 宿,而實沈之次也。 日在畢十二度。

其帝炎帝,其神祝融

中明矣。 則 日一百二度,加以昏分二刻半,約爲九度, 當在十二度。」 昏軫六度中,旦虚五度中也。○孔 三度,爲一百十一度,則秦時 漸長,昏中星去日應一百二度,計 「三月時,昏中之星去日九十八度,四 去日應一百十一度。 愚謂: 自畢 四月昏中之星去 立夏軫星昏 十二度至軫 翼 氏 月日 星 中

其日丙丁,

謂"丙丁爲火,故日之值丙丁者屬乎夏。曰"「夏時萬物皆炳然著見而强大。」 愚志》曰"「明炳於丙,大盛於丁。」 鄭氏高氏誘曰"「丙丁,火日也。」《漢書・律

融,顓頊氏之子,曰犁,爲火官。」 愚謂:來著德立功者也。炎帝,大庭氏也。祝鄭氏曰:「此赤精之君,火官之臣,自古以

四六七

之盛 明 祝 融 王 一,其號 融 者,在 帝者 也 ,祭火神 也。 在 地 亦 祝 火 Ħ 天火德之帝。 融 則 行之神, 犁爲火正 炎帝,祭火 以配 者, 言火德之繼 焉。 八帝則以 祝,續 大庭 氏 · 其官 也 乘火德 配 續 焉 融, 愐 亦 光 明 日 祝 而

其蟲羽,

鬼 故 物之有羽者屬火。」 馬氏晞 上升,得陽之極者也 夏則 、柳、星、張、翼、軫七宿,有鳥之象 孟 其 曰:「朱鳥,火屬 蟲 羽。 吴氏 ,故屬夏。 愚謂: 澄曰 也。 羽 ੋ: \_\_ 其 蟲 南 類 輕 ~,故凡 方 爲 揚 井、 羽, 而

其音徵、《釋文》:「徵、張里反。」

四。 鄭氏 祉 和 也 則 徴 曰 : ,物盛大而繁祉 屬火者,以 聲 「三分宫去一以生徵,徵數 調 其 微 漢 也 書 清 事之象 律志》 也。 日 夏氣 Ŧi. +

秋》作「仲吕」。《釋文》:「中呂,音仲,又如字。」〇《呂氏春

應。 鄭氏 吕六寸五分八釐三毫 著,於其中 巳,在四月。」 二千九百七十四。 ,律長六寸萬九千六百八十三分寸之萬 律志》曰:「中吕,言微 《周語》曰:『中吕 曰:「中吕者,無射之所生,三分益 旅 助 蔡 姑洗,宣氣 氏 孟夏 四 元 定 宣 絲六忽。」 氣至,則中吕之 딩 : 中 齊 氣。」 陰始起 物 小 也 滿 未 則 位 於 成 漢

其數七

其味苦,其臭焦,

七者,火之成

數

也

苦。 鄭氏曰:「火之臭味也,凡物之苦、 物以 馬 火化 氏 睎 ,則其. 孟 曰 氣 爲焦。」 炎 上作苦,故 焦者 味 屬

其祀竈

祭先:

肺。

迎尸  $\equiv$ 乃制 著 愚 門外西室之奥,以神位 從 鄭 以 在 主在廟門之奥。 俎 竈之禮 亦 内,故祭在廟室之奥。 性爨」言之,故云「祀竈 也。 火類 謂: 在上 穀 西 南,亦祭黍三,祭肺、心、肝各一,祭醴 氏 ,如祀户之禮。」 《禮器》云:『竈者,老婦之祭也。』」 食爲主,且祭竈配 壁。」西壁,堂之西 亦既祭徹之,更陳 肺及心肝爲俎,奠于主西。 曰 竈夏祀,盛德在火,烹飪之功所 也。 , 先席於門之奧東面 ,肺爲尊也。 特性》記: 「夏,陽氣 祀之先祭肺 配竈神而祭者,是先炊之 性 盛,熱於外, 竈在 孔氏 祀竈 在西也。 鼎俎,設饌于筵前 爨 以先炊老婦之神 在 牆 者,陽 在 廟 門外」。 下 ,設主于竈 曰:「奥,謂 門外之東,祀 廟門外, 在門外, 也。 位 祀之於 祀户在 又設盛于 在 注 然養人 1 疏 饎 故 陘 肺 竈 設 據 爨 由 户 廟

螻

勝

金、祭其所勝

也

牲爨 乃婦人之所主,祀竈之禮不當舍饎爨 非門堂之奥矣。 特性禮 也。 》「主婦 竈祀饎 視饎 爨, 祭先肺者,肺屬 爨 則奥 于西堂下」,則饎 亦廟室之奥, 金,夏 而 火 而 就

作「丘」,「瓜」作「善」。 螻,音樓。 得陰 蟈 疑王 瓜 文不一也。」 鄭氏曰 有 曰:「螻,螻蛄 正》云『王萯秀』,未聞孰是。」 王瓜萆挈者,《本草》文。 光 ,萆挈也。 鳴,蚯蚓出,王瓜 以 瓜是王萯否,二疑『生』之與『秀」,其 氣之多者,故至是始 蟈,古獲反。 : 爲即今之黄瓜,未 「皆記時 今《月令》云『王萯生』,《夏 愚謂:二月蟄蟲已出,蚯 鄭注:「今《月令》云『王萯生』。」 蚓 蟈,蝦蟆也。」 候 ,以忍反。」○《吕氏 也。 生,苦菜秀。 螻 知 出 未聞孰是者, 蟈 是 否。 王 孔氏 鼃 瓜 春秋》「 《釋文》: 蔡氏 也。 ,歸氏 曰 邕 蚯 蚓 小 王

文》:「駵,音留,本又作『騮』。 七奴反。」○《吕氏春秋》「路」作「輅」,「粗」作「觕」。 衣朱衣,服赤玉,食菽與雞,其器高以粗。 天子居明堂左个,乘朱路,駕 選, 茶 苦菜生於寒秋,經冬歷 也 名游 **爾** 雅》疏: 冬。 《易緯 「苦菜 菽,本又作『叔』,音同 通 春,得夏乃成。」」 卦 一名荼草,一名 赤駵,載赤旂, 騐 元圖》云: 粗

明堂左个,明堂南方之東室也。 深,故云『赤』。 之盛大也。 其畜雞。」粗,大也。 爲火穀,雞爲 朱赤者,順火之色也。 之名者,明堂以向南爲 青陽,西日 朱。 路與衣服,人功所 玉 總章,北 與 火畜也。 駵馬,自然之性 孔 旂雖人功所爲,染之不 氏曰:「色淺 曰玄堂。 器高以粗者,象夏氣 正也。 《淮南子》曰 食菽 爲,染必色深,故 與雞 南方不 車馬衣 皆不可 日赤,色深 明堂 蓋 服 東 以 别 須 菽 皆 色 爲 日

者,總言之皆謂之赤,若對文言之,則深鄭氏《士冠禮》注云:「朱蓋四人。」是四一染謂之縓,再染謂之頳,三染謂之纁。」色深,故亦云『赤』。」 愚謂:《爾雅》:

者謂之朱,淺者謂之赤也

「反」作「乃」,無「侯」字。 是月也,以立夏。先立夏三日,大史謁之天 於南郊,還反行賞,封諸侯。 慶賜遂行,無不 於南郊,還反行賞,封諸侯。 慶賜遂行,無不 於南郊,還反行賞,封諸侯。 慶賜遂行,無不 於南郊,還反行賞,封諸侯。 慶賜遂行,無不

所賞者益徧。 卿、大夫也。 焉。不言帥諸侯者,文略 同,而封諸侯 炎帝而祭之於南郊之兆,而以大庭氏配食 立夏者,四月之朔氣也。 則所賞者益 行賞與慶賜 蓋孟夏陽氣益盛,故順之而 也。 迎夏者,迎赤帝、 重,無不欣説 遂 行,皆與孟 行賞,賞公、 則

出。 也,而 者甚多,固 之,以順陰氣之收斂。 侯、立大官 之,以順陽氣之發宣。 而封 大約 之事,於時 出 者於禘 布 不務內,以會天地之藏,無有宣出 代之制,必以三代之法求之,則其不合 田 政 諸 秋冬,陰也,故務内。 順 邑,發秋 如 封 侯 陰陽以爲出内: 也,發爵 此 諸 則行慶之尤重者,故孟 不僅在 ,則宣出之尤大者,故 侯 未 政,順 可。 則 鄭 賜 違 氏 此一事而已也 於古。 服 陰義也。』今此行賞可 日 ,順陽義 愚 蓋《月令》乃欲自 季秋命百官貴賤 :「《祭 謂 春夏,陽也,故務 孟春行慶施惠, 封諸侯、出土地 《月令》之例, 也。 統 孟 而 於當也, 日 夏 秋 : 乃 封 即 古古 行 爲 禁 諸 無

節,與孟春之「命相布德和令」,孟秋之「命鄭氏曰:「爲將飲酎。」 愚謂:此與下

乃命樂師習合禮樂

象 乃 將 時 順 帥 氣之 時 選 士萬 布 政 兵一 之最先者也。 大,行爵出禄以 例, 皆於 迎氣之日 蓋習合禮樂以 順 時 氣之宣 發 命

散。

鄭謂

爲飲酎習之,非

也。

反。」〇《吕氏春秋》「桀俊」作「儁傑」。必當其位。《釋文》:「長,如字,下『繼長』同。當,丁浪命大尉贊桀俊,遂賢良,舉長大。 行爵出禄,

義。 大尉舉 《月令》」,未通於古。」 加以 其才德之秀出 尉,秦官則 日 良,有德者。長大,形貌壯大 : 助也。 「助 爵 蓋 禄,所 季春既聘名士,禮賢者,至 此三者,亦周 長 氣 有 遂,進也。 也。 大尉。 以 ,并及於形貌之魁異者 順 三王之官,有司 陽氣之盛 今俗人皆云『周 制 桀 以 俊,有才者。 司 也 馬 有 掌 力者。 馬,無 爵 此 公作 鄭 則 禄 擇 之 命 賢 氏 而

是月也,繼長增高,毋有壞墮。《釋文》:「壞,音

怪。 而高。 少 鄭 養之道,增益高 曰:「是月草木 有壞墮,所以 有 **~**,至 壞 氏 許 墮, 曰 : 規反,又作 此 壞墮 則 亦爲 繼 繼 順繼長增高之氣也。○孔氏 如壞城 長增高,謂 逆時 而 『隳』。」〇《 蕃 大之物。」 有壞墮,乃言施化。 長 庶,王者施化,當繼 氣。」 春物 郭,廢宫室之類。 吕 氏春 草 萌芽,至 愚謂: 木 愚謂: 秋 盛蕃 墮 作 春 此 廡。 繼 「隳 孔説 長增 物 則 續 長 毋 增 幼 毋

毋 起 鄭 氏 土功,毋 티 : 爲 發大衆, 妨蠶農之事。」

非

是。

高,言天

時

毋

毋伐大樹

I 鄭 之氣也。 11: 一論 伐木,此特禁伐其 氏 材,及萬 日 其小者,則得伐之。 亦 爲 民 逆 斬禁外之木者 時 氣 大者,亦爲其傷盛大 愚 也。 謂 孟 此 謂 春 禁 邦

> 是 月 也 天子始 絺 《釋 文》 絺 敕其 反。」

始裘。」 夏 鄭 暑 氏 티 : 之始, 初 故 服 始 暑 絲。 服。」 孟 方氏 冬寒之始,故 慤曰: 孟

反。」○《吕氏春秋》無「爲天子」字。 時。《釋文》:「行,下孟反,下同。 命野虞出 行田 原,爲 天子 勞農勸 爲,于僞反。 民, 勞,力 毋或 失

勞以慰其勞,勸 者,言野虞之行,如天子親 以 勉其惰。 行然,重農之 曰「爲天子」

命司 注:「今《月令》『休』爲『伏』。」 徒循 行 縣、鄙, 命農 勉作, 毋休 于都。 鄭

至也。

則六 也。 于 屬 鄭氏 主民 國。」 鄙,五百家也。」 曰:「急趨 鄉 可 者也。 知, 高 舉 氏 於農 遠以 誘 王 曰 : 居 也。 該近 明 愚 縣, 堂 謂 縣 也。 禮 二千五 鄙 循行 **>** 日 都, 鄉、 : 縣、 邑 白 毋 遂 也 宿 之

既勸之以 者,此時 左傳》: 意於農者至矣。 當出耕廬舍,而不可休於都邑也。 「邑有先君之主曰都。」毋休于都 野虞,復申之以地官之長,其所

以

留

是月 大矣。」 故 鄭氏曰:「爲傷蕃廡之氣。」 方氏慤曰: DU 也,驅 日『毋大田 時之田, 獸毋害五穀,毋大田 夏 獵』。 曰苗,以其爲苗除害 若秋 獮冬狩, 而已, 則 爲

氏春秋》「登麥」作「收麥」,下有「升獻天子」一句。 農乃登麥。天子乃以彘嘗麥,先薦寢廟。 彘 雛 之至。」 高氏誘曰:「麥始熟,故曰嘗。先寢 食之,散其 令》嘗穀皆配 或 麻 如 嘗 鄭氏曰:「麥之新,氣尤盛,以 〈熱也。 鄭 稻 氏 在 以 之説 秋皆以犬, 其 彘,水畜。」 時之牲。 與? 獨夏嘗麥 嘗 黍 愚謂:《 在 廟,孝 乃 夏 **~**吕 用 以 月 彘

斷

是月也,聚畜百藥。《釋文》:「畜,許六反。」〇《吕氏

春秋》「畜」作「蓄」。 鄭 氏曰:「蕃廡之時,毒氣盛。」

靡 鄭 草 氏 死 曰:「舊説,靡草,薺、葶藶之屬。」 ,麥秋至。

薄 秋。」 孔氏 徐 孟 麥則以之秋,以明可順 麥爲秋也。」 愚謂:言此以起下文之事。 成於秋,而麥獨成於夏,故言『麥秋』,以於 故不勝至陽而死。 立,感陰而生者柔 蔡氏邕曰:「百穀各以其 炎,恐罪人之繫者或以 夏爲 氏 刑,決小罪,出輕繫。《釋文》:「斷,丁亂反。」 師 曰:「以其 方氏慤曰:「凡物感陽而生者彊 曾曰: 萬物盛長之時,然靡草則以之死 此 枝葉細 恤 而靡。 凡物生於春,長於夏 刑 之事。 鬱蒸 時 靡 氣 靡草 故 初生 而斷薄 而 是 日 至陰 爲春,熟 生疾,故 靡草 時天 刑 所 ் 也。 氣 爲 始 刑 而

之輕 之薄 墮』相違, 日 墨者,今以純陽之月斷刑決罪,與『毋有 『草艾則 者 者 即 即 似非。」 縱 斷決之,罪之小者即決遣之,繫 「草艾則墨」疑其 墨。」謂立 出之。二〇 愚謂: 秋後 鄭 氏 薄刑乃鞭笞之 也。 相違 曰 : 刑 非是。 「《祭 無 輕 統 壞 於

氏春秋》「事」下有「既」 賤 蠶 「祭」字。 長 事 幼 ,畢,后妃獻繭。 如一,以給郊廟之服。 」字,「長幼」作「少長」,「之」下有 乃收繭税,以桑爲均,貴 長,丁丈反。○《吕

屬

,鄭氏以

公家以 桑葉 后 后妃 之女,其年有長幼也。 夫之妻。 桑 妃獻 蠶 室 獻繭者,三宫 而 均 爲 於天子也。 以 賤,謂士之妻。 蠶 其 税 也。 税之多 ,以供其夫之祭服,使入繭 以桑爲均者,視其所受之 少也。 世婦之屬 收繭 税者 長幼,謂内、外宗 鄭氏 貴,謂公、卿、大 獻於后 ,外命婦就 曰:「收繭 妃, 於 公 而

> 異也。」 税 十一,故云『如一』。其 知收以近郊之税 師》云: 者 收 近近 以 郊十 近郊之税。」 一。』公桑 貴賤長 幼出 在 受桑,則 孔 或 氏 繭 北 税 近 郊, ,俱 =載 賤 以 故

十字。 反。JO《吕氏春秋 是月也,天子飲酎, 》此下有「行之是令,而甘雨至,三 用 禮樂。 《釋文》: 耐, 直 旬 又

廟,無 鄭氏 耳。 黄金於漢廟。 焉。』《漢儀注》:「王子爲侯,歲以 於宗廟也。 孟 飲酎。」漢 春酒至此始成。」 夏 古者天子宗廟三時祫祭,惟 飲飲 曰:「酎之言醇也,謂重 可 酎,季秋嘗,孟 疑 襲秦 者。 《左傳 禮者 皇帝臨受,以助大祭祀, 兀 一時 》云:「見於嘗 愚謂: 也,則飲 之祭、《月令》見其三, 冬烝,唯不 飲酎 酎之爲 釀之酒 耐 謂 春 見 户 與 獻 則 春 П 執 耐 犆 日 西寸 燔 酒

祭。《月令》不言春祭,豈以其非禮之盛者

而略之與?

保。《釋文》:「數,所角反。」
孟夏行秋令,則苦雨數來,五穀不滋,四鄙人

也。 類。 鄭 氏 鄙,界上 曰 : 時物得 「申之氣乘之也。 雨傷。 邑。 小城曰 四 鄙人保,金 [保。] 苦 雨,白 氣 爲 露 害 之

鄭氏曰:「亥之氣乘之也。草木蚤枯,長行冬令,則草木蚤枯,後乃大水,敗其城郭。

日促也。」

成也。」 「東之氣乘之也。蝗蟲爲災者, 東有啟蟄之氣,行於初暑,則當蟄者大出 東有啟蟄之氣,行於初暑,則當蟄者大出 東天曰:「寅之氣乘之也。蝗蟲爲災者,

文》:「亢,音剛,又苦浪反。」仲夏之月,日在東井,昏亢中,旦危中。《釋

時危星 宿。 氏 則 統 月中日在井三十一度。 在 案漢《三統 東井,南 漢 四度中,旦時當室五 書》,五月節昏氐二度中,旦室三度中 東 井十 時 危者,北方玄武之第五宿 已西過四 五. 方 月節初昏時 八度。亢者,東方蒼 朱鳥之第一宿,而 書》,五月節日 [度,則 亢星已西過 度 秦時 秦時五月節 中 在 也 五月節 井十六度,五 鶉首之次 也。 龍 三度,日 香時 之第一 案《二 日 也 當

音徵,律中蕤賓。其日丙丁,其帝炎帝,其神祝融,其蟲羽,其

陰 志》曰:「蕤,繼 所 氣至,則蕤賓之律應。 鄭氏曰:「蕤賓者,應鍾之所生,三分益 一,律長六寸八十一分寸之二十六。 以安静神人,獻酬交酢。」」 氣 使繼養物也。 也。 位於午,在 賓,導也。 《周語》曰:『蕤賓 五. 《漢書 言陽 月。 仲夏 始 · 律 獐

其數七,其 小暑至,螳蜋 螳,音堂。娘,音郎。 蜱 也。 曰 : 舌,效百鳥 暑,視大暑爲小。 緯言爲蝦蟇,五月得水,適當聒人耳 口 云 曰:「《釋蟲》云:『不蝸,蟷蠰,其子蜱 曰:『伯趙氏,司至者也。』反舌,能 百舌鳥。」 節之暑爲 小暑至, 言始暑 氏 側 蛸 元 『博勞鳴,蝦蟇無聲。』蟜夙云:『誠 『鳴 前 定日 則螵蛸,故云『螵蛸母』。 反舌,蔡邕 螳蜋,螵蛸母 鼃 末向 、味苦,其臭焦,其祀竈,祭先肺。 小也。 也,今謂之 生,鵙始鳴,反舌無聲。《釋文》: 之鳴,故謂 高氏誘曰:「鵙,伯勞 夏至則 内,故謂之反舌。』《通卦 鵙,古闃反、《字林》工役反。」 而未 此曰「小暑」,又視 也。 蕤 鄭 盛也。 蝦 賓六寸二分八釐 鵙,博勞也。 氏 之百 墓。 曰:「皆記 舌。」 六月節名 其舌本 也。 辨 -,何反 反舌, 時 六月 前 蛸。」 孔 反 騐》 傳 氏 其 如 著 候 小

> 微陰而 微陰而鳴。 無聲?』是 螳螂 與鵙皆陰類,故或感微 無聲 知 百舌之鳴,感陽 蝦 臺 非 反舌。」 中 陰 方 而 而 氏 發,故感 生,或感 慤 日

明堂大廟,明堂之南堂也。衣朱衣,服赤玉,食菽與雞,其器高以粗。天子居明堂大廟,乘朱路,駕赤駵,載赤旂,

「狡」。《釋文》:「佼,古卯反。」○《呂氏春秋》「佼」作

例,獨 鄭氏 容體 壯 因 物之盛 佼,仲秋 盛大。 曰:「助長 此不言「是月」者,文偶略 而養之也。 養衰老,仲冬飭死事,其事 佼,謂形容佼好。」 氣 也。」 仲春存諸孤 孔 氏 日 耳 愚謂: : ,仲夏養 「壯,謂 此

磬、柷、敔。《釋文》:「鞀,大刀反,本亦作「鞉」,同。簫,執干、戚、戈、羽,調竽、笙、竾、簧,飭鍾、是月也,命樂師脩鞀、鞞、鼓、均、琴、瑟、管、

魚吕反,本又作「圉」。」○《吕氏春秋》「竾簧」作「壎篪」。與,步西反。竾,音池,本又作「篪」,同。柷,昌六反。敔,鞞,步西反。竾,音池,本又作「篪」,同。柷,昌六反。敔,

孔氏曰 作。 也。 之籍。』郭云:『管長尺,圍寸,併漆之,有 琴謂之離。』孫炎云:『聲留離。』《廣雅》 以冒之,其中空廓。』琴者、《釋樂》云:『大 注《詩》云:『小鼓,在大鼓旁,應鞞之屬 鼓而小,持其柄摇之,旁耳還自擊。」鞞,鄭 執、調、飭者、治其器物、習其事之言。」 鄭氏曰:「爲將大雩帝習樂也。 寸,二十七弦。』管者、《釋樂》云:『大管謂 之變布如灑 也。」鼓者、《周禮》『雷鼓鼓神祀』之屬 云: 『琴長三尺六寸六分, 五弦。』 瑟者 釋樂》云:『大瑟謂之灑。』孫炎云:『音 鞞,裨也,裨助鼓節。鼓,廓也,張皮 劉熙《釋名》云:『鞀,導也,所以導樂 :「鞀、《周禮・小師》鄭注云:『似 出。』郭璞云:『瑟長 脩、均、 八尺一 是

《釋名》云:『鐘,空也,内空受氣多。』磬 吹之。』《廣雅》云:『八孔。』鄭司農云: 之。《釋名》云:『磬,罄也,聲堅罄罄 者、《釋樂》云:『大磬謂之馨。』以 爲聲。鐘者、釋樂》云:『大鐘 四寸,圍三寸,一孔上出寸三分,名翹,横 『大篪謂之沂。』郭云:『篪以竹爲之,長尺 樂》云:『大笙謂之巢。』篪者、《釋樂》云: 空。』笙者,鄭注《周禮》云:『十三簧。』《釋 三十六簧。』《釋名》云:『竽,汙也,其中汙 舞』之屬是也。竽者,鄭注《周禮》云:『竽 戈,鉤孑戟。羽,鳥羽,《周禮》『羽舞』『皇 名》云:『簫,肅也。』干,盾也。 言。』郭云:『編二十二管,長尺四寸。』《釋 而吹之。』簫者,《釋樂》云:『大簫 底。』鄭注《周禮》云:『管 『篪七孔。』簧者,竽、笙之名也,氣鼓之而 如篴 而 戚,斧也。 謂 小,併 玉石 之鏞。」 謂 爲 之 兩

調者 物。 農注《笙師》云:「塤六孔。」康成云: 矣。干、戚、戈、武舞 柷、敔,木音也。 笙, 匏音也。 琴、瑟,絲音也。 燒土爲之,大如鵞卵。」軺、鞞、鼓,革音也。 謂之籈。』郭云:『敔如伏虎,背上有 者,其椎名。』敔者,《釋樂》云:『所 柷 竾、簧,當從《吕氏春秋》作「塤、篪」。 七鉏鋙刻,以木長尺擽之。」脩者,脩理舊 寸,中有椎 <del>물</del> 文武之舞備矣。 云『治其器物,習其事之言』也。」 「, 調 「,《釋 均者,均 柷如漆 和 樂》云: 音 柄 平 曲 桶,方二尺四 鐘,金 連底撞之,令左右擊。 - 其聲。 武舞之大者以干配戚,小 管、簫、竾,竹音也。 竽、 垻,土音也。 「所 飭者,整頓器物。 也。 音 以 也。 執者,操 鼓 羽,文舞 柷謂 寸, 磬,石音 則八音 深 之 持營 愚謂 也 以 一尺八 止 「塤 鄭司 故鄭 二 十 鼓 爲。 也 止 具 則 敔 郭

> 者以 戈、羽用以舞,故 其節奏言之,而曰「均」曰「調」。 脩 鞀、鞞等之聲 又有戈者,蓋 舞師》「兵舞以 干 曰「飭」。 配戈。 易調,故以 琴、瑟等之聲難 Ш 大 曰 舞 JI] 雩 執」。 之 帝 Ш 小 當 川之祭祀」,是 治其器言之,而 用 者 干 或 唯 調,故以習 戚 用 大 干、戚、 小 舞 也 此 舞。

「源」作「原」,「百縣雩」下有「祭」字。「寶。《釋文》:「爲,于僞反。辟,必亦反。」〇《呂氏春秋》乃命百縣雩祀百辟卿士有益於民者,以祈穀命有司爲民祈祀山川百源,大雩帝,用盛樂。

皆作 雲雨 卿 Ŧī. 求雨之祭也。 鄭氏曰:「陽氣盛而常旱,山川百源,能 一精之帝,配 士,古者上公,若句 者 曰 盛 也。 樂。 衆水始所出 以先帝也。 凡他雩,用歌 零帝,謂爲壇南 龍、 爲百 自鞀、鞞至柷、敔 后 舞 源 稷之類也。 而 郊之旁, 雩 雩, 吁 百辟 興 嗟

義

帝,諸 月純 禮 求 几 亦 命有司 春 爲 有 雨 月 秋 陽用 零祭。」 禱 因 凡 傳 侯以下雩上公。 祈祀 無雩。」 周 事 之秋 正雩此月,失之矣。天子雩上 故 Ш JII 愚 制禮 三月 龍 謂 孔氏 百源,爲將雩之漸也。 見 此月爲雩,縱令不旱, 中 而 凡言「水潦將降」者 曰:「將欲雩祭,先 周冬及春夏雖 雩。」 雩之 正 而 旱,亦脩雩禮 當 以 几 以

源 皆謂 雨 者,蓋是時百穀待 百源」者,著其多,明 必 爲 出 最 夏 入時也。 於山 亟 ,此雩之所以 l,其源· 則夏非 大而 雨 而 必乏雨,而 所祈之徧 流長 必於夏行 長,於四時之中 者 則 也。 雩 爲 之 JII 也 以 將 求 需 水  $\Box$ 雨

零而先祀 晉人將有事 齊 也。 人將 零帝,<br />
零祀<br />
昊天上帝 有事 Ш 於河,必先 ][ 於 即 泰 事之漸 山 有 必 事於惡 先 也 於南郊之圜 有 ^ 事 禮 池。」此 於 器 配 ₩ E 林 F 其

> 若因 克,上帝不臨」,此因旱而雩之事也。 詩言「自郊徂宫、靡神不舉」、又言「后稷不 也 而 . 雩者祭上帝,則常雩所祭者必上帝, 旱而雩者,其 百 縣 , 謂 鄉、 (祭蓋與 遂 及  $\equiv$ 此 等 同 采 地 之 雲漢 屬 大 也。 早 而

農乃 登黍。 是月也,天子乃 以 雛 嘗 黍 羞 以

非五

帝

也

含桃

,先薦寢廟

爲嘗 夏食 鄭氏 故 其實諸果亦時 桃 日 之早熟者。 「是時黍 :「《月令》諸 大 者,以此果先成,異於餘物,故特記之。 雛 鷄 曰:「含桃,櫻桃也。」 新 穀 故 」,誤矣。 新熟, 而 Ŧi. 鄭 并薦之。 月嘗黍 氏 薦。」 月 今 羞,進 以 無 蟬 此時黍未登,故 和之。 薦果之文,此獨 鳴 凡果皆然 愚謂: 也 黍 是 果輕,不特薦 蟬 也 雞, 蔡氏 鳴 ,以含桃爲 黍,蓋 小 邕 謂 鷄 羞 孔 日 此 也 穀 氏

薦果之始,故言之以見例爾。

令民毋艾藍以染,《釋文》:「藍,力甘反。」○按"艾、

刈通。

藍 藍 高 古今事異 始可分别移 若及早移種 月藍始 氏 ,五月可刈藍 誘 日:「 愚 可 孔 别。 與 謂 氏 散 青 則 日 《齊民 《夏小正》 未 有 :「種藍之體,初 引《夏小 而《月令》五月禁刈藍,豈 成 損傷。 要術》榆 也 日 正》者 此月藍 鄭 莢 Ŧi. 氏 落 月啟灌 證 必 既 日 時 此 叢 長 : 可 月 大, 生, 種 養 藍 此

毋燒灰,毋暴布。《釋文》:「暴,步卜反。」〇《呂氏春

秋》「灰」作「炭」。

高氏誘曰:「 喪服 朝 服 十五 》記 愚 日 謂 升,去其半而緦, : 是 灰, 月 鍛 炎氣 而 謂 勿 所 盛 灰。」《 用 猛 以 暴 加 湅 雜 灰 布 布 記 錫 則  $\Rightarrow$ 者 也。」 日 脆 也。 傷

> 禮 染 灰湅布,暴之日中, 之法,蓋 之,沃而 考 夏。」 • Ĭ 染人》:「凡 記 亦 **盏之**,畫暴諸 **>** 湅 如此。 帛 者 染, 用 是月 恐 欄 春 日, 脆 陽 灰 暴 夜宿諸井 傷 氣 渥 凍, 其 大盛,不 淳 夏 之, 布 纁玄, 也。 蜃 可 湅 灰 周 燒 秋 布

門 以 也。 舅 以 鄭 閶 所 曰 有 二十五家之門,内則宫中 門,内 不 以 間 避 門 : 氏 毋 閉, 之常 毋閉 闔 征税,是月不得搜索。」 養微陽之初 爲 關 曰 所以 國門。 市,停物之所, 關市 而 ,毋夜閉 也。 宫門,皆門 順 毋索。 洩盛陽之太過。 陽 竊謂 然至 敷 生。 也。 門間 縱, 日 《釋文》: 也。 仲夏門 閉 蓋 商 不 所包甚 關 賈 晨 永 難 巷 「索,所 或隱 闢 巷 則 門 間 物 愚謂 高 一廣,而 畫 之門,皆間 而 毋 日 白 氏、 藏 有 夜 閭 閉 反。 闔者 其 不 外外 外 孔 則 闢 物, 夜 氏 則 而

係

獨

重

也。

處

必掩身,無躁者

,所以定其

氣

止聲色,

恐不在其中。蓋國門於備禦至於切要,若

是月也,日長至,陰陽争,死

生分。

夜而不閉,豈所以待不虞乎?

挺重囚,益其食。

且益其食,恐其不堪暑熱以致死也。挺,緩也。重囚禁繫嚴密,是月稍寬之,而

注云:「養馬之官。」
列反。執,如字,蔡本作「鷙」。」〇《呂氏春秋》「政」作「正」,游牝別群,則縶騰駒。班馬政。《釋文》:「别,彼

其牡 群。 氏 高氏 馬 教 政 3、以阜 並言 日 : 教 愚謂 也 氣 不欲騰駒蹏傷 誘曰:「是月牝馬懷妊已定,故 「别群 ,此獨言馬者,以馬供軍國之用,所 有餘,相蹄齧也。 馬逸特,教縣,攻駒。」此之謂 别群,别其牝牡之群也。 《廋 ,孕字之欲止也。 人 、職》曰:『掌十有二閑之政 其胎 育,故縶之。」 馬政,謂養馬之 繋騰駒,爲 前月牛 也。 别 鄭 其

> 刻,夏 氏曰: 刻。」 鄭氏 萬物死生之所由分也 物,以陰氣殺物,陽謝 畫六十刻,夜四十刻也。今法,夏至書五十九 五分,夜三十六刻十分。 五刻,夜三十五刻。 日: 至畫漏 「長至者,謂日長之至極。 愚謂: 「争者,陽方盛,陰欲起也。」 以昏明爲限,則夏至晝六十 六十 死生分者,天以陽氣 以日之出入爲限,則 Ŧi. 陰興,自夏至始,此 刻, 夜 漏 三十 大史 牛 五. 漏 孔

此謂夏至之日也。齊戒者,所以定其心。字,「節」作「退」。鄭注:「今《月令》「刑」爲「徑」。」母刑,以定晏陰之所成。《釋文》:「和,户卧反。」以定晏陰之所成。《釋文》:「和,户卧反。時間,以定晏陰之所成。《釋文》:「和,戶卧反。此謂夏至之日也。齊戒者,所以定其心。

四八一

陽一 陰陽 成就 節 恒與 静 静 蓮 色,蓋亦處必掩身,毋躁之義,若以『止樂』 言止樂、《月令》非也。」 曰:「冬至圜丘 作樂五日。今止樂,非其道 也,務於有以養之,所以贊化育之道,而 能發散,二者之氣,不可相無。 君子嘗致其 致其敬慎,安静以養之,而定此晏陰之所 春秋》説,夏至,人主與群 故故 無 滋 宣之宜也。 有所 也。 天 味 爲 曰「晏陰」。 有所偏,則無 地 者 而 偏,則 蓋人身一小天地,其 所 相 禁 、扶陽抑陰之意,然不收斂則 爲 止 以 流 ○鄭氏 無 刑 ,夏至方澤,皆有樂,不得 節 通 以養其生。 夏至之日,微陰初起,故 罰 其 以 也。 不善欲 雖 曰 : 育 陽 庶類 晏,安 朱子曰 「《易》及《樂》、 臣 主生,陰主殺, 静 也。 從 故於其始 ; 陰陽之氣, 事 也 八能之士 故天地之 人身之 無 「止聲 刑, 孔 氏 盡 生 陰 不 道 安

> 言, 角 以 此爲 解 則 拘 蟬 八非,則 矣。《月令》之説固多未安, 始 鳴、半夏生、木堇 失其 指 榮。 《釋文》: 而 注

鹿

,户買反。始,市志反。堇,音謹。」

是月 祭暮 鄭 曰 : 至得 從陰 麋是澤獸,冬至得陽氣 鄭 有名堇者,故此曰「木堇」以别之。 陰獸,情淫 氏云:『鹿 氏 氏 也 落,是月 退之象。 陰 日 曰:「木堇,王蒸 蟬 毋 而 鼓 用 「又記 解角,從陽退之象。」 翼 火 而 是 八榮華, 始 南 遊澤、冬至 Ш 鹿 方。 鳴。 時 默, 爲 候 可用作蒸,一 陽獸 夏至得 半夏, 也。」 也 而 情 陰方退,故 角解。」今以麋爲 藥草。 陰 淫 孔 愚謂: 氣 而 氏 名蕣。」 而 遊 日 高 木堇 解 角 山 菜 氏 「熊 夏 解 朝 誘 亦

又用

火於其

方,

可以居高明,可以遠眺望,可以升山陵,可以

處臺榭。

鄭氏 明之所。臺榭、人爲高明之所。」 闍 者 謂之臺,有木者謂 日 登 :「順陽在上也。 高明乃可遠眺望。 之榭。」 高明,謂 Ш 陵, 樓觀 方 自 然 氏 也。 高 慤

至。《釋文》:「雹,步角反。」〇《呂氏春秋》「凍」作「霰」。仲夏行冬令,則雹凍傷穀,道路不通,暴兵來

脅之,凝爲雹。盗賊攻劫,亦雹之類。」

鄭氏曰:「子之氣乘之也。陽爲雨,陰起

《釋文》:「螣,音特。」行春令,則五穀晚熟,百螣時起,其國乃饑

生日長。騰,蝗之類。言百者,明衆類並鄭氏曰:「卯之氣乘之也。五穀晚熟者,

鄭氏曰:「酉之氣乘之也。果實早成,生行秋令,則草木零落,果實早成,民殃於疫。

害。」

日短。」

秋》作「昏心中」。 季夏之月,日在柳,昏火中,旦奎中。《吕氏

春

中,旦時當婁十度中也。 六月節昏時火星已 月節,昏尾七度中,旦婁八度中。 星,東方蒼龍之第五宿也。 時六月節,日 案漢《三統書》,六月節,日 柳者,南方朱鳥之第三宿,而鶉火之次 西過九度矣。 在柳 秦時六月節昏時 十一度。 西過八度,日 案《三統書》六 在柳九度。 火,大火,心 當尾 時 是漢 奎星 九 也。 度 時

音徵,律中林鍾。其日丙丁,其帝炎帝,其神祝融,其蟲羽,其

鄭氏 純 周語》曰: ,律長六寸。 恪。」 曰:「林鍾者,黄鍾之所生,三分去 「林 《漢書 季夏氣至,則林鍾之律應。 鍾 和 律 展 志》 百 物,俾莫不任肅 日 林、君也

四八三

言陰 盛 也。 氣受任 位於未,在六月。」 助助 蕤賓君主 種物,使長 蔡氏元定曰: 大林

温風 其數七,其味苦,其臭焦,其祀竈,祭先肺。 ○《吕氏春秋》「温風」作「涼風」,「壁」作「宇」,「腐草」下有 釋文》:「蟋,音悉。 化」字、「螢」作「蚈」。 大暑則林鍾六寸。」 始至,蟋蟀居壁,鷹乃學習,腐草爲螢 蟀,音率。 熒,本又作「螢」,户扃反。」

鄭氏 故 殺 飛 蟲,螢火也。」 孔氏曰:「蟋蟀, 也 稍成,未能遠飛 云: 『今促織。』 此物生土中,至季 公爲螢。 在野。 心,學習搏擊之事。 ,鷹還化爲鳩,故曰化。 《夏小正》曰:『六月鷹始摯。』螢,飛 曰:「皆記時候也。 於時二陰既 不云『化』者,蔡 ,但居在壁,至七月則 起,鷹感陰氣,乃有 腐草得暑溼之氣, 鷹學習, 氏 今腐草爲螢,螢 云: 『鳩 郭景 夏 謂搏 化爲 羽 遠 翼 純 攫

> 至。 甚,而 爲鷹,此六月,何以言鷹學習乎?」張逸答 至,乃於季夏言「始至」者,五 不復爲腐草,故不稱化。」」 温風,即景風也。」 是月之朔氣爲小暑,故 〇《鄭志》:焦氏問云:「仲秋 愚謂: 温 月 方 日 風 雖 氏 温 以 熱 慤 鳩 風 五. 而 日 化 始 未 月

皆化 愚謂:凡言「化」者,言有化者耳,非謂 曰:「鷹雖爲鳩,亦自有真鷹 也。 二月田 鼠化爲駕,豈遂 可習 無 矣。」 田 鼠 其

天子居明堂右个,乘朱路,駕 衣朱衣,服赤玉,食菽與雞,其器 赤駵,載赤旂, 高 以粗

明堂右个,明堂南方之西室也

乎 ?

九月雉人大水爲蜃,豈遂無雉

乎?

人。 多反,又徒丹反。」○《吕氏春秋》「命」上有「是月也」字, 命漁師伐蛟、取鼍、登龜、取黿。《釋文》: 「命」作「令」,「登」作「升」。鄭注:「今《月令》『漁師』爲『榜

鷹

也。 也。」 也。 此等皆據當 諸事以季夏始命,而自是至秋,皆可爲之 氏曰:「此等事非一月所爲,故不言是月 者,尊之也。黿、鼉言取,羞物賤也。」 時,周之八月,夏之六月,因書於此,似誤 秋 害人,難得,故言『伐』。 皆不害人,易得,故言『取』。 漁 龜魚。』又曰:『凡取龜, 人宗廟,尊之,故言『登』。」 漁師 八月萑葦」,而《月令》皆言於季夏,蓋此 四者甲類,秋乃堅成。 也。 師 蛟言伐者,以其 川澤之物,國家所常用,吕氏爲秦相 , 掌漁官。 作《月令》者,以爲此『秋』據周 愚謂:《周禮》登龜 周 禮》之戲 時 實事而著之於書,非徒 鼍皮可作 人也。 有 《周禮》曰:『秋獻 龜神 兵衛 用秋 以 鼓,黿 蛟有鱗甲,能 秋、《豳詩》言 可 也。 時。』是 高 以決吉 鄭 氏 可爲羹, 龜 氏 誘 言 夏 티 : 曰: 據舊 凶 孔 登 之 之

> 典立 也」三字,此蓋録《月令》者偶然脱之,不得 説 也。 《吕氏春秋》此節 本有「是月

因此别立義例。

秋》「命」上有「乃」字,「澤」作「虞」,「納」作「入」。 命澤人納 鄭氏曰:「蒲葦之屬,此時柔刃,可 材 葦。 《釋文》:「葦,于鬼反。」〇《吕氏 取 作 器 春

物也。」 愚 謂 : 澤 人,澤虞 也。 萑 葦 之

福。《釋文》:「爲,于僞反。 川,四方之神,以祠宗 令民無不咸出其力,以共皇天上帝,名 是月也,命四監大合百縣之秩芻,以養犧牲 ·命」作「令」,「共」作「供」,「祠」作「祀」。鄭注:「今《月 屬 ,澤之所生。 廟社稷之靈,以 共,音恭。」〇《吕氏

爲民

祈

Ш

大

春

秋

鄭氏曰:「四監,主山林 也 鄉、遂之屬 百 縣 給國 地 養犧 有 111 牲之芻,多 林 111 川澤之官。 澤 者 也。 少有常,民 秩,常 百 縣 「四」爲 [田」。」

祭 於民 福 皆 陵、墳衍之神,兆之各以其方者也。 五. 時草枯,故 織、四 明使 祀以爲民祈福,先民後己也。 當出力爲艾之。 力者供犧 鎮、四 民艾芻,不虚 於季夏令民艾芻。 [瀆也。 牲 一,成民 牲以供祠神 四方,山 取 而後致力於 也。 林、川 名 靈,爲民 愚 Ш 謂 澤、丘 神 以出 大 也 ][[ 秋 求

詐僞 是月 賤等給之度。《釋文》:「貸音二,又他得反。 故,無或差貸,黑、黄、倉、赤莫不質良, 反。」〇《吕氏春秋》「貸」作「忒」,「倉」作「蒼」,「無」作「勿」, 詐偽」作「偽詐」,「等給」作「等級」。 以以 也,命婦 給郊 廟祭祀之服,以 官染采、黼、黻、文、章必 爲旗 章,以 别,彼列 以法 無 别 貴 敢

帛爲宜。」 官 官者,以其與婦功相成也。 鄭氏曰:「婦官,染人也。」 ,掌婦功之官,謂染 愚謂: 染 人亦男子爲之,曰 人 也。 黼、黻、文、章, 孔氏 此 月 暑濕 曰 : 婦婦 染 婦

> 斬伐。 是月也,樹木方盛,乃命虞人入 「或」。 變貸 黑謂 必 謂 上言「法故」,下言「質良」,亦 必以質良,若用茅蒐染絳,用藍染青之類 繡。」必以法故者,若三人爲纁,五人爲緅 給當作「級」,祭服旗章,貴賤皆有等 已成帛而染之者也。 七人爲緇之類,當用舊法故事,不得參差 日 :「青與 染 用質實良善之物,不得淆 也。 之黼 其 《釋文》:「行,下孟反。」〇《吕 絲 黑、黄、倉、赤、染其絲 黑 而用 赤謂之文,赤與白 與 之以 青謂 質,實也。 繡 之黻,五 者 也 山 雜 謂 氏 互相! 之章 春秋》「有」作 爲 以織帛,或 一采備 《考工 行 良,善也。 詐 木 ·, 毋 ·, 白 級 備 僞 謂 也 也 之 與 有

鄭 行 木,謂 氏 曰 : 巡 爲 行厲 其 禁之内 未 堅 刃 也 也。」 愚 謂 人 Ш

不可以興土功,不

可以合諸侯,不可以

起

兵

是

月

也

土

潤

溽

暑,大

雨

時

行,燒薙行水,利

大事 妨 動 發令而待 神 衆 則 農 之 毋 有天殃。 |作「發令而干時」,「神農將持功」作「命 事 舉 世 大 事 《吕氏春秋》「摇 水 以 潦 摇 盛 養 氣, 昌,神農將 養氣」作 毋 發 **令** 揺 持 而 蕩於氣」, 神農將 功 待 舉 以

巡功」。

秋

》增之耳

農。」 持 言其害 也。 預於此 也。 化 高氏 水 則 兵動衆之事 稼穡 潦 之, 歲 功 誘 盛 摇 毋 號 無以 養 【時發令,使民廢耕事以待上之期會 發令而 愚謂 E : 之功,若起繇 人事也。 爲 ,百穀受甘 氣,言其逆天時; 「炎帝神 也。 成,而饑 神 大事 待, 農, 神農,主稼穡之官。 摇養氣 孟 即即 後 農 凶 役以摇養氣,妨農 秋當選 雨 興 世 氏 之殃及之矣。 以 謂 土功、合諸侯、起 大 向 能 摇動長養之氣 妨神農之事 士 名 成實,神農將 殖 属 其 嘉 兵,不可 穀, 官 此時 爲 神 事 神 而

> 字。 履 彊 以 ·化」,又此下有「行之是令,是月甘雨三至,三旬二日」十 反。 殺 ○按注疏皆不解「暑」字,疑本無此字,後人據《吕氏春 《釋文》: 草, 糞,方問反。 如 「辱,本或作 以 熱 彊,其丈反。」○《吕氏 湯, 可 『溽』, 以 音同 糞 田 疇 薙 春秋》「美」作 他計 可 以 反,又 美 直 土

職 稼 萊 謂 者,大雨 之,至六月合燒之,故 流 火變之』。」 土 而 火陽根陰,是月暑熱極,故土蒸溼 也。 潤 水潦畜於其中,則草死不生,而地 地,先薙其草,草乾燒之,至此月大雨 塗 大 曰『夏日 溽 溼 雨 也。 ,膏澤易行 糞、美,互言耳。 應 時 時 至而 行,行於所 薙 而 孔氏 謂 行 薙之,如欲其化 曰:「五月夏至,芟殺 也 迫 也。 地 燒 云『燒 芟草也。 ^ 薙 土彊,彊 空之地。 田 鄭 中 人》『掌殺 氏 薙 曰 : 也,則 仍壅蓄之, 也。 此 而 謂 潤 溽 草」, 美可 行水 欲稼 以 溽 潤 水 暴

确者。」 土潤溽 之根也 使 中,水熱而沫沸,如熱湯漬之也。 中之草也 以 而 肥 其 漬 易 田 燒 有疆界者。 也。 ,則土之膏澤易行,故可 薙 蔡云:『穀 之草 如以熱湯者 吴氏澄曰: 即 草 土彊,謂 田 根 曰 爛 ,日暴水於爛 田,麻 死 一田 耕難 是 疇 糞、 田 而 利 糞,壅 其 謂耕熟 日 以 美之, 疇。  $\pm$ 草 殺 一磽 苗  $\mathbf{H}$  $\mathbb{H}$ 

徙。《釋文》:「鮮,音仙,又仙典反。 欬,苦代反。」季夏行春令,則穀實鮮落,國多風欬,民乃遷

鄭 氣 鮮少墮落 在 坎主戊寅申,離主己卯酉,艮主丙辰戌,兑 案《易林》云:『震主庚子午,巽主辛丑未, 徙,象風轉移 異位 而 氏  $\Box$ 逢 一二氣 秋 由 辰 氣 之氣 風 物 相 肅 多故 也。 殺 亂 乘之 爲 故 也。 害, 孔氏 初 也。 故多風。 鮮 或 云: 潔 曰:「鮮落,謂 未屬 而 以夏召春 異,辰 墮 民 一落也。 乃 遷 又

主丁巳亥。』是未屬巽也。」

敗也。」

水,禾稼不熟,傷於水也。 女災,含任之類鄭氏曰:「戌之氣乘之也。 大雨而高下皆有秋令,則丘隰水潦,禾稼不熟,乃多女災。

行冬令,則風 竄 鄭 疾 也。 厲 氏 之 티 : 氣 「丑之氣 寒不 也。 時,鷹隼蚤鷙,四鄙人保 四 乘 鄙 之也。 人 保, 象 鷹 隼 鳥 蚤 雀 **二**鷙,得 亡之走

中央土,

日: 「 爲木,夏爲火,秋爲金,冬爲水,而火生土, 雖寄 而 冬,土則 鄭 位 氏 日 王於四季之末,然五行 本 四 一、「火 愚謂:中央,謂四時之中間 未, 時 每 木 時 宜 休 分 配春,火配 處 寄一十八日。 而 季夏之末, 盛 一德在 夏,金配秋,水 土 播 也。 故 於 雖 每 四 在 也。 時,春 分寄, 此 孔 陳 氏

王於季夏之末,居四時之中央。土生金。土之次在火、金之間,故其氣偏

其日戊己,

中央。 謂: 高氏誘曰:「戊己,土日也。」 物皆枝葉茂盛,其含秀者抑屈 曰:「戊之言茂也,己之言起也。 志》曰:「豐楙於戊,理紀於己。」 戊己屬土,故日之值戊己者皆屬 而起。」 《漢 至此 書 鄭 • 於 氏 愚 萬 律

其帝黄帝,其神后土,

謂: 鄭氏 后 而 來著德立功者也。 一,亦顓 王,其號 黄帝,在天土德之帝。 一,在 其 曰:「此黄精之君,土官之神,自古以 地 頊 官 亦曰 土行之神。 亦曰 氏之子曰 后土,祭五土之神則以 黄帝,祭黄帝 黄帝,軒轅氏 犂,兼爲 共工氏之子句龍 軒 土官。 轅氏乘 則配食焉。 也。后 土 配 爲 德 愚

> 闕其禮與? 氣於北郊而祀黑帝,所謂「祀五帝」也。 夏迎氣於南郊 之后 土, 非社 也。《左傳》蔡墨云:「句龍爲后土。」又云 又爲五祀,故云犁。」不知五 食焉。后,君也。 氣,豈秦自以爲水德,土者水之所畏,故遂 而祀黄帝,秋迎氣 五帝于四郊。」蓋春迎氣於東郊而祀青帝, 同地」之説。孔氏云:「句龍 「后土爲社正」,以明社稷之社即五官土正 ○《周禮》每言 《月令》於中央但曰「其帝黄帝」,而不言迎 鄭以后土爲犂,蓋據《國語》「火正 而祀赤帝,季夏迎氣於西南 之外 「祀五帝」、《小宗伯》:「兆 土爲四行之君,故曰「后 於西郊而祀白帝,冬迎 又 列 土正 祀之后土即社 爲社神,不得 之祀 也。

其蟲倮、《釋文》:「倮,力果反,又乎瓦反。」關其禮母

馬氏晞孟曰:「人,土屬也,其類爲倮,故

也。 爲冲氣,故倮蟲屬於中央。 長。」《周禮·大司徒》:「原隰,其 中 人又人之最靈者。 人秉中和之氣,猶土之 屬,皆倮蟲也。 贏物。」蓋凡物之無羽毛鳞介,若鼃、 火金水也,故以蟲之倮者屬焉。」 《大戴禮》曰:「倮蟲三百六十,聖人爲之 央 人類之尊於羽 則 其 蟲倮。」 而人則倮蟲之最靈者,聖 毛鱗介,猶土之尊於木 吴氏澄曰:「倮, 動 愚謂 螾之 物宜 人類

其音宫

居中央,倡始施 鄭氏曰:「聲始於宫,宫數八十一。 宫聲調。」 其最濁,君之象也。 《漢書·律志》曰:「宫,君 生,爲四聲綱也。」 季夏之氣 和,則 屬土 也,

律 中黄鍾之宫。

鄭 生,五聲具,終於六十焉。季夏之氣至,則 氏 日 :「黄鍾之宫最長 也。 十二律轉 相

> 六月用 非 濁,何得以黄鍾半聲相應乎? 蔡、熊之説 律長六寸,七月夷則五寸三分有餘 宫是黄鍾少宫也,半黄鍾九寸之數,管長 寄王四季,無候氣之法,取黄鍾宫聲 子,此是黄鍾宫聲與中央土聲相應。但土 黄鍾之宫應。 鍾 又直以黄鍾之律爲黄鍾之宫,亦非 四寸五分之律於六月候之乎? 四寸五分,六月用爲候氣。案六月林鍾之 土耳,非候氣也。 宫,於諸宫爲 之律 也。」 一管,還 以 愚謂: 蔡氏、熊氏謂 相 位於十二月,●豈容復應季夏 候氣」,其説固 爲 長。 官。」 《禮運 黄鍾 蔡氏及熊氏以 **>**  $\check{\exists}$ 候 孔 非, **元**. 氣之管,本位 氏 日 而 「黄鍾之宫, 鄭氏、 : 又土聲最 爲黄 丁黄 六律、 也。黄 孔 鍾 何 鍾 以 氏 之 在 應

0 「十二」,據《禮記注疏 》當作「十一」。

之宫。 兩節 伶倫 十二月無專 而 謂之「含少」。 寸九分而已。 鍾 平 最長,應鍾最短。 也。《史記》云:「黄鍾八寸七當作十。 吕之本也。」《月令》爲吕氏之書,則 之宫,而皆可以生之。故曰黄鍾之宫, 之下,聽鳳凰之鳴,以别十二律,以 黄鍾之宫」,必指此三寸九分之少宫無疑 應鍾 之官 十二律長短取用之數皆含於此,猶土於 四寸二分,其中長短 ? 間 取 ^ 次曰含少,次制十二筒,以之阮 以 竹嶰 吕 ,其長三寸九分,而吹之以 四寸二分三分二。」蓋十二律黄鍾 氏 應中 位,而 春 谿之谷,以生空竅厚均 此乃黄鍾 黄鍾之少宫在 秋 · 央土 於 自黄鍾八寸一分,至 古樂》 位 四 也 行無不包也。 取 中 篇 用之數,不過 所含之少聲,故 十二律之外, 云: 「黄帝 此黄 爲黄 故黄 所 分 律 應 鍾 斷 謂 鍾 令 隃

其數五,

合也 獨言 土以 鄭 氏 生爲 生數者, 曰:「土生數五 本。」 以 五. 愚謂 居 ,成數十。 數 之中,與 四 時 皆言成數,土 但言 中央之位 Ŧi.

其味甘,其臭香,

味甘。 鄭 屬 焉。」 氏 曰:「土之臭 物以土化,則 馬氏 晞 味 孟 其 曰 : 也,凡物之甘、 (氣爲香。) ❶ 稼 穡 作甘 香者 故 其

其祀中雷,祭先心。

鄭 尊 及 之先祭心者,五藏之次,心次肺,至此心 神在室,古者複穴,是以名室爲 肺 氏 也 肝 日 祀中霤之禮,設主於 爲 :「中雷,猶 俎。 其祭肉,心肺肝 中室 也。 牖 土 各 下,乃 主 霤 一,他皆 中 云 制 央 爲 祀 而

「物以土化則其氣爲香」,據《禮記義疏》爲方慤語

O

國主社 中霤。」 功 開 土之母也。土兼載 之中而 如 其 祀 ,故用其所由 上 户 配 之禮 」,是也。 取 愚謂: 乎土也。 明,故 生 雨雷之,是以後因名室 季夏祀中霤者,以其 祭先心者,心屬火,火者 孔 《郊特牲》「家主中 氏 四行,不以有所勝爲 日 「古者複穴,皆 ·雷 居 室 爲 而

天子居大廟大室,乘大路,駕黄駵,載黄旂, 衣黄衣,服黄玉,食稷與牛,其器圜 如殷 中,故曰「大廟大室」。 隅之室,故曰「大室」;以其 大廟大室,明堂五室之中也。 土始王之日居之以順 之以聽朔,季夏之末,無聽朔之事,蓋但於 「圜,于權反。閎,音宏。」〇《吕氏春秋》「閎 輅 也 而 飾之以黄。 稷,五穀之長,屬 車 時氣與? 明堂十二室,皆居 馬 衣服皆黄者 士。 處 以其尊於四 乎四堂之 大路,制 以閎。《釋 牛,土 作 揜 \_\_\_, 順 畜

土

色

應 南北 室皆 行之主,尊之,故大之。 西 以 也 二筵,無大小也。 中 九筵,南北 孔氏 閎,象土之周布於四 南 央大於餘室。」 四 睘 北 日 : 則 步,東西四步四尺,則周之明堂 流轉不滯 三步,東西三步三尺,中央 :「案《考工記 七筵,凡室二筵。』是 中央獨稱大者,土爲 閎 則翕受宏多。 一時 記》:『周 然夏世室四旁之 而 包載 人明 廣 五室皆 堂,東 大也 土:

禮 記 卷 + 六終 斂

更於庚,悉

新

於辛。」

鄭氏

## 禮記卷十七

成。」

愚謂

庚辛屬

金

,故凡日之值庚辛

者屬乎秋。

日

秋

時

萬

物皆

肅

然

改

更,

秀

實

新

## 月令第六之三

素時七月節,昏斗六度中,旦畢十度中。 翼者,南方朱鳥之第六宿,而鶉尾之次也。 翼者,南方朱鳥之第六宿,而鶉尾之次也。 翼者,南方朱鳥之第六宿,而鶉尾之次也。 秦漢《三統書》,七月節,日在張十八度,秦 秦時七月節,日在翼二度也。又案《三統 秦時七月節,日在翼二度也。又案《三統

國史館纂脩孫希旦集解賜進士及第翰林院編脩

音辱。」. 其神蓐收。《釋文》:「少,詩召反。蓐,

謂: 皥。 蓐收,在 少皥氏之子曰該,爲金官。」 鄭氏曰:「此白精之君,金官之臣,自古以 日 而 來著德立功者也。 「西方收斂,元氣便少,故西方之帝謂之少 蓐 王,其號亦曰少皥,祭金帝則以配食焉 蓐收,言秋時萬物摧蓐 少醇,在天金德之帝。 收,祭金神則以配 地 金行之神。 少皥,金天氏。 食焉。 該爲金正,其官亦 金天氏乘 而 收 孔氏 斂。」 蓐收 金德 티 :

其蟲毛,

其日庚辛,

高

氏誘曰:「庚辛,金日也。」

《漢書

律

馬 故 氏 秋 晞 則 其 孟曰:「白虎,金屬 蟲 毛。」 吴氏 澄 也,其 日 西 類 方 爲 毛,

四九三

走,得陰之少者也,故 物之毛者皆屬 胃 昴 、畢、觜、參七宿,有虎之象,故 金。 屬秋。 愚謂 毛蟲陸 處 凡 而

其音商

氣和 之爲言章 鄭氏曰: 則 屬金者,以 商聲調。」《漢書·律志 「三分徴 也,物成熟可 其 益 濁 次宫,臣之象 章度也。」 以 生 商 商 》曰:「商 數 也 七 秋 +

其祀門,祭先肝。

律中 夷則

《漢 去 七月。」 曰: 鄭 Ŧi. 度,而使 十 分五釐一毫。」 氏 書 ,律長五寸七百二十九分寸之四百 『夷則所以 曰:「夷則者,大吕之所生也。 孟秋氣至,則夷 陰 律志》曰 蔡氏元定 氣 夷 詠 當 歌 「則,法也,言陽 傷之物 曰 九 : 則,平民 則之律應。 「處暑 也。 則夷則 位 無貳 於 《周 氣正 申 五. 在 語 寸 法 <u>Ŧ</u>i.

其數九,

九 者,金之成數 也。

其 辛 腥 鄭氏曰:「辛、腥,金之臭味也,凡物之辛、 味辛,其臭腥 ,故其味辛。 者皆屬焉。」 物以金化 馬 氏 晞 孟 則 其 日

.

「從革作

氣爲腥。」

尊也。 陰也。 制肝及 鄭氏 祭先肝 東,其他皆如祭竈之禮。」 祀之先祭肝者,秋爲陰中,於藏值 曰:「秋,陰氣 祀門之禮,北 且秋主 肺心爲俎,奠于主南。 者,肝 屬 内,内從外始,故秋祀 木, 出,祀之於門, 面設主於門左 秋金勝 愚 又設盛于俎 木,用 謂: 外 肝 門偶 福,乃 陰也 其 門。 所 爲

戮。 涼風 《吕氏春秋》「用始」作「始用 至,白 露 降, 寒蟬 鳴,鷹 乃祭鳥 ,用始行

勝

也。

也。」 殺,以 也」。」 猶若供 鳴 蟬 之後 之中 鄭 鳥之時,先殺 云 也 生於夏,前 氏 也 鷹 寒螿 티 : 案《釋蟲》云: 其殺,故言『白』,蓋白 不必 兀 愚謂: 祀先 高 方氏 面 氏 鳥 皆記 也 陳 盡 神 誘 者 鳥 之,世 此 陰 慤 食。 一,不敢 日 將 時 似 而 氣 未 日 : 候 不食 蟬 食之, 是 盛 若人 : 鳴, 謂 也 『蜺, 而 「春 即 而 之『祭鳥』。」 月 與與 小, 至 食, 露 君 示 鷹 寒 露 是 重 人之祭 寒蜩。』郭 青 摰 有 蟬 行 爲 故 則 月感 一, 故 赤。」 秋 殺 先 生 刑 寒蜩 色白 之正 鳥 也 一,秋 二示 食相 陰 鷹 戮 於 氣 有 景 之 露 欲 孔 既 謂 色 大 似, 故 而 先 純 澤 寒 則 食 氏 而 蜺

衣白 天子 「駱,音洛。」 衣 居 服 總 章 白玉 左个,乘 ,食麻與犬,其器 戎 路, 駕 白 駱, 廉 以深。 載 白 族,

> 中 方 總 犬,金畜也。 也 章 深邃,象金氣之嚴 ,飾之以白。 而 章 左个,明堂 明 成熟,故 器 白 廉 西方之南 以 馬 日 肅 深 黑 總 者 鬣 而 章。 室也。 收 曰 外有 斂 也 廉隅 戎路,兵車 麻, 萬 物 而 金穀 其 西

以 子曰 是月 立 秋 軍 皥 立 迎秋於西郊,還反賞軍 帥 也,以 而 秋,七月之朔 之日,天子 : 諸將 祭之於西郊之兆,而 某 日 文. 秋。 也。 立 親 秋 以,盛德 先立 武 氣 帥 也。 三公、 人,軍 秋三日,大史謁 帥 在 迎 九卿、諸侯、大夫 士之 、武人於朝 金。」 秋 金 者,迎 天 天 有 氏 子 勇 配 白 乃齊 力者。 食 帝少 之天

功,以 方。 ○《吕氏 天子乃命將 《釋文》: 征 春 秋 不 義,詰 順 帥 詰 作 選 去吉反。 巡 士 誅 暴 厲 慢, 兵 好 簡 以 呼 報 明 練 反。 好 桀 惡 俊 恶, 烏 專 順 路 彼 任 遠 有

賞之者,

將

順

秋

氣

而

耀

武

也

四九五

其罪。 蓋 用 曰:「此亦因 之之事。 者,慢於上。 任之不專,亦 用,然後 練 簡 則 此 戰者危 時 無 其 擇之而 誅,謂 也。 不 專任 順服彼遠方之國也。 人選之則 所征如 事 利。 時 暴慢即不 討 無 非 有 以其器 桀 氣而著此令,非謂出 其人。 以 有 功之將,以征不 此 俊 無 責 已試之效者不 ,所以 其 不精。 即 練 義之人,詰 暴者,暴於民 成功 習之也。 士之材 明我之好義 兵,謂 也。 勇 彭 義之國。 詰 敢 士既 誅 者 氏 其 謂 任 器 師 廉 即 ൬ 一,而 慢 必 夫 惡 征 問 可 簡 厲

止姦,慎罪邪,務搏執。是月也,命有司脩法制,繕囹圄,具桎梏,禁

爲 傳之於古 [梏,春之所去,則繕之具之。 將 順 秋 . 則脩 氣 而 斷 而 明之。 刑 也。 繕 令 亦 吾 脩 ,春之所省 禁其姦以 也 法 制

> 及於無 若周 謂搏 刑 有 戒之於未然,罪 源順 罪 也 擊 天 禮 辜。 而 地 • 拘 孟秋之政,首言治兵, 可 肅殺之氣也。 「搏執」言「務」,又戒其縱釋 執之。 隸 》「搏盜 其那 「罪邪」言「慎」,懼其 以治之於已 賊」之「搏 而 犯 繼 搏 以 搏, 平 濫 明

戮有 命理 蔡氏及高氏《吕氏春秋注 文》:「創,初良反。 反,「決」字下屬,今從之。 罪,嚴斷 瞻 傷、 察創、視折、審斷,決獄訟必端 刑。 斷,丁 天地始肅,不可 ·亂反。」○注 並以 「審斷」爲 疏以 句,「 審 以 斷 斷」字徒管 贏 決 爲 平, 《釋 句

折 傷 創也,折 肉皆絶 蔡氏邕曰:「皮曰傷,肉 周 又重於創,故視之。 輕 八禮》則 T, 故 日 也,斷 瞻之而 士 斷。 師、鄉 也 己。 , 四 愚謂: 士、遂士之屬 者皆掠治 創 斷又重於折,故審 重 理,治獄之官 日 於 創,骨 傷, 罪 也 故 人 日 察之。 傷 所 折 致。 广,於 也,

乎輕重之宜而無所頗。 政令之寬縱 端,謂明於曲直 皆恐 其 也。 以 之辨 創 承上文而言,所以戮 重 致 而 無 死 贏者,肅之反,謂 矜 所 枉 恤 平,謂 之意 也 有 得

罪,嚴斷刑者,所以順天地之氣也。

可隄矣。

通一

障,其爲民禦患

也。」

是月也,農乃登穀。天子嘗新,先薦寢廟。 也。」 穀亦用犬與? 此 方氏 官,謂之后稷,土穀之神,謂之社稷,凡以 稷言『穀』,以其爲五穀之長也。 之黍,仲秋之麻,季秋之稻,皆穀也。 爾。 慤曰:「穀謂稷也。孟夏之麥,仲 愚謂:當 皇氏 侃曰:「不云牲,記 麻 嘗稻在秋,皆用犬,嘗 稼穡之 文略 獨於 夏

命百官始 心收斂。

鄭氏 是 秋主收斂,命百官始收斂者,官之收斂,以 月始 曰:「始收斂,順 也 秋氣 也。 愚謂

> 完隄防,謹 壅 塞,以 備水潦。 《釋文》:「隄,本又作

『堤』,丁兮反。 防,本又作『坊』,音房。」

應氏鏞 時則完而 曰 : 謹之,蓋夏潦 「夏時脩利堤防、無 不可 隄也 有 秋 壅塞,秋 潦則

愚謂 不能無損壞,故又脩之。 :季春脩利隄防,當大雨 辰角 見而 時行之後, 雨

是時 雨猶 未畢,故云「備水潦」。

脩宫室,坏牆垣,補城 郭。 《释文》:「坏,步回

○《吕氏春秋》「坏」作 坿。

無「諸 是月也,毋以 大使,出大幣。《释文》:「使,色吏反。」〇《吕氏春 鄭氏曰:「象秋收敛,物當藏 」字,「以割地」作 封諸侯,立大官, 「割土地」,「行大使」二句 毋以 也。」 割 作「行 地,行 秋

割 爲其逆收藏之氣 地 有功而 加 賜者。 也。 封諸 ○鄭氏 侯,始建 曰:「古者 @國者。 幣,出大使」。又此下有「行之是令,而涼風至,三旬」十字。

四九七

陰陽爲出 地,失其義。 於嘗出 田 邑, 内, 不必 此 其 愚謂《 八月也。 以 古制繩 月令》之法,大抵 而禁 之。 封 諸 説已見 侯、 順 割

仲

秋

之月,日在

角,香

牽

牛

中,

日

觜

觿中

《释

○《吕氏春秋》「觿

」作「巂

「觜,子斯

反,又子

髓

反。

觿

户

圭

反,又户

規

反。

乃來。 孟秋行冬令,則陰氣大勝,介蟲敗穀,戎兵

孟夏」章。

J春令,則其國乃旱,楊氣復還,五殼無實。蟲屬冬。敗穀者,稻蟹之屬。J鄭氏曰:「亥之氣乘之也。介,甲也。甲

《释文》:「復,扶又反。還,音環,又音旋。」行春令,則其國乃旱,陽氣復還,五穀無實。

行夏令,則國多火災,寒熱 、释文》:「瘧,魚略反。」○鄭注:「今《月令》『瘧疾』爲『疾 風 鄭 除 氏 也。 曰:「寅之氣乘之也。 五穀無實,陽氣能 不節 早者,雲雨 生而不能 民 多 瘧 成。」 疾 以

鄭氏曰:「巳之氣乘之也。瘧疾,寒熱所

爲

也。

疫』。」

必矣。 度。 五日 度中,旦 案漢《三统書》,八月節,日 度,若至觜初 分五刻,約 分,昏、旦中星 六宿也。 漢時立秋後七日日在角初 角者,東方蒼龍之第 八月節,中星相 度; 度中也。 日 自牽牛二度至井四 秦時 在 一井二度中,則秦時立秋昏時 角 案《三統書》八月節,昏 減 立秋,旦 初 漢時立秋,旦 + 度,止一 度也。 相 去一百七十五 八度,當 去一 時 觜觿,西方白 百 宿, 百 當 度,得 相 井 時 四 八 度,秦時立秋後 在 而 去一百五 觜 四 + = + 軫十二度,則 壽星之次 度,加晨、昏 度 觿 八度, 一百五 斗二 中 已 度有 也。 西過 虎 其 十六 + 之第 十五 牽 也 + 秋 牛 誤

音商,律中南吕。 其日庚辛,其帝少皞,其神蓐收,其蟲毛,其

八月。」 陽 物。』」《漢書 南吕之律應。 鄭 氣旅 ,律長五寸三分寸之一。 、氏曰:「南吕者,大蔟之所生,三分去 助 夷 蔡氏元定曰:「秋分則南吕五寸 則 任 《周語》曰: • 律 成 萬 志》曰:「南,任也,言 物也。❶ 『南吕贊 仲秋 位於酉,在 氣 至 陽 則 秀

「盲,亡庚反。」 盲風至,鴻鴈來,玄鳥歸,群鳥養羞。《釋文》: 其數九,其味辛,其臭腥,其祀門,祭先肝。

異。」丹鳥羞白鳥。』 説者曰:『丹鳥 以 鄭 玄鳥歸,謂 曰:『九月,今《夏小正 中國 氏曰:「皆記 爲居。羞,謂所食 去蟄 也。 時 候 》作「八月」,孔云:「鄭所見本 凡鳥 也。 隨陰陽者 也。 盲 風, 《夏小正》 也者 疾 1,皆不 風 謂 也

> 世曰: 風。 也。 彭蠡。 所美之食,養之所以備冬藏也。」 養羞』。」 方氏慤曰:「盲風,又謂之閶 將至,群鳥養進其毛羽禦寒也,故曰『群 月,候時之雁從北 者云[丹良],故云[未聞孰是]。」 高氏誘曰:「是 羞白鳥」,是二者文異。《月令》云『群鳥』,《夏小正》説 是。」疏云:「《月令》云『群鳥養羞』,《夏小正》云『丹 盡食也。」二者文異。群鳥、丹良、未聞孰 者,重其養者也。 丹良也。 《傳》曰:『玄鳥 玄鳥至以陽中,故 「群鳥至秋,與百穀俱成,人取之以 玄鳥,春分而來,秋分而 白鳥 也者,謂 有翼 漠中來,南 氏,司分者也。』寒 閩 爲 歸 蚋 鳥。 以 也。 陰 過周、雒、之 中。 去,歸 養也者,不 其謂之鳥 項氏安 羞,謂 蟄 氣 置 所 鳥

「陽」、《漢書・律曆志》作「陰」,是。

0

爲 至秋食之。」 養 羞 如如 雉、鷃、鶉、鳩、鴈、鶩,❶今人皆 愚謂: 群鳥養羞之義未詳

高 氏、方氏、項氏之説,未知孰是。 以《夏

小正》之義推之,方氏稍長

衣白衣,服白玉,食麻與犬,其器廉以深。 天子居總章大廟,乘戎路,駕白駱,載白旂,

總章大廟,明堂之西堂也

是月 文》:「糜,亡皮反。 也,養衰老,授几杖,行糜粥飲食。 粥,之六反,《字林》羊六反。」 《釋

也。 順物之成而養之也。 行猶賜 也。」 高氏誘曰:「陰氣 鄭氏曰:「助老 發, 氣

老年衰,故共養之。今之八月,比户賜 年 鳩 少,不能乾食,故糜粥爲養老之具。」 杖、粉餈是也。」 張子曰:「老人津 高

有長 文》:「量,音亮,下『度量』同。」〇《吕氏春秋》「恒」 乃命司服具飭衣裳,文繡有恒,制有小大,度 液 短 ,衣服有量,必循其故,冠帶有常。 作「常」。

> 《詩》云『七月流火,九月授衣』,於此作之 服 衣服,謂朝、燕及他服。 司服,春官之屬 也。 文,畫也。 也。 祭服之制, 凡此爲寒益 鄭氏 畫 曰:文繡,祭 衣 而 至也 繡 裳。

五〇〇

可也。 所用采色之成法也。 量,即大小長短之齊 冠帶,因制衣服而作之。」 限 祭服 也。 重,故言之詳。 故,謂 愚謂: 制 度及

餘服輕,故言之略。

教反,又乃絞反,《字林》作『撓』,非。」 乃命有司 枉橈不當,反受其殃。 申嚴百刑,斬 《釋文》:「當,丁浪反,橈,女 殺 必 當, 毋 或 枉 橈。

百百。 高氏誘曰: 曰:「申,重也。 必當」。 軍 凌弱 刑 「有司, 斬、獄刑 爲枉,違 當,謂值其罪。」 理官。 殺,皆 彊 爲 刑 重 橈。 非 其 事 愚謂: 故 鄭氏 故

<sup>0</sup> 鶉」,四庫本《項氏家說》作「鳴」。

大辟 不當 民 孟 命 秋 之刑 既命嚴 也 ,則反受其殃,明有國 一者皆謂之「不當」。 於百 尤宜慎也。 斷 刑 刑 中又特言 矣, 是 枉 月 則失人, 橈 人命至 又命 法,幽 「斬殺必當」, 申 重,用 -嚴之, 有天道 則 刑 失 以 重

長 文》:「行,下孟反。 芻豢,瞻肥 是月也,乃命宰、祝循行: 犧牲,視全具。 巡」,「饗」作「享」。 短,皆 中 瘠。 度。 中,竹仲反。」〇《吕氏春秋》「循」作 察物色,必比類。 *Ŧ*i. 者備 當,上 帝 量小大 其饗。 八,視 《釋 案

具,謂 牲事 羊曰芻,犬豕 宰、祝,大宰、大 鄭氏曰:「於鳥獸肥充之時,宜省群 大大祝 則肥 體完也。 減 掌 接 日 則 豢。」 瘠 草食曰芻,穀食 神,故命之循 祝,主祭祀之官也 肥肥 者乃中爲 愚謂: 行。 大宰掌 牲 日 也。 豢。 犧 牲也。 費 養 牲 比 牛 全 Ŧ.

門

磔禳,以發陳

氣

,禦止疾疫。」然則凡

矣。

鄭氏引《王

居

明堂禮》曰

「仲秋,

滯,則中乎人而

爲害,道

而

行之,則

其

害

天子 ○《吕氏春秋》「難」下有「禦佐疾」三字,「達」作 類也。 達,謂道 合也。 當,雖上帝至尊,猶且饗之,則 祭天地之牛角繭栗,宗廟 黝 是月陰氣 也,物色也,小大也,長短也,五者皆得其 中度,謂中大小長 牲, 乃難,以 不及於國 望祀各以其方之色牲,必各比於 小,謂羔犢。大,謂 必比 而行之也。 始達 類者,若 達秋氣。《釋文》:「難,乃多反。」 於地上,故 人者, 短之度 陽 凡天 以 祀 陰 也。 之牛 成性。 用 地不正之氣 天子爲 氣 騂牲 餘 猶 全具 角 神 冷陰 未 通 長短 握 難 口 盛 (也,肥 是 以 知 祀 也。 也。 凝 其 用

無

可

逃也

以犬嘗麻、先薦寢廟。

皆有磔禳之祭,此不言者,文略

也。

π. O

稻 麻 始熟也 ,皆以犬 秋 食犬,故是月嘗麻,九月嘗

倉。《釋文》:「窖,古孝反。」○《呂氏春秋》「窖」作「笷」。 是月也,可以築城郭,建都邑,穿寶窖,脩囷

鄭氏 穿窖,所以盛穀也。圓曰囷,方曰倉。」 都,無曰 災。」 命庶民畢入于室,曰:「時殺將至,毋罹其 寶,方曰窖。 邑。 「爲民將人,物當藏 高氏誘曰: 穿水通寶,不欲地泥濕 《王居明堂禮》曰:『仲秋, 或 有先君宗廟 也。 入地隋 也。 日

愚謂: 入也。 者,或當建則建之。此皆以寒氣至而民 郭者,則築之。 築城郭,謂舊 穿竇窖,以藏 建都 時已爲都 穀於下,脩困倉 邑,謂舊時未爲 邑而 未 以以 都 有 藏 將 邑 城

> 古者。 《月令》興土功以仲秋,此亦秦制之異於 之功多。 務,火見而致用,水昏正 案《左傳》:「凡 而 土功, 裁,日 至 龍 而 見 畢 而 畢

文》:「趣,七住反,本又作『趨』,又七緑反。 乃命有司 趣 民 收 斂, 務畜菜,多 畜,丑六反。」 積 聚。 《釋

○《吕氏春秋》「畜」作 也。 曰 : 鄭氏曰:「始爲禦冬之備也。」 他物皆當積聚而蓄之。」 蓄」,以禦冬也。」 「有司,於《周禮》爲場人。 蓄菜,乾苴之屬也。《詩》云『亦有旨 吴氏 澄曰:「菜之外, 愚謂:孟 場,協 高 秋「命 氏

乃勸 吕氏春秋》「其有」作 種麥,毋或失時。 「其或」。 其有失時,行罪 一無疑。

收斂」,斂其在民者也。

百官始收斂」,收其在官者也。此言「趣民

鄭 氏曰:「麥者,接絶 續乏之穀, 尤重

郭

建都邑。

脩之補之之功少,築之建之

脩宫室,補

城

郭

而已。

此月則

可 以

築

城

孟

秋

穀於上,此皆以禾稼熟而穀將藏也。

誘

年秋穀 黍稷 百 穀 未 孔氏曰: 登,麥此 不言『勸』, 前 時熟,乃 年秋 麥獨言『勸』,是尤 穀,至夏 接 續其 絶盡,後 、乏絶。

重之。」

「环」作「俯」。 浸,子鴆反。涸,户各反。」○《吕氏春秋》「雷」下有「乃」字,浸盛,陽氣日衰,水始涸。《釋文》:「坏,音陪。是月也,日夜分,雷始收聲,蟄蟲坏户,殺氣

小之也 中動 涸 致梁,以利農也。」 九月末也。 而 鄭氏曰:「又記時候也。 止,而曰水竭,非也。《周語》曰 ,主於動,不 雨畢,天根見而水 内 成梁。』辰角見,九月 物 涸,竭也。 也。 《王居明堂禮》曰:『季秋除道 坏,益 唯地中潛伏 孔氏曰:「雷是 此甫 涸 也。 本 雷始收聲,在 雨畢 八 蟄 而 八月中, 也。 蟲 己。 前 益 『辰角見 户**,** 天根見, 除道,水 雨 至十 氣 謂 陽 未 稍 地

> 斗、角。《吕氏春秋》「同」作「一」,「角」作「齊」,「斗」作 日夜分,則同度、量,平權、衡,正鈞、石,角 升」。 穴也。 小。 坤爲 氣尚 月一 温 陽生,震 以陰氣將至,是以坏之。 地,是動於地下,從此月爲始。 以土增益穴之四畔,使通明處稍 ,猶須出入,十月寒甚,乃閉之也。」 下坤 上,復 卦 用 事,震 稍小,以 户 爲 ,, 謂 動

作「人」「集」作「雜」、「財」下有「物」字。四方來集、遠鄉皆至、則財不匱、上無乏用、四方來集、遠鄉皆至、則財不匱、上無乏用、是月也、易關市、來商旅、納貨賄、以便民事。

旅,賈客也。匱亦乏也。遂猶成也。」 孔鄭氏曰:「易,謂輕其稅,使民利之。商

在 財 財 事乃 所須 也。 氏 市之税者,所以散財 彼。 用 也 日 了然而 成。」 俗性 自足。 商 關 旅 故 既 市 商旅去之,則財 愚謂: 是故國家 來, 或 既 無 貨 易,商旅 乏用。 重關市之税者,所 賄 也,然而 自 足用之道,在 自來,是來 上下豐足, 用必 是 商旅 納 貴 貨 趨之,則 賄 此不 故 以 商 輕 也 關 聚 旅 百

凡 乃。 吕氏春秋》「舉大事」作「舉事」,「大數」作 舉大事 此下有 ,毋逆大數,必 「行之是令,白露降,三旬」九字。 順 其 時, 「天數」,「慎」作 慎 因 其 類。

衆也。 天道 愚謂 郭 鄭 宜温 季 氏 也。 ,陰宜肅,陽宜發宣,陰宜收斂也。 曰:「大事,謂興土功,合諸侯, ·秋教 此 季夏禁之,孟秋始征伐,此月築 天道 承上「百事 田 獵,是以 運 而 爲 乃 四 於中爲之戒焉。」 遂」而言。 時,時各 有 大數 舉 介,謂 城 兵 蓋 陽

> 又因 財用 用 之足,逆天 既 而戒之。 足, 則 時 百 而妄舉大事,又不可 事 無患於不遂,然恃 也, 其 故 財

仲秋 恐。《吕氏春秋》「有」下有「大」字。 ·行春令,則秋雨不降,草木生榮,國乃有

陽動 鄭 氏 也。 日: 「卯之氣乘之也。 國乃有恐,以火訛 相 草木 生榮, 應

《釋文》:「復,扶又反。」〇《吕氏春秋》無 「乃」字。

行夏令,則

其國乃旱,蟄蟲不藏,五穀復生。

鄭氏曰:「午之氣乘之也。」

行冬令,則風災數起,收雷先行,草木蚤 釋文》:「數,所角反。」 死。

物。 鄭氏 草 木蚤死,寒氣 先猶 曰:「子之氣乘之也。 蚤也。 盛 雷先收聲,冬主 也。」 風災,北風 一閉藏 也。 殺

季秋之月,日在房,昏虚 中,旦 一柳 中。

房者,東方蒼龍之第四星,而大火之次也。

星 節 節 北 共 度,秦時 案漢《三統 已西 十五度, ,昏虚四度中 ,昏虚二度中,旦 方玄武之第四宿 過 寒露十 九度,秦時 則 書 漢 Ħ 也。 時 九 日 寒露 月 張 也。 漢 節 九 在房初度也。 初 月節, 時 日 十二日,日 度 案《三統書》,九月 九 位中,則 在氏 月節 旦當 秦時 五. 張 在房初 日 度。 虚者, 三度 時 九 月 氐 柳

中

也

音商 其 日 復 也 Ŧi. 鄭 示民軌儀。』」 一,律長四寸六千五百六十一分寸之六千 周 言陽 始, 百二十四。 氏 律中 庚辛,其帝 語》曰:『無射所以 無 氣 無 厭 究物, 射。 已 無 也 射者,夾 少皥,其 季秋 《漢 《釋文》:「射,音亦。」 而使 位 書 氣至,則 於戌,在 陰 • 神 鍾之所生,三分去 宣布 律 氣 蓐收,其蟲毛,其 畢 志》曰:「射,厭 喆 無 剥落之,終而 九月。」 人之令德, 射之律應。

氏元定曰:「霜降則無射長四寸八分八釐

四毫八絲。」

以祭也 也。 爲賓客然。 之『祭獸』。」 未 鄭 未至也。 毛,其色黄,於是月 語》云『雀人 來賓」者,雁以 去 氏 曰 也 ",猶 高氏 「皆記 是月鴻 大 言「鷹乃祭鳥」, 鞠,治 于 水,海 誘 愚 曰:「豺,獸 北爲鄉,其在中國 時 海爲蛤」, 雁 謂 候也。 蘠 來賓,始至中 殺獸 也 也 八月鴻 祭獸 來賓,言其客 四 故 孔 也,似 用 韋 雁 知 氏 始 陳之, 戮 來 大 或 曰 禽,殺 也,若 行 始 水 狗 也 戮 是 世 行 而 爾 來 或 ıŀ. 謂 長 海 曰 而

禽亦獸也,其名通爾。

衣白衣,服白玉,食麻與犬,其器廉以深。天子居總章右个,乘戎路,駕白駱,載白旂,

是月也,申嚴號令,命百官貴賤無不務内,以總章右个,明堂西方之北室也。

會天

地之藏,無

有宣

出。《吕氏春秋》「内」作「人」。

「藏」、冬將至也。會猶合也、言會合於天者、謂卿大夫、賤者、謂士也。無不務内、言其收斂皆當畢也。秋主收、冬主藏、官言其收斂皆當畢也。秋主收、冬主藏、官申嚴號令、申孟秋收斂之令也。百官之貴

又反。」○《吕氏春秋》無「乃」字,「穀」作「種」。收於神倉,祗敬必飭。《釋文》:「之收,如字,又守乃命冢宰農事備收,舉五穀之要,藏帝藉之

地

藏

物之時

也

帝藉,所耕千畝也。藏祭祀之穀爲神倉。鄭氏曰:「舉五穀之要,定其租税之簿也。

用也。 孔氏 尤以神倉爲 蓋凡物皆藏,而以 溼朽蠧之患也。此承上「會天地之藏」言, 要,於將藏之時,核其多少之實數,以 冢宰藏 祇 而又敬,無不飭正也。」 亦 敬 日 祗敬 也。 帝藉所收禾穀於此神倉之中,當敬 神倉者,貯祀 重也 必飭,言當蓋藏完密,以 祗敬必 五穀爲重 一飭,重 鬼神之倉也。 愚謂:舉五 一粢盛之委也。 ,五穀皆藏 避 穀之 制 而 燥 命 或

是月也,霜始降,則百工休。

皆

人室,謂自廬舍而入居於都邑也。

上丁,命樂正入學習吹。《釋文》:「吹,昌睡反。」

○《吕氏春秋》無「命樂正」字。

學,合聲」,即 吹籥。」 春 人學習吹, 故習吹。 爲陽,陽 孔氏 人學教國子以吹 主 《周 此季秋 動,故習 曰 : 《 禮 習 周 籥 吹, 舞。 禮 師 ・大胥》「 一, 秋 也。 爲 使習之也。 掌 陰,陰 教 或 秋 主 頒 子

是月也,大饗帝,句。當,句。犧牲告備于

「犧牲皆備」告於天子也。秋祭也。二祭皆於是月行之,故有司以大饗帝,祀上帝於明堂也。嘗者,宗廟之

白 侯制」爲句,「百縣」下屬。 爲度,以 於民輕重之法,貢職之數,以 合諸侯,制 縣二 句。」今從之。 給郊 百縣 廟 ,爲來歲受朔日,與諸 之事,無 吴氏澄云"「『合諸侯』一句,『制 有 所 遠近土地 私 鄭 氏以 侯 所宜 所 「合諸 税

> 貢,非 等采 品之類。」 爾。 事 事 秦正 諸 宜 男 民 所宜之度,於頒朔而并令受此法焉, 者,有輕重之法,貢於天子者,有遠 朔於内外而使受之。諸侯、百縣之稅於民 而定其制也。 制」,互文也。 ,如《禹 服 ,無有所私者,言所以令諸侯入貢,凡 者有制,奉上者有準矣。 侯,畿外之諸侯。 天地祖宗,而非 貢 建亥,九月爲歲終,故於此頒來歲之 地之屬。 但 張 器 給郊廟之用,特 貢》 氏 物 虑 衛 徐州貢土五色,揚州 合諸 曰:「遠 於諸侯言「合」,於百縣言 朔日 服 有所 貢 侯,制 ,來歲十二月之朔也 百 財 私於己也。 縣 近所宜,若《周禮 物之類 畿 白 舉其重者言之 以給 縣,皆 内 鄉、 郊 土 諸侯之 貢 近 謂 遂 地 廟 則 合之 金 及 土 所 之 取 地

是月也,天子乃教於田獵,以習五戎,班馬

政。《吕氏春秋》「班馬政」作「獀馬」。

之。」 戟 鄭 之政也。 卒,亦非也。 先鄭分而爲二,非也。 兵車 之皆爲矛,猶唐、大、夾、庾之皆爲弓也。 圍,殳、矛守,戈、戟助」,是也。 酋矛、夷矛 殳也,矛也,戈也,戟也。《司馬法》「弓矢 矢而無夷矛。』」 矛、夷矛。』後鄭云:『步卒之五兵,則有弓 也。《校人職》曰:『凡軍事,物 人,左執弓,右持矛,後鄭以弓矢專屬於步 兵』,鄭司農注:『五兵者,戈、殳、戟、酋 也。 法也。 氏 馬政,謂齊其色,度其力,使同乘 孔氏曰:「《周禮 「教於田 五戎,謂五兵:弓矢、殳、矛、戈、 此 仲夏 因  $\mathbb{H}$ 獵 愚謂: 五兵者,弓矢也, 因别群 獵 因 而 田獵之禮,教民以 頒 而 馬 司兵》『掌 頒 一乘,甲士三 政,用馬 馬 政,養馬 馬 而 之 五 頒

> 有「以」字。 有「以」字。 有「以」字。 「於」、「施」下有「興」字、「授」作「受」、「面」作「嚮」、「嚮」下反。 授如字,又音箭。扑,普卜反。」〇《吕氏春秋》「旌」作屏外,司徒 搢扑,北面誓之。《釋文》:「騶,側求解,及七騶咸駕,載旌旐,授車以級,整設于命僕及七騶咸駕,載旌旐,授車以級,整設于

陳也。 僕者,大僕、戎僕之屬也。 騶、説文》云: 載旌旐。❶ 鄭氏曰:「僕,戎僕及御夫也。 非書》:「使騶盡粟以 馬,主爲諸官駕説者也。 又有總主之人,故七騶。」案《左傳》晉使 七騶,皇氏云:「天子 食馬,蓋《周禮》馭夫、僕夫、 「御也。」《左傳》:「孟氏之御騶豐點。」《韓 屏,所田之地門外之蔽。」 級,等次也。 馬六種 食馬。」翳 整,正 既駕 趣馬 種 列也。 之,又爲之 七騶,謂趣 掌 之屬 别 御、又掌 愚謂: 有翳, 也。

政也。

敘

和

以

旌

也

整

者。

監之。 主之翳 卿大夫戎事之車,皆官給之,田 命騶皆駕之, 授車於大宫,公孫 八常,諸 下之車,各以等級授之也。 鄭 《大司 物,郊 屏,以 爲左、右和 ,略言之也。 出 陳車 爲 蓋 左 析 曰「咸 一仲 侯 乘 右 羽 馬 木爲 野 徒之行列。 載 即 馬 秋教 爲 載 陳 而 駕」者,王出 乘 御 旂 旌 之,樹 旐 軍, 大 六騶 馬 車 「仲冬教大 之門,群吏各帥 治 龜 僕 百官載旗 徒 授車 御 兵,辨旗 閼 吏 與 ,有司平之。 以下各監 蛇爲 屬 於和 載 與 設,謂 ? 以 焉 潁考 旗 級, 旐 則 騶 \_ 門 物物 閲 心。」此 五. 師 掌 之外 設 叔 謂 之用。 《左傳》鄭 其 皇 《周 路 遂以 獵 都 駕 驅 諸 其 争 所 氏 皆從, 既 載 馬 獨 亦 逆之車 車 車 以 侯 禮 御 所 舉 陳 然也 旜 狩 ·, 則 徒 爲 軍 王 路 謂 而 乃 田 旌 以 蔽 伯 吏 鄉 載 大 故 僕 總 故 設 궄 以 司 車 庶 小 於

旐

者

遂

載

大

駕

也

程

百

馬

之後。 令者。 在未出 教戦 左右 法之罰。 表貉,誓民」,此 象 馬》於大閱 . 無自後射 則 司 司 和 騙 君 但 徒北 然後 門之外 用 徇 徒 逆 掌 戒 親 搢, 搢 之車 陳」, 也。《 師 此 和門之先, 其 其 誓 若《周禮 誓於屏 面 從禽之不 田 政 社 用 向 此 獵 言 而 師 於 教 周 整 屏 教 陳 帶 則 群 是 與 禮 以 而 外 田 而 設 戰 注 車 田 間 君 也 其 皆有誓 誓之。 其 獵之誓也。 吏 於 徒、設 如法者 之誓 謂 親 獵 戒 也 小 聽 事 引《漢田律》云「無 屏 田 車 禁。」扑 誓 之誓,在 誓 司 重 外 獵之誓 也。 師 徒 焉。 四 于 佐 徒》: 故 者, 背 謂 其 時 車 陳 故《郊 也 於蒐 門 《周 之田 事 教戰之誓, 既 前 忧 誓 所 也 既 教 稍 而 田 凡 斬 以 出 禮 以 田 特 戰 司 南 用 獵 皆 犯 劉 教 和 牲 • 徒 面 故 之 戰 門 大 既 干 衆 以 田 犯 出

别 綏 知 諸 也? 兵 唯 左傳》: 言諸侯 别 ( 辨旗 侯 建綏,但 建 司 戦 大白 田 建大白, 徒誓之而 蓋王之車皆建大常,若即 獵 時 殺 物之用,王建大常」, 亦 以 亦 其 則 衛 然。 即 建龍 大常與 大 下 侯 田 己。 戎,木路建 小綏。」 小 不 獵 《王制》:「天子 旂, 王 不 去 則 ◎大 (族則不 同 其 大 耳。 則 旗 常 戰 諸 司 了, 是 外别 大麾 時 大綏、 侯 馬》「仲 而 亦 以 以 建大麾 殺 建 甚 戎 以 巾 下 小綏,既 則 」敗。」是 則大 大  $\dot{\mathbb{H}}$ 田 車 秋 常 獵 下 教 也 常 革 皆 大 口 何 治

天子乃 几 月令》『獵』爲「射」。」 方。 作 属 《釋文》: 服属 厲 飾 飾 執 「挾,于協反,又音協。」〇《吕氏春秋》「厲 挾 」作「操」,「獵 挾 矢 以 獵 作 命主 射。 祠 鄭 祭禽 注 于 今

殺

則下之,而

下

世

于 鄭 氏 四方,以 曰 厲飾 所獲 禽祀四方之神 謂 戎 服,尚威 武 令司 也。 馬 職》

> 是月也,草 韋弁服 弁 獵異 服。 服 也。 禽以 禮 必及 澤、丘陵、墳衍之神,兆之各以 祠 弁服。」 四方與社稷,爲五行、五土之神,祭社稷者 日 服 也 : • 掌 服 凡甸, 祀方」,春言「社」,秋言「方」,互見之 大司 四 者 〇孔 羅 祭祀 義 秋冬之田 方,祭四 獘, 木黄落 用 田 乃馬》春 氏 冠之 獵 冠 愚謂: 之官。 無 致 曰:「熊氏云: 皆 弁 所 禽 物,而 田 冠弁服 乃 服 出 方者亦必 1, 章 以 《司服》「凡兵 獻 伐 几 祀 弁服。 蓋 弁用 禽以 方 薪 如弁之制爲之者 祊 也。 兀 爲炭 皮,冠 及 四 時 祭社 『戎服者,韋 熊氏 若春 類 之 社 田 一,秋 稷 其 及 愚 用 謂 事, 教 夏, 方者 也。 山 謂 繒 四 田 林 韋 戰 則 時 也 也。 弁 冠 弁 致 唐 111 冠  $\mathbb{H}$

鄭 爲炭以禦冬寒也 氏 티 : 伐木 必因 殺 氣 方氏 慰曰:

暬 有 蟲 罪 咸 俯 釋 文》: 在 内 墐, 皆 所 墐 靳 其 反。 户。 趣,音 乃 趣 促,又七住反。」 獄 刑 毋留

○《吕氏春秋》「内」作『穴」。

者,繼事之辭。 墐 建亥,歲首不可 孟秋,申於仲秋,至是則獄辭皆具,而秦 明此月可 言之者,蓋蟄 又塗閉其户穴,以 下,故蟄 謂 趣 決之也 塗閉之。 蟲 順 咸俯 時 蟲 而 是月殺氣 以一趣 墐 以行刑,故當刑者皆於此 其 行 户, 辟 首 殺 斌 地上之殺 也。 因天 以 刑」繼「蟄蟲墐户」 隨 益 地 斷 在 盛, 刑 殺 下之陽 氣之盛 之事,始於 氣也。 而 陽 氣 以 氣。 乃 ĪĒ. 在

收 者」字,「供」作「共」。 禄 秩之不當、供養之不宜者。《釋文》:「當,丁 供,九用反。 養,餘亮反。」〇《吕氏春秋》「當」下有

月

不 鄭氏曰:「禄秩 宜 欲 所 貪 嗜, 不 當, 若 熊 恩所 蹯 之 增 加 屬 也。 非 供養 常 食

> 之説。 時,乃嚴 禄 人繼粟,庖人繼肉」之類,皆供養 之財以養老孤」、《孟子》言國 禄而 無勳 也。」 收」,則供養非謂王之所飲食,當如 秩、供養,或有過從其厚者,至此 官爲共給者謂 於國 高 蓋有位而 核其當否 氏 故收 誘 日 ]:「供 之。 有常禄者謂之禄 而收之。 之供養。 養之不 愚 謂:二 《周 君養賢,「 宜 也。 禮 秩 事 謂 收 皆 平 門 無 高 所 斂 時 廩 歸 氏 養

是月也,天子乃以犬嘗稻,先薦寢廟

季 秋 鄭 氏 行夏令,則 曰:「稻 始熟 其 國 也。」 大水,冬藏

殃

敗、民

多

鼽

嚏。 嚏」作「窒」。 《釋文》: 「鼽,音 求。 嚏,丁計反。」〇《吕氏

《釋文》:「竟,音境 行冬令,則 鄭氏 曰 : 國多盜賊,邊竟不寧,土 「未之氣乘之也。」 ,後同。」 地分裂。

竟之象也。大寒之時,地隆坼也。」鄭氏曰:「丑之氣乘之也。極陰爲外,邊

解、懈同。○《吕氏春秋》作「師旅必興」。《釋文》:「煖,乃管反,又許元反。解,古買反。」○今按:行春令,則煖風來至,民氣解惰,師興不居。

孟冬之月,日在尾,昏危中,旦七星中。 直角,角主兵。不居,象風行不休止。」 鄭氏曰:「辰之氣乘之也。巽爲風。辰宿

度,秦時十月節,旦時當翼五度中也。節,日在尾十度,秦時十月節,昏時危十六度度。又《三統書》,十月節,昏時危十六度度。又《三統書》,十月節,昏危十四度中,度。本《三統書》,十月節,昏危十四度中,是宿,析木之次也。案漢《三統書》,十月

其日壬癸,

志》曰:「懷任於壬,陳揆於癸。」 鄭氏高氏誘曰:「壬癸,水日。」 《漢書・律

《帝顓頊,其神玄冥,《釋文》:「顓,音專。頊,許者皆屬乎冬。 萌芽。」 愚謂:壬癸屬水,故日之值壬癸曰:「冬時閉藏萬物,萬物懷任於下,揆然

玉反。」 其帝顓頊,其神玄冥、《釋文》:「顓,音專。 頊,

鄭氏 德王 謂: 者,水之色玄而幽闇 者,冬物閉藏,其 官亦曰玄冥,祭水神則以 玄冥,在地水 冥,少皥氏之子曰脩,曰熙,爲水官。」 來著德立功者 顓頊在天,水德之帝也。 ,其號亦曰顓頊,祭水帝則以配食焉。 曰:「此黑精之君,水官之臣,自古以 行之神。 也。 德專一 也 顓 頊,高 脩及熙 耐 配 静 陽氏 Œ 食 高陽氏 爲 也。 焉。 水 也。 正 顓 以 一, 其 水 愚 玄

其蟲介,

故冬則其蟲介。」 吴氏澄曰:「北方斗、馬氏晞孟曰:「玄武、水屬也。其類爲介、

其數

物之甲者皆屬水。」 愚謂:介蟲沈重而牛、女、虚、危、室、壁七宿,有龜之象,故凡

下伏,得陰之極者也,故屬冬。

其音羽,

宇也,物 鄭氏 和 貝 羽 屬水者 曰:「三分商去一以生羽, 聲 聚藏宇覆之也。」 調 门以以 其最 漢 清 書 物之象 律志》曰 也。 羽數 冬氣 四十 羽,

律中應鍾。《釋文》:「應,「應對」之應。」

利器 陽 鄭 至 日 日 ,律長 一,則 閡 :「應鍾,言陰氣應亡射,該 氏 :「小雪則應鍾四寸六分六釐。」 種也。 用,俾 曰 : 應鍾 四寸二十七分寸之二十。 應鍾 之律應。 應 位於亥,在十月。」 復 者,姑洗之所生, 也。」 《周語》曰:『應鍾 漢 藏 書 蔡氏 萬 三分去 孟冬氣 物 律 元定 而 志 均 雜

六者,水之成數。

其

孟曰:「潤下作鹹,故其味鹹。物以水化,者皆屬焉。氣若有若無爲朽。」 馬氏晞鄭氏曰:「鹹、朽者,水之臭味也,凡鹹、朽味鹹,其臭朽、《釋文》:「朽,許九反,本或作「死」。」

其祀行,祭先腎。

則其氣爲朽。

腎亦在 故自 鄭氏 也。 禮,北面設主于載上,乃制腎及脾 道路之神也。 其他皆如祀門之禮。」 爲軷壤,厚二寸,廣五尺,輪四尺。 辟除之類也。祀之先祭腎者,陰位在下, 于主南。 用其藏也。 曰:「冬,陰盛,寒於水,祀之於行,從 祭先腎者,腎屬水,冬氣静 下,腎爲尊也。 又設盛于俎東,祭肉腎 冬祀之者,以其爲往來之交 ○《白虎通》、《 行在廟門 愚謂:行,謂宫内 而 淮 外之西, 復其所, 爲俎,奠 ,脾再, 祀行之 南子》、

同耳。 盛德在 亦云: 羝以 蔡邕《 道 之軷,祭古之行神,城外之軷,祭山 或 疑。○行神所主不同 行」,人,「釋幣 、聘禮》記云:「出祖,釋載。」 載祭行神,此 《聘禮》「釋幣于行」,此宫中之行神 路之神。」其説非是。 外之行神也。 城,以 獨 「冬爲井。」夏盛德 《曾子問》疏引崔氏説,謂:「 水,似乎祀井爲宜。 斷 》皆云:「冬祀井。」《 興 嗣 于 歲」、《聘禮》出,「釋幣 行神皆主道路 ,門」,則行爲五祀之一無 《月令》冬「祀行」, 在 然《詩》云「取 火 太玄 而 但 祀 所主不 竈 • 宫内 III 數》 也 及 于

《釋文》:「蜃,常忍反。見,賢遍反。」水始冰,地始凍,雉入大水爲蜃,虹藏不見。

蛤曰 鄭 語》云: 氏 蜃 日 『雉入于淮爲蜃。』」 「皆記 孔氏 時 曰 : 候 也。 知 大水爲 大水, 高 氏 淮 淮者、《晉 誘日 也。 大

> 「虹,陰陽交氣也。是月陰壯,故藏不見。」 氏春秋》作「宏以弇」。鄭注:「今《月令》曰「乘軫路」,似當 衣黑衣,服玄玉,食黍與彘,其器閎以奄。《呂 衣黑衣,服玄玉,食黍與彘,其器閎以奄。《呂 作「袗」,字之誤也。

斂 以奄,謂其中宏大,其口揜 順水色也。 色黑如鐵者也。 玄堂左个,明堂北方之西室也。 而 藏物於内也。 黍,水穀。 車馬衣服皆以玄及黑 彘,水 小,象冬氣之收 畜 也。 鐵驪 器閎 馬馬

於北郊,還反,賞死事,恤孤寡。立冬之日,天子親帥三公、九卿、大夫以迎冬立冬之日,天子親帥三公、九卿、大夫以迎冬子曰:「某日立冬,盛德在水。」天子乃齊。是月也,以立冬。先立冬三日,大史謁之天

死事,謂死國事者。 頊 立冬,十月之朔氣 ,祭之於北 郊之兆,而 也。 孤寡,死 迎冬者 高 陽氏 事者之妻子。 一, 迎 配 黑 食焉。 帝顓

及贊 所以 孤」,是 無 士 德 周 所命者,冬主閉 厲兵,皆迎氣日 和 禮 令,孟 、桀俊之屬, 順 殺氣 也。 司 夏迎 門 蓋行 也。 孟 氣 以 孟 此 藏 發命以應時氣。 秋 行賞 賞以 春 其 ,不别發命者,亦所 迎 財 迎 氣 後,則 氣 勵 養 行賞後 死 死 行賞後,則命 敵者之氣,亦 政之老與 命習合 孟 則 冬獨 禮 命 以 選 樂 布 其

察,阿 卦吉凶,於是察阿上 筴,初格反。」○《吕氏春秋 是月也,命大史釁龜、筴,占兆,審卦,吉凶 今《月令》曰 之, 」句,「則罪」下屬。 攘磔之祭名。 大史,當作「大卜」,卜筮官之長也。 順 時 神 黨 氣 之也。 則 也。 『釁祠』。」〇按 罪 無 今當以 亂法者則罪 龜 龜、 有 所 掩 》作「命大ト禱 筴 得 注 「卦」字「察」字「罪」字爲句。 蔽。 所以 疏 日 審 之,無有 兆, 筴 《釋文》: 卦 卜筮,於歲 吉 祠, N 揜 所 龜、筴占 「釁,許 蔽 句, 得 \_ 「是察 釁者, 日 鄭 首釁 1兆,審 靳 注: 挂 反 是 呵

> 之。 私 凶 有 釁龜、筴,與周異矣。 凶 龜」,謂建 實告也。 也。 附 爲 事 於下。 前 吉者,必治其罪, 阿,謂 鄭 卜筮,則占兆、審 蓋因命釁龜 寅 氏 其 之月  $\Box$ 有 或 所曲 《周 有 也。 阿 禮 狗於上 秦 、 策, 而 黨, 無 掛 以 得 而 以以 龜 其 有 以 人》 歲 言此 掩 察所行之吉 黨,謂 吉 首 蔽 爲 使 上 以 而 X 大 春 預 有 不 史 所 釁 戒 以 以

是月也,天子始裘。

愚謂:四時之服不同,而獨言「裘」「葛」鄭氏曰:「九月授衣,至此可以加裘。」

者,以其爲寒暑之大别也。

通 命 別 有 司 塞 曰:「天氣 而 成冬。」《釋文》:「上,時 上騰, 地 氣 下 掌反,又如字。」 降,天 地 不

○《吕氏春秋》無「塞」字。

陽在上,爲天氣上騰,三陰在下,爲地氣下孔氏曰:「以《易》卦爻象言之,則七月三

降 鄭 言皆是 欲 義,不相妨 氣 陰 在 + 上,陽 氏 用 月 使之順天地 下降」。 以 地 事 以 也。 氣六陰俱升,天氣六陽並 氣 「閉門户、塞窻牖」言,非 地 歸 應言之,則 《易》含萬物,言非 也。」 體在 於 〇閉 虚 而 下,陰下連於地,故 無,故云『上騰』。 愚謂:命有司以此者, 行 塞 閉藏之令,下文三節所 成冬,乃言天地之氣。 從五 月 地 一端,各取其 氣 是 謝。 上 地 云 騰 氣 天 地 六 體 至

辇

月令》『疆』或爲『璽』。」

聚,才柱反,又並如字。仲冬同。」 命百官謹蓋藏,命司 釋文》: 「藏,才浪反,又如字。 徒循 行,下 行 積聚, ·孟反。 無有 積,子賜 不 斂 反

鄭氏 謂 主 積 孟冬命百官謹蓋 一斂,故 、聚,謂 禾稼之露積者。 日: 芻禾 孟 謹 秋 蓋 命百 薪蒸之類 藏 藏。 謂 官始收 斂,謂: 府 民間之收斂,視官爲 庫 納之於困 斂。 困 倉 愚謂 冬主藏 有 藏 倉。 積 物 (),故 聚 也 秋

> 奚。」○《吕氏春秋》「坏 邊竟,完要塞,謹關 坏 反,又其偃反。 城郭,戒門 行而 稍 晚, 趣之,爲其尚有未斂者 故仲 間 秋 要塞,先代反。 () 脩鍵 趣 |作「坿 民 梁,塞徯徑。《釋文》: 收斂,至 閉,慎管籥 三,「疆 塞徯,上 作 此 也 璽 又 为 固 先則 命 鄭 封 司 反,下音 注 疆 「鍵,其 徒 備 循

管籥 擬盜賊 溝樹 鄭氏 完完。 也。」 害 有破壞,故云『脩』。 「慎」。 坏。 處 及其 曰 : 也 搏 故 門閭備禦非常,故 關梁禁禦姦非,故 封疆 孔 鍵 「坏,益 梁, 氏 云『備. 衆庶之守法 器 理 日 也 橋 當 : 險 梁 也。 古 城 阻 也。 管籥不可妄開, 封 要 故 郭 鍵, 寒 也。 疆 當 徯 云『謹 云。固 云『戒』 謂 理 牡; 須 徑 要塞,邊 宜 使 牢 牢 禽 閉 有 厚, 固 潤 徯徑 邊 鍵 디 牝 故 故 之 故 閉 城 竟 循 也 細 防 或 言 道 要 其. 云

所 小 以 狹 路 固 或 故 關梁所以 須『塞』。」 通塗,塞絶徯徑,爲 高 氏 誘 曰 : 要 其 塞

喪紀

也。

敗

田

「塋,音營。壟,力種反。」〇《吕氏春秋》「塋」作「營」。大小、高卑、厚薄之度,貴賤之等級。《釋文》:飭喪紀,辨衣裳,審棺椁之薄厚,塋、丘壟之

有」之「功」作「工」。

厚薄, 紀」,謂 鄭氏 尺。』蓋周之士制外無文。」 少 所 椁 土 辨衣裳,謂襲斂尊卑所用 下各有等差。』又《檀弓》注云:: 人》云:『漢律,列侯墳高 *\_*° 一而 有 以 厚 高 爲 具在《喪大記》。 薄 者 正 孔 貴 「此亦閉藏之具,順時飭正之也 氏 ,塋有大小,丘 日 飭喪事之條理。 賤 「丘壟。 日 之等級,辨之審之,皆以 :「衣裳襲、斂多 喪紀之衣裳有多寡 丘壟大小,鄭注《冢 一壟有 四丈,關内侯 墓域 也,所用又有 高 愚 卑厚 少,及棺 謂: 日 『墳 薄,皆 飭 正 高 棺棺 封 喪 以 棹 多 飭 兀

> 是月 情。《釋文》:「當,丁浪反。」〇《呂氏春秋》無「命」字,「功 名,以考其 作 爲淫 也,命 巧, 誠,功有不當,必行其罪 以 Ι. 蕩 師 效功, 上心,必 陳 功致 祭器,案度 爲 ¨,以 程 物 窮 勒 毋 其 或

之情。」 生其 容也 度程 也。 效功,録見百工 鄭氏曰: 以蕩上心」,於其 材精美而 祭器尊也。 毋作淫巧,以 不奢淫。」 一,戒淫 竭其力謂 淫巧, 「霜降而百工休,至此物皆成 器 愚 巧,而未能功致 度,謂 不堅 謂 謂 之功,盡其 蕩 孔氏曰:「功有 一所 奢僞 古 季 方作 E 作 制 春 也。 心」,於其 器 怪 大 云「毋 而 小 物 好 窮其 戒之也。 心 也。 也。 也。 猶 謂 或作爲淫巧, 情 既 之致 未得爲器之 不當, 蕩,謂 窮其 程 主於祭器 成 一,謂 此又言 而 詐 雖合 察之 謂 器 摇 也。 僞 用 動 所

其既 完」,築氏爲削,曰「敝盡 工記 善 其誠」者如此 能 遽 也 用 辨 輪人》曰 必 勒 而考之,則其 用之而 刻 也。 「輪敝 後 器之功致 見,故刻 誠 ,三材不失職,謂之 僞 而無惡 莫能 與 I 否,一 」,所謂「考 逃 名於物 矣。 時 於於 考 未

是月也,大飲烝。

「飲酎」也。多也。曰「飲烝」者,猶獻酎於宗廟,而曰丞,冬祭宗廟也。曰「大」者,冬物可進者

先祖」作「饗禱祖」、「農」下有「夫」字。

力合反。勞,力報反。」〇《呂氏春秋》「割」下有「牲」字、「臘問、臘先祖五祀,勞農以休息之。《釋文》、「臘,天子乃祈來年于天宗,大割祠于公社及門

鄭 也。 氏 牲 五祀,門、户、中霤、竈、行 日 割 「天宗,謂 之也 臘, 日月星 謂 以 辰 田 也。 獵 也。 所 大割 得 或言 大大

皆 秦以 飲 其 臘 言,皆臘祭也。 愚 索響」之説,遂指爲蜡祭。《月令》孟 神,求其説 於神祇,其遲速不同,大約 示,六變而致象物及天神。]此 致毛物及墳衍之示,五變 之示,三變而致鱗物及丘陵之示, 致羽物及川澤之示,再變而致贏物及 惠王始臘。 ○《周禮 祈年』,或言『大割』, 部: 酒 書 相 祭中所 亦作 仲 相 遺 社以上公配祭,故曰「公社」。 以 慰 秋 於戰國 勞也。 水。」《左傳》有「虞不臘」之言,蓋 興 大司樂》:「凡六樂者 而不得,唯蜡祭有「合聚萬 《韓非書》:「山居谷汲者,膢、 有也。 土 功, 臘祭始於戰國。《史記》秦 一時 周 耳。 鄭氏 故 制,營室中而 或言『臘』,互文。」 是月民 勞農,既祭而令民 誤 如是,非 而致 謂 但言樂之感 己 介物 祭 休 土 有 謂 四 息 功 此 變而 冬祈 及 變 Ш 物 此 始。 也 土 林 神 所

乎? 望 社 率用 天宗 卑者復有 辰、社稷、 而 可以及卑,祭卑不可以及尊。 **编祭天** 物」者,謂禽獸百種之屬無所不祭,初 之細,莫不徧及矣。 辰、社稷、四望、山林、川澤之示,羽毛鱗 月令》有臘 蜡祭。 舞《 稷、 猫 其合於《大司樂》徧 河祠 其 虎之微 大 天神 且蜡祭用疈 几 地 説 公社 磬》,乃禮 望 展轉相證,浸淫蔓衍,唐宋議 四望,於尊者既 間之神 ,於是所 厭 舞《雲門 用 而 與焉,乃 降之嫌,求諸 血 無 此 祭。 蜡、秦制 秦 示 辜,而天神用實柴槱 謂 之必 》,地 時 也。 夫蜡祭之曰「合聚 蜡 因 蜡祭之樂,土鼓、葦 致 祈 也者,自日、月、星 而祭及日、月、星 禱之祭。 也 不 示 神 祭祀之禮,祭尊 非專誠之義,於 禮 可 示之説 舞《 意,不 蜡祭 得 郊特 咸 而 池》, 鄭 合 八神, 牲 亦 亦 不 氏 者 燎 禮 遠 四 謂 萬 介 指 又

秋》「率」作

「帥」,「習」作「肄」。

天子乃命

將

帥

講

武,

習射御,

角力。

吕

氏

祭乎? 祠公社 不啻風馬牛之不相及,豈容牽合而指爲一 八蜡之神。《郊特牲》歷言八蜡之神,而無 蜡 語及天宗、公社等之祭。 而 無 門 臘 間,臘 周 制 也。 先 祖 月令》 五祀, 二《記》所言, 歷 而 言祈 無 天宗, 語 及

武。 農,一時講武」也。 獵 大雩在孟 習射御以講 而 茇舍,秋 此即《周禮》「冬大閱」之禮 爾,則仲冬何 唯冬之大閱 及時祭皆以 〇 鄭 振旅,冬大閱,皆所 夏, 氏 謂 車 以 而《月令》在仲夏。 仲月,而《月令》酎以 此 爲盛、《左傳》所 乘 反不言「大閱」? 「爲仲 之武 角力,角擊刺之技勇。 一角力 冬大閲習之」。 也。 以 以 謂 習 春治 講 三三時 武 周 《周 步卒之 兵,夏 事 孟 禮 夏, =也 務

以孟 嘗以 甚多,或本無此禮,或《記》文疎略,要無庸 其必合。 冬。 季秋,烝以孟冬,教田獵以季秋,講武 至其 此自秦制不同,皆不可 他周禮之不著於《月令》者 以周 制 求

有若此者,行罪無赦 是月也,乃命水虞、漁師收水泉池澤之賦,毋 或敢侵削衆庶兆民,以爲天子取怨于下。 其

以意説也。

鄭 澤之賦,若《周禮· 燩人》之「燩征」、《 謂:水虞,澤虞;漁師,燩人也。 葛》「徵草貢之材于澤農」之類是也。 氏 曰:「因 盛 德 在 水,收其税。」 水泉 掌 池 愚

流亡。 孟冬行春令,則凍閉 不密,地氣上泄,民 多

鄭氏 蟄 蟲 動 曰:「寅之氣乘之也。 民多流亡,象

行夏令,則國多暴風,方冬不寒,蟄蟲復出。

鄭氏 曰:「巳之氣乘之也。 立夏巽用事

巽 爲 風。」

仲冬之月,日在斗,昏東辟中, 行秋令,則雪霜不時,小兵時起,土地侵削 鄭氏 曰:「申之氣乘之也。」 旦軫 中。

文》:「辟,必亦反,又必狄反。」

軫星已西過四度,秦時大雪,旦角五 中,秦時大雪昏辟七度中。 又《三統書》,大雪,昏壁五度中,旦角三度 斗宿,星紀之次也。案漢《三统書》,大雪, 日在斗十二度,秦時大雪當在 也。 漢時大雪,旦 斗十四 度。 度

其日 音羽,律中黄鍾 壬癸,其帝顓頊,其神玄冥,其蟲介,其

中

鄭 以宣養六氣九德。」」 氣至則黄鍾之律 氏 티 : 「黄鍾 者,律之始也,九寸。 應。 《周 《漢書·律志》曰 語》曰:『黄鍾 仲冬

日 者,著宫聲也。宮以九唱六,變動不居,周 焉。地之中數六,六爲律,律有形有色,色 流六虚。 孳萌萬物,爲六氣元也。 上黄,五色莫盛焉。 天之中數五,五 黄者,中之色,君之服也。 「冬至則黄鍾九寸。」 始於子,在十一月。」 爲聲,聲上宫,五聲莫大 故陽 以黄色名元氣律 氣施種於黄泉, 鍾者,種 蔡氏元定 也。

「曷,本亦作「鶡」,同户割反。」 冰益壯,地始坼,鶡旦不鳴,虎始交。《釋文》:其數六,其味鹹,其臭朽,其祀行,祭先腎。

衣黑衣,服玄玉,食黍與彘,其器閎以 天子居玄堂大廟,乘玄路,駕鐵 鳴。 也。 也。 鄭氏曰:「皆記 虎,陽中之陰,陰氣盛,以類發也。」 鶡旦,山 交猶合也。」 鳥,陽物也,是月陰盛,故不 時候也。 高氏 誘曰: 鶡旦,求旦之鳥 驪 「坼,凍裂 ,載玄旂, 奄

玄堂大廟,明堂之北堂也。

飭死事。《吕氏春秋》無此句。

孔氏

曰:「因

殺氣之盛,以飭軍士,令戰

有

必死之志。」

「多」。
「多」。
「出事毋作,慎毋發蓋,毋發室屋命有司曰:「土事毋作,慎毋發蓋,毋發室,

謂:以 藏 衆」二句。沮,當作「且」。 地 是時陽氣潛藏地下,若房舍然。 氣之閉藏 鄭氏曰:「大陰用事,尤重閉 之房也。 ,起大衆,則地下之陽發洩於上,是發天 古 也。 而閉,謂上文所言,皆 蟄 蟲隨陽氣以 此句下當有「發蓋藏,起大 房所以 生,陽 藏。 所以 藏物者, 氣洩,故 若發 古 蓋 愚

於已藏也 冬一月之事,故不言『是月也』。」 暢,達也。 死 欲其謹於方藏 及季冬,而非上包孟冬。 孟冬「謹蓋 孔謂「此非一月之事」,是也。 沴 無發蓋,則孟冬云『謹蓋藏』是也。 暢月」,言其逆天 ,故中乎人而爲疾疫,又隨之以死喪也 氣 用 時 事 當 也。 而 閉 一時 藏 陽氣出 此云「毋發蓋」,戒其發 也。 而 暢達之,故命之日 而干之,二氣 〇孔氏 然此所 非唯仲 曰:「慎 愚 藏」, 命下 謂 乖

不禁。《釋文》:「重,直龍反。省,所景反。」重閉,省婦事,毋得淫。雖有貴戚近習,毋有是月也,命奄尹申宫令,審門間,謹房室,必

之屬。 鄭氏 陰 内宰,掌治王之内政、宫令,譏出入及 類 也。 曰:「奄尹,主領 重閉 淫,謂 外外 内 女工奢僞怪 閉 也。 奄豎之官,於周 省婦 巧物 事 也。 所 以 開 則 貴 爲 静 閉

> 名,或 也。 屬之奄矣。 必奄也。 之下有内小臣、寺人之屬,而其 故有閭。○郝氏 宫中之門閭也。 伯,皆大夫、士爲之,故先王之世,宫、府 法之行,自貴、近始。」 戚,姑姊妹之屬。 馬氏晞孟曰:「貴戚易奢,近習易驕,欲 是書以· 因其 愚謂: 所 此秦作法之弊,趙高所以 奄爲尹,内宰宫政之職,移 領 郝氏之説固善,然奄 者乃奄官,若《周 巷門日 敬曰:「《周禮》内宰、宫 近習,天子 間。 愚謂 宫中有永巷, 所 此門間,謂 爲尹者未 親 禮 幸者。」 尹之 內 專 室 制 如 而

水泉必 乃命大酋, 秫稻 大酋監之,毋 香、陶器必 有 差貨。 必 良,火齊必得。 齊 辨 《釋文》:「酋,子由反,又在 糵 必 時 湛 兼 用 熾 六物 必 絜,

0

反。」○《吕氏春秋》「熾」作「饎」,「貸」作「忒」。熾,尺志反。火齊,才計反。監,古銜反。貸,音二,又他得由反。秫,音述。麴,丘六反。糵,魚列反。湛,子廉反。

出,則 禮 麴 於周 稷、稻、粱之黏者皆曰『秫』,此『稻』既别 云: 也。 此 猶事也。 漬 人之事,不親監作,此大酋監作,故爲 **酋爲『酒人』者,以酒正掌酒之政令及酒** 鄭氏曰:「酒孰曰酋。 至春 也。 春 •酒正》引此『大酋』爲『酒正』,此注大 『春酒,凍醪。』」 此月漬米麴,至春 爲 所 .酒,以 秫 熾,炊也。 酒 以 乃黍、稷、粱之總名。」 而爲酒。《詩》云:『十月穫稻 差貸,謂失誤。 爲 介眉壽。」 酒 秫 也 稻必齊,謂孰成也。 火齊,生孰之調 秫 大酋者,酒官之長 稻者,所以爲 而成,故《毛詩傳》 吴氏 古者穫稻而漬米 孔氏 澄 曰: 愚謂 曰:「黍、 也。 麴 酒 爲 湛, 物 周 糵 出 人

> 泉。《吕氏春秋》「子」下有「乃」字,「源」作「原」。 天子命有司祈祀四海、大川、名源、淵澤、井 今《月令》『淵』爲『深』。」 味。 也。 必得中也。 薜、暴也。器不良,以之炊及盛酒,則能 器,甑、甗、尊、罍之屬。 稻,及以和麴,必欲其香,香謂 熾之不絜,其害於酒 用炊之柴薪也。 盆 則生衣多而力厚 者, 麴之蒸鬱, 必伺其温涼之時 一盎,欲其滌濯之淨也。 火齊,謂火之齊候,炊米和酒 齊,謂 齊同 六者一有失焉,則謂之差貸 成熟,無秕稗之雜也。 如以勞薪炊飯則味變,是 也。 可 湛必絜者 知。 良,謂不髻、墾 熾 必 以 Ħ 絜者,謂 而調適之, ,謂盛水之 水泉漬 冽 ,其生熟 也 鄭注: 助 陶 秫 所 時

夢、大野之屬。四海,水之所歸也。大川、源,岷山、桐柏之屬。淵,深也。深澤,雲大川,江、淮、河、漢之屬。名源,大川所發

佚者,取之不詰。《釋文》:「畜,許六反。」〇《吕氏春 是月也,農有不收 名 源 水 之 氏 流 者。 藏 順 積聚 其 淵 德 澤、 者, 盛之 馬 井 牛 時 泉, 祭之也 畜獸 水 之 有 聚 放

秋》「馬牛」作

「牛馬」。

道,音導。」〇《吕氏春秋》「蔬

作

「疏」。

之收 孟冬命 於孟 愚謂 鄭 得 非 未 禁,所以警懼其主也。 孟冬之月,命農 取 徒 收 氏 耗 之以 物 物之候 秋,藏物始於孟冬。 警懼 敗 曰:「此收斂尤急之時,人有 則 畜獸,羊豕之屬也。 始 於 司 其 於仲 外,牛 爲 其 徒 怠惰 也。 用, 主 循 秋,而畢 行 使 馬 勿率甚矣。 亦「貨惡其棄於地」之意 今其 畢積 積 凍 之急於收 聚,毋 露 積 《王居 聚, 而 於 聚 仲秋 繋收 死 孟 有 非 不不 敛,且 官之收 故又下 冬。 唯不 不 明堂禮》曰 斂 趣 牛 如 馬。」 ·藏,而且 民 至仲冬, 則 取 使 與 · 此令, 物,始 收 者不 其 他 民 斂, 間 積 人

道之。 山 林藪澤,有能 言之,蓋藏易於收 也 其 有 然民之收斂, 相侵奪者,罪 取 疏 食, 既 趣 之再 田 收 未 之不 獵禽獸者,野虞教 有 不 赦。 而 藏 藏 者 《釋文》: 僅 也 於 是

之以 實爲 于林 示其所 高氏 其 日 争 疏 所 中。 食。」 餘 蔬 誘曰:「無水曰 在 力取 食。」 以爲民計者周矣。 既教道以遂其求, 也。 鄭氏 蔬 《易》曰: 食、獵 愚 謂 日 「大澤 藪,有水 禽獸 是時 即 禾 日 又禁侵奪 鹿 教 稼 日澤。 藪 無 道之者, 畢 虞,惟 納 草 故 木 草 之 實 止 命

是月也 之至 鄭 謂 六十刻。 物 氏 티 : 極 動 將 短至,陰陽争,諸生蕩。 萌 以 以 争者,陰 芽也 日 昏 明之限言 出 入之度言,則畫三十 方 ,盛,陽 愚 謂 則 書 欲 日 四 短 起 + 至 也 刻, 謂 *T*i. 夜 短

日

刻,夜 復於下,而諸物之生氣初 分,夜五十九刻五 死生分」,懼陰之長 六十 五 分。 刻 也。 蕩, 今法: 動 也。 也。 冬至晝 動 仲冬日「諸 諸 也。 生蕩者 三十 仲 六刻 夏 生 日 陽 +

(幹)。 「去,起呂反。耆,市志反。」○《呂氏春秋》「掩」作慾,安形性,事欲静,以待陰陽之所定。《釋君子齊戒,處必掩身,身欲寧,去聲色,禁耆

蕩」,喜陽之復也

耆慾。 氏 也。 掩身、身欲寧、以安其形。 則陰自將退 此所言皆與 此謂冬至之日也。 主 曰:「《易》及《樂》、《春秋説》云,冬至, 與群臣 蓋敬慎 事欲静,即仲夏之「静事無刑 聽,而陰陽之争者定矣。 仲夏同 安静,以養微陽之初 從八能之士作樂五日。 齊戒,以安其性。 而 稍略,以彼文可 去聲色,以 起。 此言 ○ 鄭 也。 禁其 陽 互見 處 長 必

『去聲色』,又相反。」朱子説已見「仲

夏」章

「紆」。《釋文》:「芸,音云。荔,力計反。」○《呂氏春秋》「結」作芸始生,荔挺出,蚯蚓結,麋角解,水泉動。

冬「水澤腹堅」,而此云「水泉動」者,謂 鄭氏曰: 動則宛而上首,故結 挺,馬丘也。 曰:「荔,馬荔。 結猶屈也。 「又記 蚯蚓在穴,屈首下嚮陽氣 水泉 挺,生出也。」 時 候 動,潤 而 也。 屈 上行。」 也。 芸,香 草 孔氏 愚謂: 高 也 日 氏 陽 隨 荔 季 誘

日短至,則伐木,取竹箭。

陽氣而動於下也

《王制》「草木零落,然後入山林」,謂此鄭氏曰:「此其堅成之極時。」 愚謂:

是月也,可以罷官之無事,去器之無用者。

月也

五二五五

鄭 藏 氏 而 日 萬 物 :「謂先時 休,可以去之。」 權所建作者也。 天地 閉

塗闕 也。《吕氏春秋》「此」作「所」。 廷、門間,築囹圄,此以助天地之閉藏

者也。 而其 間 吴氏澄曰:「闕廷,畚土以補其凹陷。 又增築之。此月之所築,即至仲春而省之 圄」者,蓋孟秋之繕,特因其本有脩治之, 「省囹圄」,孟秋曰「繕囹圄」,此又曰「築囹 一、埏埴 所省者如故也,至此收藏嚴 以 塞其罅 隙。」 愚 謂 肅之時, 仲 春 門 F

聲。《釋文》:「氛,芳云反。」○《呂氏春秋》「氛」作「氣」。 仲冬行夏令,則其國乃旱,氛霧冥冥,雷乃發 鄭氏曰:「午之氣乘之也。 氛霧冥冥,霜

行秋令,則天時 「雨,于付反。 雨 汁,音執。 汁,瓜 瓠不成,國有 瓠,户故反。 大兵。

露之氣,散相亂也。」

雜下 鄭氏曰:「酉之氣乘之也。 也。 雨汁者,水雪

《釋文》:「疥,音介。」 行春令,則蝗蟲爲敗,水泉咸竭,民多疥癘。 鄭氏曰:「卯之氣乘之也。 之病,孚甲之象。」 蟄者出也。 水泉咸竭,大火爲旱也。 ○《吕氏春秋》「疥」作「疾」。 蝗蟲爲敗,當 疥癘

音羽,律中大吕。 其日壬癸,其帝顓 季冬之月,日在婺女,昏婁中,旦氐 氐十二度中。 宿。案《三统書》小寒,昏婁十一度中,旦 白虎之第二宿。 氐者, 東方蒼龍之第三 秦時小寒,日當在婺女十度。 婁者,西方 也。案漢《三统書》,小寒,日在婺女八度, 婺女者,北方玄武之第三宿,而玄枵之次 度,當胃初度中,旦時氐十四度 秦時小寒,昏時婁星已西過 項,其神玄冥,其蟲介,其

中。

增

損

無

則上生 不同。 吕者,鄭氏之説 位於丑,在十二月。」 蔡氏元定曰"「大 辰皆上生。 六陽辰皆下生,丑、卯、巳、未、酉、亥六陰 之相生,自蕤賓以下,鄭氏與班 雪則大呂八寸三分七釐六毫。」〇十二律 冬氣至,則大吕之律應。 云:「黄鍾生十一律,子、寅、辰、午、申、戌 ,律長 照射下生中吕者,班固之説也。 上夷則,夷則下生夾鍾,夾鍾上生無射, (氏曰: 助陽宣物。」」 也,言陰大,旅助黄鍾 其 一夾鍾 蕤賓上生大吕,大吕下生夷則,夷 大吕、 八寸二百四十三分寸之百四。 「大吕者,蕤賓之所生也,三分益 其林鍾、南吕、應 ,夾鍾下生無 夾鍾、中 也。 《漢書 蕤賓下生大吕,大吕 -吕在 《周語》曰:『大 宣氣而 射,無射上生中 律志》曰:「吕, 陽則用 鍾 在 固《漢志》 西山蔡氏 牙物 陰 倍數 無 也。 所 向。 作 鴈 乳 北 律。 且 雉雊」。 如

旅

吕

鄭

其數六,其味鹹,其臭朽,其祀行,祭先腎 中昌以 者也。 蕤賓三律下生而得之者,特其半律耳 陰呂,律呂皆上生。鄭氏所言大呂、夾鍾 律、陽吕,律吕皆下生, 自午至亥爲陰律 時上時下,非自然之數。 又下生,却當「上生大吕」,故沈存 本而倍之,以爲候氣之用者也。 言者,大吕、夾鍾、中吕之本,用之 方與十二月之氣 候氣,皆用本律,何以此三律乃 雊,古豆反。 鄉, 班固「蕤賓下生」,至蕤賓清宫,不 而 鵲 鄭氏所言者,就大吕、夾鍾 班 蕤賓三律上 始巢,雉 固 乳,如住反。」〇《吕氏春秋》「雉雊 所言大吕、夾鍾 相應。」是蔡氏 雊,雞乳。 生 而 蓋自子至巳 得之者,乃其 、中吕 《釋文》:「鄉,音 用 然 以 、中吕之 倍聲? 三律 中 以 班 十二 爲 疑 調 固 以 陽 月 本 其 口 所

《漢書》云「雉者聽察,先聞雷聲,故《月令》 月 尚 乳,卵也。」 鄭 誘曰:「鵲, 詩》云: 未北 雷應陽氣,始發聲於地中,雉聞之而 氏 日 也,至正 雉 皆 陽鳥,順 愚謂 之朝 記 月候鴈 雊 時 尚 鴈北鄉者,始鄉之而 候 陽 北 也 求 而 始北 其 動 雊 雌 ,始爲 歸 雉 矣。 鳴 巢 高 雊 也 也 是 氏

玄堂右个,明堂北方之東室也。 衣黑衣,服玄玉,食黍與彘,其器閎以奄。 天子居玄堂右个,乘玄路,駕鐵驪,載玄旂,

文》:「難,乃多反。」命有司大難,旁磔,出土牛以送寒氣。《釋

也。 鄭氏 故 出 命大難。 猶作也。 送猶畢 曰:「旁磔,於 也。」 仲秋之難,唯天子行之,季春 作土牛 愚謂:是月陰寒至盛 者 四 ,丑爲牛,牛可牽止 方之門。 磔, 攘 也

> 之難 牛」,或秦時已有此説與? 屬,其説未知 之於九門之外,以禳除陰氣也。 又以土作之、土能勝水、故於旁磔之時、出 之「九門磔攘」也。 尤徧也。 雖 及於國 旁磔,磔牲於國門之旁,即 其始。 人, 出土牛者,牛爲土畜 而不若是月之驅 《月令》季冬「出 十二物相 季 除 春 土 爲

征鳥厲疾。

以

紀

氣」,是也

齊人謂之擊征,或名曰鷹。」 愚謂:厲鄭氏曰:「殺氣當極也。征鳥,題肩也。

氏春秋》「畢」下有「行」字,「天」下有「地」字。 乃畢山川之祀,及帝之大臣,天之神祇。《吕

疾,言其搏鳥猛

厲

而迅疾

也

於帝之大臣者,山川中有嶽瀆,尊也。天臣,即百辟卿士之有益於民者也。山川先畢之,亦秦禮也。帝之大臣,謂先帝之大此於歲終總祭諸神,承孟冬之所未祭者而此於歲終總祭諸神,承孟冬之所未祭者而

之屬,地 社 地 之神 此 所 祇 祭 祇 最 乃丘 天 在 神 一陵、墳 後 乃 者 風 師、 術之屬,卑於帝之大 孟 冬已 雨 師、司中、 祭天宗 司 及 命 公

是月也,命漁師始漁。天子親往,乃嘗魚,先

臣

也

薦寢

廟

魚之時 魚, 明 犒。」●蓋 成,獸虞於是乎禁罝 寒降,土 廟 是月魚美,於始漁 非 重其 登 種 JII 也。 事 自 蟄 禽,而嘗之寢 也 一發, 也。 此 季 月始 春 水虞 所 或 漁,以 而 薦 語》 於 天子親往,爲將 羅 唯 是乎 廟。 里 精 鮪,此言「嘗魚 至 革 講 魚 鳥 於 日 鼈,以 季 獸 罛 古古 春, 孕, 罶 皆 水 爲 取 者 薦 取 蟲 名 夏 大 寢

鄭注:「今《月令》無「堅」。」
「腹,本又作「復」,又方服反。」〇《吕氏春秋》「腹」作「復」。
冰方盛,水澤腹堅,命取冰,冰以入。《釋文》:

水,流 由 處 結 上以 ,言其在水之中,若人之腹然。 而 堅 水 漸及於下,至是月而水澤之腹 固,故可 也。 澤, 取 聚 而 水 藏之也。 也。 腹,謂 入,謂 水 水 皆 之冰 之 於 凝 深

器。《釋文》:「種,章勇反。」〇《呂氏春秋》「命」下令告民出五種,命農計耦耕事,脩耒耜,具凌室。 以入,猶畢入也。

田

「司」字。

愚謂: 鄭氏 故 者,耕必以二人爲 穀之種。 耒之金也,廣五寸。 於歲終預 曰:「大寒氣過,農 令告民,令田 出,謂 、飭之。 出 於倉窖而 耦 也。 官 田 器,鎡 告 事將 之也。 正 簡擇之。 月農事將起 起也。 錤之屬 Ŧi. 種,五 耜 耦 者 耕

命樂師大合吹而罷。《釋文》:「吹,昌睡反。」

「犒」,原文誤作「槁」,今據《國語·魯語》改

0

乎? 之説 族。 吹之成 但言 樂之事於是而終也。 之,則必不然。 《王居明堂禮》:『季冬,命國爲酒,以合三 終,與族 季 所言,古或有是禮,若以《月令》「合吹」當 言「用禮樂」也,大雩用盛樂,必不可但言 而但言「合吹」也,飲酎用禮樂,必不 已於季春見之也。 用 秋 君子説,小人樂。」」 ,則合吹 習 「用盛樂」,則人亦安知其所用爲何事 必無是立文之法也。 樂」也。 也。 吹 人大飲,作樂於大寢,以綴恩 ,至此則合而作之, 此 爲燕飲而舉,必不當 使飲酎 亦當天子親往,不言者,以 言「而罷」者,以一歲學 但言「用禮樂」,大雩 ○鄭氏曰:「歲將 愚謂: 《王居明堂禮 以觀 如鄭氏 含燕 國子 可 也 旧 飲 學

僚。《釋文》:「共,音恭,下文「以共」皆同。燎,力召反。」乃命四監收秩薪柴,以共郊廟及百祀之薪

是月也,日窮于次,月窮于紀,星回于天,數 ○鄭注:「今《月令》無『及百祀之薪 是也。 之柴。 夏而長也。 祀」,舉其重者言之爾。 以給烹飪,燎 鄭氏曰:「大者可析謂之薪,小者合束謂 薪施炊爨,柴以給燎。」 薪 燎 收薪柴以冬,薪至冬而乾也。 所 以 共 助 非 明 , 若庭燎 <del>\_</del>, 合秩芻以夏,草至 燎」。」 獨 日 及 郊 田 愚謂 廟 燭 及 之 百 類 薪

汝也。 也。」 季冬,日月會於玄枵,至此復會於玄枵,故 至此月復次玄枵,故曰『日窮于次』。 耕稼之事,不可徭役,徭役之則志散 匝於故處也。 鄭氏曰:「言日月星辰 言專一汝農民之心,令之豫有 孔氏曰:「去年季冬,日次於玄枵, 次,舍也。 運 紀,會也 行,於此 月皆 去年 失業 志 而 周 於 猶

將幾終,歲且更始,專而農民,毋有所使。《釋

文》:「幾,音祈,又音機。」

事 謂 終」。 使之,則力不堪矣。 乃回復於舊處也。 故星之中於昏旦伏見於東西,亦必盡 之中,皆隨日之所行而異,日行 天,實不待終歲而回,但其東西伏見昏旦 明年正月節,復參中也。 某官之屬者,皆是《禮》家總禁也。」 者、爲國家戒約之辭、《月令》内不云乃命 得 Ŧī. 至今年季冬三百五十四日,未滿三百六十 故曰『星回于天』。幾,近也。 雖 日 文 周 : 星回於天,謂今年正月節,昏參中,至 興起造作,有所役使也。 日,未得正終,唯近於終,故云『數將幾 『月窮于紀』。二十八宿隨 起 天一匝,早晚不同,至此月復其故處 而,汝也。 唯 歲 晚 務間之時少可休息,若又 言在上專一農民之事,毋 小民終歲勤 經 蓋此 星 天而行,每日 以去年季 動,至春農 一歲始 每 脩《月令》 日 愚 一歲 周 周 冬

> 待來歲之宜。《呂氏春秋》無「公」字。 天子乃與公、卿、大夫共飭國典,論時令,以

要無 典有定,故 典,經國之常典。 典之未宜者改之,以經邦治,論時令之未 鄭 論 所謂『待來歲之宜』也。」 協者正之,以授民事。 各正其治,受其會,聽其致事。 馬 須商度所宜 氏 氏 時令必先飭 不出 晞 曰:「飭國 孟 於國 曰:「先王之時,歲終 飭 而 正其 行。 典 國典者,時之所宜雖 典者,和六典之法 也 舊 時令,隨 來歲所宜,謂 而 已。 至正月始和 吴氏澄曰: 時之政令。 時 令無常,故 於是 令百官 時 也 令也。 布馬 不同 飭 國 或 或 府

上帝、社稷之饗。 乃命大史次諸侯之列,賦之犧牲,以共皇天

鄭 小 氏曰:「此 也。 賦 之犧 所與諸 牲,大 侯共者也。 者 出 多, 列 小 國 者 有 大 出

五 三 三

皆然。」 孔氏曰:「言『諸侯』,則同姓、異姓

乃命同姓之邦,共寢廟之芻豢。

犧牲。」 鄭氏曰:「此所以與同姓共也。芻豢,猶

牲,以共山林名川之祀。 命宰歷卿大夫至于庶民土田之數,而賦犧

宰。 地 歷 鄭 者,畿外之國。 具,令百官府 地、社稷、宗廟 「不言『士』,省文。」 氏 《周禮 次也。 曰:「此所 其邑之民多少賦之。」 小小 卿大 共 尊,故 與卿 此 其 宰 夫采 所 財 職 賦 所賦 **\*** 用一, 地 大夫、庶民共者 愚謂:宰,疏以爲 者,畿内之地。 掌 亦有大小,其 者廣。 是也。 祭祀賓客之戒 孔氏 Ш 上 林、名 所 曰 : 非采 也。 天 賦 小

> 氏 皇天上帝、社稷、寢 春秋 以 民出 禱於己也。 民 大夫」,此獨言「民」者,邦國采地之賦 此復總上三節 力者 明 》此下有「行之是令,此謂一終,三旬二日」十二字。 也。 所 爲祭祀者,凡爲民祈 奉祭祀,蓋成 犧牲非國家之所乏,而 而結言之。 廟、山林、 民 而後致 上言 名川 福 而 力於神, 之祀。 必以 「諸侯、卿 非 私 皆由 出 **~** 吕 其 且 於

人保。 季冬行秋令,則白露蚤降,介蟲爲妖,四鄙

露, 也。 畏兵,辟 鄭氏曰:「戌之氣乘之也。 月中乃爲 疏云: 寒象。」 《陰陽式 霜 法》「丑爲鼈 介蟲 爲 妖者 蟹。」 九月初尚 四 Ħ. 鄙 爲 人 有白 鼈

鄭氏曰:「辰之氣乘之也。夭,少長也。《釋文》:「夭,烏老反。」

凡

在

天下九州之民者,無不咸獻其力,以共

111

卑,故所

賦

者狹。

國多固疾,生不充性,有久疾也。命之曰達。胎夭多傷者,生氣早至,不充其性。此月物甫萌芽,季春乃句者畢出,萌者盡

鄭氏曰:「未之氣乘之也。季夏大雨行夏令,則水潦敗國,時雪不降,冰凍消釋。

逆者,衆害莫大於此。」

禮記卷十七終

實

也

## 禮記卷十八

國史館纂脩孫希旦集解賜進士及第翰林院編脩

曾子問第七之一《别録》屬《喪服》。

《禮》者,其常也。 起夫禮,由經以 揣以爲問,夫子隨事而爲之處,蓋本義 意度之外,而爲禮制所未及備者。 子言之,不待其問也。蓋先王所著之爲 夫子答之者也。 者一條,子夏問者一條,餘則皆曾子 此篇多記吉凶冠昏所遭之變。内子游問 ·孔子曰」者,或記者文略,或孔子自 亦有不言「曾子問」, 達之權,皆精義 然事變不一,多 窮理之 曾子 有 出 直日 問 爲 以 預 於 曾 而

> 奠。 又如字,下「聲三」及「三者三」皆放此。」 音無,本亦作『無』。祝聲,之六反,徐之又反。三,息暫反 升,奠幣于殯東几上,哭降。 『大宰』『大宗』『大廟』皆同。祝,之六反。裨,婢支反。毋, 夫、士房中皆哭,不踊,盡一哀,反位,遂朝 大祝裨冕,執束帛,升自西階,盡等,不升堂 命毋哭。 曰:「卿、大夫、士從攝主,北 曾子問日 小宰升,舉幣。《釋文》:「大,音泰,下文『大祝 祝聲三,告曰:『某之子生,敢告。』 : 君 薨而世子生,如之何?」孔子 衆主人、卿、大 面於西 階南

子之子,男也,則立之,女也 傳》:「季桓子疾、命其臣正常曰:『南孺 主,故以庶子或兄弟之子暫主喪事。 此言世子生,告殯之禮也。 喪主者。 桓子卒,康子即位。 蓋世子雖未生,而 南氏 生男,康子 ),則肥 攝主,謂 喪 不 可 也 可。 以 攝 左 請 無 爲

哭之位 退。」所 堂,遠近之節 遠 帛 喪 者,三章之絲冕裳 之禮。天子之大祝下大夫,服 以其上服之次爲裨冕。 西 南。 夫人之氏 喪,故不用其 冕則玄冕也。 王 制 階上 ,升堂又迫 章之玄冕、玄衣、纁裳者也。 三,謂發聲告神者三,欲其聽之也。 而假冕服者,皆視其常服有所降明矣。 麻冕、黼 今以告殯,故在 幣 '¬, 攝 也 謂 也 也。 主在 攝 裨 裳;大保 也。 上服 主」者,謂 近 十端 大祝 猶 殯 作階 殯所,故升階 副 無 而 命毋哭者,告神宜静 繡 爲 接 也 東,西 几筵,此特 服其次也。 西 黼 束。 神,故吉服,又以 麻冕、彤裳。」黼 若康 階南、北 此兼明 益 黻 者也。 也 告於 面,卿大夫 子者 盡 希冕,其 服 天子、諸 設 堂下 面,以殯 等而 以 《顧命》: 也。 彤裳者, 冕 几 此 者, 以 則 知 在 朝 不 也 升 大 在 裳 在 裨 侯 在 其 夕

埋之階間。」 語 神 位 殯 中 告殯,男子在 哭降者,大祝既告,則哭 幣,蓋横設於殯東,與尋常設 凡祭祀,神之所享謂之歆。 夕哭之位也。 子在阼階下西 文略也。 也,亦從攝 大夫之列也。 『歆警神也』。」小 也。 而 耳,異於朝 <u></u> 南 『噫!』是古人發聲多云『噫』,故知 後朝 面,皆爲 『顔淵死,子曰:「噫,天喪予。」』《檀弓》公肩假 孔疏曰: 房中,婦 奠。 主北 宰升,舉 欲 西階 夕哭及受弔也。 「直云『祝聲』,不知作 面 衆主人,君大 告殯在朝哭之後,既告,反 嚮 孔 面 ,婦人在阼階上 鄭 於 下 人 氏 殯 氏 北 也 西 故 幣 今作聲,欲令神歆享,故曰 日 曰:「聲三,噫歆 階 也。 面,故婦 而 所主  $\sim$ 下。 朝夕哭之位 且 不 周 降 几之法 功以上之親 此 也 反 踊 前 ···, 而 禮 何 聲 人在 學 西 位,反 者 不言者 亦 面 北 謂 此 異 而 按《論 西 面 男 下 也 也 室 房 朝 告 於

階,殯前北面,祝立于殯東南隅。祝聲三, 子從,宰、宗人從,入門,哭者止。 宰、大宗、大祝皆裨冕,少師 三日,衆主人、卿、大夫、士如初位 代君聽 其含襚 上 既葬蒲席」,有筵 何所取 又鄭氏謂 終於三年者也,何以下見殯不言攝主乎? 此 告,設奠卒,斂幣玉,藏諸 埋之階間者,下文云『師行,主命』,『反必 職 不備几筵,與設坐位之法異,無他義 筵」也。 有几 幣亦埋階間 『凡祭 於几、筵? 或 幣玉之事。」是幣,小宰所主也。 而 《雜記 政者。 「筵、几 無筵,蓋皆特設之以受幣物,故 祀,贊 也。」〇鄭 》諸侯致含、襚,「有葦席 果爾,則百官總己以 以明 而 玉幣爵之事。 且《記》但言「几」,不言 無 几。 繼體」,不知明 氏 奉子以 兩階之間」,故知 此奠於殯東几 以 攝主爲 子升自西 ,北面,大 衰,祝先, 喪荒 也 繼 E 聽, 體 卿 受 知

> 父』「廟見」「旅見」同。」 告于五祀、山 反。衰,七雷反。 三,襲,衰,杖,奠,出。 三、降東反位、皆袒。 祝、宰、宗人、衆主人、卿、大夫、士哭踊 曰 :『某之子某,從執事敢見。』子拜 從,才用反,下同。 川。」《釋文》:「少,升召反。 子踊,房中亦踊 大宰命祝、史以 見,賢遍反,下『見 稽 奉,方 二三者 顙 名徧 哭, 勇

禮》凶祭,「主人先,祝從」。此在喪中,乃 牲 者 師 猶大祝裨冕之義也。 相王之大禮,故子見皆從。 主,而攝主退矣。 此言見殯之禮也。 命,服毳冕,其裨冕則希冕也。 階南之位也。 不言攝主者,見子則子爲 也。 》、《少牢》吉祭,「祝 氏之上士爲之、《左傳》所謂「卜士負之」 初生未 能 服 大宰主贊王,大宗伯 如 衰 少師主養子者,蓋以 初位者,如 先,主人從」、《士虞 ,故用衰奉之。 天子之卿 二卿 告 殯 裨冕 《 特 時 喪 西

於

西

**「階,而** 

反作階

東之位

也。

節,如

是者凡三也。

以

下

·皆從

而踊

矣。

此

皆

踊者,子初見殯故踊

子踊

也。禮,子生三月見於父,父名之。 「衆主人、卿、大夫、士」之下,則人君朝 位立名,然後告殯」,是也。子拜稽顙 自右,祝在子之右而稍後,直 三者三者,踊以三度爲 降東反位者,降自 初告子生不踊 子某者,稱其名 而當死者之首, 此言「東反位 西階者、居喪 祝立於殯東 門未哭,故 則衆主人 疏 之禮 面 謂「 此見 者 「,殯 也 大 哭位 成服。 作階 之位 踊 婦人 位 東反位者,堂上皆降,堂下者皆東 略 言「宗廟、社稷」者, 出 而衰杖者,成子禮也。 文略也。 也。子又踊者,象小斂後主人初即 異 夕哭之位,卿、大夫、士 曰:「三日,負子日 矣。 也。 ,故不袒,今反朝夕哭位 反於喪次也。 、皆踊,不言「衆主人、卿、大夫踊」者, H 而 欲見婦人在房中及反位皆踊 此 西 皆袒 踊 皆袒者,子及衆主人、卿 三日 見子時,婦人在西房,反位時,在 也。 面,皆與男子拾踊 孔氏曰:「諸 一者,以 子踊 而 以名徧告 衰者,喪已在殯故 也。 初堂上堂下之哭 則衆主人、卿、大 亦 奠,謂朝奠。 一皆同 侯 文略 因負子名之,喪禮 五. 于五 ,故皆袒 ,故言「房中 日 面 也 而 祀 大 與 殯, Ш 夫 反 也。 出者 也。 作階 士 川,不 非 大夫及 鄭 朝 殯 皆 喪

宰即

殯

稱

名

,則名子在見殯之先矣。

哭者,奉子者代爲之也。

殯之東

、南也。

祝亦北

面。

南

隅

者

1,詔辭.

當在

殯之東稍南而北

面

也。

之禮

,升降不

由

阼

階

也。

殯

前

北

南首,子不可正立於其

南

入門

、哭者止者,子乃喪主,初

人

祝

先、子從者,以

告神故,

依

吉

祭

禮

衵

F

衆主人止哭以待之也。

升自

Œ

H

降

氏

孔子 曾子 月乃名于禰,以名徧告及社稷、宗廟、山 釋文》:「禰,本又作「祢」,乃禮反。」 曰 : 問  $\Box$ 「大宰、大宗從大祝 如 已 葬 而 世子 生,則如之何 而告于 禰。 آآر ا ?

宰 朝夕哭,故 大夫、士皆在 名,故三月乃名。」 絰,自依常禮也。 制 板 孔氏曰:「禰,父殯宫之主也。 當稱子某,故 不云『五 葬後不言自顯也。 唯 攝 幣、從可 ,子生則退矣。三月乃名於禰者,三月 『禰』也。不云『裨冕』者,未 政,宗伯主宗廟之禮故也。 有主在,故告於主,同廟主之稱,故 祀」, 知也。 唯 一者,以 大宰、大宗從大祝 互. 三日名之。 相 雖三日不見,其成服 前不云『宗廟社稷』,此 明 不云『執帛』者,凡告必 朝 愚謂: 也。 哭 故 既葬 王 也。 肅 前 葬 既葬,無尸 而告,蓋 云:『未 不言攝 既 告殯 稱子不 尚裨冕, 葬 卿、 不 稱 葬 衰 大 復

> 月 事 子生則攝主可以告退,而見子亦可 葬,則朝夕哭皆在廬,而殯宫無所 乃見於禰 、抱之。 也。 ,故三日即見,既見而後 未 而 名之也。 葬,殯宫 有 喪 朝 必 攝 有 夕 主 哭 主可 主 奠 事焉,故 拜 以待 退。 幼 賓 則 既 之 使

JI, 孔子曰:「諸侯適天子,必告于祖,奠于 按: 牲如字。 之。《釋文》: 冕 日 而 而 乃命國家五 徧 出 ,過是非 視 朝。 「朝, 命 禮 直遥反,下同。 官而 祝、 也。 后行,道 史告于 凡告用牲、幣、反亦 牲,依注 社 而 稷、宗廟 出。 音 告者 制。」〇 禰 如 Ш  $\overline{\pi}$ 

宗廟,謂君 之以視朝, 者,諸侯朝 祖,大祖也。 告」,或言「奠」, 所不親告者也。 天子 所 祖 以 與禰皆設奠以 預 服裨冕,今於將 互見之也。 敬 其 事 也。 告山 告之。 冕 命 出 而 111 祝 時 H 或言 史 就 先 視 或 服 朝

遷主以 告反 史以 者五 者。 於後告者嫌 所 社 四 祖 日,君親告禰 用犬,諸侯降 瘞 喻行道 寸,廣五尺,輪四尺,既祭,以 以菩、芻、棘、柏爲神主,封土爲軷壇,厚二 外之兆 告者 主 方 」,其實告祖最在 亦如之」,鄭謂「伏爲載祭」,則天子載祭 日而 並 以 以 道,祭行道之神於國城之外 次告之。 行。 示 時 行 四 而 用牲、幣,但告反所用之牲重於告 也。 無 相 日告之。 徧者,容日 告之也。 上以 於怠 險難 繼 於天子,軷祭蓋 廟,其祖及曾祖、高祖,使祝 過是非禮 至五 續 也。 尊卑之次,故先言 其禮,故 ,於先告者嫌 至五日告社稷,而 後也。若告山 日, 五. 告一 ^ 官,五 君親告大廟 周 者、蓋過 禮 爲 廟 非 ・犬人》「伏、 車轢之而去, 以狗與? 大 也。 於留 禮 夫 也 Ŧi. 川,則 前行 主 日 告出 其命, 遂 一告于 其 則 遂 或 其 奉 分 奉 五 禮 事

> 天子巡 出 據典 與? 當用特羊,諸 出 以《 行,或留國總主衆事,既命五大夫,亦 國 聘 事者言之。 守 孔 歸歸 禮 氏 日 出釋幣,反釋奠推 假 侯 于祖 或 「大夫衆多、云『五 不云『命卿』者,或 歸 禰 用 特 用 羊,出 特 牛, 之可 用 則 知 《從君 特 其 也 命 豕 出

出。 諸 所告者,而后聽 史告于五 侯 反必親告于祖、禰 相 見,必告于 廟 所過 朝而人。」 Ш 禰,朝服 JII, ,乃命祝、史告至于 亦 命 而 國 出 家五官 視 朝。 道 命 祝 前 而

卿

口

知。

裳、冕 之也。 此 冠,故因 告于禰,謂親告之。不言祖者,使祝 朝 將 服 出 当皆 弁,皆 視朝,不冕服 朝 以 服,諸侯 謂 其 以冠 此 所 服 用 名服 也 之朝 以 爲 祖 諸 服 服 而 廟 侯 玄冠 名。 朝 不 相 服 親 朝 凡 緇 與玄端 告,山 亦 經 衣、 冕服 典言 史告 111 百 素

五三九

次,反 重 後?」孔子曰:「葬,先輕 也,先重而 先。 鄭氏 子 故 親 葬 殯當爲『賓』,聲之誤 不 諸侯朝天子裨冕,其自相 也 僅 反 諸 從 啟 奠,務於當葬者。 則 告 同 後輕,禮 問 葬奠, 侯 自,從 祖 輕 者 於 期 티 : 相 朝、聘之服 所 者 也 後輕 祖 聘皮弁服 禰皆親告者 而 過 爲首; 也。 父 並 也。 並 后 謂 母 ,禮也。」《釋文》:「殯,音賓,出注。」 皆 有 辭 從啟 孔 及世 自啟 所 奠 父 喪, 相 氏 於殯,遂脩 不同: 以 是供養,故 母 不哀次,輕於在 母 叔 티 : 也。 及葬不奠,行葬 , 告反之禮重於告出 貶 朝 如 若 而 殯之後,及至葬柩 兄 於 亦皮弁服 之何? 朝以 後重,其奠也,先 朝 並 親 辭於賓,謂告將 弟。 朝 亦然。 同 天子 葬事。 冕,聘以 葬 謂 者 令重者 父母 之禮 是 同 」,非也 何 熊氏 「殯者。 奪 月 其 先 不 死 也 也 居 虞 哀 何 謂

葬者設 奠至 喪 父 踊 處,廬 有所 徹重 故 節,賓出,遂營脩葬父之事。 者,不更設 欲 之奠有 父之後,孝子告語於賓,以 者,謂葬母還,反於父殯宫 及 云『自啟及 母之 亦先 祖 致 以 出 哀於此 奠、 之時 喪之夕奠而 朝則徹之。 致 偏 堊 朝 所同,而 其哀 重 所不暇及 隆,葬近 遣 夕奠也。 後 室之所在 奠 唯 新 葬不奠」,謂 輕。 也。 ,今行葬 設 而 奠,仍有 母之啟 父喪 今於輕喪既啟之朝,不 已,不於殯宮爲父喪奠,故 則 奠,謂 設 也。 事 愚謂: 也。 凡朝奠至夕則徹之, 朝 尚 不 有所 奠也 舊 次,謂 殯之奠 設重喪之夕奠也。 哀次 在 葬 不 奠 殯 偏 不奠,謂不爲未 時 奠父也。 存 明日啟父殯期 而 急,故 者,喪次 ,故不敢爲母 柩 虞是奠之類 居 蓋 設 也。 朝 至 喪 奠 既 此 廟 次 反葬 於 啟 也 之 奠, 不 乃爲 舍之 則 重 則 哭 奠 奠 喪 哀 奠

矣。 虞以 賓客之處乎? 不哀次」,則 爲大門外接賓客之處 安神 婦人迎送不出門,可謂次爲 故故 非 亦 並有喪者,其葬母 先 重 而 非 後 輕 也。 〇孔 此 固當 大門外接 云 疏 行 哀 以 次 葬 次

孔子曰:「宗子雖七十, 雖無主婦 可也。」 無無主婦。 非宗子,

『七十日老,而 若有子孫,則傳家事於子孫。 鄭 大宗、小宗皆然。 之祭、祭必夫婦親之、故不 :「此謂 氏 曰:「族 無 子 人之婦,不可無 傳。」 孫 及 有子 愚謂: 孫 可以 而年幼 統。 宗子主宗廟 故《曲禮》: 無 主 小者, 孔氏 婦。

則 廢。 、衰、大功之喪,如之何?」孔 子問曰:「將冠子,冠者 如 外喪則冠 冠 者 未 至 而 則 不醴 廢 一、徹 釋 至, 饌 文》: 揖 而 子 埽 讓 日 冠 而 古古 即 人,聞 内 位 亂 反 喪 而

> 異事 也。 鄭 房中者是 子、醴賓,醴賓在醴子之後,既不醴子, 言「冠者」,謂爲人加冠之人也。 門之内,吉凶不可同 喪 不醴實可 愚謂:此篇所言「冠者」,與《士冠 士冠禮》言「冠者」,謂加冠之人 士冠禮》甒醴、勺、觶、 氏 而 不醴 改新之也。 冠 曰:「冠者, 不 也。 知。 孔 - 醴子也 不醴子,故徹之。 饌, 氏 即 曰 : 賓 陳也,所 位而哭,謂喪遠者也, 與 處 加加 角 贊 其 ,故内喪則 廢者 者。 机、 脯、 冠 陳醴 在 喪 内 廟 冠禮 也 醢之屬在 埽者,爲 南 在 喪, 子之具, 成 禮》異。 廢。 服 同 此篇 有 門 則 大 醴 大

之喪,則因喪服 如將 冠子而未及期日,而有齊衰、大功、小功 而冠。」

若

近

,則往哭之。

鄭

氏

日

「廢

吉禮

而

大

喪

冠

俱

成

人之

贊者。 年之喪 者異 禮雖 所筮 喪禮 重也 能備 也? 冠爲 H 服 而 以吉禮爲事 而 H 子」,乃謂 了,就 言禮乃所以事神也。 加 不 重 也 重禮 也 得以成人之服居喪,則是以 ,今既有冠日,乃以不能備嘉禮之故 之 喪次以 有齊衰、大功、小功之喪, 蓋吉禮重於嘉禮 既冠字之,一加而已,而無餘禮也 可 愚 故因喪冠者,非 ,視喪禮則爲輕矣。 H 謂 備嘉禮 也 也。」而 0 雜記》「大功、小功之末,可 乃因 之常 雜 喪冠 未 因 一喪服 記 及期 而 而冠者,與此因喪 此 喪 而 言「將冠 曰 冠 服 凶 行 日 : 也。 禮乃事之變也。 ,以嘉禮所 而 之, 輕冠禮,乃 凶禮又重於吉禮 謂 以 冠 其 既筮 童子於喪服 蓋 者 喪 子 略 亦當 冠 於 則因 如 所 日 而未及 者 以接神 百有賓及 成 服 所 輕 此 而 [喪服 者何 以 服 未 雖 而 以 廢 冠 期 及 之 冠 冠 重 所 不

冠」,是 不欲以未成人之禮服其 蓋 亦 喪末以吉禮 齊衰、大功因 記》云:「以喪冠者,雖三年之喪 者,齊衰、大功之喪,已及冠年則冠,故《雜 不可。」下殤之小功,本齊衰之親也。 除喪以吉禮冠、雜記 「大功之末,可以冠子」,是也。 日 日 下,則有當室,有不當室。 而 而 異 服 ,則大功者,待喪末以吉禮冠,《雜記 則 父母之喪,已及冠年 冠, 之輕 因 也 喪 也 則 重 未 而 有 蓋 ,恩之隆殺不同,故冠之緩急 冠,此記 冠、《雜記》「小功之末 喪 期日 大 而冠 喪 者 而 可 固 所言是 冠者, 》:「下殤之小 ·, 則 知,小 不 親 不當室者,已 必 必 也。 所 因 因 也。 功以 以 齊衰者,待 喪 喪而 若齊衰 可 重 若未 而 下 也 喪 冠 冠 可 功 則 當 服 以 統 筮 明 室 則

「除喪不改冠乎?」孔子曰:「天子賜諸侯、

乎有 大 夫 冠 冕 醮 弁 服 無 於 冠 大 醴 廟 《釋文》: 歸 設 奠, 「醮 ,子妙 服 賜 反。」 服 於 斯

之後 醴質 也。 之」,是也。 鬯之裸 쨈 所 廟 + 尊者所成 子,天子假大 子之大夫也。 改 此 鄭 冠 酢 賜 而後 服 氏 謂有功得 之服 改 而 總 日 設奠者 賜 日 一 一 此 醮。 服 《左傳》「 醮 冠 「酒 故歸 文,醴 醴 而 當 酌 一、告於 之。 冠禮 告廟,明 此 醴之。」 世國,若周、召、劉 未 廟而命之,賜以冕弁,禮 用 爲 諸侯大夫未冠嗣 云「有 酒,尊 重 冠 遂不復行冠禮也。 醮。 有醴 醮 君 而 祖 嗣位,得賜冕弁服 用 冠,必 醮 不爲冠 冠 廟 與醮。 冠 賜 酒 輕。 醮, 也。 愚謂 也。 禮 每每 以 無 諸 禮 醴 服 醴用 不醴 裸 冠 侯冠 也。 大夫, 重 加 賜 位 、單之屬 將之禮 醴 服 而 醴 而 初 大 禮 酌 明 言 醮 夫 謂 據 於 見 用 本 不 而 醮 輕 大 行 服 者 大 五 於 天 天 爲 鬱 無

> 也。 子、庶子之分,非是。 復行冠禮可知矣。 侯,則亦但使人酌酒 夫言之也。 冠禮,故但 受賜 服者 使人酌 大夫冠 如 此 酒 禮當 醮 醮 則 説見《郊特 孔 己 己 因 用 疏 而不 而 喪 醴 以 不 而 今 醴 爲鬱鬯之裸 用 冠 與 牲 以 醴 者,其一 醮 不 爲 若 復 不 滴

伯父叔父,而 爲新其 禮》「醴賓,以一 者,冠於禰 鄭氏 伯父叔父尊,故先見之而后饗冠者。 而 冠, 日 則 事 響 於其父響冠者之 也。 廟 后饗冠者。」 既冠 饗冠者 謂禮之。」 獻之禮,贊者皆與」,是也。 而行告祭也 謂 醴 愚謂 時 賓 也 而 見伯 埽 祭於 父在 地, 士冠 父 禰 亦

矣?」孔 曾子問 日 子 日 :「聞之,小祥者 祭, 如 之 何 則 不 主 行 旅 人 酬 練 之事 Mi

叔父。

父没而冠,則已冠埽

地

而

祭於禰,已祭

而

見

不旅 舉,亦非禮 練 而 舉 奠酬 酬 行 也。 於賓 旅,非 () 賓弗 禮 舉, 也 禮也。 孝公大祥奠 昔者魯 酬 昭 弗 公

所奠觶 也。 祖 祥 日 公大祥奠酬 加 以 加 奠于薦北  $\equiv$ 冠練衣。 "「奠無尸,虞不致爵,小祥不旅 辯 爵之後,兄弟弟子 獻以後 |年之喪,至期而祭,謂之小祥。 父。 爵 無 昭 ,謂之旅 無 則禮畢賓不復取所奠鱓行 公練 酬 算 ,賓取觶奠于 ,主人獻賓及衆賓訖,洗觶 練祭,謂 長兄弟,長 爵, 而 弗 酬。 旅 舉,賢者之過也。 彌 酬,不肖者之不及 練冠 吉 今小祥之祭,長兄 舉 兄弟 也。 薦南。 以祭也。 觶 取 於 孝公,隱 觶 其 至衆賓 、長,賓 酬賓,交錯 旅酬 特性 小祥 也 派酬,大 子 公之 鄭 之禮 弟 乃 長 賓 禮 氏 孝 爲 取 爲 練

> 乎? 乎 朋友,一本作『士則朋友奠』。」 文》:「與,音預,下至『説衰與奠』皆同。 喪,斬衰者奠,大夫齊衰者奠,士則朋友奠。 可 不足則取於大功以下者,不足 禮 孔 孔子曰: 也。 子 日 曾 : 子 「非此之謂 日 贵 : 大 功 不 耳 以 也。 輕 自 爲,于僞反。 天子、諸侯之 服 則反之。」《釋 斬 而 衰 重 以 下 相 士則 皆 爲

謂 不 衰。不奠者,避天子、諸侯之禮也。 服者皆斬衰 者奠,故直曰 己有大功之服,而與於他人之喪奠,故 饋奠,謂執喪奠之事 人多,取於大功以下猶不足,則使執 大夫之禮 與於饋奠」。 足 僚屬。 則 取 也。 士卑,不嫌 於大功以下,不取 也。 「奠」。 孔子所言,謂有服 不足則反之者,謂殷 大夫之臣爲大夫,亦 天子、諸侯之喪,爲 與 也。 君同,故 曾子 齊衰 所 使 而 問 其 者,又避 奠 爲 朋友, 者, 屬 時 所 奠。 者 斬 君 服 謂

曾子問曰:「大功之喪,可以與於饋奠之事

先者反之」。凡喪禮,主人皆不親奠。往而復反也。《公食大夫禮》「士羞庶羞,

者,蓋 爲 此 吴氏 功 八稍輕, 則 他人奠矣。」 澄 知有服之人但爲所服者奠,而不 以 曰:「曾子 斬、齊 或 可 與 服 人殯 重 初 必不 奠。 問自『大功之喪』始 可 而 執 孔子答之如 事於人,大 可

曾 功以下者。」 夫,齊衰者與祭。 曾子曰:「不以 天子、諸侯之喪祭也,不斬衰者不 子 「何必 問 曰:「小功 小 功耳 輕 自 士,祭不足,則取於兄弟大 喪 可 而 斬 以 重祭乎?」孔子曰 衰以下與 與 於祭乎?」 八祭, 禮 與祭。 也。 孔 大 子

服 可 祭,謂虞、祔、練、祥 者,諸侯則有之,若寄公、國賓是也。 者之喪祭以答之也。天子之喪,無 與於他人之喪祭,而 也。 孔子復言可 曾子問 己 爲 有 不 所 喪 斬 爲 服

> 祥,必 已除 也。 下也。 者,蓋喪奠,主人不親,而 孔子於喪奠,直言 斬 甚寡,必不足以 除,天子、諸侯之祭則得 云:「知非 喪祭矣。」〇鄭 此,則知 大功,或 者與祭,若齊喪者不足,又取兄弟 臣少,故斬衰以外又取齊衰者。 祭,主人親之,他人特與之而 衰 大功 服 者 服未 而 不 但 可與他人之喪祭, 吴氏 與 以 與 練、祥者 除者乃得與祭,則 得爲所服者祭,而 於喪 下,但據 、祭,以 澄曰:「曾子 注 執 祭也。 謂 事 「奠」,於喪祭言一 群 矣。 士練 其 祭爲 臣 本服言之,初 兼練、祥。」其 多 若大夫、士之練 他人執其 祭時,大功 虞、卒哭」, 人,足 而 疑 不得 得 孔 己 1 以 子 士 也。 與於祭者 功 執 與 答之 大 亦 V 與 事 不 説 服 他 功 孔 輕 齊 也 嫌 夫 如 以 喪 非 己 疏 於

曾子問曰:「相識,有喪服可以與於祭乎?」

孔 神 也。 特言 行。」言「練、祥」而不言「虞、祔」,蓋虞 記 爲父母虞、祔、卒哭祭。」其説 子、諸侯,臣妾死於宫中,雖 同 漸 爲 先 而 疑 廟 祭 喪 沉他 人,則 心也。 宫緦服 言也。」○熊氏以祭爲虞、祔,謂:「身有 大功,次小功,次緦麻 緦 服 孔子以不可答之。 祔以適祖,其祭皆不可以久稽,雖 麻 吉凶不相干,己 相 謂 如三年之喪,既 更輕於小功,或得與 上文曾子兩問 緦不祭,又何 識」,以明所問 先殯奠,次喪祭,次吉祭, 人之祭乎? 緦 ,不得爲父母虞,祔、卒哭 也 與 於祭,謂 有 以上三問 助於人?」 者非謂其 緦 而孔子不 曲 吴 潁 服 氏 與於 0 重 亦非 所識者吉祭, 無服,亦 澄 不 其 而 門,論喪 日 得自 所 相 練、 漸 也。 喻 祭。 由 爲 識 車平 「曾子 祥 值 不 祭宗 之吉 以 服 服 故 X 雜 天 安 皆 得 於 則 者 此 而

> 乎? 他 唯同 祭」,亦謂練、祥之祭,非 年 祭,皆當爲吉祭無 **總服,不得爲練、祥之祭,** 母之虞、袝、況天子、諸侯乎? 夫、士,亦必不以同宫臣妾之未葬,輟 之喪, 人之祭,則義不 宫緦爲然,若以喻身有緦服 又曰 亦 「將祭, 不 過 既 疑 相當。 殯 同 也。 而 宫臣 祭耳 虞、祔 雖若 故 妾 ,況其 此 死 可 若謂 節 也。 不 通 所 葬 輕 得 然 言之 焉 身 與 其 雖 而 於 有 此 大 者 后

曾子 可 乎?」孔 問 神 鄭 也。」《釋文》:「説,湯活反。 ··, 以 氏曰 吉祭而 問 子曰 其 : 忘 問問 説 |: | 説 廢 哀 饋奠者,以己新説 衰 疾 喪服, 與 也。 衰 奠 心與 奠, 非 미 相,息亮反。」 禮 以 孔 者 非 氏 與 禮 日 於 執 喪服,吉祭 也 饋 事 曾 奠 於 以 之 人之 擯 事 相

神也。 禮 者,以己尚未吉祭,故不可執 除父母之喪也。 助奠,故問之也。」 愚謂: 人之重者 輕,吉凶 擯相 ,己又新始説 不相 猶可,以其 干, 新除 決 喪,不可 其 衰,凶事 非 不可; 所 廢 以接神故也。 事 與 喪 相 饋 於人之鬼 他 服 大 奠 疑 饋 謂 是 奠 新 得 他

喪,則須己行吉祭畢,乃可爲人執事也。」禮意,緦功之喪,踰月可與人祭,齊、斬之則不若并擯相不爲之爲得也。 詳酌人情

吴氏

澄

百.

可者,略許

而

非

深

許之辭

死,則 諾 之父母死,則女之家亦使 曾子 母之喪,不得嗣 已葬,壻之伯父致命女氏 母喪稱母。 問曰:「昏禮既納 弗 如之何?」孔子曰:「壻使人弔。 敢 嫁 父母 禮 爲 也 不在 兄弟,使某致命。』女氏 壻 「,則 幣,有吉日,女之父母 免喪,女之父母使 人弔。 稱 曰:『某之子有 伯父、世母。 父喪稱 如壻 父, 壻 許

亦如之。」《釋文》:「取,七住反,本亦作「娶」,下文「取請,壻弗取而后嫁之,禮也。 女之父母死,壻

婦』『取女』同。」

弟」。 喪,壻猶 弟。」壻爲 姻之稱 致 某,如何不淑。』凡弔 者,未成兄弟也。 也 今既未得取,故致還 不親弔者,以 則若云: 『宋蕩 『某子聞某之喪,某子使某,如何不 宜各以其 鄭氏曰:「吉日, 命者 而 弗敢 后 也。 ,前已卜日 弗取者,餘哀未忘,不欲 外舅 嫁之者,蓋女之家 敵者也。父使人弔之, 嫁者,不敢 《喪服 未 小 成 伯 取女之吉日。 功, 父喪稱父,母 》傳 以告於女家,女家許之, 昏 姬 其命 辭 姻,親弔則 聞姜氏之喪,伯姬 舅 日 遽 耳。 報 嫁 小小 也。兄弟者,昏 服 女與之也。 擇 緦,故曰「兄 功 喪稱 難 日 必 以下爲兄 汲 愚謂 爲 辭 使 以告於 淑。」 汲 母,禮 辭 於昏 云 也 弔 使 母

《釋文》:「迎,魚敬反,下同。」以趨喪。女在塗,而女之父母死,則女反。」如之何?」孔子曰:「女改服,布深衣,縞總,曾子問曰:「親迎,女在塗,而壻之父母死,

之服。 深邃。 年。 爲父箭、笄、髽、衰三年,父卒,爲母 展衣,卿妻鞠衣也。深衣,衣裳相連,前後 服,改嫁時之服。 鄭氏曰:「布深衣,縞總,婦人始喪未 今既在塗,非復在室,故知服期,於時 縞,白絹 女反,奔喪,服期。」 嫁服,士妻緣衣,大夫妻 總,束髮者。 孔氏 女子在室 曰:「改 亦三 成服

愚謂: 制 之後,束帶相見,不行初昏之禮 也。 女之奔喪如之何? 若女之父母死,其女 男就成於女家,久而未歸,若壻之父母死 後,男居外次,女居内次,自不相 事,皆不言之,何也?』朱子曰: 服,布深衣,縞總,以趨喪。」《開元禮》除 自此始,故 寸,齊衰總八寸,婦爲舅姑期,則 蓋婦人之服皆深衣之制也。 而後,束帶相見,於是而始入御。 而壻之父母死,如之何?」孔子曰:「女改 則用帛矣,故特言「布」以别之。 斬衰總 女亦改服布深衣,縞總,反而 必必 「郭子從問:『曾子問:「親迎,女在塗 昏禮,舅姑承子以授壻,而夫婦之義 有 深衣皆不言「布」,此特言「布」者 所 据矣。」」〇「葉 在塗而反,爲其父母降 味 道問:『今有 玄綃衣以上 奔喪 見。 縞總八寸 『趨 趨 開 也 服期。 元之 除 喪之 喪 \_ 後 喪 喪

之制 且 服 放 如 在 之何?』朱 塗之禮行之可 子 E 也。 : 然既 此 乃 嫁 原 則 頭 服 不

自當降,既

除

而

歸

夫家耳

卧反。」 時不祭,禮也。 曰:「除喪 如之何?」孔子曰:「男不入,改服 女人,改服於内次,然後即位而哭。」曾子問 如 壻親 迎,女未至, 則 不 復昏 又何反於初?」《釋文》: 禮 而 乎?」孔子曰:「祭過 有 齊衰、大功之喪,則 於外次, 「過,古

禮 鄭氏 喪 即 謂 饋 衰 也 以下。 家 婦 是 位 ,不人大門,改服深衣於門外之次。 響,相飲食之道。」 曰 : 爲 也 生 而 哭,謂於壻家爲位 位。 人 ,人大門,改服 祭過 相 不 祭祀是奉 燕 聞 一時不 飲 喪 即 故 祭, 改 爲 事 孔 深 重 輕。 服 鬼神 也。 喻 衣 氏 者 輕 於門内之次。 曰:「男,謂 重者尚 故 昏禮 皇氏以爲就 也 爲 重 디 重 廢 牢 於 女, 輕 香 壻 及 齊

爲大功 姑乎? 禮 即 門外也。 所。 外 齊 得 門内者,改服於所奔者闡門之内也。 者,所以 者 故曰「又何反於初」。然則 嘉禮輕於吉禮,祭過時不祭,則 服,乃入至喪所,與 功之喪,有同門不 者,於男爲 一,則昏 喪 不 位 衰、大功 廢 略也。 則 男改服 而 可 哭,是見也。 行 知 티 : 則 降 禮 婦 昏禮 也。 於女爲 於 ,若婦已 非 齊衰, ○熊氏安生曰:「此謂 人奔喪,人自 於門外者,改服 齊衰、大功之喪,婦 父 重 約 母 於 則 小功 愚 同 舅姑之喪也。 齊衰、大 上冠禮之文。」 在家者皆即 揖 於女爲 喪 門, 謂 讓 也。 事 人 而 | | | | | | | 齊 重 門,内 功。 婦 奔喪 門。 於所 大 此 衰、 則 可 聞 功 昏禮 位 大 皆必 於 以 奔者之 不 與 女改 喪 力 齊衰、 喪 而 不 即 功 嘉 舅 在 不 ; 哭 則 可 見舅 至 之 孔 既 改 爲 於 塗 事 姑 服 知, 也 廢 大 大 氏 聞 不 改 喪 服 昏 男 喪

若 耳。 H 牢、合卺之禮  $\vdash$ 見舅姑,盤 小 功 不 愚謂 在塗聞 問問 小 功者 然後 饋饗婦之禮 熊 喪者 氏言「行 小小 ,其禮蓋 改 功輕 服 即 昏 位 待 亦 禮」者, 則 而哭。 如 昏 不復 禮 此 與 謂 畢 舉也 其 ? 乃 次 哭 口

婦之義 也。 月 而 廟 取婦之家,三日不舉樂,思 也。」《釋文》:「離,力智反。」 見 稱 來 婦」也。 擇 日 而 祭於禰 成

孔子

日

:

嫁女之家,三夜不

息

燭

思

相

離

嗣親

也

 $\equiv$ 

姑。 氏 稱 之義,人子之所 皇舅某 舅姑。」 不息燭,謂不能 而 奠菜 公彦曰: 來 若舅姑没,則三月而 婦 其 也 子」也。 者,《昏 祝 「若舅没姑存,則當時見姑,三 婦見於舅姑 辭 禮》: 日 擇 寢 不忍言也。 也。 日 某 而 氏 「質明,贊見 嗣親 祭 來 ,乃成爲 於 見於廟,奠菜 婦 禰 三月 敢 則 謂 奠 親 婦 而 婦 有 嘉 擇 廟 代 於 菜 舅 謝 日 於 賈 干

庶婦 若廟 言庶 見」, 婦就 爲前 盤 内 月 婦 饋。」其異於適婦 然於没者不 謂 見 月 而 人之先夫 濱宗 矣。 祭 饋 不 亦 或 賈氏謂 寢 同 行 醴 見,所以代質明之見,與 婦 非 姑 於舅姑存者,未嘗無質明之見 廟 更 義。 耳, 蓋 之禮 也 所 婦之班 而 見 則 有 供 而 生 奠菜與? 舅。 舅姑 適 《士昏禮 , 尤不 繼 養主 見,於人情 姑没有 死 若 云: 婦 者,雖 姑, 此 廟 若 「庶婦則 没 爲 見,自 者止此,則其餘禮皆 一於適 舅 可 祭主 亦亦 自 則 繼 但見 存 》於奠菜祭行之後 無 〇孔 當 與 姑 必 婦 廟 亦 姑 與 滴 當見 如 廟 而 繼 恐未安。 没, 祭禮 ,而祭之於寢 故 使 婦婦 氏謂「庶婦 常 庶 見 姑 庶 人 盥 禮 婦 婦 繼 可 而 不同, 盥 醮之,婦 饋 婦 也 姑 不 知 已 人 饋 不 庶 過 也 且如 無 特特 殊 盥 古 未 如 不 婦 列 至 廟 義。 饋 也 别 夫 可 於 醮 滴 不 廟 則 婦 愚 不 口

以庶婦不得主祭疑之也。

《釋文》:「菲,一本作「屝」,扶畏反。」
菲、不次,歸葬于女氏之黨,示未成婦也。」子曰:「不遷於祖,不祔於皇姑,壻不杖、不
曾子問曰:「女未廟見而死,則如之何?」孔

於女氏之黨,亦不祔於皇姑之意也。 杖、不菲、不次,爲未成婦殺其禮也。 爲之服齊衰期,非無 之父母,則爲之降服大功,以其非在家,壻 壻不杖、不菲、不次,唯服齊衰而已。 杖而 之黨,故其柩不朝於壻之祖廟,祔祭之時 爲之服齊衰也。」 又不得袝於皇姑廟也。 鄭氏曰:「遷,朝 菲屨,及止哀次。 廟也。 孔氏 主 也。 壻雖 今未廟見而死,其 壻爲 日 「反葬於女氏 妻合服齊衰, 不備喪禮 愚謂: 其女 壻不 歸 猶 葬

亦如之。」

除者,以壻於女未有期之恩,女於壻未有也。女服斬衰。」 孔氏曰:「所以既葬而鄭氏曰:「既葬而除,以未有期三年之恩

三年之恩。」

餘,下「禮與」同。」
社,尊無二上,未知其爲禮也。《釋文》:「與,音孔子曰:「天無二日,土無二王。嘗、禘、郊、曾子問曰:「喪有二孤,廟有二主,禮與?」

祭及四方,而所尊者唯后土也。郊祭及日、月、三望,而所尊者唯上帝。社而已。嘗、禘合食群主,而所尊者唯太祖。尊無二上者,言所祭雖衆,而所尊者則一

祖廟。廟有二主,自桓公始也。《釋文》:「亟,徐昔者齊桓公亟舉兵,作僞主以行,及反,藏諸

起吏反。」

曾子問曰:「取女有吉日

而

女死,如之何?」

壻齊

衰而

弔,既葬而除之。

夫死

鄭氏曰:「僞猶假也。舉兵,以遷廟主行,

五. 五.

故 無 亟,數也。 有二主也 則 主 命。 作假主以 爲 假 主,非 行,而反藏於祖 也。」 孔 氏 曰 : 廟

康子之過也。」《釋文》:「鄉,許亮反。」 釋,衛君請弔。 哀公辭,不得命。 公爲主,客 喪,衛君請弔。 哀公辭,不得命。 公爲主,客 喪,衛君請弔。 哀公辭,不得命。 公爲主,客 喪之二孤,則昔者衛靈公適魯,遭季桓子之

鄭氏 弔 諸 當 拜 臣之禮也。 正當孔子之時,未知後代行之以否,但見 「二主行來已久,故云『自桓公始』。 其喪者,乃因其君而及之,故其君爲主 侯於鄰國之臣,尊卑既異,情分又疎,其 時失禮,故云『自康子之過』。」 稽顙,非也,當哭 曰:「辯猶正也。 鄰國之君弔,君爲之主,主人 踊 而 若康子者,君 已。 孔氏 愚謂 康子 弔其 曰 :

> 反,本亦作「齋」。」 失之矣。《釋文》:「守,手又反,本亦作『狩』。 車,言必有尊也。 孔子曰:「天子巡守,以遷廟主行,載于 曾子問曰:「古者師行,必以遷廟主行乎?」 非靈公,又無適魯之事,此記 主之義,二孤猶曰「二主」云爾。案《春秋》 以喪禮主人拜賓,今哀公拜賓,是有 主喪一人。今哀公既拜,康子又拜,是有 拜賓,唯其情之稱而已。 哀公三年秋,季桓子卒,時 二孤也。 哀公乃桓子之君,而 今也取七廟之主以行, 喪禮 衛君 所言疑也。 日 拜 爲出公而 賓者,唯 「孤」者, 齊,側皆 爲喪 則 齊

遷廟 莫適 鄭 廟主,謂新遷之主。」 鄭氏曰:「齊車,金路。」 氏《齊僕》注云:「王將朝覲、會同必齊, 之主也。 載焉,宜奉其近者 金路,王乘之以朝覲 而 愚謂: 載 皇氏侃 之,故知 遷廟主 日 : 、會同 爲新 遷

鄭氏

「老聃,古壽考者之號也,

與孔子

又 不 取 載 乘 所 所 以 知 一主以 乘 金 遷 以 載 路 主 敬宗 廟 也 必 遷 不 ,故載遷主亦以金路,象其 以 行 取七廟之主以 廟 可 廟 金路 及 無 主之禮,故取七廟之主以行, 非謂 神明。」故 主,故又别作一主以 者 並載七廟之主也。 ,巡守即 行者,謂 「金路」 會同 曰 於七 也 牛 齊 公行,此 後世 時 廟 車 會 2 中 口

僞

主

一之所由

來

也。

各反 之主 他甘反。 廟 聞 侯 當 從,禮也。 薨 入廟,必 諸 七 文其 廟 而 老聃曰:"天子崩,國君薨,則 與去其 從,才用反,下「椑從」「而從」同。 廟。 藏 五. 諸 廟 給祭於 蹕。」老 君 祖 無 國,與祫祭於祖,爲 廟,禮 去其國、大宰取 虚 主。 聃 祖 則 云。」《釋文》:「治,音洽。 也。 虚主者,唯天子崩,諸 祝 卒哭成事,而 迎 四 廟之主,主出 群廟之主 蹕,音畢。」 無主耳。 祝 取 后 群 以 吾 主 廟

> 當蹕 從。 去國 卒哭成 也。 明 廟。人廟,謂由大廟還入己廟也。 廟」,舉諸侯言之也。 從者,鬼神依 口 日 時。 天子袷祭,則迎六廟之主,今言『迎 非祭祀之事,故大宰 止行人。 給祭是祝之所掌 新主祔祭於祖,故祖 藏 事,先袝之祭名 諸 主於 人者也。」 若主 祖 出 廟 出 入大廟中則 ·, 故 象 也。 「廟,謂 祝迎 有 孔 取群廟之主以 主先還 去國 X 氏 出己 事 四廟之主 曰:「卒 取 者 不 主出 廟 人己 廟 蹕 聚 往 主 也 廟 哭 以 四

孔子 壓 子又却問禮於他,不知何故?」朱子 問:『老子云「禮,忠信之薄 主,天子一尺二寸,諸侯一尺。1〇「郭德元 不 他曾爲柱下史,故禮自是理會得,所 一於尊 用 説 得 亦 得 也。 可, 如 此 若有喪及去 好。 似聖人用禮 只是 他 或, 又 而亂之首」,孔 時 説 無 反 這 蹕 多事 箇 禮 以 日 也。 與 所

以

以如此説。」

子曰: 就舍。 之間 遂奉以 天子、諸侯將出,必以幣帛皮圭告于祖 乃出。 問 「主命。」問 反必告,設奠,卒,斂幣玉,藏諸 日 出,載于齊車 「古者師 蓋貴· 命也。」 行 ·以行。 「何謂 無 遷 主, 每舍,奠焉 也?」孔 則 何主 子 -?: 孔 兩 禰 而 階 后

之也。 告用 公禰 幣 祖 出 則 無 帛皮 大祖 據 、禰」,不言「牲」者, 遷主,謂天子則始祖 而遂以爲主,但主其命而 。』《覲 無 牲幣於所主命者 主禰廟,亦受命於禰之義。 《文王世子》曰:「其 圭以 遷 在 主 Ŧi. 禮 一 出。 世 主命者言之。 以 「侯氏 但言「 内 也 唯據所奉 裨冕釋幣 則加以皮圭,而 在七世以 以 主命者,受命 幣帛皮 在軍 然 無主也。 以 則 於 兼言祖 ,則守於 内, 圭 H 主 禰 命之 。此 者 告 諸 凡 于 奉 而 侯

以一 埋之。」 受國 間 去。 謂 未備 也 以 於祖、禰,遂奉以出。』熊氏以爲每告一 之兩階之間。 者,直以幣帛告神, 醢 禰 而後即安也。貴,尊也,謂尊祖、禰之命 舍,必設脯、醢之奠於齊車 \_\_\_ 所 者 有遷主則載遷主 孔 而已。」〇鄭氏 其近 氏 若近祖幣 幣玉,告畢,將所告遠 載幣玉告於遠祖 於 因 而 愚 曰:「在路 祖 禰 皇氏、熊氏各以其意 謂 祖 孔氏曰:「皇氏云:『謂 者 而 以下,直告祭而 也。 及 鄭氏之言,所以 玉不以 無遷主者,加之以 祖,且 曰:「所告而 舍, 不 而不將幣帛 ,而幣帛不以出 可恒設牲 出者 ,事畢埋於遠祖 謂 容父有故不得立 館 即即 而後就舍,禮 舍。 祖 已,不 申 補 埋之。 幣 牢 不 以 每 -, 奠以 之。 玉載 記 皮圭 以 出 有遷 日 文之所 陳 一故即 即即 出 之而 至 幣 反時 皇 兩 廟 一,告 脯 氏 階 主 神 館 即 玉 埋 而 禮記

卷十八終

非

也

埋之。 禮 不言有牲。然以《舜典》、《王制》考之,則 出 告禮有牲。 幣爲制幣,而諸家於告出、告反之禮,亦皆 此章言「幣帛皮圭」,而不言「牲」,故破 章云:「凡告用牲幣,反亦如之。」鄭氏見 主命者、主於祖、禰、而熊氏謂以所告遠祖 其幣帛不以出,故即埋之。二者皆禮之所 近祖以下反時無幣,則其説皆非是。 幣玉載之而去,告反重於告出,而熊氏 命之廟則有之,而熊氏謂每廟用幣 有,其義相兼乃備。但告用皮圭,唯所主 了,所奉以出者唯幣帛皮圭,牲非所奉以 者,故略 熊氏謂所告之廟而不主其命者,則 此章不言「牲」者,蓋以主命之 而不言耳。 謂「告禮 無 牲 又前 玉 牲

五五五五五

## 禮記卷十九

國史館纂脩孫希旦集解賜進士及第翰林院編脩

## 曾子問第七之二

之。 忍 乎!』公曰:『古者天子練冠以 行之,則有 其母,有慈母 所使教子也,何服之有? 子游問曰:「喪慈母如母,禮與?」孔子曰 也君爲之服,是逆古之禮而 非 也,遂練冠以喪慈母。 禮也。 有司以聞曰:『古之禮,慈母 古者男子外有傅,内有慈母,君命 司 良,及其死也,公弗忍也,欲喪 將 書之以 遺 喪慈母,自魯昭公 昔者魯昭公少 後 亂國法也 世 燕 無 無 居。』公弗 乃 服。 不 若終 喪 可 今

始也。」《釋文》:

「少喪,如字,讀者亦息浪反。

遺,

如字,

己者, 子則 慈母 想。天子、諸侯之子爲其母, 父在則練冠 可 麻衣縓緣,既葬除之,父没大功,則其 子期,父没皆三年。 之皆如其母,父在則大夫之子大功,士之 者,父命之爲母子。 慈母有二:一 子子爲庶母慈己者」,是也。 夫、士之子爲之小功,《喪服》「小功」章 「君 寡言者,使爲子師。 云「慈母如母」,是也。 者,必求其寬裕、慈惠、温 亦然。 不服 而 以 其母之服服之也。 子游所問,蓋謂 則《内則》曰:「擇於諸 則妾之無子者,妾子之無 《喪服》「齊衰三年」章 其次爲 此則大夫、士之子 若爲 良、恭敬、慎 慈母。」此 人君於庶 天子、諸侯之 父後者,則 故孔 子 母 則 母 爲 爲 以 母 與

之慈母 其父在 於命爲 三十乃 冠 時 此 是 則 也。 不 如 服之外,則其爲父後者不可以復降,故 也。 爲其母練冠、麻 功,爲父後者降 君 之制 庶子 忍 以其 稱 否,蓋不敢以私喪廢國家之禮,則 其父在之服 命 於慈 練 大夫、士之子,父在爲其母或期 練冠以燕居,庶子爲君,爲其 所 爲君 也 喪 冠 己 母子之慈母,而 母之服 而略降之也。 使 齊歸 不 ,故曰「喪慈母 13: 以 教子」告之,言與 復行矣。 者皆以 居之制,而曰「古者」,蓋春 U 服之矣。 又無感容,是不少,又安能 此 而 衣 服 非 服緦。 縓緣,既葬除之。 小 之。 昭公明矣,未知 君之禮服其母,而 昭公爲慈母練 不可施於君命教 然燕 自昭公始也」。 鄭氏 不知 人君之子,父在 命爲 居 曰:「昭 此 則 服 母子 練 母 但 冠,則 ",或大 冠, 何 在 亦 之 者 口 練 秋 服 子 施 視 出 旧 Ŧi. 異

> 母 也 良。」鄭 孔 氏 云 日 二不 : 知 「《家語》云: 何 公」,不見《家 『孝公有 慈

故 也。」

見天子,入門不

得終

禮

色與兵。」《釋文》:「幾,居起反,下同。 色與其兵。 諸侯皆在而 廟火,日食,后之喪, 廢者幾?」孔子曰: 曾子問曰: 疎也。 也。」 衣 時 皆然,主於始祖 鄭 揖讓 正 赤, 事有所討 氏 日 曰 : 當日 入門」,乃爲 愚謂: 西 漢建安中, 「旅,衆也。 「諸侯旅 方衣白, 大廟火,則從天子救火,不以 日 蝕。」朝士疑會否。 食,則 也。方色者,東方衣青,南 日食 耳。 「四。」請 將 日 從天 雨霑服 有定,可 北 正 食 各以方色與兵,示 大廟,始祖 方 會, 廢 子 衣 禮者,古 救 失容, 問 而 黑。 以 日,各 之。 霑,竹廉反。」 太 預 時 兵, 則 史 廣 推 廟 曰 : 平 上 時 以 廢 未 計 言 此 宗 其 律 大 聞 吏 法 奉 方 方 云 廟 如

五五七

獸 劉 兵者,蓋以示助陽討陰,與伐鼓於社同義。 術謬誤也。」朝位在庭,故雨則廢。 不爲變異豫廢朝禮者,或災消異伏,或推 得終禮者 推 周禮 水火 劭 ,則以救日之弓與救月之矢射之。」 在 ·庭氏》:「掌射夭鳥,若不見其鳥 錯失天 坐,曰 四,日 : 時 「梓慎、裨竈,古之良史,猶 蝕其 諸侯旅見天子,人門不 \_\_\_\_ 然則聖人垂制 救日用

服失容,則廢。」「天子崩,大廟火,日食,后、夫人之喪,雨霑禮,廢者幾?」孔子曰:「六。」請問之。 曰:曾子問曰:「諸侯相見,揖讓入門,不得終

曰:「廢。」
 如之何?」孔子曾、禘、郊、社、五祀之祭,曾子問曰:「天子嘗、禘、郊、社、五祀之祭,,以民曰:「夫人,君之夫人。」

鄭氏曰:「既陳,謂夙興陳饌牲器時

同也。」 孔氏曰:「下文云『當祭而日食』,也。」 孔氏曰:「下文云『當祭而日食』,

殺,則廢。 之何?」孔子曰:「接祭而已矣。如牲至未曾子問曰:「當祭而日食,大廟火,其祭也如

社稷以 故也。 當祭而天子崩,后之喪,外神已殺牲,亦接 以 祭外神之所以牲已殺必祭者,以其已降神 神,以致其祭祀之意,而不復行餘禮也。 可不祭矣。 則廢祭不待問矣。接祭,謂以祭禮一接於 此祭,謂祭外神也。 疈 辜,此皆於殺牲後行之,神既 血祭,山林川澤以貍沈,四方百物 祭天神以 牲未殺則未降神,故 燔燎降神,祭地 若祭宗廟 而 可 以 大 降則 瘞 廟 火 埋, 若

祭,内 神則 廢與?

祭也,尸人,三飯不侑,酳不酢而已矣。 而 至于反哭,五祀之祭不行,已葬而祭,祝畢 天子崩,未殯,五祀之祭不行,既殯而祭。 其 囗。」《釋文》:「飯,扶晚反,下同。侑,音又,絶句,下 酳,音胤,又仕覲反。 自啟 獻

皆放此。

酢,才各反。」

之祭。 孔氏 不行。 喪 祝飲畢 按《特牲禮》,尸九飯畢,主人酌酒酳尸,尸 牢饋食》尸食十 人,『三飯告飽,祝侑』 尸,至九飯 唯 飲卒爵,酢 飯,則諸 有大夫、士祭禮。 廢 曰:「天子、諸侯祭禮既亡,今《儀禮 一,酌獻 其祭,故既殯哀情稍殺而祭也。 既 初崩哀戚,未遑祭祀,故五祀之祭 侯十三飯,天子十五飯也。 主人,主人受酢飲 而 佐食。 祭者,五 一飯畢。 今約此 按《特牲饋食禮》,尸 祀 外 士九飯,大夫十 而説天子五祀 神 畢 不 一,酌獻 畢。 可 以 《少 祝, 又 私

攝主。 也。 不得純 尊卑一偏言之,其實外神無不祭也。 宗廟俟吉也。」 事 酌 而 而 稷越紼行事」,此言「五 廢,既殯則外神皆祭。《王制》言「天地、社 攝主酳尸,尸飲卒爵而酢攝主,攝主飲畢 彌吉,尸人三飯之後,祝侑尸至十 也。若啟殯以後,反哭以前,哀摧更甚,故 後,尸三飯告飽 五祀之祭不行,已葬反哭畢 也。」 畢。《 ·祭者,皆使人攝之。《特牲禮》尸食九飯 獻祝、祝受飲畢則止 冢宰 少牢禮》尸食十 而 如吉禮 攝 鄭氏曰:「郊、社亦然。 已者,謂 主,酌 理 愚謂:未殯之前,諸祭皆 則 唯 酒 須降殺,故 止,祝不勸侑 行 酳 祀既 尸,尸受卒爵,不 此 無 飯 而已,不爲餘 獻 而祭。 殯 而 佐 畢。 迎 而祭」,各舉 戸人 食以下之 使 唯當、禘 Ŧi. 但既 鄭云: 滿 一飯畢 奥之 在 常 喪 葬 數 酢

Ŧī. 五九 十三飯,十

士九飯,大夫十一飯,則其餘有

Ŧi. 同 當三飯而 五 非天子所祭皆當十五飯也。此言殯後祭 神,則當視其神之尊卑,以爲飯數之多寡, 祭宗廟當十五飯。 Ŧi. 一蓋五祀神卑故 祀、「尸人、三飯不侑、酳不酢」,則常禮 飯」同宗廟之禮,誤矣。 飯 也。」蓋謂諸侯祭宗廟當十三飯,天子 侑 飯畢 也。 若天子、諸侯所祭之外 而 獻 疏乃謂「侑尸至十 尸,與《特牲》祭禮

奉帥天子。」《釋文》:「比,必利反。」子曰:「廢。自薨比至于殯,自啟至于反哭,子崩,后之喪,君薨,夫人之喪,如之何?」孔子崩,后之喪,君薨,夫人之喪,如之何?」孔曾子問曰:「諸侯之祭社稷,俎豆既陳,聞天

侯者,不必皆在殯前,蓋於赴告至日,斷爲也。若天子崩、后之喪,則赴告之及於諸也。若天子崩、后之喪,則赴告之及於諸此謂君薨、夫人之喪也。奉循天子者,言此謂君薨、夫人之喪也。奉循天子者,言帥,循也。自薨比至于殯,自啟至于反哭,

則祭。」 之所以異者,總不祭,所祭於死 祭也,尸人,三飯不侑,酳不酢而已矣。大功 喪,君之大廟火,日食,三年之喪,齊衰,大 問之。曰:「天子崩,后之喪,君薨,夫人之 設,不得成禮,廢者幾?」孔子曰:「九。」請 曾子問曰:「大夫之祭,鼎俎既 酢而已矣。 功,皆廢。外喪自齊衰以下行也。其齊衰之 祭,奉帥天子,則五祀可知 七日之限,以爲祭行之節也。 小功、恕,室中之事 而已矣。 諸侯社稷之 陳, 者 籩 豆 無 服 既

喪也。 祭,謂 在堂,今以殺禮,但於室中行祭禮 尸酢主人而止也。 而已矣者,祝侑尸至十一 主婦、賓長獻尸皆在室,既祭而 祭宗 室中 廟 之事 也。 而已者 外喪, 此皆謂齊衰、大功之外 《少牢饋食禮》主 飯畢,主人獻尸, 謂 不 同 門者。酢 而 賓尸則 復

之時,故不廢 内 記》云:『臣妾死於宫中,三月而後祭。』此 主 爵 也。 其降殺之節 謂門内總喪,若外喪,則齊衰以下皆祭,而 所祭者有服,妾死,所祭者無 母緦,妾有子亦緦。 則小功可知。所祭於死者無服者 此緦、小 夫無總服,小功之服降爲緦服,亦不復服。 賓尸也。 室中而已」,兼謂小功、緦之内外喪也。 功、緦」,則 而 .喪緦麻不廢祭者,此謂鼎、俎既陳,臨 一婦相 「酢賓,又獻祝及佐食而祭止,而無主人、 當祭聞 其總、小功之祭,則賓長獻尸,尸飲卒 爲致爵之事與? 功據其本服 喪,猶爲之殺禮 上云「齊衰、 雖同宫不廢祭,此云「小功、緦, 亦如大夫。不言者,蒙上可 也。 若不當祭時則不祭,所 若祭禰 而 言、蓋雖 大 功廢」,不云「小 也。 廟 孔氏 服 ,則庶母死, 士緦不祭, 不爲之服, 也。 曰 : ,如爲庶 此 大 祭 雜 知 皆

> 祭於死 祭,若外喪 士門内緦 母兄弟』, 者無 非 喪廢祭,若與所祭者無 則 服 也。 齊衰以下皆祭矣,豈 鄭 士緦 氏謂『若舅,舅之子,從 不祭,亦 謂内喪耳。 服 論 則 其 於 仍

飾情,三年之喪而弔哭,不亦虚乎?」「三年之喪,練,不群立,不旅行。君子禮以曾子問曰:「三年之喪弔乎?」孔子曰:

死者有服無服

乎?」

哀乎? 情」。 弔禮 也。 親,爲親哀 也。三年之喪而弔 鄭氏曰:「不群立、旅 也。 有是情 三年之喪,爲己哀之不暇,而 乃從而弔哭,則是無是情 則是妄 而後 以禮表之,故曰 哭,爲彼 行,爲其 愚謂 哀則 荷 一禮 語 飾 不 而 遑爲 專 忘 虚 以 猶 於 哀 飾 表

而有君服焉,其除之也如之何?」孔子曰:曾子問曰:「大夫、士有私喪,可以除之矣。

是 祭,禮也。」 有 乎有過 君 喪 服 時 於 而 身, 弗 除 不 也 敢 私 君之喪 服 又 何 服 除 除 焉 而 ? 后 殷 於

得除 祥 乎? 否。」 君 復 祭,故亦謂之殷祭。 末,在親始重之日尚不獲 君之喪服 鄭氏曰:「有君 喪 除 後,將及大祥之期 後之 也。 喪 祥待君服 大祥之祭也。 追祭。」 除 私 故云『又何除 禘、袷曰殷祭,小大二祥,變除之大 孔 服 服 而 除 以 氏曰:「成服爲 后 而 愚謂: 除 而 祭,君服未除,則不可 殷祭者,凡變除之祭,必 其家適子已行祥祭,庶子不 後 而 服 若未練而 後 殷祭,謂主人也。 也。 可 不 行。 馬」。 此謂適子仕宦者,故 敢私 以除之者,謂小祥之 此殷祭,謂大祥也 若支子仕宦,雖 殷祭, 伸 重 服, 遭君喪, 一始, , 況輕末之時 重 除 謂小大二 喻 以 支子 服 則 輕 服 親 爲 也 則 喪 親 其 不 邨

> 如 除之服 練、祥之祭, 此 則 雖不 亦悉得相應矣 除 亦 親 各 於 喪 君 而 喪 其練、祥之祭與變 練、 祥 之後行之。

除 曾子問曰:「父母 曰:「先王制禮,過 也, 患 其 過 於 制 之喪, 時 也,故 弗舉,禮 弗 君 除 子 也 口 過 乎 非 時 ·? 孔 弗 不祭, 能 子

禮也。」

子答以 其服 追服之之禮也。 曾子以 君服既除之後,弗除親 皆主於君 有 「祭過時 君喪 不敢 弗祭」, 而親 私 喪實 服 則親喪之已過者 喪 而 則 則 追服之也。 未 聞 畢 君 一,故欲 喪之後, 於 孔 無

君所,朝夕否。」如之何?」孔子曰:「歸居于家,有殷事則之曾子問曰:「君薨既殯,而臣有父母之喪,則

曰「歸殯」而曰「歸居」,則親喪既殯亦在家君喪既殯而遭親喪,則當歸治喪事也。 不

奠 有 可 視 知 君喪,則之君所,君喪既殯而歸,其禮亦 矣。 朝 夕奠爲 殷,盛 盛也。 也。 殷事 若父母 謂 之喪 月 朔 既 薦 殯 新 而 之

孔子曰:「歸哭而反送君。」曰:「君既啟而臣有父母之喪,則如之何?」

如

此

與?

愚謂: 父母虞、祔、卒哭之祭則 既 也。 哭者,服 鄭 有君喪,則往哭而 反 而 日 送君 殯,此 殯之後者 氏 「既葬 啟殯至 人君 日 疏 則 君 君 謂 Ŧi. 殯親 而 言『送君』, 喪既 服 一葬不遠 虞,其 ,則當之君所。 示 歸 而 固 者,不待君之虞祭 歸,不 啟 待虞祭」,不待 歸 在 虞與卒哭、祔祭 而 而 君葬之後矣。 葬,葬畢 有父母之喪,歸哭 敢 則 舊説謂 歸。 既 私 若親 服 葬 而居君 大夫、士三日 也 而 「諸侯之葬 葬日 喪既 歸 也。」 以此見 在 也。 所 之虞 孔 啟 親 而 值 而 喪 氏 歸

朝廟六日而徧,天子朝廟八日而徧」者,其

不然決矣。

孔子曰 夕否。 日 内子,有殷事,亦之君所。 未殯 :「君未殯而臣有父母之喪,則如之何?」 親 親之後也。 歸 以 妻爲夫之君,如婦爲舅姑服 朝夕否,謂君之喪既殯 子,大夫適妻也。 若父母之喪未殯 則歸居於家,有殷 曰:「舉此一條,婦 亦既殯反於君 殯,反于君所者,人君 制 大夫室老行事,士則子孫行 而有舅姑之喪,其禮悉同 歸 ,親以恩制,其隆 殯, 反于 反于君 而 内子有殷事,亦之君 所也 同於夫,則君既 事 所 有 君 君 則之君所,朝夕否。 ,爲殯君也。 所,有 朝夕否。」 而 五日 喪 有 也 齊衰。」 則 殷 舅 鄭 而殯,其 往哭而 夫也。」〇 事 姑之喪者, 然君之喪, 氏 事 則 曰 : 啟 君已 歸 及 孔氏 大夫 反殯 殯 内内 所。 君 君 在 朝

恩與義 權 上 臣 乎其已殯未殯,以爲緩急輕重之節,使 三條,言並 之所共襄; 得 以 交盡 一遭君親之喪,而於其 親之喪,子之所 而無 憾,禮之即乎人心 獨 盡 並 隆 故 此

長,知丈反。」
誄之。諸侯相誄,非禮也。《釋文》:「誄,力水反。賤不誄貴,幼不誄長,禮也。唯天子稱天以

如

此

《春秋公羊》説以 子遣大夫會葬 不誄貴,即平敵 子乃使大史賜之謚。」 受之於天然。 以 鄭氏曰:「誄,累也。 通》云: 小喪,賜謚 作謚。 『君 謚 薨 』,鄭云:『小喪,卿大夫也。』 當 諸侯 請 而 由尊者成。 相誄 謚 謚 爲 之。』《 , 世 禮當請 讀 累列 亦 誄、制謚 子 爲 孔 周 赴告於天子,天 不可。 生時行迹,讀之 氏 天子無尊焉。 禮 誄 日 於天子,天 於 :「非但 ·大史職》 案《白 南 郊 虎 賤

> 私。 權; 上 謂: 成 知 有脱 諸 此章不言問答,又不云「孔子曰」,疑 此義行 侯亦然。」 則 則 文。 以分之 以 、情之所 ,●名分正,美惡 徐氏 所 在, 在 師 不 恐其 曾 可 日 當 擅 : 雜 「益 操 矣。」 於 榮 虚 由 美之 辱 尊 愚 之 者

恭。 如 曾子問曰:「君出疆,以三年之戒,以 子麻弁絰、疏衰、菲、杖,入自 君、大夫、士一 君薨,其入如之何?」孔子曰:「其 小斂,則子 免,音問。」 免而從 節 也。」《釋文》:「牌,薄曆反。 柩,入自門 闕 升 升 殯 自 自 牌從。 服 阼 西 共,音 則 階 階

出 大斂至殯時 三年之戒,謂 必以 親 身棺從 所服之服 喪 備 2,是以 也。 椑,親 喪備 共者,於在外大斂 行也。 身棺 也。 殯服, 君

❶ 「義」、《禮記義疏》作「禮」。

者也。 経、 疏 此謂 也。 大斂在 杖。」 之也。《喪大記 不可 闕,升自西 之未成者,首尚皮弁,帶猶 變者也。 斂 時 免而從柩者,小斂時主 成服之麻苴絰 **絰、疏衰、菲、杖」是也。** 與殯相連爲之,故大斂之服 共之,遂 以 人君小斂之服與 麤衰 謂死後之三日 斬衰之菅屨 衰、菲、杖,此人君大斂之服異於士 無 外 疏衰、菲、杖,至成服皆不 飾 即即 弁經,皮弁 ,雖未殯而已 階,皆所 服 故 斬 之以 ,大鬲,散帶垂,至大斂 不 衰 也。 曰:「君之喪,三日 括 也。 從 以 1 髪 乃小斂之明 而 柩 杖者,爲 異於生也。 同,以 服殯 人 而 菅蒯之屨謂之菲, 加 麻,小 免也。 括髮,此以行遠 苴 在 未 服 家 其 經 一絞耳。 已病 斂 ,即下「麻 即 遭 也。疏, 可知 不言其 殯服 日 時 ·改,其 喪 小 也。 所 故 者, 斂 授 此 而 服 自 子 弁 服 則 服 廳 弁 今 尚 無 未 大

禮皆同 也。 絰 殯 菲 服 節者,謂已小斂則服 以 者 喪 散帶,小 二,誤矣。 小斂之服,則 衰、菲、杖」,上言「小斂」而下言「免」,免 鄭氏云:「殯服,謂布深衣、苴絰、散帶垂 者,皆入自門,升自 在 變服 大斂之服,及其所入之處,所升之階,其 形 。」案上云「共殯服 時 、杖者、棺柩未安、不忍成服 柩入者,皆入自闕,升自西階,以 小斂 主人 鄭 體 也。 分 日 斂 自 猶 所服。 殯服 時 且 輕 在 故 布 一,猶以 而 已 麻 不 鄭氏曰:「子 與 弁経、 重 服之,不可 深 杖 麻 麻 若 衣 也。 生人之禮待之也 阼 弁 7,始死 弁 」而下言「麻弁経 小斂之服,已大斂 疏衰從柩 階。 疏衰、菲、杖即 絰 絰 者, 自 謂 疏 已服 君、大夫、士 麻 菛 布 衰、菲、杖 之殯服 於外也。」〇 弁経、疏 至殯,又服 弁 之,苴 升 而 自 尸人 加 阼 殯 衰 爲 即 疏 環 則 凡 初 服 階

記》。 成。 大斂 大斂之服,雖苴経、疏衰、菲、杖悉與 期近,故小斂而 以爲弔服之環經,尤誤之甚者。 記 布 至殯後亦無以異也。 爲疑,則士之苴絰、大鬲,小斂時已服之, 弁,乃爲成服耳。 後同,而首猶皮弁,帶猶未絞,則服 杖,大斂而 人君殯期遠,故小斂而苴絰、散帶,三日而 喪大記》「君將大斂,子弁絰即位 喪大記》「三日授子杖」合,殯 》「小斂環経」,所 深衣 杖與弁經既爲人君大斂之服 聊 至殯後絞其帶垂,首加 ○《喪大記》人君五日既殯成服。 ,反自重 疏衰、菲、杖,何也? 弁經、疏衰、菅屨 苴絰、散帶,既殯而 而 若以大斂遽疏衰、菅屨 輕, 謂 且此言殯服 有 經 即即 是 理乎 ,既殯而 苴 六升 曰: 服 絰 ? 説 弁經 也 有 于序端 布 士之殯 小則疏 成服 詳 至《 杖 成 之服 成服 猶 ",與 與與 服 未 此 雜 氏 雜

> 喪禮 謂 衰、 此 菲 與 屨 士禮不同,故 爲 大斂之服 孟 可 子以爲 知 蓋 未嘗學,正 天 八子、諸 侯

曾子問曰:「君之喪既引,聞父母之喪,

如之

文》:「引,以刃反。 何?」孔子曰:「遂。 遂往。」 鄭 爲『窓』,非封墳 必在子還之後。今云『不俟子』,故知封當 子,嗣君也。」 此言『既 云『君既 氏 曰:「遂,遂送君 引, 啟」,啟 封,依注音空,彼騐反。」 則既行矣,故不得 孔氏 後越 也。」 既封 曰:「若待封墳既畢, 日而 也。 黄氏 而 歸,不俟子。」《釋 行 封當爲『窓』。 應暘 故得歸 歸 曰:「前 哭而

曾子問曰: 之何?」孔子曰: 跣 鄭氏曰:「封亦當爲『窆』。 ,布深衣,扱上衽,不以私喪 「父母之喪既 遂。 既封,改服 引及塗 改服,括髮,徒 一,聞 而 包至 君 往 一薨,如 尊

耳。 也。 括髮之理,此既改服始死之服,自當笄纚 先服免,忽聞君喪,若著其笄纚 而 同,故括髮。」 乃始括髮。 任變者。始死,主人尚未括髮,臣 父母之葬服斬 孔 氏 今有父母之喪,葬在 曰:「禮,親 愚謂: 衰,可改而深衣,何不 喪服未 始死,笄纚 有 ,則與尋常 不 於塗,首 俟 小小 無 主 先 斂

祝曰: 文》:「祝,皇之六反,舊之又反,下同。 如之何?」孔子曰:「以上牲祭於宗子之家, 曾子問曰:「宗子爲士,庶子爲大夫,其祭也 宗也 牢。 宗廟在宗子之家,是重宗。 氏曰:「貴禄、重宗也。 介,副 『孝子某,爲介子某 若大宗子爲士,得有祖、禰二廟也 孔氏曰:「用大夫之牲,是貴禄。 也。 不言『庶』,使若 薦 爲,于僞反。」 此宗子,謂小 上牲,大夫 其 常事。」《釋 可 以 祭 少

> 謂 也。 曾祖 若 名也。庶子,卑賤之稱,介是副介之義,故 孝子,謂宗子也。某,是宗子之名。 之廟於宗子之家,並供上牲,宗子爲祭也 祖之適,則立祖、禰廟於己家,亦寄立曾祖 之家寄立之。 於其家自立禰廟,其祖及曾祖廟亦於宗子 以上牲於宗子之家而祭祖、禰也。 廟,則曰「孝孫」「介孫」。 稱『介子』,使若可以祭 大夫,得祭曾祖廟,而庶子不合立廟,當 孝子「介子」,據祭禰廟言之也。 庶子爲大夫者。 庶子是宗子親弟 若己是宗子從父庶兄弟父之適子, 廟於宗子之家,亦以 若己是宗子從 介,副也。某,是庶子 ,則與宗子同 然。」 上牲,宗子爲祭 祖庶兄弟父 愚 祖 湖:此 若祭祖 庶子爲 介子, 禰 稱 則 寄

미

笄纚之有?

也,祝曰:『孝子某,使介子某執其常事。』攝若宗子有罪,居于他國,庶子爲大夫,其祭

賓,賓 反。 . 愿」,於豔反,下皆同。 其祭也,本或此下有『如之何』三字,非 ·宗兄、宗弟、宗子在他國,使某 厭祭,不旅,不假,不綏祭,不配,布奠於 如字,徐其位反。」〇按: 奠 而 不 舉,不歸 綏,注作『墮』,同許 肉。 假,依注音嘏。 其 辭。』」《釋文》: 辭 也。 垂反,徐又況 於賓 厭,本或作 綏,今音奴 曰 垂

禾反。

爲嘏。 也。 辭不言『以某妃配 主人也。 厭 徹 祝 厭 鄭 者,不陽厭 薦 厭 氏曰:「『不厭祭』至『不配』,皆辟 酌奠,奠之且饗,是陰 奠觶 俎、敦,設於西 飫 不嘏,不嘏主人也。 酬之始也。 於薦 神也。 綏,《周禮》作『墮』。 也。 北 厭有陰 某氏」。 不旅,不 賓奠,謂 北 奠之不舉,止旅。 隅 有陽。 是陽 厭 也。 布奠,謂 取 旅酬 不綏祭,謂 觶 厭 不配 尸謖 迎尸之前 奠於 也。 也。 主 記者,祝 之後 正主。 假 此 人 肉, 酬 今 讀 不

佐食取黍以授尸,衣言曰:按《少牢》經文,取黍者

·既祭則藏其墮」,是也。

又《少牢》祝與上

訖,主人酳尸,尸 尸入,即席坐,取菹 備禮,故不言『以某妃配某氏』。 告。』」 孔氏曰:「按《少牢饋食》司 弟」,昭穆 俎 綏是減毀之名,《周禮》作『墮』,《 食取黍、稷、肺授主人,此是主人綏祭也。 祭黍、稷、肺等, 嘉薦、普淖,用薦歲事于皇祖伯某,以某 拜稽首,祝曰:『孝孫某,敢用柔毛、剛 于奥,設饌畢 宿賓之辭,與宗子爲列,則曰『宗兄』若『宗 配某氏,尚饗。』此所謂『配』也。 曰:『宗兄某在他國,使某執其常事,使某 也。 諸 與祭者留之共 異 者 ,祝酌奠于鉶南 日 是尸 酢主人,主人 『宗子』而 捶 綏 于醢,祭于豆間,及 祭 燕。 也。 ,主人西 른 辭 拜受爵,佐 尸 又《少牢 攝主不敢 猶 守 十 一 其 ||桃|||云 告 辭 宫 面 也。 飯 妃 再 筵

也

敢受福 子舉奠、舉奠訖、賓坐取薦南之爵酬長 賓奠」也。 奠於薦南而不舉,不爲旅酬 弟,長兄弟酬衆賓,衆賓酬衆 長兄弟加爵於尸,衆賓又加爵於尸訖,嗣 及衆賓訖,尊兩壺于阼階東,西方亦如之, 敢受嘏。凡將受福,先爲綏祭,今攝主不 孝孫。』此所謂『嘏』也。 主交歡之始。 主人曰:"皇尸命工祝承致 旅酬」也。 一佐食,而上佐食兼受,摶之以授尸也,不當有 賓取 西方之尊以酬賓,主人奠爵於賓之薦 尸 特 ,故不綏祭也。按《特牲》主人獻 執以 爵而 牲禮》戶起,主人降,『佐食徹尸 主人獻長兄弟,又獻衆兄弟訖 今攝主,主人奠於薦北, 命 奠於薦南,所謂『布奠於賓, 今攝主不敢當正主,故 祝,祝受以東,北 攝主辟正主,故 多福 也。 兄弟, 所 旅酬 無疆 面 祝 是賓 賓 嘏 于 與 薦 取 謂 賓 旅 兄 不 女 於 禮 備 祝 厭 而

北

酌

此篇孔疏云:「墮是減毀之名。」然凡祭皆 氏皆讀爲墮、一 生虞》注云: 不行賓尸之禮,即不賓尸之禮亦有所不 厭祭與旅,不賓尸之禮有之,蓋攝主不 設饌,欲神之歆饗而厭飫 當作「挼」,「 下,皆減毀,不 亦作「墮」,又作「綏」,《特牲禮》三見皆作 不賓尸二禮,賓尸之禮文,不賓尸之禮質。 正,故逆陳之。」 今此文乃從祭末以次至祭初,以攝 俎,設於西北隅」,所謂 授」,今文《士虞》、《特牲 ,謙退,似若神未厭 ·守祧》作「墮」、《儀禮》古文《士虞禮》 也。 配,次綏祭,次嘏,次旅,末乃厭祭。 綏祭,祭黍、稷、肺之名 墮 獨 者音近 黍、稷、肺 愚謂 飫 · 大夫祭,有賓尸 陽陽 而 然也。 也。 誤, 》並作「綏」。 也。 厭 「下祭日 门,以 攝主不爲 綏 凡祭,皆先 疑 也。 者 其 此 主非 形 墮。」 字 無 周 敢 鄭 们 似 正 陽 尸

舉也。 之禮 所取以 聚。 下 以 如 子酌于東方之尊, 阼階上舉觶于長兄弟, 賓奠而不舉,即上文「不旅」之事也。 蓋主 挼祭,亦摶黍之義也。 并 如 則舉之。今不行旅酬,故奠於薦南而 也,其尸則緩祭,自如常禮 **綏祭**,一是主人綏祭。 而 酬 祭之, 、酬賓,奠于薦北,賓取奠于薦南,至旅 節所云與? Œ 主人酬 誤 《特牲禮》尸嘏主人,佐食摶黍授尸 主 蓋 長兄弟者也。 也 亦不 酬賓者也。 又案《特牲禮》嗣舉奠訖,「兄弟弟 稱名不言「孝」,身没而 恐其 挼,挼抄也。 賓 -行矣。 儀」。 播 ○鄭氏以迎尸之前,祝酌 散,故 主人酬賓之觶 若宗 既不 弟子所舉之輝,長兄弟 以手 此不綏祭,謂主人 級祭有二: 一是尸 黍、稷、 子 旅 也。 死 酬 挼 則 則弟子舉 抄, 肺 已,亦當 布奠於賓, 其禮 賓所取 令其 物 不復 미 觶 摶 以 子 如

> 以其 厭」。 祭」。 厭、陽 事 既謖,故亦皆曰 以飲食飫神之名。 北 奠,爲陰厭,尸謖之後 之殤亦於奧,以其在幽陰之所,故皆曰「陰 祭有陰、陽二厭亦明矣。 不厭祭」,則祭末改設之名爲厭明矣。 云「殤不祔祭,何謂 隅, 耐 在顯明之處,故皆曰「陽厭 同名也。 改設在 初之饗神,尸 厭 爲 專爲祭殤之名。 陽 厭 西北 「厭」。 陸 隅 氏、敖 陰厭、陽厭 未入,祭未之改設 ,祭凡殤亦於西北 祭殤無尸,故曰「厭 徹 饗神在奥,祭宗子 然此篇言「攝 氏 薦俎、敦, 蓋厭者,無尸 非 」,則成 之, 不妨異 加 設 人之 以 於 户 而 又 陰 西

祭。 曾子問 祭如之何?」孔子曰:「望墓 者,可以 若宗子死,告於墓而后祭於家。 曰:「宗子去在 祭乎?」孔 子 日 他 :「祭哉 國, 庶子 而 ! | 「請 爲 無 壇 爵 宗子 以 問 而 時 其 居

義,故誣於祭也。 庶子祭者,以此,若義也。今之祭者不首其死,稱名不言『孝』,身没而已。」子游之徒,有

告於 遠 雖 則不敢,故望墓而爲壇 爲大夫、士,而唯大夫乃敢攝 者,皆據爲大夫者也。宗子尊,故不問 而 愚謂: 庶子無爵 也。若,順 者,至子可以稱孝也。 同 家,容無 不祭於廟 鄭氏曰:「有子孫存,不可以乏先祖之祀。 一辟正 事 了,其辭但言『子某薦其常事』。 與 ,則無爵者兼謂士、庶人,蓋凡言有爵 主。 此 而 廟 **,無爵者賤,遠辟正主。** 異,而其爲壇之意 后祭於家者, 也。 也。 周公告於三王,爲三壇 孝,宗子之稱。 首,本也。 而 [居,對上「庶子爲大夫」 以,用也,用此禮 ,以四時致祭,所以 士則 誣猶妄也 祭於廟 則 其祭。 與 身没 不敢 此 言祭於 同 同 若士 庶人 而 與之 也 墠 其 祭 H

子在 罪 愚 鄭注《小記》云:『宗子去國,以 若其無罪,則以廟從,本國不得有廟。 游之徒』以下,非孔子語,乃記者記之以爲 若義,謂順於古義。 所宗,即去國宗子之子,亦當還宗此子矣。 此庶子之禰亦得稱「孝孫」也。蓋族 子之所祭者,其禰 子也。身没而已,謂没庶子之身也。 外而言,故曰「家」。稱名不言「孝」者,宗 則薦於寢也。 證。」〇孔氏曰:「此宗子去國 可以無宗,此子主祖、禰之祭,則爲族人之 庶子之適子,祭此庶子固得 副貳,故但稱名,而不得稱「孝子」同 去國,以廟從,則鄭氏之臆説也。 謂:宗子有罪 「,庶子祭,稱介子某, 廟、寢在大門之内,對墓在 去國,乃上章之明文,無 也。 徐氏師曾曰:「『子 庶子既 宗子既死,無 稱「孝子」,祭 謂 死,其子 廟從。」 有罪者。 此庶 於宗 故 即 口

從,蓋 竟,爲 國,止 廟 『奈何去墳 墳 去 墓 或 之 不 壇 而 謂之亡。 敢 位 曰 越 ]:『奈 總 以 墓 在 也?」」自非 有罪之人主宗廟之祭,以 國 他竟者,故去 而 <sup>《</sup>曲 何 哭。」又曰 去宗 一禮》記 有罪 廟 也?」士 其 或 「大夫 ",必 禮 則 日 不 無 : 以 棄宗 去 日 其 辱 廟 踰

之也。」 孫,孫 曾 乎?」孔 殤必 子問曰:「祭必有尸 幼 一厭,蓋 則 子曰 使人抱之,無孫則 弗成 祭成 也。 喪 祭成 乎? 者必 **喪而** 取於同 若 有 厭 尸 無尸,是殤 ,, 尸 祭, 姓 可 必 亦 也 以 可

其

、祖、禰

也

者 百 其 厭祭,謂 人之喪也。 昭 姓之人,在孫 ,或近屬 穆同 無 也。 不 尸 尸 可得, 而 取 必 行 以 於同 以 | 而昭 飲 則 孫 食飫 取 姓 用所祭者之孫 穆同者,則得取 於族 者 神 F, 也。 屬之遠者, 必適子 成 喪,成 無 以以 以 们 父

> 子、諸 爲 同 厭者,原立尸之義,本在 穆同者以爲尸,又不 人,無爲人父之道,己既無 P 姓 孫 也 侯 行者也。 0 祭遠祖 然 此 謂 ·, 則 祭 但 必皆 祖 取 禰 其 用孫 孫 孫,亦不 以 廟 行 下 之 也。 前 所 爾 得 殤 祭殤 出 取 未 若 而 於 成 天 必 昭

備,本或作「祔」,亦同。」〇今按"祔,如字。不祔祭,何謂陰厭、陽厭?」《釋文》"「附,依注音孔子曰:「有陰厭,有陽厭。」曾子問曰:「殤

厭」; 問 則 祭,言不得 殤唯祔與除服二祭則止。祔,附也。 不祔祭,而 祭有尸,故 之。 無 祭末 所 爲 户 其州 陰 其 附於宗廟四 陽 已謖 祭初,尸 與除服之祭, 二厭之分,故 而 改設,日 未入 時之祭 而饗神 初 陽厭 也。 曾 未嘗有尸, 子 宗廟 日「陰 疑 不 袝 之 而

孔子曰:「宗子爲殤而死,庶子弗爲後也。

不告利 反。」〇「不舉」下本或 其吉祭特牲,祭殤 『不舉肺,無肵俎』。」是孔氏所據本有「肺」字也。 今從之。 른 後 後。庶子弗爲後者,殤無爲人父之道,族 後? 殤 其他如成人。 祭。『不舉肺』以下,以其無尸,及所降也 之,明不序昭穆立之廟,其 鄭 人來後大宗,與殤之父爲 小宗爲殤,其禮亦如之。」 齊衰」章「爲 者。 也。 氏曰:「宗子爲殤而 而死,謂大宗子爲 代之者主其禮。 成 後大宗也。」小宗無子則絶,不得立 言此 是謂 陰厭,是宗子爲殤,祭之於奧之禮。 者 人後者」傳 陰 舉肺,肵俎 無 明 厭。 不舉肺 「肺 殤 字。 《釋文》:「肵,音其,又忌 既不 殤 卒哭成事之後爲吉 死,族人 按《正義》云:「以 而 曰:「爲 無 ,利成,禮之施於 得以族人爲後, 後 愚謂:宗子爲 死 祭之就 肵 ,而不與殤爲 也。 俎 以 ,無玄酒, 人後者孰 《喪服 其 其 倫 祖 經 代 而 依

從獻 也。 俎。 禮》尸將食,「佐食舉肺、脊以授尸,主人 用 則此唯據祔祭言之也。 之後也。 卒哭之祭,其祔祭準 也。凡喪祭,自卒哭以後謂之吉祭。 虞禮》無尸祝,祝卒不綏祭,無泰羹湆、胾 面 玄酒,重古之義,祭殤禮降,故無玄酒。 斯俎于腊北」。 斯者, 廟,除服於寢。 故不得以成人之禮祭之也。 、特性禮》無算爵之後,「主人出, 無泰羹湆、 ,祝東面 少牢,殤用特牲,降於成 祭殤無尸,故不舉肺,無肵 今亦以無尸,故不告利成也。 祭 殤 殤有祔與除服二祭" 祔祭於祖 告利成」,言孝子之利 載從獻 無 尸 下節言「祭於宗子之家」, ,其禮 」,蓋文略 成人之喪,則 敬也,主人敬尸之 成人卒哭成 亦當 人也。 吉祭,謂 耳。 如 之。 俎 户外 養成 鄭氏 在 《特 案《士 事,祔 不 祭設 卒 殤 袝 畢 西 牲 哭 祭 無 又

然。 唯 其 殤,祔於祖,則主是祖之祭者皆爲之祔也 之祭者爲之祔。 者爲之袝。 與宗子之殤同也。大宗子之殤,族人來後 不 死 所 以 不皆然。 昆弟之長 不可無主,如高祖之適死而 後,其祭與 節本主爲大宗子而言,而 他 者,祭於奥乃禮之常,不 其祭之於奥,其 祔與除 除服之祭 ,其祭之之禮 得以族 如 成人」,亦爲未 孔 既主 服 氏 者主高 人爲後,則亦當以殤禮祭之,而 凡 二祭則 小宗子之殤 曰:「熊氏 殤同。 則 廟 親者主之,殤與無 亦 蓋小宗雖 祭,則收族之責移而屬之 祖之祭矣。 處 如 咋 幺 若小宗子 審 此。 云: 陰 也。 與 此言吉祭者,唯 也。 不 無 『殤與 小宗子爲 又庶子 言 無後, 推 旦 後 立後,而 可 不言其祭之 者 成 而 陰 知 無 ··, 主 人無後 下之,莫 成 則其 後者皆 也 厭 灬後者, 其 殤 廟 據 庶 無 祭 祖 而 此

孔氏謂 者既 休止。」 祭。」 服 故 殤 殤 服 以 祖 袝 祭爲言者,蓋 虞以安神,則其祭不 祭,是已。而又以用特牲爲從成人,是 後者之祭也。 云:「殤 其 與 則但 陰 四 二祭,而 而 與 [時常祭言之,則 食、故 若 厭 無 祔於祖 除 處不 有陰厭 陽 後 如 「兼據祔與除服」者, 與 服 者,喪禮 愚謂 庾 也。」 無後者從祖 異 日 厭之名,唯 此所言「吉祭」,則 説 ,自後祭祖之時, 一從祖 虞與除服皆祭於寢,宗子凡 而 鄭氏 殤 而 庾氏 熊 無 袝 與 不 陽 氏 於 解吉祭爲卒哭以 祔 可 備 誤 無後者之祭不 云: 厭 之説 祔祭有之,而虞與除 祖 食」,實別 祔食。」蓋 闕。 也。 , 則 也。 廟 吉 無卒哭之祭, 甚 殤雖 亦非是。 而孔子唯以 則 祭 則 確。 祭之異所 唯 通 欲 有祔 無 殤 據 殤 其 與 知 四 小記 祔 又案 與除 後 與 神 無 時 何 吉 而 後 常 又 之 無 依 時

于東房,是謂陽厭。」凡殤與無後者,祭於宗子之家,當室之白,尊

子 鄭氏 是 祭之當於宗子祖廟。 子,祭之當於宗子父廟。 日 爲 北 其牲物,宗子皆主 父,然則今死者,皆宗子大功 之子,或從父昆弟。 小宗之家,小宗祭之亦然。 東房,異於宗子之爲殤。 居之道 祖、禰者。 無 凡 昆弟無後,祭之當於宗子祖 :「凡殤,謂非宗子之殤。 隅得户明者也。明者曰陽。凡祖廟 :子孫 殤。 曰:「凡 也。 過此 爲後。 言『祭於宗子之家』者,爲有 無廟者,爲壇祭之,●親者 殤,謂 以往,則不祭也。」 凡殤有二: 工其禮。 庶子之適也。 無後者如 無後者亦有二:一 二是從父昆弟, 當室之白,謂 當室之白,尊 宗子之適,亦 無後者,謂 廟。 有昆 以 一是昆 内 或昆 二是諸 弟 親 孔 弟之 及 庶 氏 在 于 共 異 共 弟 西

> 謂 : 父無 也。 祖 成人者不祔乎? 嫁,亦未成人者也。 殤不祭,以 之所言者矣。 祭於宗子之家者, 之内,兼有宗子之親昆弟,而不止 知兄弟之殤不限適、庶皆袝矣。 喪,尚功衰,而祔兄弟之殤,則 王父則配,女子祔於王母則不 唯祔與除服 ,故於宗子之家就 凡殤,自宗子以外,凡適、庶之殤皆 後, 無後,謂 祭之當於宗子曾 凡殤專 二祭。 成人 《雜記》云:「有 而無後者也。 爲適子之殤, 雜記》云: 祖 而袝 廟 而 祖 何 袝之。 之 以 練 配。」女子未 「男子祔 庶 廟。 然則 注 非 冠 於注 諸 袝 子之未 父母之 祔 也 疏 必 父 凡 謂 無 於 疏 殤 可 於 殤 是 愚 庶

「壇」、《禮記注疏》作「墠」。

後者,祭於曾祖之廟,若曾祖

無

廟

則

於祖

0

五七五

所,其 席舅 北隅 蓋 也。 凡 也。 廟 者,唯其祭之之所,則其所用之牲,祭之之 祭凡殤 于室中北墉下。] 袝祭之設尊, 蓋與此同。 不於奧,而於室之白也。 次之,室中之位,西南隅 非 爲之尸矣。 上之位,牖間南向者最尊,西階上東面者 也。 ,皆與宗子之殤同也 既 殤 祭 無後, 與 于 南 曾 祭凡殤,當室之白,設席南 日 處 在 庶子 廟 祖 面者次之。 室之白,謂 顯 陽 西 而 奥,東面,席姑于北方,南面。」 則不得下敘昭穆,而 明 厭」者,以 祭凡殤 附之。 北 無後者,皆降於宗子,故祭之 也。 隅,故設尊辟之而 無後者之祭亦無尸者, 室之西 故《士 與 注謂 屋漏 無 後者,其異於宗子 《士虞禮》:「尊 東 北 爲壇祔之」,● 昏禮》: 乃 隅 面 日 者最尊,西 所謂 光 面。 使孫行者 漏 在 「奠菜 東房 人之 蓋 屋 堂 漏 亦

乎? 莫,音暮。 字,徐子餘反。 患。」 不見 舍。 止柩 曾子 罪人與奔父母之喪者乎。 葬於巷黨,及堩,日有食之。 速,出注。 行,逮日而舍奠。 豈如行哉?』老聃曰:『諸 以反者也。 曰:『禮也。』反葬 問曰: 夫柩不蚤出,不莫宿。 星 就道右 吾聞諸 且不乎?」孔子曰:「昔者吾從 也 店,始占反。」〇今按"「且不」之不,否通 朝, ? 直 從,才用反,又如字。 老 ,止哭以聽變。』既明反,而后行, 日有食之,不知其已之遲數, ·葬引至于堩,日有食之, 遥 且君子行禮 聃 反。 云。」《釋文》: 大夫使,見日 一 使,色吏反,下『君使』『所 丘 問之曰: 『夫柩不 侯 日有食之,安知 不不 見星而行者 既 朝 垣 老 明反,絶句。 而 以 天子,見 古鄧 聃 人之 行,逮 日 反。 老 則 親 日 且,如 日 聃 有 數音 其 則 可 痁 唯 而 助 變 而

<sup>「</sup>壇祔」、《禮記注疏》作「墠祭」。

「爲

君

使

而

卒於舍,禮曰

:『公館

其見星 《周 舍。」店 復也。 禮 也。 右。 篇云:「刑 焉」,賈疏 姦寇 舍而 以 由 地, 避婦人之所行 左,車從中 禮 道 葬於 明電 道右,道西也。 奠行主也。 也。 聽變,謂 也。 • 司烜氏》「邦若屋 而 ,病也。 已,止也。 餘 「父母 行,而 則 云: 罪人之喪,不 罪人見 北 有 方, 罪人 待日 央,柩行專道。 變,謂 不 之喪,見 病於姦寇之患也 司 柩不 柩 也。 星而 (夜葬 數讀 以 烜 食之變也。 嚮 道路,男子由右,婦人 有 人之親 氏 得晝行, 蚤 北 止哭者,爲天災 異 主 可 爲 行者,以 出 行。 星 禮 明 速。 知。 莫宿者,懼其 而 以昏殣。」《 誅 火 店 也 今止就道右 縱 行, 《荀子・ 患,謂 明反, 掌 舍奠,至 則 塗以 夜葬 巷 見 爲 夜 黨 星 奔 事。」 明 謂 西 不 禮 也。 論 變 使 而 喪 竁 近 館 黨 明 爲

> 與公所爲曰公館。 公館己。 「善乎問之也! 復,私館 不復。』凡 何謂 私 自卿大夫之家曰私館,公館 館 所 公館 不復也?」 使之國,有司 復,此之謂也。」《釋 所 孔子曰 授舍, 則

文》:「爲君,于僞反,又如字。」

也。」 氏 官 鄭氏曰:「復,始死招 私館之禮殺,故不復。」 是卿大夫之家,但有君 與,及也。 舍,謂之私館。公館,謂公家所造之館 合也。 曰:「私館者,謂 方氏 公所爲,君所 公所爲者,君所命 慤曰:「公館之禮隆,故復。 非 魂也。 君 命使舍己者。」 命,故謂之公館 命 所 公館,若今縣 停客之處 使,私 相 即即 停 孔

塗邇 死 曾子問曰:「下 子 ,下殤也,墓遠。 曰:「吾聞諸老 故也。 今墓遠,則 殤土周葬于園 聃 召公謂之曰:「何以不棺 曰:『昔者史佚 其 葬 也 遂 如之何?」孔 輿 機 有子 而 往, 而

字。 於周 斂於 今如字。 作『邵』,同上照反。 下 殤 衣棺 公。 用 宫中?」史佚曰 「豈不可」爲 棺 並 去聲。 衣棺 周 按: 公曰:「豈 輿,舊 ,自史佚始也。」《釋文》:「召,本又 周公曰豈,絶句。]○鄭注: 句。 如 : 「吾敢 字,今音舁。 舊「豈」字絶句,非。 不可?」史佚行之。』 乎哉 棺斂、舊 !」召公言 「輿 用棺,如 古患 八機,或 反

置於繩 虞氏 繫 直於中央,繫著 以 就 之堲周葬下殤,葬於園,以其去成人遠,不 鄭氏 央,又以 中殤、下殤。 木爲之,狀 墓 一邊材 之瓦棺 也 曰:「土周,堲周也。周人以 上。 繩 機,輿 横 從 葬 鉤 如 兩旁鉤之。」 無 愚 蓋中、下之殤,皆先斂於瓦 中 牀,無脚及輄簣,先用 兩 尸之牀 謂 服之殤,以 央 頭之榪。 直繩,往還 輿,昇也。 也。 夏后氏之堲周 又别取 孔 以 氏 取 繩 周 H 匝 夏后氏 絙 人 — 繩 其 以 取 — 繩 機 有 P 中

矣。 宜而 就園 也。 後世 棺 棺,置棺於機上,而除繩以下之也 則下殤竟以尸葬而 解,而尸從機 當堲周之上,先縮 之,故曰「用棺衣棺,自史佚始」,此禮之所 斂之也。 曾子問之。 由變也。 則在園 棺於家而 下棺於堲周 疑「尸」字乃 下殤葬於墓 許之也。 豈不可,言是豈不可乎? , 斂於棺 ,至此在家衣之,遂置於棺 〇孔疏謂:「舉機往 前此下殤在家衣之而已,其棺 車 棺斂於宫中,用瓦棺斂之於家 載 中央 而 衣棺,謂用衣衣之,又用 以 中以 遂葬焉, 往 「棺」字之誤。 ,而塗遠,則輿尸不便,故 落 除 無棺,反不如無服之殤 葬。 直 入堲周中。」如 下殤 繩 以其 則 但 葬 中 於園 園,臨斂時 兩 塗 殤 權 蓋 邊之繩 邇 葬於墓, 則 既 乎禮 而 其説, 故 澳尸 斂 棺 也 於 悉 斂 之 棺

曾子問曰:「卿大夫將爲尸於公,受宿矣,而

遂

廣

説

事尸之法。

士服爵弁助祭,大夫著

驅。

冕而

出」以下,此孔子因曾子問爲尸之事

卿、大夫、士皆下之,尸必式,必有前驅。」 公館以 有 冕。 君出 爲土 可同 既受宿,則祭日已迫,不可復改卜,故雖有 來。 齊衰内喪,則 華仲前驅」,是也。 齊衰之喪也。 齊衰内喪,而不可已也。齊衰内喪,同 宿,謂祭前宿尸也。 宿當爲肅 下之,敬尸也。 處也。 人君祭前三日卜尸,既卜吉,乃宿之, ,<br />
則有前驅辟道。《左傳》「公子\状大、 一,則尸服 餘説見《曲禮》。 事 ,禮也。」孔 尸服卒者之上服,君之祖父或 ,進也。」進之者,使知祭日當 如 爵 出宿於公館以待事,吉凶不 之何?」孔子曰:「出舍於 弁,爲大夫、諸侯,則尸 尸尊與君同,故必有前 鄭氏《特牲禮》注云: 尸必式,答之也。 子曰:「尸弁冕 孔氏曰: 『尸弁 而出, 服 門

《記》曰:『君子不奪人之親,亦 也。』此之謂乎。」《釋文》:「辟,音避。 氏三年之喪,既殯而致事,殷人既葬而致事 也者,禮與? 子夏問曰:「三年之喪卒哭,金革之事 服,人君禮伸,故尸服助祭之上服。」 大夫、士卑、屈於人君、故尸服在家自祭之 、皆服在家自祭之服,不服爵弁及冕者 《特牲》尸 初有司與?」孔子曰:「夏后 服 玄端、《少牢》 尸 不可 與,音餘,下 服 朝 奪 無 服 親 辟

奪人親 孔氏曰:「皇氏云:"夏后氏尚質,孝子 鄭氏曰:「初有司、疑 文,悲哀至甚,故卒哭致事。』 人漸文,思親 親恍惚,君 事,謂還其職位於君。 亦不 事不敢久留,故既殯 可奪親,二者恕也,孝也 彌深,故既 有司 周卒哭而 葬致 初使之然。 事。 知 周 致 致 事。不 周人 事。 人卒哭 致 極 喪 殷

皆同。」

哭也。 孝也。 彼也。 可不許。舊記有此文,孔子引之。」 是不奪人喪親之心,此謂恕也,以己情 卒哭也。 致 事 者, 言孝子居喪不可不致事,人君亦 遭喪致 夏既殯,殷既 以喪之大事有三: 人 臣 事,不奪情以 有親之喪,人君許其致事 葬,後世漸 殯 求利禄 也 遠 放知 葬也 此 不 謂 恕 周 卒

爲之也。今以三年之喪從其利者,吾不知 也。』」《釋文》:「有爲,于僞反。」 曰:「吾聞諸老聃曰:『昔者魯公伯禽有爲 之。 《費誓》。 作難,喪卒哭 鄭氏曰:「伯禽,周公子,封於魯。 之兵,言非禮 而從金革,時有徐戎作亂,東郊不開 時周 以三年之喪從其利者,時 公尚在,伯禽卒哭,爲母喪也。 也。 而征之,急王事也。 孔氏 曰: 「伯禽卒哭 征之作 有徐 多 改征 攻 取 戎

> 高矣。」 從其 講 其疑,遂使千百載下,遇變事 之難以 理無 以傳習講貫之功。其於禮也, 守約之學。 鏞 齊之事,而問於聖人。 所可及者,或講明不素 而 亦如處經事 又不 明之功也 曰:「曾子以篤 貫」,隨 利, 盡 中其肯綮,故歷 廢乎旁搜博考之力。 貪從於利 事物亦日 聲 其於身也,反觀內省,而 而不失其宜焉。 其後 響 答, 慤 攻 真 醇至之資,而 新 略 取 夫子隨事 積 舉喪祭吉凶 而 而猝然遇之,則應 無 於 力 無 人 留 久, 夫子 窮,有非 而知其權者 此皆其問 也。」 難,其 知天下之義 躬行實踐 剖析 雜 爲 見 語 意 益 潛 應 出 而 益 答 決 料 以 1 加 氏

子夏曰:「金革之事無辟也者,非與?」孔

子

禮記卷十九終

親睦

九族,尊

事

**耈老,必自其孝於親者推** 

王子皆造,亦莫非

- 所以教

世子

也

而

人

君

之,則其本亦

皆由於爲世子之能

盡其道,

此記者

國史館纂脩 賜 進士及第翰林院 孫 希旦集解 編脩

採輯之意也。

故廣言之,而以《世子之記》終焉。

**文王世子第八**《别録》屬《世子法》。

之。 若 篇之大名焉。其第二篇、第四篇、第五篇 世子,故以《文王世子》居首,而因總爲六 法,次言養老之事,末引《世子之記》以終 次言三王教世子之法,次言庶子正公族之 及周公教成王之事,次言大學教士之法, 此篇合衆篇而成。首言文王、武王爲世子 而記者集合之者也。 無與於世子之事,然國學之教,王大子、 蓋其初本各爲一篇之書,各有篇名, 記者之意,本主於教

> 音暮。 直遥反。三,如字,又息暫反。 視寒煖之節。 能正履,王季復膳,然後亦復初。 不安節,則内豎以告文王。文王色憂,行不 中又至,亦如之。及莫又至,亦如之。 否何如?」内豎曰:「安。」文王乃喜。 服,至於寢門外,問内豎之御者曰:「今日 文王之爲世子,朝於王季日三。鷄初鳴 |末有原。」應曰:「諾。」然後退。《釋文》:「朝 上,時掌反。」 食下,問 衣,徐於既反,又如字。 所 膳。 命膳宰 食上,必在 其 有 Ė 及 而 安 H 衣

鄭氏曰:「内豎,小臣之屬,掌外内

之通

御,如今小史直日矣。

節

謂

居

處

故

禮記卷二十

在

側

飯

再

飯

欲

知

氣力箴

藥

所勝

間

禮。」 初」以 也。 端,蓋以聖人之盡倫盡性者立之極 於孝也。 欲 節,若食齊視春時,飲齊視冬時。 原 察 事 極,而盡 知親之所好 也 再也。 退,反其 復 上問 愚謂:聖人之於人倫,無所不 膳 問 其愛敬 故此篇言教世子,而先以 飲飲 所 勿 安之禮,『食上』以下視 膳, (寢。」 有所再進,爲其失飪 食 也。 安也。 以 問 事 所 方氏 其親 徐氏 食 復初,憂解 者。 乃其 慤 師曾曰: 曰:「寒煖之 末 爲子之止 猶 臭味 問所膳 也。 也 此 勿 膳之 『復 開 用 也 在 其 其 惡

飯亦 武 王 脱」,又作『説」,同音他活反。 王 再飯 説 帥 飯,扶晚反。」〇間,去聲。 冠 而 帶 行之,不敢有 旬有二日乃 而 養、文王 加焉。 間。 養,羊尚反。 飯 《釋文》: 亦 文王有疾,武 一飯,文王 「税,本亦作 壹,本 亦作 再

一一一

鄭氏曰:「帥,循也。不説冠帶而養,言常

終,武 武王 我百,爾九十。 文王曰:「非 文王謂武王曰:「女何夢矣?」武王 夢帝與我九齡。」文王曰:「女以 不敢有 者 其間 猶 有所加也。 瘳 曰:「西方有 ,親食乃能食,親飽乃能 王九十三而終。 有空隙 也 加者,文王事親之止於孝,不可 也。 文王一 ,故云『間猶瘳也 孔 吾與爾三焉。」文王九十七乃 氏 九國焉,君 古者謂 日 一飯亦 《釋文》:「聆音零,本或作 病 年齡,齒 一飯 損 飽 王其終撫諸。 則 再 也 不 爲 飯 亦 何 恒 一對 亦 愚 一龄也。 在 也? 티 : 再 謂 以 飯

文王 陳氏 而 好 莫之敢議也。」 事者爲之辭 雖愛其子,豈能 澔 曰:「數之脩 而 不究其理,讀記者信其説 愚謂:年壽之數,父不 短,稟 減 己之年而 氣 於有 益之耶? 生之初

耶 ? 耶 ? 果爾 則 年八十三,又十三年而伐紂,又六年而崩 王。」如其言,則文王九十七而崩,時 志。」蓋亦 者,示其傳基業於武王,欲使武 寸陰,不可減之晷刻。 孔 鄭 可 年已定於此夢,則未至於九十三,周 疾,周公禱於三王,求以身代。 能 武 氏 以 以 疏 者不合。 [與爾三],上下不相應,何也? 決 王崩時 云 : 謂 與子,且 ○ 大 且其曰「九」曰「三」者,又何 則 其 何 「年壽之數,賦命自然,不 「吾與爾三者,示傳業於武 疑記 必瘳,何必皇皇焉爲之禱 不 戴 年百有二歲,與此記言 先儒 既 可 禮》謂:「文王十五 言之不可信 云「帝與我九齡」, 明言, 因 謂《泰誓》「十三年大 文王云『吾與爾三』 而爲此 而 曲 若武 廋 解 王承其 詞 之。 可 武 而 而 九 所 武 隱 延之 王。 乎? 公固 王之 生 又云 王 + 武 指 語 然 所 有

> 同: 要之,此等處不可盡考,姑闕之可 四。「受命稱王」之説 氏,則據《竹書紀年》,謂武王崩 文王受命七 會孟津」者,乃并文王受命稱 而《大戴禮》、《竹書紀年》亦皆難 謂文王 而鄭氏 一受命 年 與《尚 而崩者 九 年 書》孔傳之説 鄭氏 而 歐 崩者,孔傳 陽 也。 氏 王之年 已 時年五十 至仁山 辨 也。 以 又自 也 微信。 其妄, 而 金 謂 不 數

《世子法》於伯禽,欲令成王之知父子、君 吏反,一音如字。 成王世子之道也。《釋文》:「相,息亮反。治,徐 長幼之道也。 成王幼,不能涖阼。 下也。 鄭氏曰:「涖,視也。 與 人君之事,周公代王履阼階,攝 成王居而學之。 抗,舉也,舉《世子之法》於伯 長,丁丈反,後皆同。」〇令,力呈反。 成王有過,則 周公相,踐阼而治。 以成王之過擊伯禽 成王不能視阼階,行 撻伯禽,所以示 王 位 禽,使 治 臣 抗 天 則 直

教 所 高 官 嘗 如 沖 所 曰 然 以 無 以 之,欲成王 足 喪,二十 1總己 當 宗已 攝 順 盡 荀 謂 法 子 成 不 以 mi 「《書》所 之法 王 先 位 其 文 倫 卿 攝 明 感 攝 一,可謂 矣。 知 以 所 所 王 盡 喻 然,不特 亦 五 政」,皆 者 也。 聽 謂 以 性 焉 而 也 一觀 非 月 成 \_0 **温** 其 者,則於君臣、父子、長幼之道 警悟成王者切矣。 未 冢 謂 有 曲 而 伯 宰,未 攝 王 至 『位冢 舉 周 盡 七 在 畢 天子位』之事 禽之所行, 愚謂 吴氏澄曰: 也 一,而 有 此 车 公行之。 成 過,則 不不 法 但 知其 而後還 方其 王 無 宰,正百工」,與《詩 ·稽之事實,武王崩 於 過 諒 ^ 以 世子法》,文 位 伯 畢時,周 闇 所從始,如 使 撻 而求 此皆論 ~ 政之事 之年, 禽 冢宰 成 伯 也。 按 禽,爲 王 〇吴氏 文王 使 此 觀 而 公固 三年 篇 非 帥 周 也 已,非 感也 殷之 一之所 周 公者 以 其 而 王 未 之 幼 棫 所 百 行 爲

阼,而 喪,而 復 以 諒闇 傳 成 成 至 大 庚 曠 君 同 即 口 詳 使 後 學之事 伯 以 以 廢 能 爲 王 出 王 爲 考, 叛。 成 亦未有能行之者。 同 年 居 幼 禽 已久,管、蔡輩 ,殷衰而復興,禮 行之者 武 冢宰攝 不 學,令 管、 東, 就 成 王 而 王 要皆 ? 知 行是禮 而後 封 王 崩 歸 伯 其 蔡 少,故《 幼 後 禽 政,其 或 觀 在 周 爲 即 世 流 不 事 古者 武 亦 公居 伯 相 成王 前 傳 言 能 就 乎 王 成 禽 創 聞 喪 禮 ? 踐 己 東,雖 封 在 Ŧ 殷 所 初 天 見而生疑,遂 所從 廢 服 阼, 攝其政焉。 亦 而 子 學 東 人 時,周公使 至武 年,實 而 四 征 謀 征 居喪之常禮 不復究其本 而 而 愚謂: 其 來遠矣。 復 制 徐 一,安得 效之,記 叛 王之喪,周 周 起。」意 年月先後 無 戎 公代之踐 其 抗《世子 天 伯 至挾 其 有 而 時 子 高 高 然 禮 者 禽 伯 後 周 末, 也 不 武 典 居 誤 與 公 公 周

文王之爲世子也

也。 之,欲成王以文王所 傅,使伯禽與之同學,而 氏之説得之。 其當務而圖其不切,必無是理也。 竊疑吴 事生、問安、視膳之儀節,舍本而 斬焉衰絰,乃使之與伯禽處 之内也。 王。 王、武王爲世子及周公教成王之事。 之法,則所以教之者,亦迂 法》以示之,舍居喪哀痛迫 魯。」如其説,則抗《世子法》在武 幼,周公踐阼,抗《世子法》於伯 法》之時。 自篇首至此爲一篇,名《文王世子》,記文 若成王已爲天子而乃示之,以爲 至明 廬堊室之中,不與人處焉。 年,王冠且 仁 Щ 蓋成 金 氏云: 王 以 長,使 爲 事王季者事 抗《世子法》 世 武 切之至 而 一子,周 伯 ,而抗《世 不切矣。 王崩, 禽 禽 王喪 逐末, 一情 以以 公 就 ",而 武 议 爲 成王 成王 封 教 世 期 子 Ŧ. 大 觀 子 示 於 成 舍 年

篇,其篇名題於篇末,第六篇則引於篇首,也。此篇合六篇爲一篇,自第一篇至第三鄭氏曰:「題上事。」 愚謂:此書篇之名

樂正學干」「籥師學戈」「學舞干戚」同。」學羽籥,皆於東序。《釋文》:「凡學,户教反,下「小凡學世子及學士,必時:春夏學干戈,秋冬

惟第四篇、第五篇不可考耳。

學,教也。學士,胄子及鄉所升之俊士 《大武》』,小舞以干配戈,《周禮》樂師教 干戈,武舞; 必時,必 也,下文「大樂正學舞干、戚」,則大舞也 舞是也。」 以干配戚、《明堂位》『朱干、玉戚,冕 東序,夏后氏 静,陰之屬也,故用秋冬安静之時 之屬也,故用春夏動作之時教之。文舞安 因 其 愚謂: 羽籥,文舞也。 四 之學也。 時 此 所宜,若下文所言 所教,皆文武之小舞 〇 孔 氏曰 武舞發揚,陽 :「大舞 教之。 而 也 也 Ŧ 舞

《大武》,是也

《象》,二十舞《大夏》」,熊氏謂《勺》即《籥》 《夏》、《籥》序興」。若禘、祫大祭,則取《大 卷》、《大咸》、《大磬》、《大夏》、《大濩》、 樂正教之,《大司樂》「教國子舞《雲門大 教國子小舞」,是也。至二十學大舞,則大 舞,則小樂正之等教之,《周禮・樂師 也。國子之未二十者,學《象》、《勺》之小 中奏之」也。《内則》「十三舞《勺》,成童 以享先祖」,又言「《九磬》之舞,於宗廟之 韶》以配《大武》,故《大司樂》言「舞《大武》 武》、《大夏》對言,《仲尼燕居》亦言「《武》、 配《大武》。 武王作《大武》,爲武舞之大。若文舞則武 其樂聲容未備,文武之舞猶皆爲小舞。至 舞,文王之《南籥》也。 武 王未及作,而因夏之《大夏》脩而用之,以 舞之小舞,文王之《象箾》也。 故《明堂位》、《祭統》皆以《大 文王大勳未集,故 文舞之小 舞

息余反,又息吕反。」
贊之。胥鼓《南》。《釋文》:「大,如字,又音泰。胥,小樂正學干,大胥贊之。籥師學戈,籥師丞

之法。」 籥師,此有籥師 禮》樂師教小舞,六舞皆教,故知 禮 教國子舞羽、吹籥。」」 胥》:『掌學士之版,以待致諸子,春入學 樂師》:『掌國學之政,教國子 之屬。通職、秋冬亦學以 鄭氏曰:「小樂正,樂師也。 冬之時亦教羽、籥也。 師既教戈,又教籥。此小樂正教干,《周 舍菜,合舞,秋頒學,合聲。』《籥師》:"『掌 正、《周禮》有大司樂有樂師。 籥師》:『掌教國子舞羽、龡籥。』是籥 愚謂:「小樂正」四句,申上「學 丞。或諸侯之禮,或異代 此 羽籥。 有大樂正、小 孔 四人皆樂官 《周禮》惟 氏 小舞。』《大 《周 通職 曰:「《周 禮 至秋

舞之所用,其實 之兵舞,以干戈皆兵也。 舞。」不言「戈」「籥」者,蓋舞以干戈、羽籥 舞,有羽舞,有皇舞,有旄舞,有干舞,有人 禮·樂師》:「掌教國子小舞。凡舞,有帗 贊之者亦鼓也。 之。大胥於國子舞羽籥之時,則擊鼓 則知學羽籥者,亦小樂正、籥師 之節。上言「小樂正學干」,「籥師學 干戈」之事 Ш 相配,干舞兼戈,羽舞兼籥也。干舞,亦謂 之文舞名《南籥》,蓋歌二《南》之詩 籥」之事也。《南》,即羽籥之舞也。 胥鼓《南》」,則知學干戈而大胥、籥師 川之祭祀」,是也。 巫之所舞 」之屬者,蓋《周禮》因樂師教舞,遂廣 也。「胥鼓《南》」,申上「學 旄 皇 舞 皆互見以 則 舞 四 用 此不言「帗舞」「皇 於旱 夷舞者之所舞 《舞師》「兵舞,舞 相備 暵 河則 也。 也。 司 下言 ◎∥周 戈」, 文王 以 邓 以 非 言 派 爲 奏 羽 帥

所以教國子者也

宗、書》在上庠。《釋文》:「大,音泰,下「大樂正」「大 者韶之。冬讀《書》,典書者韶之。 春誦夏弦 盡 ,大師詔之。瞽宗秋學《禮》,執禮 《禮》在

傅』『大寢』皆同。」

陽用事則學之以聲,陰用 宗。 《禮》典《書》,蓋以他官之習於《書》、《禮 《周禮·大師》教六詩,「以六德爲之本,以 學《書》於有虞氏之學、《典》、《謨》之教所 大 賢,而三時釋奠,大師首行其禮,故曰「瞽 也。瞽,大師 禮》大司樂之屬,無教《書》、《禮》之事,執 誦 者充之,使之人教於國學也。 六律爲之音」。執,持也。典,主也。《周 謂 時 順 上庠,有虞氏之學也。 誦《詩》也。 氣,於功易成 也。 宗,尊也。殷學以祀 弦,以絲 也 周 事則學之以事, 播 立三代之學, 瞽宗,殷學 其《詩》 鄭氏 曰: 也。 先

膠。 代之大學,異名 學之人環水而觀 學《書》者就虞庠,其辟廱,惟天子出 學干戈羽籥者就東序,學《禮》者就瞽宗, 學,其東爲夏后氏之學,其西爲殷人之學。 《禮》、《樂》於 興 子》言「養老於東序」,知東序、東膠一也。 宗,皆大學也。 理。周立四代之學:辟廱、上庠、東序、瞽 謀、受俘、大射就焉。當天子至辟 處並建四學:辟廱居中,其北爲有虞氏之 也。」〇劉氏 以治建國之學政」,知辟廱、成均,並爲 見於經記,先儒之説不同,惟劉氏最有條 鎬京辟廱」,而《大司樂》言「掌成均之法, 世 《王制》言「養國老於東膠」、《文王世 學舞於夏后氏之學,文武中也。 敞曰:「周立四代之學,謂 殷之學,治定 辟廱 而 矣。」 同 實 名成均。 也。 愚謂:學之名散 功成,與 東序 廳,則 《詩》言 一名東 師、成 己 周 百 學

門之外」,是 學,而頖宫當天子之辟廱,則天子之受成 知瞽宗、西學一也。 祖 瞽宗一名西學。 序」,是也。 長》「春秋以禮會民 射在辟廱矣。周鄉之學名庠、《孟子》 宫。」《詩》言「振鷺于飛,于彼西 獻俘在辟廱矣。《穀梁傳》言:「習射於 學之所,而辟廱則天子之所視學而 之庠。鄉大夫之賓賢能,皆取諸鄉學,其 所升者,教於州之序。 云:「廱,澤也。」是澤宫即辟廱,則天子 周曰庠」、《鄉 魯頌》言:「在泮 國索鬼神 ,祭于瞽宗」、《祭義》「祀先賢 而祭祀,則 家塾所 也 飲酒義》「主人拜迎賓於 <sup>©</sup>大司 州、黨之學皆名序、《州 獻 升者,教 而 東序、瞽宗、上庠 馘,在 以 射于州序」、《黨 州 樂》「死 禮 所升者,教於鄉 泮 屬 於黨之序。 獻 民 於 則 廱 囚。」魯 而 以 飲 \_,毛 西 行禮 爲教 學」, 爲 酒 庠 大 澤 四 黨 E 傳 樂 干

尤俊異者乃升於大學而教之。

於東序。《釋文》:「合,如字,徐音閣,下「大合樂」凡祭與養老乞言、合語之禮,皆小樂正詔之

放此。」

乞言,求善言可行者也。合語,謂於旅酬之時,而論説義理,以合於升歌之義。第 五篇云「登歌《清廟》,既歌而語」,「言父 五篇云「登歌《清廟》,既歌而語」,「言父 子、君臣、長幼之道,合德音之致」,是也。 發用明德於民也。」禮,謂進退之威儀也。 祭祀之禮,及養老時乞言、合語之禮,皆小 祭祀之禮,及養老時乞言、合語,謂於旅酬 樂正於東序之中教之也。

干、戚、《大武》之舞也。大樂正兼教六舞,徐始鋭反。論,力門反,徐力頓反。」 大親正學舞干、戚。語説,命乞言,皆大樂正

是也。 樂》「以樂語教國子興、道、諷、誦、言、語」, 也。 正又授以篇數而使習之。《周禮 惟君所命者爲之也。 語說,合語之說也。 而 又以公卿之有道德者人而總主其教,謂之 蓋大司樂掌國學之政,至於教國子,則惟 《詩》、《樂》乃樂官之所掌,執《禮》、典 書》,則以他官之習於《書》、《禮》者充之, 獨言干、戚者,舉當代之舞以該其餘 語説、乞言二者,小樂正詔其禮,大樂 大司成,有道德 命乞言者,養老乞言 數,謂其所習之篇數 而 教於國學者也。 爲 · 大 樂祖 也。

職,必其位 祭于瞽宗」,是也。 謂「有道者有德者使教焉,死則以 論説者,所以明其義 大司成,言其主成國子之業。《大司樂》所 韶其 禮 望尊重 一,授其 數 而道德充盛者乃得爲 大司成無定 也 者,所 習 以 其 習其 事者易, 人,無專 事也。

則 A. 容也,徐古辨反。」 負 侍坐於大司 其 牆 義 難 列 此 事 未盡 成者,遠近間三 所以必屬之大司成 不問。《釋文》: 席,可以 「間,如字,猶 也。 以問,終

凡學,春官釋奠於其先師,秋冬亦如之。 之也。 事之時 官。 制 師 焉,死則以 錯 退 三 孔 設薦饌奠之,不迎尸也。」 鄭氏曰:「官,謂《詩》、《書》、《禮》、《樂》之 一就 之類也。 氏 席則函 氏 亂尊者之言,輙 《周禮》曰:『凡有道者、有德者,使教 、《詩》有毛公、《書》有伏生,億可以 後 曰:「席制 ,尊者序 席,負牆 不言『夏』,從春 一丈,可以指畫 爲樂祖、祭於瞽宗。』此之謂先 若漢、《禮》有高堂生、《樂》有 廣三尺三寸三分寸之一, 列 而 其事未 有咨問,爲不敬也。」 坐,辟後來問者。若問 可 一而問 知 得終盡,則不可 愚謂:三時釋 也。 也。 釋奠者 問終 則

也。 《禮》有伯夷、《樂》有后夔、《祭義》所謂 酬」,此有獻酬之證 樂之證 有牲、幣之證 樂,有獻酬。 爲先代之先師。此三時釋奠,兼有當代之 當代之先師 有道德而 師 其先師」者,弦誦也、《禮》也、《書》也,其先 奠,各以主其時之教者行禮 先師也。 以爲先師 先賢於西學」是也。此先代之先師也。 教,而以古之賢臣明於其業者爲先師。 秋則執《禮》者,冬則典《書》者也。 不同也。 ○陳氏祥道曰:「釋奠有牲、幣,有合 也。 夏不釋奠者,弦誦 、《大司樂》所謂 爲學之大司成者,死則亦祭之, 學以《詩》、《書》、《禮》、《樂》爲 也。下文「始立學,釋奠」,但 ^ 《曾子問》『凡告用牲、幣』,此 也。 聘禮》『一人 『釋奠必有合』,此有 也。 然山 「樂祖」是也。 如如 舉爵,從者行 相 JI 成 廟 春 無 則 社有牲 曰「於 大 師 其 此 合 祀 師

三獻,天子、諸侯於山川廟社不止三獻也。合樂,山川廟社不必合樂也。《聘禮》釋奠幣,學非始立,不必有幣也。學之釋奠有

凡始立學者,必釋奠於先聖、先師,及行事,

此又其異者也。」

必

以

先聖, 四時常奠禮輕, 故惟祭先師。 也, 若伯夷、后夔是也。立學禮重, 故祭及也, 若堯、舜、禹、湯、文、武、周公是聖, 述者之謂明。制作禮樂以教後世者, 聖, 述者之謂明。制作禮樂以教後世者, 聖, 若伯夷、后夔是也。 ○ 思謂:作者之謂鄭氏曰:「謂天子命之教, 始立學者也。 ○ 集聖。四時常奠禮輕, 故惟祭先師。

合,合舞與聲。有故則否,與國有大故去凶、札、師旅也。」 陳氏祥道曰:「必有劉氏敞曰:「合,謂合樂也。有國故者,謂凡釋奠者,必有合也。有國故則否。

樂意 之者乎? 學,而所祀之先聖、先師則同,豈有各自奠 師,非一國之所得專,天子與列 下文考之,『有合』當爲『合樂』。 子,則各自奠之,不合也。」 故,若唐、虞有夔、伯夷,周有周公,魯有 先聖、先師,則釋奠者當與 奠及始立學釋奠而言。 愚謂:鄭氏之説,穿鑿無據。 同。」 愚謂: 凡釋 奠,總 鄭 鄰國合。 朱子曰:「以 氏 上三時 曰: 從陳説 國雖各 先聖、先 有 之 或 孔 或 無

凡大合樂,必遂養老。

爲特盛也。必遂養老者,樂不可以無事而春合舞,秋合聲,則謂之大合樂,以其用樂頒學合聲。」 愚謂:三時釋奠皆合樂,而鄭氏曰:「大合樂,謂春入學釋菜合舞,秋

● 「學」下、《禮記注疏》有「官」字。

菜 空作 而 重 也。 舉者也,釋菜合舞,釋菜因合舞 乃大合樂者,蓋釋奠合樂,合樂因 ,釋菜禮 故因 輕。 行 養 三時釋奠合樂,春合舞、釋 老之禮 而 合樂。 釋 而 [釋奠 奠 舉 禮

者

遠之於成均,以及取 以 凡 三而一有焉, 遠,于萬反。」 事舉,或以 語 于郊者,必取 言揚。 乃進其等,以其序,謂 賢斂才焉: 曲藝皆誓之,以 爵於上尊也。 或以 德進,或 之郊人, 待又 《釋文》:

門之德行、政事、言語之各爲一 優。 庠」是也。 所 詢衆庶,賓賢能也。 郊,謂六鄉之學在 能 祝、史、醫、卜、射、御之屬。 言 而 揚者,非 用之。 語,考論也。 事 必不 舉 四郊者、王制 任 者 人材各有所長,隨其 事 非 語於郊,謂 必 而言爲長,若孔 無 德 科也。 》所 誓,戒飭 耐 鄉 謂 大夫 事 曲 虞 爲

> 得爲 之士 之也。 於此二事遠之,使不得與 升於成均而爲俊士,於鄉大夫賓賢 於成均,以及取爵 等輩之中自爲次第,以 等類之中,不求 也 飲酒之實、介,取爵於上尊以 人,言不得與賢能之士同稱俊選也 同 鄉飲 以 郊人既賤,不得升大學,又不 陳三事,而有一事之善 日 三而 待 而 酒之賓、介,取爵於上尊 又語者 語 故戒 有焉,乃進其等者 備 曲 也。 於上尊者 飭之,以 藝 待補 展,不 以 也。 其序者 待 用 賢 ,則異之於 得 後 酢 也。 能 與 主 H 謂 謂 人。 得 以 能 之士 賢 謂之郊 再 遠之 之 爲 酢 於 曲 考 能 其 時 得 其 之 鄉 主

也。 授器 本亦作「擯」。」○今按:興,如字。 始立學者,既興器用幣, 《釋文》: 乃 退, 「興,依 儐 于 注爲『釁』, 東 序。 然後釋 音 虚觀 獻 反。 菜。 無 儐, 必 不 舞 語 刃 反 不 可

菜於先 禮 興,舉 輕 干》:「舞者既陳,則授舞器。」不舞不授 曰 無 介以輔賓,又至旅酬 也 菜之禮,蓋以大樂正主之,而其爲賓者 器,釋菜禮 學始教,皮弁祭菜」,是也。 奠之禮,然後學官行釋菜之禮 聖、先師,及行事必以幣」也。 大司成與? 讨故 序 隨 ,價賓之禮宜 ,舉釋奠之器 **儐賓之禮** 釋 則諸 人之所 無介、語 也 加師,而 奠有 與 侯 輕 後 亦不 行 蓋大司成主國學之教,既 也。 繼之以 亦可 「興秩 行一 也。 而 與之相 惟 始 以 用幣,即前 也。 獻,蓋 而 儐 立學,一也; 禮 一學矣。 釋菜在 節 合語。 稱也。 二之興 禮賓謂之嬪 蓋此 大司成,亦禮 先 舞則授器 瞽宗, 儐賓 云一釋 師 君既 同 、《學記 ○熊氏 事,或 凡飲 但 獻之禮 四 行釋 奠於 親 興 (酒,有 此 之宜 時 器 牛 在 或 既 菜 釋 則 釋 用

有三: 謂: 菜、殯賓之事耳。其曰「既」者,乃 釋奠,已見上文,此又重述之,以 幣,然後釋菜之事,則釋菜惟 學始教,皮弁祭菜」,即 也。 四 奠、釋幣爲一,皆誤 釋奠與興器 成、釁之、又用幣告先聖、先師」,以 文之辭也。 師,及行 釋菜』,二也,《學記》『皮弁祭菜』,三也 ·秋頒學,合聲』,無『釋菜』之文,則不釋菜 興器用幣」,即上 了; 五. 先聖哉? 夏不釋奠,則釋奠惟五。《學記》「大 釋幣惟 也; 『春入學釋菜,合舞』, 事必以幣 完 王 鄭氏 用幣爲二事,故熊 一, 此 ○自「凡學世子」至 制 讀興 」,非二事也。 師 也。 所言「釋奠於先聖、先 興器用幣是也。」 還 爲釁,謂 釋奠,六 釁器 始 立 也; 事 學者興 一也。 小,何 氏 也。 禮 蓋 此 樂之 遥 起 亦 始 始 必 下 此 器 分 興 釋 立 立 釋 學 前 釋 學 用 菜

Ŧi. 九四

篇,名《教 (世子》,明大學教士之法。

教世子》。

鄭氏曰:「亦題上事。」

是故 禮所以脩 凡三王教 其 成 外也。 也 世子,必以禮樂。樂所以脩內也, 一懌、恭敬 禮、樂交錯於中,發形 而 温 文。 於外,

然發於 禮 又能 以 於一偏者如此 樂發於歡 功交養互發,故其德性之進於中和而 而 和心 又能 養其 之敬,敬 見於威儀 温 文,則 恭 内 内 生則戾 敬 也 者未嘗不達於外,制於外 欣鼓舞之情,故曰 心 動作之際,故曰「 質 則和 牛 懌者,和順之意。 八心消。 而 則 而 不 慢 真氏德秀曰:「禮以 野 不 心 流也。 也。 薫陶 塞。 蓋 德 「所以脩内」。 樂以 所以脩外」。 性,變 惟 恭敬矣,而 禮 和 者乃所 感 、樂之 順矣, 人之 化 不 倚 氣 起

質,莫妙於此。

至二者薰醲

涵暢,

相

與莫

間,故其 而 成也,但見其懌 而已, 恭敬 温文

文》:「少,詩照反。」〇行,下孟反。 保也者,慎其身以輔翼之而歸諸道者也。 德成也。 世子以觀大傅之德行而審喻之。 也。 輔及三公,不必備,唯其人。」語使能也。《釋 曰:「虞、夏、商、周 少傅在後,入則有保,出則 立大傅、少傅以養之,欲其知父子、君臣之道 大傅審父子、君臣之道以示之,少傅奉 師也者,教之以事而 有師、保,有疑、丞,設 有師,是以教喻 喻諸德者 大傅在前 也。 記 DЦ 而

教也。 子,是二人皆以他官充是職,蓋古制然也。 悼公使羊舌肸傅大子,楚莊王使士亹傅大 蓋亦以他官之有道德者充之。《國 養,謂涵育薰陶以成其德也。 喻,曉也。 奉世子以觀大傅之德行 審父子君臣之道以示之,以身 大傅、少傅, 而審喻之, [語》晉

四鄰: 道」也。 師 解 作記者取以 揚、責之弼。」四輔三公、古記據天子之事 責之丞。可正而不正,責之輔。 天子有問 氏 以 以言 師 有 所聞皆正言 也 師、保、傅之無時或離,是以所見皆正事, 而 日 以 教以 事 氏、保氏,人大學則受教於大司成。然 前記之言也。」〇世子人小學則受教於 氏、保氏,則貴游之子弟皆學焉,大司成 明 教 師 而 《尚 前日 其理 氏 也。 六 喻 「前」「後」「出」「人」互言之,以見 掌 無 藝、六容,所謂「輔翼之而歸諸 諸 一,德成 成説。 疑,後曰丞,左曰輔,右曰 書大傳》云:『古者天子必有 ·教國子以三德、三行,所 以 師、保,即《周禮》之師氏、 ,潛移默導,少成若性,教喻 德」也。 對,責之疑。 而 『語使能』一句,作記者 有以踐其實也。 保氏掌養國子以道 可 志 可揚而不 而不 謂 保 一弼 志 教 孔 而 氏

少傅,則周旋左右,無朝夕之離,無少長之皆造焉,皆非專於教世子者也,故又爲之皆造焉,皆非專於教世子者也,故又爲之則諸侯、公、卿、大夫、元士之適子及後選則諸侯、公、卿、大夫、元士之適子及後選

治」並同。」
國治,君之謂也。《釋文》:「治,直吏反,下「而治」「國君子曰德,德成而教尊,教尊而官正,官正而

異者也

子法》於伯禽,所以善成王也。 仲尼曰:「昔者周公攝政,踐阼而治,抗《世 則教於國者尊嚴,而人不敢忽,百官由此 者,謂其能 此申上「教喻」「德成」之言。 言「教成」,以世子之教於人言之也。 正,萬民由此治,此世子爲君之謂也。上 教尊」,以世子爲君而教人言之也。 成爲君子也。 君子之德既 所 聞 之曰:『爲 謂 德 此言 成, 成

五九五

作「迂」,音同,又音紆。」以善其君乎。周公優爲之。」《釋文》:「于,依注人臣者,殺其身有益於君則爲之。』況于其身

周公優爲之。」

周公優爲之。」

周公優爲之。」

別氏彝曰:「以《世子法》教世子,直道也。

別氏彝曰:「以《世子法》教世子,直道也。

成王之知父子、君臣、長幼之義也。故抗《世子法》於伯禽,使之與成王居,欲令成王幼,不能涖阼,以爲世子則無爲也。是臣,然後可以爲人君。知事人,然後能使人。是故知爲人子,然後可以爲人父。知爲人

君之於世子也,親則父也,尊則君也。有父法》於伯禽,使成王與之居而學之也。」王既無父,則無爲世子之處,故抗《世子孔氏曰:「凡教世子之法,必須對父。成

養世子不可不慎也。 之親,有君之尊,然後兼天下而有之。是故

乎? 治,其可得乎? 成,必異日爲君父而教不尊,欲官正 之親,能爲人臣 息之愛、昧義 於世子,兼尊、親之分,可不 周公之於成王,迂其身以成其德,況君之 而有之,而能爲人父、爲人君。不然,狥 世子教喻德成,則能爲 方之訓,今日爲臣子而 而有君之尊,然後兼 思 人子 所 而 以 天下 有 教 而 教 國 不 姑 父

學之謂也。 曰:「將君我 則禮然。」然 則禮然。」然而衆知父子之道矣。 行一物而三善皆得者,唯世 「將君我而與我齒讓,何也?」曰:「有君在, 「將君我而與我齒讓,何也?」曰:「有父在, 故世子齒於學,國 而 而與我 衆著 齒讓,何也?」曰:「長 於君臣之義 子 人觀之,曰: 而已,其齒於 其二曰: 也。其三

元良,萬國以貞。」世子之謂也。《釋文》:「學之,而國治。語曰:「樂正司業,父師司成,一有君、親親也。故學之爲父子焉,學之爲君臣君、親親也。故學之爲父子焉,學之爲君臣君、親親也。故學之爲父子焉,學之爲君臣

> 教世子之法。 教世子之法。 教世子之法。 教世子之法。 本。此引古語言「樂正司業,父師司 事也。此引古語言「樂正司業,父師司 成」,世子入大學之事也。〇自「凡三王教 成」,世子入大學之事也。〇自「凡三王教 成」,世子入大學之事也。〇自「凡三王教 成」,世子入大學之事也。〇自「凡三王教

周公踐作》。

並音效。」

之也。《周公踐阼》,必篇首有此語,而記者删出鄭氏曰:「亦題上事。」 愚謂:此篇夕

子。」 愚謂:《周禮》有「諸子」,而《禮 學,明父子之義,長幼之序。《釋文》:「弟,大計 愛,明父子之義,長幼之序。《釋文》:「弟,大計 愛,明父子之義,長幼之序。《釋文》:「弟,大計 愛,明父子之義,長幼之序。《釋文》:「弟,大計 一個禮》『諸子,下大夫二人』,諸侯謂之屬, 一個禮》『諸子,下大夫二人』,諸侯謂之屬, 一個禮》『諸子,下大夫二人』,諸侯謂之屬, 一個禮》『諸子,下大夫二人』,諸侯謂之屬, 一個禮》『諸子,下大夫二人』,諸侯謂之庶 一個禮》『諸子,下大夫二人』,諸侯謂之庶 一個禮》『弟子,皆同。」〇按"子,當音慈。 一個禮》『弟子,皆同。」〇按"子,當音慈。 一個禮》『弟子,皆同。」〇按"子,當音慈。 一個禮》『弟子,下「孝弟」皆同。」〇按"子,當音慈。 一個禮》『弟子,下大夫二人』,諸侯謂之庶

五九七

文所列,皆其 孝、慈、愛,以明父子之義。 子 記 友,以明長幼之序。 慈」,與《樂記》「子諒」之子同。 即「諸子」,非侯國之異名也。 燕義》引《諸 日也。 子職》作「庶子」,則 此節爲一篇之綱,下 教之以弟、睦、 教之以 子當 「庶 作

孔氏云:「應承「臣有貴者以齒」之下。」今從之。直遥反,下同。」〇「庶子治之」十二字,舊在「則以上嗣」下,庶子治之,雖有三命,不踰父兄。《釋文》:「朝,其朝于公,内朝則東面北上,臣有貴者以齒。

穆、長幼爲序列也。《燕禮》:「卿西面 貴者以齒, 行列中。」 族,三命不齒。 與庶姓同。 禮 鄭氏曰: 也。 唯於内朝則然,其餘聚會之事,則 「内朝,路寢庭。治之,治公族之 言雖貴,猶在父兄之下,以 一命齒於鄉里,再命齒於父 愚 謂 不齒者,特爲位,不在父兄 内朝,即燕朝也。 臣 北 昭 有

> 禮。 禮》異。《燕禮》、《大僕》所言,謂群臣朝於 賤,與《燕禮》異。又《周禮 但 異姓所不與者也 内朝之禮。此所言,則公族 眂燕朝,則正位。]此云「庶子治之」,與《周 臣有貴者以 上,大夫北 三云「東 蓋或圖宗人之嘉事,或與宗族燕飲 面 北 面東上,士 齒,則不 上,則 别卿、大夫、士之貴 無 西方 北 面、西 東面北上。」此 大僕》:「王 朝於内朝之 面之位。

其在外朝,則以官,司士爲之。

士 也。」 鄭氏曰:「外朝,路寢門之外庭。 而 面北 上。」諸侯之治朝,其三卿北面,大夫西面 司馬之屬也,掌群 士亦西方東面,與卿、大夫、士之位不 上,卿 「正朝儀之位,三公北面 愚謂:外朝,治朝也。《周 大夫西面 臣之班,正 北上,士門西東 東上,孤 朝 儀之位 司士,亦 禮 面 東 司

而

朝外 矣。 之朝, 是也。 文。 寇》、《朝士》見天子外 見諸侯燕朝之位,而天子則無文。 於内朝」,是也。 門内之朝爲 位」,是也。 一是以 门其在 治朝 》、《射人》見天子治朝之位,於《小 近 皆 朝士》「掌 君 朝之位 由諸侯燕朝之位 有 則 者 君 路寢門外之朝爲治朝、《大宰 三朝: 外朝 則費 亦 官之貴賤 爲 視 日 亦曰 尊 燕 以 燕朝、《大僕》「王眂燕朝 ,則以 内 (聽治」,是也。 朝 推 建 詢 朝、《玉藻》「朝服 諸 内朝,此記公族朝於内 諸 在 對燕朝,則亦 外朝之法」,是也。 衆庶之朝爲 爲 侯 侯,其朝位亦大略 阼 官」,是也。 等列 之西 朝之位 階 以推天子,由天 下東南 也。 面者爲卿, 治朝 一,而諸 日 故 外朝, 於《燕 對 以 外 天子、 Ü 詢 侯 日 於《司 朝 則 · ド 王 子 路 可 削 視 衆 而 西 禮 大 見 治 無 司 此 朝 庶 朝 寢 周 諸 正 面 爵

及州 之禮 天子 君者爲尊。 夫北 臣東面,群吏西面,則諸侯外朝之位,三 天子外朝之位,三公及州 者爲三卿, 面,大夫西 君視治朝, 三公,而 同 長、百姓北 面,士 也。 孤 、卿、大夫北面,士西方東 一西方東 面,士西方東面 而大夫西 出路門外 天子之北 〇此上二節,言公族在 面,而群臣、群吏之位 面 少左,故以北 画, 面者爲三公,而 則天子之西面 長、百姓 士 ,則諸侯之北 西方東 北 面 面 面 面 朝 亦 一者爲 孤 而 也。 也。 狂 龃 卿 群 東 對 面

其在宗廟之中, 以 官。 則如外朝之位,宗人授事,以

士

記

眂

禮

侯

同

禮 牛 賤 鄭氏曰:「宗人,掌禮及宗廟 ', 司 異位也。以官,官各有所掌,若司 》,衆兄弟之位 馬奉羊,司空奉豕。」 在 作 階 下 西 也。 愚謂 面 以 祭統 爵, 《特牲 徒

禮 記 集 解

大夫。 子、諸 如《 卿 以 疑 又 衆賓之後,故 卿 在 以 飲 以 賈 此 云 云 非 、大夫者,亦以昭、穆獻之,則其得獻 、爵序。 未 賓長、衆賓之後,若天子、諸侯同 齒。」蓋 Ŧi. 炭 疏 則云「宗人授 大夫之班 凡 獻 所 云: 爲 昭、穆 君 牢禮》衆賓門東,北 侯 賜 尸飲九 序 以 謂 洗玉 百 爵 ', 至 其獻之亦以官。」故《祭統 《特牲禮》主人獻長兄弟、衆 前 群 無爵者阼階下 姓 次,既 昭 昭 獻 賈 爵獻 群 猶 助 群 事,以 與 之,則 以散爵獻士及群有 昭 氏 ^ 祭皆在 特 穆 昭 之説 獻 群 卿。尸飲七,以 牲》 监, 咸 穆皆 而 一爵以 其 在 改 如 作階下 之衆 爲 穆 面 在 而 西 就 此。 卿 官」。《特牲 與 不 既 阼 面 卿 大 兄 穆 失其 ·西面 階 然 大夫之位, 夫 齿, 弟。」 獻 有 如 者 下 一姓之爲 爵者 西 瑶 司 \* 其言, 倫 自依 之位 西 [階西 是 爵 鄭 反在 兄 矣。 》記 面 弟 皆 P 天 獻 則 注

> 廟之位 西階 爲 諸 執 之位、《中庸》所謂 面 南 云:「祭祀 事 序則 侯 者 東 異 . 與? 下 者列爲衆賓,餘 上 賓 姓助祭之位 與外朝之禮 ,有不能盡 位 有 私 一,其不 特 上 臣 牲》 事 門 者貴之。」疏 「序事 執 東, 如 一、蓋 口 記:「公有 在門西位」也。 事 外朝者, 耳 北 亦 者 辨 如 面 **賢」也** 則 此 在 西 但其以 司 謂 門 上。 執 門 「公有 東 然 事 天子、 門 西 貴 鄭 則 者 賤 在 司 西 注 北

音俊。」 其 登 餕 獻、受爵 則 以 上 嗣。 釋

也。」 鄭氏 祝 舉奠洗爵 食禮》言之,受爵 祝 命 酌 日 之 奠于鉶 二 上 孔 餕 氏 酌 也。 日: 人 一嗣 南。 也。 ,君之適 大 謂上嗣 尸人,祭奠不飲,衆賓 特 夫 餕, 之 牲 謂宗人 長子。 一禮》尸 嗣 舉 無 奠 此 未 遣舉 以《 也 禮 人 特 一、辟君 之前 奠 獻 牲 盥 饋 謂

少

餕

受。』嗣子答拜,則 遣嗣子長兄弟相對而餕,所謂『餕』也。 舉奠者,鄭注《特牲》云:『將傳重,累之 卒鱓,拜,則此 時雖有長兄弟,以上嗣 也。』《特牲》又云:『舉奠洗酌 嗣子進受,復位 長爲加爵之後,嗣子乃舉之。 〈特牲》無算爵之後,禮畢,尸謖 嗣舉奠,盤,人,北面 經所謂『受爵』也。 ,再拜稽首。』尸答拜,嗣子 此 經 再拜稽首。 爲主。《特牲禮》先 所謂『獻 《特牲》云: 而 入,尸拜 也 出,宗人 尸 必嗣 ,執奠, 餕 又 子

受爵

而

後獻,獻而後餕。

今此經先言『餕』

父兄齒

此言公族喪紀之禮也。公大事,謂君之喪族之喪亦如之,以次主人。 、 其公大事,則以其喪服之精麤爲序,雖於公

下。 親者 服者以 使以 衰,而 非 事 麤者近主人,服精者以次而南 0 但 喪服 既小斂,則皆在阼階之東,西 在室中,立於主人之後,而 君 本服之精麤爲序,親 其本服各有精麤,故庶子治其 精 喪 庭離 如 親者麤,疎者精。 爲序,以次主人。尸在室, 此,雖於公族之喪事,亦使有 疎 不 爲 也。 得 君 疎者在 面 相 雖 加 越 喪事 皆 也 堂 則 服 斬

若公與族燕,則異姓爲賓,膳宰爲主人,公與

親親 膳宰爲主人,君尊,不獻 鄭氏曰:「異姓爲賓,同 此言公族燕飲之禮也。膳宰,膳夫也 此 序異矣。 上」,此云「公與父兄齒」,則與尋常燕禮之 其爲君與族燕之位與? 也。 《尚書 愚謂:《 顧 命》有 燕禮》「公席于阼 ,姓無 酒 西序東鄉之位 ^ 公與父兄齒, 燕禮》賓席于 相賓客之道 階

燕,異姓爲賓,席於牖間,在父行者席於賓 牖 東,在兄行者席於賓西,公與父兄齒,則宜 西者又次之,西序東面者又次之。 公與族 是燕禮之席位,牖間最尊,賓東者次之,賓 面者,則北上東面 間 ,卿席于賓東,大夫繼賓而西,若有東 之位 ,即西序之位 也。

族食,世降一等。

在西序東嚮之位也。

弟。」公與族燕,飲禮 既有親疏,燕食亦隨世降殺。 鄭氏曰:「親者稠,疏者希。」 愚謂:《大宗伯》:「以飲食之禮親宗族兄 則一年再會食,總麻則一年一會食也。」 衰,一年四會食,大功則 族食,與族人燕食也。 公食大夫禮》賓惟一人,公立於廂,無阼 《大傳》云:「合族以食,序之以昭 也。 世降一等者,族人 一年三會食,小功 族食、食禮也。 假如本是齊 孔氏曰:

> 之禮。 之禮 則相與燕飲、《伐木》詩所謂「迨我暇矣,飲 降一等,則與族燕不用此法,但閒暇無事 穆。」則公與族食,序昭 此醑矣」,是也。 ,亦與《公食大夫禮》異 〇此上二節,言公族飲食 穆列 也。 坐、蓋用燕 族食,世 食

其在軍,則守於公禰。

者,以下文言「孝愛之深」,自仁率親,故以 據無遷主而主命者也。 禰,父廟也。 尤親者言之。 主以行,則亦守於遷主也。必言「公禰 師以遷廟主行,此云「公禰 若有遷主 而奉遷

守貴室,本或作『守貴宫、貴室』。」 諸孫守下宫、下室。《釋文》:「守,如字,又手又反, 公宫:正室守大廟,諸父守貴宫、貴室,諸子 公若有出疆之政,庶子以公族之無事者守於

出 其當宿者, 宫伯授以 之政,庶子率公族致於宫正、宫伯,宫正 庶子凡在 之版以待,夕擊柝而比之。 糾禁,以時比宫中之官府次、舍之衆寡,爲 燕寢 魯仲子之廟者是也。貴室,路寢。下室, 氏 穆尊者。 從或守也。正室,公族之適子。 子以公族守於公宫」,蓋群子非一人 諸子》: 廟、寢。 邦有大事,作宫衆,則令之。」蓋公有出 宿,其比亦如之。」《宫伯》:「掌王宫之士 以以爲 疆及有故,則盡 「鄭以貴宮、貴室總爲路寢,下宮爲 也 四 公在國及無事時,則更番入直,公 「會同、賓客,作群子從。」此 《周 版者。 親 諸子諸孫,昭穆卑者。 廟。 禮 · 宫正》:「掌王宫之戒令 授八次、八舍之職事,若 下宫,吴氏以爲别廟,如 次、舍,以尊卑分守 宿衛也。 國有故,則令 〇吴氏 諸父,昭 貴宫,吴 云底 澄 比 疆 或 親

> 貴、下乎? 陸氏以大廟若周公,貴宫、貴 室分爲二。 室、下室皆親廟,亦未是。」○此上二節,言 貶爲下乎? 室若魯公,下宫、下室若群公廟。 尊己而卑祖 守之,路寢反稱『貴宮』,而以諸父守之,是 廟,下室爲燕寢,則貴宮、室混爲一,下宫、 廟僭放文世室,他國無之也。 昭廟,下宫、下室爲穆廟。 又親 禰也。 胡氏以貴宫、下宫人所居,貴 廟貶稱『下宫』,而但子孫 方氏以貴宫、貴室 昭穆等耳,可分 又四親 然魯 廟 爲 可

取、七喻反。」告,死必赴,練、祥則告。《釋文》:「冠、古亂反。五廟之孫,祖廟未毀,雖爲庶人,冠、取妻必

公族在軍及在

國

宿

衛之法也

鄭氏曰:「赴,告於君也。 日 五廟』者,容顯 :「祖廟未毀,謂 考爲 同 高 始 祖。 封 實四廟 子 高祖以下, 也 孫 而 孔 H 唯

子。 自 有 五 四 世以 廟,今云『五廟』,故云『容顯考爲始封 是高 下,其廟 祖 爲 四 不毁也。」 世,五世 祖爲始封之君

又作「啥」。」○陳氏:承,如字。 族之相爲 爲,于僞反。 至于賵、賻、承、含,皆有正焉。 也,宜弔不弔,宜免不免,有司 免,音問。承,音贈,出注。 含,胡暗反,❶本 《釋文》: 罰

衣服。 渠眉 物。 者謂之含,承於身者謂 之官正之以 親 氏 承 鄭氏曰:「弔,謂六世以往。 (弔、免,乃其疎遠者,而闕於禮則有 (曰:「六世以至百世,但有弔 讀爲贈,聲之誤也。 盡 一,但 、疏璧者,皆承 賵,車馬。 總謂之贈。 有 袒 禮。」 免。 賻,財帛。 **賵、賻、含、襚,皆贈** 陳 赠,送也。正,謂 也。」 氏祥道 之承。 正,正禮 含,珠玉。 愚 曰:「實 免, 謂 凡玉可 禮。 也。 謂 族 Ŧi. 於口 庶子 五世 人 以 喪之 孔 襚, 世。 罰 相 爲

> 之, 弔之法也。 可 相爲言「弔」「免」,則公於族人之喪 告」,則族之相 知,互相備也。 則 其 相 爲 有 爲 服 亦 〇此上二節,言公族赴 者 必 赴 可 告 知 可 知。 於 君言 亦必 於族、 之 赴

剸,亦告于甸人。公族無宫刑,獄 依注音鍼,之林反,徐子廉反,注本或作「纖」,讀爲殲者,是 曰:「無及也。」反命于公,公素服不舉,爲之 公又使人追之,曰:「雖然,必赦之。」有司 司又曰「在辟」。 罪,則曰「某之罪 于公。其死罪,則曰「某之罪在大辟」。其 公族其有死罪,則 ·在辟」。及三宥,不對,走出,致刑于甸人。 如其倫之喪,無服,親哭之。《釋文》: 公又曰「宥之」,有司 在小辟」。公曰「宥之」,有 磬于甸 人。 其刑 成 罪, 有 又曰 則 司 料 刑 纖

司

暗」、《釋文》作「諳」。

依徐 下脱「于異姓之廟 〇朱子曰: 音 魚列反。 而 改 也 辟,婢 「素服」下脱 剸,之免反。 」五字。 亦反。 爲,于僞反。」〇今按: 「居外不聽樂」五字,「親哭之」 告,依注作『鞠』,久六反。 告,如

于 蓋 也。」 其 辟 鄭 走 族 刑 刺 刺 與王之同  $\exists$ 甸 同 用 也。 氏 無 亦 割 出 面 者 宫 族 鑽 罪 人,告之以 X 日 宫、 、鑿,次 剸,割 以 雖 愚謂 也。」 體 不於市朝者,隱之也。 刑,當宫者 「甸 無 族, 也 臏、 法 爵 奪 刑 也。 奉 人,掌郊野之官。 《周 其 宫 刖、 孔 當刑 君之恩 用 而 刑 禮 氏 臏、墨、劓、刖,皆以 刑 刀 以 滴 劓 鋸。」蓋 人而 殺 曰 劓、 甸 淫 掌 則 也 亦 刑。 師  $\sim$ 刖 就 於甸 囚 以 氏 魯 代之也。 之 墨 素服 刀 讞之言白 纖 以 語 行 師 刑 鋸 \*\frac{\times}{\times} 刑 待 凡 讀 縣 ,素衣、素 以 氏 割 縊 有 也。 也。 刑 鑽 爲 不 其 殺之 刀鋸 殺 爵 鑿 「小 也。 對 告 者 體 刻

宫重 刑, 刑, 也。 使有 也。 爲 禮 親 禮之差也。 爲 親 此 爲卿大夫,比葬不 裳、素冠。 族刑罰之法也。 者 士疑衰,無 爲 疎亦各有等衰。 士,比殯 疎之序 鄭 則獄已定矣,尚 之也。 **髠者** 鞠 於別,而 ,嫌爲有罪 司哭之。 ○鄭氏讀「告于甸人」之「告」爲鞠, 氏 者, 謂「以 使守積」,在五刑之外 也。 不舉樂。」此公爲卿、大夫、士變 不舉,不 推 公於公族之喪,爲之變禮 君弔 服者不往弔 審 君哭其臣,無不 **髠代之」,蓋** 而 自此以上,皆庶子之所 而 則 死者或 變禮 待鞠 食肉, 殺牲 今雖以罪死 窮 服 其 弔服 乎? 也 盛 情 異 比 也。 饌 之謂。 爲 也。 以 卒哭不舉 以 又公族 《周 雜 親者,特 大夫 親 , 猶如其 食 故 記》: 此 哭,謂 也 禮 既 節言 也 錫 無 將 其 衰 一君 倫 不 非 宫 īE 不 常 行 公

也。 矣。 姓之士也 衰,則諸侯自相弔亦緦衰,非所以施於同 自 自相弔,其服 其同、異姓之服乎? 皆無同、異姓之異,何獨諸侯之弔士乃異 矣,何以又生異説乎? 夫弔哭之事不可虚,鄭於《檀弓》既言之 獲 鄭氏謂「君弔於士疑衰,同姓 衰,弔服二。士又無錫衰,弔服疑衰而已。 [相爲亦錫衰推之,可見天子爲諸 減 錫衰也,總衰也,疑衰也。 等, 又鄭氏云:「君於臣,使有司哭之。」 天子弔其臣,諸侯弔其卿大夫,其服 先鄭以髡者爲司 而宫者乃以髡代,亦失輕重之平 同。 以君 凡上之弔下,與下之 圜 爲大夫錫衰,大夫 ○天子、諸侯 所 收罷民,其 則總衰」,非 大夫 侯 無 吊服 説 緦 緦 近

父子也。外朝以官,體異姓也。 前于内 朝,内親也。 雖有貴者以齒,明

> 體異姓者,言與異 所異也。 此 以 下 覆解前 、姓爲 文。 體 而 不可以 有

宗廟之中,以爵爲位,崇德也。宗人授事以 官,尊賢也。登餕受爵以上嗣,尊祖之道也。

鄭氏曰:「上嗣,祖之正統。」

喪紀以服之輕重爲序,不奪人親也

紀,條理也。不奪人親,故必以親者居上,

而不相越踰 也。

反,徐所例反。」 食,世降一等,親親之殺也。《釋文》:「殺,色界 公與族燕則 以 齒,而孝弟之道達矣。 其族

殺,等差也。

尊宗室,而君臣之道著矣。諸父諸兄守貴 戰則守於公禰,孝愛之深也。正室守大廟, 室,子弟守下室,而讓道達矣。

也。 戰者危事,故守於公禰,事死 適庶之分,有君臣之義,故尊正室而 如事 生之孝

道達。 鄭氏曰:「上言『父』『子』『孫』,君臣之道著。尊者守尊,卑者守卑,故讓

此言『兄』『弟』,互相備。」

《釋文》:「臨,如字,徐力鳩反。」告,死必赴,不忘親也。親未絶而列於庶人,告,死必赴,不忘親也。親未絶而列於庶人,五廟之孫,祖廟未毀,雖及庶人,冠、取妻必

道,不以貴賤殊也。 賤無能者,言以其無能,故賤之。睦友之

鄉方矣。《釋文》:「治,直吏反。鄉,許亮反。」古者庶子之官治而邦國有倫,邦國有倫而

之功,不宜與罪惡相連,故於此結也。」之義,長幼之道,各得其倫理也。父子長었之道明,而民皆鄉於禮義之方矣。 孔幼之道明,而民皆鄉於禮義之方矣。 孔幼之道明,而民皆鄉於禮義之方矣。 孔幼之道,是幼之道,各得其倫理也。父子長倫,理也。庶子之官治,則邦國之中父子

無絶也。公族無宮刑,不翦其類也。《釋文》:也。素服居外,不聽樂,私喪之也,骨肉之親弗弔,弗爲服,哭于異姓之廟,爲忝祖,遠之弗氏,此。刑于隱者,不與國人慮兄弟也。公族之罪,雖親,不以犯有司,正術也,所以

「百姓,本或作『異姓』,非。遠,于萬反。」

之法。 也。 於公族者」至此 猶私喪之也。 忝,辱也。 不可以有 術,法也。 不與 所私 國人慮兄弟,不以疏謀親 骨肉之親無絶 體百姓者,言與百姓 翦猶絶也。 也。 爲一 刑于隱,謂 篇, 故雖 ()自 明庶子正公族 以罪死 爲 「庶子之正 刑 于 體,而 也。 而

衆

「昕音欣。養,如字,徐羊尚反,後皆依徐音。」先聖焉。有司卒事反命,始之養也。《釋文》:後天子至,乃命有司行事,興秩節,祭先師、天子視學,大昕鼓徵,所以警衆也。衆至,然

後文所謂「慮之以大」也。 子,天子始適東序養老之處也。此一節, 也。 之。《大胥》「釋菜合舞」,謂此也。 也。 徴學士」。 警猶 鄭 至在辟廱,有司既行釋菜之禮,反命於天 祭先師、先聖者,將有事於學,故釋菜以告 者,視學觀禮耳,非 氏 養,謂養老之處,東序是也。天子初 使有司舉常禮祭先師、先聖,不親 起 日 也。 興猶舉也。 大 《周禮》『凡用樂』,大胥『以 昕 早 昧 爲 爽, 彼報也。」 秩,常也。 擊鼓 以 召 節猶 愚 之,適 衆 謂 也 鼓 祭 禮

口反。」之席位焉。《釋文》:「更,江衡反,蔡作「叟」,音素之席位焉。《釋文》:「更,江衡反,蔡作「叟」,音素適東序,釋奠於先老,遂設三老、五更、群老

父兄養之,示天下之孝弟也。群老無數,五更各一人,皆年老更事致仕者。天子以鄭氏曰:「親奠之者,己所有事也。三老、

以孝養也 適饌省醴,養老之珍具,遂發咏焉。退,脩之 謂:先老,先世之老、更也。三老,以三公 同日也。 節,所謂「愛之以敬」也。○陳氏祥道曰 也。群老則大夫、士之致仕者也。此一 仕者爲之。曰「五更」者,因古者五官之名 致仕者爲之,故曰「三老」。《禮運》 其禮亡。 「天子視學,遂適東序養老,則視學、養老 如賓,五更如介,群老如衆賓必也。」 「三公在朝,三老在學。」五更,以 鄭氏謂『用其明日』,誤矣。」 以《鄉飲酒禮》言之, 則三老席 孤、 Ĕ 卿 致 愚 位

美,若《封人職》所謂「歌舞牲及毛炮之豚」響禮言之也。發咏,謂歌咏其饌具之豐也。養老有饗、食、燕三禮,此有醴齊,據饌曰「適」,醴曰「省」,珍曰「具」,皆互言之饌,籩豆、俎簋之實也。珍,八珍之屬也。

禮 也。 養,言脩此饌具以致其孝養也 I 饌 之 所 了,賓人皆金奏《肆夏》,不歌也。 鄭氏 謂 而退也。 以 樂納老、更,非 脩,治也。 也。 脩之以孝 退,謂 饗、 燕之 自

者也。子、君臣、長幼之道,合德音之致,禮之大反,登歌《清廟》,既歌而語,以成之也。言父

下之義行矣。

升 成之,謂 管、間歌、合樂之後,樂正 也。 司 詩,以《清 乃使工登堂上歌《清廟》之詩也。 老、更人而獻之、群老受獻畢、皆升就 反,自省饌之所而反於堂也。 乃用之,今養老亦 歌《清 正,乃 語,合語也。 廟》, 成 行旅酬,於此 廟》爲最尊,天子祭祀及饗諸 其 以 升 發文王之德,乃道德之音 歌之意 既歌 升 歌《清 時 而 也。 有 告 語 合語 I樂備 廟》,尊老、更 者,升歌及下 致,極 既反然後迎 之禮 作 升歌 致 相 也 也。 爲 侯 之

> 興有德也。正君臣之位,貴賤之等焉,而上 下管《象》,舞《大武》,大合衆以事,達有神, 言之。 之極致。 不相接,以二者皆所以 之道,合於德音之極致也。 。此所謂「行之以 既 歌 而 語 論説 禮」也 發明道德,故合而 父子、君 升歌、合語,事 臣、長 幼

拊琴瑟以詠」,此升歌也,「下管鼗鼓」,此 下 而 笙、間、合」是也。 其聲也。凡樂皆有四節、《鄉 武》而《左傳》即謂之《武》也。 之舞、歌《維清》之詩以奏之,因 之詩爲《象》,亦猶《桓》、《賚》諸詩以奏《大 云:「《維清》,奏《象舞》也。」《象箾》,文王 象》,《詩• 管也; 舞當合樂之節。 「笙鏞 頌 以間」,此間 維 樂之重者,則 《書》云「夏擊鳴 清》之篇也。 歌也,「簫韶 飲 管,以 兼 酒 謂 用 禮》下歌 《詩 《維清 笙管, 球 管播 序 搏

用樂,每節皆三終。此及《明堂位》、《祭 之義行,此所謂「紀之以義」也。 天下既定,而君臣貴賤之分皆正,故上下 《大武》之舞,有武王與周、召之等,是君臣 達有神,興有德者,言文、武治化之神通達 及《大武》之舞,所以象文、武之大合師衆 射》有合樂、《大射》有歌管,而皆無間 者,以其非樂之重者,故略之也。 之第 之位。有諸 文、武之討伐應天順人而非以 於天下,道德之盛,興起 神,以見於治者言。德,以具於身者言。 以行討伐之事也。 也。「舞《大武》」,第四節也。不言「間歌 九 可見矣。大合衆以事者、《象》以奏《象舞》 成 」,此合舞 節 也 侯與士卒之屬,是貴賤之等。 也。 此云「下管《象》」,第二節 上言「登歌《清廟》」,樂 神,如「所存者神」之 而受命,又以 力征 觀《鄉 也。 歌 見

> 見也。 《周頌》篇第已亂,觀《左傳》楚子所言《大 《儀禮》考之,歌、笙同用之詩,其篇皆相 清》、《烈文》、《天作》。 之命》、《維清》。 次。升歌《清廟》三終,當爲《清廟》、《維 武》七章,其次第與今《詩》皆不合,可 三篇,即下管之第一篇,疑其非是。蓋 統》、《仲尼燕居》皆言「升歌《清 象》」,不言「三終」,文略 下管《象》三終,當爲《維 然如此則升歌之第 也。 以《 廟 **学**, 下 詩》 今 天 及

按:「幼」字衍,注疏皆不解此字,是鄭、孔本無此字。 吏曰:「反養老幼于東序。」終之以 有司告以樂闋,王乃命公、侯、伯、子、男及群 禮 諸侯,時朝 此所告者,謂 鄭氏曰:「闋,終也。 ,是終其仁心。」 孔氏曰:「上云『登歌 會 無 在 算樂。 此者。 告君以歌舞之樂終。 命各反養老如此 群吏,鄉、遂之官。 仁也。

以下,以了各引引我还会见。 関」,下即云『王乃命諸侯反養老』,是燕末《清廟》』,次『下管《象》』,此云『告以樂

「免,注作「説」,同音悦。」 「免,注作「説」,同音悦。」 「免,注作「説」,同音悦。」 「免,注作「説」,同音悦。」 「免,注作「説」,同音悦。」 「免,注作「説」,同音悦。」 「免,注作「説」,同音悦。」

之也。 也。 聖人之記事,言聖人養老之事,記之以 慮之以大,慎其始也。終之以仁,慎其終 之,正其席位,是愛之而致其恭敬之心也。 而不敢苟也。愛之以敬者,養老所以愛 始,徵學士,祭聖師,是慮之以重大之心, 後世也。慮,圖也。 喻者,謂敬老之意,曉喻於衆心 引《説 命》者,證養老始終行禮 慮之以大者,養老之 在 而 學 化 傳

至此爲一篇,記天子養老之禮。也。此一節總結前文。〇自「天子視學」

之。嘗饌善,則世子亦能食,嘗饌寡,世子亦 《世子之記》曰:朝夕至于大寢之門外,問於 側皆反。」 之節。食下,問所膳羞。 然後亦復初。朝夕之食上,世子必在視寒煖 告世子,世子色憂,不滿容。 安。」世子乃有喜色。其有不安節,則 内豎曰:「今日安否何如?」内豎曰:「今日 不能飽,以至于復初,然後亦 宰,然後退。 而養,膳宰之饌,必敬視之。疾之藥,必親 朝,直遥反。 旦曰朝,暮曰夕,舊如字。 若内豎言「疾」,則世子親齊玄 必知所 内豎言「 復初。 上,時掌反。齊 進, 《釋文》: 内豎 以 復 初, 命 以 膳

者齊玄,玄冠、玄端也。必敬視之者,疾者憂,憂淺也,不及文王行不能正履。養疾鄭氏曰:「《世子之禮》亡,此存其記。色

一書,世所誦習而常行之者也。」 愚謂:之記」,則古者教世子,其文字禮節必自有王一飯再飯。」 金氏履祥曰:「稱『世子之食,齊、和所欲或異,不能飽,又不及武

以旨甘。」一日再朝者,自命士以上事親之曰:「昧爽而朝,慈以旨甘。日入而夕,慈朝夕至于大寢之門外,日再朝也。《内則》

知所進,以命膳宰者,必知親之所食何物,貌,所謂「笑不至矧,怒不至詈」是也。必達禮也。色憂不滿容,謂不能充滿其容

者,疾時之齊、和嗜好,或與常時不同,尤於養也。玄者,玄端,齊服也。必敬視之命使勿復進也。養疾者必齊,欲專其志慮

履,其憂深。此篇首引文王之事,而復以云「色憂不滿容」,其憂淺,文王行不能正之也。此云日再朝,而文王則日三朝。此當慎察之也。飲食善則多,惡則寡,互言

自盡 雖有 之盡 子之常禮。 是終之,所 而已。 常,而 倫、盡 以 世子之所以事其親者,亦務 性者,其孝爲獨 ○此篇名《世子之記》,言爲 見 世子之常禮 至也。 如 此 然 而 則 文 於 禮

禮記卷二十終

賜進士及第翰林院編 國史館纂脩孫希旦集解

禮運第九之一《别録》屬《通論》。

治天下國家者以告之。 游之問,而爲極言禮之運行,聖人所恃以 行者也。 然,而禮制已自然運行於兩間矣。 然必爲 禮運者,言禮之運行也。 蓋自禮之本於天 而禮制達於天下,此又禮之待聖人而後運 人君者體信達順,然後能則天道,治人情, 地者言之,四時五行,亭毒 周衰禮壞,孔子感之而歎,因子 陳氏澔曰:「疑 流 播、秩然燦

> 然而 又苦怪反。」 文》:「與,音預。蜡,仕嫁反。觀,古亂反。 與三代之英,丘未之逮也,而有志焉。《釋 昔者仲尼與於蜡賓,事畢,出遊於觀之上,喟 曰:「君子何歎?」孔子曰:「大道之行也, 歎。 仲尼之歎,蓋歎魯也。 喟,去位反,❶ 言偃在側

正》:「國索鬼神而祭祀,則以禮屬民 者。 也。 蜡,歲十二月合聚鬼神而索饗之也。 時也。英,才德之秀出者。三代之英,即 觀,所謂「闕黨」者與? 大道之行,謂五帝 酒於序。」與於蜡賓,言與於蜡祭飲酒之賓 及也。孔子言帝王之盛,己不及見,而有 下言禹、湯、文、武、成王、周公是也。 蜡祭在黨之序,夫子出 觀,闕也,門旁築土而高,可登以 於序而 遊 眺 而 ^ 黨 於 望 飲

位」、《釋文》作「媳」。

子游門

人所記。」

禮記卷二十

有門 云: 門有闕 魏 闕, 矣。 注 熊 耳。說詳《月令》。象魏尊嚴,必無登眺之理 氏 志 絰皇」,杜氏注云:「絰皇,冢 如不容,若至象 又祭之,不亦煩乎? 魏之上」, 思 城 一疏謂 得位 氏 日 : 乎 也。 (闕」,是城門 懸法象,使民觀之處、《周 「窒皇,寢門闕。」是寢 《爾雅》「觀謂之闕」,孫炎以 謂 皆有闕,皆得謂之觀 此 「不言魯事,爲 行道,以 「蜡亦祭宗廟,孔子助祭,出遊於象 遊 然 其説 又《左傳》「屨及於窒皇之外」,注 蓋 爲遊 闕 登 實 非是。 高 反 有闕。《左傳》「鬻拳葬於 魏 目」,然孔子人公門,鞠 不 眺 唐 而 惟 望 虞 遊 象 其太切,廣言之。」〇 宗廟,冬已烝祭,蜡 臘祀 三代之治也 有感 目,亦非所以 魏有之。 也。 門 先祖,乃秦 於魯之衰 禮》 有 前 若雉門之 闕。 闕。 爲宫門雙 所 《詩》言 謂 是凡 是 爲 墓 象 制 敬 躬 鄭 而

> 闕, 有闕者不止雉門也 得專闕之名者,正以 之闕,則其 卑等級不同,魯之兩觀,其 觀爲僭禮,則必天子、諸侯雉門之闕,其 侯 同,故爲僭禮 臺門」,是也。 則天子、諸侯皆有之、《禮器》「天子、 制 非 當又加 諸侯 而《公羊傳》又以魯設 卑焉。 其 不 高於餘 · 得 高 有 雉 闕 與天子之制 闕 門之闕, 也 爾,其 餘 實 獨 處 高 兩

睦。 也,不必 棄於地也,不必 廢、疾者皆有所養,男有分,女有歸。 所終,壯有所用,幼有所長,矜、寡、孤、獨 而不作,故外户而 大道之行也,天下爲公,選賢 爲,于僞反。」 ·長,丁丈反。」「矜,古頑反。」「分,扶問反。」「惡,烏故反。」 故人不 爲己。 獨親其親,不獨子其子 是故謀閉 藏於己; 不閉。 是謂 而 力惡 不興,盜 大同。 與 其不 能 (), 講 出 貨惡 竊 《釋文》: 於身 老有 亂 信 其 脩

睦

兄

弟

以以

和

夫婦

以

設制

度,

以

立

田里

爲

固

禮義

以

爲紀。

以正

君

臣

以

篤父子,以

今大道

既隱,天下

爲家、各親其

親,

各子其

子,貨力爲己,大人世及以

爲禮

城郭

溝

以

此,則 賢 和 作,故門户之扉 之風,故 歸者,嫁不失時 世 由 人之所以 有分者,士、農、工、商各安其業也。 説忠信之行。 達於天下也。 大道,言道之廣 於身困 ,惟賢能者則 而不傳子也。 也,平也。 民 圖 無 相圖 窮 謀 不 而 此言五帝之時 足不 閉 脩睦者,脩習親 天下爲公者,天子之位, 俗惡 謀,而至於爲盜 從外 大而 也。 選 寒 選賢與能,諸侯國不 贍之患,而 而 而 薄也。 謀, 闔 不 不 用之也。 興,盜 偏 而 謂 不關 私 今大道之行 相 也 也。 有 竊 啚 睦之事。 講信者 竊 閉 亂 親 謀 行,謂 亂 也。 賊 遜 也。 賊 女有 而 和 同, 傳 男 談 不 如 蓋 傳 睦 通

> 起。 賢勇 力爲己」之下。 起吕反。」〇按「故謀用是作,而兵由 小 義,以考其信,著有過 此六君子者、未有 如有不由此者,在執者去,衆以 康。」《釋文》:「知,音智。 知,以 禹、湯、文、武、成王 功爲 己。 不 故謀 謹於禮者 ,刑仁講 執音世,本亦作『勢』。去 、周公,由此 用是 此起」,此十字當在 讓 作 也。 爲 一示民 殃。 而 其選 以著 兵 有常 是 由 謂 其 貨 此

代以 其節 並。 也。 子曰世,兄弟曰及,謂父傳國於子,無子 家,傳子 傳弟也。 今,謂三 而 不 文度數之詳,至三代而後備耳。言三 五帝之時,未嘗不以 復傳賢,在下者各私 來,大道既微,在上者 紀,條理也。 而不傳賢 代 城郭 以 來 溝 也 池 禮之從 也。 以 爲 隱 大 固 猶 禮 其骨 來 人,諸侯 既 ,設險以 微 義 遠 以 也。 矣,與 治天下,但 肉,各愛其 天下爲家, 天 守其 也 下 天 地 或 則 父 爲

六

禮 記 集 解

及以 者 選者,高 以 聖人之因時立 則聖人之所以治之者不得不詳,故大人 既 作,兵革 睦 貨 也 周公用此禮義以治天下,而爲三代之高出 使之立功於國,以輔助於己 險 言之謂之義,言禮 所言,皆禮義 [言「禮」者,以其文言之謂 () 備設 有亂 勇知者爲賢而登用之也。 力 ,所謂「三代之英」也。 之意衰,不 防篡 ,於是 刑 法也。 賊 禮義 由 出之意。 ",則盜 奪之端 有 此 以爲 無 爲 而 足 政, 著其 起 相 竊不足言矣。 以 紀之事也。 城城 也。 耀,貧富 則 言禹、湯、文、武、成王、 而要以禮義爲本。 條理之密。 相 、義以導其行,考其信 義 維 郭 兵起,即 持,故 在 溝 上言「禮義」而 其 相 池 也。 中 之禮,以 以 賢勇知 競 以 啚 此三者,皆 矣 矣。 功爲 世變既 亂 爲 曲, 謀 而 賊 守國 考,成 由 親 者,謂 己者, 之事 用 此下 其 此 遜 異, 也。 Z 世 理 下 和 IIII

故其 至盛 篇言 也。 大人世 贍矣。 下,而 此 異 以 禮 其 以 度,立田里,則 則 五. 三代之時,風 帝之時 矣。 治 五帝、三王之所以爲 雖各親各子,而恩亦足以 而 性 杜 講 氣象之廣狹稍有 聖人以 小康者,言其稍 其 其 示 必 刑仁 民, 民 欺 而 及,而仍不 舉賢尚 黜 遜 風 此乃以三代之禮義爲小康者,蓋 以常行之道 去之也。 讓 著 雖 講 禮治天下,其體信達順,功 氣 氣 有 在 以 讓 雖貨力爲己,而力亦 功 漸 方厚,而 過 勢位,衆以爲 防 則講 薄 失 而 以 其 而 遜 一乎選 争,凡 不 康,安也。 懲 也。 不同者,非聖人之德 於大同之時 時不同 信脩睦之道 由 其 聖 聖 賢與 禮 苟 罪,法仁 人之治扶 人之治 此 相 者 不由 皆 被 而 殃,禍 介能 則 蓋 矣 所 同歸於治 之意 去 乘 此 也。 亦 足 人 以 恩 八其 衰, 其 以 設 倫 及 以 則 無 則 謹 此 雖 制 厚 於 以 相 無 於 厚

道之行 道之行。 有 所不 ,如堯、舜方是。 足也 各親其親,各子其子,亦不害於 ,時爲之也。 謹於禮 張 一所以 子曰:「大 致大

子矣。 不獨親 至於順達之後,則不獨親其親,不獨子其 大人世及以爲禮,古來 ,不獨子,止是各親各子者恩差狹, 亦有,但道

城郭溝 亦不能 隱之後,雖有子如朱、均,有臣如伊、周者 池爲固,亦是禮義以 行 堯、舜之事,故以世及爲定禮。 爲紀之事,所

然使 以 防 **」堯、舜** 亂 也 承桀、紂之後,亦當禮義 大道 既隱,由 暴 君以 壞之也。 以爲

紀。

也。 馬 氏 以 六君子居堯、舜之世,是亦大同之治 晞 其 孟 襲 曰: 亂,急於禮義,適 「傳子傳賢,皆天之所與, 得 康 耳。

五. 三王 非 人之 帝之 未 時 嘗 所 亦莫不行也。 不 爲 同 也。 也。 老有所終,至廢 以正君臣 孔子傷時之弊,欲 至以 疾 立 有養,  $\mathbb{H}$ 里,

> 復歸於至德之盛,故 言 如 此

言 交反。冠,古亂反。 下『復問』同。 體,人而無禮。 故天下國家可 祭、射、御、冠、昏、朝、聘。 夫禮,必本於天,殺於地 故失之者死,得之者生。 曰:「夫禮,先王以 偃 復問 相,息亮反。 得 朝,直遥反。」 人而無禮 如 而 承天之道,以治人之情 此 正 遄,市專反。 也。」《釋文》:「復,扶又反 乎禮之急也?」孔 ,列於鬼神,達於喪、 ,胡不遄死?』是故 《詩》曰 故聖人以禮示之, 殽,户教反,徐户 二間相 鼠 子 有

鏞 失禮則亡其所以 禮之用所 以立也。治人之情者,示以一 承天之道者,本其自然之秩序,禮之體所 治之,然後天下復安,則可 三代之時,大道既隱,謀作兵起,聖人以 「禮之大原出於天,故 以行也。禮者,人之所恃以生, 生矣。 殽 以 效 見禮之急矣 推 也 定之儀 其 所 自出 應氏 則, 禮

可遺。 鬼神者,所以承天之道。 人道交際,周流上下而無不通。 而 本之。 列於 達於喪、祭、射、御、冠、昏、朝、聘 鬼 效法之謂地,故因其 神,充塞乾 坤,昭 達於天下國家 布 成法 法於天地 森 列 而 而 效 不

者,所以治人之情。」

乾》之義、《夏時》之等,吾以是觀之。《釋文》:故之宋,而不足徵也,吾得《坤乾》焉。《坤杯之徵也,吾得《坤乾》焉。《坤與?」孔子曰:「我欲觀夏道,是故之杞,而與?」孔子曰:「我欲觀夏道,是故之杞,而言偃復問曰:「夫子之極言禮也,可得而聞言偃復問曰:「夫子之極言禮也,可得而聞

之書 生日 其 鄭氏曰:「得《夏時》,得夏四時之書 書存者有《小正》。 愚 謂 也 殷《易》以 子游聞夫子告以禮之急,復欲問 其 書 存者有《歸 坤爲首,故 得《坤乾》,得殷陰陽 藏 >>° \_ 日《坤 熊 乾》。」 氏 也。 安

> 之後。 監以損益者也。 夏、殷之禮也 者如此而已。 杞、宋,但二國文獻不足,無可考證,所得 之,適也。 其詳,而 蓋禮義備於三代,而夏、殷者 夫子以所得於夏、殷者告之也 徴,證 以是觀之者,以是二書 故欲觀夏、殷之禮而之於 也。 杞,夏之後。 宋,殷 而 周 所

同。 苦對反,又苦怪反。桴,音浮。」○胡氏「蕢」,如字。 飲, 蕢桴而土鼓, 猶若可以致其 夫禮之初,始諸飲食,其燔黍捭豚,汙尊而 釋文》:「燔,音煩。 也。 古未 鄭氏曰:「言其物雖質略,有齊敬之心 可 食之耳。 汙,烏華反,一音作『鳥』。 抔,步侯反。 以薦羞於鬼神,鬼神饗德不 抔飲,手掬之也。 蕢讀爲出, 墙也, 謂 有釜、甑,釋米捭肉,加 今北狄 捭,卜麥反,注作『擗』,又作『擘』,皆 猶然。 汙 於燒石之上 尊,鑿 響味 、敬 蕢,依注音出 於鬼神 地 也 爲 則 尊 而 中

及其

死

也

升

屋

而

號

告

日:

『泉

某復

然

之事。」 此 由 獨 之,故禮 在 草爲桴。」 氏 者 鑿 **捭豚者**,捭 者,以水 摶 面 而 一,而飲 子春 池汙下 其物不足而 ,可擊也。」 飲,故曰『抔飲』。 桴,擊鼓之物。 土 以 養人者質略 爲 下 中 土出 桴 至 E : 洮 古 制 食 ·而盛 也。 爲 析 釋 始乎 所以 雖 「土鼓, 愚謂: 禮 桴。 豚 黍米,加於燒 有 之大 誠 酒,故曰『汙尊』。 土 如 此焉。 胡氏銓曰 肉 養 火 一鼓 有餘 此, 加加 土鼓,築土爲 化,未 生,人既生 禮,經緯 築 成一, 以土爲 而 於燒 也 土爲 猶 曰「猶若」者,言 一簣,草 有 皆 可 石之上而 石之上而 匡,以 鼓 釜 是二 萬 以奉祭祀焉 孔 則 也 端, 氏 甑。 鼓。」 有 以手掬之 書 日 革爲 無 也 所 燔之。 熟之。 所 乎 **費**桴 燔 以 孔 「從 不 以 見 非 養 兩 杜 黍 氏

> 知 其 降 後 初。 音智。 飯 知 腥 氣 《釋文》:「號,户 而 首,手又反。 在 苴 上,故 熟,故 死者北 鄉,許 毛反。 天 望 亮 首, 而 飯,扶晚反。 反。 地 生 0 藏 者 鄭 也 注: 南 苴,子餘 苴, 體 皆從 魄 或 反 則 爲

俎。

孔氏 生之禮 此 陽 以天望者,由知氣在上故也 尸 天 設 北 野 陰,故死者北首 而 望,謂 遣 也 也。 行含禮,飯用 面 而 又言及其死而 奠,苞 告天,招 且 日 所 : 後 不足以養人也。 望天 愚謂: 以 息,引聲之辭。 世 裹 地 魂復魄,復魄 而 聖人既變之矣,以 孰 藏者,由體 生米,故曰『飯腥』。 ,歸陰之義。 上言古者養 招 肉 送死之禮如 魂 以 送尸 地 若送死之禮 魄 某,名 藏 ), 故 不復,然後浴 則 生之禮 生者 謂 此 體 降 日 其過 也。 葬 也。 魄 故 南 苴 入地 也 地 至葬 則 鄉,歸 如 然養 孰。 於質 以 升屋 彼 爲 所 藏 雖

六一九

之而不變焉,故曰「皆從其初」。 已,與順夫理之所不可易者,夏、殷之禮因 順乎魂升魄降之宜,此則出乎心之所不容 順乎魂升魄降之宜,此則出乎心之所不容 以盡其事死如生之愛,天望地藏,以 其棺椁衣衾之美有踵事而增者,至於飯腥

助交反。茹、音汝。衣、于既反。」
助交反。茹、音汝。衣、于既反。」
「橧、本又作「増」、又作「曾」、同則登反。樔、本又作「巢」、血、茹其毛。未有麻絲、衣其羽皮。《釋文》:與。未有火化、食草木之實、鳥獸之肉、飲其

鄭氏 者,憎聚其薪 穴於地,地 氏曰:「此論上古之時。營窟者,地 未有 并茹其毛以助飽。」 火化,食腥也。 曰:「寒則累土,暑則聚柴薪居其上。 下 而爲巢。 則營累其土而 此上古之時也。」 陳氏澔曰 茹毛,食鳥獸之肉, 爲 :「未有火 窟 橧 高 孔 巢 則

化,故去毛不盡而并食之也。」

『合亨』同。炙,之石反。酪,音洛。」○范,陳氏作「笵 死,以事鬼神上帝,皆從其朔。《釋文》:「樹,音 爲醴酪。 謝,本亦作『謝』。 後聖有作,然後脩火之利, 臺榭、宫室、牖户。 物。 火化 也。 未盡也。 土以 之火上。 及甒、大。榭,器之所藏也。 鄭氏曰:「作,起也。 **范金**,爲形 土曰型,以金曰鎔,以木曰模,以竹曰 朔亦初也。」 燔,加於火上。 也。 爲陶器也。」 范金,謂鑄作器用。 治其麻絲,以爲布帛。 以爲醴酪、蒸釀之也。 後聖脩之,而器用、宫室、飲食 燔黍捭豚,雖有火化,而 範 炮,薄交反,徐扶交反。亨,普伻反,下 以 陳氏澔曰:「笵字從竹。 鑄 以 金器也。 愚謂: 茹毛飲 炮以 亨,煮之鑊 脩火之利,謂孰治 燔,以亨以 范金,合土,以 合土,謂瓦瓴、甓 合土,和 炮,裹燒之 也。 以養生送 酪,酢截。 血,未有 火之利 炙, 貫 合泥 2. 萬 爲

聖 不 處、飲食、被服,過 衣 資火以 服 者,夏、殷之禮,亦因之而 通其變,而相生相養之道乃盡。皆從其 凡 所 成 以 ^,而\* 養 後火之利 生、 於樸陋 送 死、 盡矣。 ,而不宜於人,後 事 不變也 鬼 神之具,莫 上古之居

夫婦 下。 古雅反。」 反。粢,依注爲『齊』,才細反。 以 磬、鐘、鼓,脩其祝、嘏,以 故玄酒在室,醴、醆在户,粢醍 正 朔 陳其 君 有 所。 臣 犧牲,備其鼎、俎,列 ,以篤父子,以睦兄弟,以齊 是謂承天之祜。 醍,音體。 降 E 《釋文》:「醆,側眼 其琴、瑟、管、 神 在堂,澄 嘏,本或作『假 與 其 E 先 酒在 下, 祖

謂 醴 玄酒 爲 鬯 之醆。 玄酒 配 齊 也 ,鬱鬯也 明 也。 水 醆,盎齊也。 在户者 而 在 設,而 室者,在 水及明水皆謂之玄酒 醴 尊 在 於 户内 盎 室内之北 五. 齊 齊 之東, 醆 盛之以醆 放因 也。 謂 在 鬱 故 户 幽

也。 鼎,大夫尊辟人君之禮也。 下也 上。 以 下也 禮惟有三齊也。 於門外,北 言「泛齊」、「沈齊」者,或文略,或據諸侯之 齊,三曰盎齊,四曰 外之東也。 廟門外陳之也。備其鼎、俎者、、特牲禮 上,牲在獸西。」天子、諸侯省牲之禮,亦於 夕陳鼎於門外」,是也。 次 酒清於五 鼓皆縣之,琴、瑟與管雖未 《周禮 管、磬、鐘、鼓,堂下之樂。 而 陳其 一酒則 南。 尸在室,設酒之法以在 デ<u>·</u> 五 面 犧 旅 五齊所以獻酢,故在室内及堂 齊,故曰「澄酒」。 築醍,醍 棜 牲者, 酬及無算爵之所酌 澄,清也。 在其 齊: 醍齊,五曰沈齊。」此 齊 按《特牲禮 南 也。 《少牢禮》祭 南 日 琴、瑟,堂上之 澄酒,三酒也 泛 順,實默 在 在下,在堂 齊 堂 北 遽入,亦使 列者, 磬 **\*:** 者 故 在 爲 於 陳 在 日 堂 日 陳 其 鼎 堂 醴 上

之辭。 格 以 將 貴 明子 納之也 在 福 慮 君 謂 而 咸 人 謂 I 假 在 廟 死 尸 之地者,實在於未事 於迎尸 者,已於是乎在矣。 事 祭之先,陳 夫婦之位各得其所。 賤,而上下之分齊。 臣 執 之預 之位 祖 事父之道,而父子之恩篤。 門 者 也 而 考, 脩,謂 之精氣 不失其倫,而兄弟之情睦。 則全於臣,故君 ,若《詩 而 ,備物之具,致愛致 殺牲之後,而 正 祝 備 陳 + 齊酒,脩禮樂,省牲 預 謂 列 也。 祭,立尸 倫 稱 脩 響 於 習之以 尸 神 廟 君 蓋 爲 之 門 在 君在 積其 蓋 雖 北 之先。 祜, 迎 辭。 之外 廟門外 神 未 祭 待用 牲 面 保 福 阼,夫人在房, 嘏, 誠 祀 與 慤 而 而 也。 以 之行 神 敬 《易》 事 不 則 也 也 謂 而祭則 群昭 待 交,而 視 之,所 迎 序爵 疑 以 此節言 嘏 及 沪,而 於君 濯 上神 先 所 爲 群 主 時 祖 謂 受 辨 穆 昭 雖 其 將 以 而

鬱鬯、 褅 褅 禘禮 酒 用 時 酒 與 饋 酌 齊。 王備 下三節,備言祭禮 用 盤 大於給 肾用 五. 加加 三酒 祭二齊、 后 食之尊, 泛齊,因 醴 ൬ 同 皆用 饋 Ŧi. 〇孔氏曰:「崔氏云:『《周禮》大祫 明水 齊 盎 爵 不 , 禘與 皆 食 齊、三酒。 各 亦 薦 而 故 一齊 共 有 朝 王 百 用 所 諸 已。」魯及王 有 一禮、盎 一酌 十八 酒。 疏 明 於王 王 獻 踐之尊。 侯 乎 酒。 水 盎 謂 四 之齊。 爲 顒 齊,后 「袷用 尊。」 鄭 朝踐 之配,三酒各加玄酒 時 。」天 賓, ,而受天之祜 若 同。 而 注《司尊 大禘用四齊、三酒 再獻 則 已,四 ,王酌泛齊,后 子 賓長 者之後,大袷 酌 五齊,禘用四 酌 愚謂: 正 侯、伯、子、男給 大 醍 沈 ,后酌 此 酳 袷 7彝》四 時 齊。 齊。 義 尸 用 惟用 ,特於此 先儒 也 , 酢 Ŧi. 朝獻 醍 尸 時 齊、三 齊,因 盎 齊 酢 用 酌 不 故 四四 通 知 王 此

之則 著 諸 泛 饋 以 朝 所 朝 又其 Ш 兩 酢 疏於下方。 之差,及 王氏 大 尊 踐 熟 其 踐 酢 臣 盛 也 一之所 言 尊 也 用 醌 次 ,其饋獻 口 日 説 朝 配玄酒 。」追享,謂大禘。 齊 節 於 四 兩 王 其再 盛 獻 謂 踐」,以 與 也 朝 再獻、饋 時之間 酢 獻尊,其 醴 皆謂 則 「賓 ○《司 后 踐 也。 獻 」,其 用 齊 日 獻尸 罍 而 長 也。 用 兩壺尊,皆有罍 「饋 爵言之則 祀、追 則 獻 朝 秋嘗、冬烝,其 酳 尊 説 再 兩 獻,皆 所 事 盛 尸 獻 獻 亦皆 饋 則 彝》:「春祠、 山 獻 酌 沈 及 享、 獻 尊,皆有 用 日 之尊 齊 P 朝享, 加 非 謂 兩 「再 兩 朝 日 也。 也。 朝享,其朝 爵 尊,一 是。 象尊,皆 饋 獻 及 獻 獻」。 用 熟 兩 以 諸 是天子禘 謂大給也 罍,諸臣 ; 朝 今以 清 用 盛盎 獻 夏禴 尊 籩、豆言 臣 獻 以 酒 二句,臨 齊 有罍 尸 踐 之所 愚 其 用 多 也 其 盛 與 之 用 意 及 小 兩

尊。 以明 之禮 獻 無 袷 所 諸 節 幂八尊」,亦不數明 之,不數明水之尊。 獻皆惟 時祭多少之差,實皆臆説 時祭爲隆殺 猶籩、豆之有八,鼎 堂下之尊至將 ○《特牲禮》加 動 多 皆備 臣 與 用 水,當有 寡之差矣。 獻 饋 ,或略舉而 几 之 泛齊之尊, 后與諸 酌 言「兩 獻 時 尊 之 兩 獻。 醍 尊 也。 祭, 蓋 齊 + 尊 酬賓乃設之,特以 爵三,皆不酌堂下 説 酳 一之尊。 不備 · 尊。 二者, 皆 王 見 但 蓋 尸 有 水也。 獻 於 經、記 俎 王 ^ 即 ^ 後。 惟 Ŧi. 幂 之有 祭 酌 司 説者因 用 尊 司 據 尊 齊 人》云「以 盎 無 朝 臣 所 以 饋 尊 王祭十二獻 所 彝 九,不因 有 齊之尊 據 言 獻 | 彝》不 獻 分盛 獻 酌 》於 以爲 Ŧi. 也。 兩 之尊 -之尊。. 酌醴 以 或 爲 尊 朝 酒 Ŧi. 獻 禘、祫、 據 疏 旅 五齊 殷 齊, 獻 有 者 后 布 酳 齊 侯 與 每 蓋 ? 與 之 言 饋 配 國 則 巾 無 P 王

其北 也。 醴、 其所 設 醍 尊 墉下。」《士虞禮》:「尊于室中北墉下。」《禮器 户之東」、《鄉飲酒禮》「尊于房户之間」,是 尊於户外者,皆在户東、《士昏禮》「尊于房 户 牲》、《少牢》「尊於户東」推之, 用 弟之屬,皆不 算 尊之處 齊在 在 **、東、即《特牲》、《少牢禮》設尊之處。凡** 饋 爵 或傍於楹 醆 阼 )鬯,在北 爲泛齊,當室東壁南 醴齊設於户内之東,直盎齊之北,又 酌 食之醍齊,則爲 之所 在 堂 蓋堂上之罍 户 一,蓋 則沈 也。 用 ,醴在户 在堂上 酌 墉下也。《士昏禮》:「尊于室中北 不 ,或傍於序,事 蓋設 齊設 此 但 尊 不 内,酸 於 尊 尊 東 加 也 以 阼 必 楹之西,當《燕禮 也 爵 獻 階 有所傍,或傍 在 者宜 北之中,又其北 王 尸 上,東傍東 户外。  $\bigcirc$ 祭 當 則盎齊設 即 設尊 一降用 群 然 獻 臣 爾 賓 之處, 以《特 沈 酳 及 序 於 於 尸 兄

設之亦 酒,而 酒 楹 齊南 鬯、 者於門西 作階東,西 於堂下也。 之下,然視三酒爲尊,且 齊、三酒皆在堂下」,非 者西上,南北設者北上,皆統於尸也。 上,公在阼階上,統於公也。 牲》設尊亦西上,統於尸也。 《鄉飲》、《鄉 而 特牲禮》堂下無玄酒、《 西上。 在下」,以 ,沈齊傍於東序,皆南北 Ŧi. 傍於壁,盎 群 齊 必在此。 臣 射禮》設尊西上 泛齊傍於室之東 ,兩方壺」,無玄酒 皆 衆多 方亦 《特 以 澄 明 (如之」。 爲 ,其設 牲 齊 水 但 沈 禮》將酬 北 配 士: 齊, 傍於 《燕禮》設尊於東楹 設 尊 此室中堂上之尊,東西 ,統於賓也。 止 也。 配 酒 人君堂下之酒 燕 多 四 壁,皆 壁 以明水,必不 爲 鬱 尊。 禮 少 賓,「尊 沈齊雖 設之而 一、醍齊傍於東 鬯 不 三酒 》「尊 蓋尊之設 鄭氏 傍 人 《士虞》、《特 東 可 北 考。 君備 兩壺 士 西 爲 北 謂 解 之西 墉 施 設 五 其 於 食 又 于 設 齊 沈 澄 之 醴 設 南

之所用 於堂下 齊 禮 諸 齊; 齊也。 堂下 朝 差 酒。」是薦熟時,夫人獻已用酒。 之,執鐙。」《禮器》、《祭義》、《祭統》 堂下人衆,故使 天子祭用十八尊,鬱鬯、五 夫人薦盎」,無言「泛齊」者,是諸侯 醴酒在室,醍酒在堂。」《祭統》:「執醴授 一尊,三酒自相配爲六尊也。 乃上 踐、 而 侯又無 醍 饋熟,君 者 下之,朝踐 齊 饋 又《禮器》云:「君親 也。 ,以其不用於正禮,故略之。 ,例無玄酒之配,一則玄酒尊,不設 公九 食, 沈齊也。《禮記》所言,多據 一則堂下之尊,但 夫人不 子 獻 獻 · 男五 尸 君獻 之禮 兩 用醍 尊皆酒,所以優之也。 獻,朝 獻 尸 尸,惟 若侯 齊,夫人用酒。 用 踐、饋食,君、夫 醴齊,夫 齊 一爲旅 割牲,夫 伯 用二 配明水爲十 ○《坊記》: 惟 從上 쨈 七獻 齊: 人 無 三則 用 人薦 皆言 醴 無 算 是 泛 則 魯 盎 齊 爵

> 惟 醍 如 雖 **酳尸或進** 人皆不獻尸。 醴之所用最 此 無 齊,夫人 耳 明 用醴 據 齊, 廣,冠、昏皆用 用 但合諸經記 酒。 宜更詳之。 其 酳尸,當 是子 之。 男 所言推之,則 此 與 子男惟用一齊,則 用 侯 上所言, 伯 齊 同 也 或 於 君 五. 禮 用

反。 本又作『鼏』,同莫歷反。衣,於既反。」 嘉 醴、醆以 孰 作其祝號,玄酒以祭,薦其血、毛,腥 其殺, 魂魄。 殽,本或作『肴』,户交反。 獻,薦 與 是謂 其 (越席 合莫。《釋文》: 其燔、炙。 疏 布 越,音活,字書作『趏』。 以 君 幂,衣 「祝,之六反,徐之又 與 夫 人交獻 其 澣 其 帛 俎 以以

號,六 腥 鄭氏曰:《周禮 法於上古也 其俎 鬼號, 曰 謂 幣 豚 號。  $\equiv$ 解 日 孰其 而 號 祇 祝 腥之,及 者,所 殺 號 號 謂 有六"『一 四 體 以 曰 血、毛 解 尊 牲 而 神 號 爓之。 ,皆所 方. 顯 日 神 物 日 也 以 齍 此

禮自饋 於俎 句皆尸 某, 越 湯 毛者、 以 未 毛、 也。 也。 以 句 雖 幂 ',皆尸 祭,謂 未入 席,結草 爓骨 有饌 未 下 覆尊 剛 莫,虚 以 設 少牢禮》: 初 某 鬣、嘉薦、普淖,用薦歲事于皇祖 食始, 具,則 體 時 初 進 饌 所 出 殺 也 用 妃 祝 之。 入在 在 牲 法 爲席,若《司 鬱 而 無 配 進之。 祭初即 堂行 其 作 澣 於 時 某 鬯 亦 也 殺, 室 帛 響神之辭未知如 祝 牲、幣之嘉號 取 灌 中 預 氏 時 朝獻之時 骨體 舉 血 地 此與下「醴、 古 也。 練 設饌饗神。 曰:『孝孫某,敢 毛毛 之以 愚謂 以 尚饗 染以 也 降 也。 几筵》「莞筵」 腥 以告殺 神 爲 !」」大夫、士 其 爲 越 也 孰 作其祝 也。 祝 俎 祭服 , 告 神 而 席 酸以 其 與? 以 越,結 也。 何。 人君 殺 薦 翦 腥 謂 獻 其 號 嘉 蒲 此二 祭始 意者 肉 玄 用 饗 血 也 也 蒲 以 盛 酒 祭 伯 柔 之 謂

尊,以 者,所 醴、醆、 燔從 者,朝 禮 筵 報 者 燔 以 皆 鼎 至 而 所言專 烯肉 魄 朝 也。 ,「賓長 凍絲 者。 以 ,故并而言之。 與上下 一之屬 氣歆神者,所 踐 ,合陰陽以求之,足以通合乎冥莫之 以嘉魄 踐 畫 燔、炙之屬 嘉,善善 屬 所 而 時 彼 布 也 周 以 織 所言朝 行之禮 於朝踐 炙,炙肝 君 市幂六彝。」澣帛者,祭 謂 禮 之也。 肝從」,主 也。 獻 疏 酳 也 用 尸 布 幂 乃 踐之禮,並 以 醴 者 · 可 血 從獻,此 曰「與其」者, 魂 此三事非惟 廳 也。 人》:「以 嘉 腥之屬,不可 齊,夫人 不 所 氣 以 婦 布 魂 司 因 《特牲 飲 爲 也 獻 也。 也。 於 食 陽 尸 則 古 人獻用 疏 幂 因 朝 此節言祭 而 一禮》主 體 醴、 初 施 所 於 布 長 明與 踐 以 魄 者, 以 盎 於 服 醛 中 巾 時 味 兄 以 爲 飲 齊 朝 用 古之 幂 弟 人 以 E 報 從 覆 陰 踐 也 食 初 獻 獻 尊 以

天,有 也。 矣。 故 有 殽 豚 肩、 篇葬奠,羊左胖 喪禮》: 飫 之尚。」 藁鞂爲祭天席, 非 中 豚 解、體 。』腥其 或 也。」 體 有 也 也。 謂 解』也 髀 解 房 房香,親 語 疏 體 而 布,説 W E 『特 理乎? 解 解。 爲 無 俎 下 孔 而 四, 體 豚 豚 謂 皆言祭宗 氏 若夫吉祭,❶ 『郊禘之事 熟之爲 見《禮器》。 戚 解 解 以 禮 又 豚 四 燕飲 亦如之。 也 《郊特 越 運 兩 以 解 鬄 席、 胉 \* 而 去去 有殺 其 二 十 廟 殽 曰:『腥其 腥 性》: 則 無 疏 則 之事 蹄, 晋, 之爲 四 脊 則 晉。』全晉, 有全晉,王 布 朝 浦 陳 體 天 骨 而 鬄 兩 爲 此 踐 「蒲 越 七 氏 子、諸 爲 者 折 脏,脊。』下 祭天之禮 非祭 獻 體。 祥 乃忽言祭 俎, 了, 殊 也。 越、 大夫、士 腥之禮 道 熟其 熟 侯 所 左 豚 公立 藁 天 日 ^ 其 右 + 席 鞂 有 謂 解

> 祥。 然後 籩、 豆 此 退 鉶 禮 而 羹、祝 合亨, 之大 成 以 體 孝 其 也。」《釋文》: 告, 犬 豕 嘏 牛 以 羊 慈 「鈃,又作 告。 實 其 是 簠 大

音刑。」

惟右 也。 鄭 則 亨熟之也。 其殽,雖爓之而實未熟,且其薦於尸俎 祝以孝告,嘏以慈告,各首其義 牛 其骨之貴賤,其 合亨者,合左右 豆 羊,謂 以 氏 朝 胖十 爲主人、主 今世之食,於人道爲善也。」 日 踐 : 時 「此謂 分 別骨 已有 體 體 其 而 薦今世之食 '', 此 婦 體 右 肉之貴賤,以 犬豕牛羊者,既熟乃 已,至此乃合牲之左 及 而 胖 則謂 助祭者之俎 亨之也。 仍 升之尸 饋食之籩、豆,及 也。 俎 爲 朝 也 體 衆 也。 其 踐 愚 其 祥,善 俎 時, 右 謂 左 體 也。 胖 孰 豕 别 體

❶「吉」,陳祥道《禮書》作「正」,是。

禮 也。 然 未 孝告,即上「作其 畢 於鬼神。 而 盡 故又本上而言之也。此節言饋食以後之 此又言之者,以尸之嘏所以答主人之孝, 疆于女孝孫」,而致其慈愛之意也。祝以 人之辭也。 羹之有芼者,盛 此兼有稻粱者,諸侯以上之禮 加 特性禮》黍稷二敦,《少牢禮》黍 愛也。 備 後皇尸 備,體嚴而情未洽,足以 ,則祝傳神意以 籩 ,所因於近世者,蓋 祝,謂饗神之祝辭 ,故曰「大祥」。 加 豆之等 醉 至饋食而盡飲食之道以事鬼神, 至主人 祭初饗神,祝辭以主人之孝告 飽 ,神惠周 也 以 祝號」之事,在於祭初。 嘏主人,言「承致多 鉶 祥,善也。 簠盛 器,亦饋食時 朝踐之時 ,, 而 浹,祭之情文,至是 也。 稻 主 盡敬,而未足以 梁,簋 嘏,謂 人事尸之事 也。 禮之大成 禮質 稷 盛 尸 之所 鉶 四 黍 福無 嘏 而 羹 敦 稷 物 主 薦

> 而灌。 言 牲,乃言后灌,頗失次第,今據《司 之、啐之、奠之」,非是。 之,非是。 所謂「奏無射」者是。 東面」以下,疏於饋食尸入室時乃言之,蓋以《郊特 室,大祖東面 之,王不出 天子十二獻,后灌後,當有賓長灌 后從灌 人,奏《肆夏》,見《大司樂》。 入室,無不坐也。 言「奠斝、角,拜妥尸」,❶故疑尸初入未坐耳。 日,王被衮而入,尸 祭禮 説見於下。 ○愚按:灌爵,尸 二獻 於 今不取 此 迎。《祭統》云:「君 也。 獻皆用樂,王 一,昭南 而 説詳 今移於此。 成 疏以《大司樂》「黄鐘爲宮」一段當 愚按: 説見《郊特牲》。 也。 亦飲之,鄭注《小宰》,謂 《郊特牲 亦被衮而 面 穆 若降神之樂,疑《大司 疏據《内宰》注 作樂降神,愚按: 北 孔 一乃出 尊彝 獻 面 下; 乃 氏 不迎尸。」尸人 入,祝在後 》賈疏 灌 迎牲, 是一獻 朝 愚按:「大祖 一,衆尸 獻、 : 先言王 更 不知尸既 正。 祭 人至 戸 依 獻 也 之 侑 祭 尸 又 迎

)「奠」、「拜」、《禮記注疏・郊特牲》作「舉」、「韶」。

洗肝 愚按: 次 説,而經傳未有見焉,未知古有此禮否? 祭」之説,鄭注《禮器》及《郊特牲》皆言之,乃據漢禮 炭,入以詔神於室,又出以制 者爲昭, 昭 於户 事 朝事,延尸於户外,有 然告於室,正是告於尸,此疏爲是。 於室。」此言 和。」《逸禮》云:「毀廟之主,昭共一牢,穆共一牢。」〇愚 庭、《禮器》云:「納牲詔 於室。」廟各别牲,故《公羊傳》云:「周公白牡,魯公騂 南總而 乃升牲首於室中北 ,尸出於堂。 上節「薦其血、毛」,疏云:「延尸在堂,祝以血、毛告 而 於鬱鬯 昭宜在西,穆宜在東,蓋鬼神之位尊西。 尸在室, 西,南面,其主在右,昭在東,穆在西。 嚮陰者 穆北嚮,尸在堂,昭東嚮而穆西嚮,皆以嚮陽 以 血 血、毛告於室。 爲穆。 而 毛告於室」,在尸未出之前,與 燔之,謂之制 鄭注《祭統》云:「天子、諸侯之祭 北面事尸之禮。」大祖之尸坐 祝乃取 於庭。」王親 墉下,后薦朝事之 牲 《禮器 於是行朝踐之 膟膋,燎於 於主前,王 祭。 執 尝云 説見《禮器 鸞 愚按: 「血、毛 刀啟其 彼異 制 乃 爐 爲 犅 詔

問 是取 毛,即 以獻尸,四 獻之豆、籩,王乃以玉爵 入室,舉此奠斝。 上之饌於室内坐前,祝以 之祭,其尊則大尊、山尊也。 秋嘗冬烝之尊。 踐酌著尊,饋獻酌壺尊」,蓋據大袷在秋,故用 玉爵酌泛齊以獻尸,三獻 在王獻尸之後,后獻尸之前,而 又按:朝踐中又有薦爓 云:「薦 之言,故謂 《禮運》云「薦其血 《郊特牲》注:「天子奠斝,諸侯奠角。」時尸未入,於 豆、籩,乃薦腥於尸主之前 注 血、毛 腸 ,以此前 血 間 「薦 腥 韶於室。 脂,焫 者,謂腥 獻 腥 爲接祭。 不知《司尊彝》追享、朝享乃大禘、大祫 時 也。 、毛,腥其俎」是也。 又薦 疏家因《司尊彝》注有 蕭 肉帶 ,即《禮運》所云「熟其殺」。 於是行饋 主人拜以妥尸,后薦 其説無據,今不取。 合羶 血 血 后又以玉爵酌 耳。 酌 然 薌 此 也。 斝 血、毛不當再 盎 疏不言。 愚 説又見 酌奠於饌南 熟之禮,徙 謂 齊以獻尸,五 ○愚按: 按: 愚按: 之朝 郊 疏據《曾 「薦 乃 王 ~司 疏 薦其 踐 薦。 特 血 迎 乃 醴 謂 尊 牲 腥 彝 以 血 P 齊 朝 當 鄭 即

卑,不 於朝踐、 謂 尸自酳尸始,故尸亦至是始酢主人。若天子十二獻 先言王 貫串,又參以鄭氏之説,雖其詳 瑶 於時王可 酳尸始酢主人也。 也。 獻 侯,於是后乃以 主人」,蓋據《特牲禮》而言。 今易以 疏言「王酌 王 》、《禮記》之中者,尚存涯 、朝獻、饋獻,主人主婦及賓皆獻尸,則皆有酢,不 之加爵 爵 以 也 玉爵 酌 於是尸食十五 「盎齊」,説已見前。 止三也。」天子、諸侯祭禮既亡,其見 一饋獻已依次而言,此又自亂其例,今更之。 芦,乃 醍 后 泛齊酳尸」,乃據用 以 酌 齊 又 《特牲》三加爵 言 盎 以 瑶 以 后薦 齊以 爵 獻尸,爲九獻。九獻之後, 玉 主人受嘏,時王 瑶 獻 豆、籩。 爵 爵 卿也。 酳尸,七獻也。 飯訖,后 ] 酌醍 酌 略,然散 ○又按: 疏於此下言「尸 然獻必有酢、特牲禮 醍 《司尊彝》注,其説非 《祭禮》皆先薦後獻 不可 齊酳尸 齊 諸侯爲賓者,以 ,天子以下依 而無紀。 盡考, 乃薦加豆、籩 以 獻 可 而其 尸 爲 以 疏家採 愚按: 始 獻 於 六 末 獻 爲 是 尊 諸 獻 獻 又 俟 灌 酢 疏 疏 規 合

者也。 正 獻 獻 客之饗,其 等諸侯宗廟之獻數者。 王之饗禮,而王於諸侯之長加隆焉 長,其饗禮必不踰於王,則十有二獻者,必 上,又有十 無隆殺,必不然也。 獻 殺 禮之所遵用而 天子九獻 模已具 베 七獻」,子男「五獻」,此先儒 響禮, 者 ,則其祭宗廟亦必十有二獻矣。 ,侯伯七獻,上公九獻。 以 獻,后亞之,諸侯爲賓者又亞之也。 灌 兩、凡禮皆然。 於此。 《大行人》上公「饗禮九 獻 則 ,此先儒相承之舊説,而 朝 但 獻 諸 有二獻之禮矣。 其中 數 侯 獻、 不易者也 長 舛 相準。 饋 誤頗 + 獻 《掌客》:「王合 士大夫三獻,子 有二獻。」是 多,今略爲考訂如上。 所 王之饗禮 是宗 然自上以下, 尸皆三 而天子與 王於諸 所 廟 據 獻 之 獻,王 九 歷代 + 響 以 而 獻 有一 有 侯 用 侯 諸 £ 男 與 推 伯 之 之 侯 Ŧi. Ŧi.

所降殺 爲 亦未 伯 獻 言「諸臣之所酢」,則受酢者非一人,必獻 姓 者 牲 陰 Ŧi. 獻,又各殺其一,以 一,以降於天子也。侯伯七獻,於朝獻、 司尊 一等諸 也。 達 者非一人,而 加 \*\ \( \lambda 於朝獻 諸 ,必備二灌 於淵 嘗 上公九獻,於灌獻、朝獻、饋獻各殺 爵 侯 之正 少牢 彝》云:「皆有罍,諸臣之所酢 有 也。 然朝獻、饋 , 則 天子 自 灌 獻 至 醑 尸 , 亦 以 同 、 異 侯皆二,至酳尸三獻,則 相 泉,此周 所 間 饋 也。 · 禮 》 《特牲禮》賓長酳尸,長兄弟首 殺焉,何也? 而 獻,又各殺其一,以 獻,每 酳尸皆三獻, 其不 而自饋食以後,皇尸醉飽 諸 、人之所尚也,故諸侯之 獻 臣不 降於上公也。 遞有降殺,而 及乎此 獻 惟 則 蓋灌 酳 尸 者,皆禮 尸一獻 必 是 用鬱鬯,臭 雖大夫、士 **一**酢之。 每 子男 獻 灌 降 也。 亦 之 必 獻 於 侯 五 饋 其 明 故 有 則

同。

契,息列反。」

者宾及大夫、七一節也。 所謂「禮之大成」者,不可得而略,故天又

契也。 之,吾舍魯何適矣? 孔子曰:「於呼哀哉! 侯祭社稷。《釋文》:「於,音鳥。舍,音捨,下「舍禮 周公其衰矣。 諸 侯 是天子之事守也。 及大夫、士一節 杞之郊 也,禹也。 魯之郊、禘,非 也 吾觀周道 故天子祭天地,諸 宋之 幽、 郊 禮 厲 也, 也

之所 也。 郊,祭天於南郊也。 夏、殷之道言「欲觀」,周道直云「觀」者, 之後,故王命之郊,以守其先世之事,非 追祭始祖之所自出於大廟,而 夏、殷爲前代之制 將言周道而先發歎辭者,以周之衰也。 公之後,猶 得擬也。 魯之郊、禘,僭 秉 周 周道 禮 而周 故 壞於 天子 禘,王者宗廟之大祭, 觀 道 禮 幽、厲,而 也 乃 者舍魯則 時 杞、宋,天 以 王之法 始祖配之 魯 爲 無 也。 於 子 周 所

禮也。 之適 得 游而 則成王 敦,祝、宗、卜、史,備物典册,官司、彝器。』 殷民六族,以 以大路、大旂,夏后氏之璜,封父之繁弱, 作《頌》,以郊爲夸焉。 雖 魯公止之。」然《外紀》之説,又本於《吕氏春秋》。 曰 子之禮樂哉? 矣,然皆臣子之分所當爲,魯安得獨用 『周公相王室以尹天下,於周爲睦,分魯公 家僭《雍》徹,故仲尼譏之。」 請之,而魯郊猶未率以爲常也。 :「魯之郊、禘,惠公請之也。 用郊、禘,兼四代服、器、官,祝鮀不應不 「魯惠公使宰讓請郊、廟之禮於天子,王使史角往 發歎也。 而 其因襲之弊,遂使季氏僭八佾,三 命魯,不過如 其 僭 昭周公之德。 竊 成王之賜,伯禽之受,皆非 〇程子曰:「周公之功 又 如 此 此。 按衛祝鮀之言曰: 此 如記禮之言,● 孔子之所 予之土田、陪 陳氏傅 劉恕 僖公始 外 惠公 古 以 紀 良 天 大 出

> 數於衆 人並 甯武子何以致譏於《湛露》、《彤弓》? 於 壞失,所以 言,則承魯之所自託者,而遂傳以爲實也。 言出於成王之賜。 自惠公之請」者爲實。 以理言則程子之言爲 禘之説,當從劉恕。」 以見魯僭未 及, 況魯行天子之禮 ○自此以下至「是謂 無 仲? 語及於成王之賜以 申明 久。 周 發歎之意。 公閲 有識者皆疑 《明堂位》、《祭統》之所 疵 何 久 盡,以事言則謂「出 愚謂: 國」,歷言當時禮之 蓋 矣, 以 魯 辭 隱 既 怪遜謝, 備 自解,故郊 公何 魯僭郊、禘, 僭禮 物之享? 以 前 加 問 魯 羽

假,舊如字,鄭云:「大也。」陳氏澔曰:「假,亦當作嘏,猶上說,藏於宗、祝、巫、史,非禮也,是謂幽國。祝、嘏莫敢易其常古,是謂大假。祝、嘏辭

<sup>■「</sup>記禮」,四庫本陳氏《春秋後傳》作「明堂位」。

爲之,而又俾私其藏,不爲隨之矯舉,則爲 曰『宣』。 國,言其國之典禮幽暗不明也。 法,祝、史莫敢變易。 常古、舊法也。 史之所私藏,若漢世祕祝之類是 不實,必有不可聞於人者,故爲宗、祝、巫、 嘏之辭説,變易常禮,媚禱以求福,矯舉而 鬼神用饗,大福自降之矣。 之君,祭祀不祈,薦信不愧,故祝、嘏之常 :「祭祀之辭説,未嘗不使人知之也,故 祝、嘏辭説,苟欲聽宗、祝、巫、史 假,當作「嘏」,福也。 如此 則雖不求 人君無德,祝、 也。 應氏 小福,而 有德 鏞 出出

漢之祕祝矣。」

者之後得用之,其餘諸侯用時王之器而鄭氏曰:「醆、斝,先王之爵也。 唯魯與王

禮記卷二十

禮畢 禮 己。 名 之僭禮也。 玉琖仍雕,猶不用斝。 尸,唯用當代之爵,其酌奠又以角。 尸獻以爵, 天子酳尸獻以爵也。 亦如之。」注謂 酸,殷曰 日酸 , 尸人於室, 祝酌奠亦以 僭 内宰》:「大祭祀、后裸、獻 酒, 斝 則朝 ·, 周 僭 尸 則天子饋 禮 ,君,猶《詩》言「公尸」也。 「后酳尸爵,以 E 踐獻以斝矣。 之君 爵。 天子饋食獻以醆,酳 食獻 也 盎 酸、斝及尸君,諸 齊,饋 以 堂上行 斝。 瑶 愚 醆 食 則 爲飾 謂 也。 所 贊 諸侯 夏 魯 朝 瑶 ^ 周 此 用 獻 則 而 踐  $\mathbf{H}$ 

冕弁、兵革藏於私家 冕 授人。 自大夫世官, 兵掌於司兵,革掌於司 弁冕,卿 弁藏 於私家矣。 大夫之尊 ,非禮也,是謂脅君 服,君爵 自大夫藏甲 而爵命不出於君, 甲, 有軍 命之乃 ·,而兵革 事則出 得 服 則 以

上二節,言當時諸侯之壞禮

於 不 得 私 家 伸 矣。 也 脅 君 謂 君被刼 脅, 制 於臣 而

謂亂國。 大夫具官,祭器不假,聲樂皆具,非禮也,是

具官者 夫。 是諸 賈 也。」 宗伯》「四命受器」,是也。三命大夫,祭器 設之也。 諸 天子有六卿,諸侯立三卿以兼六卿之事 空者,諸侯猶 兼數事。」 鄭 士 疏 氏 ,見《少牢禮 侯之有三也。 若大夫,則家臣之長惟宰,而不得 侯已兼官矣。 云: 曰 朱子曰:「大夫不得 謂放諸 司 「臣之奢富, 四命之孤 愚謂:《少牢禮》「司士擊 士乃 兼官、大夫職 而不得 侯三卿、 宰之下有宗人、司馬、司 司馬之屬,擊 然諸侯有三卿,有五大 ,得備祭器、《周禮 擬 於 國 如諸侯之有 五大夫之制 職 具官, 君 相 り、敗 兼 豕 不 也 亂 五. 」。」蓋 人常 豕」, 使 之國 · 大 而 也。 如 司 備

> 樂之八音皆具 造 之法紀紊 音不得具,則大夫可 八音闕其二。 而 不 備, 亂 必 也 假 大射乃諸 也 而 後 《大射禮 知也。 足 也 侯用樂之輕者,八 》無柷 亂國,謂 聲 樂 皆 敔 具 及塤 或 謂

居 新有昏者,期不使。 故仕於公曰 期,居其反。」「朝,直遥反。」 齊齒,非禮 臣, 仕於家 也。 是謂 以衰裳入朝,與家僕 君 日僕。 與臣 同 三年之喪, 國。 《釋文》: 雜 與

是矣。 臣,而 家 方氏慤曰:「臣者,對君之稱 與士齒。』齊齒者,與之等夷而齒列 臣」、『輿臣』之類是矣。 可 可不辨。 日 謂之僕,若《周官》『戎僕』、『齊僕』之類 一僕,而 諸 僕亦可謂 侯 《王制》曰:『仕於家者 稱君。 大夫稱主。 之臣,若《左氏》所 僕者,對主之稱,故 然通 名雖 i',故仕 而言之,臣 可 通 一, 出 前 也。 於公 謂 位 仕 不 皂 不 於 亦

年得出 至於 蓋 者,言其上替下 之相雜而 期年也。 不 禮 不 與 愚 故」者,承上文而言也。 君 ·使之以 家 也。 復 謂 被刼脅,國法紊亂 致 E 臣 仕 貴 失 事 以 使 T, 故以 事 於 處,而齊同齒列也。 大夫强 衰裳入朝 者 操 戡 也。 公曰臣, 仕於 殊 柄, 權 也。 陵, 喪服 也。 蓋喪不貳事者 則陪臣 而 者,大夫 下移 期不 而 期年之内 人 政柄 ,則其勢之所極,必 於朝 尊,故 · 使, 於臣,故 此上三節,言當 家 不出於 擅 謂 日 而 君與臣 朝廷之臣 ",無出 治 或 期年之内, 僕,言公臣 ,禮也。期 事 政 發端 不不 使之 居 同 也 言 國 與 待 喪

孫,大夫有采以 故天子有田以處其子孫,諸侯有國以處其子 處其子孫,是 謂 制 度

時大夫之僭禮。

 $\mathbb{H}$ 謂 九 州 之田 天子 有田 以 處其子孫

> 乎在 口 可 度之一定者也。 子孫,其子孫受之以爲大夫。 與大夫同 處其子孫,其子孫受之以爲庶士。 其子孫受之以爲諸侯。 與 與天子同天下。 諸 上者謹守制 侯同 家。 國。 而 故自天子之田 欲 自大夫之家而 度而 自諸侯之國 在下者之遵制度,尤 不失。 諸侯 言此 大夫 有 别 而 而 或 者 别者,不 别者,不 以 此 有 以 不不 申上 乃 采 處 在 可 制 以 其

文之義 而起下 節 也

是謂 故天子適諸侯,必舍其祖 之家,是謂 天子壞法亂紀。 諸侯 謔。 廟 非問 前 疾弔 不 以 喪,而人 禮 籍

諸

臣

君臣

爲

惡。 飭 鄭 也。 氏曰:「以禮籍人,謂 天子 無 故 雖尊,舍人宗廟 而 相之, 是 戲 大史執簡記,奉諱 猶有 謔 也。」 敬 焉 愚 自 謂 拱

天子不謹 於禮 而 壞 法 亂 紀 則 無 以 責 諸

侯。 大 夫。 諸 此又承 侯 而 不 禮之壞 謹 於禮 上文而言天子、諸 失所 而 君 臣 來 爲 也。 謔 則 侯 不 無 能 以 治 謹

守

制

度,

由

是故 鬼神 文》:「儐,必刃反。 事之細 執 禮 貴 宫室、車 屬 以 事 或 柄 賤 之淆 者, 考制 禮 别 禮 猶 禮 禮 以 辨 者, 而 日 以 匠 所 矣。 治 小, 雜 用 儐 旗 儐 度 人 執 君 國 之, 禮 禮 之大柄 執 ,别仁義 而 以 仁主 治,皇如字,徐直吏反。」 衣服 鬼 則 接之,而 以 以 而 斧 治 神者, 政治 别之,而 斤之柄 刑 明之,而 物 於慈 之等 賞 也。 者 ,所 而 天 也 愛,義 出 黜 君 以 禮 以 所 地、社 明 嫌 微者著矣。 安也。 陟 治政 治 以 以 者辨 通 人君 當 主 考 别 器 矣。 矣。 安君 稷、 於 而 矣。 嫌 也 執 此又承 斷 明 正 制 故 Ш 禮 也 之, 微者, 制 嫌 微 度 接 111 以 人 者 者 賓 上 而 之 治 儐 君 以

> 列。 故 竊 民 弗 政 文 禮 而 歸 刑 不 言 無 肅 正 也。 列 則 爲 而 國 俗 君 是 則 之必 敝 位 謂 士 危 則 疵 不 以禮 法 國。 事 君 無 也 位 也 《釋 常 危 文 》: 刑 則 法 肅 大 無 倍 而 臣 常 俗 倍 步

而

禮

無

小

臣

敝

則

内

反。

敝,音弊,本亦

作「弊」。」

肅 政 治 鄭 民 出 君 上 柄 肅 是也。 於下 則 志不 失而無 政安君。 験 ,若魯陽虎之專 氏 風 日 俗又敝, 也。 非 定,故 而 徒 大臣 以 人心 疵 君 又 禮 自 與 爲 上下 安其 則舊 既 失 不服, 病 臣 言 倍 故 也。 政 同 身也。 乖 其君 政 政 法不足以 而 故 或 離 不 失 人 矣,若 督 正 愚 而 君 則 季 倍, 以 而 謂 俗 危 桓 小 威 防姦,而 君 敝 魯 謂 之 子 臣 禮 嚴 位 季 悖 是 亦 禍 危 者 而 刑 盜 氏 逆 也 敗 謂 所 刑 罰 之 至 竊 而 也 肅 以 於 既 政 逐 犯 操 或

六二

輔禮。本以無禮而至於法無常,而法無常,而已。 本以無禮而至於法無常,而法無常則是離心,故怨畔而弗歸。此節又承上文則民離心,故怨畔而弗歸。此節又承上文則民離心,故怨畔而弗歸。此節又承上文而言治國無禮,則非獨君危於上,而其疵而言治國無禮,則非獨君危於上,而其經則禮益無列,蓋其彼此相因之勢然也。上輔禮。本以無禮而至於法無常,而法無常

更張

而

無

陳列也。法者,

所

禮記卷二十一終

## 禮記卷二十二

或 賜 進 館 士 纂修 及 第 孫 翰 希 林 院 旦集解 編 修

## 禮運第九之二

祖 於天, 殺以 故 祀之謂制度。 之神。 一廟之謂 政者,君之所以藏身也。是故夫政,必本 於地 指 殽 藏 猶託 其形體謂之地。 ,效也。 而 《左傳》「社稷五祀,是尊是奉」、《大 降者也。下三句放此。 仁義、降於山 也。 降 命,謂政 命。 此聖人所以藏身之固 藏身,謂身之所託以安 命 降 令也。 命降於社,謂政令之本 川之謂 于社之謂 指其神謂之社, 興 作,降 五祀,五行 殽 也 地 於五 降 也 于

> JII. 廟。 也。 物, 安固而不可危 如 飲食爲五味。 播於音律爲五聲,發於文章爲五色,散於 爲五方,行於四時爲五德,稟於人爲五常 鬼神體物不遺, 宗伯》以 承天道之意 制度出於五 而已矣。 此,此所以 `五行之流播,則其性情功效之尤顯者 自仁率親,自義率祖,故仁義 山川 五行者,見象於天爲 禮 血 者,人之所取 祀。 祭祭 必本於天, 殺於地 政 是天下之制度莫不本之,故 也。 無 而祖廟之降格,山 聖人之爲政,其所效法者 五祀 不治,而所以託 〇此 」,是也 材,故 下二節,申言聖人 五星,分位 興 列於鬼神 蓋政者 作 其身者 出 出 川之生 於地 於祖 於 禮 Ш

其所存,禮之序也。玩其所樂,民之治也。故聖人參於天地,並於鬼神,以治政也。處

故 川 釋文》: 天 生 君 「樂、音岳、又音洛、又五孝反。 以 時 IE. 而 用 地 之,故 生 財,人,其父生 君者立 一於無 治也,直吏反。」 過 而 之地 師 教之。 也

治 也。 兼 玩之,而 之,而率履 之道,具於吾身,是聖人之所存也,有 樂,如《孟子》「君子樂之」之樂。天地鬼神 地 參於天地,並 合其德,與鬼神合其吉凶,然後禮序而 川 神之道,見於政治,是聖人之所樂也,有 地」,「質諸鬼神」之意。 時, ,兼是四者而使之各得其正者,君之責 鬼神而 也 故君必 地生貨 鼓 參擬之,比並之,以求其 不 舞 正身立於無過之地,而 越,則禮無不序矣。 於鬼神,猶《中 財,父生,師 不 倦,則民 言聖人效法於天 無不治矣。 教,四者各 庸》言「建諸 天 與 (合也。 不相 天 地 天 以 牛 以 民 地 鬼 處 天

故君者所明也,非明人者也。君者所養也,

患其 以自 故百 皆同。」〇明,舊讀. 君 非 明 養人者也。 生。《釋文》: 顯 姓 人 也。 則君 則 有 故禮 以 過 君者 自治 如 養 字。 「養,羊尚反,又如字。 達 人則 而分定,故人皆愛其死 所 也,養君以 陳氏 事 沿 治云: 也,非 不 ·足,事 「三『明』字皆當 事 自安 人者 分,扶問 人 (也,事 則 也 失 反,後 位 君 故 而

則。」今從之。

役人。 養、所 死 所養,謂食於人。養人,謂食人。 所則,爲人所取法也。 治人情之意 而 皆知尊君親上,愛其死 者,民之分也。 也。 死 ,則死賢於生。 事者、君之分也。則君、養 事人,謂 ○自此以下 禮由分出,分以禮顯,故 役於 至「舍禮 人人也。 違 而 則人,取法於人 禮 患其生。 而 何 爲人 生 以 一, 則 哉」,申 君、 所 所 蓋合 生 則 事 事 不 謂 也 如 禮 所 明 君

故用人之知,去其詐。用人之勇,去其怒。

反,後皆同。」用人之仁,去其貪。《釋文》:「知,音智。」「去,羌吕

是 得 仁 能 惟 質之偏 知 偏。 去其 禮達 者易 剛 而 硬 能 底人。」 分定, 仁善底人便有貪便宜意思 去其貪也。 詐,用人之勇 ,而全其德性之美。 於 詐, 而 勇 民 者 知 易 而能去其怒,用 嚮 朱子 於怒,仁者 方,則有 İ 故用 :「人之 人之 以 易 廉 去 於 性 人之 其 介多 知 易 而 氣

禍

矣。

之變。 從之。 故 國 有 《釋文》:「變,音辨,出 患 君死社 稷 謂 之義,大夫 注。」〇陳氏「變」,如字。 死 宗 廟 謂 今

或 正 夫 死 陳 之則 者 死 氏 君 之 祥 如 與 社 之 則 義 道 何 稷 非 而 共 義 正。 存亡,故死 而 社稷,天子之社 日 宗廟, 變 也 死 衆 己之宗廟 然 而 社稷者謂之義 則大夫之義 己。 稷 也 也 愚 故故 謂: 故 大 而 君

> 也。 則 者 廟 大 惟 有 夫 則 蓋大夫死宗廟,乃誤 仗 得 不 謂之變,若鄭之伯 罪 節 明 於君 死義之風, 於上下之分故 則 當 出 而 用其 有, 無 也 若 作 晉之樂 致 勇而至於怒 禮 亂 死 達 犯 以 分定, 上之 盈 守 是

婢 達於其患 非 故聖人耐 亦反。」 意之也,必 然 以天下爲 後 知其情 能 爲 之。《釋文》: 辟 家,以 於其 中 義 或 「耐,音 明 爲 於其 人 能。 者 利 辟

之趨 知其 之身也。 下 禮達分定,人皆愛其 相 人於人之情義利 親 雖 遠,而 上 理之所以 愛,如一 ,不啻手足頭 意之者 民 家之 之親 然 害 也 謂謂 人 其 君 也。 以 目 死 知之無 辟 私 之相 ,不啻父子兄 而 猫 中國 意 患 涌 其生, 測 捍 不 世 度,不 明 衛 雖 開 故故 大 如 則 也 處 能 弟 而 是 之 之 天 實

無不當,而能以天下爲一家,中國爲一

人也。

下音悌。長,丁丈反。」下音悌。長,丁丈反。」下音悌。長,丁丈反。」下音悌。長,丁丈反。」下音常。長,丁丈反。」下音说。長,丁丈反。」

非

禮則無以治之也

情。 樂」、《左傳》言「喜、怒、哀,樂、好、惡」爲六 黨,先鄉黨 婦,先天合而後人合也。 弟夫婦,先尊 情,此言「喜、怒、哀、懼、愛、惡、欲」爲 色,耳欲聲是也。 廢,争奪非 不治則亂,義不治則壞,信睦 六,又析之則爲七也。 至而未至也則懼,故總之爲四,析之則 愛則樂,失所愛則哀,而於所怒所哀之 父愛子,子愛父是也。 蓋人值所好則喜,值所惡則怒,得 尊尚辭讓則不能去。 而 後 而後卑也。 朝廷,先近 令中 十義先父子 庸》言「喜、怒、哀 欲,謂貪欲,如 先兄弟 先閨門 而 非 後 講 遠 此四者 而後 且 而 而 也 後 目欲 脩 後 將 所 則 鄉 夫 兄 爲 情

藏其心,不可測度也。美惡皆在其心,不見之大惡存焉。故欲、惡者,心之大端也。人飲食、男女,人之大欲存焉。死亡、貧苦,人

其 色 「度、大洛反。 也 欲 見,賢遍反。」 以 窮 之, 舍 禮 何 以 哉 ! 釋

Ŧī.

謂: 窮之而 也。 也, 馬 欲、惡可以該之,故曰「欲、惡者,心之大端 情雖有七,而喜也,愛也,皆欲之别也,怒 哀、懼、愛、惡、欲,皆所謂情,而情之所本, 亡、貧苦,惡之甚也,故曰『大惡』。 喜、怒、 欲之甚也,故曰『大欲』。 睦之風敦,而争奪之患息矣。 尤在於欲、惡,故曰『心之大端』。」 氏 哀 見其 情者,心之所發,心者,情之所 蓋見其所爲之合禮, 晞 人心之欲、惡不可見,而惟禮 也,懼 後 孟 能 所爲之悖禮,則 曰:「莫非欲 治之,情治則 也,皆惡之别也。 也,而 莫非惡也,而 人義 知 則知 其 飲 無 情之惡矣。 其情 故 食、 不脩,信 情 可 男女, 之美 以 七 具。 愚 窮 而 死

> 陽,陽變交陰,静而生陰,陰 行 聚,陰靈 理之流行,而爲生人之機也。 理,而爲生人之本也。 造化之樞紐,品彙之根柢。 徐 氏 之秀 師 曾 氣 爲 曰:「上天之載,無聲無臭,而 也 鬼 聚 而 成 魄,陽 理一 而已,動 靈 合交陽,此 此天 由是二氣 爲 神 地之 而 實 凝 實 實 而 爲

於物也。」 秀也。 形生 其氣之已具於人身者而言。 其氣之初出 魂者神之盛,魄者鬼之盛。 陽、鬼神、五行以氣言。 成魂,此實 所謂「太極之真,二五之精,妙合而凝」也 氣之秀也。 而 神發 四肢 理之凝 於天地者而言; 、百骸 此實理之全具,而人之所以 而 愚謂: 天地之德以理言, 聰 明 無有偏塞,五行之質之 成, 睿 知 人兼: 耐 無 人於是乎 有 陰陽之交,指 鬼神之會,指 此而 駮雜,五行 天地之生人 生,周子 生矣。 陰 靈

故人者,其天地之德,陰陽之交,鬼神之會,

此 其 嘗 物 有異 所以 以 以下至「故 ,皆予之 理 爲 而 以 萬物之靈 言 理 氣 人情 則 以 而言,則 其 成 不失」,明 所 性 而能 得 当皆 惟 於 全其 賦 天 人情之本於天 之氣 者,人 獨 性也。 得其 以 與 (秀,此 成 〇 自 物 形 未

Ŧī. 故 Ŧī. 立行於四 三五五 行 天 秉 於 い時」。」 陽,垂 四 而 時 闕 H 和 星; 《釋文》: 而 后 地 月 播於 秉陰 生 也。 五 竅 行 四時,本亦作 是以三五 於山 إال 而 播

道

,而本天道

者之所以治人情

也

弦 望 三五 秋 散 下 秉,持. 也。 也。 以 爲 望、 金 至 而 也。 竅者, 播五 晦 盈 晦 、冬爲 自 也 竅,孔 朔 行於四時者,春爲木,夏爲火, 在下 於 水, 朔 几 其 以 也。 時 而 中 至 而 分 土 望 通 垂者,在 而 則 世 氣乎上 Ŧi. 爲 寄 行 十· 二 王 之氣 三 五 於 E 也。 而 月, 和 四 而 照 播 季 闕 則 而 臨 也。 分 月 自 平 几

之施 精, 行播 化 陽 在 象,生之謂 流 露之感遇 E 陰,五行, 時 故曰『月以爲量』也 星之下,而 合,故月生 丽 生矣。 之序 天地之中, 萬物者,亦不離乎風 播 四 地所載之神氣,然皆應天之時,與之 於天, 故天 乎四 於四時,是天 時 其闕 順 雖有春夏秋冬之四 時 Ш 日 聚 也。 居 一焉 而 愐 川之所 也三五 之間 星 李 散 實 而 地之上,其去 月之弦、 氏 一之所 無 古今説者皆謂 陰 地 所 光 精 類 以 如 地 以 主 非 地 郊 陽 調 雷 其 陰 也。 Ш 曰 也 望、 毓 雨 故 氣, 電 和 陽 盈 JII 霜 陰之孕。 既 然 晦 谌 也三五 之和合 所 風 地 會 Ш 日 露 經 酌 時 五行之氣 鬱。 霆、雲雨、 於 111 最 朔 月 而 星 緯 乎 近。 太 已。 從 在 從 無 而 陰 以 日 五. 故 虚 也 天、日 地 所 天 不 陽者 行 受陽 是月 月 而 夫 以 如 而 而 Ŧi. 同 霜 之 實 雖 成 和 牛 屬 屬 期

其

佐 四 時 寒 暑之令, 而 又專 司 山 111 風 雨 胎

育 群 英 也。

結反。 五 行之動,迭相竭也。《釋文》:「迭,大計反,又田 竭,義作揭,其列反。」○陳氏、陸氏「竭」,如字。

鄭氏曰:「竭,猶負戴也。」 休則有王,故竭 戴之。」 在人上,謂之負戴。氣之過去者,下亦負 陳氏 祥 則 道 有盈。」 曰:「竭,猶所謂 孔氏曰:「物 陸氏 佃口: 休也

之所分著,其流行變動 行之所播 愚謂:此包下文四 竭,盡也。水王 而 五聲、五味、五色亦莫非 節 而 ,皆迭相爲休王也。 言。 蓋 四 時 五行 古 Ŧi.

則

金竭,木王則水

竭。」

Ŧi.

行、四時、十二月,還相爲本也。《釋文》:

還,音旋,下同

有其本也。 王 五行各以其時之王者爲本:春木王,夏火 ,季夏土王,秋金王,冬水王。 然春三月皆木,而正月爲寅, 是四 時

> 本也。 二月爲 卯 月 爲 辰 是 十二月 又各有

五聲、六律、十二管,還相爲宫也。 中吕。 管長九寸,下生者三分去一,上生者三分 爲第一宫,下生林鐘爲徵,上生大簇爲商 有 黄鐘下生林鐘,林鐘上生大簇,大簇下生 孔氏曰:「十二管更相爲宫,以黄鐘爲始 益 陽管曰律,陰曰吕。布十二辰,始於黄鐘 鄭氏曰:「五聲,宮、商、角、徵、羽 下生南吕爲羽,上生姑洗爲角。 夷則上生夾鐘,夾鐘下生無射,無射上生 上生蕤賓,蕤賓上生大吕,大吕下生夷則 南吕,南吕上生姑洗,姑洗下生應鐘,應鐘 一宫,上生大簇爲徵,下生南吕爲商,上生 五聲。十二律相生,至中吕而畢。 一,終於南吕,更相爲宫,凡六十也。」 隨其相生之次,每辰各自爲宫,各 林鐘 也。 黄鐘 其

角

射

爲

爲

角

夾

鐘

爲

下生無

射

爲

爲

角。

夷則

生

中

自

爲

商

徵,上生夾鐘爲

無射

爲徵,下生夷則爲商,上生夾鐘爲羽,下生 蕤賓爲徵,上生大吕爲商,下生夷則爲羽 生應鐘爲徵,上生蕤賓 一生姑洗爲徵,下生應鐘 爲角。大吕爲第八宫,下生 第十一宫,上生中吕爲徵,上 ,上生黄鐘 商,上生中吕爲 第十宫,下生 爲第九宫,上生夾鐘 商,下生無射 蕤賓爲第七宫,上生大吕 角。 應鐘爲第六宫,上生 生 爲 爲 爲 姑洗 一姑洗 角。 南吕爲第四宫, 爲 羽 商 無 ,下生林鐘 羽,上生黄鐘 爲第五宫,下 ,上生大吕爲 商,上生蕤賓 爲羽,上生中 爲 大簇 射爲徵,上 商 下生生 一夷則爲 爲 爲徵 第 爲 應 焉。 子曰 角。 生林 角。 生黄鐘 而旋相可 其 下 律。」又曰:「『十二正律,各有一定之聲 自仲吕復上生黄鐘,不及九寸,於是有變 此。」又曰:「『十二律相 四聲,合爲八十四聲。 不及二變,而止爲六十聲,增入二變二十 生,餘分不可損益,故立均之法,至是而 當得宮前一位,以爲變宮。 上生,當得徵前 ,當下者或高,則宮商失序而不 半律以爲子聲。」朱子變律、半律之說,其詳 孔氏以本文但云『五聲』『十二管』,故 「五聲相 是十二律各有五聲,凡六十聲。」 鐘爲 中吕 爲宫。』則 爲 商,上生大簇爲羽,下生南吕 爲第十二宫, 商,下生林鐘 生,至於角 一位,以爲變徵。 五聲初 自唐以來,法皆 上生黄鐘 爲 生 無定位 羽,上生大簇 至仲吕 位 又自變宫隔 ,隔八下生,

羽,下生夷則爲

角。

上生夾鐘爲角。

爲羽,上生大吕爲

角。

E.

鐘爲羽,上生蕤賓爲

生南

吕爲

微,上

爲徵

下 下

爲

姑

洗

爲

羽,下生

應

鐘

,當高者或

而

窮

如

和故

取

自此

下

終

於《儀禮經傳通解・鐘律》篇。

「和,户卧反。」五味、六和、十二食,還相爲質也。《釋文》:

質也。 質也。 質也。 質猶本也。 旋相爲質者, 以滑甘,是爲六和。」 愚謂:十二食,十 以滑甘,是爲六和。」 愚謂:十二食,十 以滑甘,是爲六和。」 愚謂:十二食,升

五色、六章、十二衣、還相爲質也。

反,徐扶義反。」

有四時之分,而無每月之别,若衣則因事青,南方謂之赤,西方謂之白,北方謂之黑,天謂之玄,地謂之黄。」是也。十二衣,黑,天謂之玄,地謂之黄。」是也。十二衣,黑,天謂之玄,地謂之黄。」是也。十二衣,以玄爲質,皮弁服則以素爲質也。若不問之。此謂之故。此問之所、此言之。此言之。此言之。此言之,,而其之。此,以玄爲質,皮,而無每月之别,若衣則因事

其十二之説,則鑿矣。 其十二之説,則鑿矣。 其十二之説,則鑿矣。 其十二之説,則鑿矣。 其十二之説,則鑿矣。 其十二之説,則鑿矣。 其十二之説,則鑿矣。

聲、被色而生者也。《釋文》:「別,彼列反。被,皮義故人者,天地之心也,五行之端也,食味、別

物 於人具之,而物不得與焉。 知、信,然後 行之性不可見,自人稟之以爲仁、義、禮、 生,而惟人之知覺稟其全,故天地之心 文「天地之德」也。人、物各得天地之心以 天地之心,謂天地所主宰以生物者,即 不能備也,而 以其端 人則盡食之。 緒可見也。 端,緒 五聲、六律, 五味、六 也。 Ŧi. 獨 Ė

之全; 結 神者,五行 物 物 也,言五行則陰陽、鬼神在 後,而言其 五. 一行之端,溯其 不能 不 上文七節之意也 能 食味、别聲、被色而生,據其既生之 全 辨 也 也 得 陰 形氣之正 而 而 人則能 陽, 有 人 生之初,而 則 而陰 兼 别之。 也。 被之。 陽 其 之良能即 不言陰 、中矣。 言其 <u>Ŧ</u>i. 天地之心 (稟義 陽、 六章 此 鬼 以 神 鬼 理

四 故聖人作則,必以天地爲本,以陰陽爲端,以 徒,五行以爲 一靈以 爲 畜,許又反,下同。」 柄 爲畜。《釋文》:「柄,本又作『枋』,兵命反。 ,以日星爲紀,月以爲量,鬼神以 質,禮義以 爲 器, 人情以爲 田 量 爲

首也。 温 天,聖人之所效法,莫非天地之道也。 則 法也。 正 以陰陽爲端者,仁育萬物,法陽之 萬民, 以 天 法 地 陰之肅,聖人之政治,以 爲 本者,道 之大 原 出 於

之所 爲 月各 水昏 情 制 功 孟 北 有 之,以爲 時 聖人凡有 侣然也。 爲徒者,明則有禮樂,幽則有鬼神,聖人 者,歲有四 一者爲 之也。 陸 田者,人情爲聖人之所治 春之令,仲春則有仲春之令也。 綱 爲 ,猶農夫用耒耜之器以耕 用,與天地之功用 有 柄者 耕 正 而 而 也。 藏 又有 端 分限,聖人因之以爲量,孟 而栽之類是也。 作訛 禮義以爲器者,聖人 五行以爲質者,制度 冰,西陸朝覿 首 興作,必以此爲質幹, 一時, 四 也 几 紀,聖人 時 成易之序 而 靈 有生長收藏 柄 以 日星運 者, 爲畜者, 並 因之以 工之所 而出之,龍見畢務, 行迭 月以爲量者,十二 也。 行乎其間 田 四 猶 聖 運,若相 爲紀,若日在 以 用 也。 執 出於 靈 田 日 禮 而 人 巾 並 ,若網 星 鬼神 春則 爲農 大 執 義 至 五. 爲徒 情 治 爲 而 以 而 Z 夫 有 紀 裁 用 几

協

於

分

藝

藝之分」,

皆

此

義

也

月

以

則十二月之政各有

分限

而

不

相

踰

行 人制禮 上言人以 養之, 以 若 治人,亦取 天 養 地、陰 六 畜 然 陽 法於天 也 Ŧi. 行 而 地、陰 吴 生,此 氏 澄 陽、 日 Ŧi. 聖 :

質,故 也。 也。 情 以 畜,故飲食 可 天 舉 萬 也。 物皆天地之所生,故以 人情以爲 鬼 紀,故 睹 地爲 事可 神以 也。 人情 本,故物 有由 復也。 事 以 爲徒,故 可 不出乎 田,故· 四 也。 列 時 禮義 也。 可 爲 鄭注: 人以 舉 事 柄、故 陰陽二端, 以 月以 也。 有 爲 「藝,或爲「倪」。」 爲器,故 守 奥也。 天地爲 事可 以 爲量 也 陰陽爲 故 勸 五. 事 故 以 本而 几 也。 行 行 靈 功 陰 端 以 以 物 以 有 陽 有 爲 考 可 爲 爲 蓺 H 故

端

而

X

情

口

睹

也

生長

收藏

隨

時

無

失,

第

陳

列

之

也

敬

授

人

一時

各有早晚,故

事

口

次

第

陳

列

也。

藝,

謂

事之分限。

後

云

故

民

不

假

督

勵

而

事

皆

動勉

也。

列

謂

以

次

也。

失。 何謂 又作「獝」,況必反。 麟 以 以 爲 成,以 皆有 越矣。 隨 靈 田 者可復矣。 無 五. 《釋文》: 一,而 爲 行 爲 畜、故魚 四 主 而 畜 靈 至 則 循 所 群物之長,既 其情 禮 ? 環 ,得以充庖 荒廢,故 鬼神體物不遺,以 故 循 義 「鮪 迭運,以 以 麟、 不至 鮪 治 考,成. 鬻 ,于軌反。 守 狘,況越反。」 不念。 人 、鳳、龜 不 矣。 於 則 狘 用 也。 廚 荒 爲 事 人 五行爲質 復者, 、龍 沧,音 鳳以 故 廢,故 龜 聖 爲 行 以農器治 成。 以 主,聖人 人所畜, ,謂之四靈。 飲 爲畜,故鳥不獝 終 鬼 爲 食 人以 徐 奥,主 則 神 畜,故人情不 而 有 舒 復 爲 由 冉 則 爲 以 事之已終 田 徒, 始之意。 其 奥。 人情 則農 也 屬 則 故 龍 並 爲 功 事 几  $\mathbb{H}$ 

孔氏曰: 「淰,水中驚走 也。 獝 驚 飛 也。

厚, 鳳 行,其 情 之四靈。」 其 狘 既 長既 、驚走 知治 情 來 來,故 也 不 應 亂, 失 人,知人 其屬 魚 也 龜兆吉凶 鮪 見人不驚走 從 八情善惡 元龍, 方氏 鳥 龍能 慤 從 一, 故 日 鳳 也 變化,故 人各 獸 麟 龜 從 守其 體 知 麟 謂 信 人

序。 設 故 「増」,同 祭也。 制 禮 昭假 先王秉蓍 而 屬 列 瘞 《釋文》: 一,埋 一,故官 祭祀之事 度。 也 禮 似仍反,又則登反。」○鄭注: 達 也。 而禮達於上矣。 宣祝嘏 秉 故 於下矣。 有 「瘞,於例 蓍 龜 或 所 繒 龜 世 有禮, 御, 帛 列祭 以 辭説,宗廟之祭也。 決其嫌疑 也。 制度,城郭、宫室、車旗 而 御, 反, 祀, 官 事 有御, 瘞帛 一音於器反。 得 治 瘞 設立 其職 也 繒 「繒,或作『贈 以 ,列祭祀以 事 制度以治民 宣 降神,地祇之 ,所行之禮莫 惟 有 祝 上下一 繒,本又 職 嘏 一者皆 辭 禮 盡 説 於 其 有 作

> 之,故天下國家可得 不 功效之盛也 順其 次 序也。 自 而 此 正之意,而 以 下, 申 以 極 禮 其 示

故 舊必信反。 祀,所以本事 廟,所以本仁也。 以定天位也。 老在學,王前巫 王中心無爲也,以 先 王患禮之不達 朝,直遥反。 也。 祀 而 社 故宗祝 守至正。《釋文》:「價,皇音賓 後史,卜筮瞽侑皆在左右 Ш 侑,音又。」 於國,所以 於下 川,所以償鬼神也 也, 在廟,三公在 故祭帝於郊 列 地 利 也。 朝 祖 所 Ŧi.

天 列 也。 天、地、祖廟、 此 爲政治 之於郊。 地 日 承上節 或, 利 「定天位 ,故還本其 謂 謂 定天位,所 而 或 陳 申言先王以禮自治之事 山 列 中 其養 川、五祀,先王之所效 於地 也 功 人之功 謂 日 而 親 報之。 祀於南 地,故祀之於國 列 地 而 利」,互見之 報之也。 尊天,故 [郊,就] 陽 法 也。 於 位 祀 以

爲 言 禮 禮 禮 其 和 疑 神 在 而 史者,君舉 而 與 ][[ 在 也 祇 學 廟 則 上下爲互也。 非 動 事 在 必 報之也。先王患禮之不達於下 Ŧi. 而 男巫 自上 以 其 以 天 後 1 心 本 絶 祀皆鬼神 追孝於祖 乞其 筮, 也。 環 相 地 而 乎 筮 以 一始,故 其 鬼 学王 列 納 人欲之擾,所守得其至正 謂 必 食 (言, 巫 禮 神 瞽,樂官也。 於 諸 本 則 書 助 **=** 前 弔 獨 軌 一考者 其致謹 於仁恩之意 其 而 樂官以 記言、 本 後 一公在 以 則 物。 行禮 明 事 於 左 卻 與 謂 智 如 Ш 右 朝 其 又 於祭祀,以 王 祝前 樂侑 記 此。 川言之者,亦 者, 瞽、 本制度之所 以 有 則 不 侑 動 論 其 祥,史以 也 中 侑 無 也 之 前 勸 本 其 是也。 心 史 以 巫 非 也 故故 道 祖 無 先 恒 者 所 墳 0 報 廟 所 以 其 宗 王 記 王 從 功 而 自 所 作 其 老 祝 以 有 Ŧ. 後 周 於 行 而 格 中 出 以 Ш

> 循 之所言也 是 鬯 以 乎 而 郊 天 齊 焉 理 戒 而 之 神 格 則 明 之德 廟 焉 蓋 不 而 古 享 已 待 默 登 而 通 壇 其效如下文 於 塲 鬼 神 秉 矣。 圭

祀 祀 故禮 可 極 而 ,義之脩 焉 正 行於郊而 法則焉。 ,禮行 而 禮之藏也 於 百 祖 神 故自郊、 廟 . 受職 而 孝慈服 馬,禮 社、 祖廟、 行 焉 於社 禮 Ш 行 HIJ 川 於 白 五. 貨

陰陽 是 故 法則 極,盡 藏 脩 者,法則中 慈服,言天下化之而 白 變而 神, 者 者 夫禮,必本於大一,分而 天之群 義 禮 言 也,謂可盡 爲四 也, 也 法則 禮因 ·包之也。 義 1時,列 神也。 得 因 其 義 得 禮 而爲 義以 正 而 而 而 服 受職, 也。 起,故曰 用 見 行孝慈之道 鬼神。 也 故 理言,禮以文言。 爲天 不言 各率 日 服 地,轉一 禮之藏」。 其降 行 「義之脩」 Ш 其 111 也 也 職 日 興 而 命 也 爲 Œ

其官於天也。《釋文》:「大,音

泰。」

也。 散 謂 降 爲陰陽,而動静之氣以 主,所謂「道之大原出於天」也。 其官於天者,言此所降之命,莫非天之所 伸變化體物不遺。降,猶「降衷」之降。 者,上天之載,純 天理之本然者言之,所謂「天高地下,萬物 而春夏秋冬錯行不悖。 大者,極至之名。 殊,而禮制行焉」者也。 之命,所謂「天命之謂性」也。 日 分而爲天地,而乾坤之位以定。 命者,言天理之流行 一不貳,而爲理之至極 一者,不貳之意。 行。 列 而 而 變而 賦於物者,則 爲鬼神,而 此一節以 官,主也。 爲 四 轉 大 其 時 屈 而

時,協 力、辭 夫禮必本於天,動而之地,列而之事 釋文》:「冠,古亂 讓、飲食、冠、昏、喪、祭、射、御、 於分藝。 反。」〇 其 居 人也 養, 鄭 日 讀爲 養,其行之 義、王肅 丁,變而 朝 如字,今 "、聘。 以 貨 從

所以 也。 各有其稱。 出 此乃言聖人制禮之事也。天者,禮之所從 義文理之所以養情。』蓋聖人之道,寓於度 養。《荀子》曰:『恭敬辭讓之所以養安,禮 乎人情之所安,此 王之於禮,既已履之於身以先天下,而 人之行禮如此,乃禮達於下之實也。 文。冠昏、喪祭、射御、朝聘者,行禮之事 貨力、飲食者,行禮之具。 益之各有所宜。協於分藝,而大事小 吉、凶、軍、賓之分。 而 ,所以養其身心,而 爲朝、廟、鄉、黨之異。 ,故聖人之制禮,莫不本之。 教人者,又皆出於天理之本然, 馬氏晞孟 其居人也 曰:「禮 其 變而 所 非 日 以 以 列而 養者 以 從 辭讓者,行禮之 行之 養人爲本,故 八時,而 煩苦天下也 , 言禮之在 之事 動而之地 而 無 或 前 蓋 事之 而 損 弗 先 或 爲 達 即 其.

喪,息浪反。」〇石經「固人」下有「之」字。 故壞 之大竇也。 死,事鬼神之大端也。 而 故 心禮義 固 數之間 人肌膚之會,筋骸之束也。 國、喪家、亡人,必先去其禮。 也 莫非 者,人之大端 故唯聖人爲知禮之不可 順 性命之理 所以達天道,順人情 也。 而 所 所 以 以 所以養生送 講 養 以已也 信 人 《釋文》: 脩 也。」 睦

情 先 身者 於事者無 由 鬼 日 肌、膚、筋、骸四者,聚而爲身,有禮則莊 入,禮亦天道人情之所由以出入也。 會,筋骸之束 神 王 具 此 强,惰慢邪 於 亦惟禮 無不莊。 而 制 和 禮 人,先王制 不 以 實,孔 達之, 誠 ,自此 義爲大端 僻之氣 以明 古 穴也。 禮 而 則 固 X 無自 以 秩 矣。 養生送死 肌 順 敘 緒 膚、筋骸 孔穴,物之所 之,而喜怒哀 也。 經 講信 而 入,而 曲 道出 以 自 脩 而 此 睦, 出出 肌 於天 而 禮所 膚之 則 動 而 行 樂 敬 出 事 於 見

> 爲 而致 以 字之意。」 之國,喪敗之家,死亡之人,皆由自去其禮 此條之體要。 内 然。 治 其 〇吴氏澄曰:「『順人情』三字, 身 心, 外 自此以至終篇,皆演『順 治 其 天 下 或 家 故 壞 亂

小人以薄。 故禮之於人也,猶酒之有糵也: 君子以厚, 糵,麴 糵厚則酒 也。 《釋文》:「糵,魚列 美,糵 禮 所 薄 以 則 成 酒 人,猶 薄。 反。 糵所以 禮厚則其人爲 成 酒 也

講學以耨之,本仁以聚之,播樂以安之。 者,聖王之田 故聖王脩義之柄 方氏慤 無義,心 言『序』。 言『柄』。 動 禮 禮 也,脩禮以耕之,陳 而 「義者,所 義 者 情 ,禮之序 本出 所 亂 也。 行有 於人心, 操有 以 聖人脩其柄 節 治 宜 人情。 而 而 而 不 義 不 或 可 可 以 至 故 亂, 失,故 種之, 與 無 人情 其 禮 故

君子,禮薄則其

人

爲

小人

以永其 學,以 義也 苦 理 爲 猶農夫用耒耜以耕,所以墾闢荒穢也。然 申 而 本者未必不終失之,故必播之以樂,歌咏 聚之於家也。然非有以進之於安,則其所 然後德存於心而實有諸己,猶耕者之穫而 理,則其所講者終非己有,故必本之於仁, 去稂莠而長嘉禾也。然非去人欲,存天 猶耕者之因地宜而播種也。然非明乎其 故必陳之以義,然後大小多寡各適其宜, 序,❶還以治人之情 前 禮 明上文「禮 可 ,則於義之是非或不能辨,故必講之以 以 而 得其安美也。 去其非而 趣,舞蹈 人情不治則荒穢,脩禮以 不失,猶 不合乎義 義以爲器」,「人情以 存其是,猶耕者之耨,所以 以暢其機,然後 耕者之既 小,則 而已。」 蓋先王既脩禮義以治 無以 穫而 各適乎事之宜, 愚謂: 食,免於勤 所存者洽 治人情, 爲 田之 此 以

> 故禮也 先王未之有,可以義起也。 而不自知。 有以開其知覺,復其天良,振興鼓 能 問之途者,其事如 天下,又設爲學校,使天下之人從事於 寫理盡性,以進於聖賢,其爲 者,義之實也。協諸義 此先王以禮義治人情之備也。 此。 故其爲君子者, 而協,則禮雖 小人者,亦 舞、遷善 既

禮,可酌於義而創爲之。」時制宜,故協合於義而合,雖先王未有此制。義者,禮之權度。禮一定不易,義隨陳氏澔曰:「實者,定制也。禮者,義之定

處於外者,以義爲分限之宜。心之發於内陳氏澔曰:「藝以事言,仁以心言。事之

❶ 「人」、《集説》作「王」。

故得之者强。」

故得之者强。」

此義爲之裁制焉。上好義則民莫敢不服,

以義爲之裁制焉。上好義則民莫敢不服,

以義爲之裁制焉。上好義則民莫敢不服,

以義爲品節之度。 協於藝者,合於

仁者,義之本也,順之體也,得之者尊。 也。 枝一葉,各得其宜者 其序,此散體之禮也。 木也,從根本至枝葉皆生意,此全體之仁 言,本以全體言,同一理也。張子謂 者義之實」,此言『仁者義之本』,實以散 體仁足以長人,故得之者尊。上文言『禮 本,是乃百順之體質也。元者,善之長。 陳氏澔曰:「仁者,本心之全德,故爲義之 三百,曲禮三千,無一事之非仁也。 順 乎天理,略無違逆,中節之和也。 本至千枝萬葉,先後大小,各有 「, 義 而其自本至末,一 也。」 吴氏澄 猶之 經禮 體

> 體。 藉以講明,樂者仁、義、禮之所由以精熟, 禮以耕,陳義以種」,「本仁以聚」之意。 不 中,仁也。 不在三者之外也。 言「講學」「播樂」者,蓋學者仁、義、禮之所 仁,其相資而 由 全體之中, 愚謂:此三節,皆所 大用之和,順 不可闕者如此 發 而 爲 中節 也。 之 ,以申上文「脩 以明禮、義 故仁爲 和 全 順之 體 之 與

不之深也。」 種 義,猶耕而弗種也。爲義而不講之以學,猶 故治國不以禮,猶無耜而耕也。爲禮不本於 也。《釋文》:「不,亦作『弗』。 弗食也。 而弗 而弗耨 穫也。 也。 安之以樂 合之以仁 講之以學而不合之以仁,猶 而 而 不達於順 不 何休注《公羊》云:『弗者 安之以樂,猶 ,猶食而 弗肥 穫 而 耨

■「度」、《禮記大全》作「制」。

二也。 體 體 聚 吴氏 仁者體之全於內,順者用之達於外。 治 極 衆理 未肥 功 或 雖全,而 也 謂 澄 於 成於樂而 曰 故 治 心。 : 順之用未達,猶内腹 必 此 國之人情。 達於順而 反 仁而未能 安於仁,則與仁爲一矣。 解 E 文, 後爲禮義,治情之 合之以 安,是猶與仁爲 而 以 雖充,而外 順 爲 極 仁之 謂 也 合

也。 序,士以信相考,百 爲 官 弟 鬼神之常 四 車 職 睦 體 是謂 大婦婦 既 相 以樂 序, 正,膚革充盈,人之肥也。 也。 大 爲 君 和,家之肥 順 御、諸侯以 臣 鄭 注 相 大 IĘ, 「車,或爲『居』。」 順 姓以 者 也。 國之肥 所 禮相與,大夫以 睦 大臣 以 相守,天下之肥 也。 養生、送死、事 法,小臣 父子篤,兄 天子 以 法 廉 相 德

重,無不從令也。膚革充盈者,睟面盎背,四體既正者,天君泰然,而手容恭,足容

達者 導和 情」也。 倍,小 秩然 孝 篤 宰 故 德所以容載天下,故曰「以德爲車」。 其君,以法守事 宰》所謂 義、婦聽,故夫婦和。 和 職、官聯、官常、 而 位,進其治,作其 職 大能字小,小能事大也。 日 ,故父子篤。 順 而 積 以 ,賴有樂以導之,猶車之恃御 而 「以樂爲 臣 所謂 睦 於 感人爲深,天子之德,所 不 君 廉則必不至於竊 「以官府之六敘正群 中, 相 紊 ĪĒ. 一以 守。 也 御」。 其 而 八 其上。 兄良、弟弟 而 官成、官法、官刑 臣 英 事,制其食,受其會,聽 以信 法 鄉 一, 以 華 以禮 間 治官府 發 大臣 道 之情 相 車 於 相 揆率其下。 考, 以載物、天子 外 故兄 法則 與,謹 官職 親 以 吏,以 也。 而 法 而 朋 必 弟睦。 蓋 以 相序、《大 相 官屬 於邦 父慈、 以 官計 友之 無 敘 不 以 序 行 臣 至 禮 所 樂 IE. 官官 也 義 子 其 其 於 皆 不 夫

既正 意。 事 筋、骸之束」者,又有進矣。 相 神」言之者,蓋 條 治人情 禮 考,以 鬼神之意未顯,故舉此以結之。 申言其説。 「義者,人之大端」,而 諸侯以下,以 ,膚革充盈 睦相守,即講信脩 而 其 功 此 大 ,則視所謂 效 順 獨 禮 之 以 相 即 極 「養生、送死 與,以法相敘,以 順 至 以 天道 古 於 睦之事。 「講 獨 如 養生、送死、 肌、膚之會, 一達人 信脩 此 八情之 睦 事 四 前 信 鬼 言

失,深 故 危也。《釋文》:「苑,于粉反。 不相害也,此順之至也。 事大積焉 陳氏 之大者積 同者一時並 而通,茂 澔 曰 叠 而 「以大順 在 不 而 前 行,亦不至舛謬; 有間 苑,並行而 亦 之道 不至於膠滯; 連 繆,音謬。」○間 故明於順然後能 而 治
天 不繆,細行而不 不 相 ۲, 及也 雖 ,如字。 雖 則 小 動 事 雖 事 > 所 事 守 而

亦不以微

細

而有

失也。

雖

深

窅

而

可

達於順 之極 動 連 不至於危 君位危」之危。 所争矣。 通 有茂,有連有動,而自然各得 ,則有利害之争。 而 雖 至也。」 相及,則 茂 而後能治政安君,以爲藏身之固 密 此泛言天下之事有 也。 而 有彼此 有 愚謂: 必明 間 謂 之争。 不相及,不相 於順 危,即 有 中 而 間 兩 後 前「政不 其 大 事 也 能 分理者, 有 達 細 害, 時 兩 於順 有 Ē 則 物 而 則 而 順 無 俱 接

合危也。《釋文》: 故禮之不同也,不豐也,不 後能 順 不使危亂 儉者不可豐,宜隆者不可殺。 徐氏師曾曰: 而 Ŀ ,所以維 守危」之意。 替,而陵替之患皆由於人情之驕縱。 也。 持 人 「貴賤有等,故禮制 「殺,所戒反,徐所例 情,不使驕 愚謂:此申上「明於順 蓋君位之危皆起於下陵 殺也,所以持情 縦 反。」 ,保合上下, 凡此禮制之 不同, 然 宜 而

然禮之順非一,而不豐不殺者,特其一端曰「守危」,此兼以上下言之,故曰「合危」。而使之各安其分也。上專以君位言之,故禮有豐殺之節,所以維持人情,和合上下

天降 妖,又作『祆』。澧,本又作『醴』,音禮。 能 獸 鳳 天不 故 時,合男女、頒爵位必當年、德,用民 中 故 也 脩 之 無 ·原 聖 凰 耳,故下文又以 膏露 - 愛其 一, 。」《釋文》:「 禮 卵 水旱昆蟲之災,民 王所以 麒 胎 以 麟 弗敝也。 地地 達 皆 道,地不愛其寶,人不愛其情。 皆 順,山 義 窺,本又作『闚』,去規反。」 在 出醴泉,山 可 體 當,丁 俯 郊 者不使居川,不使渚 順之事廣言之。 信 而 棷 用水、火、金、木、飲食必 浪 龜 以 闚 反。 無 達 也 出器、車,河出 元龍 M 順 孽,又作 饑妖 故 則 在 棷,素口 是 宫 孽之疾。 句。 『蠥』,魚列 無 沼 故,先 , 其 反,徐總會 此 必必 馬 者居 順 餘 圖 順 反 故  $\Xi$ 之 故 鳥

以救 謂漁人 木」。 其 謂 之屬 醬齊視秋時,飲齊視冬時。 各安其所,不易 鄭 膏猶甘也。 用民必順,不奪農時 位,謂《司士》『稽士任,進退其爵禄』也。 氏》『令男三十而 用木,謂《山 用金,謂《卝人》以時取『金、玉、錫、石』也 魚」,是也 天不愛其道』三句,言嘉瑞應、人情 禽獸 氏 龍 馬 時疾」,及『季春 日 飲食,謂食齊視春時,羹齊視夏 清者 以 負 無災疾者,言大順之時 啚 時 小 器,謂若銀甕、丹 用 漁 虞》『仲 而 洲 利 火,謂《司爟 出 爲梁,『春 其 其 日 取,女二十而嫁』。 魚 渚 利 :冬斬 鹽 也。 出火,季秋 以 高 孔 中 勞敝 平 氏 獻 陽 昆蟲之災, 原  $\approx$ 日 合男女,謂《媒  $\Box$ 木,仲夏 鼈 之也。 甑 利 四 原 陰陽 蜃 也。 其 納 時 Ŧi. 禮 秋 火』也 Ш 變國火 用 一穀,使 馬 至 和 螟螽 斬陰 緯 頒 獻 者 時 也。 水, 啚 也 斗 爵 龜 利

曲。 \_\_\_ 端耳。 木、飲 乎地利 謂 以 出 鄭 應 孽。」順之所感,始於無 謡 順 順 必 也 威 Ш 心,由淺 自然 氏 飲 時 、草木之怪謂之妖,禽獸、蟲蝗之怪謂 之所感而應也。 ,因乎人情 儀 車 所 因 山者不使居川,渚者不 鳥 食 自 食之事甚 合男女、頒爵位必當年、德,用民 謂 不獝 之 而順之也。 見之。 而 乎天 方氏慤 車 深 然之車。 銀 其 而 也 甕、丹甑 而 時 孔 巢 政 廣 而 順之也。 飲 氏 曰:「五行獨不 太 在 Ш ,鄭氏所言特略舉其 順之也。 食,土 所 《説文》云: 平, 下, 用水、火、金、木、飲食 垂 出 謂 一,是也 器 鈎 Ш 故 烖 二 山 謂 車 可 害, 自此 所 不揉 車、垂 垂 俯 使居中原, 用水、火、金、 出 生 而終於致嘉 鈎 以下,皆言 而 「衣服、歌 Ш 自然之器 也 治 闚其 言『土』, 出 鈎」,是 而 注 車 自 云 卵。 之 必 謂 大 愚 員

故 其道 感當時之衰,而 然所謂大順者,亦不 感 馬 鬻 如 而 致之,則脩禮、達 忠,順者循物之信,惟體信而 義之實,惟脩禮而 天下無不宜 者,不獨親其親,不獨子其子,而仁心足 而 而 不愛其道之至也 也。 鳥 此,所謂 爲子游言禮義治天下,其體 達之天下 圖 貨 不 獸 財 者 狘 則 殖 風 脩禮以達義者,外脩禮 而 則 不愛其實之至 一而地 近 「上下與天地 不愛其情之至也。 雨 無 人 節 體信以 不 故 而 有志於唐、虞、三代之治 出 順 順 後能 寒暑時 可 醴泉,山 地不愛其寶者,五穀 亦 也。 外於以 俯 非有 達順者,内體 達義。 而 義者禮之理 也。 同 · 而 闚 流 二事 出 其 禮義治人情 天降 後能達順 人不愛其 信者盡己之 」者,使夫子 器、車, 信達順至 胎 制 無 矣。 故 膏露 而 天不 禮 誠 夫子 達 河 無 也 實 於 者 > 以 他 情 出 稔 則 愛 Щ

順只在和氣。體信是致中底意思,達順是節,無一物不得其所。」又曰:「信是實理,恕。體信是無一毫之僞,達順是發而中盛矣! 朱子曰:「體信是忠,達順是不得行其道,其功效固如此也。嗚呼!

禮記卷二十二終

致和底意思。」

六五九

## 禮記卷二十三

賜 或 史館纂 進 士 及 脩 第 孫 翰 希旦 林 院 編 脩

禮器第十之一《别録》屬《制度》。

名,器運而 言禮之行於天下,而極其效於大順,由體 者謂之道,形 之義,相爲表裏。 孔子禮樂從先進,禮奢寧儉之意。 此篇以忠信義理言禮,而歸重於忠信。 原其本於忠信,由外而約之於内也。 内心、外心言禮之文,而歸 而達之於用也。此篇言禮之備於一身,而 有迹。 而下者謂之器。道 《禮運》言道之運 〇方氏慤曰:「形 重於内 《禮運 運 心 一、《禮 而 而 以 蓋 無 上

音同。」

篇,亦以 器》言器之用。」 方氏之説,以備一解云。 多從「禮器」二字立説,似 其 在 簡端 耳, 愚 謂 非 有 非 此 本旨。 他 以 義 也。 禮器 今姑録 諸 家 名

饗德。 禮,則外諧而 大端矣,故 之有筠也,如松柏之有心也。 增美質,措則 禮器,是故大備。 《釋文》: 貫四時而不改柯易葉。 正 内 「錯,七路反,本又作『措』,又作『厝 無怨。 ,施則行。 大備,盛德 故物無不懷仁,鬼神 其在人也,如 也。 二者居天下之 故君子有 禮 釋 竹 П 箭

能消 百行 禮,經緯萬端,人能以禮爲治身之器,則於 充實於内矣。 無不達,而 無所不備 人回邪之心,增 盛德發見於外矣。 措諸身則 而 其 德盛 人質性之美,而 無 矣。 不正 箭,竹之小 禮之爲用, 一,施諸 盛 事 則 德

筠 竹 之 青 皮 也 大 端 猶 言 大 節

者。 貫 和 竹 澤於其 乎 箭 四 有 時, 筠 内。 以以 而 枝 貞 二物於天下有此 葉 古 無改。 於其 外, 其在 松柏 人身 大 節 有 心 則 禮 能

心。 之釋 竹箭之筠。 禮之措正 回 增美,以充其德於内者 故君子有禮則 、施行,以達其 外 而 德於外 猶松柏 鄉國,無 者,猶 Z 不

歆 和 其 諧 (德,遠 内内 而 近 家庭,無 幽 明無不感通 所怨悔 人歸其 亦猶松柏之 神

使 田 不 脩禮 人人成 改 柯 器, 易 以 葉也。 耕之,此是也。 如耒 耜 之爲 鄭 氏云:「禮器,言禮 用 大備,自耕 也。 人情 以 至 於 爲

其 文體 亦 别 非 一人所作也

1

篇

語

意

已

盡

此

篇之義與上篇

不

同

而

食之而肥。」似以此篇爲承上篇

而

作。

然

先 義 理 Ŧ 之立禮也,有 禮之文也 本 無 -有文。 本 不 立 忠信,禮之本 無文不行。 石經 也

> 無 有 文二二字。

義 忠 理 謂 謂 存 見 諸 於 心者 事 者 無 無 不實 不 宜 故 故 爲 爲 禮 禮 之本。 之文。

無 本 則 見於事者 爲 具文,故 禮不 立。 無文

則存 諸心者爲 虚 願,故禮 不行。 釋 回、 增

所以 美者 1,所以 達 其 義理之文。 立其忠信之本。 此 措正 節 乃 施 行者 篇 之

綱 領

禮也 者,合於天時,設於地財, 順 於鬼 神,

理有 於人 宜 心, 也,人官有能 理 萬 物 者 也。 也,物曲 是故 天 有利 時 有 也 生 也 故 天 地

居山 不生,地不養,君子不以 以魚鼈 爲禮,居澤以鹿 爲禮 豕 鬼神弗響也 爲 禮 一君子

謂

之不 知禮

睹 孔 故 氏 必 曰:「忠信爲本易 仰 此 合天 以下 時 廣 俯 説 義理 會地 爲文之事。 見,而義 理 中中 趣 理 人 事 爲 君子 文 天 難

日至。 禮 尊俎 若司 時者 於冬之日至。 也。」 示遠 水土之品,足以爲籩、豆之薦。 養陰氣,故食、嘗於秋。 此禮所以合於天 爲禮,是不合人心,鬼神弗饗,是不順 之物,若冬瓜夏橘 醴 是 不養,若山之魚鼈 地 時 所 絲 也 理 有 以設於地財者也。 物之致。 也。 徒奉牛,司馬奉羊,及庖人治庖 是 有 生 竹利 以飲養陽 人官有能者,人居其官,各有所能 宜 者 也。 方氏慤曰:「以陽生於子,故祀 者 黍稷之馨,足 爲琴瑟是也。 若 一、若高 物曲 春 幣無方,以别土地之宜。 以陰生於午,故祭地 薦 氣 有利者,若麴 田 ,澤之鹿 ,及李梅冬實之屬 非 故響、稀於春 宜 卵 黍稷 以 以天之高,故燔柴 , 天不生,謂 夏 爲 豕。 下, 薦 簠、簋 麥 貨無常,以 糵 君子不 田 魚 利 於 宜 之實。 是 祝治 夏 鬼 非 稻麥 以 爲 也 此 天 食 之 以 神 地 時 酒

禮。 裸鬯 禮 於壇 此 蟄之時 禮所以合於人心者也。 莫不有合歡之情,故制爲燕、饗之禮。此 以人莫不有男女之别, 物 故曰『設』。 天,以人合人也,故曰『合』。 事天,出 魚,然後虞人入澤梁。 於天,故 0 有 禮所以理萬物者也。 成理 莫不有追遠之心,故制爲喪、祭之禮 以求陰。 莫不有君 以地之深 炳蕭 乎 罻羅 也 人, 鬼神不 故 以 必 此 而還以 求 一於鳩 曰『理』。 臣之分,故 禮 故 陽 可遺也,故曰『順』。 所 瘞 化 豺祭獸,然後田獵 以 治人,則 埋 以 禮本乎天,而還 爲鷹 火田 於 順 故 形 韭生於春 坎 於 魄 制 地則效法焉 制 之後。 必 鬼 爲 歸 是 於昆 爲 以 神 於 夫 以 朝 魂 者 黍 地 婦 天合 覲 獺 蟲 氣 也。 萬 生 以 之 之 故 歸

0

<sup>「</sup>夫婦」、《集説》作「冠昏」。

養之物 曲。 也。」 者,禮以致其敬爲本,不求物之所 彼 可逆如 直 宜介物 於秋 養者爲 『鬼神』,而下不言,以天地兼之也。 所不生者爲禮 有 施直鎛, 林宜毛物,川 合於天時」五 天 也。」 ,金之從革,所謂『物曲 能」也。 時有生」 物 稻 所謂 曲 禮 愚 此,則人官、物曲 而 聾 生 「則 有 謂 劉 水之潤 聵 不及天 於冬,所 四 利,言物之材質偏 氏 逆地之理矣。 澤宜鱗物,丘 司 地 一句,以 曲 句,又專以行禮之所用言之 ,則逆天之時 彝曰:「君子謂 理 火,瞽矇脩聲,所謂『人官 偏 所不 有 下,火之炎 謂「 也,如「其 制禮之大體言之也。 宜 生者, 也。 天 可知。言地 時 有利』也。 陵 天時 矣。 籧餘蒙璆,戚 宜 有 亦 有 次 上,木之曲 生 羽 之不 舉 地理 以地 所 致 物,墳 此 也。 曲」之 利 難 知 所不 以天 之不 以 上言 所 也。 禮 得 見 不 衍 Ш

> 可專 也。 養」,「鬼神弗饗」,正 不遺,天地之所 指一 上言「鬼神」 事爲言也。 生養莫非鬼 而 下不言者,蓋 以鬼神即天地之功 又言「天不生,地 神之所 鬼 神 爲,不 體 不 物

用,而:

非有

三也

故 倫 故必舉其定國之數,以爲禮之大經。 釋文》:「殺,色戒反,徐所例反。 應氏 年雖大殺,衆不匡懼,則 ,以地廣狹。禮之薄 時 法 棋 下,合此二者,而定國之數可見矣。 常法也。 定國之數,謂 所宜也。 也。 之所 酌其禮之次第薄厚,以 鏞 日 : 禮之大倫 生 禮之薄厚,與年之上下,因 倫,次第 也 定國, 殺,謂 以以 也。 所 猶 地 厚,與年之上下。 入賦 穀 立 惟,音匡,又丘往反。」 地 廣 不熟 上之制禮也節 或 爲行 狹,因 有廣 税 也。 之數 也。 禮 狹,年 平 用 也。 禮之大 王 地 愚 財 之常 然後 有 乎 理 之 1

六六四

節 也 有餘 雖 X 財 歉 以 而 爲 衆 M 不 年之備 恐 懼 以以 也 上 之制 禮 有

之。《釋文》:「稱,尺證反,後皆同。」禮,時爲大,順次之,體次之,宜次之,稱次

至極細也。」
環氏安世曰:「五者,自綦大順,形之辨謂之體,事之義謂之宜,物之平原,形之辨謂之體,事之義謂之宜,物之平

「適」。 紀力反。」〇革、《詩》作「棘」。猶、《詩》作「欲」。聿、《詩》作《詩》云:「匪革其猶,聿追來孝。」《釋文》:「革,堯授舜,舜授禹,湯放桀,武王伐紂,時也。

權 天子之位,不能 經,而時者乃禮之權 隨 禮之因革 時 ,故禮莫大乎此。 中之大者也。 損益 一、必隨 乘時 自 乎時,而嬗授放伐,尤 《詩 非 創制 一倫 · 大雅· 文王有 有聖人之德 ,以達天下之大 以 下,皆禮 而 居 之

> 也。 伐,亦所以追堯、舜之道,事 故引《詩》以證之如此。 之志,而來致其孝耳。引之者,言湯、武放 豐邑,非急於成己之所謀,乃所以追先 聲》之篇。 蓋嬗授之跡易白,而放伐之心 革, 急也。 猶 謀 ,雖異 也 言文 而 道 難明,  $\pm$ 則 同 作

天地之祭,宗廟之事,父子之道,君臣之義,

倫也。

倫,故順次於時。 以事君,皆倫常之大者也。人道莫大於五祭,宗廟之事,與夫子之所以事父,臣之所

社稷山川之事,鬼神之祭,體 鄭 帝及百辟卿士之有益於民者。 體,鬼是人之别 曰:「社稷 氏 曰:「天、地、人之别 Ш 川是 體。」 地之别體,神是天之 愚 謂: 體 也 也 鬼,謂若 神,謂 孔 天 先 别 氏

宗 體由身而分也。三者之祭,其尊次於天地 其祭之之禮,由天地宗廟 神、日、月、星 廟,故體次於順 辰 之屬。 社稷、山 而分,猶人之四 川、鬼神

喪祭之用,賓客之交,義也。

賓客之交際,其事各有所宜者,所謂義也。 爲輕,故又次於體 喪祭之用,於哀敬爲末,賓客之交,視鬼神 道,父子之親也。 喪之主於哀,祭之主於敬,此所謂宗廟之 若其所用之財物,與夫

羔、豚 此之謂稱也。 而祭,百官皆足,大牢而祭,不必有餘,

《王制》:「大夫、士有田則祭,無田 鄭 喻 以爲俎。此指謂助祭者耳,而云『百官』, 鄭氏曰:「足猶得也。 衆 也。 謂「大夫薦 愚謂: 羔,小羊。豚,小 用羔,士薦 稱,謂稱牲之大小 用 豚」,即 則薦。」 此

> 皆足,謂牲之體骨足以徧及助祭者也。 稱,故又次於宜。 得宜之中,又酌乎多寡大小之分,則謂 小多寡之分故也。 羔、豚非不足,而大牢非有餘 薦則助祭者少,又牲小而俎骨 而祭,則助祭者多,又牲 羔、 豚而祭」是 也。 蓋禮之得宜爲義,就 白 大 官, 而 謂 ,由其稱乎大 俎骨亦大,故 助祭之人。 亦小,大牢

諸侯以龜爲寶,以圭爲瑞。家不寶龜,不藏 主,不臺門,言有稱也。

宜 宜,其稱非一,故從此以下更廣明爲稱之 孔氏曰:「此一節還明上經稱次之事也 得天之物謂之瑞,故諸侯受封於天子,天 者,諸侯之於天子,如天子之於天也,天子 事。諸侯以龜爲寶者,諸侯有守土之重, 以禮主威儀,尊卑大小,多少質文,各有所 須占詳吉凶,故以 龜 爲實。 以 圭爲瑞

六六六

《左傳》衛有「成之昭 天子、諸侯臺門,所以懸法象,望氛祲,大 所 高 藏之也。 者同,不得藏此大龜以爲寶也。 謂之實也。 也。若尋常所用之龜,掌於卜人者,不得 輕,不得寶龜,故臧文仲居蔡爲僭。 子與之圭 禽摯,雖得爲君執瑑圭以 玉、大弓」、《公羊傳》云「龜青純」,皆謂 之大事。《大誥》言「寧王遺我大寶龜 爲寶者,龜之大者尤神,君自寶之,以占 夫不得執玉,故不得藏圭 云『班 壁」,從可 出 於門,望之闕 瑞 魏」、《左傳》所謂 臺門,謂於門之兩旁築土爲 於 一亦謂之瑞。 知也。 大夫所卜之龜,蓋與 群 后 」,是也。 家,卿大夫也。大夫卑 然,故謂 兆」、《春秋》「盜 《書》云『輯五 聘,而不得家自 「觀臺 之闕。 云『圭』不 愚謂 卿大夫執 ト人所掌 」,是也。 《周 瑞」, 卿大 竊 以 禮》 臺 云 此 寶 國 龜 又

禮

有以 門。 保捍 特 氏所謂「卜龜」也。然寶龜未嘗不用以卜, 也。 禮》『卜宅』,是也。兩邊築闍爲基,基上 夫八寸。 夫不得 Ŧī. 臺,有木者謂之榭。」孔氏謂 八寸,則尋常所卜之龜,與卜人所掌同,孔 尺二寸。」此龜之最大者,天子所寶之龜 屋 白虎通》,天子之龜尺二寸,諸侯一尺,大 者。 起屋」,則榭 非大事不輕卜耳。 日臺門。 無與。 多 諸侯一尺,即諸侯所實之龜也。 此下 爲 爲 愚謂:《漢書・食貨志》云:「元 彼謂卜龜。 也。 、貴者: 天子七廟,諸侯五,大夫 〇此章言禮之義,有「時」以下 諸侯 十章,皆以雜明此章之義也 而非臺矣。臺門之設,亦與 〇孔氏曰:「案《三正記 有 **爾** 保捍 士亦有龜,故《士 雅》: 之重,故 「築土爲基,基 闍 者謂 爲 之 龜 起

684

説見《王制》。

二,上大夫八,下大夫六。 天子之豆二十有六,諸公十有六,諸侯十有

也 朝事之豆八,饋食之豆八,加豆八,羞豆 其東西夾各六。」 堂上之豆數亦如此。 六,則其餘著矣。《聘禮》:『致饔餼於上 及食大夫。《公食大夫禮》曰:『宰夫 遞減焉。《公食禮》下大夫六豆,韭菹、醓 二,合爲二十六。天子全用之,而公以下 二,其東西夾各十。子男之豆二十有四, 十,其東西夾各十有二。 侯伯之豆三十有 大夫,堂上八豆,設于户西。」則凡致饔餼 房薦豆六,設于醬東。』此食下大夫 鄭氏曰:「豆之數,謂天子朔食,諸侯相食 、昌本、麋臡、菁菹、鹿臡,此朝事之六豆 以此差而上之,則上大夫全用朝事之 愚謂:《周禮·醢人》 《周禮》:『公之豆四 而 自 豆 東

其説 羞固 也。」 公兼 有二十甕」、《醯 氏云: 『天子之豆二十有六者, 天子庶羞 羞百二十罋之等。皇氏以爲庶羞,其義 天子二十六豆,亦爲正羞,故熊氏以爲正 此上大夫八豆,下大夫六豆,皆爲正 者,説堂上數也。』今案: 庶羞與正羞 百二十品,籩、豆各六十。 今云「二十六」 同,但其數減於堂上耳。 禮》「致饔餼,堂上八豆,西夾六豆」,皆云 「韭菹」「醯醢」,則凡東西夾之豆實與堂上 掌客》上公:「飧五牢,食四十,簠十,豆 (豆,諸 壅」,此謂實於罋而陳之者 用 亦尚未晰。《周禮·膳夫》「王醬用百 非,而熊氏以爲正羞百二十罋之等, 朝 愚謂:皇氏以天子二十六豆爲庶 侯加 事 饋 以 人》「王舉,共齏菹 食之豆 饋食之四 而 〇孔氏曰: 爲 豆而爲十二,諸 十六也。 有此 醯物六 數耳 《聘 羞 别

《籩人》者惟朝事、饋食、加籩、羞籩之實 形 言,謂食禮之豆數 之説尤謬,而孔氏亦未之辨也。 已,初無所謂「六十籩」者。 牢,其所用不同,非可合而言之也。 豆、蓋大夫饗、燕之禮、上下大夫同 王亦全用二十六豆,而諸侯朝事、饋食、加 飲酒,不用於食。 飧之陳,牽四牢,米百有二十筥,醯醢 腥三十有六,皆陳。 四 十豆,五等諸 豆皆減其二,爲十八豆,加以羞豆二,爲二 醢百二十罋,皆豆實也。 左傳》周公閱聘魯,饗之有昌歌、白、黑 一十罋。」是豆配 鹽 + ,閱以備物辭。 四 + 有 侯同也。 死牢,醯 皇氏「籩、豆各六十」物 也。 壺四 饔餼九牢,其 昌歜,即朝事豆實之 若饗神之豆數,則 干 少牢》賓尸 若籩實,則見於 醢百二十罋 且籩實惟用 鼎、 簋 〇此節 + 死 也。 有 惟 又 牢 西己 百 醯 又 於 如 四 所 mi 有 生

禮惟用四豆,遠降於諸侯,故得用昌菹優又《少牢》賓尸禮亦有昌菹,蓋大夫饗、燕食大夫禮》六豆乃有昌本,饗、食法異也。昌本也。是天子三公饗禮無昌本,而《公

之也。

諸侯七介、七牢,大夫五介、五牢。 同牢。 牢,子男五介、五牢。 之卿也。 之王也,制禮,上物不過十二。」是天子十 無介,牢禮無等」,非也。《周禮 降其君二等,牢數則君以 七介、七牢,侯伯之禮。 介,副也。 二牢也。 左傳》吴徵百牢於魯,子服景伯 王 弔 臨 〇孔氏云:「不云『天子』者,天子 上公九介、九牢,侯伯七介、七 天子之介,由上公差而上之,亦 則 牢,謂主國 共 介鬯。」是天 卿大夫出 所致饔餼之牢 五介、五牢,侯伯 爵等,五等之卿 八子非 聘,其介各 鬯人》: 無 曰:「周 介矣。 數 也

當十二也。

《釋文》:「重,直離反,下同。」 天子之席五重,諸侯之席三重,大夫再重。

重席。 陸氏佃 紛 席,設于賓左。』此筵亦重設 席蓋亦單設。《大射儀》曰:『司宫兼 設,席則重也。大夫再重,有筵則席亦單 之筵也。 對文則别 筵》: 『設莞筵紛純,加繅席畫純,加次席 設,無加 黼 葦》傳曰 重篾席 『蒲筵常,緇布純,加 純 純。』席皆重設,是以 加 而鄭謂《公食大夫》孤 ,敷重筍席」, 曰:「天子之席五重。《書》曰 繅席畫純』,是不知《司 席 又天子五重,諸侯三重,筵皆單 ,散文則通,筵或謂之席,席亦謂 『設席,重 則筵蓋 重 爾。《公食大夫禮 席也。』《周官 萑 則 席尋,玄帛純。」在 謂之五 凡  $\pm$ 也。 席 爲 重。 重設。 几筵》『加 賓 是以 · 司 則莞筵 凡禮 卷 謂 『敷 行 重 几 之

繅席、 《司几筵》諸侯「莞筵紛純,加 《書》言「敷重篾席」,篾席即 己。 「三重」爲 帛純。」筵與席皆單 繅席亦重設,則三重也。 加加 繅席、次席皆重設,而 筵二在南」,是士席蒲筵而已。 酒》、《鄉射禮》「蒲筵布純」、《士冠禮 食》記云:「蒲筵常,緇布純,加萑 繅席』重設,主諸侯三重言之,《公食大夫》 几筵》云:「凡大朝覲 天子之席五重爲大祫之席,以《司几筵》言 在上之席而言重,則繅席 王「莞筵紛純,加繅席 萑 席」、主大夫再重言之、產席單設而 次席皆 愚謂:凡席以一爲一重、《司几筵》 時 祭之席。 重 設,并莞 設,則再 是不 畫純, 强爲 ,大饗射,凡封國 大夫之席,則《公 區别 ·知《司 亦 筵 次 加次席黼 重也。《鄉 重可知。 繅 席 爲 也 席 也。 Ŧī. 几筵》之 席尋,玄 熊 畫 然《司 重 》 蒲 純, 氏 純 也 飲 其 命

七〇

有所 席、底 之重 席 禮 爲 席 純 諸 ○ 司 大夫之席 夫再重」,再重者 之卿大夫,則 重者,亦惟 天子如此,則諸 上 河再重. 》同 畫 如 侯 降 此 純 數 有 几筵》諸 也。 其 此 ,《大射禮》賓有 豐 至《 筵國 亦 王 降 四 祭祀 餘 又《公食大夫禮》蒲筵 昨 燕禮》之賓、《大射》及《 席、筍席、蓋天子之席 必 殺 種 紛 無 事 賓 席亦 有 ,各因禮之重 侯"「昨席莞筵紛 以 侯之席以莞筵加 純 、饗射大禮用 加 當 于 三等,則 禮 種 席。 有 牖 加 如之。」 之 差降。 前 繅 席而 又《鄉 輕 席 亦 加席,蓋 天子、諸侯 如 畫 此 重 重設之 輕 之。 之, 《顧 純 飲 皆 爲 而 酒 重 而 繅 加 隆 命》 與《公食 或 用之也。 純 其 禮》「大 其 席爲三 禮 也。 加 次 殺 燕禮 賓 設 萑 餘 加 有 席 而 加 矣。 是 當 於 席 席 繅 篾 設 黼

> 然大夫 與 同。 再 者 萑 夫 席 來 重 去之。」則不過暫設以優之,而 此 《鄉飲酒》又云:「公升,辭一 而 同 聘者言之, 、《公食禮》有 以 己。 席 再重 種 五等諸 席 ,而《鄉飲 爲三重,與 非 明文。 侯無 也 、異席 大夫 孤、 酒 、諸侯之三重不 禮》「公三重」 之席 推 卿 之席 之可 究亦 席, 蒲 知 使 蓋 止 筵 也 亦 加

此 葬,三重六翣。 天子崩,七月而 以 多爲貴也 葬,五 大夫三月 重 1 而 翣。 葬 諸 再 侯 重 五月 兀 而

又有 者。」 緇 在 鄭 坑 翦, Ŀ 氏 木横三縮一 一, 茵 「折」。 曰:「重,謂 有幅、 愚謂: 在 下。 亦縮 蓋古之爲椁,累木於棺之四 一<del>,</del> 加 士: ^ 抗 二横三。』此士之禮 + 喪禮 抗 木 喪 席三,加茵, 禮 與 陳 茵 デ 器,「抗木」之上 也 篇 陳 葬者抗 器 用 疏 一重 曰 布 木

諸

侯爲

賓者

鄭

氏

兼諸侯

來朝

孤

卿

大

禮 也,折 棺,加 二。」是天子龍翣、黼翣、黻翣、畫翣各二, 畫翣二」,大夫「黻 以障柩。《喪大記》曰君「黼翣二,黻翣二, 由 匡,衣以白布而畫之,在路以障柳車,入墳 Ŧī. 士禮之一重者推之,則所謂再重、三重 • 重者,皆 而 縫 也,抗席也,抗木也,四者備爲一重 折於其上,次 上 人》 下 东 可 注云"「漢制"天子 周,故 見矣。 加抗席,次加抗 其下 翠二,畫翠二」。 翣, 形 藉之以 如 扇,以 茵 有龍 木 木爲 既 翌 周 茵 下

爲

八翣也。

○鄭氏

謂

上公四重,無據

鄭氏 曰:「爲賓用介,天子以四海爲家,既不爲 故 曰:「天子 無 介 謂 無介,無客禮 無 以 客禮陳擯介 也。」 也 孔 氏 其

> 少也。 子臨 實 諸侯之禮,殷膳大牢,而天子惟用犢,皆貴 之也。宗廟社稷用大牢,而 擯介以交辭,天子無客禮,故雖有介而 膳亦止一牛而已。」 子事天,故天子巡守,適諸 尊,貴質,故止一牛也。諸侯事天子,如 於祭天言「特牲」,於膳天子言「犢」,互見 陳之以交辭,故 掌客》:「王 餘 鬼神 事 亦 ,使介執鬯也。 有介,故《鬯人》『共 巡 狩殷國,國 日 「無介」。 愚謂: 特,一 侯境上,諸侯 膳,謂 君膳 祭 兩君相見,列 介 天 鬯」, 也。 以 惟 殷 牲犢。」 特性 膳 天 也

禮以脯、醢。《釋文》:「朝,直遥反。」諸侯相朝,灌用鬱鬯,無籩、豆之薦。 大夫聘

再裸而酢」,侯伯「一裸而酢」,子男「一裸鬱鬯之酒以禮賓也。《大行人》上公「王禮灌,獻也。灌用鬱鬯者,朝享禮畢,主君酌

六七二

天子 貴其 之也。 孔 適諸 祭天 在 此 耳。 以 之。 比 鬯之灌 鬯爲尊 不 氏 節 「, 凡 附 孔 醴 食味,故 蓋至敬不饗 特性 且諸 曰:「食猶飧也。 食、諸侯再、大夫士三、食力無 又自以 侯,膳以 無 疏謂祭天無鬱 而 未嘗以 獻 諸 諸 ,天子宗廟固用之矣,特祭天不用 籩、豆之少,卑其有籩、豆之多也。 加 脯,籩實。 酒 對社 侯殷膳大牢,亦未嘗有鬱鬯也 以 侯 一飧。 侯 が脯、醢 必 朝、 相 犢 鬱鬯之有 相 薦 朝 稷宗廟 ,對諸侯殷膳用大牢而言。 聘相對爲 朝 味 籩、豆, 之禮 諸侯德降天子,故再 醢 用鬱 ,則有籩、 |鬯,諸侯膳天子亦無鬱 而貴氣臭,不敢以 ,豆實。 天子 亦 無 用 | 鬯爲卑,非 惟 然 别多 大牢而言。 義 鬱 豆之薦矣。 以 ,與上文初不 鬯之 無籩、 大夫聘,禮 少 德 也 爲飽,不 灌 數 也 豆 天子 此 則 之 飧。 是 之 薦 鬱 褻 無

牢 乃 也。 飯告 飯。 農、庶人之屬 未 爲節,則諸侯九飯告飽,侑至十三飯,天子 禮》戶三飯告飽,侑 飯、再飯、三飯爲告飽之節,非 連食二口, 飧無數。」 得食,故呼食力。 十一飯告飽 七飯告飽,侑 大 E 夫、 體 告 再 佐食舉牢 乃再 食。諸侯 飽,亦連 飽,須侑乃舉牢 上佐食舉尸 天子禮 士 德 食。 轉 三謂連 愚 謂 : 極文,故 , 侑至十五 至十 以以 少, 食三 肺 禮 大夫、士禮又簡 正 牢幹」,乃又食。 故 稍 其無禄代耕,陳力就業乃 此等無德,以飽爲度,故 П 一脊授 食一 簡,故 食三口 至七飯。  $\equiv$ 飯。 ·體再食。大夫三 食 則 飧。 止 尸」, 口謂之 飯 是飯之侑皆以 食二 П 舉 也。 食 也 即 ^ 力 牢體 尸「食舉,三 止,舉 少牢禮》尸 口 也。 ,故食三口 一飯,再 孔 謂 少牢禮 則 是士 氏 乃 《特 I 止 一、商、 牢 以 再 飯 牲 舉 雖 四 謂

則 止 舉 牢 體 乃 再 食 也。 食 力 無 數者 禮

不 下 庶 也

大路繁纓 一就,次路繁纓七就。《釋文》:「繁,步

干反。」

鄭氏 周禮》『王之五路』:『玉路繁纓十有二 曰:「大路繁纓一就,殷祭天之車也

路,無 罽 謂 五五 馬 腹 别 色一市 帶 雕 也。 飾,乘以祭天,謂之大路。 日 纓,鞅 就。 就, 也。 成 染絲 也。 言五 而 織 色币 之日

翦繁、

鵠

纓。」

孔氏

日: 「

殷質,以

木爲

就

金路路

九

就,象路七

就,革路

五就,木路

尚質,故就之少 次路供卑用,故就多。」 成。 車既樸素,故馬亦少飾,止一 者爲大,多者 方氏 爲次。 就也。 周 則 殷

路也 『先路三就,次路五 多爲貴,故玉路十有再 此言『七就』, 就」,彼謂 謂 繼 就。 次 路 《郊特牲》言 繼 而 先路 又 之次 次 者

> 圭、璋特,琥、 也。 周 路 有 璜 五. 爵。 則 《釋文》: 殷 固 不 止 於三路

璜,音黄。」

也。 鄭氏 也。 此玉將幣。」 琥、璜 特,謂不用 日 : 主、 爵,天子酬諸侯,諸 孔氏 璋特,朝聘以 他物媲之也。 曰:「圭、璋,玉中之貴 爲 瑞, 侯 聘禮 相 無幣帛 怬 日

桓圭,侯執信圭,伯執躬圭。』諸侯以 聘君以圭,夫人以璋。』《典瑞》云:『公執 相見

帛,表德特達,不 之時,則璧以 及朝天子,是圭、璋 帛、琮以 加物 朝 也。 绵,是 聘 以 若《聘禮》 爲 加 瑞 束 帛。 皆 行 無 又 享 幣

云:『二王之後享天子。』『璋以 小行人》云以 玉『合六幣, 圭 以 皮」, 馬」, 注 注

璋特升,亦是圭、璋特義也 圭、璋者也。 天子饗諸侯,或 琥、璜 諸侯自相 是玉 劣

云: 『二王之後享后。』皮馬不上堂

惟

於

六七三

書

純

加 次

席

黼

純

諸

侯

祭

祀

席

蒲

筵

繢

也。

及諸侯 用玉。 E 義: 食以 禮賓之幣束帛乘馬。 賤,不能特達,故附爵乃通也。 日 幣, 圭以馬, 璋以皮, 皮馬不上於堂, 二也。 過 璜之玉將幣 是正 也。』則諸侯於聘賓唯用束帛乘馬,皆不 琥,半璧日 朝 **侑幣』,鄭云:『禮,東帛乘** 栖 聘用 自 義,下是兼義。 今號、璜送爵,故知是天子酬諸侯 酒 相 時 圭璋,無 酬 ,故云『琥、璜 璜 則 也 有幣 將 東帛之藉,一 愚謂 又『致饗以酬幣,致 半圭曰璋,爲虎形 送 爵』。 酬 **圭、**璋特有二 爵 馬 案《聘禮》 琥、璜 亦不 又 也。 有 琥 是 既

鬼 神之祭單席。

則《司 筵》「甸役則設熊席」,是也。 也 孔 氏 曰:「神 几筵》祀先王「設莞筵紛純,加繅席 愚 謂 道異 此謂 人,不假 祭外 神之席,若《司几 多 其宗廟之祭, 重 自 温 故

諸侯視朝,大夫特,士旅之。 也。 鄭氏曰:「謂君揖之。」 純 大夫以其等旅揖,士旁三揖』,是也。 之朝,所尊者多,故《司士》云『孤卿特揖 侯所尊者少,故大夫特,士旅之。 君衆共一揖之也。大夫貴,故人人得揖。 大夫則君人人揖之,若士則不問 士賤,故衆共得一揖。 ,加莞席紛 旅,衆 也 純 君出路 」,皆不單 是以 門視 孔氏曰:「特,獨 也 此以少爲貴 少爲貴。 諸 臣 一之朝 多寡,而 若天子

音亮。 之厚,丘封之大,此以大爲貴也。 有以大爲貴者: 皿,命景反,《字林》音 宫室之量,器皿 猛。 之度,棺椁 《釋文》:

節,自上公至子男,以九、以七、以 此宫室以大爲貴也。 方氏慤曰: 「《周官・典命》宮室以 天子之路謂之大路 Ŧi. 命數爲 一爲節

此諸

深廣 也。 貴 者 器 名 牛鼎之扃三尺,膷鼎 合九成規,諸侯合七成規,大夫合五成規, 度,言其所至。 弓謂之大弓,斗謂之大斗,俎謂之大房,此 於宫室言『量』,於器 度。』此丘封以大爲貴也。 量,言其 耳。 也 正 Ш. 狹 以大爲 於 《周 、其制有定,君路曰大路,特尊其 愚謂:器皿 重 官 貴也。 一,椁則 度、量,宫室、器皿皆有之, 冢 人 >: 周於棺,此棺 以大爲貴,若天子之弓 尊者之棺至於四 二尺之類。 皿言『度』, 以 爵等爲丘封之 至車之淺 | 棹以 互相 、所容。 重,卑 大 備 爲

者 有 散,悉旦 獻 升 鄭 以 日 氏 小 以 一反。」 爲 觶 E 散 貴 四 者: 尊 凡 升 者舉觶,卑者舉 觴 E 宗 角 廟 升 之祭,貴者獻 五 日 升 爵 日 二升 散。 角。 日 以 《釋文》: 陸 觚 氏 賤 佃

禮》, 當。 貴者 士。 升。」是爵與觶 之所舉與? 避尸之所用,故 解,而爲尊者之所舉。 尸」,此雖皆用 獻尸以角,又《郊特牲》云「舉斝、角,詔 算爵之始,而無舉角之事。 用 飲 又賓弟子及兄弟弟子各舉觶於其 日 以爵,諸臣 Ŧī. 玉 「貴者獻 疑天子、諸 | 琖仍雕,加以璧散、璧角」,是也。 獻 兄弟弟子舉觶於其 君 以 升, 洗玉 愚 爵, 謂 觶本作「觚」,鄭氏云:「當作觶。」|| 以爵,賤 ○《考工 爲 爵 以木爲之,觚、角、散 賤 角,然與卑者舉角之義 獻 旅 侯尸 加 獻 者 栖 爵 謂 卿 獻 有 用散 降 獻 了**,** 尸 記 者獻以散,所 以 旅 至 而 P 長,爲 飲九, 散 賓 쨈 用 也。 ^ 梓人》:「爲 《明堂 也。 與 之禮,酬尸 角 特牲禮》主 兄 君、夫 旅酬 以 而爲卑者 案《特 弟相 長 位

| 散 亦皆木 之始 謂 爵 不 戸 栅 飲 用 相 無 牲 是 爵 獻 獻 翌

謂 散,或以璧飾之,謂之璧散、璧 以 **觶、角皆刻畫爲飾矣。天子、諸侯之爵,飾** 散 副品 崇義云:「今祭祀之爵,刻木爵立方板上, 謂 之,蓋後世 爲之可知。 觚爲稜角,故謂之觚。《周禮 失之矣。 統》「尸酢夫人執柄,夫人授尸執足」,孔疏 爵 柄 玉 事,用散 兩柱三足,有流 亦 謂之玉 爲尾,即朱子《圖》所謂「極」也。 無 然其圖乃仍爲爵立方板,誤也。」 飾者也。 尊」,鄭氏謂 一之制耳。 朱子《紹 爵,飾以 有盤」者當得之。 散爵 興禮 其形 瑶謂之瑶 「無飾 無 製, 器 飾, 圖》 則 日 > 鬯人》「凡 角。 爵,其角與 則 散」,然則 爵範 朱子《圖 爵、觚、 與? 聶 銅 《祭 氏 爲

謂「圜 也。 壺以 亦以 聞 之尊爲方壺,士旅食者之尊爲圜壺,豈 皆瓦爲之,其爲一器 東箱,瓦大一」,是甒 謂 者之尊設於門外也。 上,而卿、大夫、士之尊設於門内,士旅 食者之尊。 大夫、士之尊。 用之尊也。 士冠禮》「側尊一甒醴」、《聘禮》「醴尊于 0 子男響 爲卿大夫之尊,缶以爲 盛醴以爲君尊。 燕禮》兩 易》曰 壺」者即 此兩君相響,故惟君尊設於堂 禮 瓦甒 : 『尊 缶 五. 方壺在東楹之西,以爲卿 兩圜 與? 獻, 即《燕禮》之「瓦大」也。 酒 一壺在門西,以爲士旅 無疑。 與大皆可 五獻之尊,饗子 《燕禮》卿、大夫、士 簋 壺與缶,皆以盛酒, 貳, 士旅食者之尊 用 此「瓦甒」,蓋 缶。」 以 盛醴,又 男所 所 食 愚

大夫五尺,士三尺。天子、諸侯臺門。 有以高爲貴者: 天子之堂九尺,諸侯七尺, 此以

以

小

·爲貴

也。

《釋文》:「甒,音武。」

鄭

氏曰:「壺大一石,瓦甒五斗,缶大小未

五.

獻

之尊

門外缶

門

内

壺。

君尊

瓦

甒

此

1:

所用之爵,蓋但有

疏

刻

而

無

他

飾

高爲貴也。

有 次 宫,於地上之圜丘奏之;函 以下爲貴者:至敬不壇,埽地 及一尺也。 堂九尺,謂堂廉至地之度也。 園壇, 壇下 之謂「祭天無兆」,非 及奏樂皆於壇,而行祭禮則在墠也。 中之方丘奏之。」蓋天地之祭,燔柴、瘞埋 瘞 埽地,即 至敬,謂祭天 五尺,階五等。 而 但言「兆五帝」,不言兆上帝、地祇,蓋舉其 《郊特牲》言「兆於南郊」,是也。《小宗伯 「埋於泰折。」《周禮・大司樂》:「圜 .階九等,盡等至堂,復爲一級,則每等不 い明其 墠也。 Ę 爲墠, 諸侯堂七尺,階七等。 也。 《祭法》曰:「燔柴於泰壇 士堂三尺, 階三等。 大宰》言「祀五帝」,掌「誓 墠 封 也。 外 土日 有 祭天之所,中爲 遗,遗 壇,除 鍾爲宫,於澤 一而祭。 天子堂九尺 即 地 大夫堂 兆 日 陳 鍾 也。 墠 爲 用

下爲貴也。《釋文》:「棜,於據反。」天子、諸侯之尊廢禁,大夫、士棜、禁。此以戒」「具脩」等事,而不言上帝,亦此義也。

法: 酒 皆長四尺,廣二尺四寸,深五寸, 高三寸。」 禁』、《鄉飲酒》大夫禮云『兩壺斯禁』,是大 寸,刻其足爲褰帷之形。謂之禁者 棜、《鄉飲酒禮》謂之『斯禁』。 無足,似木轝之棜,故因 畫青雲氣,菱苕華 象等六尊皆不用舟。又《燕禮 禁者、《司尊彝》鬱鬯之尊用舟以承之,犧 用斯禁,士用棜禁,如今方案,隋長局足, 棜者,無足,有似於棜,或因名云耳。 鄭氏曰:「廢猶 戒也。《玉 『瓦大兩,有豐。』是無禁也。 孔氏 藻》云『大夫側尊用 去 曰:「天子、諸侯之尊廢 - 爲飾。 也。 棜,斯禁 名爲棜。 棜上有 禁局足高 也。 》諸侯之 が、士 四周,下 漆赤中, 此謂 棜及禁 因 大夫 謂 之 爲

也。 戒也。」 禮,而云『棜禁在東序』,祭尚厭飫,不爲神 禁」、《特牲禮》「棜禁饌于東序」,是也 之「斯禁」,斯,滅也,斯禁,言其切地無 是棜禁即棜。 序」,鄭注云: 是禁又名於 斯禁者,以禮樂賢從大夫 用 夫 夫之棜無足,故但謂之棜。 上之四周者謂之棜、棜下之足謂之禁。 禁,是士用 用 士之棜有足,故謂之禁,又謂之「棜 斯禁也。 愚謂 禁 禁也。 《士冠禮》、《士昏禮》承尊 「祭尚厭飫,故與大夫同。」 二注不同,疑此注爲是。 也。 鄭注此記云「士用棜禁」 《特牲禮》「棜禁在 鄉 対影是 也。 《鄉飲酒禮》謂 士 《特性》 禮 而 足 大 蓋 東  $\dot{\pm}$ 皆 用

孔氏曰:「人君因天之文章以表於德,德反。熏,字又作「纁」,許云反。」 大玄衣纁裳。《釋文》:「卷,本又作「衮」,同古木體有以文爲貴者:天子龍衮,諸侯黼,大夫

繡裳」、是特言黻也。』」
編裳」、是特言黻也。『諸侯以下文稱、故天子龍衮、纁裳。今言『諸侯大夫、元士爵弁、玄衣、纁裳。今言『諸侯以下,其中有黼、孤希冕而下,其中有黻、以下,其中有黼、孤希冕而下,其中有黻、及黼」,是特言黼也。《終南》篇云「玄衮特舉黼、黻而言耳。《詩・采菽》云「玄衮特舉黼、黻而言耳。《終南》篇云「黻衣、趣篇」,是特言黻也。』」

文》:「繰,本又作「璪」,亦作「藻」,同子老反。」夫七,下大夫五,士三。此以文爲貴也。《釋天子之冕,朱緑藻,十有二旒,諸侯九,上大

七旒也。下大夫五者,天子之中、下大夫也。諸侯九旒,謂上公也。上大夫七者,也。諸侯九旒,謂上公也。上大夫七者,也。諸侯九旒,謂上公也。上大夫七者,是藻五色,而云「朱緑藻」者,謂五采之中藻,雜采也。冕以雜采絲繩爲旒。天子之

伯 但 以 以 禮 公一命衮。」三公八命,加一命而 以論天子之卿、大夫、士也。 侯 四 而 士 夫希冕,則上士玄冕宜矣。 冕,加一命爲 差之,則孤卿六命,宜服毳冕,加一命爲 旒,則三公之不加命者宜服鷩冕矣。 士三者,天子之上士玄冕三旒 司 之差次 但服 ,則服驚冕七旒 則然,爵弁無旒,諸侯之士 爵 此 命, 爲飾,故進而 曰「士三」者,蓋冕必 服 爲夏、殷制,謂「周家冕旒隨 弁無旒」,非 加一 爵弁,則自希冕以 冕之服 也。 命 子男,則 而 希冕三旒,則 有 爲子 與希冕同 也。 也。 冕旒 · 男, 而《弁 服毳冕五旒 大夫四命,宜服 有旒,而 則 下頓降二等,非 隨 禮窮 若天子三等之 毳 玄冕宜 《王制》: 師 則然,而 命 也。 冕 數 》僅 服衮冕九 則 命數,士 五. ,五等諸 旒 也。 〇孔 言五五 旒 同 以 非 不 旒, 也。 也 可 大 希 侯 此 可 疏

> 冕」, 則 希冕服、玄冕服同冕可知 蓋 以 冕 配 服 則 爲 六, 而 冕 則 止 有

至敬無文者,謂祭天襲大裘而不裼也。衣有以素爲貴者:至敬無文,父黨無容。 具希冕朋 玄冕朋同冕古矢乡

以 退走。」父黨至 士相 裼 爲文,以襲 見禮》曰 親,故 「庶人見于君,不 爲質。 見之不 容,謂 趨 爲 爲 翔 趨 爲 容 翔之 進

容也。

作『鼏』,莫歷反。 反。越,音活。犧,鄭素何反,王如字。 作『瑑』,丈轉反,徐又依字丁角反。 布 大圭不琢,大羹不和,大路素 頭,樿杓。此以 樿,章善反,又市戰反。 素 爲貴也。《釋文》: 大羹,音泰。 而 幎,本又作『幂』,又 越席 杓,市灼反。」 犧 「琢,字又 和, 尊 胡卧 疏

○鄭注:「鼏,或作『幕』。」

路,殷路也。』樿,白理木也。」 孔氏曰:當爲『篆』,字之誤也。《明堂位》曰:『大鄭氏曰:「大圭長三尺,杼上,終葵首。琢

飾也。 氏 謂 爲之者也。 大路素者,謂祭天之大路質素而 勺、疏勺、蒲勺,則 也。 古, 但 鳳羽婆娑然,故謂娑尊。』疏,麤也。 云: 肉汁也 首,而無 凡 祭祀,以 大 祭天之席,結藁 一煮肉 圭 禮圖》云:「畫以牛形。」《周禮》先鄭注 運》言「越席」,謂 木不飾爲樿,樿櫛、樿杓是 但 『刻尊爲犧牛 以 一、天子 越,結也。 廳 而 琢桓 肉 飲其 疏 布 不 汁, 此言「越 和 布 爲 朝日月之圭 蒲之文,尚質之義 無 巾幂八尊。』」 巾 汁,未知 謂 以 於勺加 之大羹。 之形。』鄭云:『畫尊作 鹽 結草爲 覆尊 席」,與「大路」連文, 祭宗廟之席,結蒲莞 梅 調 也。 也 也。 飾 和,後人祭既 席,謂之越席 矣。」 犧尊 大古初變腥 但杼上 《幂 陸氏 也 也。 無金玉之 者,先 犧尊, 阮 人》云: (佃日: 愚謂 鼏,覆 一,終 大羹 若龍 儒 重 葵

氏之説 尊」,此雖 虎、雉爲 刻 似。 尊』。然則毛、鄭『獻』、『沙』二字讀與『 器 州 大夫子雅送女器,有尊作犧牛形。 彝 尊、象尊,皆以鳥獸名其器,則其 犧、象二尊並全刻牛象之形,鑿背爲尊。 形婆娑然。又《詩傳》疏説 娑」之娑義同,皆謂刻鳳凰之象於尊,其 獻。』又《詩 謂 今按《司尊彝》 發齊景公冢,得二尊,亦作牛形。 影『犠 無别 而畫之爲其象,則 雞彝、鳥彝、虎彝、蜼 以 是也。 ,如先鄭之説 尊 翡 飾 在 耶? 在 翠 . 古器 爲 西 頌》毛 若如後鄭之説 雞 飾 至謂「爲牛形 彝、 或 注云: 有 聶 ,則虎彝、蜼 犧 鳥彝、虎彝、蜼 傳説,『用 之,魏 氏 尊、象 、钱, 彝,先儒 晉  $\tilde{\pm}$ 禮 時 然 永嘉中,曹嶷 則 肅注《禮 啚 尊 魯 而 形 | | | | | 沙 亦 鑿 彝 犧 形製當 周 郡 製 羽 皆以 地 其 贵 尊 然。 禮 彝、 詭 中 以 背 與 亦 於青 異 得 作 鳥 爲 犧 以 羽 婆 飾 禮 爲 相 阮 齊

陶 樿杓 用以 尊,以素爲貴,但據疏布鼏言之,因 杓」亦以祭天之説通之。 疏 爲一物」,是也。龍勺、疏勺,斟酒之勺也 洗東,有枓。」賈氏《士冠禮》疏謂「勺與枓 杓有加於尊而用以 古天子、諸侯宗廟之所用也。 置之六彝、六尊之列皆不倫,未 祭皆有之,「犧尊」以下則祭宗廟之禮也 祭天之事,若大圭則 人》「爲飲器,勺一升」,是也。 言「尊」,非以犧尊爲素也。 家見大路乘以祭天,遂欲 爲 ,不當用 誤 周禮 也。 鹹 水者、《少牢禮》:「司 一又以 夏、 犠 尊,則謂犧尊爲夏、殷禮,用 殷質 的构爲 於周,夏、殷祭天用 **鄭酒者、《考工** 爵,謂祭天爵 朝 此 節 日 又以祭天器用陶 所 惟 杓即 於「犧尊」「樿 搢,大羹則 大路、越席 宫設 有加 疏 勺 布 可 不用玉 罍 於 記 據 世 鼏 所 壘 以 水 LI 而 犧 凡 梓 爲 于 而 然 連 鼏 爲

> 尊,而 矣。 人 》: 果如其言,則經文雖簡,亦不 地尚 宗廟之所 爲 不專用於祀天亦明矣。 此又以「疏布鼏」係「犧尊」言之,則 廟之所同也。 之,故言「八尊」於上者,以其爲祭天地 幂六彝。」蓋 爵 質」, 《禮運》言宗廟之禮而 也, 「祭祀,以 周 顧用 何以 獨 解 也。 宗 陶 畫 又 言「六彝」於下者,以其爲 廟 耶? 疏 布 用 鄭氏 有 布 巾」謂「宗廟 樿 鬱 巾 祭天器 解「疏布 耶? 鬯之灌 幂 八尊 日「疏 用 當 巾 陶 周 止 可 而 以 一謂 布 一, 领,以 於如 以 禮 天 書 疏 以 「祭天 布 文。 地 布 幂 • 此 鼏 無 匏 巾

反,又所例反。」殺。」此之謂也。蓋言稱也。《釋文》:「殺,所戒殺。」此之謂也。蓋言稱也。《釋文》:「殺,所戒孔子曰:「禮不可不省也。禮不同、不豐、不

孔 同 ,氏曰: 察則無 「省, 察 由 也。 可 知 禮 既 不 有諸 司 謂 事 ,所趣

说不同,然其義皆通。 小、文素之異也。不豐不殺,孔氏、馬氏之 不以爲不足。」 愚謂:此引《禮運》孔子 不以爲不足。」 愚謂:此引《禮運》孔子 不以爲不足。」 愚謂:此引《禮運》孔子 不以爲不足。」 愚問:此引《禮運》孔子 不以爲不足。不豐者,應少不可多。

樂,五教反。」●○今按"樂音洛。貴乎? 故君子樂其發也。《釋文》:「詡,況矩反。句。詡萬物,大理物博,如此則得不以多爲樹之以多爲貴者,以其外心者也。德發揚,

事 謂 禮之多、大、高、文者,皆多之屬也。 夫儀文之盛,凡以求 物,其理至大,其事甚博,非備物不足以 也。天地與聖人之德發揚昭著,徧於 發其心於外 故君子之於禮樂,其發見於外,而 也。 詡,普也,徧也。 稱 乎德之盛大而 外心, 物猶 極 稱 萬

則得不以少爲貴乎? 也 極也。 ]精微,觀天下之物無可以稱 也。 之體,天地之於穆不已,聖人之至誠無息, 位天育物,人之所得而見者也。 發揚者德之用,天地之大生廣生,聖人之 外之備物,凡以求象夫德之精微而已。 慎於幽獨,務於在内之致誠,而不專 妙,而物無 謂專其心於內也。德産,猶德性也。致, 禮之少、小、下、素者,皆少之屬也。 之文而歸極於忠信之本也 之於外,自忠信之本 人所不得而見者也。 樂其發者,由内 慎其獨者,由外而約之於内,自 天地與聖人德性之極至,精 可以稱之,故君子之於禮,必 是故君子慎其獨也 而 求 盡 其德者,如此 夫 義 精微者德 理 内心, 深微 之 事 而 文 致 平 理 推

❶ 「教」、《釋文》作「孝」。

禮之以少爲貴者,以其内心者也。德産之致

禮記卷二十三終

可寡也,唯其稱也。《釋文》:「樂音洛。」之爲美。是故先王之制禮也,不可多也,不古之聖人内之爲尊,外之爲樂,少之爲貴,多

六八三

## 禮記卷二十四

國史館纂脩孫希旦集解賜進士及第翰林院編脩

## 禮器第十之二

之攘。《釋文》:「匹士,本或作「正士」。攘,如羊反。」 是故君子大牢而祭謂之禮,匹士大牢而祭謂 竊君子之禮。」 豚,遣奠、卒哭、祔少牢,若用大牢,則是盜 介乃行,故謂之匹。攘,盜也。 謂 牢,遣奠及卒哭、祔用大牢,故祭用 孔氏曰:「君子,大夫以上。 之禮。 匹士,士也。 愚謂: 士賤不得特使,爲 大夫常祭少牢,殷 大夫常祭 士常祭特 大牢 而 少

祭大牢,故大牢而祭謂之禮。

士常祭特

管仲鏤簋、朱紘,山節、藻棁,君子以爲濫矣。禮,失其宜故謂之攘。 以申明前章言「宜」之義。得其宜故謂之牲,殷祭少牢,故大牢而祭謂之攘。此章

釋文》:「紘,音宏。棁,章悦反,依字當作『棳』。」 節 頭 凡 禮》有「金敦」、《士喪禮》有廢敦、瓦敦。 敦」,而後云「分簋、鉶」,是簋 弁冕之笄,以固 簋,謂鏤玉 子、諸侯以 敦無足,瓦敦無飾,則士吉祭敦有飾矣。 兩 鏤,刻也。 紘、士緇組 名也。 斗栱也。 飾,金次玉 ,畫藻於棁,天子之廟飾 《周 以 簋 即 敦 紘纁邊,大夫之紘 玉,大夫以 棁,梁上侏 飾簋也。 禮·九嬪》「贊玉齍」、《少 一,象次 冠者。 也。 金。 紘,屈 金、士以 天子朱紘,諸侯青 《特牲禮》前云「 儒 然則敦之飾 也。 柱 未聞 組 也。 與敦一器 濫 象與? 爲之,繫於 謂 畫 節 Ш 放溢 天 廢 牢 於 鏤 兩 柱 而

敦啟會面足。」啟會而猶云「面足」,則是爲 得 其 其形 有 焉 本,大夫達棱,諸侯斵 而 日 無 真 形 甲有腹。 :「劉原父得 踰 古 外方内圓 節 如 書 簋 桶 也 Ш 不同也。」 藻之禮 但於其蓋 今禮家 而 鄭 古煮簋 小隋之,●似龜 氏 也。」〇歐陽氏《集古 作 曰:「宫室之飾,士首 刻爲 而礱之,天子加密 簋,亦外 愚 於扶風,簋 心謂:《 龜 形 與與 方内圓 士喪禮 有首 容四 原 父所 前 尾, 升, 録 石

父所得 得 啚 龜 形 之簋外方内圓 》謂「外圓 者 者爲 不 ·專 真古簋 内方曰簋 在 於蓋 ,則簠當外圓 蓋 矣。 ,外方内圓 可信也。 《集古 内 録 日 又原 方,而《禮 》謂 簠,亦 父所 劉 原

氏

日 :

「言二大夫皆非

也。

反。朝,直遥反。隘,本又作「阨」,於賣反。」朝,君子以爲隘矣。《釋文》:「澣,又作「浣」,户管晏平仲祀其先人,豚肩不揜豆,澣衣濯冠以

失之也

孔氏 周 不華也。 又過小,併豚 豆言之。 人貴肩 曰:「大夫祭用少牢,今平仲用豚, 大夫須鮮 也。 隘,狹也。」 兩肩,不揜豆也。 肩 在俎,不在豆 華之美,澣 愚謂 · 喻 濫 衣 必言肩者 濯 而 其 僭 冠,是 少 假假 豚

隘而逼下,皆失禮之宜者也。

紀散而衆亂。 是故君子之行禮也,不可不慎也,衆之紀也。

隘,則綱紀散而尊卑上下之分亂矣。 鄭禮爲衆之綱紀,行禮而或失之濫,或失之

道矣。」 我戰則克,祭則受福。蓋得其孔子曰:「我戰則克,祭則受福。蓋得其

神人,和 得其道者,謂慎 上下。 於行 禮 得 禮 則 也。 人 和 蓋禮者所 而 神 故 以 治

● 「隋」,四庫本《集古録》作「堶」。

云此者,蓋以理決之爾。 戰則克,以祭則受福。然孔子未嘗戰,而

本又作「保」。」
本又作「麾」,毁皮反。蚤,音早。葆,音保,又保毛反,善嘉事,牲不及肥大,薦不美多品。」《釋文》:
若子曰:「祭祀不祈,不麾蚤,不樂葆大,不

露而 鄭氏曰: 宜 嘉 長 葆者,褒也,崇高之稱 而 蚤 言褒也。」 人所善 麾之言快 昏 事 短 祭,不以 存親 自有常宜 冠 先 若  $\Xi$ 下香 時 麾。 非爲 也。 「祈, 無親者,昏三月祭以告廟,冠畢 霜露 也 也。 孔氏曰:「祭祀 不樂葆大,謂器幣也。 祭有時,不 求 ,不以貴者 就親 孝子 未至 人生成人自宜 也。 ,感霜 祈 而 也。 祭祀 福報 先 以先 露 貪 時 祭之器幣,大小 也。 不 之禮,爲感霜 高 蚤 而 · 爲 人爲快。 一設爲 思 冠 大 麾,快也 求 爲 親 嗣 之也 快也 福 思思 葆之 親 也 親 齊

賜也。 設祭。 祭器 蓋 祭,自爲存親,不因此而舉也 保大、嘉事,以之告祭則有之,若四 若天子克敵服遠,諸侯、大夫著勳伐,見褒 氏之説爲是。 《春秋傳》所謂『保大』。」 埽 君子之言以明行禮貴乎儉約 薦,謂籩、豆也。 籩、豆之品未嘗不多 大,或貴 美也。」 美多品者,薦祭品味,各有其定,不以多爲 角握,社稷尺,不必須 曰 濫 地 博 與 有定,不求多於常品之外 而 碩 牲 隘 不樂保大,謂不爲樂此而 祭 肥 小,各有所宜,不必皆及肥大也。 皆爲 不 禰 陸 腯 及肥大者 ,並是有爲而 氏 」,是牲未 葆猶有也,謂有盛大之業, 失宜,而 佃 曰:「葆大,讀 並 嘗 謂 濫之失尤 及肥 然,非 郊 不 愚謂: 肥 牛 ,而不尚乎侈 大也。 繭栗,宗 以 大,然或貴 奉牲以告, 祭也。 謂善之而 如 甚,故引 爲 葆大,陸 保大。 美 時之 薦 也 不 廟

不,亦

作『弗』。

奥,依注

作『爨』,七亂反。

盛,音成。」○鄭

祈之科,而《禮記》祭祀不祈,何義也?』鄭大也。○《鄭志》「趙商問:『《周禮》設六

答云:『祭祀常禮,以序孝敬之心,當專一祈之科,而《禮記》祭祀不祈,何義也?』鄭

其志而已。祈禱有爲言之,豈祀之常

不求其爲,而尸嘏主人曰:『皇尸命工祝,也?』又鄭《發墨守》云:「孝子祭祀,雖

承致多福無疆于女孝孫,來女孝孫,使女

之言畏,熹彖子系之之真下次学其且考,之。』此亦有祈福之義也。」 愚謂:祭祀受禄于天,宜稼于田,眉壽萬年,勿替引

之心而達之,乃事死如事生之義,與祭祀緣祖考之心莫不欲福其子孫,故本其慈愛之有嘏,蓋緣子孫之心莫不欲孝其祖考,

孔子曰:「國文中安印豊? 夏父卑不祈之義初不相悖也。

盛於盆,尊於瓶。」《釋文》:「父,音甫。 不綦,音忌,而弗止也,燔柴於奧。 夫奧者,老婦之祭也。孔子曰:「臧文仲安知禮? 夏父弗綦逆祀

注:「奧,當爲『爨」,或爲『竈』。」

器也。 之。 也。 不 閔置僖下。 宗伯,佞文公云『吾見新鬼大,故鬼小』,以 僖 閔爲君,僖時爲臣。閔少而 之子,閔適而 神,乃燔柴。 尸卒食而祭饎爨、饔爨也。時人以爲祭火 伯之爲也。 大廟,躋僖公」,始逆祀,是夏父弗綦爲宗 之,不正禮也。 鄭氏曰:「文仲,魯公子彄之曾孫 而 能 死,僖子文公立,大事 祭爨神,言其有功於人,人得飲食,故祭 諫止,故爲 莊、文之間爲大夫,於時爲賢 明此 孔氏曰:「魯閔 是臣在君上,逆亂昭穆,文仲 奥當爲『爨』,字之誤也。 祭先炊,非火神, 老婦,先炊者也。 少,僖庶而長。 文二年『八月丁卯,大事 不知禮。 公、僖公,俱是莊 于大 禮,祭至尸食 死,後乃立僖 莊公死,而立 廟。 燔柴似 盆、瓶、炊 是是 臧 弗綦爲 孫 以 竟 失 辰

六八七

報之。 《春秋》文二年:「大事 於五祀之竈矣。盆所以淅米,瓶所以汲 祭爨,則不過 夏,乃地示之卑者,已非火神之比,若祭畢 燔柴祭之者也。 心爲大火, 蛛爲 月、星、辰」,是也。 柴者,天神之祭,《大宗伯》「以實柴祀 弗綦諂文公而躋僖於閔 西 僖之君,僖雖長而嘗爲閔之臣,則閔當 爲昭穆,則大袷當同位。然閔雖少而嘗爲 昭穆,而合食於大祖 大給也。大給之禮,毀廟未毀廟之主列敘 文仲又不諫 云:「古之火正,或食於心,或食於咮 ·而居僖之上,僖當在東而居閔之下。 弗 綦 止 謂 祭先炊老婦之神,其禮 ,又爲不 爨神爲 鶉火。」此火神爲天神,當 電爲五祀之一,其常祀 爨 ·知禮· 火神,遂燔柴祭之, 而閔、僖爲兄弟,不 于大廟。」大事者, 即 ,則於禮逆矣。 竈 也。 也。 **定** 愚謂: 又 傳》 日 降 燔 在 在

引此 又稱 穆,閔公爲昭,僖公爲穆。按魯自魯公至惠公 公爲 爲 傳》:『躋僖公。 故云「先禰後祖」。』此《公羊》之義。案《外 爲兄弟,以繼代言之,有父子、君臣 也。』何休云:『惠公與莊公當同 又況 祀不順也,燔柴於爨非體也,不稱且不可 燔柴,雖皆弗綦所爲,然是時文仲爲正卿 弗綦以天神之禮祭之,失禮甚矣。 蓋 水。 上,隱、桓與閔、僖當同 公羊傳》云:『逆祀奈何? ·穆。」』以此言之,文公上至惠公七世,惠 因 失順 昭,隱公爲穆,桓公爲昭,莊 ',以明前章言「順」與「體」之義。 爲賢,而 其 祭爨之禮,用盆以 所用之器以 與體 不 乎? 能 弗綦云:「明爲昭,其 正,故孔子 爲禮 盛食, ) 孔氏 北 一,乃簡 面 西 用 先禰 曰:「文二年 責之。 上。 略之甚者 瓶 以爲 南 而 閔、僖 逆祀、 之道 公爲 記 後 蓋 面 次 者 西 祖 逆

706

竈。」 昭,非 関 氏同《 爲昭 立 穆,❶設令兄弟四人皆立爲君,則祖 論。 者,宗廟祭後,直祭先炊老婦之神,在於爨 者,止是竈之神,常祀在 子考公以下,遞 而 廟 共十三君,止 俎及豆、籩,設於竈陘,又延尸入奥。 三者不同 『兄弟無相後之道,正以 公祔 廟之法,未 盡 即當從毀,知其禮必不然。」斯言 《左傳》疏 矣。 ,閔公爲穆,自此以下,昭穆皆逆。 中昭穆 或 愚謂:兄弟不爲 祖 語 但 廟, 爲八 也。」又曰: 『》之説 祝融是五祀之神,祭於郊。 兄弟 敘 世。 則 知 昭 云:「若兄弟 穆,故惠公當爲昭。 如 祖 同 魯公爲世 與與 何。 遷 面, 袷祭之位 而 何 若僖公之時,遽 高 昭穆,先儒 僖在閔上,謂之爲 「祝融并奥及爨, 休 室,其 夏,以老婦配,有 祖 義 毁,高祖 相 廟 異。 不毁。 代 今躋 . 固 即 鄭云: 己 可 然, 自魯 父之 僖 謂 爲 不 有 奥 . 得 服 以 定 而 簡 昭 公 公

> 當 聞 遷 則 神 孔 神 神 薄 無 几 蓋 時,閔公特立廟於祖廟之南,至文公時,僖 與 公袝,則閔公之主遷藏於祖廟之夾室與 即就 先炊之尊 更立 也。 後 在僖公之時,雖 於 ,其配食之人不可考,若祀竈以 氏 ,迎尸於奧而祭之,祭畢,所祭者先炊之 如 世,固不患於僭,而文公爲僖公子,閔 、毁,揆之人情,皆所不安。 是 時 謂先炊即 而 耳。 享,而 廟 當時逆祀之舉,於大給見之,而 毁,而僅與於大給之祭,亦不患於 竈 制 坚 竈即是爨,但五祀所祀者 ,則意其立 與 而 文公之世, 配於竈者,非 竈等,其祭之豈 祭,其神不 廟數增多,而 廟、遷、毀之法,正 閔、 同 僖 也。 ,其禮亦異 疑 同 所祭 先炊配 五祀之 苟簡若 僖 廟 公之 止 而 竈 不 公 於 ? 無

0

<sup>「</sup>爲」、《春秋左傳正義》作「異」。

六九〇

此 乎

禮 設之不當,猶不備 也者,猶體也。 可以不備,而設之又不可以不當。 也,此以人之體喻禮之體也。 此又承上文而申言體之義也。 也。《釋文》:「當,丁浪反。」 體不備,君子謂之不成人。 人之肢體 禮也者,體 爲禮 亦 不

不可 禮 由户者。 有 百 益 大有小,有顯 一,曲 顯者 禮 示 三千,其致一也。 可 有微。 揜,微者不可大 大者不可損,小 未有入 也。 室 故經 者 而

以爲

體

矣。

然。

如祭爨

而

燔柴,則設之不當,而失所

不

如《冠禮》有三加,《昏禮》有六禮之類,其 類,其目有三百也。 者常行之禮,如《儀禮》、《冠禮》、《昏禮》之 謂之小,外心謂之顯,内心謂之微。 此又以申言稱之義也。 曲禮 貴多謂之大,貴少 者儀文之委曲, 經禮

> 常、變。」 吕與 恐不然。 如坐如尸,立如齊之類,皆是其 禮》中士冠、諸侯冠、天子冠禮之類。 可外也。 小、微、顯之宜 大節,目有三百,餘如始加、再加、三加,又 人之所行莫不由之,如入室之必由户而 目 有三 叔云『經便是當 千 〇朱子曰:「禮儀三百,便是《儀 也。 經 中自 禮文雖繁 ,則其致 有常、變,緯中亦自有 行底,緯便是變底』, 也。 而 莫 惟 不 中 其 得 (然,故 小 乎 此是 自。

若,有美而文而 君子之於禮 也,有所 誠若 竭 情 盡慎,致其敬 而 誠

然也 外心雖 竭情盡慎,致 文,禮之外心 不同,而 者 其敬,禮之内 也。 莫不實 若,順 (順乎天 心者 也 理 禮 也。 之所當 之内 美 而

君子之於禮也,有直而行也,有曲而殺也,有

也。 進 也 而 《釋文》:「摲,所監反,又所覽 等也,有 而 文也 順 而討也,有 一,有放 而 摲 不致 反。 而 播 也 放,方往反。 ),有順 也,有 推 而 不 摭 而

致,本或作『不至』。 摭,之石反。」

致 禮 禮 立 放 推 下,降殺以 殺 摲 上 賤皆遂服 謂 直而行,謂若始死哭踊 户,殷 而 事 旅 |順之以至於下,而遞有所去,若天子以 、下殺是也。 委 而 而 謂 文, 户,及諸 進 酬 曲 播 所 謂 ,謂取 逮賤,及天子燕享來朝諸侯是也 而 放於古之禮而損之者,如古者不 坐尸,周旅 謂 是也。 減殺,若喪禮變除,及 推 所效於古之禮 兩是也。 摲, 芟也。 上之所 侯朝享天子是也。 下之所有以進之於上,若祭 經而等,謂若三年之喪,貴 討,去也。 酬六尸是也。 有 以 無 播之於下,若祭 而益之者,若夏 節 順 也。 而 播,布也 放,效也 討,謂 上殺、旁 曲 放 而 而 殺, 不 自

> 摭,取 降, 殺」一句爲反對也。 義,「直而行」「經而等」二句,實與「曲 士三之類是也。 而 反對爲文,獨『經而等』無反對。」今詳 遞有所取,若天子一食,諸侯二,大夫、 上下各以 也。 順 其 而 摭 服 項平父謂:「此九條皆以 周 謂 〇此以承上章而 則有尊降之法 自 E 順之以至於下 是 起下 玩 也 而

殷因。三代之禮一也,民共由之,或素或青,夏造

章也。

鄭氏 語 亂,或以青爲黑,黑爲黄,民言從之,至 之所得而變革者也。 不異於道。 『黑』言『素』『青』者,秦二世時趙 猶存也。」 ,禮之大體,聖人之所不得 曰 「素尚白,青尚黑者 或素 愚謂:三代之禮,異於迹 或青者,服 夏造 殷 色異尚,聖 因者,三綱五 而變革者也。 也。 高 欲作 今 而

從也 之而 其 不 變者 不謬,是以達之於下, 固 守之以 爲 經,其 而 所 變者,亦 民 莫不 · 信 考

在「周坐尸」之上,簡錯在下耳。下。今詳下文「其禮亦然」句,其文義當有所承,此二句必更立尸而卒祭,殷坐尸,此節舊在「其道一也」之

事無事皆坐也。」 乳氏曰:「夏禮,尸有事乃坐,积用立也。 八坐神坐,故惟飲食暫坐,不飲食則立也。 外坐神坐,故惟飲食暫坐,不飲食則立也。 學氏曰:「夏禮,尸有事乃坐,殷尸無事猶

「韶侑,或爲「韶囿」。」《釋文》:「侑,音又,本或作『宥』。武,音無。」○鄭注:周坐尸,詔侑武方,其禮亦然。 其道一也。

勸尸飲食無常,若孝子之爲也。孝子就養『無』,聲之誤也。方猶常也。告尸行節,鄭氏曰:「言此亦周所因於殷也。武當爲

尸也。 其道一者,言三代之禮,其道 方,言隨尸之所 謂告尸威儀,勸尸飲食。 無 無方,亦因於殷禮,故曰『亦然』也。 者,其 方。 用 孔 至 氏 一誠 티 : 在 之 詔, 而 道 詔 侑之,無 也。」 告也。 周禮坐尸及詔 同 侑, 愚 常 歸 謂 所 勸 於敬 其道 也 也 無 侑

周 作「遽」,注云:「周使六尸旅酬,不三獻,猶遽而略 釋文》: 旅 殷禮 鄭氏 不與子孫爲旅酬,餘文、武并親廟六尸,南 廟 命 酬 稷之尸,發爵不受旅。合錢飲 或 相 酬六尸。 ,后稷之尸在室西壁 「醵,其庶反,又其約反。 「醵。」 而益之也。 酌 曰:「周旅酬六尸,使之相酌也。 似之也。 曾子曰: 孔氏曰:「周 完 王 給祭時,聚群廟之主於大 居 周 東總 明堂禮》: 與,音餘。」〇王 禮其 旅酬六尸,又因 ,爲發爵之主 酒 猶 『仲秋 爲 醵 醵 與 肅 旅 禮 ? 后 14

近』之近。

烟,似廉

反。

君

血,大

饗腥,三獻爓,

獻孰。」《釋文》:「近,「附

錢 主 出出 但,但 飲 前 相 對爲 酒 有 唯 ,必令平徧, 主 云『六尸』者, 昭 也。』醵,斂錢 穆,更相 與 次 周 序以 先 共 旅 儒 栅 飲 酬也 云: 六 酒 P 也。 相 大給多 毁 似 凡 廟 斂 無

子 乃 此 爵 猶 數。 言 **給祭尸多**,雖皆得獻 殺 性》、《少牢禮》戶不與旅酬,蓋以旅酬之禮 未通 聖人 日 三節 僅 成、康之時,文、武 陸氏佃 而尸尊,故不與子 :「禮之近人情者,非 蓋 埭 受命創制之事,所謂 ,故使之自相 以時祭,何必大給?」 言三代之禮,其因 於 日 禰 廟之尸 「案周九 而 子 前 親 孫 咔 廟 以 未 群尸 相 革 栖 盡 而 通 而 其 一時 ,猶在 之間 損 不 其 旅酬六尸 至者也。 及 爲 益 歡 天子、諸 愚謂:《特 大」也。 於下 其歡 者 情、蓋其 七 如 廟之 也。 此 郊 情 侯

> 三獻 湯 鄭 小 遠近備古今也。 社稷、五祀,非 生人之道也。 祀,孰 天 也 氏 謂祭 也 日 : 而已。」 「近人情者褻,而 獻,祭群小祀也。 大饗, Щ 林、川 禮 是。 治祭先 尊者先遠,差降 以 愚謂: 澤之屬 近 陳 人 氏 王 説 爲褻,遠 近 也。 遠之者敬。 也。 見 血、腥、爓、熟 人 後 爓,沈 情 鄭 謂 而下,至 人爲尊 郊 氏 祭 近 以 肉於 郊, 以 於 爲

是也。 薦 近人,孰則全乎生人之道矣。 獻之禮,直自饋孰 爲 上公九獻,侯伯 饋孰始者,若大夫、士祭宗廟,及五祀之 Ш 獻 111 始,此皆謂 血 視子男,四方百 爲始,大饗以 外神,五嶽視三公, 血於生人飲食最遠,腥 朝 事 七獻,子男 爲始也。 時 薦 也 腥 物之類 爲始,三獻 四 Ŧi. 然三獻 獻 瀆視諸侯,小 視 獻 ○祭宗廟 次之, 爓 無 大夫、士。 大夫、士 朝 以 亦有 踐、 薦 祭 稍 自 饋 爓 獻 與 爓、有熟。 饗、三獻之屬,正祭之時 神之外,於正 禮 其視大夫、士者,則惟食畢酳尸 柴、血祭之屬,皆祭初降神之禮,與宗廟之 師、雨 祀 内 止 灌 沈祭山林、川 曰 仴 而 之祭,血、腥、爓一 :「郊血、大饗腥、三獻 烟、熟,大饗之時 神三 Ŧi. 相 ,禮盛於其初,則 日、月、星辰, 祭 獻 當,故其視三公者止七獻,視諸 初 廟 師 獻者本 ,視子男者止三獻,以其 有 自 降神之禮 Ŧi. 皇氏云: 血 獻 澤,以 祭之時 無 祭祭社稷、五 以 以槱燎祀司中、 H 二裸,而 。 皆 『郊則先設 殺 疈 時同薦。」熊氏 血 《大宗伯 有 乎 辜祭四方百物。」實 與 有 皆 此 其 爓 外 腥 有 也 末 祀、 同 神 灌 血 也 時 既 獻熟,謂 五嶽 外 血,後設 不灌故 凡 俱 有 有腥、 司 獻。 神 郊 以實 降 薦 云『宗 命、 以 無 與 孔 神之 侯 也。 灌 腥 有 大 蓋 者 降 氏 風 柴 貍

> 繆耳。 祭時 大饗 熟」, 謂 血 特性》言「毛、血告幽全」,及《詩》言「薦 廟 血祭祭五祀」,謂祭初降神之禮,皆非 而 膋」,皆謂 又云「郊與 此 之 也。 握則 則 所言「皆降 祭 非 無 念記 無 也 血 祭初告殺之禮 血 》文本簡明, 大饗、三獻皆 四 ,三獻爓則 其 神之外正祭之禮 [者惟. 義 非 祭天正 也 \_\_\_ 又無 而 、《大宗伯 有 祭 疏 愚 血、腥、 腥 時 家 謂 矣。 」,是也 備 自 有 生 謂 孔 爓 郊 女 其 以 氏 īF

作『感』,子六反,又音促。」 三辭三讓 由 是故君子之於禮 始 也。 是故七介以 而至,不然則已蹙。《釋文》:「蹙,本 也 非非 相見 作 而 世 致 不然則 其 情 也 慤 此 有

作,起也。 之禮,故禮之所由始,始於心之敬 而 强致之也 作 而致其情 内有 恭敬之情 謂 本無此 則 外 情, 也 有 交 而 接 起

戒,三日宿,慎之至也。

《釋文》:

「類,本或作「泮」,

事

於泰

Щ

,必先有事於配林。

三月繫,七日

故

魯人將有事於上帝

,必先有

事於類宫;

晉

人將有事

於河,必先有事

於惡

池;齊人將有

矣。 己也。 以見義理之文莫不根於忠信之本也 言祭祀之尚臭不尚味,則 此以内心、外心二者發明義理之文,上節 若已慤已蹙,則情文不足,而 已,甚也。 也。 介以 義,至此言禮之由於心,而非作致於外,又 於心之不容已也,夫豈作而致之乎? 蹙,謂急迫也。君子於所尊敬者不敢質, 賓於大門外,交擯三辭,辭主國以客禮待 故擯、介辭讓之禮,雖 七介 相 三讓者,讓入門也。 見,謂 者, 慤,謂質慤也。 侯伯之禮 諸 侯 相 朝, 舉 陳 三辭者,主君迎 在 歸 至,至廟 中以言之也 擯、介以 於外,而實本 重於内心 無以將其 中也。 交辭 之 前 敬

依注音判。 泰,本又作「大」,音同。」〇鄭注:「判宫,或爲「郊宫」。」 祭前 七日 也。 名。 切 聲之誤也。 此皆積漸,從小至大也。《充人》云:"紀 必先告配 從祀於河者,然後祭河。 後祭尊也。晉人將祭河,必先告惡池小川 天,先於類宮告后稷以將配天,是先告卑 鄭氏曰:「頖宫,郊之學也。 五帝,則繫于牢,芻之三月。』是三月繫也。 也。」 繫,繫牲於牢。戒,散齊也。 戒 將有祭祀之事,必先敬 三日致齊也。 惡,依注音呼,又音虖,好故反。❶ 謂 林從祀於泰山 孔氏曰:「魯無 祭前七日散齊也。 呼池、嘔夷,并州 鄭注《儀禮》云:『宿是 者,然後祭泰 齊人 后 稷 惡當爲『呼』, 慎 إال 三日 將祭泰 之廟,將 如 此,不 宿,致 配林,林 宿, 山 Ш 謂 祭 敢 齊

池,大河反。

0 故」、《釋文》作「胡」。

六九五

其 之禮 本 1 先於大廟告后稷而後卜也。 魯無稷廟,故 時 愚謂:《郊特牲》云「卜郊受命于祖 又戒。』宿之言肅,肅敬之義 以以 於敬慎之至,亦上節之義也 即 郊之時,假類宮以告稷。 事 明禮之本於忠信,此又言祭祀之禮 漸如此,敬謹至極,不 之有漸,誠意之預積者如此,莫非 敦 上節既以賓客 也。 切 迫 廟」,謂 將祭之 也

故禮 相,息亮反。 從容 以 以 鄭 相 賓主者也。 温 有擯 步 行 威 氏 謂 以 禮 日 和順之意,亦不敢慤、不敢蹙之義也。 儀 前 韶,樂有相 扶 承藉。凡玉以物緼裹承藉,君子亦 擯 温, 紆運反。」○鄭注:「詔,或爲『紹』。」 「皆爲温 持之,所以 相 擯 相步,扶工也。」 以 詔 自 以 藉, 承 相 步 藉 道之,樂工 承藉 ,温之至也。《釋文》: 重禮 也。 於禮樂,而致其 也。 皇氏侃 愚謂: 賓主 以奏樂,而 擯詔,告道

> 老反。 不詔 學也。《釋文》: 是故先王之制禮也,必有主也,故可述而多 刀之用,鸞刀之貴,莞簟之安,而稟鞂之設。 禮 也者,反本脩古,不忘其初者也 明朝事 鞂,江八反,徐古八反。」 以 樂; 「菅音官,❶一音丸。稟,字亦作『藁』,古 醴酒之用,玄酒之尚, 故 M 割 事

酒 事 氏曰:「本,謂心也。反本,謂反其本性。 可 鄭氏曰:「凶事、朝事二者,反本 至,是反其孝性之本心也。 孝子喪親,痛 忘其初也。 脩古,謂脩習於古。 也。 述而多學者,以本與古求之而已。」 孔 』以下三者,脩古 以樂,奏音樂也。 凶事,喪親之事 由 心發,故不待詔告而 也。 由其反本 主,謂 朝廷是養老樂賢 也。 朝事 脩古,故不 本 韶,告也 ', 朝 ·與古 也。 哀自 廷 『醴 也 之

刀也。 酒也。 也」。」 簟精細 「反」。 也。 之麤席。 酒之美,而陳尊以玄酒在上。今刀便利, 稟鞂,除穗粒,取稈稟爲郊席。 本心 之地,故 初,古者今之初,反之脩之,則不忘之故 今,逐末之流而不知所反,從今之便 本與古求之,則可得也,故曰『可述而多學 有反本、脩古之法。 古刀遲緩,而宗廟不用今刀而用古刀。 有所脩,則先王之禮意忘矣。 也。 本末一物,欲追還之而已,故 古今異時, 鸞刀,古之刀也。莞簟,今之席也。 玄酒,水也。尚,上也。 而 方氏 臣人門必 此三者皆脩古也。先王制禮 此二者是反本。 可安,人祭不用莞簟,而用稾鞂 | 慤曰:「物有本末,時有 縣興,是反其 必 若欲述行學習,但 有 損益焉,故於古 醴酒,五齊第二 割刀,今之 祭祀有醴 八樂朝 本者末 於於 廷之 本 而 必必 莞 Ħ 之 古 用 Ħ 不

> 事 學,謂習其事。 心,而非樂不足以達之也。 無待於詔 寡要也。 古爲主,故可傳述而多學,而不患其博 已,後世既有莞簟,而祭天之席猶設稟鞂 廟割牲貴用鸞刀。古時但有稟鞂之席 古時但有鸞刀而已,後世既 玄酒,使居酒醴之上。 水獻之而已。 「脩」。」 不可無忠信之本。 三者,皆爲不忘古之故也。 也。 凶 也。 愚謂: 蓋禮貴反本,故有義理之文,尤 事 不 後世聖人既爲酒醴,而猶設 朝事以樂者 韶者,反其哀戚之本心,而 先王之制禮,必以反本脩 朝事,謂朝廷燕樂群臣 禮貴脩古,故有外心之 鸞刀,刀之有鈴者。 ,反其和樂之本 述,謂傳其義 上古無酒 有割刀,而宗 一,酌 之 而

察物而不由禮,弗之得矣。故作事不以禮,君子曰:「無節於内者,觀物弗之察矣。欲

貴多,尤不可無内心之貴少也

六九 八

禮 弗之 也 者 敬 矣。 物之致 出言不 也。 以 禮 ,弗之信矣。 故 日 :

致 言 之傷,而人弗之信矣。人之辨 而 能 物不以禮,則 乎禮之節文而喻之於心 禮者,天 辨矣。 人弗之敬矣。 也 慎 行, 地之節。 莫不由禮,故禮 作事 昧乎天理之則, 不 出言不以禮 以 無 禮 節 則 於 也 内 必 者, 者 有 物,事 而 則必有鄙 别 惰 事 謂 於是非不 事 慢之失, 物 也 不 理,謹 之 能 極 悖 察

月,爲 爾。 時 是故昔先王之制禮也,因其財物 雨 澤, 故作 高 君子 必 大事 因 達 反 丘 必 亹 陵 順 亹 (),爲下 天 焉。 時 必 爲 《釋文》: 因 朝 111 夕 澤。 而致 「亹,亡匪 必 放 其 是 於 反,徐 義 故 焉 天 日

才 此 性 申 即即 前「合於天時」一 天時之所生,地 節 之義 理之所宜,人官之 也。 財 物 猶 音尾。」〇朝,直遥

澤是也。 也。 怠 勸 故 勉之意。 放 依 龍 所 下之祭,必因於川 祭天於圜 陵,謂爲崇高之祭,必因於丘陵之本高 祀之事。 先王之制 也。 勉 順 也 日之升 見而雩,始殺 能 此所 於 之 物 鬼 爲 意 曲 此所 丘是 因乎天時之事 先 於朝 神 朝夕必放 爲大事 禮 之所 勉 王之 为 因 mi 也。 因於地理之事 力 雨 ,夕月以夕,放月之見於夕 而嘗 利 之 制 必 澤 以 而 也 澤之本卑,若祭地於 爲下必 於日 時 禮 順 報 「閉蟄 致 降。 必必 天時 功 其 財 也。 月 於神 大 物 宜 因 而烝是 君子 ,若啟 者 乎 焉。 各 也。 川澤,謂 爲 財 有 朝 祇 達 高 亹 物 螯 大 所宜 日 也。 必因 而 其 亹 之宜 事 以 而 不 亹 爲 放, 朝 郊 敢 廖 勸 方 卑 丘 故

置之,聚衆而誓之。 是故昔先王 一尚 有 德,尊 是故 有 道,任 因天事天,因 有 能 舉 賢 地 事 而

升中于天, 地 風 为因 雨 節,寒暑時。 名 Ш 而 升 鳳 中 皇降,龜 于 是故聖人南 天 因 龍 吉 治,直吏反。」 假。 土以 饗帝 面 饗帝 而 立 于郊,而 于 而 郊。 天

-大治。

《釋文》:「假,音格。

先王既 其 祭 將 置 備 地 成,升而告之也。 守至於方嶽之下,燔柴祭天,而以治功之 Ш 有能,謂 至,因陽氣之至而祭之也。 有德,謂有 百官 齊 禮 謂 地 饗帝 而誓戒之也。 以夏至,因 五嶽也。 治定功 因天地之宜以制爲祭祀之禮 申誓戒,順 於位也。 曲藝之士。 于郊,祭天於圜 德行者。 成,故 中,成也。 陰 衆,即 吉土,王者所 因天事天,謂祭天以 其陰陽,就其壇兆以 氣之始 賢,即道德才能之人。 鳳 有 皇 在位 道 降 丘 升中于天,謂 謂 而 也。 因地事地 而 之衆。 祭之也。 龜 有 卜而 假,至也 龍 道 假 藝者。 一,於是 誓,謂 居之 行 洲 名 謂 冬 百

> 神受職 故故 風 雨 節 而 寒暑 時

人東酌 至也。 君 此陰陽之分,夫婦之位也。 天道至教,聖人至德。 在 阼, 《釋文》:「罍,音雷。 西。 中尊,禮交動乎上,樂交應乎下,和之 夫人在房,大明生於東 廟堂之下,縣鼓 犧,素河反。 廟堂之上 君西 在 西 酌 月 一, 罍 縣,音玄。 應鼓 犧、象,夫 生 尊 於 在 在 東。 阼, 西

鼓,應 樂。 天道 縣 阼階之上也。 下 面 在阼,犧尊尊,故在西。 ,人之後,主人室内西面 也。 「此云「君在阼」,謂 鼓在西 垂教,著於陰陽。 罍尊,尊畫 鼙也,以 房,東房也。 應鼓在東者,縣鼓尊 禮樂之器尊 其與朔鼙 爲雲雷之飾者。 大明 初 聖人之德,著於禮 縣鼓,大鼓也。 人 相 朝 生於東,日 西,罍 時 應 踐 心,故曰 即 於應鼓 時,堂 位 尊卑,故 在 於 阼, 應 出 阼 E 也。 應 於 階 北 在

應對」之應。

分,扶問反。」

乎下。 尊、山 發乎? 之生於 尊。」 故 諸 犧 代之尊也。 禮 則 以 方 尊 東 當代之尊也。 象尊、秋冬用著尊、壺尊、 一交動 >,刻 此云 象 東 月 而 侯 方 房 君 也 生 西 四 而已。 尊、皆有罍、諸 爲 乎上 行。 在 在 西 時之祭,或 禮樂之和若此,豈非聖人至德之所 於 「罍尊在阼,犧尊在西」,又云「西酌 ○《周 象 作階之西也。 方 阼 月 西 諸侯 形 生 而 喻 夫人在房,而 天 而 者。 於西,月初見 禮 縣鼓、應 東 著尊、壺尊、大尊、山 之者,蓋 西 子 行 不 酌犧、象,象日之出於 以犧 春 鄭 也。 司尊彝》春 得 臣之所 夏之祭,兼 司 用前代之尊,惟 配罍,或以象 鼓 由 農 云: 夫人 君與夫人交獻,是 並 阼 東酌罍尊,象月 追享朝享用大 在 酢 階 奏,是樂交應 在 也 西 夏用犧尊、 而視 東房,而 以 用犧、象。 方 犧、象, 象 也 尊,前 東房, 心配罍。 骨 用 73 東 象 飾

之西。 之位 犧、 鼓、朔 之縣 北。 西者 辟 南 西 建鼓在阼階西,南鼓; 東、笙磬西 西 罍尊之西, 蓋醴齊、盎 禮運》云: 其 射 階 也。 陳 象」, 之 (西鍾, 惟 故 鼙 則 本 建鼓在西階之東,南面 西 西 0 相 異 見於此。 在 惟 階之東 東 建 齊。 面 但自 對 於常法。 頌磬東 大 西方之縣皆備 東 酌 其 鼓 醴、醆在户。」則犧 ,其南笙 者 射 方 罍 西 在其 **罍尊之所** 作階而 也 禮 鍾 尊」也 有建鼓,則阼階之西 礴 ), 因 然 面 **\***: 鑮 南, 人君 其建鼓、應 而鼙在鼓東, 鍾,其南 樂 其 辟 應鼙在 之 視室户, 東 南 射 盛者 犧、 南 軒 人 鼓 鍾 而 而 縣 宿 象 與 其 移 東 蓋蓋 。」人君樂 其東,南鼓 鑮,皆南 之所盛 朔鼙 縣 尊 西 鼙 則室户 之於 方 而 南 事酒 于 非 因 方 與 在 大 鑮 阼 之 射 在 正 辟 當 階 阼 阼 陳。 也 在 建 間 其 階 在 有 階 階 以 射

《儀禮

房。」孔

注

疏

以

縣鼓與

?

用

笙鍾

則

南

建鼓」,此

間

爲

應鼙

之縣

同

笙鍾

相配

西方之縣,

而

獨

設

鼓。

有右房,有

東

于大夫,「

君

使

侯有左右房」,以明夫人之所在 鍾、磬、鼙、鼓, 間之縣言之也。 建鼓、縣鼓尊 也。若天子宫縣,則 ,階間之鼙爲應鼙,則磬亦 北上, 疏云: 此云「縣 「夫人在房」爲 一,則 鄉飲 言「縣鼓」,則廟庭用縣 方 皆鼓 若祭 鄭 則階間南方之縣 卿 爲 南 而 影記 鼓在 氏云:「天子、諸 也。 頌 方 東 南 祀 與 大夫以下惟 磬、頌 爲 方以 薦 鼙 則 階間 若天子, 朔鼙。 西,應鼓 出 西房,故言「天子、諸  $\equiv$ 北 應鼓 自左房、少牢禮 面 不不 鍾 相 皆備 於 也。 對 階 與 可 南 在 則路寢 有 同 間 縣之, 爲 ~ 笙磬,鍾 笙磬、笙鍾 以 方 東 東」,據階 東 侯 東 大射》言 爲笙磬、 西房 鼓 言 方 亦 上。 有 房。」蓋 ,路寢 「東」 或 西 備 東方 左 也。 階 右 以 方 縣 亦 禮 也 卿還 主婦 室 第 尊 少 知 於東,月生於西」之語,故以西房言之,不 在 有 則惟 東 中,皆謂東房。《祭統》:「夫人 有 則 房」者非也。 者 中 以 西 君 此 側階,爲婦人之所升降, 房。」蓋房雖 有 對言東西也。 東 與堂 在阼之時,夫人東房 在 西 玉 薦 初 ,亦猶犧尊設於室户 ,乃婦人之正位 西 ,反其所自 房。 即 東房,人君及大夫、士皆然。 房之明據。 於館,賓 自東房。 上,則 位言之,若尸入後,主人之位 又《聘禮》賓館 《特性 有 生 君反 退,負右房」,此尤大夫、 然此 有 東 左 西 》、《少牢禮》主 舊説謂「大夫、士惟 西 樂也者 房則 所言君夫人之位,亦 一,而 鄭、孔泥 而

七〇

,樂其所自成

夫人反東矣。

所謂「北堂」者

東

於「大明

牛

中之位,視之爲

而與作階之壘

祭祀,主婦

之

位

副

禕

文

于

婦

在

東

七〇二

音洛。 者。 觀 是 子之人達。」故觀 而 知 其 故 《釋文》: 其 禮 先 樂 人之知。 王 一之制 而 「道,音 治 禮 亂 其器 也 故 導。 可 以 日 : 之知,音智。」〇今按: 知 而 節 事 也 君子慎 知其工之巧,觀 ,脩樂以 蘧 伯玉 其 所 道志 日 以 樂其 與 其 人 發 君 故

紂救民 禮節 是也。 君 引 事 過 之爲樂,若《韶》樂其紹堯致治、《武》樂其伐 醴之美而 反其所自生者,反本、脩古,不忘其初,若酒 差。 子以 蘧 理 伯 樂 也 禮樂與 樂有 也。 和 樂其所自成者,樂其治功之成,而 玉. 之言 則治,禮慝樂淫則亂。 發,發言也。 尚玄酒,黼 禮得其反,故能 所 樂、故能 人交接,不 以 喻 觀 黻文繡之美而 禮樂可 宣道 與人, 可不 其志意之堙鬱。 節 謂 ·慎 以 制 達,謂 知治 接於人也。 也 其行事之 尚 亂 通於 疏 故 象 布

文》:「從,才用反。盎,烏浪反。 屬 卿 君 牽牲 屬 大夫 親 乎其 制祭,夫人薦盎。 ,謂灌獻既 從 君 忠 也, 命婦 勿勿 畢, 從 夫 乎 君 君親 人。 出 其 屬,之玉反。」 廟門迎牲,牽之 欲其響之 割牲 洞 洞 ,夫人薦 乎 其 也。 敬 也 酒

盎 齊。 體而 之也。 制。 人也。 君薦 洞 執之也。 割牲 洞 進之 薦酒 醍 朝踐、君薦醴齊、夫人薦盎齊。 制祭,謂 」, 則 敬 幣,所 盎,盎 齊, 貌 制,如《量 則 也。 夫 知 朝 以 齊 夫 人 屬 知 酒,事 踐 也 禮 人薦 薦 屬 君 薦 神告殺者。 事 薦 人》「制其從獻脯 忠 腥 割 醴 酒 酒 豆、籩。 一、爓 貌 牲 、薦醍,互見之也。 也 也 量度 謂 勿 言「 上 饋 勿, 贊,謂 言「夫人薦 公祭用 孰 牲 君 猶勉 時 體 饋 制 燔 割 助 而 祭 獻 之 勉 牪 君 而 准

大

廟之内敬矣:

君親

牽牲,大夫贊幣

而

從。

<sup>「</sup>玉」、《釋文》作「六」。

時

鄭

據

燎

後

之作 饋 烘 蒿 既 氏 膟 ,案《郊特牲》云: 祭於室及主。」 朝 在 也。』《祭義》取膟 。」《郊 制 孰 而 於此 奠然 膋 酌 蕭 事 也 郊 孔 有 肝 所用 奠之後 合羶薌」,故知當饋 進 特 特 疏 洗 勿 黍 後 章 血 染 性》「蕭 牲 稷, 於鬱 黽 所 從 膋 焫 以 在 勉 以 事 制 分饋 此 時 脂 蕭 鬯』者 腥、 從 詔 發 祭 所 合黍 云『蕭 合羶薌」,鄭氏 合黍稷,臭陽 明 事 祝 孰 爓之前, 孔 膋之後,又爓祭、 \_ 制者,制 其 注 於 之節 取膟 ,據漢禮 氏 鄭 公室」注 義者 云:「朝 合黍稷」,『既 漢 稷 曰 : 氏 、《記》文 **脊**燔燎升首 燒 書 孰時 亦已 是朝 日 肝 云 之。」疏 朝 : 而 洗 達於牆 劉 踐 當當 也。 事 <u>云</u> 知 事 於鬱 親 向 進 明 取 矣。 進 時 祭 制 傳 是 奠然 云: 牲 血 白 血 蕭 腥 鬯 報 屋 也 燔 愚 誉 引 膋 膟 而 口 Ŧī.

故

香

謂

云

者

陽

則

以

謂

也

燔 燎 燎 朝 特 伯 鬱 所 心 報 蓋 言 燎合於朝 首、心, 曰 以 朝事 燎羶 羶 事 七獻 一,其爲 鬯,制於主前 及鬱鬯之灌三者, 氣,故合而言之。 獻 燔 三王 三
取 報魄,故亦合而言之。 薌」之義 於爐 燔 原 一薌,以 覸 、燔燎,二者非 薦 一祭九 燎 周 其 腥 事 膟 朝 以 羶 炭 所 制 膋 踐 解之,遂生謬説耳。 俠 獻 薦 也。 薌」,皆言「 報 與 以 燔 人 及饋 甒 ,魯及王者之後 否 ,謂之制祭,鄭 孰 氣 燎升 以 實由 「, 亦 也。 時 加 祭義》云: 詔 薦黍稷,羞 獻 亦 以 首」,及《祭義 神 誤 未 君 時 非 薦 鬱 朝踐 時 於 亦皆 敢 解 君皆不 鬯, 黍 室。」孔 事 決 稷,羞 鄭、 建 時 微饋 也 以 不 也 本 建設 亦 設 事 肺、肝、首 孔 獻 報 孰 據 至 而 獻 朝 九 也 氏 肺 3》「建 , 酳尸 誤 皆 洗 魄 兩 漢 獻, 於《 子 事 朝 孔 所以 度 禮 肝 以 也 而 肝 燔 男 侯 於 燔 皆 燔 郊 氏 爲

七〇四

矣。 耶 從,夫人薦涚水」,寧 則上公九獻者也。 酒 男五 通 牲 獻之豆、籩皆夫人所 考,而疏 饋 之後但得 行三獻,主 君 確 不然,則 献,説 二灌 孰以 」,以爲侯伯 也 疏特據 獻 獻 少 至子 前 爲 見《禮 而 字》,尸 家之説 薦 《祭統》言「夫人副 君 自 五 已 婦婦 男五獻,則孔氏之説 獻 此章言「夫人薦盎」,「夫人 獻 獻 侯 運》。上公九獻,侯伯七獻,子 與 因 皆屬之夫 朝踐、饋獻 伯 也。 食之後,主人、主婦 此 夫人 如 則 獻 以下 崔 此。 夫人不得受酢。 而 而其下止言「宗婦 氏 並 得受酢。 薦,則 可據之以 無獻 ,其差降之法不 愚謂:王之祭禮十 之説 以理言之,朝踐、饋 人,而 君 禕立于東房 ,食後行三獻 獻尸者必 也 不獻之證 君 若子男尸 爲 固 反 今 無所 視崔 君 蓋子男 及賓 按 不 執 君。 非 薦 可 食 氏 獻 事 盎 備 特

堂,爲

祊

乎外,

故

曰 :

於彼

乎?

於

此

釋文》:「定,徐丁罄反,一音如字。

祊,百彭反。」

韶皆不同

位、蓋道

求

而未之得也。

設祭

於

納牲詔 其間 子 爲 自王以訖於大夫、士,皆無異,獨子男參差 薦、獻相 獻尸,尸 設,未知其 男 優 食畢,賓長酳 朝 於庭,血、毛韶於室,羹定韶於堂。 , 揆諸隆殺之節, 亦恐不然也 但 踐 須,於禮似協 酢君; 朝 禮 踐 饋 何 食 饋 饋獻 如 皆 食之 尸 也 無 , 尸 獻, 但 豆 夫人獻尸 或 酢 食畢 則 謂 簿 賓長。 籩、 子 因 男朝 酳 獻 豆 , 尸酢 尸三獻 而 乃 如 薦 此 爲 削 夫 虚

以 韶,告也。 以告神於室也。 告之也。 神之後,象神之初 幣告神 血、毛韶於室,既殺 於庭也 納牲詔於庭,謂 肉謂之羹。 自外 必於庭告之者,時 來 牲既 人及庭,而 定,熟也。 牲 而 入廟門, 取毛、血 於 方 此 降 煮 前

獻

質,三獻

文,五獻

察,七獻

神

<u>Ŧ</u>.

獻

四

瀆

視諸

侯者

也。

七獻

Ŧ.

嶽

視

羹定詔 之時,既 外,謂求神於廟門外待賓客之處也。 爓之肉 謂 道 其説非是。 前 其下章乃言「執 定所在,故徧於諸處告之也。 俎 肉 不知神之於彼 口 詩·楚茨》曰「祝祭于祊、祀 戸出 言也。 位 必 ,當朝踐之節明 盛之以告神於堂,然後入設於室也。 沸 謂 也 在 既 於堂,謂 設 庭也、室也、堂也、其 堂時,薦 求,求神也。 祭於堂,又求神於廟門之外,蓋 熟 ^ 説見《郊特牲》。 爾 則 煮既 雅 於此,故求之非 ıĿ. 爨 火 》:「門謂之祊。」爲祊乎 矣。 朝 踖 熟,將迎尸入室,先用 而 踐之豆、籩,及祭腥 踖, 沸者定,故 鄭 求神未得,不知其 氏 則 以 祊 事孔 設祭於堂, 處 祊 在 爲 不 日 饋 明,而 處 辉祭, 同 |羹定。 朝踐 食之 也。 也。

質,謂: 尊。 氏 明 獻,皆鷩冕七章 饗諸侯,自子男五獻,以至於諸侯長十有 之禮,子男五獻 卑之於山川,以獻數不繫於服章也。 於祭服各有象類,希冕三章,以祭社 祀獻少,則社稷之獻 也,四方百物之類,小祀也。 之類,大祀也,社稷、五祀、五嶽之類,中 於《酒正》。 小祀,見於《肆 祀、五嶽。」則社 公者也。 Ŧi. 察 以七獻爲祭先公,亦非 祀,五獻 而 ○陳氏祥道曰:「《周禮》大祀、次祀 其禮質 其 ^ 禮 爲 大宗伯》: 《大宗伯》所辨天地、五 彌 DA 略。 師 備。 前 望 ,侯伯七獻,上公九獻 稷、五祀其祭亦 已。 **\***; Ш 文者,有文飾 111 宜 神者神靈,而 大祭、中祭、小祭,見 以以 鄭氏以三獻爲社稷、 ,誤矣。」 加 也 於 血 Ш 祭祭社 大祀獻多,小 司 111 也 七獻 也。 服》「享先 愚 一帝、先 其體彌 謂 稷、 察者 與? 賓 先 而 鄭 非 Ŧi. 客 Ŧ 祀

箭,與 美味 蓋 所 知 示 大饗,其王 陔』。」○今按:肆,如字。 之所服 也。 子之禮 重 有 和  $\pm$ 見 〈夫。」 豈有天子廟祭而貶用侯伯之禮乎? 也。 | 衮冕,享先 禮 也 · 賢 衆 則 也。 金次之,見情 遍 致 共財 籩、豆之薦,四 故 東帛加璧, 反。 遠 事與? 父爲 也。 釋 物 纊,音 也。其餘 文》 公則驚冕」,蓋 也 令中 士,子爲大夫,葬以 曠 三牲、魚、腊 事 其 庸》曰:「上祀先公以天 尊德 也。 劉 與,音 出 無常貨,各以其國之 昌 「時之和 也、《肆夏》而 丹、漆、絲、 宗 也 餘。 古曠 以不 龜 腊,音昔。 氣 ,四海九州之 反。 爲 也 可 肆, 前 士; 纊、竹、 過 送之, 列 内 依 内,音 祭 於尸 注 金 , 先 以 作

也 獸 爲天子之禮 大饗,謂王饗來朝諸 也。 此 四 四 句 時 , 言大饗饌具之盛也。 之 與 和 諸 氣, 侯 侯也。 之饗賓 言 四 時 王 異 和 事者 也 氣 之所 「内金」 言其 腊, 牛 乾

皆陳 出 餘 物 皆三享中 所 者 知 者 謂 以 賓之事 也。《覲禮》三享,皆東帛加璧,庭 又陳於金之後,示與天下 命,君子於 其聲之和 金雖先人,而 1,陳於 1,聲和 有 先 也, 固 則 ,故貴之 下,言諸 隨 不 於庭,而 内之於廟 龜 也。 肆夏》以 其 止 則 也,金也,丹、漆、絲、纊、竹、 庭 所 國之所有 於 也 情 而 玉 侯 而 有之庭實 此,此所言,其有常者 來朝 大司樂》:「大祭祀,王出 和 陳之 比 在 最 束 束 也。 也。 送之,此還明 諸 德,故尊 帛 在 帛 物之前 北 則 加 而 示 所以享天 加 丹、漆、絲、纊、竹、箭 也。 也。 用 在 璧 和 璧,尊德也 之,無 則 龜之後也。 之也。 者, 先知 也。 然庭實旅百 共 執之以 金 子 此 大饗 常 者 可 者 金次之者 龜爲 物 物 19, 龜 者 爲 也。 升堂 實 禮畢 也 也。 而 箭 鍾 見情 唯 不 能 前 餘 其 内, 也 其 私 物 送 其 或 前 致 列 取

或用 揚州 此 也 曰: 夏》。 皆以璧、帛致之。」 龜 乃與祭祀同,此所以爲禮之重也。 出奏《肆夏》,大饗之禮 奏《王夏》,尸出入奏《肆夏》,牲出入奏《昭 地物非一國所能 禮 馬,或用 貢 荆州 「荆、揚二州貢金三品。 大饗不 漆、絲、纊、竹、箭也。 篠 「皮馬 貢 蕩。』《儀禮 丹,兖州貢漆、絲 入牲,其他皆如 虎豹之皮。 賈疏"下經 相 間 可 ,也。」其 有,唯所有分爲三享, 然也。 次 享, 其餘無常貨 荆州納錫、大 祭祀。」則賓 饗賓之樂 豫 曰:「初享 龜 州 先陳馬。 也, 貢 鄭氏 纊 金

王者所敬莫如天,故祀帝爲敬之至。宗廟

『忠敬』者、言『仁義』則忠敬可知也。」 之祭、事死如生、事亡如存、故爲仁之至。 朝聘所器之屬也。服器無益於死者、而不敢不備、故爲忠之至。服、襲斂之衣也。器,明居之幣帛、多寡各有其宜、故爲仁之至。 朝聘所不欲死其親之意、故爲仁之至。 朝聘所不欲死其親之意、故爲仁之至。 朝聘所不欲死其親之意,故爲仁之至。 朝聘所不敬死其親之意,故爲仁之至。 朝明所不敬。 孔氏曰:「言『觀仁義之道』,不言本。 孔氏曰:「言『觀仁義之道』,不言本。 孔氏曰:「言『觀仁義之道』,不言。 和氏曰:「言『觀仁義之道』,不言

其人之爲貴也。」《釋文》:「和,户卧反。」學禮。苟無忠信之人,則禮不虚道。是以得君子曰:「甘受和,白受采。忠信之人,可以

學禮。其人,即忠信之人也。」 愚謂:受五色之采。忠信之人不有雜行,故可以之和。白爲五色之本,不偏主一色,故得了一世爲衆味之本,不偏主一味,故得受五味,以曰:「道,由也,從也。」 孔氏曰:鄭氏曰:「道,由也,從也。」 孔氏曰:

學禮者,習學義理之文也。 立 信之本,與義理之文,固不可偏廢,而尤以 人,則無本不立,而禮不能 其本爲先 也。 然苟非忠信之 虚 行矣。 蓋 忠

大旅具矣,不足以饗帝。 之禮,不足以大饗。 孔子曰:「誦《詩》三百,不足以一獻。 之旅 有故 大饗 有故 大饗、大旅皆大祭,然分有 之名,其 足以一獻。 誦《詩》三百可以言矣,而未嘗學禮,故 门謂袷 ,則旅上帝及四望。」有故,謂凶裁也。 爲大旅 而禱於上帝及四望,皆曰 禮 祭先王也。 稍殺於正祭。《大宗伯》: 一獻禮 大旅、饗帝皆祀天,而禮 也。 饗帝,謂祀 大饗之禮,不足以大旅。 輕,故未足以大饗。 毋輕議禮。」 大旅者, 遠近 天之正 旅,而上帝 則 因事祭天 誠 禮 「國 之所 也。 此 獻 不

> 帝」别,於《掌次》見之。 皆云「旅上帝」、《周禮》言「上帝」,與「五 以饗帝,然後爲内盡忠信之本,而 殺,則敬之所致有淺深。 祭五帝」,非也。 理之文,禮其可輕言乎? 《周禮 ·大宗伯》、《典瑞》 行禮者必至於可 ○鄭氏 謂「旅爲 外極義

繼之以 音 謂 明而 子路爲季氏宰。 怠矣。有司跛倚以臨祭,其爲不敬大矣。 日祭,子路與,室事交乎户,堂事交乎階,質 預。 由 也 始行事,晏朝 朝,直遥反,又張遥反。」 而不知禮乎?」《釋文》:「跛,彼義反。 燭。雖有强力之容,肅敬之心,皆倦 季氏祭,逮 而退。 孔子聞之曰: 闇 而 祭,日不 二誰 他 足

也。 之人取饌至户,而室内之人受之以進於尸 事,謂正祭 宰,家臣之長也。逮,及也。闇,未昧 立而 偏 事尸 任 一足曰跛。 在室 也。 交乎户者,室外 倚 物爲 倚。 爽

感有難易。

有隆

也。堂事,謂儐尸時在堂也。交乎階者,也。堂事,謂儐尸時在堂也。交乎階者, 一位。堂事,謂復時也。質明,正明也。晏,晚也。晏朝,謂夕時也。質明,正明也。晏,晚也。晏朝而退,則不必繼以燭矣。子路閣矣。晏朝而退,則不必繼以燭矣。子路閣,非必循乎舊禮,然略繁文,敦實意,所行,非必循乎舊禮,然略繁文,敦實意,所行,非必循乎舊禮,然略繁文,敦實意,所行,非必循乎舊禮,然略繁文,敦實意,所行,非必循乎舊禮,然略繁文,敦實意,

禮記卷二十四終

## 禮記卷二十五

國史館纂脩孫希旦集解賜進士及第翰林院編脩

郊特性第十一之一《别録》屬《祭祀》。

相出入。而篇首言貴誠尚少之義,又似承及於朝、覲、燕、饗之禮,其語頗與《禮器》此篇多記祭事,而中雜以冠、昏兩段,間又

《禮器》而發其未盡之義,疑一人所作。

也。故天子牲孕弗食也,祭帝弗用也。犢,諸侯適天子,天子賜之禮大牢,貴誠之義郊特牲而社稷大牢,天子適諸侯,諸侯膳用

孔氏曰:「諸侯適天子,天子賜之,禮用大

文》:「繁,步干反。」 大路繁纓 謂 特性、天子膳用犢之意。 牢 之義、「降尊就卑」,則又明貴稱之義也 也,貴其誠慤,未有牝牡之情。」 愚謂 積之等皆用大牢也。 『降尊以就卑』,覆説以少爲貴之義。」 用特牲爲貴少,用犢爲貴誠。 而義主於貴誠。 犢」,而義主於貴少。 ,則《掌客》云『殷膳大牢』,及饔、餼、飧 自此至「尚腶 一就,先路三就,次路五就。 ○孔氏曰:「自此 脩而已矣」,明貴誠尚 貴誠之義者,釋郊用 此篇兼 郊之特牲,亦犢 言 上篇 特性 以 兼言 下至 《釋 愚 小

此又明貴少之義也。

天以血爲始,血非食味之道,但用氣臭歆此又明貴臭之義也。至敬,謂郊天也。郊血,大饗腥,三獻爓,一獻孰,至敬不饗味郊血,大饗腥,三獻爓,一獻孰,至敬不饗味

神而已。

脩而已矣。《釋文》:「灌,本又作「裸」,古唤反。殿,丁諸侯爲賓,灌用鬱鬯,灌用臭也。 大饗尚殿

唤反。」 也。 饌,先設腶脩於筵前,然後始設餘饌,故曰 事之籩,蔆、芡、栗、脯。」大饗雖設大牢之 芬芳之氣,故云「用臭」。 大饗,謂諸侯 此亦明貴臭之義。 朝而天子享之,及諸侯相朝 廟中行朝享竟,以鬱鬯之酒灌賓。 尚 殿脩」。 殿脩, 籩實也。 諸侯朝天子及自相朝 《周禮 而 **籩人》:「朝** 主國 鬱鬯有 饗 賓 來

反。酢,才各反。」而酢焉。 此降尊以就卑也。《釋文》:「重,直龍而酢焉。 此降尊以就卑也。《釋文》:「重,直龍大饗,君三重席而酢焉。 三獻之介,君專席

席三重,主君獻賓,賓酢主君,設三重席而大饗,謂諸侯相朝而主君享賓也。諸侯之

敬客也。○三獻之介,謂饗禮也。 席而受酢,降主君之尊以就介之卑,所 皆大夫,席並再重,但享時賓席再重,介 獻,而以其介爲介也。專,單也。 受之,賓主禮敵,無所降下也。 之,其説皆非是。 於賓,故不重 諸侯使大夫聘於諸侯,主君享賓,其禮三 燕禮》無賓酢主君之禮,孔疏强以媵 以介爲賓,賓爲苟敬」,據《燕禮》爲説 主君獻 介之時,則徹 三獻之介, 鄭氏言 賓與介 觚 去 以 當 降 重 而

注。 嘗無樂。 響、禘有樂,而食、嘗無樂,陰陽之義 也 秋嘗,春饗孤子,秋食耆老,其義 飲,養陽 ,故無聲。 食,音嗣。」 氣 飲,養陽氣也,故有樂。 也。 凡聲,陽也。 凡食,養陰 《釋文》:「禘,音藥,出 氣也。 食,養陰 一也,而 故春禘 也。 凡 氣 食 mi

饗,謂春饗孤子也。禘當作「禴」,字之誤

子,死 禮以 用諸 乎陰 秋 禴 也 而 祭宗 從乎陽 在 飲 天子 也 陽 秋 王事者之子也。 酒 廟 時 也。 爲主 耆老 養陽 春祭宗廟 也 故 有樂。 也。 食養陰氣者 死 氣 在 陰 故 王 飲養陽 時 日 食謂 用 事 故故 祠 《周禮 諸 者之父祖 春。 秋 諸 氣者。 無 ,以其重實 樂。 食耆 侯 • 外饔》: 養 日 以其 陰氣 飲 老 禴 也。 言。當 而 清 謂 謂 孤 故 從 虚 響

皆所 有饗, 正》 饗」,於耆老言「秋食」,互相備 邦饗耆老、 以 則孤子亦有食 饗 追慕,饗、食皆所以 耆老、孤子,則共其酒。」 耆老 孤子 則 掌 矣。 其割亨之事。」《 於孤子言「春 報功,故 也 禘、嘗 日 「其 亦 酒

實,水土之品也。不 鼎、俎奇而籩、豆偶,陰陽之義 交於旦 又言 樂爲 頌》: 嘗 則用樂,大給禮盛故也。 大 有樂者,蓋大給之祭也。 子食禮有樂。 「大嘗禘,升歌《清廟》,下管《象》。」此嘗祭 籥師 一秋嘗行之。 無樂,蓋諸侯之禮異於天子者與? 殷禮,非 「顧予烝嘗」,是殷天子嘗祭有樂矣。 \* 秋而 一明之義 賓客饗食, 載嘗、《萬舞》洋洋。」《祭統 也。 《公食大夫禮》不用樂, 諸侯秋祭無樂, 也。 《商 敢用 《釋文》: 鼓 頌》言「鞉鼓磬管 褻 羽籥 熊 諸 味而貴多品,所 「奇,居宜反。 氏 也 侯大給之祭, 之 而給祭在 以 舞。」 籩、豆之 食、嘗 《魯 食 秋

當爲 鄭氏 俎 奇者,以其盛 『神』,篆字之誤 曰:「水土之品, 性體 也。」 声 動 言非 物 人 孔 屬 (所常 陽,故 氏 曰 : 食。 其 數

陽,其

(或用

或

否

亦

順

乎陰陽之義

而

己。

○ / 周禮

樂

師

響

食諸侯,序其

樂

事

令奏鐘鼓。」《鍾

師

凡響食,奏燕樂。」

義

也

而

或用樂,或不用樂,蓋聲樂是

列反。

旦,音神,出注。」

以

陳

俎

魚

四

數奇 貴衆多品族,所以交接神明之義也。 奇。 與人異,故不敢用人之食味。 俎 又《少牢》陳五 又有陪鼎: 鮮魚八、鮮腊九也。 功,故貴多品 類,非人所常食也。 之品者,言箋、豆之實,皆是水土所生之品 陰,故其數偶。 一、羊二、豕三、魚四、腊五、腸胃六、膚七、 一、腊五 鼎二、腊鼎三。 六俎者,尸 一,非正 籩、 也 在 豆 正鼎 其 俎 鹏 偶者,以 及侑主人、主婦各 腸 是皆鼎、俎 也 一也,臐二也,膮三也,亦其 故云『陰陽之義也』。 九,鼎别一俎,俎亦九也。 鼎:羊一、豕二、膚三、魚 鼎、 胃從羊。 亦有三俎, 肵俎 《特牲》三鼎: 其 俎奇者,案《聘禮》牛 不敢 是鼎九,其數奇也。 兼 奇 有植 五鼎 用褻美食味, 也。 神以多大爲 物,植 五 有 牲 俎 俎,又肵 一,非正 其餘 鼎 司 水土 神 物 道 屬 而

《籩人》朝 也。 謂 之禮 愚謂:《特牲禮》三鼎,《少牢禮》五鼎,以 諸公十有六,諸侯十有二,上大夫八,下大 籩,以此差之,諸侯朝事、饋食酳尸皆六 其三耳。 二,惟饋食之籩止五物,蓋亦當有 此差之,則諸侯祭禮七鼎,天子祭禮九鼎 夫六。』案禮,籩與豆同,是籩、豆偶 四』。又《禮器》云:『天子之豆二十有六, 上公『豆四十』,侯伯『三十二』,子男『二十 二俎者,是益肉之俎。此云『鼎、俎九』者, 六豆也。 醢人》朝事、饋食之豆及加豆皆八,羞豆 乃 一處並陳也。 俎之數各如其鼎,是鼎、俎皆奇 致饔餼之法、《禮器》天子「二十六 孔氏 《特牲》二豆二籩,《少牢 是籩、豆皆偶也。 事之籩 所引《掌客》上公「四 籩、豆偶者,案《掌客》云 及 加 籩 皆 ○此章言祭祀 八,羞籩二。 十豆之 八,而 崇四 也。 豆 脱 四

七

ĮЦ

矣。 禮》。 則惟用 則諸 加以 豆同 祭,「大夫以索牛」。 鮮 傳》云「唯君用鮮」,則諸侯祭用鮮魚、鮮腊 致 實,見於《特牲禮》。 食之籩,棗、栗、桃、乾藤、榛實」,爲五物。 有七鼎,士殷祭當用少牢,有五 又《士喪禮 牢者五鼎,用大牢者七鼎、九鼎。三鼎之 祭,且其禮皆有豆 豆」之屬, 腊 響 天子祭九鼎 **黛** 侯 而止爲 牛與腸胃也。 二,尤爲 七鼎之實,見於《公食禮》,就五 於飲耳。 大袷亦當爲 ,就七鼎而 則朔食及禮食之法,不可通之於 》遣 七鼎 非 是。 奠 ,則諸侯宜七鼎,有鮮魚、 〇凡用特牲者三鼎,用少 用 則 加以鮮魚、鮮腊也。《左 而 九鼎之實,見於《聘禮 九 蓋豆飲、食皆用 五鼎之實,見於《少牢 少牢五 膚與腸胃不别鼎與? 是大夫殷祭用 無籩。 鼎 矣。 鼎 而又云「籩 ○《籩人》 · 鼎 曲 也。 禮 大牢, 之, 一鼎而 光 「饋 然 簜 與

樂闋。 住反。」 也。 賓人大門而奏《肆夏》,示易以敬也,卒爵 釋文》: 來者 籩: 此。 鄭 於《籩人》,疑亦在饋食八籩之内而脱之耳。 脩、棗、栗、榛、椇。」此皆籩實,而椇獨不見 言,尚止七籩。《曲禮》:「婦 八籩而重言之,不應饋食之籩立文簡奧 時不常有。 梅皆有乾有溼,爲八。 下脱「糗」,「栗」下脱「脯 歌者在上,匏、竹在下,貴人聲也。 氏 棗、糗、栗、脯。 《少牢》不儐 也 孔子 云:「乾藤,乾梅 一,禮 以以 屢歎之。 鼓反。 由 又《籩人》加籩之實,以 陰 作者也、陰陽 闋,苦穴反。婁,本又作『屢』,力 戸禮 奠酬 敖君 也。」 然三物之溼者,四 主 善謂《籩 而 是也。 賈 一婦亞 I 和 人之摯, 疏 一升歌, 而 謂 一獻,設 萬 人》「棗」 然如其 棗、桃、 四 物得。 樂由 發 物 德 而 如 爲 四

此言諸侯朝天子而天子饗之之禮也。

陽

也。

奠酬

Ŧ,

升

歌者,升

堂

E

孔

子曰「吾語女禮,大饗有四

子屢歎之者,歎其禮樂之盛。《仲尼燕居 夏》,天子所以饗元侯』。」是饗元侯奏《肆 夏》、《昭夏》、《納夏》,而饗、燕卿大夫止 孫穆叔,「金奏《肆夏》之三,穆叔謂 樂闋者,王獻賓,賓飲卒爵,賓又酢王, 惟兼奏《三夏》,故其始終之節長。 《肆夏》、《詩》篇名、《九夏》之首也 惟止用《肆夏》,故其始終之節 酬賓,賓受爵而奠之薦東也。 而歌《清廟》之詩也。 人門即奏《肆夏》,卒爵 《燕禮》:「若以 奏,謂以鐘鼓 止也。 焉」,即其 《左傳》晉饗 賓拜酒,主 卒爵 孔 用 奏 發 以時 將 也。 鬯以 賓客則攝而載裸。」《小宗伯》:「祭祀賓客, 饗禮樂之盛,又言禮樂之所由作,與其感化 陽和則萬物得,禮樂和 堂上之樂獨言「歌」,以歌爲主也。 笙、管、《燕禮》「下管《新宫》,笙入三成」是 賓客之裸、獻、瑶爵,皆贊。』《大宗伯》: 之效也。 天作,故屬乎陽。禮由地制,故屬乎陰。 者,聲之出於人者精,寓於物者粗 樂獨言「匏、竹」,以匏、竹爲 匏,笙也。 德者,《清廟》之詩,所以發明文王之德也。 言「卒爵」,謂卒鬱鬯之爵也。 王饗元侯,則下管《象》。下,堂下也。 實 將 《鬱人》: 彝而陳之。」所謂 瓚 〇王饗賓客,其初亦有二灌。 竹,管也。 裸。」《肆 「凡祭祀賓客之裸 師》: 凡樂,升歌之後,總 則 「賓客之裸」,皆大 萬 「大賓客,贊 主也。 事 《内宰》: 順。 也。 事

乃樂闋者,大饗禮與燕異也。

、答拜而樂闋。」此

樂納賓

則

賓及

庭奏《肆

夏》。

王飲卒

爵,

而

樂乃闋

也。

堂下之

以

貴

X

聲

而

叔

之也。

説見《玉

一藻》。

易,和悦也。

闋,

禮

在

廟。

大門,廟門也。

拿肆

夏》也。

短;

和

裸

此因

大

陰

由

· 凡

此

大

七

六

往

《釋文》:

别

彼列

反。

焉。 飲,又酬賓,賓受爵而奠之也。 此 幣。」據此 獻之儀。 絳 即 注之於爵而飲之。 疑。 若朝時禮賓,非后所與也,則大響之有灌 然《内宰》以裸、獻、瑶爵連言,其爲一時之 事明矣。 饗之禮 一爵也。 ,歸取 云「奠酬」,謂王 鄭氏 灌 用圭瓚,而 也 酬幣,終事八反」,杜氏云:「備九 始禮自齎其一,故續送其八,酬酒 又《左傳》「秦后子享晉侯 大饗之禮,后有 專以禮賓言之,蓋疑饗賓無灌耳。 ,則饗賓之禮每獻皆有 而 朝享之後, 圭瓚 初獻賓,賓酢 《顧命》行灌 重大,不可以飲,故 王 助王薦、獻之法 所 以 禮賓者 禮 王, 王酌 若祭祀 酢 有 有酬 ,自雍 同, 亦 灌 自 無 及 同 存

也。 參之也。 旅幣無方,所以 獻 龜 ,尸飲畢 爲 前 虎豹之皮,示服 列,先知也。 亦 酢王,但 别土地之宜,而 無酬 以鐘次之,以 猛 也。 耳。 節 東帛加璧, 遠 邇 之期 和 居

> 物也。 德 幣,謂三享之庭實也。 此 絲,青州貢鹽、絺之屬是也。 謂 也。 諸 别土地之宜,若《禹 侯 所 以享王者也。 無方,言非一方之 貢》兖川 旅,衆 節遠邇之期 也。 貢漆 旅

若《周禮 前 用 禮》有三享,龜 馬卓上」。● 皮,初享所用之庭實也。 鐘聲之和,參居 故列之最在先也。 庭實也。 物,甸服二歲壹見而 有龜 也。 ,後有丹、漆、絲、纊、竹、箭之屬,取 次之,次於龜 • 龜 大行人》「侯 爲 蓋有馬 也 前列,先知者,以龜 於前後之間也。 鐘 鐘,貢金以共王鑄鐘之 者用 也,次享、三享所 也。 貢嬪物」,是也。 《覲 服歲壹見而 馬,無 以 和 禮》初享,「 居參之者 馬 能 則用 虎豹之 前 貢祀 用 《覲 知 九 之

O 九 據《儀禮注疏 覲禮 》當作

但所言各有詳略耳。

但所言各有詳略耳。

但所言各有詳略耳。

但所言各有詳略耳。

但所言各有詳略耳。

是,以明諸侯歸往於天子之德也。上節言上,以明諸侯歸往於天子之德也。上節言上,以明諸侯歸往於天子之德也。上節言上,以明諸侯歸往於天子之德也。上節言是,以明諸侯歸往於天子之德也。上節言是,以明諸侯歸往於天子之德也。上節言是,以明諸侯歸往於天子之德也。上節言是,以明諸侯歸往於天子之德也。上,以明諸侯歸往於天子之德也。上,以明諸侯歸往於天子之德也。上,以明諸侯尉之。

之,是失禮從桓公始也。」
子、男三十。見《大戴禮》。齊桓僭用,後世襲庭燎。禮,天子百燎,上公五十,侯、伯、庭燎。禮,天子百燎,上公五十,侯、伯、,以照燎來朝之臣夜入者,因謂火爲鄭氏曰:「僭天子也。」 孔氏曰:「庭中

天子、諸侯饗燕賓客,奏《肆夏》之樂以納大夫之奏《肆夏》也,由趙文子始也。

賓。 禮;奏《肆夏》之三者,燕饗諸侯之禮也。 《肆夏》之三」,此納賓之樂 宜 燕饗卿大夫,納賓宜奏《肆夏》之一,升歌 庭、奏《肆夏》。」穆叔不敢當《肆夏》之三, 之三」,此間歌之樂也。 之、非也。《左傳》晉享叔孫穆叔、「金 納賓樂」,是也。又謂「登歌、下管正樂」 所以見譏於穆叔也。天子饗諸侯,及諸侯 嘉魚》、《南山有臺》,而晉皆進 則是納賓奏《肆夏》之一者,燕饗卿大夫之 王》之三」,此升歌之樂也,「工歌《鹿鳴 則天子用《三夏》以饗元侯,元侯相饗亦用 君也。○孔氏謂「文子奏《肆夏》,僭諸 夫禮納賓無樂,趙文子始奏《肆夏》,僭人 賓及庭,奏《肆夏》」,是也。 用《鹿鳴》之三,間歌宜用《魚麗 上章言「賓人門,奏《肆夏》」、《 《燕禮》:「賓及 也,「工歌《文 《鄉飲 而用之,此 心》、《南 《燕禮 酒》大 侯

實私 所以 朝覲、大夫之私覿、非禮也。 交,不敢貳君也。《釋文》:「使,色吏反。」 夏》,惟用於金奏,未有用之升歌、下管者。 自 門」章 覿 申信也。不敢私 相 何爲乎諸侯之庭? 響,皆升歌《清 及《仲尼 燕 一觀,所 廟 居》所言是也。 》,下管《象》, 以致敬也。 大夫執圭 爲人臣者 若《九 E 而 無 而 使, 「賓 外 庭

之物 之誠信 也。 己不敢參焉耳。聘賓卑,故介禮得伸。 於從卿爲 敬於己君 夫從君 朝 就諸侯 貳心於他君也。○《聘禮》賓、介皆得 覲 也。 謂 大夫執圭出 也。 朝 諸 相 何爲 也。 覲 介之禮,以 朝 侯 從君 則 相 而 庭實 乎者,深怪之之辭。 爲 朝也。大夫之私覿,謂 行 而 聘,得行 介者不 私 私觀 行,不敢私覿,所以 明禮之專主於君 覿之禮於主 、私覿者必 私 敢 一觀,所 私觀,所 以 或 陳 貳君, 以 庭 申 之君 一, 而 私 Ė 降 實 致 大

> 嫌乎? 之卿 非禮 君 尊,故介禮從屈。 意矣。 皆得以摯見於 周 禮 • 朝 掌 今乃謂「不 客》諸 君,曷嘗以 侯 相 敢貳 朝,主 貮 君」, 君 爲 或

文》:「升自阼,本又作『升自阼階』。」 大夫而饗君, 君適其臣,升自 也,由三桓始也。 非 禮 作階,不敢 天子 也。 無客禮 大夫 强 有 一、莫敢 而君殺之,義 其 室 爲主焉。 也。

紀, 也。」 君而 季友以君命 牙、公子友。 慶父與牙通於夫人以脅公, 魯桓公之子,莊公之弟:公子慶父、公子 鄭氏曰:「大夫饗君,由强 饗之,非禮 而 孔氏曰:「大夫富强,專制於君,召 君能殺之,是銷 鴆牙。後慶父弑二君,又死 也。 大夫强 絶惡 且富 盛則干 原,得其 也。 三桓 或 宜 亂

❶ 「則」,原重文,據《禮記注疏》删。

之,則亢矣。故又言「天子無客禮,臣不敢 則臣可以饗君,然當就君所而 者,據魯而言。」 宫長萬皆以强 也。 天子祭天於南郊,就 有其室」,以明饗君之非禮也 鄭伯饗王於闕 三桓之前,齊公孫無知、衛州吁、宋南 盛被殺。 西辟」,若召君至己家而 愚謂:天子可以 陽位也。 此云『由三桓始. 設饗禮 故《左傳》 祭天, ",猶 響

釋文》:「縣,音玄。

鍚,音陽。」

覲 侯,天子之失禮也,由夷王 禮,天子不下堂 待諸 饗之時,乃有迎法。』義或然也。」 下堂見諸侯也。 敢自尊於諸侯。」 夷王,周康王之玄孫之子也。 鄭氏曰:「不下堂而見諸侯,正君臣 『天子負斧扆』,南面,侯氏執玉入。 侯,以車 出 迎。 若春朝、夏宗,則以 而 見諸 孔氏曰: 熊氏 以下。 侯。下堂而見諸 云: 『春夏受三 「案《覲 時微 賈氏公 以弱,不 是不 客 也。 禮

> 錫,冕而舞《大武》,乘大路,諸侯之僭禮也。諸侯之宫縣,而祭以白牡,擊玉磬,朱干、設法。故云『覲禮不下堂而見諸侯』。」 一受之於廟,受贄、受享並無迎之。 秋冬一受之於廟,受贄、受享並無迎

待諸 《明堂位》所謂 天子宫縣,謂 必執朱干、玉戚者,武王伐紂,初執朱干以 則王親在 故戚亦謂之揚。天子祭宗廟,舞《大武》, 盾也。錫當作「揚」,鉞也。朱干、設錫,即 磬、《書》所謂「鳴球」,天子之樂器也。 宋得用之,其餘諸侯 云:「揚、戚,斧也。」是揚、戚皆斧之别名 軒縣,惟東西北三面 侯,後執黄鉞 舞位,執朱干、玉斧,以象武王。 四 「朱干、玉戚」也。 面 以臨六師,故《大武》之 縣樂,若宫室然。 近用時 而已。白牡,殷牡也 王之牲耳。 **^** 廣 諸 雅 玉 侯

天子祭天之車也。 以下,而不得執干、戚以象武王也。大路,雖得舞《大武》,然其所象者特周、召、大公難。

禮也。 臺門 爵於站 鄭氏 以 受爵飲畢,反此虚爵於坫上,於西階上拜 之,兩君 當門道立屏,蔽 之站也、蓋在 以 屏謂之樹。 主人阼階 「酢主人,主人受爵飲畢,反 簾,士 而 繡,如字。 《釋文》: 旅樹,反站,繡黼丹朱中衣,大夫之僭 曰:「此皆諸侯之禮也。旅,道也 上。 相 以 上答拜。 見,尊 帷。 「站,丁念反。 禮 熊 尊南。」 ,天子外屏,諸侯 氏云:『主君獻 疏云:《禮緯》文。 内 南 外 賓於站 爲 站,獻 爲敬也。 繡,依注作『綃』,音消。」〇 孔 氏曰:「旅樹, 取 柵 此 爵 賓,賓 反站,反 飲 内屏、大夫 虚爵於站 洗 畢 筵 則 土 一,酌 前 爵 爲 謂 反

章,黼 文也。 奠之也。中衣,衣在上服之中者。 禮》奠爵之所,東西各一,而賓主各於其 賓卒爵 皆反爵於坫上也。」」 不可爲飾 玄色。」朱四人,郷五人,玄六人,此三者皆 云:「君子 下也。其大夫以纁,士以 則大夫、士中衣之飾,蓋自縓以 人君之中衣丹朱緣,喪自小祥以 領緣,又於其上繡爲黼 地,而反於坫上。坫之設,蓋即於《鄉飲 階上奠爵拜。 三染之纁 ,主人阼階 用繡。鄭 繡黼丹朱中 ,於西階上奠爵拜,主人卒爵 則 别 不以紺、緅飾。」邢 無可 大 Ŀ 兩君相響,則其卒爵不奠於 夫、 氏破「 拜, 用 衣,謂以丹朱爲中衣之 士之飾,舍再 賓答拜。 也。 愚謂: 繡」爲「綃」,非矣。 文也。《虞書》十一 頳 孔氏曰:「《鄉 與? 疏 《鄉飲 是 E 謂: 賓 後線緣 染之顏 ,丹朱以 主 紺 論語 黼 酒禮 於 飲 爲 斧 所 阼 畢 酒

尊於房 尊於東 傳》: 間。」 兩 非 處 尊與大夫、士設尊同處,安見饗賓設 體敵者,其設尊皆當 禮 云: 《禮運》。 君 飲 云「醴、醆在户」,是人 左 特性》、《少牢禮》尊於房户 君 《必異於大夫、士也? 《酒》是 相 》是燕己之臣子,尊於東楹之西。 」傳》云 ,大饗有灌,則有 相響 見, 夫 「王享醴 愚謂 户間,爲賓主敵體之尊。 楹 兩楹 人 卿 則 、、 西 亦當有之,則有 薦 大夫之禮,尊於房户間。 尊 「爲君 之間非設尊之所 酒。」諸 凡設尊之法,必有所 於 ,命之宥。」王饗諸 象不出門 兩 燕其臣之尊。 楹 侯 如《鄉飲 君祭祀醴 間 祭祀 盛 但 鬱 故 兩 齊酒之尊。 是 獻尸 鬯之 間 君 其 也 酒 也 齊、盎齊之 相響,其尊 坫 而《禮 》之法矣。 , 兼 是凡賓主 侯有 彝。 鄉 《燕 《禮 在 傍 飲 有三 尊之 若 ,説見 兩 ^ 器 禮 運 酒 故 左 楹 燕 兩

> 也。 坫 尊。 以《詩》言「素衣朱襮」爲冕及爵弁服 以 皆在其北,故《明堂位》言「反坫出尊」,言 在户,酒在堂與? 粢 酒 衣,非也。 之中衣也。 出 醍 裼裘葛者也。 則 《禮運》云: 緇 於尊之南也。 在堂。」大饗之尊,其 兩 衣以 君 相饗亦有三酒,則 楊羔 素衣以裼麛裘,皮弁服之中 派裘,朝 「玄酒在 玄綃衣以 蓋站設於兩階之上 〇中衣,衣於上服之内 服之中 亦鬱 室 裼狐青裘,祭 ,醴、酸在户 衣 又有盛酒 鬯 也 在 室 之中 孔 一,齊 尊 之 衣 服 疏

亂矣。 貴以等, 故天子微,諸侯僭,大夫强 相 覿以 貨 相賂 以 諸 利 侯 偂 脅。 天 下 於 之禮 此 相

鄭 明 故 見 氏 爾 脅 日 : 相 「言僭 貴 强 以 故 等, 所 敢 曲。 則爵不足以 僭 几 方氏 者 之言 馭 慤 其 日 貴 亦 互相 微 相

起下節也 貴賤之等列也。 由 則予不足以 覿 群臣」,以此三者爲先。三者失,天下之禮 是亂 以 矣。」 ,則禄不足以馭其富。 馭其幸。《大宰》『八柄詔王馭 愚謂:脅,謂被劫脅。 〇此以結上七節之意而 相賂以 等, 利

之設於私家,非禮也,由三桓始也。諸侯不敢祖天子,大夫不敢祖諸侯。而公廟

不在 魯以 士且 廟。 鄭氏 祭,臨於周 爲諸姬,臨於周 諸侯,不敢以卑祭尊也。 僭焉。」 愚謂:諸侯不祖天子,大夫不祖 五廟之數者。 周公爲大祖,文王之廟蓋 一然,況天子、諸侯乎? 魯以周公之故,立文王廟,三家 曰: 一仲 公之廟。」周廟,文王之廟 孫 叔 廟,爲邢、凡、蔣、茅、胙、 魯立周廟 孫、季 支子不祭,大夫、 孫 《左傳》:「魯 ,則諸侯祖天 氏 别立之,而 皆 立 見 桓 也。 而 公

高而代。《釋文》、「過,古卧反。」○鄭注、「二,或爲「三」。」
等,天子存二代之後,猶尊賢也。尊賢不過二之禮公,而歌《雍》舞佾,無所不僭矣。
五其極也,遂以魯之所以祭文王者祭桓五朝,子矣。三家立桓公廟,則大夫祖諸侯矣。

杞,投殷之後於宋。」所謂二代也。 後於薊,帝堯之後 記》:「武王克殷,未及下車,而封黄帝之 之二代,此言「存二代之後」,是也。 帝、堯、舜之後,謂之三恪、《左傳》言「封胡 之賢也。 作賓王家」也。 子之禮樂,以祭其先世,所謂「脩其禮物 所謂三恪也。 公於陳,以備三恪」,是也。 夏、殷之後,謂 視以爲因革損益之宜者,不過此也。 存二代之後,謂周存夏、殷之後,使得用天 尊賢不過二代,以己之制 一 下 猶尊賢,言猶尊敬其 於祝 車 而 ,帝舜之後 封 夏 后氏 之後 於陳。」 杞、宋 禮 (先世 〇 黄 所 於 樂

諸侯無異,何得比夏、殷之後?」杜預以 服色。恪者,敬也,敬其先世而封其後,與 天子之禮祭其始祖受命之王,自行其正朔 異義》云:「存二代之後者,命之郊天, 恪之禮殺於二代矣。鄭氏駮許叔重《五 皆郊,而黄帝、堯、舜之後未聞有此, 則三 陳 以 經

諸 寓,或爲「託」。」 侯不臣寓公,故古者寓公不繼世。 鄭注:

及杞、宋爲三恪,非是。

臣之矣,故寓公不繼世 寓公,謂諸侯失國 公嘗爲諸侯,故諸侯不敢臣之。至其子則 而寄寓於諸侯者也。 寓

君之南鄉,答陽之義也。臣之北面,答君也。 《釋文》:「鄉,許亮反,下『君南鄉』同。」 之。 臣 此 在朝,不皆北 謂 天子日視朝之位,三公北面,諸侯 君 視 朝、臣 面 朝君之位 · 北 面答君,據其尊者言 也。 答,對 也 則

> $\equiv$ 一卿也。 朝位之説,詳《文王世子》。

文》:「辟,音避。」 大夫之臣不稽首,非尊家臣,以辟君也。

之也。」 畿外,專有其國,故大夫得 夫,便是一國兩 於國君已稽首,今大夫之臣又稽首於大 首,非尊敬此家臣 稽首,皆盡 孔氏曰:「諸侯於天子稽首,大夫於諸 夫稽首於諸侯,不辟天子者,以 臣 禮以 君,故曰『以辟君也』。 事君。 ,以辟國之正 家臣 於大 盡 君 諸侯出封 臣 大夫不 也。 禮 事 臣 侯

也。《釋文》:「爲,于僞反。」 大夫有獻 弗 親 君 有賜 不 面 拜,爲君之答己

尊,若親獻 日又往拜 拜,謂君使人賜 大夫有獻弗親,使宰獻之也。 君賜,拜於門外而 面拜,則君當答之,重勞君也。 大夫於家,大夫既拜受,明 君有賜不面 退 也。 大夫

臣 者,於外 夫拜賜 玉 》:『掌三公及孤卿之復逆。』」 而 日 告 退」,是也 「凡獻於君, 小 ,臣,小 臣 大夫使宰」,又曰 鄭氏 受以 曰:「不 人 也。 面 大 小 拜

文》:「楊,音傷。」○鄭注:「楊,或爲「獻」,或爲「儺」。」(鄭人楊,孔子朝服立于阼,存室神也。《釋

與? 宜 神。」 服 孔 鄭 而 疫,逐强鬼也。 安也。 氏曰: 氏 也 立 曰 : 於廟之阼階,存安廟室之神,使 蜡祭皮 愚 驅 大夫朝服以祭,故用祭 「楊,强 謂 弁服 逐 朝 强鬼,恐室神驚恐,故 存室神者,神依人也。」 鬼也。 服 ,儺之禮卑於蜡, 立 于 阼, 謂時儺,索室驅 儺 禮 服 蓋 則 以 依 朝 朝 著 依 服 服 己 朝

孔子曰: 鄭 氏 氏 日:「 「何 「射之以 「多其射 以 聽者,言何以能聽此樂節,使 樂也,何 容 與 樂 以 節 聽? 相 應 何以 也 射 孔

> 樂節 與射 云: 「何 容相 相應。 以 應。 、言其 善其 何以 難 兩 也。」 、射者, 事 相應,故 言何 鄭注《 以 能 使射 射義 與

義也。」《釋文》:「弧,音胡。」 孔子曰:「士使之射,不能則辭以疾,縣弧之

居,音姬。」 孔子曰:「三日齊,一日 日伐鼓,何居?」《釋文》:「齊,本又作「齋」,側皆反 因 有 男子生, 有懸 事 也 弧之義,不可自言其不能射故也。 則 故君 懸弧於門左。 使士射,不 用之,猶恐不敬。二 能 射者,男子之所 則 託 疾 以辭

禮之甚 散齊七 成 足 比 譏三日齊,二日伐鼓者,致 三日 以 其爲齊矣。 感 日, 也。 動 齊而 性情,鼓鼙之聲讙 致齊三日。 齊所以專致其精 一日伐鼓 何居,怪之也 ,則情意放散,而 散 齊 齊伐鼓,尤爲 一、尤非 則 明之德,而 不 樂 他 矣, 樂之 樂 不 失

之於西方,失之矣。」
孔子曰:「繹之於庫門内,祊之於東方,朝市

其位 楚茨 門内之西塾,而祭於其室,賓尸於其堂。 名曰 外 方 在 正祭時求 今魯人乃於庫門之内塾,則非禮矣。 也。」大夫賓尸於堂,天子、諸侯繹祭,就 曰:「自堂徂基。」毛傳曰:「基,門塾之基 庫 諸侯祭之明日又祭,亦祭畢而賓尸,而大 繹者,祭而又祭之名。 釋,賓尸也。」大夫正祭畢而賓尸,天子、 也 而 門内,謂於庫門之内塾也。《絲衣》之詩 西,求神當 釋也。 東於門之處也。 在門東,故求神於此,不知鬼神之位 》所謂「祝祭 市 有 神 三時 於 庫門,諸侯之外門也。 於廟 廟 于 門外待賓客之處、《詩 門 朝 祊」也。 時 外之西方,不當於東 魯人以主人待賓客, 《絲 而 集 衣》詩 者謂之朝市 東方者,廟門 繹之於 序曰 祊, 廟

> 門外庭之東方耳。《燕禮》: 言,遂誤合爲一 及注《郊特牲》「索祭祝于祊」,謂爲正祭, 祊」, 皆謂 索祭祝于祊」、《祭統》「詔祝 之次日又祭之名。 者,正祭日求神於廟門外之名。 堂,二者同 於東方、謂於其處列次而陳貨也。 餘則皆以爲繹祭。蓋因此章以繹與祊 祭于祊」、《禮器》「設祭于堂,爲 在東方,夕市宜 面 郊特性》「祊之於東方」,又「直祭祝于主 鄭氏 東上。」●《士喪禮 日 正祭求神之事也。 時, 「紡於 而大名曰繹。」 事 在西方,順其時之陰陽也 廟 也。 二祭不同日。 》朝夕哭,門外之位: 門外西室,釋又於其 且祊之於東方,謂 「士西方,北 於室而出于 鄭 氏箋《詩 祊乎外」, 愚謂: 繹者,祭 《詩》「祝 朝市宜 對 祊

「北面東上」、《儀禮注疏・燕禮》作「東面北上」。

0

西室」,誤矣。
西室」,誤矣。
一西方,北面東上。」門内之庭,其遠於門者亦謂之東方、西方,門外之庭,其遠於門者亦謂之東方、西方,門外之庭,其遠於門者亦可室」,誤矣。

亦作「墉」,音容。」之義也。日用甲,用日之始也。《釋文》:「庸,本之義也。日用甲,用日之始也。《釋文》:「庸,本社祭土而主陰氣也,君南鄉於北墉下,答陰

義」。 所以尊之也。 社 君 下者,社壝北 祭主於陰氣也。墉,牆也。君南鄉於北 社 Ш 春蒐田,獻禽以祭社 主 在壝内北 .者,祭五土之總神也。 林、 北 國中之神,莫貴乎社,祭用日之始, 川澤、丘陵、墳衍、 面向陰,君南鄉對之,故曰「答陰之 墉 面 ○社 下南鄉祭之也。 開門,其主設於壇上北面 歲 」,是春祭也; 不再祭。 原隰 地秉陰,故社之 ,謂之五 《大司 答,對也 馬》 士。 秋 墉

以有平水土之功配社祀之, 稷有播種之功 以爲社祭五土總神,稷爲原隰之神,句龍 社 仲秋 獮 置之處,《小宗伯》云『左宗廟,右社稷』,鄭 壇在社壇西,俱北向,營並壇 土與之,上皆以黄土也。』《條牒論》:『稷 法,非周禮也。 〇孔氏曰:「鄭康成之説 稷次之,故北郊以夏至而祭,社稷以仲春 月以春分、秋分。 陰陽之極,二分者陰陽之中。 封五色土爲之。若諸侯受封,各割其方色 五丈,諸侯半之。』説者又云:『天子之社 配稷祀之。《白虎通》云:『天子之社壇方 至尊,而日月次之,故南郊以冬至,而 云:『庫門内、雉門外之左右。』」按"天子社 」,謂「社一歲三祭」,不知《月令》乃秦 田 也。 ,致禽以祀方」,是秋祭也。 孔氏據《月令》孟冬「大割祠于公 地示,皇地祇至尊,而社 共門。」其所 天神,上 蓋二至者 祀 日

是故 牖 古」皆同。 天子大社 使 稷 在應門 喪 陰 國之社屋之,不受天陽 喪,息浪反。 明 ,必受霜露風 内,諸侯 也。《釋文》:「大,音太,下文「大廟」「大 在雉門 薄,本又作「亳」,步各反。」 内 雨 説 以 詳 《祭義 達天地之氣 也。 薄 社 也 北

使人 以爲 絶 惟 不 爲 也。 喪 天 使天之陽 天子之社曰大社,尊之之辭也。達,通 而 得受風 國 乗陽 其 開 廟屏 Ш 之社 君 武王 陽 北 鑑 ]1] ",而霜 也 戒。」謂立之於廟門之外以爲屏 戒 牖 見之而 陵 隰 雨 滅殷,班 ,即亳社 氣 使 陽 霜 下通於地,以 ,地之體 其 穀梁傳》云: 露風雨,天之用 主 露之陽 知 陰 生而 戒懼 也。 其 方偏 也。 社 氣 也 陰主殺,亡國之社 薄、亳 於 明,所 也 故大社 成 諸侯,使各立之 薄社 「亡國之社,以 生物之功 也 又 通,殷之舊都 以 塞 屋 通 其 不 其 地 其 ·爲 上 三面 秉 陰 也 屋, 使 陰 也 如 而

> 民美報 財於地 所以 此,以 云:『若祭勝國之社稷,則爲之尸。』」 孔 焉。 ,取法於天,是以 氏 神地之道也。 其 日 無 家主中霤 事乎 「亡國之社 生 物 地 而 國主社 尊 載 而 亦 天 萬 但 有 而 物, 稷 用 一,示本 親 门,故《 以 天垂象, 地 也,故 示 巾 士: 誡 師 也 教 取

社

子祭天 爲 祭,是神 其象,所謂『在天成 貴,故引天爲對也。 取法於天者,四時早晚,皆放 財於地者,財産 地所以得神之由也。 孔氏曰:「社所以 ! 祭社 耕作 教民 是 是 之候也。 明於地之道 也。 也。 美 報 地 所 也。 並 既 取 所 神地之道者,言立社 從 爲民 象,在 財 取 地 中 也 天垂 地 故 法, 霤 有其物,上天皆 所親 出 一,謂 故 親 地 地 一象者,欲明 爲 載 尊 故 而 成 日 土 月星 人 祭之,一 而 形」也。 萬物者 與庶 神。 所 祭之,天 一辰 取 卿 民 地 也。 切 以 取 之 釋 之 大 垂

七二八

謂 者,境内之土 者,宫内之土 皆祭之,示其 或 夫 之家 家、國之所依 主祭土神 主 祭 神也,一 神 養生之本也。」 於 + 以 也,一家之中 社 神 爲主也。 於 以 中 國之中以爲主。 土 霤 神 生財 天 以 愚謂: 子 爲主 養 諸 人,故 中 侯 社 ·雷 之

文》:「乘,時 唯 唯 社 爲 社 丘 事, 乘 證 單出 反。 共 粢 共,音恭。 里。 盛, 所 唯 築,音資。」〇鄭注: 爲 以 報 社 本 田 或 反 始 人畢 也 「乘,或 作。 《釋

社之事 爲邑, 羨。 徒》: 也。 也。 此 謂 惟 畢作 爲社 州 凡 四 田 長祭社之事 邑爲丘 則一里之人盡 起 與 田 竭 徒役,毋 追胥 謂 作 爲 也 四丘 竭 祭 也。 作。」「 謂 過 社 爲 家 羨 單,盡 而 出 乘。」築,稷也 卒 一人,以 九夫爲井,四  $\mathbb{H}$ 謂 -皆行。 獵 每 也。 也 家 出一人 其 惟 畢, 小 餘 爲 稷 井 爲 司 盡 祭

> 得,故 卒伍 諸 之起之,以 季春出火, 利, 共之。」 也。 本反 本。 田之穀,大 日 而 明 以 以 始,故 反始者 粢 戦 觀 君 皇氏 則 爲 其 觀 親 在 克, 器 不 其 誓 焚 夫 民 侃 ,反其生物之始。 犯 習變也。 也 爲 社,以習軍旅,左之右之, 以 以 日 無 命也。 盛 下 祭則 不 然後 天 無 咸 報 受福。 八子、諸 藉 求服 出 而 簡 本 田 流 其 者 其 力 其志,不貪 示之禽, 車 則 侯 《釋文》:「鹽,依 祭社 報 賦 以 丘 祭 其 社 乘 供 所 養 而 之民 其 用 人 而 歷 以 其 之 鹽 坐 其 藉 事

注音艷。」〇鄭注: ^ 歷,謂 屬 用 因言祭社 大司 之也。 也。 馬》春蒐,「火 算具陳 百人爲卒,五人爲 焚,將田 而 社 遂及春 列之 ,或爲『省』。」 也 而 、 弊,獻 田之事 先焚除其 車 禽以 賦 伍 也 八草萊也 車 祭社」, 誓社 出 馬器 火,出 謂 械 故 於 之 簡 此 而

能

謂

謂

獸

鹽

師,用 右之, 者,將田 句,言教陳之事 觀其習變者,戰陳乃非常之事,於無事之 旅」,是也。 先,教之以 私 從 讀 陳之誓, 不 教之,觀 田 之。 教 犯 禽不如法者。 爲 加 教 謂 師 艷 陳,則 誓之 車 而 以坐作進退之法也。 必 車 r, 斯真 歌 歆 一,無自災 戰陳之法,《大司馬》「仲 君 設 其 徒 凡四時之田,誓皆有二: 動之,以獲禽之利 也。 爲 動之意。凡田,大獸公之,小 親 驅 皆 君 預 能 也。 田 誓師,故教陳 逆之車,驅禽以示之也。 習於非常之事 左 親 後射」,是也。 以 用 誓之。 不犯命,若《漢田 獵之誓。 右 習 命矣。 流,行也。 陳 軍 列之 旅 蓋 求服其 者 田 變,非 教 也。 亦 獵 也。 陳 謂 也。 艷 流示之禽 然 以 坐之起 未 諸 司 春 [律》所 常也 志 犯 此三 左之 象 教 徒 田 者 命, 用 誓 爲 振 之 mi

時

社

祇也。 是而 受福 也。 狹各 氏 社 火,而民 求士卒之用 之祭,所祭者皆上帝 之地,以爲神之所主而祭之者也。 社,祭一國之地祇也。 春以火田 可 而 上,其尊 謂 用 記者誤 獲 一故以 禽也。 天子之社,祭畿内之地祇也。 實非 社 有 歲有九,又有大旅之祭,出 大夫以下成群立社 不 與上帝對。 乃 即 也。 ,田止火獘,然後獻禽,至季春 鄭 同。 祭 也。」○經典多以郊、社對言, 用 戰則克。 氏曰: 此 命。 地,别無北 火。 蓋天無二者也,地則 Ŧī. 北 不貪其得者,不欲其 句,言田獵之事 郊 今云『季春出火』,乃 「祭社是仲春之禮 所 也。 至於春 田 州社,祭一州之 祭,祭全載 獵 郊之祭」,其説 地 得禮 ,亦各視 則 祈、秋報 惟 故 也 夏至祭 征、巡 天子 之 祭 諸侯 其 疆 7,及因 地 社 所 域 犯 守 祭 居 地 之 廣 似 胡 誓 出 仲 則 皆 命 祇

之方丘 《周 天地之 侯祭山 惑。 祭,自 社 辭 此 注《周禮》,謂 祀,多舉南郊以見北郊,而北郊自夏至外, 事 地 又别無他祭,故無明文可見,致滋後人之 使各主其五土之祭,則天子之祈、報、告 司樂》:「凡樂函 別與六天之説同爲 之禮 也。」 而 告祭,皆祭社。 `禮》,然《禮記》所言,豈皆妄耶? 闢 然大示之祭見於《周禮》者非一、《大 無 之者也。 川。』《郊特牲》:「器用陶、匏,以 可 性 奏之。」《曲禮》:「天子祭天地,諸 庸祭及全載之地 謂社 也。」《祭法》: 有崑 即祭地 白自 鍾 崙地祇,又有神州 蓋 爲宫,夏日至,於澤中 畿外之地分封 讖緯 「社祭土」至此,明祭 乎? 「瘞 無稽之言,所當 矣。 即 埋於泰折, 胡 經典言郊 氏 諸 地祇 若鄭 不 侯 信 象 祭

郊之祭也,迎長日之至也,大報天而主日 之東南 降其神。 崔氏以雩爲常祭,九也。 月大饗八也。 雩與郊禖爲祈祭,不入數。』 夏正二也,五時迎氣五也,通前爲七也,九 物之始。宗祀 祭天之禮,以 謂之大報天。 之大。祭天歲有九,而冬至之禮最盛 生,而日始長,故迎而祭之。 迎長日之至,謂冬至祭天也。 巡守至方嶽之下,先燔柴以告天 曰:「皇氏云:『天歲 曰:「以始祖配天,須在冬至一陽始生,萬 唯人道 ,西嚮,燔柴及牲玉於丘 宗廟 祭天無 日 有 縣 九月,萬物之成。」〇孔 爲主,而 象著明,莫大乎日月,故 裸,故鄭注《小宰》云 有八祭:冬至 月配焉。 祭日,王立於丘 禮之盛者 上,升壇 冬至 也 一也 張 祼, 一,故 也。 陽 以 氏 子 謂

焉。』然則祭天唯七獻也。鄭注《周八道宗廟有裸,天地大神,至尊不裸,

莫稱

天子適四方,先柴。

之性,本無可象,但以質素之物,於沖穆無

兆

壇

而設祭於墠

匏,以陶爲尊簋之屬,

以匏爲爵

也。

天

地

郊。 器用 兆於南郊,就陽位也。 質達 地示在 宗廟十二獻,祭天無灌,則 降神也。 之燔柴,地示之瘞埋,宗廟之灌將,皆所以 睘 禮》云:『大事於大廟,備五齊、三酒。』則 地之間,鬱鬯芬芳,其氣從乎陽而上升,其 所以不灌者,以其以燔柴降神也。 上下之交也。此三者之禮之所以不同也。 牲用騂,尚赤也。 陶、匏,以象天地之性也。 丘之祭與宗廟洽 乎陰而下潤,故灌用鬱鬯,所以求諸 一下,非瘞埋不足以達之。人鬼在天 天神在上,非燔柴不足以達之。 同。」 埽地而祭,於其質也。 九 愚 於郊、故謂之 獻 謂 也。 天子 蓋天神 祭天 祭

,謂壇之營域也。 也。 陶, 用犢,貴誠 埽地而祭者,燔柴在 瓦 器 也 也。 器用 陶 禮北 也。 玉 牲

有牲、幣」。 天牲用騂犢,此與《祭法》所言是也。 郊天而兼言地,則北郊之禮亦然也 孔氏因謂《大宗伯》所言者爲圜丘所用之 幣,豈待言乎? 大朝覲之時所以 方,以赤璋禮南方,以白琥禮西方,以玄璜 四圭有邸、《典瑞》所言是也。《大宗伯》: 「天下之物無可 爲之意爲稍近,故用之以祭。《禮器》言 以蒼璧禮天,以黄琮禮地,以青圭禮 ,誤矣。 玉,此與《典瑞》所言者爲南郊所用之牲 方明非正祭,嫌不用牲、幣,故曰「皆 方,皆有牲、幣,各放其器之色。」此 若言祀天之正禮,則其有牲 以 鄭氏誤分郊、丘爲二祭, 禮方明者,非祀天之禮 稱 其德」,是也。 此 玉用 主言 東 謂

郊之用辛也,周之始郊,日以至。 郊之用辛,謂正月上辛祈穀之祭也。始

爲遠。 以 郊之祭天爲尊。 不 譽配,郊者祭感生帝於南郊,而以稷配 祭,謂「禘者冬至祭天皇大帝於圜丘,而以 而 法》「禘譽」在「郊稷」之上,謂「郊既祭天 也,其所祭則皆昊天上帝也。 報天之正祭也,祭之於孟春者,祈穀之祭 之則謂之圜丘」,是也。祭之於冬至者,大 王 周有之,而魯未嘗行也。 上辛祈穀之郊,魯亦行之,冬至之郊,則惟 對 郊 言「郊稷」也。 稷配 知禘乃宗廟之大祭,非祭天之名,但 肅謂「以所在言之則謂之郊,以所祭言 \ 祈穀又郊言之也。 禘在郊上,又大於郊」,遂分郊、丘爲二 日 以 此《祭法》之所以先言「禘嚳」而 前 至,謂 禘追及於譽。以尊卑言之,則 且鄭氏既分禘、郊爲二,至 冬至之祭也。 以遠近言之,則禘之及嚳 於始郊特言「周」者, ○郊,即圜 日 鄭氏見《祭 「始郊」者 丘也 後 郊

或移用其前後之一日與? 其冬至祭天,固以至之日爲主,其不從,則 卜之者,審慎之意也。 祀五帝,迎氣之祭也。 卜日。」祀大神,祭天也。祭大示,祭地也 伯》:「祀大神、享大鬼、祭大示、帥執事而 帥 ト郊、ト日也。《周禮・大宰》:「祀五帝 則周之祈穀,或亦有用中辛、下辛者矣。 執事而 卜日,祀大神示亦如之。』《大宗 以 此皆有定 魯禮 祖 廟,始祖之 ト郊推之、 日,而猶

廟。 而先告之也。 受命于祖 作,灼也。 廟者,郊天以稷配,故將卜 《周 禮 卜師》:

尊祖之義。作龜于禰,親考之義。 龜于禰宫,就禰 凡卜事, 既高, 揚火以 廟 而卜之也。 作 龜 ,致其墨。」作 受命于祖,

義也 卜之日, 王立于澤, 親 聽 誓命,受教諫之

廱也。

廱

《詩》: 澤,辟 子,無 意也。 戒。 譴也。 禮 矣。受教諫之義者,釋所以聽誓命於澤之 言戒王者,尊王,不敢言戒,其實亦并戒王 雠,澤也。」是也。 前 大宰 北 「振鷺 期 大學者,王受教之所 郊天至重,故王 画 十日,帥執 職》:「祀五 者。 于 飛,在 辟 誓王有教諫之義,此 誓命,謂 事而 彼 環水,故謂之澤。 帝, 西 亦受誓戒。《周 ト日,遂戒。」不 則掌百官之誓 所謂 雝。」毛傳云: 戒王以失禮之 一詔 其所 於天

以不於朝廟而於澤也

獻命 姓 也。 庫門之内, 戒百官也。 鄭注:「庫,或爲「廐」。」 大廟之命,戒

百

勅也。 祀 先祖所生。」 鄭氏曰:「王自澤宮而還,以誓命重 宰,辟王 姓於大廟,皆不於朝者,郊之誓戒出於大 百族,即百姓也。戒百官於庫門内,戒百 則郊之誓戒,亦大宰誓之,而司寇涖之矣。 者,據魯之郊禮言之也。《大司寇》:「禋 諸侯之外門曰 百姓者,皇氏云:『姓者,生也,並是王之 此還齊路寢之室。」 百姓,王之親 五帝,則戒之日涖誓百官,戒于百族。」 大廟,祖廟 所 出 命之處也。 也。 「庫門。 愚謂: 也。 入廟戒,親親也。 孔氏曰:「王親謂 云「獻命庫門之内 百官,公卿以下也。 王之外 門日 皐門, 工相申 王自 之

祭之日,王皮弁以聽祭報,示民嚴上也。

鄭 郊,故未服大裘,而 于王」。」 事 謂:嚴,敬也。 之日』,小宗伯『逆粢省鑊,告時于王,告備 而敬其君上矣,故曰「示民嚴上」。 民嚴上,示民 者,乃後 氏 日 「報,白也 孔氏曰:「皮弁以聽祭報,未 服 祭 以 天子敬於事天,則民化之 服 尊嚴君上之意 而 服日視朝之服 行 夙興,朝 事 也。 服 《周 也。」 以待白 禮》『祭 也。 示 愚 祭

弗 喪 命 者 而 不哭,不敢凶服,氾埽反道,鄉爲 曰:「謂郊道之民爲之也。反道, 民聽上。 《釋文》:「氾,芳劍反,本亦作『汎』。」 田 燭,

鄭氏

剗

之旦,喪者不哭,又不敢凶服而出 當界廣埽新道也。 之吉祭也。 民 令新土在上也。 之土反之,令新土 聽上,化王嚴上也。」 氾埽, 田燭,田首爲燭。 在 廣埽 鄉,謂郊内六鄉也。 上也。 也。 孔氏 郊道之民,各 反道 曰:「郊祭 一,剗路 ,以干王 弗命 六 H 而

> 禮 也。 蠲,禁刑者,任人及凶服者,以及郊野。」而 下,並非 郊祭之時,王不特命,故云『不命』。」 此云『不命』者、《蜡氏》所云,有司常事 鄉之民各於田首設燭照路,恐王祭郊之早 • 蜡氏》: 『凡國之大祭祀, 令州里除 弗命而 王命,而 民 聽上者,合結『喪者不哭』以 民 化王嚴 上故 也。 周

音早。」 卷,本又作『衮』,同古本反。載,丁代反,本亦作『戴』。璪 則之,郊所 旒,龍章而設日月,以象天也。 則天數也。 祭之日,王被衮以象天。戴冕璪十有二旒 以明 乘素車,貴其質也。 天道 也。《釋文》:「被,皮義反。 天 旂十 垂象,聖人 有一

上也。 月、星辰之衣,不别爲之名,而但謂之衮 衣,有日、月、星辰之章,故曰 被衮,謂内服大裘,而被十二章之衣於其 在天成象,莫大於日月,十二章之 「象天」。

章。,不 裼 之裼 衮。 者,蓋 奇 也 陳 明天道,故其衣服旂章皆取象於天也。 旂 是 故 爲 謂 不盛,服不充,故大裘不裼,則 名 大常」也。 i i 之族 氏 也。 冕之 其 十有二旒 王之服章 龍 古者服裘,有裼 也,見美也。 服 祥 有表之而 以 . 過 衮,所 旒 也。 素車,殷之木輅,無金玉之飾 道 説者謂 猶 龍 據《左 也 之象 大常有 明,謂 璪者,用 及冕之旒,旂之旒,皆取數於 以 龍 則 氏》『三辰 一周 不裼 祀 章 襲 爲 天數者,天之大數十二, 服 則之以 天,内 而 龍 大 最 畫 、襲 之而 之襲 設 裘 五采絲 章 顯 三三辰 日 也 著 者也。」 日<sub></sub> 旂旗』之文。 服 示 月, 也 不 而 於旗 人也。 大裘, 一、充美 《記》 襲,襲之 爲繩,垂之以 月,而 華 巾 盛 襲 ·車》所 曰 : 服 衮 外 林氏 也 郊 或 故 者也。 引。』禮 惟 被 而 可 所 亦 特 <sup>《</sup>左 『裘 九 之 不 知 龍 以 謂 旧 以

路以 乎? 也。 爲 禮 服 氏 車》「玉路以祀」,謂自宗廟以下之祭之所 裘襲衮」,不可 大裘之上有中衣與上服必矣。 乃褻服,與夏之絲、綌,春秋之袍、繭、絅、 公之服九章,而侯伯特如其鷩以下也。 服。」王之服十二章,而公特如其衮以下,猶 魯乃十二章 鄭氏謂『此魯禮也』, 云『祭之日,王被 止 》謂 類 •司服》:「公之服,自衮冕以下如王之 無 就 杜 者 於九章,而祭天但服大裘」,非 《玉藻》 旗 道 預 也。 有 乘 玉路 謂 「玉路即大路」,陸農師謂 》言大裘不裼,不裼則 乎? 大路 表裘不人公門, 辰 易也。 飾 何 衮以 之以 以 嘗 即 贵 愚 象 謂 ○祭天 玉 壇」,皆非 有 謂 天 衣 一,不可 周 無 舊 制 則  $\equiv$ 乘素車 而 説 混 陳 止 辰 十二 口 也 而 氏 謂 九 襲 耶 也 以 爲 章 謂 也, 章 「乘 ? 大路 祀 王 《周 大 乘 巾 則 天 褶 之 而 此 牛唯具,所以 帝牛不吉,以爲 軷 去壇不遠,出次即壇,咫尺之地,未必復乘 之稟鞂也。 王之有事於郊外者不一,非祭天之事也。 彝》不言祭天之陶、匏、《司 巾 也。 」之祭,蓋朝日、夕月、四望、山川之祭, 車 · 》 備 《大馭》「掌馭玉路以祀」,而有「犯 言 别 郊祭雖有大次以爲止息,然其 Ŧi. 稷牛。 事 路 天神與人鬼也。《釋文》: 而 帝牛必在滌三月,稷 不及大路, 几筵》不言祭天 猶《 司 尊

滌,范音迪,徐徒嘯反。 也。 卑,故稷牛可臨 傷 而 取 不吉,謂 中所搜除處也。」 ()則取稷牛爲帝牛,又别 稷牛而用之也。 養之:一爲帝牛,一爲稷牛。若帝牛死 天神尊,故 死傷 也。 時取具。 帝牛 爲,用也。 郊天以稷配,故卜二牲 必 在 滌 取 鄭氏 以爲稷牛,謂 他 月。 牛爲 日 : 人鬼 稷 4

别,彼列反。」

萬 郊之祭也,大報本反始 物本乎天,人本乎祖, 也 此所以配 上帝

爲人之本也。郊、社皆有報 祖之所以 而郊之報本反始爲尤大也 配上帝者,以其一 爲物之本,一 本反始之義 ○自「天子適

文》:「蜡,仕詐反。」 也,歲十二月,合聚萬物而 天子大蜡八。 伊耆氏始爲蜡。 索響之也。《釋 蜡也者,索

四方」至此,明郊天之禮。

月也。 時,始命國人爲蜡 老物,故并使掌焉。 也。此官掌共杖,以安息老人爲職,蜡息 種三,農四,郵表畷 百種禽獸,其類非一也。《大宗伯》:「以 八者,所祭有八神也:先嗇一,司嗇二,百 伊耆氏,秋官之屬。 蜡祭八神,而 祭 五,禽獸六,坊七,水庸 也。 曰「合聚萬物」者,以 始爲蜡 伊,安也。 十二月,建丑之 者,於將蜡 耆,老

物」,並 之也 疈 之蜡,對 辜祭 喻 四 諸侯爲大。 其多耳。 孔 方百物。」或言「百物」,或言「萬 氏 曰 索饗之,謂求索而 「蜡云『大』者,是 天子有八神,則諸 天子 盡 侯 響

種也

諸侯及黨正之蜡,於八神有不皆祭者矣。諸侯之國及黨正皆有之。天子大蜡八,則侯未必得祭也。」 愚謂:蜡祭,自天子、

其 鼓、蕢桴、葦籥,伊耆氏之樂也。」女媧氏 疏 謂 諸 伊 侯 耆氏 無 先 嗇,黨正又無 爲 神 《明堂 司 嗇 位》 與 ? 曰:「土 孔 己

有笙簧,而神農之樂乃葦籥、土鼓乎?

嗇也。《釋文》:「種,之勇反。」

蜡之祭也,主先嗇

而

祭司

嗇

也,祭百種以

報

也 鄭氏 種 0  $\Box$ 稼 曰:「先嗇,若神農也。 孔氏 斂 日 日 嗇。 : 「以先嗇爲 不云『稼』 主 而 司 嗇 云『嗇』者 司 嗇從祭。 ,后稷是

> 爲 取其成 曰:「主先嗇 八神之主也 功收斂,受嗇 猶 前 章『主日』之主,言 愚 而 謂: 祭也。」 百 種,百 陳 穀 氏 之 其 澔

又作『貓』,音苗。爲,于僞反。」 迎虎,爲其食 之君子,使之必報之: 饗農及郵表畷、禽獸,仁之至,義之盡也。 郵,本亦作『尤』,有周反。 田 豕 也, 畷,丁劣反,又丁衛反。 迎貓,爲其食田 迎 而祭之也。 《釋文》: 鼠 猫,字 也 古

民。 也。」 以督 鄭氏 者 連 田 郵,若郵亭屋宇。 畷。 畯 特 處 郵 約 曰:「農,田 於此 云『貓』『虎』,舉其除 焉 表畷者,是田 孔 百 姓 氏 禽 田 日 於井間之處 獣 畔 一畯也。 「農,謂古之田 相 表,田 即 連 貓 畯 畷 於井間 虎之屬 郵表 畔。 之所, 也 害甚者。 畷 畷,謂井畔相 迎, 消謂 造此 所舍之處。 畯 助 田 有 迎 田 郵 仁之 除 功 其 畯 舍, 害 於 神 所

迎其 皮 廬 也 必 至 表,田間 以以 報之,義也。」 舍,表道 ,義之盡 畷,疆 户 象之與? 也。 道 路,分疆界,以利人者也。 界相連 路,《國 者,不忘恩而祭之,仁也, 貓、虎非可爲尸,蓋使人蒙其 愚謂 綴 [語》所 也。 郵,田 謂 郵 表 列 畷 樹 間 廬 以 謂 舍也 表 始創 有功 迎, 道

音房。」
壑,昆蟲毋作,草木歸其澤。」《釋文》:「坊,黎,昆蟲毋作,草木歸其澤。」《釋文》:「坊,祭坊與水庸,事也。曰:「土反其宅,水歸其

宅, 鄭氏 屬 也。 畜 土 坊及水庸,是 得陰 即 小,亦以 則不 坊也。 曰:「水庸,溝也。」 孔氏曰:「坊以 水歸 崩 而 其 反,歸 驰。 障 死, 壑 人 水。 得 則 水, 誉 陽 不 也。 爲 庸 即 汎 而 以 所須,故 水庸 生,故 溢 宅,安也。 受水, 也。壑,坑 昆 日 亦 日 蟲 見 『事 蝗 以 土歸 泄 蟲 也 螟 水 之 坎 毋 其

服色白,近於喪服

故

曰「以送終」。

《周

辭。 同 嘉穀 屬 及水庸爲一壇,以《記》文繹之可見也。 百種爲 庸之祝辭也。 作』,謂 處矣。 也。 也 當各歸生藪澤,不得生於良田, 愚 一壇,農及郵表畷、禽獸爲 不 調: - 爲災。 蓋蜡祭當爲三壇: 蜡 祭 「土歸: 坊與水庸同祝 報 草,苔、稗。 功, 其宅」四 亦 因 祈禱,故 句,祭坊與 辭,則其祭之 先 木,榛、梗之 嗇 壇 司 有 坊坊 水 此 害

文》:「殺,所界反,徐所例反,下『德之殺』同。」 杖,喪殺也。 皮弁、素服而祭。 白鹿皮爲弁。 祭之禮卑也。 小祀,則玄冕服。」此服 弁、素服,即皮弁服也。《司服》:「王祭 此下二節,言黨正蜡祭之禮也。 蜡之祭,仁之至,義之盡也。 送終,謂 素服,以素繒爲 素服,以送終也。葛帶、 送老物之終 皮弁服 者,黨 衣裳。 皮弁, 也。 正 素 蜡 群 皮 榛

禮 迎 服以送之。 帶,喪服又有杖,今蜡祭以葛爲帶,以榛爲 裁制之義也。 不忍其終者,愛卹之仁也。 以息老物。」殺,猶輕減 杖,喪服之減殺者也。 貓迎虎而言,此則統指一祭而言也。 籥 章 **\***: 爲物之已終也,故喪服以哀之。 前云「仁之至,義之盡」,專就 蜡祭則 爲物之將終也,故素 龡《 也。 豳 有始必有終者, 喪服變除有葛 頌》,擊土 鼓,

冠,草服也。黄衣、黄冠而祭,息田夫也。野夫黄冠。黄

黄冠 服 蜡,屬民飲 者,言野夫既賤,故蜡祭之時不得皮弁、素 則使之飲酒宴樂,以休息之也。野夫黄 方氏慤曰:「皮弁、素服,主祭者之服 衣、黄冠,助祭者之服。」 而 而 其 祭,謂農夫與於蜡祭之禮者,既 服 如 酒,而一國之人皆若狂 此 也。 黄冠,草服者,黄冠 愚謂: 黨 黄 正 乃 祭 冠 衣 祭 黄

冠爲臘祭,非是。説見《月令》。臺笠之屬,而其色黄也。鄭氏以黄衣、黄

國。天子樹瓜華,不斂藏之種也。」《釋文》: 客告也。 草笠而至,尊野 大羅氏,天子之掌鳥獸者也,諸侯 以 戒諸侯曰:「好田、好女者亡其 服 也 羅 氏 致 鹿 與 貢 女, 屬 而

好,呼報反。」

其服。 焉。 事。 禮 鹿 使,著草笠而 孔氏曰:「此因上蜡祭,廣釋歲終蜡時之 大羅氏能張羅得鳥,故諸侯貢鳥獸者皆屬 言『掌獸』,此云『獸』者,以其受貢獸故也。 今歲終功成,由野 是田 • 羅氏》: 草笠,以 大羅氏,爲大羅以 詔亦 獵 所得,女是亡 告也。 『掌羅 草爲 至王庭。 人而 笠 烏鳥,蜡則 客,謂 也。 草笠是野 得 國之女,而王所獲 捕鳥獸者也。 貢 ,故重其事而尊 諸 鳥獸之使者 侯 作羅 貢 人之服, 鳥 襦 默之 《周

詳,今姑存舊説如 其君,亦當 樹之,不務聚蓄,與民争利。令使者還告 之食,不是收斂久藏之物,若可久藏,則不 好田、好女者亡其國,此宣詔所告之言也。 者,而宣天子之韶,令使者還告其君 者 華,果蓏 也 羅氏受貢畢,致鹿及女子以示 也。言天子樹植瓜華,是供一時 如此。」 愚謂:此節之義未 此。 也 使

以 八蜡 也。《釋文》:「移,以豉反。」〇今按:移,如字。 謹 以記 民 財 四方。 也。順成之方,其蜡乃通 四方年不 順成,八蜡不通 ,以移民

蜡祭不行,其 《大宗伯》:「以疈辜祭四方百物。」是天子 也。 記 蜡所以報 八蜡之祭,方别 四 順 方, 成, 謂 功,今神既無功於民,故不行蜡 謂 記 當 風 明 方黨、鄙之祭亦然。 爲 四 雨 壇。 方之豐歉 和 順 有不順 而 Ŧi. 也。 穀 成之方,則 成 通 熟 蓋 猶 也。 行

> 之道 成之方,則通其蜡祭,蓋百姓終歲勤動 祭,所以使民謹於用財,亦凶荒殺禮之意 其厭倦之心,而予以豐饒之樂,一張一 其倦怠,使之因蜡祭而聚會飲食,所以 也。移,猶《表記》「衣服 也。 以 移」之之移。 恐 弛 移 順

既蜡而收,民息已。故既蜡,君子不 自「天子大蜡八」至此,記蜡祭之禮 畢。」然則蜡祭在夏正之十二月明矣。 上之力役止也。 民息,謂民之收 而畢務,火見而致用,水昏正 藏畢也。 《左傳》:「凡 君子不興 而 裁,日 土功,龍 興功。 功, 至 見 而 謂

禮記卷二十五終

## 禮記卷二十六

國史館纂脩孫希旦集解賜進士及第翰林院編脩

## 郊特牲第十一之二

「菹,争居反。」也。加豆,陸産也。其醢,水物也。《釋文》:恒豆之菹,水草之和氣也。其醢,陸産之物

之薦, 之齏 菜以醯 恒豆 物,莫非 時和美之氣所生 ,朝事所薦之豆也。 四 釀之。 水草之和 時之和 四 [時之和氣, 全物若 牒謂之菹,細 氣也。」是豆實所用水草之 也。 氣 謂 獨於恒豆之菹言之, 《禮 取 菹,酢菜也, 器》 水 草爲 云:「籩、 菹 乃 取 切 豆 謂 生 四

物也; 茆 謂諸 言「饋食之豆」者、舉恒豆、加豆,則饋 非 物,加豆之芹菹、深蒲非陸産,兔醢 禮 之豆也。 臡,無骨者謂之醢。 餘 魚 物,或用 魚醢,是水物也。 「加豆之實」落菹、筍菹、是陸産 豆亦備水陸之物可知也。 醢 菹 從 水物,此蓋 其餘 **醢人》「朝事之豆」有昌本、茆菹** 侯 可 磨臡,饋 **醓醢、麋臡、鹿臡、麋臡,皆陸** 也。 知 陸物 加豆不言「菹」者,文省也。 也。 則有雜錯云。」 天子朝事之豆有昌 約略言之,以 食之豆有葵菹、嬴 可薦之物莫不 醢, 恒豆之韭菹、菁菹 肉 加 . 醬 豆,祭末 也。 ○鄭氏曰:「此 見 愚 有 咸 豆 謂 骨者 也; 一本、麋 實 酳 在 醢 尸 耳。不 鄭 或 一、 鴈 一是水 産 豚 謂之 所 非 食之 氏 用 ^ 也。 醢 拍 水 周 薦 以 水 醢

此

爲

諸侯,非

也。

以《

儀禮

》考之,《特

牪

違。 矣。 《公食禮》六豆,韭菹、醯醢、昌本、麋臡、菁 也。 從鄭氏,徒令學者瞀眩耳。 之豆,惟其多少有差,而 歸饔餼八豆,而韭菹、醯醢居其首,則全用 菹、鹿臡、《周禮》朝事之六豆也。 醢、《周禮》朝事之二豆,饋 禮 豆,是矣,而又舉饋食之豆實以釋之,以强 周禮》朝事之豆也。 》二豆,葵菹、蠃醢、《周禮》饋食之二豆 孔氏 又鄭引饋食之豆以當加豆,與《周禮 《少牢禮》四豆,韭菹、醢 既 從《周 禮》,以 是天子、諸侯、大夫 其實則未嘗 酳尸之豆爲 食之二豆 醢 、葵菹、羸 《聘禮》 有 也。 加 異

也。 貴多品,所以交於神明之義 籩、豆之 麖,水土之品也。 《釋文》: 「夢, 即 見 反,又作『薦』, 不敢 也,非 用 食 常 同。 味 褻 之道 味 或 而 作

重舉前文而申之,以起下文也。

也。 反。 婢面反,徐比絹反。」 用也,而不可便其 車,可陳也,而不可好也。 先王之薦,可食也,而 不可以同於所安樂之義也。《釋文》:「耆,市志 路,本亦作『輅』。 宗廟之威,而 音同。樂,皇音洛,徐五孝反。 (利也。 不 可安 不可耆 《武》壯,而不可樂 也。 所以交於神明者 也。 宗廟之器,可 卷 冕、路 便

也。 同 明,不可便其利於用,言常用之則 《大武》之舞,發揚蹈厲,其容壯勇,不可常 食之,而不可常耆也。 夢,謂籩、豆也。 不可常處之以爲安也。 奏之以爲娛樂也。 可陳列,而不可常服 於尋常安樂之義。」 孔 氏 曰:「此總 以其非食味之道,故 宗廟之中,尊嚴 乘之以爲容 衮冕、路車尊嚴 明祭祀之物,不 宗廟之器 共事 ·好也。 肅 不 可 雖 敬 可 偶 便 神

乘,時 卧反。 之甚 漆雕 不和 莞簟之安,而蒲越、稟鞂之尚,明之也。 黼 而已矣。 一黻、文繡之美,疏布之尚,反女功之始也 證反。」 也。 幾之美,素車之乘,尊其樸 琢,依注爲 ,貴其質 所以交於神明者,不可同於所安褻 如是而后宜 也。 丈轉反。 大圭不琢,美其質 雕,又作『彫』。 《釋文》:「越,音活。 也。 幾, 巨 貴其質 也。 大羹 衣反。 和,胡 丹

尊 取 謂 之水也。 鄭 齊之上,玄酒在 物,貴質尚本也。 神明之也。 神明之宜也。 在 於月中水也。 漆飾沂鄂 氏 日: 「尚質貴本,其至如是,乃得交於 蒲越、稟鞂,藉神席也。 疏 也。」 布之尚者、《冪人》『疏布 琢當爲『篆』,字之誤也。 明水,司烜以陰鑑 三酒之上,尊尚其古,故設 陳列酒尊之時 玄酒,謂水也。 孔氏 曰:「此明祭祀之 ,明水在 所取 明水,所 明之者, 於月 巾 幾, 五.

此 常車 物 蒲 尚 不 之乘者,尊其樸素也。 常下莞上簟,祭天則蒲 義 言祭祀之物不可用於平常,此節言平常之 甚者,言同於所安褻則不可之甚也。 本美,故曰「美其質」。 之席也。 明,不可同於尋常身所安樂之甚也。 明之也 八 儉 重華 不可用於祭祀,承上文所以交於神明之 越、結蒲爲席、宗廟之席也。 尊』、《禮器》云『犧尊疏布鼏』,是也。 一句包上『酒醴』以 非 如是,而後得交神明之義。」 以丹漆彫飾之爲沂鄂,而祭天則素車 食味之道之義,而推廣 飾,惟貴質素 大羹淡泊,故曰「貴其質」。 彫,謂 刻鏤。 而已。 下諸事 不可同於所安褻之 貴其質而已矣者 幾,謂 越、稟鞂之尚,是 申明之也 ,言祭祀之時 以 沂鄂。 稟鞂,祭天 其交於神 愚 尚質 玉質 謂 言尋 E 凡 節 神

七四三

鼎、

俎

奇

而

籩、豆偶,陰陽之義

也。

黄目

者也。 居 氣之上 「宜反。」 言酌 尊 也 於 中 黄 而 者 清 中 明於 也。 外也。 目 者 《釋文》:「奇 氣 之清 明

清明 氣。 示 必 之清明者。 故云『於諸侯爲上』。 雞 以 案《明堂位》云 『夏后氏 以 爲 鄭 **桑、鳥** 人君 棋 黄目』,是周 爲 上。 氏 目, 酌 在 曰 : 祭祀 行 盡 尊 彝 大 祭,必外盡 於 孔氏 中 黄 備 時 言酌 取 中 而 目 列 名 也 前 所 可 曰:「黄彝,以 諸 也 於 造 黄 棋 代之器,諸 尊之上,故云『上』也。 中 彝 也。 目 酌 清 將 黄是中 也,周 而 在 示 明潔 以雞 清 貯 尊外, 天子黄彝之上 人君 明 鬱 浴也。 彝,殷以斝,周 所 侯但 於外者,言酒 方色,目是 鬯, 黄金鏤其 造,於諸 而 慮 故云『鬱 有 於祭事 有黄彝 清 明 氣 有 外 侯

美,而

煎

鹽之尚,貴天産也

割

刀之用,

而

鸞

祭天

埽

地

而

祭焉

於

其

質

而

己

矣。

醯

醢

之

「斷,丁亂反。」
刀之貴,貴其義也,聲和而后斷也。《釋文

貴其 謂: 足於 南 饌 籩 孔 也 醢 云 云: 自然之鹽,鍊治之也。 産自然, 天質自然,故曰「貴天産也」。 特性 在敦 之屬 氏 ,是煎鹽之尚 以 煎鹽 『煎 『設之 斷 煎鹽 日 和 南 一禮》設 : 斷 南。 也。 而 爲 鹽 故 即 能 上 不 於醯 餘 者或不足於 祭天 曰『貴天産 形鹽,朝事之籩實 斷 是籩 饌之法,俎在 獨 日 物皆 煎 之義 用 也。 鹽 醯 醢 直 於祭天,皇氏 所 人 籩 醢 也。 之上,故 豆之南,尸 用, 功 醯 實,設當 也」。 者 煎 和。 和 醢 凡 故 豆 醢 合 鹽 須 物 立東,敦· 云 鸞 言煎 爲 醒 之尚者,皇 之和 云尚。」 必 也。 豆 尚。」 刀先有 之説 之, 貴其 席 而 資 實醓 者 成 南 在 者 鹽 醯 醢 煎煎 或或 上,設 俎 是 熊 調 醢 以 即 煎 則 也 南 成 氏 不 謂 鹽 之 醓 愚 氏 和 此 天

此,雜 義,亦前 不偏,故 明 而後資割 祭 其義 篇之義 祀 爲 所 也。 可 斷之用,和、 用 之物, 貴 也。 而 自「恒豆之菹」 歸重於尚質之 斷相資,剛、柔 至

緇之。 房列反。」 齊,側皆反。 敝之可 冠義,始冠之,緇布之冠也。 冠也。 鄭氏 虞以 古無 冠質,以爲喪冠 之耳,三代改制 緇布之冠不緌。』大白即太古白布冠,今喪 》有《士冠禮》,此 前日 其緌也,孔子曰:「吾未之聞 也。」《釋文》:「之冠,如字,餘並古亂反,後同。 曰:「始冠三加,先加緇 飾 矮,耳隹反。❶ 敝,本亦作『弊』,婢世反, 齊 非 1太古。 則緇之者,鬼神尚 時 人矮也。 也。 ",齊冠 冠而敝之者,此重古 解 其義也。 不復用 ^ 愚謂: 雜記》曰 大古冠布,齊則 出 也。 布 冠義者、《 闇 冠 太古但 也。 也 『大白、 以 也。 污冠 白 唐、 而 徐又 太 用 冠 儀 布 而

> 賈氏 若庶 之緌。 也。 敝之 白 臺笠緇撮。』是庶人用緇布冠籠其髮,以爲 祭時,自著祭服,有虞氏 屬 垂其 世之冠有笄,其纓分屬於笄,交結於頤 義 制 而其後乃爲之緌,則失其制矣。 於 也 布 既 餘 公彦曰:「冠訖, 缺 爲 人,猶著之。 可 異 緌者 了; 而 冠, 始冠既用古冠,則 以 皇氏侃 項 也 爲 之左,而 者,言 始 齊則緇之,以 ,結纓而 緌。 冠 日: 丁 猶 古冠 故《詩 緇 上結 用 齊 布 垂其餘以爲飾 太古之齊冠  $\pm$ 無笄,其 則 冠 於其 》云:『彼都 則敝 皇而祭是 明 緇 既 其纓宜用古 敬也。 之, 冠 右 之,不復著, ( 纓惟 故 則 敝,壞 謂 祭前 不 也。 重古 後世 無 也。 人士, 復 垂 也 前 制 若 用 餘 後 之 冠

「隹」,原誤作「佳」,今據《禮記註疏》、《釋文》改。

0

常服

也。」

七四五

也。 名也。《釋文》:「適,丁曆反。醮,子妙反。」 適 子 冠 三加彌尊,喻其志也。 於 阼 以 著 代 也。 醮 冠而字之,敬 於客 位 一,加 有 其 成

爵 皆言「醮於客位 周 蓋 者,謂每加則醮之,以表其禮之有成 總 之位,而酌 客之位也。 醴 布冠,次加皮弁,次加爵弁,皮弁尊於冠 西,南面」,是也。 適子冠於此,明其有代父之義也。 冠禮用 少北」,是也。著,明也。 適子冠於阼階之上,《士冠禮》「筵於東序 世尚文,用 弁又尊於皮弁也。 |冠禮雖有醴與醮二禮,然醴質而 醴之,用酒則每一加 醴,用酒 酒以禮之,《士冠禮》「筵於户 醮於客位,謂既冠則筵於賓客 醮禮者多,故此 也。 冠禮 客位,謂户牖之間,賓 喻其志者,服彌尊則 三加彌尊者,初加緇 用醴,則三加之後 阼階,主人之位, 則一醮。 及《冠義》篇 加有成 醮 也。 文,

> 字之,敬其名而不敢稱也。 大以稱其服也。名者所受於父母,既冠而當思所以稱之,曉喻冠者之志意,務令充

新月卫。 新介人長月二天卫。 计,餐餐鄭氏曰:「委猶安也。言所以安正容貌。之道也。《釋文》:「毋追,上音牟,下多雷反。」 委貌,周道也。章甫,殷道也。 毋追,夏后氏

也。 章,明也。 以重古,故用 者,皆玄冠之别名也。 三冠,其制之異 玄冠之異名。道猶制也 之,而所常冠者則玄冠也。 追猶堆也。 。言所以表明丈夫 緇 布 同未聞。」 夏后 冠。 氏質,以其形名之。 始冠宜用玄冠,而 然緇 故此 也。 布冠 愚謂:此三 因 毋,發聲 冠 明三代 而 敝

收,三代士助祭之冠也。 鄭氏曰:「弁此三代三加之冠也。弁、爵弁也。弁、冔、『貋』,火于反。』

名出 名出 收,言所以 於 於槃,槃,大也,言所以自光大也。 幠 幠, 收斂髮 覆 也。 也 言 其制之異未聞。」 所 以 自 覆 飾 冔

三王共皮弁、素積。

曰:「言三代再加,所用同也。」之也。素言其色,積言其制。 賈氏公彦此再加之冠也。素積,以素繒爲裳而襞積

爵,何大夫冠禮之有?無大夫冠禮,而有其昏禮。古者五十而后

也。」 禮 約 大夫者必由 冠已爲大夫者矣。而不爲之制冠禮者,爲 爲昆姊之長殤。」大夫爲兄姊殤服,則 爵,重官人也。大夫 鄭氏曰:「二十而冠,急成 而 冠 先生從人而 愚謂: 矣。 童子之禮,不裘、不帛、 士而升,當其爲 《喪服》「殤 入,既仕 或 時 小 而爲士,固 人也。 改娶, 功」章: 士,則固 有昏 五. 大 不 不 以 有 + 未 夫 禮 可 屨 乃 +

天子之元子,士也。

天下

無

生而

貴

者

也

敖氏繼

公曰:「元

子,

長子。

其

冠

時

猶士

而用

士禮,以其未即位則

無

一爵故

也。

之,則 必冠 此,則固 祖 以童子之禮處之,未有不冠者也。 廟 而 ,則無爲大夫 必 命之也 無 待五十。 仕 而 即 雖爲大夫,至假 爲大夫者矣,又何 蓋 而 後冠者矣。 古者爵人之慎 祖 爵, 廟 爲 大夫 士者 重 謂 而 如 假 命

冠禮之有?

諸 也。 謂「夏時諸侯至五十乃爵命」, 頌》:「公冠玄冕四加,天子擬焉。」〇 爲諸侯,及其冠也,不容不與士禮異,所以 猶 鄭氏曰:「言夏初以 侯之有冠禮,夏之末造也。 至夏末始作爲公侯之冠禮 以 諸侯繼世而立,或有 士 禮 冠 之。 上,諸 愚 謂 幼 侯幼 也。 末 而 無 造,猶 《家 嗣 而 據 位者,既 即 語 位者 鄭 末 冠 世

七四七

言也。 歸氏 是亦冠也已,人君無所殊也。」此孔氏之遺 冠,異天子與?』曰: 『君薨 成人之事者,何冠之有?」曰:『諸侯之 王世子雖幼,其即位則尊爲人君,人君治 爲人子、爲人弟、爲人臣、爲人少之禮 冠,則冕而踐阼。 子之時,以士禮冠,設不幸君終,世子未 蓋父兄以成人之事責子弟也。 爲人子、爲人弟、爲人臣、爲人少者之禮 天子、諸侯、大夫之無冠禮也。 元子唯冠禮與士同,其餘則與 家語》孔子答孟懿子,吾取焉,曰:『古者 喪服》諸侯之兄弟得 公冠》曰:『公冠 之元子以 有光曰:「自『無大夫冠禮』至此,明 益 以 見其餘。」 祝 雍 四,加玄冕。』《左傳》: 頌 已君臨天下,將又責 公冠之篇 行大夫之禮也。」〇 皇氏 而世子主喪, 侃 士不同。 冠者,將責 則 天子爲元 日 誣 乎? 天子 矣。 以 故

也。 世 之時,而不得别爲大夫之冠禮 驟 冠禮也。 漸,未冠 侯 以 德之殺也,言官爵之授,隨德隆殺,此 末以來,有諸侯冠禮之意也。 孔氏曰:「繼世以立諸侯,象賢也,此明夏 之冠也。 緇布冠,自諸 之,以先君之祧 制冠禮之義,所以同之於士者也。」 爲天子、諸侯、大夫、士之别,而不知 君冠 爲之法。 無大夫冠義也。」 死而謚,今也。 以 以能 立 必以裸享之禮行之, 諸 象 而 以 緇布冠繢緌,諸侯之冠也。』蓋務 侯,象賢也。 爲 其先世之賢,故諸 其爲大夫者,必皆已 官爵人,隨德隆 諸侯者,不得不别 侯下達。 處之。』《玉藻》曰: 古者生無爵,死 愚 玄冠 以官爵人,德之殺 謂 以 一殺,故 朱組 繼 金石之樂節 侯 以 世以 也。 冠 爲 無 官爵 無謚 纓,天子 於 大 諸 升 「始 大夫無 立 陟之 明所 死 爲 侯之 諸 Щ +

繼

乎? 孔氏 謚 僖、 繐 也。 輩 謚 IIII 節取《郊特牲》之文,附諸 無 也 夫 也 謚 屨 謚 五 禮 周 文以後,乃無不謚者 謂 謂大夫死皆 生不稱族,死不爲謚 若未五 謂 此又因大夫無 春秋 謚 + 」,本其記 冠 影記 至 周 末猶然, 1 前 起 「此《士冠禮》記之文, 義」以 初 作記之時 冠禮 全不類。 初, 於周。 爵 也 + ,然後生 魯大夫 也。 下 》自「戒賓曰」 而死,未受爵 謂作記之時 生 有謚 謂之記,失之矣。 今,蓋 無 其後 自「冠義」以 加謚」,非 冠禮 爵 如 則 前 無駭、 稱 皆未 死 謂 又誤以記 ,則禮之失固未 而推 不 篇末,其文體 其 無謚 春 問問 加謚 命,死 以 族,死 也。 羽 秋 故 其 類言之。 爵 下, 下 者,古者 論 以 故 父、柔、 己 至「不 連 何 士 士死 也。 則 還。 爵 則 則 於經 之 後 所 無 爲 與 無 久 與 人 屨 據 而 至 挾 謚 之 大 古 否

> 史之事 禮之所尊,尊其義也。 其 義 而 也。 敬守之,天子之所以 故其數可 陳也,其義 失其義, 治天下 陳 難 其 知 也 也 數、祝、 知

取,音娶,本又作『娶』。 地 固爲 曰 : 是。 故其 數見於事物之末,禮之義 孔氏 而 國」者,雖先王 守之,以體其實焉, 上起下,於中説重禮之義。」 合,而 知矣。 取 則尤不可以爲祝、史之事 「此蓋 至論。 此禮 數可陳,其義難 於 日 : 異 后萬 「此因上論冠義,下論昏義, 況今亡逸之餘,數之存者不能 之義 姓 秦火之前 然非常 物 所 所以治天下, 之 興馬。 遠,皇于萬反。 得其 以 所 附 則所謂 知。 典 以 、數,則其義亦不可得 遠 籍 夫昏禮,萬世之始 爲 厚 知其義 具備之時之語 通乎性命之精 尊 别 别 而忽之也。」 也。 其道 能 也。 愚謂: ,兵列反。 以 而 《釋文》: 禮 不 又能 朱 禮之 出 讓 故 什 敬 乎 爲 大

也

天

之義 以 西己 孔 娶異姓者,所以依 則 附遠,不取同姓 氏 也。」 萬 物 生焉。 天 方氏慤曰:「 氣 下 ,所以厚别。」 夫婦合配,則子姓生焉 附疏遠之道,厚重分别 降 地 氣 必取 上騰,天 於異姓,所 地 合

死不嫁。《釋文》:「腆,天典反。 也。 幣 ○鄭注:「齊,或爲『醮』。」○今按: 心 信 誠 婦婦 辭 德也。 無 不 腆,告之以直信。 壹與之齊,終身不改 事,如字。 事,侧吏反,又如字。」 信, 故 事 夫

辭,不 辭 以 直 辭 是 以 也。 無 沽惡之物,《昏禮》記云「皮帛必 事 誠信之道 ,謂納徵之幣。 而 夫 不 先 自 腆,善· 其 腆,直也。 有 謙 以示 徳以 言皮 也 也。 之如 信爲 帛不 信者,人之所以 誠,實也。 斯二者,所 辭 此。 無 本, 善。 不 故於納 腆 上言「直信 幣 者, 幣必誠 必 以 徴之 誠 謂 告婦以 事 信 納 可 人。 謂 )幣與 幣之 制 」, 而 也。 婦 īF. 不

> 男子 先,悉見反。 地,君先乎臣,其義 改,惟: 齊 『不腆敝器,不足辭也。』又曰: 『不腆先 言『不腆』。 下 而 以直信 文尚質之意 之敝器,使下臣致諸 民之本,而爲嗣續之源。 曰:「『歸妹,人之終始也。』 先王於此 不云『不腆』,告之以 先君之祧,既拚以俟矣。」』《春秋傳》 謂 親 但 不尚 迎 云「信」者,言「信」 其信 共 乎文辭也,非徒 , 曰: 『 先 人 之 禮 ,男先於女,剛柔 牢同 而 據《聘 焉。 른 尊卑也。 故 禮 也。 辭 直信 執 陸 **\***: 無 事以 以 氏 壹與之齊,終身不 《釋文》:「迎,魚敬反 主 而 之義 不 教婦 也。」 則 故以 佃 已。」所以 腆 爲瑞 日 : 直 人 也。 無 德 内心爲主, 在 日 顧 節 辱 而 其 凡 天先 已。 氏 謙辭 中 不腆 告之 今辭 立 Ħ 有 炎 矣。 牛 武 君

男子親迎,是男先於女也。所以然者,男

然。故天道資始,而地道代終,君務於求非獨昏姻如此,至於天地、君臣,其義亦剛而女柔,剛之德主乎進,柔之德主於退。

敬

前

親之,先王之所以得天下也

而臣耻於自衒

也

《釋文》:「贄,音至,本亦作「摯」。」禮作,然後萬物安。無別無義,禽獸之道也。子親。父子親,然後義生。義生,然後禮作。執摯以相見,敬章別也。男女有別,然後父執摯以相見,敬章別也。男女有別,然後父

之親 作 有 故 不可 所 摯,謂親迎所奠之鴈也。章,明也。 相 而 君 後 Ŀ 以 見者,賓主之道,今乃於夫婦之間 而 禮 以 後 下,有上下然後禮義有所錯,故 臣 由於男女之别。有父子然後有君臣, 致 為荷也。 一之義 作。 萬 其 物 恭敬,以 人無 安。 由於父子之親。 有夫婦然後有父子,故父子 派禮則 由 明男女有别,而其交接 男 女有 危,有 别 禮則安,故禮 而 有君臣然後 遞 推 行之, 執擎 其 義 所 牛

壻親御授緩,親之也。親之也者,親之也。致如此,所以深明男女之别之重也。

所以 親 婦 其 婦 事 本 也 御 也。 謂 爲 有御者, 壻必親御授綏, 親。 執擎 御 必身親其事者 婦 敬則夫婦之禮肅 相 車也。 見 ,所以爲 授綏,授婦綏以 ,所以致其親愛於 敬 前 所 親 以 無 御 示身親 燕暱之 授 升 也

天下,其道不外乎是也。

帥人者也。《釋文》:「先,如字,又悉遍反。知,音智。」夫,夫死從子。夫也者,夫也。夫也者,以知此始也。婦人,從人者也:幼從父兄,嫁從出乎大門而先,男帥女,女從男,夫婦之義由

大門,婦家之大門也。先,壻車先行也。

○鄭注:「夫,或爲『傅』。」

七五

傷。

親則

夫婦之情篤

,而無睽

離之患。

化

起於閨門,

而

風行於四海,先

王之所以

得

其爲婦 故 矣。自「婦人從人」以下,又以申 乎其 夫婦 丈夫之稱。 女、女從男之義也。 成師以出 曰「以 之義 爲 出 婦,一帥一從,而尊卑唱隨之義定 知 由 帥 乎大門,則夫全乎其爲夫,婦 聞敵强 丈夫乃有才智者之名、《左傳》 此 人 始 者 者, 也。 而退,非夫也」,是也, 夫也者,夫也,言夫乃 婦未出父家 ",猶 明男 未 帥 全 成

先祖後,而可以不致敬乎?玄冕齊戒,鬼神陰陽也。將以爲社稷主,爲

祖 神 服 國者是爲社 通玄,故總稱玄冕。 士之上服,則天子以下皆用上 孔 後也。 氏 故 而 齊 曰:「案《昏禮》士昏用 日『鬼 戒 明如此之重,不可不致敬,所以 親 稷内 神陰 迎,是敬此夫婦之道 主也。 陽 也」。 陰陽,謂夫婦。 嗣 妻爲内主,故 廣 爵 後 服 弁。 世 一是爲 如 爵弁是 五冕 著祭 事 先 有 鬼 色

冕而親迎也。

爵,坐以夫之齒。 共牢而食,同尊卑也。故婦人無爵,從夫之

以夫之年也。 謂兄弟之妻,其娣姒之序,不以己之年而 夫婦 婦共食之,不別俎也。 大夫以上之禮也。 命,則其妻之爵從之也。 夫之爵者,婦 二牲以上謂之牢。 玄冕」,士昏用特豚,而 共牢,以 其 人無受爵命之法,其夫受爵 尊 卑同 共牢者,謂用 士香 牢禮以爵等爲差 也。 此 用爵 坐以夫之齒者, 云「共牢」,皆 婦 弁, 人無 牢 而 爵 而 上 從 夫 云

器 用 再酳 也。 陶, 匏分而爲二,夫婦各用其一以 、陶、匏,尚禮然也。 三王作牢,用陶、匏。 謂 用 土香 以瓦爲尊、敦之屬。 爵,三 禮》食畢,夫婦皆 酳用卺。 卺,半匏 勢,謂 三酯: 育也。 也。 以 匏 初 爲爵 尚、

上通。尚禮然,謂上古之禮器如是也。

之,而用太古之器,重夫婦之始也。」鄭氏曰:「太古無共牢之禮,三王之世作

厥明,婦盥饋。舅姑卒食,婦餕餘,私之也。

文》:「盥,音管。一本無「婦盥饋」三字。」

舅姑降自西

階,婦降自阼階,授之室也。《釋

盤饋, 階 作階爲主階,舅姑自由客階降,使婦由主 禮 作階,謂盥饋之明日,舅姑饗婦 賜婦,此示舅姑相恩私之義也。」 姑,盥饋特豚,舅姑食特豚之禮竟,以 也 孔氏 不止於特豚者矣。 豚」,此據《士昏禮》言之,若大夫以上,有 既 降 食餘 曰:「厥,其也。 明 言致 而降 以 日餕。 室 潔 也。 事 以饋 授之而 私 授之室者,西階爲 也。 舅姑降自西階 猶恩也。 其明,謂共牢之明 使爲家 孔氏言「 明 主 以 日 ,婦降 盤 也。 愚謂 婦 客階 獻之 饋 餘食 見 自 日 特 盥 舅

舅姑亦不饗之,無著代之事也。饋、授室,皆謂適婦之禮,若庶婦則不饋

禮不賀,人之序也。昏禮不用樂,幽陰之義也。樂,陽氣也。

昏

事。 問》各據一義 樂,與食、嘗無樂同義 謂:昏爲陰禮,而樂爲陽氣,故昏禮 陳氏祥道曰:「《大司徒》: 第 思嗣親也。」彼言『思嗣親』,此言『幽陰之 制禮者,不以吉禮干凶禮,不以 則民不怨。』昏之爲禮,其陰禮 遽舉樂者,則以 義』者,蓋有所思者,固欲其幽陰也 曰:「孔子曰:『取婦之家,三日 齊之玄也,以 也。 昏禮不用樂,幽陰之義也。」 昏禮 舅姑授婦以室,子 而 陰 言之也。 思 幺 嗣 思 親 也」,是矣。」 然既昏之後,猶 之故,此與《曾子 序,謂相傳之次 『以陰禮 與? 有傳重之 陽事干陰 不舉樂, 方氏 教親 古之 不用 經 殼 愚

昏禮之義。 故不賀。○自「天地合而萬物興」至此,明端,則親有代謝之勢,人子之所不忍言也,

也。 有虞氏之祭也,尚用氣。 堂。 熟, 祭初 而 有虞氏尚氣,故於饋孰之前,先薦此三者, 所 毛,腥其俎,孰其殽。]則三者之祭,乃周之 有虞氏祭禮不可考。《禮運》曰:「薦其 腥、爓三者皆不可食,但用其 血 鄭 尚,謂貴尚,祭祀之時,先薦之也。 血 因於夏、殷,而夏、殷所因於唐、虞者也。 、腥、爓三者而祭,是用氣也。 氏 後王因之而不變也。 故 以 爓,謂沈肉於湯,次腥 、腥、爓祭」爲句。 曰 云『用 血 :「尚,謂 韶神於室。 氣』。」 鄭注: 先薦之。」 腥,謂朝踐 愚 「爓,或爲「腒」。」 血、腥、爓祭, 〇自此以至篇終, 調: 亦薦 氣以歆神 用 孔 氣 於堂 以其並 薦 氏 者 腥 血,謂 用 肉 日 也。 血 未 以 血 於 氣

祖。」此降神之樂也。

又曰:「湯孫

奏假

後出 也。《釋文》:「滌,音狄,又同弔反。三,如字,徐息暫反。」 殷人尚聲,臭味未成,滌蕩其聲。 未成。 響之納賓,祭祀之納尸與降神,其事相類 尸人奏《肆夏》,亦奏《肆夏》之三矣。 蓋大 夏》。」《左傳》云:「金奏《肆夏》之三。」是 降 者,播散之意。 臭味未成,謂未殺牲之先,未有 皆 故樂皆以三爲節。 魂氣之陽相感召也。 氣,聲音之呼號,所以詔告於天地之間,與 故作樂三闋以 猗與那與,置我鞉鼓。 迎牲。 明 神惟三闋。 祭祀之禮 未合亨饋孰,故味未 聲音之號,所以詔告於天地之間 《大司樂》:「尸出 降 闋,止也。 神, 《商 〇凡正樂有四節 而 頌 奏鼓簡簡 後 殷人先求諸陽 那》之篇 迎 成 牲 樂三闋, 血腥,故臭 也。 人,奏《肆 , 衎我烈 樂 滌 爲 陽 蕩 然 而

射」在 鼓 謂 若然,則大禘、大祫降神有六闋 以下有四調,蓋其上二調 之琴瑟,九德之歌、《九磬》之舞,於宗廟之 徵,應鐘爲羽,路鼓、路鼗,陰竹之管,龍 樂》又云:「黄鐘爲宫,大吕爲角,大簇 之調與? 鍾 射 懌。」此 平、依我磬聲。 綏 中奏之。」此謂大禘、大祫之樂。 奏《肆夏》之三,而但言《肆夏》與?《大司 三闋,而但言「奏無射」,豈三奏皆用 升 歌 有斁,萬舞 我 《大司樂》「黄鐘」以下皆爲降神之樂,然 思成。 歌 「歌夾鍾」之上,降神之樂也。 夾鍾,舞《大武》,以享先祖。」 正祭之樂也。 也。 抑或舉其一以該其三,若尸 鞉 舞《大武》,合舞也。 有奕。 鼓淵 於赫 淵 湯孫 我有 《大司 嘒 亦用以 嘒 穆 嘉 管聲, 樂 穆 客, 矣。 \* 厥 故「黄鐘 降神與? 亦 「奏 聲 既 歌 不 疏家 奏 無 降 和 人 無 夷 門 爲 射 神 夾 無 庸 Ħ.

> 也。 以 而不 鐘鼓或笙管奏之,如尸人奏《肆夏》之比 有九德之歌、《九 大司樂》言「奏無射」,則降神之樂蓋止以 商 下, 頌》言正祭之樂詳 升歌、合舞也。 必非徒用以降神者矣。 有琴瑟與 管,則升歌、下管之器也。 磬》之舞, 《大司樂》「黄鐘爲宫 ,方降神之樂略。 則 合舞之事 又

『薦』。」○今按" 羶,如字。 閣。 屋,故既奠然後焫蕭合羶、薌。 達於淵泉。 周 迎牲,致陰 《釋文》:「鬱,字又作 人尚 羶,依注音馨,許經反。 臭,灌 氣 灌 也。 用鬯 以 『影』。 圭 蕭 臭,句。 璋,用玉 合黍、稷,臭陽達 薌,音香。」〇鄭注:「奠,或爲 焫,如悦 鬱合鬯,句。 氣 反。 也。 凡祭慎諸此 合,如字,徐 既 灌 於 臭 然 牆 後 陰 音

奠,謂 已乃迎 鄭氏 曰:「灌,謂 薦 牲 孰 於庭 時、特性饋食禮 殺之,天子、 以 圭 瓚 酌 》所 諸 鬯 始 侯 云『祝酌 之禮 獻 神 也。 也 奠

先求諸 之鬯。 柜鬯也 用玉 氣也。 以 圭璋亦用臭之義也。 圭 知當 稷 于 者,燔燎之氣上升也。 達之深而足以感乎死者之體魄也。 者,酒醴之質下潤 之酒, 煑鬱金香草以和合之也。 曰:「饋 香蒿 之高而足以感乎死者之魂氣也。 一璋者,灌鬯盛以 燒 鉶 氣 饋 南 之。 灌用 陰 者、玉氣潔潤、言非但鬱鬯是用臭、 鬱,鬱金,香草也。 孰 合於黍、 熟 是也 也。 釀黑秬 時。」 有黍、稷,此 詩云: 鬯臭,言灌地降神用秬鬯之香 蕭,香蒿 蕭 稷 黍 愚謂:臭,香氣也。 玉 也。 而 取 薌 爲酒,芬芳鬯達,故謂 瓚,以圭璋爲之柄也。 既灌 燔之也。 蒿 蕭 也。 云『蕭合黍、稷』,故 達於牆 達於淵泉,言其所 也, 祭 鬱合鬯, 言秬鬯 然後迎牲,周人 蕭 脂 染以脂 合黍、稷,謂 屋,言其所 曰「臭陽」 曰「臭陰 灌用 合黍 既奠 孔 鬯, 氏

> 《周禮 慎諸 羶、薌 焫蕭 時尤致其慎也。 鬯,所以求諸陰。 稷」,下言「合羶、薌」,互相 蕭合羶、薌,迎尸 入室,亦先設饌 侯之祭,朝踐時事尸於堂,朝踐 時,設饌饗神,「祝酌奠于鉶南 鱻 謂 然後 [鬯,受祭之,啐之,奠之。] 此别無他據 奠爵 羽,●膳膏羶」,是也。 此者,周人尚臭,故於此灌 焫 合羶、薌,并有黍、稷,上言「合黍、 , 牛羊腸 · 庖人》「春行羔豚、膳 蕭 於 鉶 合 羶 南 間 也。 薌 ○鄭氏《小宰》注云:「凡 於室而 脂 入室 焫 此 焫 也。 蕭 明 所 而 酌 燒 焫 《特牲禮》尸 羊膏羶,牛 以 行饋 酒奠之,然後 也。 蕭之節 備也。 求 諸 膏 孰之禮 薌 禮畢,尸未 與焫 陽。 薌; 天子、諸 與 也 灌用鬱 膏 香 未 秋 蕭 凡 也 薌 同 之 焫

酒、啐 則不 其 法 飲、故注之於同而祭之飲之、此飲鬱鬯之 酢。」同,爵名。 咤。」又云:「大保 卒爵而 爵,而云「卒爵」,則尸於鬱鬯亦卒爵,賓 門」章云:「卒爵 獻 數之外者也 不 蓋 大饗,始皆有裸,其 顧 見《特 也 無 餘 也 知 命》云: 但啐之而已也。 ,不與祭饌並設,而在獻數之内者也 鉶 幽 子 酒 圭 南 在 爵 酢 、奠鱓」,遂據以 牲禮》尸人, 瓚 耳。 之觶 瓚 主人,則尸卒爵亦 受五 「王受同、瑁,三宿、三祭、 ,則但當啐之而已; 仍 飲鬱鬯之法,見於《顧 奠也,與 蓋 陳 升 而樂闋。」此爵即裸 圭 於 受 既 禮當 費口 尸 宗廟之大饗,賓客之 舉鉶 同, 祭饌 前 以 相放。 推受裸之禮 注 徑八寸, 以 故《典 南之奠觶,「 於同 當 並 異 酢 設, 司 鬱鬯之裸 前一 、瑞》云: 者飲之, 王 秉 不 而 獻 賓 璋 可 命 但 在 耳 飲 之 人 以 以 獻 獻 祭

美文王 後。 也。 以 射,以享先祖」,則 也。 也 氣 此則尸祭之、啐之而 陳之也。 有 魂氣歸 而 而 裸圭有 求諸陰爲先也 知 後 歸 以 君饋孰之始、鉶南之奠 虞氏之尚 下文所謂「舉斝、角、韶妥尸」, 《祭義》云「建設 灌 求諸陽爲先也。《大司樂》言「奏 于天,形 故祭祀之義,求諸 殷人先求諸陽,周 也 於天者,陽也。 也。 而 "費,以 或言「肆」,或言「裸」,互見之爾 曰「奉璋峩峩」,則殷未嘗 周 氣,亦所 馬 魄 人先求諸 肆先 氏 歸 晞 于 周 殷 王,以 孟 地 不飲者也。 朝 以 未嘗無降神之樂, 人 陰 ,故祭,求諸陰 形魄 人先求諸 事 求 先求諸 陰,先灌 陽 以以 裸賓客。」肆 諸 亦 而 歸 有 陽。 酌 報 己。 虞氏 於地者,陰 陽 於 氣 陰 而 先作 不 費。 也, 後 棫 尚 言 不 是 作 陽之 説見 灌 樸 也。 則 樂 樂 無 而

義

魂

미

記 集 解

七五

八

殷人 其 求 殷 氣 人從而文之,故尚臭。 意各有所主 諸 ,謂之尚聲,謂之尚臭,皆以始言之,而 X 先 陽 從 ,則知有 求諸陽,非不求諸陰也。 而文之,故 也。」 虞氏之用氣,非不 尚聲。 周人既 殷 人 既 求 尚聲, 諸 用 謂之尚 陰,又 味 也。 周

直 音餘。」 曰 於彼乎,於此乎? 詔 求 祝 祭祝于主,索祭祝于祊。 諸 於 室、坐尸於堂、用牲 遠者與? 《釋文》:「遠人,徐于萬反。 或諸遠人乎? 於庭,升首於室 不知神之所在 祭于祊尚 與

小異。 室,即《禮器》云「血、毛韶於室」 也 此 行朝踐之禮,即《禮器》云「設祭於堂」也。 ),與《禮器》「納牲詔 因上文言「求諸 謂 韶祝於室 既告殺,尸 謂 陰陽」 出 初殺牲時 於庭」 坐於 而 户 備 西,南 章 言求 以 也。 語 幣告神於 神之法 意 面,而 坐尸 大 同

此。 求焉, 也。 也。 也。 首於室 孰 肝 以 於主 用 牲膟膋,燎于鑪炭,洗肝于鬱鬯而燔之,入 庭至祊,而祊 釋辭於門外之祊,即《禮器》云「爲祊於外 索,求也。 朝事 所謂 ,乃更延主于室之奥,尸來升席,自北 韶神於室,又出以墮于 牲於庭,謂納 此時尸 以不 也, 直祭祝于主,謂 尚,庶幾也。 庶幾 ,延尸於户西 謂 詔 『制祭』也。 亦《禮器》「設 知神之所在,故其求之之徧 索祭祝于祊,謂 其 殺 於庭」也。 出 爲 可 牲 在堂,薦腥之前也。 牲於庭而殺之, 以得之與? 最遠,於至遠之所 而 自室至堂,自堂至庭,自 升 ,南面,布主席東面, 時尸 正 其首 此 行祭禮,則祝釋 祭於堂」之事 時尸 薦以 主,主人 l於室 求神之時,則 尚 籩 〇 鄭 中 即《禮 在 豆豆 北 親 氏 而 室 直,正 至. 制 無 墉 日 也 取 不 如 祝 升 方 其 下

之,謂之制祭,鄭於《禮器》及此注皆言之。 之尸、主不 北 謂 西,或南或北,参差淆雜,必無是禮 面 上之位以南 面 坐于主北焉 禮運》疏爲 也。 則 昭昭 之時 戶、主同面,不應在堂 南 在 在饋孰 又坐 ,尸出於室,大祖之尸坐於户西 東,穆在西,主皆在其右。」此 面 主 同 是。 於 面 面,則 時,不在朝踐,制祭乃 户 爲 東 尊,不 朝踐 西 画。 愚 一,謂 謂 群 燔 然尸 應 尸 廟之尸、主或 大祖之尸 《禮運》 膟膋,及洗肝 人全 南 一時獨 面 亦 也 異 時 而 云 : 主 坐 漢禮 當 東 注 反 而 大 且 於 南南 以 祭 或 祖 東 堂 則 朝 主

大也。 古雅 也。 祊之爲言倞 反。 首也 尸,陳 相 】者,直· 息 亮反 也,肵之爲言敬也。 也。 也。 長, 《釋文》:「倞,音諒。 直 相,響之也。 良 反, 徐 知 兩 反。」〇 富 嘏,長 肵音祈。 也 者 鄭 「, 福 注 也, 嘏

於經

亦無所

見

也。

説詳《禮器

蕭

或爲『犆』。」 惊,或爲「諒」。 富也者,福也,或 曰『福也 者,備也」。

直

孔氏 致多 此尸 響此 有肵 鄭氏 嘏 嘏 牢 稼 反置 主人受祭福 首祭也。 有 , 戸 心舌 辭 富 于 辭 俎,此 饌 日: 「: 曰:「《特性》、《少牢》尸祭饌訖,祝取 此 于 神象,當從主訓之,言『陳』非 H 福 有 答拜, 也 載 也。 眉 肵 無 富 訓之也。 相,謂 者,《 俎 于 疆 **倞猶索** 訓 壽 X 《特性 肵 執奠, 于女孝孫,使女受禄于天, 日嘏 也。 萬 君 俎 少牢》云:『皇尸 是主人敬 年, 詔 則 ,設于饌 也。 富也者,福也,人君嘏辭 饋食禮》曰: 首也者,直 此 祝饗。』嘏,長也,大也, 侑 勿替引之。」此 福 訓 也。 肵 慶 也。 尸之俎 北,尸 也者,敬也,爲 詔侑 之 尸 也 辭 尸者, 或 每 『主人拜妥 訓 命工 也。 更 詁 食牲 是大 也。」 所 名 爲主 祝 人君 欲 以 夫 故 使 升

之道 取 主 毛、血、告幽 也。 膟 神 胖耳,惟 也。 欲其 爲 也 也 百 | 脊燔 神無 也 一,大也,言福之長久而 者 福 直,正 祭黍、稷加 [,倞也,此因上文求諸遠之義 體之正 長久廣大 ,如幾如式」,是也 楚茨》云『永錫爾極 血 燎 形 首則全升之,故爲體之正。 全之物也。 祭,盛氣 也 而尸陳見,故曰「尸,陳 升 首 嘏,長 也。」 牲體 肺、祭齊加 報 也。 陽 載之尸俎者 也,大也, 愚謂: 告幽全之物者,貴 也 祭肺、肝、 廣大也。 直 時 明水, 釋 倞, 遠. 正 萬 文》: 尸嘏 時 也。 心,貴 報陰也 尸以 億 也 而釋 「齊,才 但 也 嘏,長 主 言首 其 1 之 象 右 祊 爾 純

反,下『涚齊』同。 毛、血 所 内之無 謂 謂 血 所 毛 初 傷 膟,音律。 殺 詔 牲 於 毛 室 時 以 膋,力彫 取毛、 告全,表其外之無 也 反。 血 血 以 以 告尸 告幽 於室 表 其 所

腸間

脂

也

取

膟

**脊**烯僚

即

所謂

「焫

蕭

之祭肺 以 表氣 也。 時 之,猶貴肩賤髀之義也。 藏 以從獻,心載於肵 雜 肺 謂之舉肺,尸之所用 陰」意不合。 肺、肝、心在前,故貴之,脾、腎 血 豆間之祭,疏以「綏祭」解之,與《記》言「報 而 也。 氣主言之。 魄 氣 非 0 也。 謂 陽 旧 加 而 純 此所謂祭,皆謂 告幽 明 離 爲 ,尸之所 謂 氣 祭肺、肝、心 水 氣主 肺 内 不 謂 也 又 外皆善也 肺 可 牲之五 心心 設 所 有 見 用 祭 以 Ŧi. 離 肝 俎 而 以 齊 以 明其 齊 肺 亦 也。 陰 者 藏 祭者也。 謂 以 食者 薦之於尸,非祭於 與 陽 有 貴 明 惟 氣之盛 血 祭黍、稷 肺 肺 相 以 刌 也 水 用 氣 載 資 相 五. 配 肺 在 其 主 於正 故因 附 盛氣 齊 之也 也。 此 刌 三者, 後 者 言謂 著 獻 離 肺 云 俎 故 於 亦 肺 饋 故 肺 血 血 謂 开 加 孰 賤 皆 以 膟 P 亦 以 取

也,故 之初 可以 踐 云: 在堂,而 以告於室也 牲》云:「毛、血告幽全之物也。」又曰 燔 爲 合羶、薌」也。 **祊**乎外。』《郊特 蕭合羶、薌。」又云:「取膟膋燔燎。」《祭義 毛。」《禮器》云:「血、毛詔於室。」《郊特 蕭合黍稷,臭陽達於牆屋,故既奠然後焫 血 战時,而 陽 療、升首,不可 祭,盛氣 「燔燎羶、薌,覸 「索祭祝 也。 飲食 體 日一報 燔 魄 祭血有二時矣。 而注疏 而 燎 爲 陽」。 也。」此皆謂初 以 于 有 陰。 升首, 味饗神者也,故 而注疏 祊。」《祭統》: 牲》云: 二時矣。 或以爲 以飲食,而以 ○《禮運》云: 黍稷、牲體 以 謂升首於室也 或以爲在室,或以爲 蕭光。」此 「祊之於東方。」又 饋 《禮器》云 孰 《郊特牲》云: 殺 時,或 牲 酒 日 「韶祝於室 時 氣歆神者 「薦 皆謂饋 報 醴 取毛、血 以 之屬 其 陰」。 魂氣 爲 「爲 血 孰 朝

明水 明水涚齊,貴新也。 也 君 鋭反,又作「涚」。」○鄭注:「涚齊,或爲「汎齊」。」 服服 或以 再 酒 謂 乃 申明水之意。著,成也。 潔 齊之義,言主人之所以 之,謂之说。 **涚猶清** 此皆先儒繆誤之説所當辨正者也 而 以敬鬼神也。 ,皆爲貴其明潔也。 明潔也。 也 出 成,以見所謂新 拜稽首,肉 也。 爲 於 由主人之絜著此水也。《釋文》: 也。 正 祊。」 此皆謂 拜, 祭,或以爲繹祭,而 祭祀取明水於月,及涚五齊之 凡酒 服 涚齊,謂 袒 也。 親 「其謂之明水也」以 初成必濁,以清者和 者之不 凡说,新之也。 割,敬之至 正 稽首,服之甚 五齊皆涚之也。 祭 凡说,新之也,釋说 **涚此** 求 徒在 主人齊潔,此 神 酒者,致其 祊有 也。 乎外 也 二名矣。 其 也。 而 敬之至 也 「説,始 、謂之 注 而 水 又 疏 肉 新 沸

衵

,服之盡

也

是服之竭盡 者是服順於親也。 順於親也。拜,服也,又釋『再拜』之文,拜 孔 之甚極也。 首』之文,拜既是服,稽首,首至於地,是服 割,是恭敬之至極 文,言心雖内服,外貌不盡,今肉袒去飾, 氏 日 . 「言君 也。 肉袒,服之盡也,釋『肉袒』之 所以 稽首,服之甚也,釋『稽 再拜稽首,及 恭敬之至極 乃 肉 是 袒 服 親

某,謂國家也。 祭稱「孝孫」、「孝子」,以其義稱也。 稱曾孫

曾祖 夫。 故 孔氏曰:「祭稱孝孫,對祖爲言, 以 禰 爲言。 以 義 既有國、家之尊,不但祭祖、禰,更祭 Ŀ 而 ,但自曾祖以上,唯稱曾孫 稱 義,宜也。 孝也。 國,謂諸侯。 事祖、 禰宜 家,謂大 行孝道 稱 孝子, 而已,

祭祀之相,主人自致其敬,盡其嘉,而無

與

言己是曾重之孫。」

讓 也 儀之善。 敬,盡其善,故詔侑尸者,不告尸以讓,是 以揖讓之儀。祭祀之禮,則是主人自致 相 謂詔 侑 也。 庾 氏 敬,謂 蔚 日 内 心之肅。 「賓主之禮

嘉

謂

外

相

其

鄭注:「爓,或爲『腒」。」 其敬而已矣。《釋文》: 腥肆、燗、腍祭,豈知神之所饗也,主人自盡 「肆,敕歷 反。 腍,而 審反。二〇

其無所讓也。」

腥,腥 禮 故備用之以祭耳。 熟,豈知神之何所饗,但主人自盡其敬心, 腍, 皆體 E 解有七體: 》:「特豚,四鬄, 脊而爲七也。 腥 肉也。 肆」。 解 也。 爓,湯沈也。 殊左右 肆,剔也,謂豚解 祭祀 腥肉用豚 肩、髀 去蹄 或進腥 腍,熟也。 而 兩 解之法解之,故 ,或進爓,或進 爲 舶 脊。」 也。《 四, 又 爓 兩 蓋 ± 與 舶 豚 喪

后坐也。尸,神象也。祝,將命也。舉斝、角,詔妥尸。古者尸無事則立,有事而

時 之節明矣。 奠角 爵 鄭 者,蓋鉶 食,以享以祀,以 未食之先也。 坐,舉所奠之爵,則主人拜以妥尸 室,亦先於室中設饌 子、諸侯之祭,於堂上行朝踐禮畢,尸將 坐,主人拜妥尸 祭初設饌饗神,「祝酌奠于鉶南,尸入即 天子奠斝,諸侯奠角。」 至尊之坐,或 也。 氏 無 饌 祝則詔 曰:「妥,安坐也。 斝,殷爵名。 朝 南 之奠, 踐 人君祭自灌 雖 主人拜妥尸,使之坐。 時 《楚茨》之詩曰:「以 , 尸答拜, 執奠, 祝饗」。 有 不自安, 妥以 與 籩、豆,而 祭饌 感酌奠。 兀 (侑。」此 升日 尸 獻 俱 愚謂 則以 始入,舉奠斝若 始,饋 斝、角,所奠之 設 角。 俎 者 妥尸當 惟 拜 尸 《特性禮 也。 孰 腥 ,此饋 安之也。 人 乃 爓 尸即 灌 酌 饋 爲 即 天 奠 食 酒 食 席 席

之辭命 象之也 奠」, 禮 也。 所 也。 合亨、 尸 明殷、周以 時 也 以 末,禮節多 意 觶 也。 之禮也。 以 鉶 也 安之也。 者,蓋灌獻 也。 《特性禮 古者尸 此舉斝、角 要饌之成,故 尸人舉奠,蓋 南 饋 有事 也。 鄭 祭初,尸已 則 孰 祝,將 斝 來,尸 而 注《 ^ 尸,神象者,鬼 無 而 ◎《禮 惟 謂 爲時久,故恐尸之不安,而 少 事 俎 少 時之事耳,自饋 天子 命者,祝 拜 牢 乃拜妥尸,人君禮與士 即 飲食之事 則 牢禮 人室 簋、 以 運 禮 特 無事 妥尸,尸答拜」,乃「 公立,有 )》:「酸 饌多不可 執之,以示其饗之之 用之。 》尸不執奠,避人 籩、 》謂 而 亦坐 以 也。 坐,至 事 豆 神 傳 斝及尸君,非 酒 而 備 無 ,所以有拜 達主 言此 尊 周 後 偏 設 形 食以 此 要 立,分子 坐 執 人與 於是 乃 一,謂 河面 成 者, 拜 至 神 異 君 以 妥 夏 執 祭 妥 奠 拜 酒

則其爲 矣。 牢》、《特牲禮 相 卒飲以鬱人與量人者,蓋以嗣子舉奠食肝 以 飲 飲之。言「舉斝之卒爵」,以見其爲上 蓋鉶南之奠,至上嗣舉奠飲之,還洗酌入 人》:「凡宰祭,與鬱人受斝 而 特 而 成 見其 、受祭之、啐之、奠之,祭畢,則鬱人、量人 量人制從獻之脯燔,與鬱 牲 諸侯舉角、雖於禮無考、然斝、角連文、 也。 復奠之爵也。 禮》 與 諸 (爲尸 量 然則 侯 用 人受舉斝之卒爵而飲之。』《 禮 所祭所 以 》皆奠觶 天子酌 可 獻 知。 尸,是 歷與瀝同。 啐之餘 加 觶 奠用鬱鬯,於此可見 止 角 諸侯奠角也 爲 尊 人和鬱鬯,其事 也。 歷 栖 於解,故 而皆飲之。」 言「斝歷」, 爵 飲奠斝之 而角 一嗣 少 所 量 則

縮 鄭 酌 E 氏 用 『醴 茅 日 齊縮 明 謂 酌 酌。』五齊,醴尤濁,和之以明 沸 也 醴 齊 以 明 酌 也 司 尊

酒,惟 尊 也。」 中 酌 醴 用 筐筥之器 游之,以 義 制 **说酌,凡酒脩酌。」人君祭用鬱鬯、五** 彝、六尊之酌 事 則 酌者,事酒之上 酌 爾貢 茅 也。 久廢 齊 斟之以實尊彝。」 ,藉之以 彝》之文釋之以 酒沸醴齊也。不云『泛齊』者,與醴 事酒尤濁, 尤 藉 縮醴齊用茅者,取其潔白也 三酒 包茅不入,王祭不 凡酒 一,時 濁 沸 愚謂: 酒 人無有 茅,縮 人所共知 必 之器 新 縮 ^ 成必濁,用清者和之,又 鬱齊獻 五齊之中, 周禮 也。 而 去滓 能 謂 曉 去其 涚 知之者,故記者就 ,而鬱鬯、五 之縮 酌 人,此釋醴齊縮酌 之乃 酌, 也。 孔 猶 共 糟滓,謂之涚; 司尊 醴 醴 氏 棋 可 無 齊 春 齊 曰:「三酒之 也。 Ŧī. 酌 彝》:「凡 以 尤潤 秋 齊皆说 縮酌、盎 齊則自禮 縮 傳》 故 酒已沸 酒 故故 日 日 齊 齊 日 又 用 明 明 縮 司 六 而 之 口 以 齊

者,成 也。 差清。 也 泛然,如今宜 齊、三酒」,鄭 酌 酒 滓沈,如今造清矣。 自醴以 而 一成而 也。 汁 者,言涚醴 清酒,今中山冬釀,接夏而成。」 滓相 而 昔酒,今之酋久白酒 事酒,酌有事者之酒,其酒則今之醳 紅 翁翁然葱白色,如今酇白矣。 將,如今恬酒矣。 赤,如今下酒矣。 成醪矣。 氏 齊用 云: 事 「泛齊者 酒 醴齊, 也。 上尤濁,盎以下 所謂 沈齊者,成 盎齊,盎猶 成成 醴 ○《周 猶體 而 禮 舊 滓 也,成 醳者 **※** 五 醍 浮 泛 而 齊 翁

醆酒涚于清。

其 盎 氏 齊 此  $\Xi$ 差清 日: 必 齊差清,和之以 釋《司尊彝 和 盎 一謂 以 齊 **醍齊、沈齊** 和 清 沸酸 以 酒 》「盎 者 清 酒 ', 皆 酒 以 清 齊涚酌」之説 而 清 ,游之與 酒, 久味 後沸 酒 **沸之而** 也。 相 之,不用 醆 得。」 醆 酒 己。 酒, 也 同。 盎 孔 沸 以 氏 盎 鄭

「莎」,素何反。」 "琴文》:「汁,之十反。 獻,依

注

爲

莎,齊 盎 氏 此 不以三酒泲秬鬯者,秬鬯尊 日 : 齊 釋《司尊 ,摩莎泲之,出其香汁,因 語 聲之 謂 彝 沸 誤 》「鬱 秬 也 鬯 齊 以 秬 獻酌」之説 醛 鬯 酒 中 也 也 有 謂 煮 獻 也 之汁 鬱, 當 和 讀 以 爲 鄭

注讀爲釋,音亦,徐詩石反。」猶明、清與醆酒于舊澤之酒也。《釋文》:「澤,依

清酒 酒 鄭 之酒者,爲 矣」,就其所 天子、諸 『若今明酌 作《記》之時 謂 氏 沸 曰:「猶, 昔 汁 侯 酒 清 獻 也 其 禮 知 以 若也。 廢, 味 明 以 酒 醆 沸 厚 酌 與 曉 時 酒 醴 腊毒 之 醆 清 人或聞 ,天子、諸 齊以 酒 澤 也。 酒 也。 讀 以 與 明 沸 爲 醆 舊 此 酌, 沸 醳。 清 醳之酒 酒 而 侯 孔 酒 皆沸 不知 之禮 醆 舊 氏 以 舊 沸 酒 醳 於 日 云 也 之 之 醳 以

最薄。 薄 則反是。 涚於厚者,而作記時以清酒涚於舊醳之酒, 西襄 者 醳 復本之義 接夏而 之酒 说之,以殺其毒,與他涚酒之意異 釀 沸 則 酒 昔酒 味 之事。」 蓋爲清酒味過厚,故用昔酒之稍 成、味最 也。 厚。 古禮 爲 事酒 酋久白 味 廢亡,就 薄 愚 厚。 謂 因 者 酒,味差厚。 **泲酒之法**,皆以薄者 事 尊 今日 凡酒 味 而作,成最 所知,以 厚者卑,反古 谏 西襄 則 清 也 速,味 味 曉 酒 薄 冬 古

祭有 注作『弭』,亡妣反。」○方氏 祈焉,有報焉,有由 「辟」讀婢亦反 辟焉。《釋文》:「辟,依

爲弭, 鄭氏 也。 類是也。 曰:「欲彼之有予 噫嘻》『祈穀於上帝』、《載芟》『祈社稷』之 報,謂若 曰:「祈猶求 謂 弭 因彼之有施也,故有報以反之, 災兵,遠 穫禾 ,也,故 也。 報 社。 罪 謂 疾 有 由,用 祈 也。 祈 福祥,求 以 求 也。 方氏 之。 辟 永 若 慤 讀 貞

> 《禮器》言『祭祀不祈』者,彼之所言,蓋 若《月令》之『磔攘』『開冰』,而 己耳。此之所言,主爲民 非祭之常禮 矢以辟去不祥是也。於辟又言『由』者,以 稷』是也。 若《豐年》之『秋冬報』、《良耜》之『秋報社 慮彼之有來也,故有 可或有 所 以 而 也。」 用之故也。 用 辟 桃 以去之, 弧、棘 爲

見其所祭者。 齊之玄也,以陰幽思也。 故君子三日 齊, 必

裳。 幽 慮 陰之色,欲使稱其 夫、士齊服玄端、玄裳,人君玄冕、玄衣、玄 齊之玄,謂齊服玄冠、玄衣、玄裳也。 陰 專,故三日齊必 則收斂於内。 蓋玄者幽陰之色,陽明則發散於外, 見其所祭者 服 君子服以 以 專 思 慮於親 稱情 齊服 也。 出出 思

禮 記 卷二十六終 本焕法師

《儒藏》精華編惠蒙善助,共襄斯文,謹列如左,用伸謝忱。

智海企業集團董事長 馮建新先生

NE·TIGER 時裝有限公司董事長

張志峰先生

壹佰萬元

壹佰萬元

壹佰萬元

北京大學《儒藏》編纂與研究中心

本册責任編委 王豐先本 册審稿 人陳 殿



